



Dill' wen dill' Kob Çhe
Jesucrístona'

Cajonos Zapotec New Testament

Contents

Dill' wen dill' kob daa bzej Matewa'	1
Dill' wen dill' kob daa bzej Márcona'	51
Dill' wen dill' kob daa bzej Lúcaza'	81
Dill' wen dill' kob daa bzej Juanna'	133
Diika' ben postlka'	170
Kart daa bzej Páblona' na' bseleen lao ben'ka' nonlilall' Jesucrístona' yell Rómana'	219
Kart nech daa bzej Páblona' na' bseleen lao ben'ka' nonlilall' Jesucrístona' yell Coríntona'	239
Kart wchopi daa bzej Páblona' na' bseleen lao ben'ka' nonlilall' Jesucrístona' yell Coríntona'	259
Kart daa bzej Páblona' na' bseleen lao ben'ka' nonlilall' Jesucrístona' gana' mbani Galáciana'	271
Kart daa bzej Páblona' na' bseleen lao ben'ka' nonlilall' Jesucrístona' yell Éfesona'	278
Kart daa bzej Páblona' na' bseleen lao ben'ka' nonlilall' Jesucrístona' yell Filípoza'	285
Kart daa bzej Páblona' na' bseleen lao ben'ka' nonlilall' Jesucrístona' yell Colósaza'	290
Kart nech daa bzej Páblona' na' bseleen lao ben'ka' nonlilall' Jesucrístona' yell Tesalónicana'	295
Kart wchopi daa bzej Páblona' na' bseleen lao ben'ka' nonlilall' Jesucrístona' yell Tesalónicana'	299
Kart nech daa bzej Páblona' na' bseleen lao Timotewa'	301
Kart wchopi daa bzej Páblona' na' bseleen lao Timotewa'	307
Kart daa bzej Páblona' na' bseleen lao Títona'	311
Kart daa bzej Páblona' na' bseleen lao Filemónna'	314
Kart daa bse' to ben' lao ben' hebreoka', ben'ka' nonlilall' Jesucrístona'	315
Kart daa bzej Santiágon'a'	330
Kart nech daa bzej Pédrona'	335
Kart wchopi daa bzej Pédrona'	340
Kart nech daa bzej Juanna'	343
Kart wchopi daa bzej Juanna'	348
Kart wyoni daa bzej Juanna'	349
Kart daa bzej Júdaza'	350
Jesucrístona' bliile' Juanna' che diika' zi' gak	352



Dill' wen dill' Kob Çhe Jesucrístona'

New Testament in Zapotec, Cajonos (MX:zad:Zapotec, Cajonos)

Language: Zapotec, Cajonos

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2011 Wycliffe Bible Translators, Inc.

Copyright © 2011 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

e1d41d41-38c8-5f04-8f00-9c42f9997189

ISBN: 978-1-5313-0739-4

Dill' wen dill' kob daa bzej

Matewa'

Dii xoxzto' Jesucristona'

(Lc. 3:23-38)

1 Dga cho'en dill' nan Jesucristona' nake' xiin dia che dii Davina' na' dii Abrahamama'.

²Abrahamama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len ben' bisheeka'. ³Na' Judána' goke' xa Fáreza' len Zárana', na' xneeka' wlie' Tamar. Na' Fáreza' goke' xa Esróma', na' Esróma' goke' xa Arama'.

⁴Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'. ⁵Na' Salmónna' len Rahaba' gokgake' xaxna' Booza'. Na' Booza' goke' xa Obeda' na' xneena' wlie' Rut. Na' Obeda' goke' xa Isaina'. ⁶Na' Isaina' goke' xa Davina', na' Davina' goke' xa Salomónna'. Na' xna' Salomónna', beena' bikaa Davina', goke' xool dii Uríaza'.

⁷Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'. ⁸Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'. ⁹Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'. ¹⁰Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'. ¹¹Na' Josíaza' goke' xa Jeconíaza' len ben' bisheeka', legaken' zoa kana' bche'byen ben' Babilóniaka' ben' Israelka' lalle'ka'.

¹²Na' shlak ni zoagake' Babilóniana' golj Salatiela' xiin Jeconíaza', na' Salatiela' goke' xa Zorobabela'. ¹³Na' Zorobabela' goke' xa Abiuda', na' Abiuda' goke' xa Eliaquima', na' Eliaquima'

goke' xa Azora'. ¹⁴Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'. ¹⁵Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa Jacoba'. ¹⁶Na' Jacoba' goke' xa Joséna' ben' che Maríana', xna' Jesúza', beena' lekzka' nsi'gake' Cristo.

¹⁷Na' ka' gok wzoa shda' diaka' wzololenzan dii Abrahamama' na' biyollenan dii Davina'. Na' wde zi shda' diaka' bizzololenan dii Davina' axt ka bche'byengake' ben' Israelka' Babilóniana'. Na' wizak zi shda' diaka' bizolon ka bche'byengake' legake' Babilóniana' axt ka wzoa Crístona', beena' bsel' Chioza' inabi'e.

Ka golj Jesúza'

(Lc. 2:1-7)

¹⁸Ki gok ka golj Jesucristona': Xnee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e. ¹⁹Na' Joséna' beena' ba nakan ikeene', nake' to ben' chon ka cheeni Chioza', na' daa bi goklallee wsi'e Maríana' yel' zto' gok-ile' choonlalleene' ka kono gakbe'i. ²⁰Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene'.

—José, xiin dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e. ²¹Na' sane' to bi' byodo' na' wsi'ob' Jesús, la' leban' yislab' ben' yell cheb'ka' lao saaxya che'ka' kwenche bi kwiayi'gake'.

²²Gok yog' diiki kwenche gok ka wna dii beena' wdixjee daa goll Chioza'ne', chi'e:

²³To nool wew' wee, na' sane' to bi' byodo',

na' wsi'gake'b' Emanuel.

Na' Emanuel zejín: Chioza' zoalene' cho'.

²⁴Na' ka biban Joséna', bene' kon ka goll anjl che Xancho Chioza'ne' na' wkee

Maríana'. ²⁵Na' bi wdelle'ne' axt ki wx-
anche' bi'do'na', na' bsi'eb' Jesús.

Wyaj ben' sin'ka' jawiagake' Jesúza'

2 Jesúza' golje' yell Belénna', daa llia
gana' mbani Judeana', kana' chnabia'
Heródeza'. Na'ch bał ben' sin', ben' nsed
che beljka', za'gake' ka de gana' chla'lə
wbilla', llintegake' Jerusalénna'. ²Na'
che'gake':

—¿Gani rey che ben' Israelka', bi'na' ba
golj? Nezinto' ba goljb' la' ka de gana'
chla'lə wbilla' ble'into' to belj dii bza-
jniin neto' nan ba goljb', daan ba za'nto'
kwenche we'la'onto'b'.

³Na' ka beni Heródeza' daa wnagake',
gokshejlallee, na' lekzka' yog'lol ben'
Jerusalénka'. ⁴Na'ch Heródeza' goxe'
yog'lol bxozka' chnabia', na' ben'ka' chli'
chsedí ley che dii Moiséza', na' wnable'
legake' gan chiyał galj Crístona', beena'
wseł Chioza' inabi'e. ⁵Na'ch gollgake'ne':

—Yell Belénna' daa mbani Judeanan'
galje', la' kan' bzej to ben' wdixjee daa
goll Chioza' le', chi'e:

⁶Na' li', yell Belén llio' gani mbani
Judeani,
aga inacho nako' dii liizelozi bibi zakii
ladj yellka' zakii llia Judeani;
la' lawo'ni ichej to ben' inabi'e,
na' gap wwie' ben' Israelka', ben'ka' nak
yell cha'.

⁷Na'ch Heródeza', ka kono gokbe'zi
goxe' ben' sin'ka' na' wnable' legake'
batyen'an ble'gakile' belja'. ⁸Na'ch bselee
legake' Belénna' na' golle' legake':

—Li shaj, na' li lljadiljyoll bi'do'na', na'
kat' yillelileb' na' yidnale nad' kwenche
len' sha' llje'lawaab'.

⁹Na' ka biyoll goll Heródeza' ka',
na'ch wza'gake'. Na' belja' daa ble'gakile'
kana' zi' sa'gake', zexan xan yabana'
llialon lawe'ka', na' ka bllinan gana'
zoa bi'do'na', na' na'zə wzoan. ¹⁰Na'
ka bizle'i ben' sin'ka' belja', le bibagak-
ile'. ¹¹Na'ch ka wyoogake' loo yooná

ble'gakile' bi'do'na' len xna'b' Maríana'.
Na'ch bchek' xibe'ka' na' be'la'ogake'b'.
Na' wlejjake' or, na' yal zix, na' lekzka'
len nill' che to yag dii chla' zix daa le
mirra, na' be'gake'n cheb'. ¹²Ka biyoll
be'la'ogake'b', Chioza' bsi'nile' legake' lo
yel bishgal che'ka' kwenche bich yide-
gake' gana' zoa Heródeza'. Daan, bika-
gake' nez yoblə ziyajgake' lalle'ka'.

Bxonjgake' wza'gake' Egíptona'

¹³Ka wde biza' ben' sin'ka', to anjl che
Xancho Chioza' bli'lawe' Joséna' lo bish-
gal che'na' chi'ene':

—Wyas, na' bche' bdo'na' len xna'baa
na' li shaj gana' mbani Egíptona'. Na'
na'z soale axt kat'ch inia' li' yiza'le.
La' Heródeza' yiyilje' bdo'na' kwenche
wite'b'.

¹⁴Na'ch lii wyaste Joséna' na' bchi'e
bdo'na' len xna'baa, na' wal-lə wza'gake'
zejlengake'b' gana' mbani Egíptona'.
¹⁵Na' wzoagake' na'zə axt ka bllin lla
wit Heródeza'. Na' daa gok ka', gok
ka goll Xancho Chioza' to ben' wdix-
jee daa golle'ne', kana' wne': “Nad' binia'
bi' cha'na' kwenche biza'b' gana' mbani
Egíptona'.”

Ben Heródeza' mandad witgake' bi'do'ka'

¹⁶Na' ka gokbe'i Heródeza' bi ben ben'
sin'ka' ka golle' legake', le blee. Na' bene'
mandad witgake' yog'lol bi' byodo'ka' lle'
yell Belénna' len yellka' ndil nllagan,
bdo' cheenka' axt bi' chop yizi, bsakee ka
to yizka' ba gok ble'i ben' sin'ka' belja'.
¹⁷Na' daa bengake' ka', gok daa wna
dii Jeremíaza', beena' wdixjee daa goll
Chioza' le', ka wne':

¹⁸Kwe' wbell na' gakyeshii ben'ka' lle'
yella' le Ramá.

Noolka' nak xiin dia che dii Raquela'
ni to kono cheengakile' gonxenlall'
legake',
daa wit bi'do' che'ka'.

¹⁹Na'ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptoná', na' chi'ene':

²⁰—Wyas, biche' bi'do'na' len xna'baa na' li yiyaj gana' mbani Israela', la' ba wit ben'ka' cheengakile' witgake'b'.

²¹Na'ch wyas Joséna' na' bichi'e bi'do'na' len xna'baa na' biyajgake' gana' mbani Israela'. ²²Na' ka wnezi Joséna' Arquelawa' ba chnabi'e lo laz dii xe' Heródeza', na' bllebe' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'. ²³Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii ben'ka' wdixjee daa goll Chioza' legake' kani'yi che Jesúza', wnagake' wsi'gake'ne' ben' Nazaret.

Juanna', beena' bchoa ben' nisa'

(Mr. 1:1-8; Lc. 3:1-9, 15-17; Jn. 1:19-28)

3Na' do kana', Juan, beena' bchoa ben' nisa', wyaje' to latj gana' bibi chashj chleb gana' mbani Judeana', na' wdixje'ile' ben'ka' chdi'a chllag na', ²chi'e:

—Li yiyaj yileni dii malaka' chonle, la' ba bllin lla inabia' Chioza', beena' zoa yabana', loo yichjlall'do'lena'.

³Na' dii Isafaza', beena' wdixjee daa goll Chioza'ne', wne' che Juanna':

To ben' gosyee to lo latj ga bibi chashj chleb, na' ine':

“Li se kwas wzenagle che Xanchona' na' wsalj yichjlall'do'leka' kat' zee.”

⁴Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa. ⁵Na' ben'ka' lle' yell Jerusalénna', na' doxen gana' mbani Judeana' na' yellka' llia gaoz yao Jordánna' jazenaggake' dillaa cho'e. ⁶Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

⁷Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—Le' naklikzle ka bel znia! ¿Achakile wak wxonjile' yel' zak'zi' daa wsel' Chioza'? ⁸Li gon ka gakbe'i ben' nan dii li ba biyaj bilenile. ⁹Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abrahamama'.” Dii li nia' le', axt yajki wak gon Chioza' xiin dia che dii Abrahamama'. ¹⁰Yog'lol-le shi bi chonle ka chiyoolallii Chioza' na' gak chele ka chak che to yag dii chbia dii zix dii bi chak wen, na' lii chchogtegake' axt xanin na' chzal'gake'n lo yi'na'. ¹¹Dii li nad' chchoa' le' nisa' daa chiyaj chilennile, per beena' zi' za' kollaana' napche' yel' wak xench ka nad', na' ni bi zaka' kak' xmose' kwenche galj' xele'na'. Len' gone' ka yidsoa Espíritu Sántona' loo yichjlall'do'lena', ka le' chiyaj chilennile', na' ben'ka' bi chiyaj chilenni wzalee legake' lo yi' gabila'. ¹²Na' gone' che ben' yell-lioni ka chon beena' nox' yag xozaa daa chpa'ile' trígona' na' kooshawee trígona' na' wzeye' beb cheyinna' lo yi'na' daa biga yiyolkzə.

Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

¹³Na'ch wza' Jesúza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'. ¹⁴Na' ka blline', bi nan cheeni Juanna' wchoe'ne' nisa', san chi'ene':

—Li'lan chiyal' wcho' nad' nisa', na' li'lə za'zo' kwenche wchoa' li' nisa'.

¹⁵Per Jesúza' golle'ne':

—Ben goklen bchoa' nad' nisa' la' chiyal' goncho ka nak daa nllia Chioza' bia' goncho. Na'ch bchoe'ne' nisa'.

¹⁶Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espíritu che Chioza' chetje' ka to palom na' jsoalene' le'.

¹⁷Na'ch bengakile' shii Chioza' zoa ya-bana' chi'e:

—Beenin nake' Xiin', beena' chakid', na' le chibaid' le'.

Goki dii xiwaa gonan ka wzenag Jesúza' cheyin

(Mr. 1:12-13; Lc. 4:1-13)

4 Na'ch Espíritu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

²Na' ka wde choa lla choa yel bibi wdawe', na' wdone'. ³Na'ch bllin dii xiwaa kwite'na' gollan le':

—Shi leilo' nako' Xiin Chios, ben ka yiyak yajki yetxtil.

⁴Na'ch goll Jesúza':

—Cho'a xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban.”

⁵Na'ch dii xiwaa bche'n le' Jerusaléna' daa nak yell che Chioza' na' blepan le' yichj yoodo'na' gana' nak sib wal. ⁶Na'ch gollan le':

—Shi leilo' nako' Xiin Chios, lla bixit'shki ni. La' Cho'a Xtill' Chioza' nan: Wselee anjl che'ka' gap wwiagake' li', na' gox'gake' li' kwenche ki koo wchewo' yajka'.

⁷Na' goll Jesúza' len:

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenchezə xenlalloo shi gone' ka ba wne'.”

⁸Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyinka'. ⁹Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

¹⁰Na'ch goll Jesúza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

¹¹Na'ch biza' dii xiwaa kwit Jesúza' na' bllin bal' anjlka' be'gake'ne' kon bi byalljile'.

Wzolo Jesúza' choe' cho'a xtill' Chioza' gana' mbani Galileana'

(Mr. 1:14-15; Lc.

4:14-15; 5:1-11; 6:17-19)

¹²Ka beni Jesúza' wloogake' Juanna' lillyana', bizee biyaje' gana' mbani Galileana'. ¹³Na' bizee yell Nazareta' na' jazoe' yell Capernaúma', to yell xen dii lla cho'a nisdona' gana' mbani yell-lio che dia che dii Zabulónna' na' dii Neftalína'. ¹⁴Na' daa jazoe' na', gok ka wna dii Isaíaza', beena' wdixjee daa goll Chioza'ne', daa wne':

¹⁵Ka nak yell-lio daa naki che dia che dii Zabulónna' na' dii Neftalína',

daa lla shlaa yao Jordánna', gana' xoa nez daa zej cho'a nisdona' daa lla gana' mbani Galileana',

gana' lle' zan ben'ka' bi nak ben' Israel,

¹⁶ben'ka' lle' na' gok yichjlall'do'eka' shgasj shchoj,

na' Chioza' ba bselee to beeni' xen lawe'ka'.

Lao ben'ka' lle' gana' chnabia' yel' wita' ba chzeeni' beeni' che Chioza'.

¹⁷Na' wzolo Jesúza' chyixje'ile' ben' cho'a xtill' Chioza', chi'e:

—Li yiyaj yileni dii malka' chonle, la' ba bllin lla Chioza', beena' zoa yabana', inabi'e loo yichjlall'do'lena'.

Wlej Jesúza' tap ben' wxen bel' kwenche gongake'ne' txen

(Mr. 1:16-20; Lc. 5:1-11)

¹⁸Na' ka zej Jesúza' cho'a nisdona' che Galileana' ble'ile' chop bish' ben' wxen bel' chzal'gake' yixja' loo nisa' chzen-gake' bel'a'. Toe' le Simón na' lekzka' nsi'gake'ne' Pedro, na' beena' sto lie' Andrés. ¹⁹Na'ch Jesúza' chi'e legake':

—Li da, dino nad', na' kon ka chonle naa chbejle belki loo nisi, ka'kzan gonle yibejle ben' lao dii mala'.

²⁰Na' ka golle' legake' ka', lii bkwaan'tegake' yixj che'ka' na' zejlegake'ne'.

²¹Na' zi lat'chga wza'gake' bizle'i Jesúza' zi chop nash' ben', beena' to lie' Jacobo na' beena' sto lie' Juan, ben'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' belka'. Na' lekzka' goll Jesúza' Jacóbona' len Juanna' shajlengake'ne'. ²²Na' lii bkwaan'tegake' barkwa' len xe'ka' na' janogake' Jesúza'.

Jesúza' chli' chsedile' ben' zan

(Lc. 6:17-19)

²³Na' wda Jesúza' yog' yellka' lia doxen gana' mbani Galileana', chli' chsedile' ben' Israelka' gana' chdop chllaggake' choe'lwillgake' Chioza', cho'e dill' wen dill' kob che yel' wñabia' che Chioza', na' biyone' yog' ben' che'i wde wdeli yillwe'. ²⁴Na' doxen gana' mbani Síriana' wze dill' daa chon Jesúza', na' jwa'gake' yog'loj ben'ka' che'i wde wdeli yillwe', ben' chey chla, ben' yoo dii xiw', ben' chaz shon, na' ben' net ni'a nee. Na' Jesúza' biyone' legake'. ²⁵Na' ben' zan inlleb jano le', ben'ka' lle' yellka' mbani Galileana' na' yellka' mbani Decápoliza', na' ben'ka' lle' yell Jerusalénna' na' yel-lka' sto mbani Judeana', na' ben'ka' lle' yellka' lia shlaa yao Jordánna'.

Dill'ka' be' Jesúza' lo yaana'

5 Ka ble'i Jesúza' ben' zan ba no-gake'ne', na'ch wyep'e' to lo yaa, na' wchi'e. Na'ch ben'ka' nakgake'ne' txen jbig'gake' kwite'na'. ²Na' wzolo Jesúza' chli' chsedile' legake', chi'e:

Ben'ka' zoa mbalaz

(Lc 6:20-23)

³—Chakomba ben'ka' chakbe'gakile' chyaljgakile' gaklen Chioza' legake', la' legaken' yillingake' yabana' gana' chñabia' Chioza'.

⁴Chakomba ben'ka' chbellyesh', la' Chioza' yizoe' legake' mbalaz.

⁵Chakomba ben'ka' nak ben' gaxjlall', la' wllin lla Chioza' wi'e legake' yell-lioni.

⁶Chakomba ben'ka' chzelall' gaggake' ben' li ben' shao', la' Chioza' in'e nakgake' ben' wen lawe'na'.

⁷Chakomba ben'ka' chiyeshii ben', la' ka'kzə yiyeshii Chioza' legake'.

⁸Chakomba ben'ka' nxi nyech yichjlall'do'eka', la' legaken' ile'gakile' Chioza'.

⁹Chakomba ben'ka' chon to dii byen soalen ljwellgake' mbalaz, la' ina ben' dii likzan nakgake' xiin Chios.

¹⁰Chakomba ben'ka' chiya dii chen chle'i daa chongake' ka cheeni Chioza', la' legaken' yillingake' gana' chñabi'e.

¹¹Chakomba le' kat' chiya dii na ben' chele na' chiya dii chongakile' le', na' kat'ka' chiyijlall'gake' bittezə dill' wxiye' chele daa chonlilall'le nad'. ¹²Li yiba yizaki, la' yabana' gaple to dii wen dii shao'. La' ka chongakile' le' naa, ka'kzan bchi' bsak'gake' kani'yi dii ben'ka' wdix-je daa goll Chioza' legake'.

Nakle ka zed' na' ka beeni'

(Mr. 9:50; Lc. 14:34-35)

¹³'Len' nakle ka zedaa ladj ben' yell-lioki. Zedaa, shi bich zxi'n, aga wakch yiyonchon zxi' ni bich gak wchinchon, na' chchoonchon gana' wlej wshoshj ben' len.

¹⁴'Len' nakle ka to beeni' ladj ben' yell-lioki. To yell dii lia to lo yaa, zit'lə nla'n, na' bi ngashaan. ¹⁵Ni biga zoa to ben' chxene' kandila' na' chdose'n to dii wk-washaan len, san chzoe'n sibə kwenche

wzeeni'n doxen loo yoona'. ¹⁶ Ka'kzan le', li gon to dii byen gonle daa nak wen kwenche ile'i ben' na' we'la'ogake' Xacho Chioza' zoa yabana'.

**Jesúza' cho'e dill' che
ley che dii Moiséza'**

¹⁷ 'Bi gakkzile bid' kwenche yikwas' ley daa bzej dii Moisézan' wa daa bli' bsemi dii ben'ka' wdixjee daa goll Chioza' le-gaken'. Bi nakan ka', san bid' kwenche yiyoll gak yog'lo' ka na leya' na' daa bli' bsemi ben'ka' wdixjee daa goll Chioza' le-gake'. ¹⁸ Dii li nia' le', shlak bin' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gach yog'lo' daa bliie' bia' gak. ¹⁹ Daan, nottezə ben' chyishje' to daa nllia Chioza' bia' goncho, la'kzi dii bi lliatotek, na' shi wliile' ben' yoblə gone' ka chone', bitek bi zakee yabana' gana' chnabia' Chioza'. San beena' gon daa nllia Chioza' bia' goncho na' wliile' ben' yoblə gone'n, beenan' gake' to ben' zakii yabana' gana' chnabia' Chioza'. ²⁰ Na' nia' le', aga wak yillinle gana' zoa Chioza' chnabi'e shi toz ka chonlenle fariseoka' na' ben'ka' chli' chsedi leya', chiyal' wzenagchle che Chioza' aga ka legake'.

**Bi chiyal' wito ben'
(Lc. 12:57-59)**

²¹ Na' lekzka' che' Jesúza' legake':
—Nezkzile goll dii Moiséza' dii xozxt'ochoka': “Bi chiyal' wito' ben'. La' beena' wit to ben' chiyal' guete' daa bene' ka'.” ²² Per nad' nia' le', nottez beena' chllée bish' ljwelle'na' chidolee tie' lo ye' zak'zi'na'. Na' lekzka' beena' chzoazi'yee bish' ljwelle'na', ben'ka' chnabia' chiyal' wwiagake' nak gongake' che'; na' beena' chnie' bish' ljwelle'na' dill' zibia', chidolee wza' Chioza' le' lo yi' gabi'la'.

²³ Daan, shi ka zjoo daa chzanilo' wi'o Chioza' na' ka illino' gana' chzeygake'n

ljadinilo' ngoolall' to bish' ljwello'na' li', ²⁴ na'z bkwaan daa noxoo, zigaate chiyal' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

²⁵ Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba bllino' lao beena' wchogbia' cho', na' gone' li' lo na' beena' wseje' li' lillyana'. ²⁶ Dii li nia' li', aga wibeje' li' lillyana' axt ki chixjo' doxen daa chiyal' chixjo'.

Bi chiyal' inelen ljwell ben'

²⁷ Nezkzile wna dii Moiséza': “Bi chiyal' ineleno' nool bi nak nool cho'.” ²⁸ San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoole'na' na' chnelene' nool yoblə.

²⁹ Shi jalawo' de shlina' chonan ka gono' dii mala', naklan wen wtoljo'n na' choono'n. La' wenchan soa tlaaz jalawo'na' aga ka daa yiyaj doxentio' lo yi' gabi'la'. ³⁰ Na' shi noo de shlina' chonan ka gono' dii mala', naklan wen wchog'o'n na' choono'n, la' wenchan soa tlaaz noona' aga ka daa yiyaj doxentio' lo yi' gabi'la'.

**Bi nakan wen yilaa ben'ka' nshagna'
(Mt. 19:9; Mr. 10:11-12; Lc. 16:18)**

³¹ Nezkzile wna dii Moiséza': “Nottez beena' yilaa nool che'na' chiyal' chas to yish we'n dill' nan bilaagake'.” ³² San nad' nia' le' shi to ben' byo yilee xoole'na' la'kzi xoole'na' bi chnelene' ben' yoblə, daa yileene' chone' ka yikaa noola' ben' yoblə na' gake' ka to noolə zoalentie' ben' che'na' na' chnelene' ben' yoblə. Na' beena' yikee noola' nlaa ben' che'na', lekzka' chone' ka chon beena' chnelen xool ben' yoblə.

**Bibi wzoacho de taschiw
kat' bin wchebcho**

³³ 'Lekzka' nezkzile golle' dii xoxzto'leka': "Bi wkwaanzo' ka'zə daa ba bchebo' lao Xancho Chioza' shi bzoatio' bi bzo' de taschiw." ³⁴ San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan gana' zoa Chioza'. ³⁵ Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalenna', la' lennan' yell che beena' chnabia' doxen. ³⁶ Na' ni bi wzoazle yichjlēna' de taschiw, la' aga wak gonle ka yiyak ni to yish' yichjlēna' yish' bez' shi nakan dii gasj wa gonle ka yiyakan dii gasj shi nakan yish' bez'. ³⁷ San kon inale "wakan" wa inale "bi gakan", la' shi chzoale de taschiw bichlə wa nochlə, dii malan' chonan chonle ka'.

Chiyal' gakicho ben'

(Lc. 6:29-30)

³⁸ 'Lekzka' nezkzile' wna dii Moiséza': "Shi to ben' wshoshje' tlaa jalawo'na' lekzka' yiyono' che'. Na' shi to ben' wxope' leyo'na', lekzka' yixopo' leye'na'." ³⁹ San nad' nia' le': Bi yizi'o wzon che ben' mala'. Shi no kap' xagoona' tlaa, bi'e daa zi shlaa. ⁴⁰ Shi to ben' chbagoo dii chbago' che' na' cheenile' ikee xkamiso'na', be'shaze' lente daa nxa kolloona'. ⁴¹ Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro. ⁴² Na' nottezə ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

**Chiyal' gakicho ben'ka'
chakzbangakile' cho'**

(Lc. 6:27-28, 32-36)

⁴³ Na' lekzka' nezile wngake': "Goki bish' ljwello'na' na' bwiyi ben'ka' chakzi' chakzbangakile' li'." ⁴⁴ San nad' nia'

le': Li gaki ben'ka' chakzbangakile' le', li inabi Chioza' gak wen che ben'ka' chsak'zi'gake' le'. ⁴⁵ Shi gonle ka', na'ch inezi ben' nakle xiin Xacho Chioza', beena' zoa yabana'. La' le' chone' ka chla' wbillā' lao ben' mal na' lao ben' wen, na' chone' ka chak yeja' lao ben' chon wen na' lao ben' chon mal. ⁴⁶ Na' shi to ben'ka' nllagzile chakile, aga bi zjanayin, la' ka'klen chon ben' wichixjka' ben'ka' chakile le ben' mal nakgake'. ⁴⁷ Na' shi to ben'ka' nllagzile chwaple chiox, ¿garan de dii wenna' chonle? La' ka'klen chon ben'ka' bi nombia'gake' Chioza'. ⁴⁸ Li gak dowalj ben' li ben' shao' ka nak Xacho Chioza' zoa yabana', nake' dowalj ben' li ben' shao'.

Chiyal' gaklencho ben'

6 'Bi wli' wzez chele ladj ben' nan nakle ben' wen. La' shi kwēnchezə ile'i bēnaan chonle daa nak wen, bibi laxjle gon Xacho Chioza', beena' zoa yabana'. ² Na' kat' chaklenle ben'ka' chyallj chchini, bi wzelen dill', ka chon ben' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwēnche we'la'o ben' legake'. Dii li nia' le', daa choe'la'o ben' legake', lennan' laxje'ka'. ³ San le', kat' choe'le ben' bi dii choe'lene', bi gonlen ka ile'i ben'. Na' ni to ben' bi ye'lene' bin chonle. ⁴ San li gaken ben' ka kono gakbe'i. Na' Xachona', beena' chen chle'i daa chonle, gone' laxjle.

Ka chiyal' we'lwillcho Chioza'

(Lc. 11:2-4)

⁵ Na' kat' choe'lwill-le Chioza', bi gonle ka ben' wxiye'ka'. Legake' chooll'gake' sechagake' we'lwillgake' Chioza' gana' chdop chllagcho choe'lwillchone' wa ga lle' lla' ben' kwēnche ile'gakile' ka chongake'. Dii li nia' le', daa chle'i ben' ka chongake',

lezannan' laxje'ka'. ⁶San le', kat' we'lwill-le Chioza', li yiyoo loo lill-lena' na' li wsej puerta', na' li we'lwill Xachona', beena' kono chle'i. Na'ch Xachona', beena' chen chle'i daa chonle, gone' laxjle.

⁷'Na' kat' choe'lwill-le Chioza' aga lilezi dill'ka' inale ka chon ben'ka' bi nombia'gake'ne', la' chakgakile' daa choe'gake' dill' zan na' wzenague' bin che'gake'ne'. ⁸Bi gonle ka chongake', la' Xacho Chioza' ba nezakile' bi daa chyalljile ka zi' inablalen. ⁹Kat' we'lwill-le Chioza', kin inale:

Xanto' Chios, ben' zoa yaba,
we'la'oshga yog'lol ben' li'.

¹⁰Na' inabia'gacho' loo yichjlall'do' yog'lol ben',
kwenche gak lo yell-lioni ka chaklalloo,
ka chak yabana'.

¹¹Ka nak daa chono' cheej chaonto' yog' lla, bengachan naanlla.

¹²Wxi'xen chento', ka chon neto' chzi'xennto' bittezə dii choni ben' neto'.

¹³Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

La' lin' napo' yel' wñabia', na' yel' wak,
na' lin' chido'loo shoo balaan xen ze-
jli kani. Kan' nakan.

¹⁴'La' shi le' chzi'xenle che ben' shi bi chongakile' le', ka'kzə Xacho Chioza' zoa yabana' si'xene' chele. ¹⁵San shi le' bi chzi'xen che ljwell-le, ka'kzə Chioza', beena' nak Xale, bi si'xene' dii mal'ka' chonle.

Daa chiya' goncho kat' zoacho wbas'

¹⁶'Kat' zoale wbas', bi gonzle cho'alaolena' nyesh' ka chon ben' wxiye'ka', la' legake' chon cho'alawe'ka' nyesh' kwenche gakbe'i ben' bi neej naogake'. Dii li nia' le', daa gakbe'i

ben' daa chongake', lezannan' laxje'ka'. ¹⁷San le', kat' soale wbas', li wpaayichjlana' na' li chib li wxis cho'alaolena' ¹⁸kwenche bi gakbe'i ben' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxjle.

Yel' shawaa daa de yabana'

(Lc. 12:33-34)

¹⁹'Bi wtop wshagle yel' wni'ana' yell-lioni, la' bal' diika' chaljan baka' chlli-ay'gakban, na' balan chibia leyin na' chbiayi'gakan, wa choo wbanka' na' chkaagake'n. ²⁰San li gon ka gat' yel' shao' chele yabana', la' daa de yabana' bi galjan bado' wlliai'ban, ni bi yibia leyin, ni bi gak sho' wbanna' ikeen. ²¹La' gana' de yel' shao' chelena', na'kzan se yichjlall'do'lena' wneyi.

Jalaochoki nakgakan beeni' che kwerp chechoni

(Lc. 11:34-36)

²²'Jalaochoki nakgakan beeni' che kwerp chechoni. Shi jalaochoki chle'gakin kwas'ol, doxen kwerp chechoni zoan lo beeni'na'. ²³Per shi bi chle'i jalaochoki, kwerp chechoni zoan lo yel' cho'la'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

Aga wak goncho yel' wni'ana' txen na' lekzka' gontecho Chioza' txen

(Lc. 16:13)

²⁴'Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj inabia' yel' wni'ana' cho'.

Bi kwek yichjcho diika' chyalljicho*(Lc. 12:22-31)*

²⁵ 'Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techl^ə yel' mban chechona' aga ka daa cheej chaocho, na' zak'tech kw-erpp chechona' aga ka xalaanchona'. ²⁶ Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshaog'gakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazə? ²⁷ Na' ni tole bi gak yischooch yel' mban chelena' zi shloll la'kzi nall inlebb ze le wneyi cheyin.

²⁸ 'Na' ¿biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do. ²⁹ Per nia' le', ni dii Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ³⁰ Na' shi Chioza' none' yejdo'ka' ze lyixaa xochi, la'kzi nakan de toldezə na'tech chtop ben' len na' chz-eye'n, ¿alechla le', gontechle' wen chele gone' xalaanle la'kzi bitek chajle'le gaklene' le'? ³¹ Na' bi kwek yichjzle inazle: "¿Bin yeej gaocho?" wa "¿Nak goncho gat' xalaancho?" ³² La' ben'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezczile' chyalljile yog' diiki. ³³ Na' daa lliate chiyal' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyalljile. ³⁴ Bitek kwek yichjle shi wyaj wdele llaka' zi za' la' to to lla nsa' dii zed cheyin.

Bi chiyal' yiya yiyiljcho ben'*(Lc. 6:37-38, 41-42)*

7 'Bi yiya yiyiljle ben', kwenche bi yiya yiyilj Chioza' le'. ² La' kon ka chiya chiyiljle ben', ka'kzan yiya yiyilj Chioza' le', na' kon ka gonile

ben', ka'kzan goni Chioza' le'. ³ ¿Biche chwiazə' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴ Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Benshi yibej' bicha' yoo loo jalawo'na'?" ⁵ Ben' wxiye! Zigaate bwia cho'na' na'tech wwio' che bish' ljwello'na'.

⁶ 'Na' bi gonle byen we'lenle xtill Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtill Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choolall'gakb gaogakb.

Chiyal' inabicho Chioza' gaklene' cho'*(Lc. 11:9-13; 6:31)*

⁷ Li inabi Chioza' bin cheenile na' gone'n. Li yiyilj daa cheenile na' yil-lelilen. Li ine cho'a puerta', na' wsalj'e'n. ⁸ La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsalj'kgake' sho'e.

⁹ 'Le' zoa xiinle, shi inabib' le' to yetxtil aga we'leb' to yaj. ¹⁰ Wa shi inabib' le' to bel yaa, aga we'leb' to bel znia. ¹¹ Shi le' naktele ben' mal chak we'le xiinleka' daa nak dii wen, ¿alechli Xacho Chioza' zoa yabana' ki gone' le' dii wen dii shawaa shi inabilene'n?

¹² 'Kon ka cheenile goni ben' le', ka'kzan chiyal' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

Puert daa nak diido' yid*(Lc. 13:24)*

¹³ Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n. ¹⁴ Per ka nak neza' daa

zej yabana' gana' lljazoalencho Chioza', nakan to nez les, na' to chopchga ben' chillelgakile'n.

Daa chbia lo yaga' chli'n bi yag daa

(Lc. 6:43-44)

¹⁵Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chlliayi'gake' ben', ka chon to ba znia. ¹⁶Ka ile'ile ka nsa' chegake' na' gakbe'ile non nalgake'. La' nezgzile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa. ¹⁷Ka'kzan yag wenna' chbian dii wen, na' yaga' daa bi nak wen chbian dii bi nak wen. ¹⁸La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen. ¹⁹Yog' yag dii chbia dii bi nak wen, chchoggake'n na' chzeygake'n. ²⁰Daan, wakbe'kzile ka nsa' che ben'ka'.

Aga yog' ben' yilline' yabana' gana' zoa Chioza' chnabi'e

(Lc. 13:25-27)

²¹'Aga yog' ben'ka' na nad': "Xan', Xan'", yillingake' yabana' gana' chnabia' Chioza', lete ben'ka' chongake' ka cheeni Xa' Chioza', beena' zoa yabana'. ²²Kat'ka' illin llana' yizia' kwent che ben', zangake' inagake' nad': "Xan', Xan', neto' wdixjeento' daa wno', na' kon ye'l' wak cho'na' bibejnto' dii xiw'ka' yoo ben' na' bennto' dii zan ye'l' wak." ²³Na'ch yepgakee: "Biga bembia' le'. Li kwas ka'lə, le' ben' wen dii mal."

Chop ben' bengake' twej yoo

(Lc. 6:47-49; Mr. 1:22)

²⁴Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na' to lo yaj. ²⁵Na' ka gok yejsiwa, bgol yaoka', na' wzechga be'na' nan wllig'gakan yoon'a',

per bi billeen daa chi'cha leninna' lo yaja'. ²⁶Per beena' cheni cho'a xtilaani na' bi chone' ka nia', nake' ka beena' bi chajni, beena' bxe lille'na' lo yoxa'. ²⁷Na' ka gok yejsiwa, bgol yaoka', na' wzechga be'na' na' bllig'gakan yoon'a' na' wlliyi'tekzan.

²⁸Na' ka biyoll be' Jesúza' dillii, bibani ben'ka' ka chli' chsedile', ²⁹daa bli' bsdile' legake' lega ben' za'len ye'l' wñabia', aga ka chli' chsedi ben'ka' chzajni legake' leya'.

Jesúza' biyone' to ben' che'i léprana'

(Mr. 1:40-45; Lc. 5:12-16)

8 Na' ka biyetj Jesúza' lo yaana', ben' zan zinogake'ne'. ²Na' kwite'na' bllin to ben' che'ile' lepra', na'ch bchek' xibe' lawe'na', chi'ene':

—Xan', nezid' wak yikwaso' yillwe'ni chak' shel' gueenilo'.

³Na'ch Jesúza' bxo'a neena' yichje'na', chi'ene':

—Cheenid'x. Na' naate yikwasan.

Na' kon ka golle' ka', lii biyakteyi beena'. ⁴Na'ch che' Jesúza'ne':

—Ni to kono yoo ka nak daa ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiyal' lljoo lao Chioza' ka nllia dii Moiséza' bia' goncho kwenche inezi ben' ba biyakilo'.

Biyon Jesúza' xmos xan soldadka'

(Lc. 7:1-10)

⁵Ka billin Jesúza' yell Capernaúma' lii bllinte to xan soldad lawe'na', na' got'yoile'ne', ⁶chi'ene':

—Xan', xmosaa die' lillaa, na' net tlaa kwerp che'na' na' le' chey chle'.

⁷Na'ch che' Jesúza'ne':

—Na' sa' yiyonee.

⁸Na' che' xan soldadka'ne':

—Xan', aga zakii nad' kwenche shoo loo yoo lillaa. Kon ben mandad yiyakile' na' wiyakkzile'. ⁹Nia' ka' la' zoa ben' chnabia' nad', na' nad' lekzka' chnabia'

soldad cha'ka'. Kat' chep' toe': "Wyaj ni", na' chaje'; na' kat' chep' stoe': "Da ni", na' chide'; na' kat' chizep' xmosaa: "Ben dga", na' chone'n.

¹⁰ Ka beni Jesúza' cho'a xtilleena', bibanile' na' chi'e beṅ'ka' nogake' le':

—Dii li nia' le', bigan' lljtia' to beṅ' Israel beṅ' gonlilallee nad' ka chonlilall' beeni nad'. ¹¹ Na' nad' nia' le', beṅ' zan beṅ' zaak doxen yell-lioni gonlilall'gake' nad' na' lljazoalengake' txen dii Abrahama', dii Isaaca' na' dii Jacoba' yabana' gana' chṅabia' Chioza'. ¹² Na' ka nak beṅ'ka' wlej Chioza' nan lljazoagake' gana' chṅabi'e, zane' wzalee gana' shgasj shḥol, gana' kwellyesh'gake' na' gaoy-aaxaxj leye'ka' daa le gakshejlall'gake', daa bi goongakile' inabi'e legake'.

¹³ Na'ch che' Jesúza' xan soldadka':

—Biyaj lillo'na', na' gak ka cheenilo' daa chajli'o cha'.

Na' lo lla lo gorzə biyaki xmose'na'.

Biyon Jesúza' tobiin che Pédrona'

(Mr. 1:29-31; Lc. 4:38-39)

¹⁴ Na'ch wyaj Jesúza' lill Pédrona', na' ble'ile' de tobiin che'na' yo'e dii lana'.

¹⁵ Na' beṅ' Jesúza' neena' na' bicheje' dii lana'. Na' lii wyastie' bene' dii wdaogake'.

Jesúza' biyone' zan beṅ'ka' bi shao'

(Mr. 1:32-34; Lc. 4:40-41)

¹⁶ Na'ch ka ba chxo'a wbillā', jwa'gake' beṅ' zan gana' zoa Jesúza', beṅ' yoo dii xiw'ka', na' shcho'azə dillaa bi'e bichej-gakan. Na' lekzka' biyone' yog' beṅ' bi shao'. ¹⁷ Gok ka' kwenche gok ka' wna dii Isa'aza', beena' wdixjee daa goll Chioza'ne', daa wne': "Le' bikee yillwe'ka' che'icho na' bene' ka bigaa yel' chey chla chechona'."

Beṅ'ka' cheengakile' lljanogake' Jesúza'

(Lc. 9:57-62)

¹⁸ Na' ka ble'i Jesúza' beṅ' zan in-leb ba nechjgake'ne', bene' mandad telene' beṅ'ka' nakgake'ne' txen shlaa nisdona'le. ¹⁹ Na' wbig' to beṅ' chli' chsedi leya', chi'ene':

—Maestro, cheenid' sa'len' li' gattezə shajo'.

²⁰ Na'ch che' Jesúza'ne':

—Bez'ka' nongakb yech ga chiyoo'gakb, na' byindo'ka' non lilldo'gakb, san nad', Beṅ' Bsel' Chioza' Yell-lioni, bibi lill' de.

²¹ Na' bchej sto beṅ' nake' Jesúza' txen na' chi'ene':

—Xan', wza'len' li' gattezə shajo' ka ziyoll guet xa'na'.

²² Na'ch goll Jesúza'ne':

—Da, dino nad'. Wikwash'kzə ljwell beṅ' wetka'.

Jesúza' bkweze' be'na' lo nisdona'

(Mr. 4:35-41; Lc. 8:22-25)

²³ Na'ch wyoo Jesúza' loo barkwa' len beṅ'ka' ba nakgake'ne' txen. ²⁴ Na' shlak zej barkwa' wtese'. Na' wzolo wzechga be'na' lo nisdona', na' wzolo chas chataan na' biyoll nisa' loo barkwa'. ²⁵ Na'ch beṅ'ka' nak Jesúza' txen jasbanga'ke'ne', na' che'gake':

—iXan', bisla cho'! iBa chbe'cho yel!

²⁶ Na'ch che' Jesúza':

—iBerache chlleblikzle? iBiche bi nxenilall'le nad' kwaslo!

Na'ch wyase' bsheshlene' be'na' len nisdona', na' wlezgakan. ²⁷ Na' beṅ'ka' lle'len Jesúza' loo barkwa' bibangakile' ka bene', na'ch che' ljwellgake':

—iNoran nak beeni, lla? Axt be'na' na' nisdona' chzenaggakan che'.

Chop ben' Gadara yoogake' dii xiwaa*(Mr. 5:1-20; Lc. 8:26-39)*

²⁸ Na' ka bllin Jesúza' yell-liona' mbani Gadarána' daa lliá shlaa niso'da', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoagake'. ²⁹ Na' besyaagakan che'gakan Jesúza':

—¿Biche za'zo' gani zoanto', Jesús, Xiin' Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?

³⁰ Na' gaoz lle' ba zan kush chao-gakb. ³¹ Na'ch got'yoi dii xiw'ka' Jesúza', che'gakan le':

—Shi yibejo' neto' loo yichjall'do' ben'ki, we'gacho' latj yiyoo'nto' kushka'.

³² Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo niso'da' na' wche'gakb yel.

³³ Na'ch ben'ka' chap kushka' bixonj-dogake', na' ka billingake' lalle'ka' goll-gake' ben' yellka' doxen ka gok che ben'ka' yoo dii xiw'ka'. ³⁴ Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblá.

Jesúza' biyone' to ben' net tlaa kwerp che'na'*(Mr. 2:1-12; Lc. 5:17-26)*

9 Na' biyoo Jesúza' to loo barkw, na'ch bilag'gake' shlaa niso'da' na' billine' yell che'na' gana' wzee. ² Na' bllinlen-gake' to ben' net ni'a neena' lawe'na', nxoagake'ne' to lo daa. Na' gokbe'i Jesúza' le nonlilall'gake'ne', na'ch golle' ben' we'na':

—Btiplaloo, xiin', ba biyakxen xtoloo'na'.

³ Na'ch bal ben'ka' chli' chsedi leya' che' ljwellgake': “Ba chonz kwin beeni ka

Chioza' daa ne' ka'.” ⁴ Na' gokbe'i Jesúza' daa wza'lall'gake', na' chi'e legake':

—¿Biche chza'lall'zle ka'? ⁵ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”? ⁶ Na' wliid' le', nad', Ben' Bsel' Chioza', nap' yel' wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Biyas, bitob daa cho'na', na' biyaj lillo'na'.

⁷ Na'ch biyas beena' net ni'a neena' na' ziyaje' lille'na'. ⁸ Na' ka ble'i ben'ka' ka gok, bibangakile', na' be'la'ogake' Chioza' daa bi'e yel' wak xenna' to ben' yell-lío.

Wlej Jesúza' Matewa' kwenche gone'ne' txen*(Mr. 2:13-17; Lc. 5:27-32)*

⁹ Ka biza' Jesúza' na', ble'ile' to ben' wichixj, lie' Mateo, chi'e gana' chchixje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

¹⁰ Na' shlak chi' Jesúza' lill Matewa', bllin ben' zan wichixjka' na' zan ben' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len ben'ka' naggake'ne' txen. ¹¹ Na'ch ka ble'i fariseoka' chaolen Jesúza' ben'ka', na'ch wñabgakile' ben'ka' naggake'ne' txen, che'gake':

—¿Biche chaolenz maestro cheleni ben' wichixjki len ben'ki bi nsa' cheyin wen?

¹² Na' beni Jesúza' daa goll fariseoka', na'ch chi'e legake':

—Aga ben'ka' shawaan chyalljgakile' wen rmecha' san ben'ka' bi shawaan chyalljgakile'ne'. ¹³ Li yiyaj na' li lljased bin zeji Cho'a Xtill' Chioza' gana' nan: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” Aga bid' ni che ben'ka' nak ben' li ben' shao', san bid' ni che ben' saaxyaka'.

**Wnabgakile' Jesúza' biçhe bi chzoa
ben'ka' nakgake'ne' txen wbas'**

(Mr. 2:18-22; Lc. 5:33-39)

¹⁴Na'ch ben'ka' nak Juanna' txen jabig'gake' kwit Jesúza' na' wnabgak-ile'ne' che'gake':

—Neto' na' fariseoka' zeyi chento' chzoanto' wbas'. Na' ¿biçhe ben'ka' nakgake' li' txen bi chzoagake' wbas'?

¹⁵Na'ch che' Jesúza' legake':

—Kat' chak to wishagna' ben'ka' chdi'a chllag lill ben' byona' aga chdagake' nyesh', san cheej chaogake'. Na' ka'kzan ben'ki nakgake' nad' txen, cheej chaogake' naa zoalen' legake', per wllin lla wkwas ben' nad' kwite'ka', kana'chan soagake' wbasaa.

¹⁶'Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nll'o' gakchan dii xench. ¹⁷Na' aga no chгаа vino daa zi' bchejte loo yid gola', la' wchez' yid gola' na' laljə vinona', na' ka vinona' ka yida' kwiayi'gakan. San chiya! sholl vino daa zi' bchejte loo yid koba' kwenche ni ton bi kwiayi'.

**Jesúza' biyone' xiin Jairona'
len noola' jexee xe'na'**

(Mr. 5:21-43; Lc. 8:40-56)

¹⁸Na' ni choe'te Jesúza' dill', ka bllin to ben' wnabia' na' bçhek' xibe'na' lao Jesúza', chi'ene':

—Shingt wit to bi' nool cha'; per shi li' sa'gacho' na' wxoа noona'b' na' yibam'.

¹⁹Na'ch lii wzolla'te Jesúza' zejlene' ben'ka' nakgake'ne' txen lill ben' wnabia'na'. ²⁰Na' ka zεgake' lill ben' wnabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' bεxee xe'na', ²¹la' chakile': "Kon she! ba bεxaa xe'na' wiyakkzid'." ²²Na' biyechj Jesúza' na' ka ble'ile' noola' chi'ene':

—Btiplalloo, xiin', ba biyakilo' daa chonlilalloo nad'.

Na' lii biyakteyi noola'.

²³Na' ka bllin Jesúza' lill ben' wnabia'na' ba lle' ben'ka' chkwell bllεja' na' ben' zan ba chosyaagake' chbellgake'. ²⁴Na'ch che' Jesúza' ben'ka':

—Li yillesh ni. Aga witba'n san cheszbaan.

Per bxill-ligake'ne'. ²⁵Na' ben Jesúza' byen billeshgake', na' wyo'e na' bεxee na' bi' nool weta' na' lii biyasteb'. ²⁶Na' yog' yellka' llia gaοz wze dill' daa bene'.

Biyon Jesúza' chop ben' lçhol'

²⁷Na' ka biza' Jesúza', chop ben' lçhol' janogake'ne'. Na' chosyaagake' zilljə che'gake':

—¿Biyesh'lall'gachi neto', xiin dia che dii Davi!

²⁸Ka biyoo Jesúza' loo yoona', ben' lçhol'ka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll ben' lçhol'ka'ne':

—Awe, Xannto', wak gono' ka ile'into'.

²⁹Na'ch bεx' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

³⁰Na'ch bile'gakile'. Na' Jesúza' golle' legake':

—Li gon byen kono ye'le ka'.

³¹Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' çhegake'.

Biyon Jesúza' to ben' bi chak ine'

³²Shlak chiza' ben'ka' gok ben' lçhol', bllin ben' yoblə lao Jesúza' nçhe'gake' to ben' bi chak ine' daa yo'e dii xiwaa.

³³Na' kon ka bibej Jesúza' dii xiwaa yoo beena' na' binie'. Na' bibani ben'ka' lle' na', nagake':

—Ni shlin biñ' ile'icho yell Israeli to yeł' wak ka dga ba ben beeni.

³⁴Per fariseoka' che'gake':

—Beeni chibeje' dii xiw'ka' kon yeł' wak che daa chñabia' legakan.

Chyallj beñ' zan gongake' xshin Chioza'

³⁵Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag ben' Israelka' choełwillgake' Chioza'. Wdixje'ile' legake' dill' wen dill' kob che yeł' wñabia' che Chioza' na' biyone' ben' che'i bittezə yillwe'. ³⁶Na' ble'i Jesúza' ben' zan zejlegake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa. ³⁷Na'ch golle' ben'ka' nakgake'ne' txen:

—Dii li nia' le', ben'ka' zi' gonlilall'gake' Chioza' zaklebgakile' to dii wlliachga to lo yell-lío, na' chyallj no yizi' yilapan, per to chopchga wen llinka' zoa. ³⁸Na' li inabi Xancho Chioza' wzanche' ben'ka' wtopgake' ben'ka' gonlilall'gake'ne'.

Jesúza' wleje' shllin ben'ka' gakgake' postl che'

(Mr. 3:13-19; Lc. 6:12-16)

10 Na'ch biti'a Jesúza' ben'ka' shllin wleje' na' bi'e legake' yeł' wñabia' kwence'gak yibejgake' dii xiw'ka' yoo ben', na' yiyongake' ben' che'i bittezə yillwe'.

²Na' kin le postlka' shllin: zigaate wleje' Simónna', beena' lezkzka' che'gake' Pedro, len ben' bishee Andréza', na'tech Jacóbona' len ben' bishee Juanna', ben'ka' nak xiin Zebedewa', ³na'ch Felípena', Bartoloména', Tomáza', Mateo, ben' wchixja', Jacobo xiin Alfewa', Tadewa', ⁴Simón, beena' bsi'gake' Zelote, na' Jud Scariota', beena' bene' Jesúza' lo na' ben' malka'.

Bsel' Jesúza' postlka' shllin je'gake' cho'a xtill' Chioza'

(Mr. 6:7-13; Lc. 9:1-6)

⁵Na'ch bsel' Jesúza' ben'ka' shllin je'gake' cho'a xtill' Chioza', na' chi'e legake':

—Bi shajle yellka' gana' zoa ben'ka' bi nak ben' Israel, ni bi shajle yellka' lliana' mbani Samáriana'. ⁶San li shaj gana' lle' ben' Israelka', ben'ka' nak ka xil' ba wnit. ⁷Li shaj li lljtixjee ba zoa gaoshosh inabia' Chioza' beena' zoa yabana' loo yichjall'do' ben'. ⁸Li yiyon ben'ka' bi shao' na' ben'ka' che'i lepra, li yisban ben' ba wit, na' li yibej dii xiw'ka' yoo ben'. Na' ka ben' Chioza', bene' le' yeł' waka' ka'z, ka'kzan le' bibi wchixje' yiyonle ben'.

⁹Na' bi wa'le mech de or, de plat ni de cobre. ¹⁰Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

¹¹'Na' kat' illinle to to yell xen wa yelldo'zə, chiljle to ben' nsa' che' wen, na' yigaanle lille'na' na' na'tezə soale axt ka illinch lla yiza'le. ¹²Na' ka sho'le lille'na' ye'lene': "Chioza' wzoe' le' mbalaz."
¹³Na' shi dii li ben'ka' lle' na' nakgake' ben' wen, wakkzə daa ye'le legake'; san shi bi nakgake' ben' wen, na' aga wakan. ¹⁴Na' gattezə illinle shi kono wleb le' na' ni bi wzenaggake' chele, na' yiza'le lill beena' wa yella' gana' gongakile' le' ka' na' yishible bishtena' lliana' n'aleka'. ¹⁵Dii li nia' le', kat' illin lla wchoglo Chioza' che ben', yeł' zak'zi' xench ile'chi ben' yel-lka' gana' gongakile' le' ka' aga ka ben' yell Sodómana' na' yell Gomórrana'.

Yeł' zak'zi'ka' yen ile'i ben'ka' nak Jesucristona' txen

¹⁶'Nad' chselaa le' ka xildo' ladj ba zni-aka'. Na' chiyał' gakle ben' sin' na' ben' wen. ¹⁷Wsak'gale, la' wchej ben' lljwee

le' lao ben'ka' chñabia' na' wit chingake' le' gana' chdop chllagcho choe'llwillcho Chioza'. ¹⁸Na' lljwa'gake' le' lao ben' wñabia' xenka' daa chonlilall'le nad', na' ka' gak we'lenle legake' cho'a xtilaana' na' ka'kzə ben'ka' bi nakgake' ben' Israel. ¹⁹Na' kat' gongake' le' lo na' ben'ka', bi sele wneyi naklə inale wa bi inale, la' ka gal' inele, Chioza' wxoe' dillaa cho'a loll'leka'. ²⁰La' aga len' inele, san Espiritu che Xacho Chiozan' gone' ka inele.

²¹'Beena' zoa ben' bishee leteze' gone'ne' lo na' ben'ka' witgake'ne', na' beena' zoa xiine' gone'b' lo na' ben' wite'b'. Na' soa ben' yizoshiy'e xaxneena' na' gone' legake' lo na' ben'ka' witgake' legake'. ²²Yog'loł ben' gakzbangakile' le' daa nonlilall'le nad', per beena' so sakile' bittezə daa yen ile'ile' axt kat' guete', beenan' gat' yel' mban che' zejli kani. ²³Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'loł yellki mbani Israeli kat' illin lla yiyed' nad', Ben' Bsel' Chioza'.

²⁴'To ben' chsed aga zak'che' ka beena' chli' chsedi le', na' ka'kzə to wen llin aga zak'che' ka xane'na'. ²⁵Na' beena' ni chsed yibaile' gake' ka beena' chli' chsedi le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

¿Non chiyal' illebcho?

(Lc. 12:2-9)

²⁶Bi illeble ben'ka' biya dii wchi' wsak'gake' le'. La' daa kono nezi naa, wllin lla ila'lawin, na' aga ga de to dii ngash' dii bi illin lla ila'lawin. ²⁷Diika' chli' chsedid' le' do ngash'zə, li we'n dill' ladj lkwe' ben'. Na' diika' nia' le' to le'zə, li wzenin yog'loł ben'. ²⁸Bi illeble ben'ka' cheengakile' witgake' le', la' kwerp chele na'zan witgake', aga bi gak gongakile' yichjlall'do'lena'. San Chiozan' chiyal'

illeble, la' len' wakə wlliyee kwerp che-lena' len yichjlall'do'lena' lo yi' gabiła'.

²⁹'La'kzi wak si'cho chop byindo' kon to sintabdo', ni tob bi guet shi Xacho Chioza' bi wi'e latj. ³⁰Na' ka nakle le', axt yish' yichjlana' nłabe'. ³¹Daan bi chiyal' illeble, la' zak'ch le' aga ka ba zan byindo'ka'.

Ben'ka' chchebgake' lao ben' nan nombia'gake' Jesúza'

(Lc. 12:8-9)

³²'Beena' we' dill' lao ben' ine' nake' nad' txen, ka'kzə nad' yep' Xa'na' zoa yabana' nake' nad' txen. ³³Na' beena' bi chcheb lao ben' nan nake' nad' txen, ka'kzə nad' yep' Xa'na' zoa yabana' bi nake' nad' txen.

Ni che Jesúza' gak ben' choplə

(Lc. 12:51-53; 14:26-27)

³⁴'Bi gakzile bid' lo yell-lioni kwenche gon' ka soalen ljwell ben' mbalaz. Aga daan bid', san bid' kwenche wxia' wdil'. ³⁵Daa bid' na' yidił-len ben' byona' xe'na' na' noola' yidił-lene' xneena', na' beena' zoa xoolille' yidił-lene' le'. ³⁶Na' ben'ka' zoa toz yoo gakzbani ljwelle'.

³⁷'Beena' chakchile' xe'na' wa xneena' aga ka nad', bi chidolee gake' nad' txen, na' ka'kzə shi chaktechile' xiine'na' ka nad', lekzka' bi chidolee gake' nad' txen. ³⁸Beena' bi chzani yel' mban che'na' yen ile'ile' bittezə kwenche gone' ka nia', bi chidolee gake' nad' txen. ³⁹Na' beena' chakile' shel' kono wchi' wsak' le', beenan' kwiayee. San beena' chzani yel' mban che'na' yen ile'ile' bittez daa nonlilallee nad', beenan' gat' to yel' mban che' zejli kani.

Ben'ka' soagake' mbalaz yabana'

(Mr. 9:41)

⁴⁰'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'. ⁴¹Beena'

wlebe' to ben' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to ben' chone' daa nak shli daa chibaile' nake' ben' li ben' shao', lekzka' lene'n ikee ka laxj beena' chon daa nak shli. ⁴²Na' beena' we' la'ch' lat' nis yeej ben'ki nakgake' nad' txen, dii li nia' le', de laxje'.

11 Na' ka biyoll goll Jesúza' ben'ka' shllin bin chiyal' gongake', na'ch bizee na', na' jali' jasedile' ben' na' jtixje'ile' legake' cho'a xtill' Chioza' yel-ka' llia gana' mban Galileana'.

Ben'ka' bsel' Juan wichoa nisa'

(Lc. 7:18-35)

²Na' Juanna' beena' chchoa ben' nisa', ba die' lillyana'. Ka wnezile' daa chon Crístona', na'ch bselee chop ben'ka' nakgake'ne' txen gana' zoe'. ³Na' janab-gakile'ne' che'gake':

—¿Alin' beena' ba llia bia' yid?, ¿anti chiyal' kweznto' sto ben' yoblə?

⁴Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'. ⁵Li lljayelle' chon' ka chle'i ben' lcholka', na' chiza' ben'ka' bi chak sa', na' chiyaki ben'ka' che'i lepra, na' chiyeni ben' kwellka', na' chisban' ben'ka' ba wit, na' chyixje'id' ben' yesh'ka' dill' wen dill' kob che Chioza'. ⁶Chakomba beena' chajle' cha' na' bi chakchoplallee.

⁷Na' ka biza' ben'ka' bsel' Juanna', na'ch wzolo Jesúza' be'lene' ben'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e?

⁸Shi bi nakan ka', ¿nakran nak beena' jawiale? ¿Ato ben' nakw xalaane' dii le nakə? Bi nakan ka'. La' nezckzile ben'ka'

nakw xalaangake' dii le nak zoagake' loo yoo lill ben' wñabia'ka'. ⁹¿Nakrakzan nak beena' jawiale? ¿Ato ben' chyixjee daa che' Chioza'ne'? Dii li kan' chone', na' chontechle' ka ben'ka' chyixjee daa che' Chioza' legake'. ¹⁰La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na', na' chixji'e xtilloona' kwenche soa ben' wzenaggake' cho' kat' illino'.

¹¹Dii li nia' le', ladj yog' ben' yell-lioki, ni toe' bin' ichej gake' ben' zak'chi' aga ka Juanna' beena' chchoa ben' nisa'. Per nottezə beena' choe' latj inabia' Chioza' yichjall'do'ena', zak'teche' aga ka Juanna'.

¹²'Kon ka wzolo Juanna' bchoe' ben' nisa' axt naanlla, zoa ben' chsej chllongake' kono wleb yel' wñabia' che Chioza'. ¹³Librka' daa bzej dii ben'ka' wdixjee daa goll Chioza' legake' na' leya' bzej dii Moiséza' wdixjeegakan che yel' wñabia' che Chioza', na' lekzannan' cho'e Juanna' dill' naa blee. ¹⁴Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'. ¹⁵Ka le' chenile dga nia', li sen wneyi.

¹⁶'¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' ljwellb':

¹⁷“Bkwellnto' bleja' na' bi byaale, na' belnto' daa chon nyesh' na' ni bi wchel-lkzle.” ¹⁸La' Juanna' bi weej wdawe' dii wen dii shao', na' wnagake' che': “Dii xiwaan yo'e.” ¹⁹Na'ch wdena' bid' nad' nak' Ben' Bsel' Chioza' Yell-lioni, na' cheej chaw', na' nagake' nak' to ben' waoxat na' to weezo, na' lekzka' nagake' non' txen ben' wen dii malka' na' ben' wíchixjka'. Per yel' sin' che Chioza' chli'lawin ka chsa' che ben'ka' chzenaggake' che'.

*11:12 Zoa ben' chsej chllongake' kono wleb yel' wñabia' che Chioza': dga nakan to dii lallj. Lekzka' bal ben'ka' nsed nagake' versículoni zejín: zoa ben' chongake' axt ga zeelo chakgake' kwenche inabia' Chioza' legake'.

**Yellka' gana' bi
bzenaggake' che Jesúza'**

(Lc. 10:13-15)

²⁰ Na'ch wzolo Jesúza' bsheshlene' ben' yellka' gana' bli'che' ye'l' waka', daa bi biyaj bilengakile' xtoleeka'. Na' wne':

²¹ —¡Nyesh'laz gak chele, le' ben' yell Corazín! ¡Nyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' ye'l' wakka' ba ble'ile, lii biyaj bilentel'jagak-ile' xtoleeka', na' gokwl'jagake' lech' zeshaa na' blaagake' dena' yichje'ka' daa le gokyesh'gakile', shel'ka'. ²² Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'. ²³ Na' le' ben' Capernaúm, ¿achakile willinle yabana? Aga willinle na', san latj gana' sak'zi'len yillinle. La' shel' ben' Sodómaka' ble'gakile' ye'l' wakka' daa ba ble'ile, balja biyaj bilengakile' saaxya che'ka' na' ni ndia yella', shel'ka'. ²⁴ Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

**Mbalaz soa ben'ka'
gonilall'gake' Jesúza'**

(Lc. 10:21-22)

²⁵ Na' lo gora' wne' Jesúza', chi'e:

—Xa, li' nako' xan yabana' na' yell-lioni, choe'lawa' li' daa bkwashilo' ben' sin'ka' diika' ba bliilo' ben'ka' bibi chajni. ²⁶ Beno' ka', Xa, la' kan' wyazlalloo.

²⁷ Na'ch goll' Jesúza' ben'ka':

—Xa'na' bene' lall' na' yog'lol' daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'. ²⁸ Li gonilall' nad', yog'le le' ba chjshiaile na' nakle ka ben' ntakw nchej to dii zii dii zshab, na' nad' gon' ka yizi'lall'le. ²⁹ Li gon ka nia', na' li wzenag daa chzajniid'

le', la' nad' nak' ben' gaxjlall' na' gon' ka gat' ye'l' wixi'lall' chele. ³⁰ Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

**Ben'ka' nak Jesúza' txen wdishjgake'
trígona' llana' chombaangake'**

(Mr. 2:23-28; Lc. 6:1-5)

12 To lla sabd, llana' chombaän ben' Israelka', wdelen Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo wdishjgake' trígona' na' wdaogake'n. ² Na' ka ble'i fariseoka' daa chon ben'ka', na'ch che'gake'ne':

—Bwia ka chon ben'ki nakgake' li' txen, chongake' daa bi chiya'l' goncho llani chombaäncho.

³ Na'ch che' Jesúza' legake':

—¿Abin' wlable ka ben dii Davina' len ben'ka' nakgake'ne' txen ka wdon-gake'? ⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxozka' de lsens gaogake'. ⁵ ¿Abin' wlable leya' gana' nan aga bi xya nakan che bxozka' la'kzi chongake' llinna' loo yoodo'na' llaka' chombaäncho? ⁶ Na' nia' le', ladjleni zoa to ben' zak'che' aga ka yoodo'na'. ⁷ Bilja wyajniile bi zeji Cho'a Xtill' Chioza' daa na: "Nad' cheenid' yiyeshii ljwell-le, aga ka daa witle bayix'ka' kwenche we'la'ole nad'." La' shel' le' wyajniilen, aga waole xya che ben' bi nap dol', shel'ka'. ⁸ Nad', Ben' Bsel' Chioza' Yell-lioni, chnabi'a' lao llani chombaäncho.

**Jesúza' biyone' to ben' llana'
chombaän ben' Israelka'**

(Mr. 3:1-6; Lc. 6:6-11)

⁹ Na'ch biza' Jesúza' latja', na' biyaje' gana' chdop chllag ben' Israelka' choe'lwillgake' Chioza'. ¹⁰ Na' ladj ben'ka' len to ben' net tlaa neena'. Na' fariseoka' chwiagake' nakla' ka si'

sengake' kwenche gaogake' xya che Jesúza', na'ch wñabgakile'ne', che'gake':

—¿Beran na leya'? ¿Ade lsens yiyoncho to ben' bi shao' llani chombaanch'o?

¹¹ Na'ch che' Jesúza' legake':

—Shi nole zoa to xil' chele na' ixopb to loo yech llaki chombaanch'o, ¿abi yibejleb? ¹² Na' ¿zak'techlā beñecha' aga ka xilaa! Daan de lsens goncho daa nak wen llaki chombaanch'o.

¹³ Na'ch golle' beena' net tlaa neena':

—Bli noona'.

Na' ka bli neena' lii biyakten ka nak daa zi shlaa. ¹⁴ Na' ka biza' fariseoka' gana' chdop chllaggake', be'gake' dill' nak sho' xñezi witgake' Jesúza'.

Daa wna dii Isaíaza' che Jesúza'

¹⁵ Ka gokbe'i Jesúza' daa cheengakile' gongake', na' bizee ziyaje' gan yoblā. Na' ben' zan inleeb janoe'ne' na' biyone' yog' ben'ka' bi shao'. ¹⁶ Na' golle' ben'ka' biyone' bi we'gake' dill' daa chone'. ¹⁷ Daa bene' ka', billinin ka wna dii Isaíaza', beena' wdixjee daa goll Chioza'ne', kana' wne':

¹⁸ Beenin nake' wen llin cha', beena' ba wlej',

na' le chakidee na' chazlallaa ka chone'.

Na' wzoa' Espíritu cha'na' loo yichjlall'do'ena',

na' chixje'ile' ben'ka' lle' yell-lioni ka cheenid' gongake'.

¹⁹ Bi gakdił-lene' ben',

na' ni bi gosyee wi'e dill' yawi nez.

²⁰ Aga wisyoll wistoe' chishje' yaxtila' daa ba chashjō.

na' aga wisole' mesha' daa ba chiyol,

axt ki gone' gan wli'lao yel' li yel' shao' che'na'.

²¹ Na' ben' lle' doxen yell-lioni gongake' lez len' gaklene' legake'.

Nagake' che Jesúza' chibeje' dii xiw'ka' kon yel' wak cheyinna'

(Mr. 3:19-30; Lc. 11:14-23; 12:10)

²² Jwa'gake' lao Jesúza' to ben' yo'e dii xiw' na' bi chle'ile' ni bi chak inie'. Na' bibej Jesúza' dii xiwaa yo'e, na' bile'ile' na' gokte binie'. ²³ Yog'loł ben'ka' biban-gakile' ka nak daa bene', na' chisne':

—¿Aaga beenin xiñ dia che dii Davina', beena' chbezcho, laa?

²⁴ Ka beni fariseoka' dillaa choe' ben'ka', na' che'gake':

—Aga bi yel' wak nap beeni. San yel' wak che Bezlona',[†] daa chñabia' dii xiw'ka'zan, chibejele' diika'.

²⁵ Na' gokbe'i Jesúza' daa chza'lall' fariseoka', na'ch chi'e legake':

—Shi gana' chñabia' to ben' na' til-gake' to lezgake' na' gakgake' choplō, na' kwiaiyi' gana' chñabi'e, na' kakzə shi to yell wa ben' lle' toz yoo gake' choplō aga wdiagake'. ²⁶ Ka'kzə Satanáza', shi yibej ljuwell dii xiwiinka' yoo ben', aga wdia yel' wñabia' cheyinna', shel'ka', la' to lezgakannan' chidił-len kwingakin. ²⁷ Le' nale chibej' dii xiwaa yoo ben' kon yel' wak che Bezlona'[‡] daa chñabia' legakan. ¿Shera ben'ka' nakle txen? ¿Alezkza' lennan' chibejlengake' dii xiw'ka' yoo ben'? Daa bi nakan ka', na' chli'n naklejjile. ²⁸ Na' shi nad' chibej' dii xiw'ka' kon yel' wak che Espíritu che Chioza' zejín ladjeni ba bla' yel' wñabia' che Chioza'.

²⁹ Aga no gak sho' lill to ben' wal na' kwane' dii de che' shi bi wcheje'ne' zigaate. Na'chan gak kwane' lille'na'.

³⁰ Beena' bi chone' nad' txen, len' chakzbanile' nad'; na' beena' bi chaklene' nad' kwenche wzenag ben' che Chioza', len' chsej chllone' wzenaggake'.

[†]12:24 Bezlo: lezkannan' Beelzebú de xtil na' nakan sto le Satanáza'.

[‡]12:27 Bezlo: lezkannan' Beelzebú de xtil na' nakan sto le Satanáza'.

³¹ 'Na' nia' le', wizi'xen Chioza' yog' saaxya chelena' na' yog'te dii mala' daa chbell chnele, san shi inele zban che Espíritu Sántona' na' cheyi diika' chone', aga wizi'xen Chioza' chele. ³² Na' shi no ine cha', nad', Ben' Bsel' Chioza' Yell-lioni, lekzka' wizi'xen Chioza' che', san beena' ine che Espíritu Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

**Kon ka nak yaga', ka'te
nak daa chbian**

(Lc. 6:43-45)

³³ 'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian. ³⁴ ¿Le' ben' wen dii mal! ¿Nakra gonle inele daa nak dii wen daa nakle ben' mal? La' yog' dill' daa chchej cho'a loll'chona' za'n loo yichjlall'do'chona'. ³⁵ Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'. ³⁶ Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele. ³⁷ La' shi le' choe'le dill' wen, na'ch ina Chioza' bibi dol' naple; per shi le' bi choe'le dill' wen, na' wchogloe' chele sak'zi'le.

**Wnabi ben' malka' Jesúza'
wli'e to yel' wak**

(Mr. 8:12; Lc. 11:29-32)

³⁸ Na'ch bal fariseoka' na' ben'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwenche gakbe'into' shi Chiozan' bselee li'.

³⁹ Na' che' Jesúza' legake':

—Le' nakle ben' mal na' ben' bi chzenag che Chioza' chnabile ile'ile' yel' waka' kwenche wli'n shi Chiozan' bselee

nad', per aga wliid' le' daa cheenile. Lete ile'ile to dii nak ka yel' wak daa ben Chioza' che dii Jonáza'. ⁴⁰ La' Jonáza' wyo'e shonə lla shonə yel loo lee bel xenna', na' ka'kzə nad', Ben' Bsel' Chioza' Yell-lioni, shon lla shon yel igaana' loo bana'. ⁴¹ Kat' illin lla wchoglo Chioza' che ben' yell-lioni, kanan' dii ben' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake' cho'a xtill' Chioza'. Na' nad', zak'techid' aga ka dii Jonáza' na' bi chzenagle cha'. ⁴² Na' lekzka' llana' kat' wchoglo Chioza' che ben' yell-lioni, noola' wnabia' yellka' lle' do lli'lə gawe' xya chele, le' zoale naa, la' len' wzee zit' nleb bidzenague' dill' sin' daa wne dii Salomónna'. Na' nad', zak'techid' aga ka dii Salomónna' na' bi chzenagle cha'.

Dii xiwaa daa chiyo ben'

(Lc. 11:24-26)

⁴³ 'Kat' chichej dii xiwaa yoo ben', na' chdan gana' bibi chashj chleb chyiljan gana' yizi'lalliin. Na' kat' bi chllelin gana' yizi'lalliin, ⁴⁴ na'ch chakin: "Yiyaach' dii yoblə gana' bichejzk'." Na' kat' yillinan gana' bichejan, nakan ka to yoo desh dii nxi nloa. ⁴⁵ Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che ben' malka' lle' naa.

**Bllin xna' Jesúza' len ben'
bisheeka' gana' zoe'**

(Mr. 3:31-35; Lc. 8:19-21)

⁴⁶ Ni choe'lente Jesúza' ben'ka' dillaa ka bllin xneena' len ben' bisheeka' gok-lall'gake' wshaljlengake'ne' na' wzegake' lesh' chyoon'. ⁴⁷ Na' goll to ben' Jesúza':

—Xnoona' len ben' bishooka' zegake' lesh' chyoon' cheengakile' wshaljlen-gake' li'.

⁴⁸ Na' che' Jesúza' beena' golle'ne' ka':

—¿Noran x̄na'na' na' noran ben' bishaaka'?

⁴⁹Na'ch bli'e ben'ka' nakgake'ne' txen na' chi'e:

—Ben'kin x̄na'na' na' ben' bishaaka'.
⁵⁰La' nottezə beena' chon ka cheeni X̄a'na' zoa yabana', beenan' nake' ben' bishaa, ben' zan' na' x̄na'.

Jempl che to ben' goz goon

(Mr. 4:1-9; Lc. 8:4-8)

13 Na' lo llana'tezə wza' Jesúza' yoona' gana' zoe' na' j̄chi'e cho'a nisdona'.² Na' daa bdop ben' zan' gana' chi'e, na' wyepe' jshie' to loo barkw. Na' yog' ben'ka' bdop bllag wzegake' cho'a nisdona'zə.³ Na'ch bseese zan' jemplka' kwenche bli' bsedile' legake', chi'e:

—To ben' goz goon wzee zeje' goza'.
⁴Na' ka zej chzałee binna', bxop bałan cho'a neza' na' bllin byinka' wdaogakban.⁵ Na' zi bałan bxop ladj yajka' gana' bitek chi' yona', na' lobe' bilaan daa bi wyazan zitj.⁶ Na' ka wna'n wbillla', bkwedan na' wbillten daa bitek bde loinna'.⁷ Na' zi bałan bxop ladj yag yesh'ka', na' bgol yag yesh'ka' na' bi be'gakan latj igolgakan.⁸ Na' zi bałan bxop lo yo wenna', na' wlliachgan. Bałan wllia to guiyoa, na' zi bałan wllia guiyon na' zi bałan wllia shichoa.⁹ Ka le' chenile dga nia', li sen wneyi.

Jesúza' bzajniile' biče chzoe' jemplka'

(Mr. 4:10-12; Lc. 8:9-10)

¹⁰Na' ben'ka' nak Jesúza' txen jbig'gake' kwite'na', wna'bgakile'ne':

—¿Biče chseeso jemplka' kat' chli' chsedilo' ben'?

¹¹Na' che' Jesúza' legake':

—Chioza' cho'e latj inezile ka nak ye! wna'bia' che'na' daa kono nezi. Na' ben'ka' bi nak nad' txen, bi cho'e latj inezgakile'n.¹² La' beena' ze wneyi shajniile' Cho'a Xtill' Chioza', zizikli sha-

jni'chile'n. Na' beena' bi se wneyi shajniile'n, na' gal-lallee daa ba wyajniile' lat'.¹³ Daan chseesaa jemplka' kat' chzajniid' legake'. La' ben'ka' chwiategake' na' bi chakbe'gakile' bin zeji daa chon', na' chengakile' daa chnia' na' bi chajni'gakile' bin zejin, daa bi chajle'gake' cha'.¹⁴ Na' daa chongake' ka', chillinin ka wna dii Isafaza' ka wdixji'e daa goll Chioza'ne', daa na:

La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

¹⁵La' yichjlall'do'eka' nchol nntin, na' chongake' ka ben' ndap naguin na' ka ben' nshod' jalawin.

She! bi chongake' ka', na' shajni'gakile' daa chzajniid' legake'

na' chazan loo yichjlall'do'eka'

na' yiyaj yilengakile' dii malka' chongake',

na' yiyongakee sto ben' wen.

¹⁶Per chakomba le' chakbe'ile bi zeji diika' chle'ile chon' na' chajniile diika' chli' chsedid'.¹⁷ Dii li nia' le', zan dii ben'ka' wdixjee daa goll Chioza' legake' na' zan dii ben'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

Bizajniil Jesúza' legake' bi zeji jempl che ben' goz goona'

(Mr. 4:13-20; Lc. 8:11-15)

¹⁸Li wzenag bin zeji jempl che ben' goz goona'.¹⁹ Beena' cheni cho'a xtill' Chioza' daa chzajniin le' che ye! wna'bia' che'na', na' bi chajniile'n, nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjlall'do'ena'.²⁰ Na' beena' cheni cho'a xtill' Chioza' na' le' chibaile' chlebe'n, nake' ka ladj yajka' gana' bxop binna'

²¹ daa bitek bi loin bde na' bi bdian. La' kat' bi chak che' wa chchi' chsak' ben' le' ni che cho'a xtill' Chioza', na' lii chbejte yichje'n. ²² Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan. ²³ Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binna', na' balan wllian to guiyoa, balan do guiyon, na' zi balan wllian shichoa.

Jempl che yixaa daa bla' ladj trígona'

²⁴ Na' bsees' Jesúza' sto jempl, chi'e legake':

—Yel' wñabia' che Chioza' nakan ka to ben' goze' bin wenna' lo yell-lío che'na'. ²⁵ Per wal' chela' shlak chese', wyaj to ben' chakzbanile'ne' jeze' ladj trígona' daa nak xenin, na' ka biyoll bene' ka' bizee. ²⁶ Na' ka bgol trígona' na' wllian, na' lekzka' bgolte xeninna' ladjinna'. ²⁷ Na' wyaj wen llinka' jell-gake' xaninna': “Ben'do', ¿aaga bin wennan jezo' lo cho'na'? ¿Gara wza' xeninna' lenzan ladjinna', Ila?” ²⁸ Na' che' xaninna' legake': “Nochod' ben' chakzbanile' nad' jene' ka'.” Na' goll wen llinka' le': “¿Acheenilo' shajnto' ll-jalall'nto'n?” ²⁹ Na' chi'e legake': “Bi ll-jalall'len, la' nxoll lente trígona' wllall'le. ³⁰ San igol-lenchan trígona', na' kat' illin Ila yichoggake'n, na' yep' ben'ka' zi-gaate yilall'gake' xeninna' na' gongake'n shlen wej kwenche sheyan, na'tech yitopgake' trígona' na' yigooshao'gake'n loo lillinna'.”

Jempl che sa mostásana'

(Mr. 4:30-32; Lc. 13:18-19)

³¹ Na' lekzka' bzoa Jesúza' sto jempl, chi'e:

—Yel' wñabia' che Chioza' nakan ka sa mostásana' daa goz to ben' lo yell-lío che'na'. ³² La'kzi sa mostásana' nakan li-izelozi diido' yid lao bichlō sa yix' kwan, kat' chlā'n na' chgolan na' chakan dii xench aga ka yix' kwanka' sto, na' axt by-indo'ka' chon lillbka' lo xoziiinna'.

Jempl che levadúrana'

(Lc. 13:20-21)

³³ Na' lekzka' bzoe' sto jempl, chi'e:

—Yel' wñabia' che Chioza' nakan ka levadúrana' daa chchix' to noolō shoña rob yezja' kwenche yisgolan kwa che yetxtila'.

Jesúza' bchine' jemplka'

(Mr. 4:33-34)

³⁴ Jesúza' toshiizi bchine' jemplka' ka bi'e dill' ladj lao lkwe' ben'. ³⁵ Na' daa ben Jesúza' ka', billinin daa wdixjee to ben' daa goll Chioza'ne', ka wne': Wchin' jemplka' ka we'len' ben' dill'. We'len' ben' dill' cheyi daa konon' inezi dezd kana' bxe bsilte Chioza' yell-lioni.

Bizajnií Jesúza' bi zeji jempl che yixaa daa bla' ladj trígona'

³⁶ Na' bisa' Jesúza' ben'ka' lle' na', na' biyo'e loo yoonā. Na' ben'ka' nakgake'ne' txen jabig'gake' kwite'na' che'gake'ne':

—Bizajnií neto' bi zeji jempl che xen trígona'

³⁷ Na' goll Jesúza' legake':

—Kin zejín: Nad', Ben' Bsel' Chioza' Yell-lioni, zaklebid' beena' goz trígona'. ³⁸ Na' doxen yell-lioni zaklebin gana' goz beena' trígona'. Na' ben'ka' choe'gake' latj chñabia' Chioza' yichjlall'do'eka' zaklebgakile' trígona'. Na' ben'ka' choe'gake' latj chñabia' dii xiwaa yichjlall'do'eka' zaklebgakile' xen trígona'. ³⁹ Na' dii xiwaa zaklebin ben' mala', beena' jez ladj trígona' daa nak xenin. Na' llana' chilap-gake', zaklebin llana' kwiayi' yell-lioni.

Na' anjlka' zaklebgakile' ben'ka' chizi' chilap trigona'. ⁴⁰Na' ka chitopgake' daa nak xen trigona' kwenche wzeygake'n, ka'kzan gak che ben'ka' chnabia' dii xi-waa yichjlall'do'eka' ka illin lla kwiayi' yell-lioni. ⁴¹Nad', Ben' Bsel' Chioza' Yell-lioni, wselaa anjl cha'ka' kwenche yitopgake' ben' wen dii malka' na' ben'ka' chzechgake' ben' yoblə gongake' dii mala'. ⁴²Na' wzal'gake' legake' lo yi' gabila' gana' kwellyesh'gake' na' gaoxaxj leye'ka' daa le gakshejlall'gake'. ⁴³Na' ben' li ben' shao'ka' sho'gake' balaan choo balaan xen yabana' gana' chnabia' Xacho Chioza'. Ka le' chenile dga nia', li sen wneyi.

Jempl che mecha' ngash'

⁴⁴'Yel' wñabia' che Chioza' nakan ka to mech xen dii ngash' to lo yell-lío che ben' gana' to ben' jadi'en. Na' na'tezə bik-washeen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

Jempl che to perla dii zak'chga

⁴⁵'Yel' wñabia' che Chioza' zaklebin to ben' chone' delgens che perla dii zak'chga. ⁴⁶Na' ka bllelile' to dii liizelozi zakii, na'ch jayet' jadie' yog' dii de che' kwenche wxi'en.

Jempl che yixj che belə'

⁴⁷'Yel' wñabia' che Chioza' zaklebin to yixj che bel. Ben'ka' chzen belə' chzal'gake' yixja' loo nisdona' na' chzenan zan kwen bel. ⁴⁸Na' kat' chilla' yixja' na' chibegake'n cho'a nisdona' na' chbe'gake' chibegake' belka' nak wen na' chgooshao'gake'b to loo llom, na' baka' bi nak wen, chchoongake'b. ⁴⁹Kan' gak che benecha' ka illin lla kwiayi' yell-lioni. Anjlka' yibegake' ben' wenka' ladj ben' malka', ⁵⁰na' wzal'gake' ben' malka' lo yi' gabila' na'

kwellyesh'gake' na' gaoxaxj leye'ka' daa le gakshejlall'gake'.

Dii koba' na' dii gola'

⁵¹Na'ch che' Jesúza' ben'ka' nalgake'ne' txen:

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

⁵²Na' chi'e legake':

—Beena' chli' chsedi leya' na' nzedile' che yel' wñabia' che Chios, beena' zoa yabana', zaklebile' to xan yoo ben' ngooshawee dii zan dii zakii, ka dii kob na' ka dii gol, na' chbeje'gakan chchine'gakan.

Jesúza' biyaje' Nazareta'

(Mr. 6:1-6; Lc. 4:16-30)

⁵³Ka biyoll bsees' Jesúza' jemplka', na' bizee. ⁵⁴Na' ka billine' yell Nazareta' gana' bgole', na' bli' bsedile' ben' Israelka' chdop chllag gana' choe'lwillgake' Chioza'. Na' bibani ben'ka', che'gake':

—¿Gara jxi' beeni yel' sin' che'na', na' nak chak chone' yel' wakka'? ⁵⁵¿Aaga xiin karpintera'zan na' xneena' lie' María? Na' ¿aaga ben' bishee Jacóbona', Joséna', Simónna' na' Júdaza'? ⁵⁶Na' ben' zane'ka' zoagake' lallchoni. ¿Gara jasede' yog'lol diiki chli' chsedile', lla?

⁵⁷Na' daa bi wyajle'gake' che Jesúza', na' golle' legake':

—To ben' chyixjee daa che' Chioza'ne', gattez chgoogake'ne' balaan san lall lille'na' aga no chgoo le' balaan.

⁵⁸Na' aga bitek yel' wak ben Jesúza' yell Nazareta' daa bi wyajle'gake' che'.

Betgake' Juanna', beena'

bchoa ben' nisa'

(Mr. 6:14-29; Lc. 9:7-9)

14 Na' do kana', Heródeza', beena' chnabia' gana' mbani Galileana',

benile' ka nak daa chon Jesúza'. ²Na' golle' ben'ka' chon xshine'na':

—Beenan' dii Juanna', beena' bchoa ben' nisa'. Ba bibane' ladj ben' wetka', daan chak chone' yel' wakka'.

³La' kana' ni mban dii Juanna', Heródeza' bselee ben' bex'gake'ne' na' wloogake'ne' lillyana' ni che Herodíaza' xool ben' bisheena', beena' le Felipe. ⁴La' dii Juanna' golle' Heródeza':

—Bi nakan wen nkoo xool ben' bishoona'.

⁵Na' daa golle'ne' ka' goklall' Heródeza' wite'ne', per bi biyaxjile' daa bllebe' ben'ka' chajle' daa nak Juanna' to ben' chyixjee daa che' Chioza'ne'. ⁶Per ka wya'i Heródeza' yiz, bi' nool wew' che Herodíaza' byaab' lao ben'ka' lle' lnina'. Na' daa le biyoolallii Heródeza' ka byaab' ⁷axt bzoe' Chioza' de taschiw bchebe' wi'eb' bittezə dii inabib' le'. ⁸Na' kon ka bzajinii xna'baab' bem', na' che'b' Heródeza':

—Yichj Juanna', beena' chchoa ben' nisa', cheenid' gonon nad' to lo plat lilij.

⁹Na' gokyeshii Heródeza', per daa ba bcheble' lao yog' ben'ka' goxe' lnina' wi'eb' kon daa inabib' le', beshaze' byen we'gake'b' daa wñabb'. ¹⁰Na' bselee ben' jachogake' yichj Juanna' loo lillyana'.

¹¹Na' blligake'n to lo plat lilij na' be'gake'n bi' nool wewaa na' be'baan xna'baa.

¹²Na'ch ben'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

Jesúza' bwawe' gayaa mil ben'

(Mr. 6:30-44; Lc. 9:10-17; Jn. 6:1-14)

¹³Na' ka wñezi Jesúza' daa gok che Juanna', bizee gana' zoe' na' biyo'e to loo barkw ziyaje' gana' kono ben' lle'. Na' ka wñezi ben'ka' lle' yellka' llia gaozə cho'a nisdona' galan zej Jesúza', na'ch wloogake' nez janogake'ne'. ¹⁴Na' ka

bichej Jesúza' loo barkwa', ble'ile' ben' zan inleeb ba lle' na', na' biyeshile' le-gake' na' biyone' ben'ka' bi shao'. ¹⁵Na' ka ba wlle', na'ch ben'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaocho. Goll ben'ki ziyajgake' yellka' llia gaozə kwenche lljxi'gake' dii gaogake'.

¹⁶Na' che' Jesúza' legake':

—Bi chonan byen ziyajgake'. Len', li we' dii gaogake'.

¹⁷Na' che'gake'ne':

—Gay'chga yetxtil na' zi chopchga bel noa'nto' ni.

¹⁸Na' che' Jesúza' legake':

—Li gonshkin ni.

¹⁹Na'ch golle' ben'ka' kwe'gake' lo yixa'. Na' bexee yetxtilka' gay' na' belka' chop na' blis lawe'na' yabana' na' bi'e Chioza' yel' choxken. Na'ch bxoxje' yetxtilka' na' bi'en ben'ka' nakgake'ne' txen kwenche be'gake' che che ben'ka'. ²⁰Na' wdao yog'lol ben'ka' ax't ka beljgakile'. Na' ka bidaogake', na'ch bitopgake' di-ika' bgaan, na' biyakan shllin xet'. ²¹Na' ben' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

Jesúza' wzee lo nisdona'

(Mr. 6:45-52; Jn. 6:16-21)

²²Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nisdona' to lezgake', na' le' bigaane' kwenche bisee ben'ka' bdop bllag. ²³Na' wde bisee ben'ka', na'ch wyepe' to lo yaa kwenche jelwille' Chioza' toze'. Na' ni zetie' lo yaana' ka gol. ²⁴Na' barkwa' gana' ziyoo ben'ka' nakgake'ne' txen ba zejan gchol nisdona'. Chakan to ki to ka'lə daa chas chat' nisa', na' be'na' bi cho'en latj yiya-jan shlichā. ²⁵Na' zbalz biyetj Jesúza' lo yaana' na' bizee tlo nisdona' zeje' gana' zejləgake'. ²⁶Na' ka ble'i ben'ka'

non Jesúza' txen zeje' tlo nisa', le bllé-
bgake' na' axt besyaagake', nagake':

—¡Ba za' to yel b̄xen!

²⁷ Na' lii w̄nete Jesúza' legake', chi'e:

—Bi illeble. Nad'kzan'.

²⁸ Na'ch w̄ne Pédróna' chi'e:

—X̄an', shi lin', ben ka gak saa lo nisi
kwenche yid' kwito'na'.

²⁹ Na' che' Jesúza'ne':

—Dashka'.

Na'ch bchej Pédróna' loo barkwa' na'
wzoloé' chzee tlo nisa' nan shaje' kwit
Jesúza'. ³⁰ Per ka gokbe'ile' zechga be'na',
na' bllébe' na' lii wzolote chbi'e yel, na'ch
besyee chi'e:

—¡X̄an', bisla nad'!

³¹ Na' lii biyoxté' Jesúza' neena',
chi'ene':

—¿Berache gokchopzilo? ¿Biche bi
nxenilalloo nad' kwasol̄?

³² Na' kon ka biyoogake' loo barkwa'
na' bgan be'na'. ³³ Na' ben'ka' bgaan
loo barkwa', be'la'ogake' Jesúza' na'
gollgake':

—Dii li, lin' Xiin̄ Chioza'.

**Jesúza' biyone' ben'ka' bi
shao' gana' mbani Genesareta'**

(Mr. 6:53-56)

³⁴ Na' ka blag'gake' sh̄laa nisdona'
na' bllingake' gana' mbani Genesareta'.

³⁵ Na' ben' Genesaretka' biyombia'gake'
Jesúza' na'ch bzengakile' ben' yellka' lle'
gao nan ba bllin Jesúza'. Na' jwa'gake'
yog' ben'ka' bi shao' lawe'na', ³⁶ na'
got'yogakile'ne' wi'e latj la'ch' gox' ben'
we'ka' xe'na', na' yog' ben'ka' bex'gaken'
biyakgakile'.

Daa ch̄xinj yichjlall'do' benecha'

(Mr. 7:1-23)

15 Ba₁ fariseoka' na' ben'ka'
chli' chsedi leya', wza'gake'
Jerusalenna' na' wyajgake' lao Jesúza',
wnabgakile'ne':

²—¿Biche ben'ki nakgake' li' txen bi
chongake' ka wyoolo dii xozxto'choka'?
La' bi chixis chiyib neeka' ka zi' gaogake'.

³ Na' w̄nabi Jesúza' legake' chi'e:

—¿Biche chyishjle daa nllia Chioza'
bia' gonle na' zechle w̄neyi chonle ka
ben dii xozxto'choka'? ⁴ La' kin wna
Chioza': "Li gap x̄axna'le balaan", na'
"Beena' ine zban che xe'na' wa x̄neena',
chiyal' guete'." ⁵ Per le', nale wak ye' ben'
x̄axneena': "Bi gak gaklen' le', la' yog'
daa nap' ba n̄heb' wi'an Chioza'." ⁶ Na'
beena' yee x̄axneena' ka', cho'allalene'
daa nale bi chonan byen gaklene' le-
gake'. Na' daa chonle ka', chonile daa
nllia Chioza' bia' goncho ka to dii bibi
zakii kwenche nole diika' wyoolo dii
xozxto'choka'. ⁷ ¡Le' ben' wxiye', le' wen
gan! Kwasol̄ inlebe be' dii Isaíaza' xtill'le,
ka wne':

⁸ Ben'ki choe'la'ogake' nad' de cho'a
loll'zgake',

la' aga do yichj do lall'gaken'
choe'la'ogake' nad'.

⁹ Bibi zjanayin chonzgake' ka ben'
choe'la'o nad';

na' diika' chli' chsedgakile' nakgakan che
ben' yell-liz.

¹⁰ Na' w̄ne Jesúza' ben'ka' lle' na', golle'
legake':

—Li wzenag dga inia' le' na' li
shajniin. ¹¹ Aga daa cheej chao beñaan
ch̄xinj ch̄lenan yichjlall'do'ena', san
dill'ka' chchej cho'enan', lennan' ch̄xinj
ch̄lenan yichjlall'do'ena'.

¹² Na'ch ben'ka' nak Jesúza' txen
wbig'gake' kwite'na', gollgake'ne':

—¿Azakbe'ilo' gokzi'chgayi fariseoka'
ka bengakile' wno' ka'?

¹³ Na'ch goll Jesúza' legake':

—Nottezə ben' bi chzenague' che
X̄a'na' zoa yabana', yiyol yinite', na' gak
che' ka chak che to yag dii chlall' ben'
do loyin. ¹⁴ Jwayishazi fariseoka', la' nnit
ncholgakilen'. Na' nezicho shi to ben'

l̄chol̄ w̄chi'e sto ljwell l̄chole', choptie' lljabix.

¹⁵ Na'ch Pédróna' golle' Jesúza':

—Bizajni neto' bi zejín jempla' daa ba bseeso.

¹⁶ Na'ch goll Jesúza' legake':

—¿Alekzka' lenle bin' shajniile bi zejín daa ba wnia'? ¹⁷ ¿Abi nezile nan daa cheej chaocho chjche'n loo lee-chona' na'tech chiden? ¹⁸ Per ka nak daa chnecho, lennan' chalj chxen loo yichjlall'do'chona'. Na' shi chnecho dii bi nak wen, lennan' chxinj chlenan cho'.

¹⁹ La' loo yichjlall'do' benechan' chalj chxe diiki bi nak wen: ye! chon xya, ye! chnelen ljwellin, ye! wban, ye! chy-iljlall' che ben', na' ye! chbell chne che ben'. ²⁰ Diikin chxinjan yichjlall'do' ben', aga daa bi chixis chiyib neena' ka zi' gawen'.

**To noolə bi nak ben'
Israel benlilalee Jesúza'**

(Mr. 7:24-30)

²¹ Na' biza' Jesúza' wyaje' gana' mbani yell Tírona' len yell Sidónna'. ²² Na' to noolə cananea zoe' gana' mbani yel-lka' wbigue' kwite'na' na' wnie' zilljə, chi'ene':

—Xan', Xiin dia che dii Daví, biyesh'all'gachi nad', la' bi' nool cha'na' yoo' dii xiwaa na' le chsak'zi'n le'b'.

²³ Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' gollgake'ne':

—Goll nooli yiyaje', la' kon chosyee zidnoe' cho'.

²⁴ Na'ch goll Jesúza':

—Bsel' Chioza' nad' kwenche gaklen' to ben' Israelka'zə, ben'ka' nak ka xil'ka' wnit.

²⁵ Na'ch noola' jabigüee kwit Jesúza' na' b̄chek' xibe'na' lawe'na' chi'ene':

—¿Xan', goklengach nad'!

²⁶ Na'ch che' Jesúza'ne':

—Bi nakan wen yikaacho ye! wawa' chao bi'do' chechoka' na' we'chon bekw'ka'.

²⁷ Na'ch noola' chi'ene':

—Lekzilo', Xan', per chak chao xikw'choka' diika' chxop lo yona'.

²⁸ Na'ch goll Jesúza'ne':

—¿Noolə, nonlilall'likzo' nad'! Na' gak ka cheenilo'.

Na' katena' lii biyakteyi bi' nool che'na'.

Jesúza' biyone' ben' zan

²⁹ Na' biza' Jesúza' na', na' billine' cho'a nido' che Galileana' na' wyep'e' to lo yaa jchi'e. ³⁰ Na' ben' zan bllin lawe'na' nche'gake' no ben' bi chak sa', no ben' l̄chol̄, no ben' bi chak ine, no ben' nxin̄j, no ben' chak bichlə yillwe'. Na' bzoa-gake' legake' lao Jesúza' na' biyone' legake'. ³¹ Na' bibani ben'ka' ka gok, la' ben'ka' bi chak ine wnegake', na' ben'ka' nxin̄j biyagkatile', na' ben'ka' bi chak sa' wza'gake', na' ben' l̄chol̄ka' ble'gatile'. Na'ch yog'lol̄ ben'ka' be'la'ogake' Chios, beena' choe'la'o ben' Israelka'.

Jesúza' bwawe' tapa mil ben'

(Mr. 8:1-10)

³² Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgatile' tneza'.

³³ Na' che' ben'ka' nakgake'ne' txen:

—Per ¿ga lljxi'cho dii gao yog'lol̄ ben'ki?, la' gani lle'cho kono zoa wit' dii gaocho.

³⁴ Na'ch wñabi Jesúza' legake', chi'e:

—¿Zi bal̄chga yetxtil̄ chechoka' de?

Na' che'gake'ne':

—De gall yetxtilka' na' sto chop bel̄.

³⁵ Na'ch goll Jesúza' ben'ka' kwe'gake' lo yona'. ³⁶ Na' bexee yetxtilka' gall na'

belka' na' bi'e Chioza' ye! choxken, na' bxoje'n bi'en ben'ka' nalgake'ne' txen kwenche be'gake' che che ben'ka'. ³⁷ Na' yoguee wdao ax̄t ka belgakile'. Na' wdena' bitopgake' dii lao'ka' bichoonan, gokten zi gall xet'. ³⁸ Na' ben' byoka' wdao nalgake' tapa mil, na' bi blabgake' noolka' ni bi'do'ka' wdao. ³⁹ Na' biyoll bisa' Jesúza' legake', biyo'e to loo barkw len ben'ka' nalgake'ne' txen na' biyaj-gake' gana' mbani yell Magdálana'.

Fariseoka' na' saduceoka' wñabgakile' Jesúza' gone' to ye! wak

(Mr. 8:11-13; Lc. 12:54-56)

16 Fariseoka' len saduceoka' jawia-gake' Jesúza' na' wñabgakile'ne' gone' to ye! wak dii ile'gakile' kwenche wli'n shi Chiozan' bseleene'. ² Na' goll Jesúza' legake':

—Shlle'na' chwiale xan yabana' na' nale: “Le yillaa wx̄e, la' le nlatjcha.” ³ Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa. ⁴ Le' nakle ben' mal na' ben' bi chzenag che Chioza', chñable ile'ile' to ye! wak kwenche wli'n shi Chioza' bselee nad', per bi wliid' le' daa chñable. Lete ile'ile' sto ye! wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

Dill' wxiye' che fariseoka' zaklebin levadúrana'

(Mr. 8:14-21)

⁵ Na' ka bllingake' shlaa niso'na', ben'ka' nalgake'ne' txen go!-lall'gake' wa'gake' yetxtila'. ⁶ Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

⁷ Na' che' ljjwellgake':

—Daa go!-lall'cho wa'cho yetxtilan' ne' cho' ka'.

⁸ Na' gokbe'i Jesúza' daa che' ljjwell-gake' na' golle' legake':

—¿Biche nazle bibi yetxtila' bia'le? ¿Biche bi nxenilall'le nad' kwaslo!?

⁹ ¿Abikzan' shajniile ka nak diika' chon'? ¿Abi chjadinile kana' wdao gayaa mil ben' kon gay'zə yetxtilka' na' bal' xet' dii bixjka' bitople? ¹⁰ Na' ¿shera kana' wdao tapa mil ben' kon gallzə yetxtilka'? ¿Abi chjadinile bal' xet' dii bixjka' bitople? ¹¹ ¿Biche che yetxtila'lə wya-jnizile ka wnia' wsak'gale che levadura che fariseoka' len saduceoka'?

¹² Na' kana'ch wyajni'gakile' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

Pédrona' chi'e Jesúza'n nake' Crístona'

(Mr. 8:27-30; Lc. 9:18-21)

¹³ Na' ka bllin Jesúza' len ben'ka' nalgake'ne' txen gana' mbani yell Cesa-rea che Filípona', na'ch chi'e legake':

—¿Non na ben' yell-liona' nak', nad', Ben' Bsel' Chioza' Yell-lioni?

¹⁴ Na' che'gake'ne':

—Ba!e' nagake' nako' dii Juanna', beena' bchoa ben' nisa', na' zi ba!e' nagake' nako' Elífaza', na' zi ba!e' nagake' nako' dii Jeremífaza', na' ba!e' nagake' nako' sto ben' chyixjee daa che Chioza'ne'.

¹⁵ Na'ch chi'e legake':

—¿Shera le'? ¿Nora nale nak'?

¹⁶ Na' Simón Pédróna' chi'ene':

—Lin' Crístona', Xiin Chios yaa Chios banna'.

¹⁷ Na' Jesúza' chi'ene':

—Chakomba li' Simón, xiin Jonás, la' aga nochlan bzajni li' daa ba wno'. Xa'na' zoa yabanan' ba bzajniile'n li'. ¹⁸ Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch

ben'ka' gonlilall'gake' nad', na' ni yel' wita' bi yizoin wliayi'n ben'ka' ba wlej' kwenche nakgake' lall' na'. ¹⁹Na' gon' li' yel' wñabia' daa zaklebi to xiinya dii chsaljan yabana' gana' chñabia' Chioza'. Na' diika' ino' bi chiya' gon ben' yell-lioni, lekzka' ina Chioza' zoa yabana', na' diika' ino' wak gongake', lekzka' ina Chioza' zoa yabana'.

²⁰Na' goll Jesúza' ben'ka' nakgake'ne' txen ni to kono ye'gake' len' Crístona', beena' bsel' Chioza' inabi'e.

Jesúza' bi'e dill' witgake'ne'

(Mr. 8:31–9:1; Lc. 9:22–27)

²¹Na' lo llana' wzolo Jesúza' bzajniile' ben'ka' nakgake'ne' txen daa llia bia' gak che'. Golle' legake' chonan byen yiyaje' Jerusaléna' kwenche gake' lo na' ben' golka' chñabia' na' lo na' bñozka' chñabia' na' lo na' ben'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shon' lla yibane' ladj ben' wetka'. ²²Na'ch Pédróna' wleje' Jesúza' ladj ben'ka' chi'ene':

—Xan', jbat gak cho' ka ba wno'!

²³Na' biyechj Jesúza' chi'e Pédróna':

—Kwas ka'lə, Satanás. Cheenzilo' bi gon' daa llia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

²⁴Na' che' Jesúza' ben'ka' nakgake'ne' txen:

—Shi no cheeni gon nad' txen, chiya' wsanlall' kwine', na' izani yel' mban che'na' yen ile'ile' bittez ni cha', na' gone' ka chazlallaa. ²⁵La' beena' bi chzani yel' mban che'na', beenan' kwiayi', san beena' chzani yel' mban che'na' yen ile'ile' bittez ni cha', beenan' gat' to yel' mban che' zejli kani. ²⁶¿Bera zjanayin gap ben' yog'te dii de yell-lioni, shi le' kwiayee? Aga bi de wi'e lo laz yel' mban che'na' kwenche bi kwiayee. ²⁷La' nad', Ben' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'.

Kana'chan chixj' to to ben' kon ka dii bene'. ²⁸Dii li nia' le', ba-le lle'le ni, ni mbanle ile'ile yel' wñabia' cha'na', nad', Ben' Bsel' Chioza' Yell-lioni.

Biyak Jesúza' nlla'lə

(Mr. 9:2-13; Lc. 9:28-36)

17 Ka wde xop lla, bche' Jesúza' Pédróna', na' Jacóbona' len ben' bishee Juanna', na' to lezgake' wyajlene' to lo yaa xen. ²Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillə', na' xe'na' nakwe' gokan xtil llyish axt chey cheeni'n. ³Na' ben'ka' lle'lengake'ne' ble'gakile' dii Moiséza' na' Elíaza' chshaljengake' Jesúza'. ⁴Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shon' ransh, ton cho', ston che Moiséza' na' ston che Elíaza'.

⁵Na' ka golle' ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiinaa, beena' chakid', na' chazlall'chga' ka chone'. Li wzenag che'.

⁶Na' ben'ka' nak Jesúza' txen, ka bengakile' wne Chioza', le bllebchgakake' na' to bdoszgake' lo yona'. ⁷Na' wbig' Jesúza' kwite'ka' bexee legake', chi'e:

—Li yiyas. Bi illeble.

⁸Na' ka bilis yichje'ka', koch no ben'ka' ble'gakile', stochga Jesúza'.

⁹Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile axt kat'ch nad', Ben' Bsel' Chioza' Yell-lioni, ba biban' ladj ben' wetka'.

¹⁰Na'ch ben'ka' nak Jesúza' txen che'gake'ne':

—¿Berache naz ben'ka' chli' chsedi leya' zigaate Elíazan' yiyed'?

¹¹Na' goll Jesúza' legake':

—Dii li ka nakannan', zigaate Elíazan' yiyede' yigwee xnezi yog'lolte. ¹²Per nad' nia' le', ba biyed Elíaza', na' bi

gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Ben' Bsel' Chioza' Yell-lioni.

¹³Na' gokbe'gakile' nan che Juanna', beena' bchoa ben' nisan' cho'e dill'.

Jesúza' biyone' to bi' chaz shon

(Mr. 9:14-29; Lc. 9:37-43)

¹⁴Na' ka billingake' gana' lle' lla' ben', na'ch bchej to ben' jabigüee kwit Jesúza' na' b'chek' xibe'na' lawe'na', chi'ene':

¹⁵—Maestro, biyesh'gachi bi' cha'ni. Chazb' shon na' le chzak'zi'b'. Zan shii ba bza'la'n le'b' lo yi'na' na' lekzka' loo nisa'.

¹⁶Na' ba jwa'b' lao ben'ka' nakgake' li' txen na' bi gok yiyongake'b'.

¹⁷Na' goll Jesúza':

—¿Zi'tegalə chelena', le' ben' mal na' ben' bi chajle'? ¿Zi ka'k'tek chiyal' soalen' le'? Na' ¿zi ka'k'tek chiyal' soid' le'? Li da diwa' bi' xkwidaa ni.

¹⁸Na'ch bsheshlen Jesúza' dii xiwaa yoo'b' na' bichejan. Na' katena' biyakib'.

¹⁹Na' ka biyoll gok ka', ben'ka' nak Jesúza' txen bshaljengake'ne' to lez-gake', gollgake':

—¿Biche bi gok yibejnto' dii xiwaa yoo bi' xkwidaa?

²⁰Na' goll Jesúza' legake':

—Bi gok yibejlen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwás ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'. ²¹Kwenche gak yibejle dii xiwaa ka daa bibej' bi' xkwidaa, chiyal' soale wbas' na' soachechle we'llwill-le Chioza'.

Sto shii wdi'jee Jesúza' witgake'ne'

(Mr. 9:30-32; Lc. 9:43-45)

²²Na' shlak chdalen Jesúza' ben'ka' nakgake'ne' txen gana' mbani Galileana', golle' legake':

—Nad', Ben' Bsel' Chioza' Yell-lioni, gak' lo na' ben' malka'. ²³Na' witgake' nad', na' ka gak shon lla yiban' ladj ben' wetka'.

Na' ka golle' legake' ka', le gokyesh'gakile'.

Jesúza' wdi'je' daa chiyal' gaxj che yoodo'na'

²⁴Na' ka billin Jesúza' len ben'ka' nakgake'ne' txen Capernaúma', ben' Israelka' ben'ka' chchixj che yoodo'na' jaw-iagake' Pédrona', na' wnabgakile'ne':

—¿Achyixj maestro chelena' daa chido'cho we'cho che yoodo'na'?

²⁵Na' goll Pédrona' legake':

—Awe, chyixje'n.

Na' ka biyoo Pédrona' loo yoona' gana' zoagake', Jesúza' bkwialoe' dillaa chi'e:

—¿Nak ka chakilo', Simón? Ben'ka' chnabia' yell-lioni, ¿aben' wlall che'kan' chchixjgake'?, ¿awa ben' zit'kan'?

²⁶Na' billii Pédrona' xtilleena':

—Ben' zit'kan' chchixjgake'.

Na' goll Jesúza'ne':

—Zejin ben' wlall che'ka' bi chonan byen chixjgake'. ²⁷Per kwenche bi wshaachogake', wyaj cho'a nido'na' na' wza'loo daa chzenilo' be'la'. Na' be'le' necha' seno' wxoo cho'aba' na' loo cho'aba' yil-lelilo' to mech. Waktekzin lljtixjo' che choptecho.

Ben'ka' nak Jesúza' txen gokdilgake' nogaken' nak ben' zak'chi

(Mr. 9:33-37; Lc. 9:46-48)

18 Na' do kana'kzə, ben'ka' nak Jesúza' txen jabig'gake' kwite'na' che'gake'ne':

—¿Noran nak ben' zak'chi ladj ben'ka' chnabia' Chioza'?

²Na' wne Jesúza' to bi'do' na' bzie'b' ladje'ka'. ³Na'ch chi'e legake':

—Dii li nia' le', beena' bi yiyak yichjlall'do'ena' ka che bi'do'ni kwenche inabia' Chioza' le', bi lene' ben'ka' chnabia' Chioza'. ⁴Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxna'baa, beenan' zak'chi ladj ben'ka' chnabia' Chioza'. ⁵Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

Koll ibixcho lao dii mala'

(Mr. 9:42-48; Lc. 17:1-2)

⁶Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlegkake'ne' yel loo nisdona' aga ka daa wchixe' ben' lao dii mala'. ⁷inyesh'laz che ben' yell-lioki!, la' biga iyallji daa gonan ka wxinj wlen-gake'. Per inyesh'lazch gak che beena' gon ka wxinj wlen ben' yoblə!

⁸Na' shi noona' wa ni'ona' gonan ka ibixə' lao dii mala', naklan wen wchogo'n na' choonə'n, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol. ⁹Na' shi daa ile'ilo' kon jalawo'na' gonan ka ibixə' lao dii mala', naklan wen wlechjo'n na' choonə'n, la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabila'.

Jempl che xilaa wnit

(Lc. 15:3-7)

¹⁰Bi gonile nakzi ni to ben'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. ¹¹La' nad', Ben' Bsel' Chioza' Yell-lioni, bid' kwenche yisla' ben'ka' yoo nez daa wliayi'n legake'.

¹²¿Nak chakile? Shi to ben' lle' to guiyoa xil' che' na' nit tob, ¿abi wk-waane' baka' taplalj twalj na' shaje' ll-jadilje' bana' wnit? ¹³Na' shi yillelile'b, lech yibaile' cheb aga ka che baka' taplalj twalj baka' lle' tozga. ¹⁴Ka'kzan Xa'cho Chioza' zoa yabana' cheenile' ni to ben'ki zi' wzolo chonlilall' nad' bi kwiaiy' shel'ka'.

Chiyal' si'xencho che ben'ka' nakcho txen chonlilall'cho Chioza'

(Lc. 17:3)

¹⁵Shi to ben' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bi-zoaleno'ne' wen. ¹⁶Per shi bi wzenague' bin yoone', na'ch wchi'o sto chop ben' kwenche gakgake' taschiw che daa yoone'. ¹⁷Na' shi ni ka' bi wzenague' chele, wak ye'le yog' ben'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che ben'ka' bi wzenague', na'chan gonilene' ka to ben' bi nonlilall' Chioza' wa ka to ben' wichixj.

¹⁸Na' dii li nia' le', diika' inale bi gon ben' yell-lioni, lezkka' ina Chioza' zoa yabana', na' diika' inale wak gon ben' yell-lioni, lezkka' ina Chioza' zoa yabana'.

¹⁹Na' lezkka' nia' le', shi chople idili xtill'lana' yell-lioni kat' bi inable lao Xa' Chioza', beena' zoa yabana', na' gone' daa inabile'ne'. ²⁰La' gana' chdop chope' wa shone' choe'la'ogake' nad', na'kz zoa' ladje'ka'.

²¹Na' wbig' Pédrona' kwit Jesúza', chi'ene':

—Xan', ¿ba! shii chiyal' yizi'xen' che bish' ljjwellaa shi bi dii mal chone' cha'? ¿Azeelo gall shii?

²²Na' che' Jesúza'ne':

—Aga nia' li' zeelo gall shii yizi'xeno' che bish' l'jwello'na', san nia' li' chiyal' yizi'xeno' guiyon shin'chopə shii.^f

**Jempl che beena' bi bizi'xen
che bish' l'jwelle'na'**

²³Yel' wñabia' che Chioza' zaklebin to ben' wñabia' beena' bizi' kwent che mecha' daa chal' wen llin che'ka'.²⁴Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb. ²⁵Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoolo' na' yog'lol dii de che' kwenche yiyaxj xyana' daa llie'. ²⁶Na' beena' chbag' mecha' b'chek' xibe'na' lao xane'na', chonyeshee, chi'ene: “Xan', wdapgach yel' chx-enlall' cha', wiyixjkz' doxen daa chbagaa cho'.” ²⁷Na' xane'na' biyeshile'ne', na' bene' ka'z doxen daa chalee che', na' bisane'ne'. ²⁸Per le', ka bicheje' lill xane'na', billague' sto wen llin ben' chal' lat'do' xmeche', na' lii bniztie' yene'na' chi'ene: “iBiyon xmechaa daa chaloo!” ²⁹Na' b'chek' xib beena' lawe'na' na' chonyeshee, chi'ene: “Wdapgach yel' chx-enlall' cha', wiyixjkz' doxen daa chbagaa cho'.” ³⁰Na' bi goonile', san lii wyajtie' ji'ene' part kwenche wloogake'ne' lillyana' axt ki yiyixjche' doxen daa chalee che'. ³¹Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'. ³²Na' wizax xane'na' le', chi'ene: “Ben' mal inleeb nako'. Nad' ben' ka'z doxen daa chaloo cha' daa benyeshoo lawa'. ³³Ka'kzan nan chiyal' yiyeshilo' bish' l'jwello'na' chal' cho', ka biyeshid' li'.” ³⁴Na' daa le' bllaachga xane'na', bene'ne' lo na' ben'ka' wdixjgake'ne' lillyana' na'

wit chingake'ne' axt ki yiyixjche' doxen daa chalee.

³⁵Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che l'jwell-le do yichj do lall'le.

**Bi chiyal' yilaa l'jwell
ben'ka' nkaa cheyin**

(Mr. 10:1-12; Lc. 16:18)

19Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa lliia sh'laa yao Jordánna'. ²Na' ben' zan zjanogake'ne', na' na' biyone' ben'ka' bi shao'.

³Na' wbig' bal' fariseoka' lao Jesúza' daa goklall'gake' wi'e dill' dii wchixa'n le', na' che'gake'ne':

—¿Ade lsens yilaa xool ben' ni che bizə diido' chone' dii bi chiyoolallee?

⁴Na'ch che' Jesúza' legake':

—¿Abin' wlable gana' nan ka wxe wzil yell-lioni Chioza' bene' benecha', ben' byo na' noolə? ⁵Na' wne': “Daan, w'laa ben' byona' xaxneena' kat' ikaa che', na' soalene' xoolo'na' gakgake' toz.” ⁶Na' bich nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba b'tile' legake'.

⁷Na' gollgake'ne':

—Na' ¿biche' ben' dii Moiséza' mandad kat' to ben' yilaa xoolo'na' chiyal' w'lise' to yish dii we'n dill' bich nake' xoolo' na' wak yichoone'ne'?

⁸Na' goll Jesúza' legake':

—Yel' widenag chelenan' be' dii Moiséza' latj yilaa xool-lena'. Per ka ben' Chioza' ben' nechka', bi gokan ka'. ⁹Nad' nia' le', shi nool chelena' bi chdalene' ben' yoblə, bi chiyal' yilaaalene' na' yikaale nool yoblə, la' shi ka' gonle, na' chonle ka beena' zoalente xoolo'na' na' chdalene' noolə yoblə.

^f18:22 Guiyon shin'chopə shii: bal' yishka' nyoj de dill' griegona' nan gall shii de guiyonshin'. Per chopten zejın toshiizi chiyal' yizi'xencho che ben'.

¹⁰Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

¹¹Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n.

¹²La' de dii chllonan wshagna' ben'. Bal ben' bi chshagna'gake' daa bi nak kwerp che'ka' wen ka chaljtegake', na' zi bale' bi chshagna'gake' daa bxinj benecha' kwerp che'ka'. Na' zi bale' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

Jwa'gake' bi'do'ka' lao Jesúza'

(Mr. 10:13-16; Lc. 18:15-17)

¹³Na' wyaj ben' jwa' bi'do' che'ka' lao Jesúza' kwenche wxoaxa neena' yichjb'ka' na' we'lwille' Chioza' ni chegakb'. Per ben'ka' nakgake'ne' txen bsheshlengake' ben'ka' zjwa' bi'do'ka'. ¹⁴Na' goll Jesúza' legake':

—Li we' latj yid bi'do'ki lawa'ni, bi wlonle, la' Chioza' chnabi'e loo yichjlal'do' ben'ka' nak ka legakb'.

¹⁵Na' ka biyoll bxoa na' Jesúza' yichj bi'do'ka', na'ch bizee ziyaje' gan yoblé.

To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

¹⁶Na' bllin to bi' wew' lao Jesúza' che'b' le':

—Maestro, ¿bi dii wennan' chiyal' gon' kwenche gat' to yel' mban cha' zejli kani'?

¹⁷Na'ch goll Jesúza' le'b':

—¿Biche chnabzilo' nad' che daa nak wen? Toz Chioza' nake' ben' wen. Na' shi cheenilo' gat' to yel' mban cho' zejli kani, chiyal' gono' diika' bllia Chioza' bia' goncho.

¹⁸Na' goll bi' wewaane':

—¿Bera diika' chiyal' gon', lla?

Na' che' Jesúza':

—Bi wito' ben', bi soaleno' nool bi nak nool cho', bi kwano' bi de che ben', bi chiljalloo bizə gon ino' che ben'. ¹⁹Wdap balaan xaxnoona' na' goki bish' ljjwello'na' ka chaki kwino'.

²⁰Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

²¹Na' goll Jesúza' le'b':

—Shi lezkilo' cheenilo' gako' dowalj ben' li ben' shao', biyaj jayet' yog' dii de cho' na' xmechinna' wyoon ben' yesh'ka', na' yido' gono' nad' txen. Na' kat' yillino' yabana' na' gon' Chioza' li' yel' shawaa.

²²Na' ka beni bi' wewaa dga, nyesh' inlleb gokib' na' biza'b', la' bi' wni'a nllleban nakb'.

²³Na' goll Jesúza' ben'ka' nakgake'ne' txen:

—Dii li nia' le', lallj inlleb chonan che ben' wni'ana' yilline' yabana' gana' chnabia' Chioza'. ²⁴Sto shii nia' le', lobe'ch te to kamey to xan yesh' aga ka to ben' wni'a yilline' yabana' gana' chnabia' Chioza'.

²⁵Na' bibangakile' ka wne', na' che' ljjwellgake':

—¿Notg gak yillin lao Chioza', shka'?

²⁶Na' bwia Jesúza' legake', na' golle':

—Ni to ben' yell-liona' bi gak gone' dga, san Chioza' yog'lolte chak gone'.

²⁷Na' che' Pédrone'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

²⁸Na' che' Jesúza' legake':

—Dii li nia' le', kat' illin lla yikob yog'lol' dii de, nad', Ben' Bse' Chioza' Yell-lioni, kwi'a inabi'a gana' sho'a bal-aan xen wal, na' le', shllinte'le, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che ben' Israelka'. ²⁹Na' nottez beena' ba wlej yichje' lille'na', ben' bisheeka', ben' zane'ka', xaxneeka', wa xiin xoolé, wa yell-lío che' ni cha', Chioza'kzə w'ene'

dii zak' dii xen inlebbch aga ka daa wlej yichje', na' lekzka' wi'ene' to ye! mban zejli kani. ³⁰Per ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gake'gake' ben' zakii.

Jempl che wen llinka'

20 Na' wna Jesúza':
 —Ye! wñabia' che Chioza' chzaklebin daa gok che to xan yell-lío beena' naz yag uvana'. Na' shzildo' wzee zeje' zjtilje' wen llinka' kwenche lljengake' llinna' gana' naze' yag uvaka'.
²Na' bgaangake' dill chixje' legake' che lla, na'ch bselee legake' gana' lljengake' llinna'.
³Na' ba gok shon gor chon ben' nechka' llinna' ka wyaje' dii yoblə gana' chak yaana', na' ble'ile' lle' ben' bibi llin de gongake'.
⁴Na'ch chi'e legake': "Li shaj li lljen llinna' gana' naz' yag uvana' na' chixj' le' daa chido!le." Na' wza'gake' zejgake' llinna'.
⁵Na' do ka gobill wizaje' dii yoblə, na' lekzka' chida shonə, bizlilele' ben' yoblə lljengake' llin che'na'.
⁶Na' do ka chida gay', wizaje' dii yoblə na' bizle'ile' ben' lle'z'gake'. Na'ch chi'e legake': "¿Biche bi benle llinna' naanlla?"
⁷Na' goll ben'ka'ne': "La' ni to kono bche' neto' llinna'." Na' golle' legake': "Li shaj, lla, li lljen llinna' gana' naz' yag uvana'." ⁸Na' ka wzeles yela' na' che' xan yag uvana' beena' ngoo lo nee llinna': "Biyax wen llinka' na' wdixjgake'. Zigaate ben'ka' zi' wyoo llinna' chixjo', na' yiyoll-lin ben'ka' wzolo nech." ⁹Na' bene' kon ka goll xane'na', na' wdixje' zigaate ben'ka' wyoo llinna' do ka chida gay'. Na' wdixje' to toe' che llakzə. ¹⁰Na' ka goll chixje' ben'ka' wyoogake' llinna' shzildo', gokgakile' wxoache' laxje'ka'. Per bich bi bxoe' san che llachokzə wdixje' legake'. ¹¹Na' ka ba nox'gake' laxje'ka', wzologake' biz chon chnagake' che xan llinna', ¹²na' gollgake'ne': "Do

lla wzento' lo bana' bennto' xshino'na' na' toz ka wdixjo' neto' len ben'ka' zi' wyoo, na' zi' tgorchga bengake' llinna'." ¹³Na' che' xan llinna' toe': "Bish'dawaa, aga bi laxjo' chzeshaa. ¿Aaga bgaancho dill che llan chixj' li'? ¹⁴Wkaa laxjo'na', na' biyaj. Nad' cheenid' chixj' ben'ka' wyoo llinna' ba wll'e'ch ka to daa ba wkoo. ¹⁵Jwayishaz nad' bi gonid' xmechaa. ¿Anti chakziilo' daa chonid' ben' wen?"

¹⁶Na' ka wde bzoa Jesúza' jempli, na' chi'e ben'ka':

—Ka'kzan ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gake'gake' ben' zakii.

Sto shii wdixjee Jesúza' witgake'ne'

(Mr. 10:32-34; Lc. 18:31-34)

¹⁷Ka ziyaj Jesúza' Jerusalénna' wñie' to ben'ka' shllinzə, chi'e:

¹⁸—Naa ba ziyajcho Jerusalénna', gana' gongake' nad', Ben' Bse! Chioza' yell-lioni, lo na' bxozka' chñabia' na' lo na' ben'ka' chli' chsedi leya', na' wchoglogake' witgake' nad'.
¹⁹Na' gongake' nad' lo na' ben'ka' bi nak ben' Israel kwenche wtitjgakile' nad' na' wit chingake' nad', na'tech wda'gake' nad' lee yag cruza', per ka gak shon lla yiban' ladj ben' wetka'.

Daa wñab xña' Jacóbona' len Juanna' lao Jesúza'

(Mr. 10:35-45)

²⁰Na' Jacóbona' len Juanna', ben'ka' nak xiin Zebedewa', wbig'lengake' xneeka' kwit Jesúza', na' xneeka' bchek' xibe'na' lawe'na' wñabile'ne' to goklen.
²¹Na' goll Jesúza'ne':

—¿Bera goklenan cheenilo' gon' cho'? Na' golle'ne':

—Cheenid' gongacho' goklen kweko' bi cha'ki shlaa wej kwito'na' kat'ka' illin lla inabi'o.

²²Na' goll Jesúza'ne':

—Ni bi nezile bin chnable. ¿Awizoile wtił-le yel' zak'zi'na' ka daa wtił' na' gak chele ka daa gak cha'?

Na' gollgake'ne':

—Wizokzinto'n.

²³ Na' goll Jesúza' legake':

—Lekzile wtił-le ka daa wtił', na' gak chele ka daa gak cha', per daa nale kwe'le shłaa wej kwitaa bi nak lo na' gon' ka nale, san Xa'nan' ba mbeje' ben'ka' wi'en.

²⁴ Na' ben'ka' zi shi, bllaagake' Juanna' len Jacóbona' daa wñabgake' kwe'gake' kwit Jesúza'. ²⁵ Na' bitop Jesúza' legake', na' chi'e:

—Nezkzile zoa ben' wñabia' na' ben' zakii che to to yell na' chongakile' kon daa nazan chegake' ben' yell che'ka'.

²⁶ Per aga kan' chiyal' gonle. Shi nole cheenile gakle ben' mbejlawin chiyal' gakle ka to ben' chon xshin ben'. ²⁷ Na' shi nole cheenile gakle ben' zakii, chiyal' gakle ka ben' ndoo lla yel chone' xshin ben'. ²⁸ Ka nak nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'ni kwenche yisla' ben' zan lao saaxya che'ka'.

Jesúza' biyone' chop ben' lchol

(Mr. 10:46-52; Lc. 18:35-43)

²⁹ Na' ka biza' Jesúza' yell Jericóna' len ben'ka' nakgake'ne' txen, ben' zan inlebb janogake'ne'. ³⁰ Na' cho'a neza' chi' chop ben' lchol, na' ka bengakile' bide Jesúza' kwite'ka' na'ch besyaagake', che'gake':

—¡Xan', xiin dia che dii Daví, biyesh'lall'gachi neto'!

³¹ Na' ben'ka' zejlen Jesúza' bsheshlengake' legake' kwenche nan kwe'gake' lliz, per ziziklā besyaachgake', che'gake':

—¡Xan', xiin dia che dii Daví, biyesh'lall'gachi neto'!

³² Na'ch wlez Jesúza' na' wñie' ben' lcholka', na' chi'e legake':

—¿Beran cheenile gon' chele?

³³ Na'ch che' ben' lcholka'ne':

—Xan', bengach ka ile'into'.

³⁴ Na' biyesh'lallii Jesúza' legake' na' bexee jalawe'ka'. Na' katena' gok ble'gakile' na' janogake' Jesúza'.

Bllin Jesúza' Jerusalénna'

(Mr. 11:1-11; Lc. 19:28-40; Jn. 12:12-19)

21 Na' ka ba zoa yillingake' Jerusalénna', bllingake' cho'a yell Betfagéna' daa llia kwit Yaa Olívoza'. Na' wlej Jesúza' chop ben'ka' nakgake'ne' txen na' bselee legake' yella'. ² Na' chi'e legake':

—Li shaj yella' daa llia shłaana'. Na' ile'ile to burr ba noolē da'b yag na' nche' to xiindo'b. Na' wsell-leb wche'legakb nilē. ³ Na' shi no bi ina le', na' ye'lene': “Xannto'nan' chyaljile' legakb, na' lii yidsantento'gakb.”

⁴ Na' daa gok ka', billinin ka bzej dii beena' wdixjee daa goll Chioza'ne' daa wne':

⁵ Li ye' ben'ka' lle' yell Siónna':

“Li wwia, ba za' ben' wñabia' chelena', nake' ben' gaxjlall' na' llie' to burrdo'; xiin to ba choa' yoa'.”

⁶ Na' wza' ben'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka golle' legake'. ⁷ Na' jxi'gake' burra' len xiinba' na' bche'gake' legakb kwit Jesúza'. Na'ch bxoagake' xe'ka' koll'bka', na'ch wllia Jesúza'b zeje' Jerusalénna'. ⁸ Na' ben' zan wdixjgake' xe'ka' tneza', na' zi bale' bchoggake' no zin na' wdixjgake'n tneza' gana' zeje'. ⁹ Na' ben'ka' llialo lao Jesúza', na' ka'kzā ben'ka' nogake'ne', wzologake' chosyaa-gake', nagake':

—¡We'la'ocho beeni nak xiin dia che dii Davina'! ¡Gonleeyshga Xancho Chioza' beeni ba bselee! ¡Li da we'la'ocho Chioza' zoa yabana'!

¹⁰ Na' ka wyoo Jesúza' yell Jerusalénna', na' yog' ben'ka' lle' na' blesh bcheengake', nagake':

—¿Noraz beeni bla' ni, lla?

¹¹ Na' ben'ka' che'gake':

—Beenin Jesúza' ben' Nazareta' yell daa mbani Galileana', beena' chyixjee daa che' Chioza'ne'.

**Bishesh Jesúza' ben'ka' chit'
chde lesh' chyoodo'na'**

(Mr. 11:15-19; Lc. 19:45-48; Jn. 2:13-22)

¹² Na' wyoo Jesúza' lesh' chyoodo'na' na' bisheshe' yog' ben'ka' chit' chde na'. Na'ch bishi'e mes che ben'ka' chsha' mecha' na' bzoles bzolline' gana' chi' ben'ka' chit'gake' palomka'. ¹³ Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'llwill ben' nad'”, na' le', ba nonzlen ka to ga chdop chllag wban.

¹⁴ Na' shlak zoa Jesúza' yoodo'na', bal ben' lcho'l na' ben' bi chak sa'gake' wen bllingake' lawe'na', na' biyone' legake'.

¹⁵ Na' b'xozka' chn'abia' na' ben'ka' chli' chsedi leya' le bllaagake' ka ble'gakile' ye'l' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “¡We'la'ocho beeni nak xiin dia che dii Davina!” ¹⁶ Na' gollgake' Jesúza':

—¿Achenilo' ka na bi'do'ka'?

Na' chi'e legake':

—Awe, chenzkid'. ¿Abin' wlable Cho'a Xtill' Chioza' gana' na:

Chch'ino' cho'a loll' bi' xkwid'do'ka' na' bdo'ka' ni chall' chxop kwenche cho'l chnegakb' li' ka chiyal' we'la'o ben' li'?

¹⁷ Na'ch bicheje' ladj ben'ka', na' bizee yell Jerusalénna' ziyaje' yell Betániana' gana' wdie' yel.

**Jesúza' bene' ka wbill to yag yixwew
(Mr. 11:12-14, 20-26)**

¹⁸ Na' betiyo biza'gake' shzildo' yell Betániana' kwenche biyajgake' yell Jerusalénna' dii yoblə, na' tneza' wzolo chdon Jesúza'. ¹⁹ Na' ble'ile' to yag yixwew dii zoa cho'a neza', na' jawie'

shi llian. Per zeelo xlaguinna'z llia. Na' golle'n:

—¡Batch kwio' yixwewa'!

Na' katena' lii wbillte yaga'. ²⁰ Na' ka ble'i ben'ka' nakgake'ne' txen ka gok, le bibangakile', na' che'gake'ne':

—¿Berache lii wbilltelikazə yag yixwewa'?

²¹ Na'ch che' Jesúza' legake':

—Dii li nia' le', shi nonlilall'le Chioza' na' bi gakhoplall'le, aga daazan gak gonle, san wakte ye'le yaani: “Bkwaa, na' jsoa loo nisdona'”, na' gak ka ye'len. ²² Na' yog' daa inabile Chioza' ka we'llwill-lene' gonkze'n kon shi nonlilall'lene'.

**Ye'l' wñabia' che Jesúza'
(Mr. 11:27-33; Lc. 20:1-8)**

²³ Na' wyaj Jesúza' dii yoblə yoodo'na' kwenche jali' jasedile' ben'ka'. Na' shlak chli' chsedile' legake', b'xozka' chn'abia' na' ben' golka' chn'abia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben' li' ye'l' wñabia'na'?

²⁴ Na' goll Jesúza' legake':

—Lekzka' de to dii cheenid' inabid' le'. Na' shi le' inale nad' daa inabid' le', na' inia' le' no lsens cheyi chon' yog' diiki. ²⁵ Li inashki nad', ¿noran bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to lez-gake', nagake':

—Shi ye'chone' Chioza' bseleene' na'ch ine' cho': “¿Biche bi wyajle'le che', lla?”

²⁶ Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lole' chajle'gake' Chioza' bselee Juanna' kwenche bidtixji'e daa golle'ne'.

²⁷ Na'ch che'gake' Jesúza':

—Bi nezinto' non bsel' dii Juanna'.

Na' goll Jesúza' legake':

—Lekzka' nad', aga wnia' le' nora lsens cheyin chon' diiki.

Jempl che chop xiin ben'

²⁸ Na' goll Jesúza' legake':

—¿Bi ka inale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana.” ²⁹ Na' che' xiine'na'ne': “¿Bi sha!” Per na'tech biyajib' na' wyajkzb' jem' llinna'. ³⁰ Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha.” Per bi wyajb'. ³¹ Li inashki, ¿nora bi'ka' chop ben ka cheeni xab'ka?

Na' goll ben'ka'ne':

—Bi'na' golle' ka' dii nech.

Na'ch che' Jesúza' legake':

—Dii li nia' le', ben' wichixjka' na' noolə wdaka', lelgaken' zigaate we'gake' latj inabia' Chioza' legake' aga ka le'. ³² La' ka bid Juanna' bchoe' ben' nisa', bidzajniile' le' ka chiya' soa kwezle, per le' aga wyajle'le' che', lete ben' wichixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le' che'.

Jempl che wen linka' nak ben' mal

(Mr. 12:1-12; Lc. 20:9-19)

³³ Li wzenag jempli sto. Wzoa to ben' biyaze' yag uva lo yell-lío che'na' na'ch wlo'en leej, na'tech benshawee to ga wsi-gake' uvaka'. Na' lekzka' bene' to yoo sibə gana' kwia beena' gap wwie'n.

Na'tech bene'n lo na' to chop ben' na' wzee zeje' zit'. ³⁴ Na' ka goll' yishib-gake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche' lljaxi'gake' uvaka' daa chidolee. ³⁵ Per ka bllingake' gana' lle' ben'ka' chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekgake'ne' na' beena' sto btakwgake'ne' yaja'. ³⁶ Na'ch bsel' xan yag uvaka' zanch wen llin che'ka' aga ka to ben'ka' bselee dii nech,

per ben'ka' chap yag uvaka' bengakile' le-gake' ka bengakile' ben' nechka' bllin.

³⁷ Na'ch xan yag uvaka' bselee kwinkz xiine'na', chakile': “Wapgake' balaan bi' cha'ni na' we'gake'b' daa chidołaa.” ³⁸ Per ben'ka' chap yag uvaka' ka ble'gakile' xiine'na', na'ch che' ljwelle': “Bi'nin xiin xan yag uvaki na' leban' yigaanlem' yog' dii nape'. Li da witchob' kwenche' yigaanlencho daa gaki cheb'.” ³⁹ Na'ch bex'gake'b' bibejgake'b' gana' lle' yag uvaka' na' betgake'b'.

⁴⁰ Na' Jesúza' chi'e ben'ka' lle' na':

—¿Nakra ka chakile gon xan yag uvaka' che ben'ka' chapgake'n ka illine' kwine'?

⁴¹ Na' che' ben'ka':

—Ba nakten wite' legake' na' bi yiyeshile' legake' daa nakgake' ben' mal. Na' yiyone' yell-lío che'na' lo na' ben' yoblə, ben' yiyoe'gake'ne' daa chidolee kat' yishibgake'n.

⁴² Na' goll Jesúza' legake':

—¿Abigan' wlable Cho'a Xtill' Chioza' gana' na: Yaja' daa bi wyoolall' wen yooka', leyen'lannan' yaja' daa ba nchejcha yoonaa'.

Dgan ben Xancho Chioza' na' nakan to dii yibanicho?

⁴³ Daan nia' le', kon ka gon xan yag uvaka' yiyone' yell-lío che'na' lall' na' ben' yoblə, ben' gongake' ka cheenile', ka'kzan gon Chioza' chele. Kwej yichje' le', na' ben'ka' wzenaggake' che', si'gake' banez yel' wñabia' che'na'. ⁴⁴ Na' ka nak yaja', nottezə ben' lljchaze' lawinna' kwiayee, na' shi idakwan ben', axt wshoshjan le'.

⁴⁵ Na' ka biyoll bzenag bəozka' chñabia' na' fariseoka' jemplki bzoa Jesúza', na'ch gokbe'gakile' chegake'n chñie'. ⁴⁶ Na'ch goklall'gake' gox'gake'ne', per bi biyaxjgakile', la' bllebgake' ben'ka' lle' na' daa chajle'gake'

Jesúza' nake' to ben' chyixjee daa che' Chioza'ne'.

Jempl che to wishagna'

22 Na' Jesúza' bseesile' legake' sto jempl, chí'e:

²—Yel' wñabia' che Chioza' chzak-lebin to ben' wñabia', ben' bene' to lñi che xiñe'na' ka bshagna'b'. ³Na' bselee wen llin che'ka' lljanegake' ben'ka' ba bye', per ben'ka' bye' bi goongakile' shaj-gake'. ⁴Na'ch bizselee zi shkwen wen llin che'ka' chí'e legake': "Li lljell ben'ka' ba bya' yid lñi che bi' cha'na' ba de daa gaocho. Ba betgake' goon cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho."

⁵Per ben'ka' ba bye' bi bengake' kwent daa goll wen llinka'. Toe' wyaj jawia' yell-lío che'na' na' stoe' wzee zeje' delgens che'na'. ⁶Na' ben'ka' sto bex'gake' wen llinka' na' biya dii bengakile' legake' axt ka witgake'. ⁷Na' le bllaachga ben' wñabia'na', na'ch bselee soldad che'ka' kwenche jetgake' legake' na' bzeygake' yell che'ka'. ⁸Na'ch chí'e wen llin che'ka' sto: "Ba gok daa yeej gaocho, na' wentelan bi wlen ben'ka' bya'. ⁹Na' li shaj lyell na' li wche' kon no ben' yillagle tneza' kwenche yidgake' yeej gaogake'."

¹⁰Na'ch wza' wen llinka' zejgake', na' jxi'gake' kon no ben' billaggake', ka ben' wen ka ben' mal. Na' billa'cha lill ben' wñabia'na'.

¹¹'Na' ka wyoo ben' wñabia'na' chwie' ben'ka' ba ndop nllag, na' ladj ben'ka' len to ben' bi nakw xe'na' daa chiyal' gakwe' gana' chak wishagna'na'. ¹²Na' goll ben' wñabia'na'ne': "Bish'dawaa, ¿nakra gok wyoozo' na' bi nakw xo'na' daa chiyal' gako' kwenche leno' gani chak wishagna'ni?" Na' beena' bikzə bi billet-lallee yeene'. ¹³Na'ch che' ben' wñabia'na' ben'ka' chde yel' wawa': "Li wchej ni'a na' beeni na' li yibeje' na' li wzalee gana' shgasj shchol, gana'

kwellyeshee na' gaoxaxj leye'na' daa le gakshejlallee." ¹⁴La' ben' zan nak ben'ka' chax chñab Chioza', per balchgagake' kweje' gagake' lall' nee.

Wñabgakile' Jesúza' shi chiyal' chixjgake' daa chñab ben' wñabia'na'

(Mr. 12:13-17; Lc. 20:19-26)

¹⁵Na' biza' fariseoka', na' wloogake' xñezi naklə gongake' kwenche we' Jesúza' dill' dii wchix'an le'. ¹⁶Na'ch bsel'gake' bal ben'ka' nakgake'ne' txen na' zi bal ben'ka' nak Heródeza' txen kwenche wyajgake' lao Jesúza' na' jellgake'ne':

—Maestro, ñezinto' nako' ben' li ben' shao' na' chli' chsedilo' ben' che nez li che Chioza' kon ka nakan, na' bi chshoo cho'a xtilloona' lao nottezə ben', la' bi chwio' no nakgake'. ¹⁷Daan cheeninto' inagacho' neto' nak ka chakilo': ¿Achiyal' chixjcho daa chñab ben' wñabia' Césara', anti bi chiyal' chixjchon?

¹⁸Na' gokbe'i Jesúza' aga do lall'gaken' gollgake'ne' ka', na'ch chí'e legake':

—Le' ben' wxiye', aga dii leilen nale ka'. ¹⁹Li wli'shki nad' to mech daa chyixjile ben' wñabia'na'.

Na' be'gake'ne' to mech. ²⁰Na' goll Jesúza' legake':

—¿Nora cho'alawin na' no leyin da' lee mech?

²¹Na'ch che'gake'ne':

—Che ben' wñabia', Césaran'.

Na' che' Jesúza' legake':

—Na'len, li we' Césara' daa naki che', na' lekzka' li we' Chioza' daa naki che'.

²²Na'ch bibangakile' daa goll Jesúza' ka'. Na' biza'gake' kwite'na' ziyajgake'.

Saduceoka' wñabgake' nak gak kat' yiban ben' wetka'

(Mr. 12:18-27; Lc. 20:27-40)

²³Na' lo llana'kzə saduceoka', ben'ka' bi chajle'gake' yiban ben' wetka', wyaj-gake' lao Jesúza', na' wñabgakile'ne':

²⁴—Maestro, dii Moiséza' wne' shi to ben' byo guete' na' kono xiine' wzoa, ben' bisheena' chiyal' yikee xool dii ben' bisheena' kwenche soa xiin dia che dii ben' weta'. ²⁵Na' ki gok che gall bish' ben' nakgake' neto' txen. Ben' necha' bshagnee, na' wite' na' kono xiine' wzoa, na' ben' bishee, ben' wchopina', bikee xoolena'. ²⁶Na' lekzka' wit ben' wchopina' na' kono xiine' wzoa. Na' ka'kzə wit ben' wyonina' na' axt biyate ben'ka' gall wit. Na' ni togake' bi wzoa xiingake'. ²⁷Na' ka wde wit yog'lole' na'ch lekzka' wit noola'. ²⁸Na' kat' yiban ben' wetka', naa, ¿nora ben'ka' gall bish' gaki xoolle' noola'? la' yog'lole' wkaagake'ne'.

²⁹Na'ch che' Jesúza' legake':

—Naklejjizen daa bi nezile ka na Cho'a Xtill' Chioza', na' ka nak ye! wak che'na'. ³⁰La' kat' yiban ben' wetka', koch no yikaa ljwellin, ni koch no wit' wde xiinin, san yiyakgake' ka anjlka' lle' yabana'. ³¹Na' ka nak daa yiban ben' wetka', naa, ¿abin' wlable daa wna kwin Chioza', gana' nan: ³²“Nad nak' Chios che Abrahama', Isaaca' na' Jacoba'”? Na' bi nake' Chios che ben' wet, san nake' Chios che ben' ban, la' lao Chioza' mban ben'ki.

³³Na' ka beni ben'ka' lle' na' daa wna Jesúza', le bibangakile' ka chli' chsedile'.

Daa lliarote daa bllia Chioza' bia' goncho

(Mr. 12:28-34)

³⁴Ka wnezi fariseoka' ba wlekli Jesúza' saduceoka', na'ch wyajgake' kwite'na'. ³⁵Na' to beena' chli' chsedi leya' wnable' Jesúza' kwenchezə wchixeene', chi'e:

³⁶—Maestro, ¿beran lliarote nllia leya' bia' goncho?

³⁷Na' Jesúza' golle'ne':

—“Chiyal' gakilo' Xancho Chioza' do yichj do lalloo na' axt ga zeelo chajni-ilo.” ³⁸Dgan liizelozi chonte na' lliaron

lawi yog' diika' nllia leya' bia'. ³⁹Na' de wchopina' nakan katekzə dii necha', na' nan: “Chiyal' gakilo' bish' ljwello'ka' ka chaki kwino’.” ⁴⁰Na' diiki chop chejin doxen ka na leya' len diika' bzej dii ben'ka' wdixjee daa goll Chioza' legake'.

Cristona' nake' xiin dia che dii Davina'

(Mr. 12:35-37; Lc. 20:41-44)

⁴¹Na' shlak ndop nllag fariseoka' kwit Jesúza' ⁴²wnable' legake':

—¿Nak ka chakile che Cristona', beena' inabia'? ¿No xiin dia cheyin nake'?

Na' che'gake'ne':

—Xiin dia che dii Davinan'.

⁴³Na' che' Jesúza' legake':

—Na' ¿berache ben Espiritu Sántona' ka goll dii Davina'ne': “Xan’”? La' kin na daa bzeje':

⁴⁴Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li.”

⁴⁵Na' shi kwin dii Davina' golle' Cris-tona': “Xan’”, ¿berache nazle nake' xiin dia che', shka'?

⁴⁶Na' ni toe' bi gok yilliigake' xtilleena'. Na' zeelo kana' koch no biyaxji bi inabgakile'ne'.

Jesúza' chawe' xya che fariseoka' na' ben'ka' chli' chsedi leya'

(Mr. 12:38-40; Lc. 11:37-54; 20:45-47)

23 Na'ch Jesúza' golle' ben'ka' nakgake'ne' txen len ben'ka' lle' na', chi'e:

²—Ben'ka' chli' chsedi leya' na' fariseoka' nak lo na'gake' wzajni'gakile' ben' daa bzej dii Moiséza'. ³Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle. ⁴Dii zan dii che'gake' ben' chiyal' gongake', na' nakan ka to yoa' xen dii chwa'gake'

ben' dii kono so saki, na' legake' bikz bi chda na'gake' kwenche gaklengake'.⁵ Na' yog' diika' chongake' chongake'n kwenchezə ile'i ben' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtill' Chioza' daa chda' loxgue'ka' na' daa chchel neeka' chongake'n dii xench aga ka che ben' yoblə, na' chtonchgabe' lox xe'ka' aga ka che ben' yoblə.⁶ Na' kat' chajgabe' lnika', le chibagakile' kwe'gabe' gana' chbe' ben'ka' zakii, na' lekzka'yen' chjengake' gana' chdop chllaggake' choe'llwillgabe' Chioza'.⁷ Na' le chibagakile' gap ben' legake' balaan kat' chillaggake' legake' ga lle' lla' ben' na' ye'gabe' legake': "maestro".

⁸San le', bi we'le latj ina ben' le' "maestro", la' toz nadaan nak' Maestro chele na' yog'le nakle ka bish' l'jwellin.⁹ Na' kono ye'le "xa" lo yell-lioni, la' toz Chioza', beena' zoa yabana', nake' Xale.¹⁰ Ni bi we'le latj inagake' le' "maestro", la' toz nad', Cristo, nak' Maestro chele.¹¹ La' beena' nak ben' gaxjlall' na' chaklene', beenan' nake' ben' zak'chi lad-jlena'.¹² Na' beena' chon kwine' ben' zakii, Chioza' gone'ne' ben' bibi zakii. Na' beena' chon kwine' ka ben' bibi zakii, Chioza' gone'ne' ben' zakii.

¹³iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chsej chllonle gombia' ben' yel' wñabia' che Chioza', na' ni bi choe'le latj inabi'e le', ni bi choe'le latj che ben'ka' cheengakile' inabi'e legake'.

¹⁴iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chkaale lill nool wizebka' na' choe'llwill-le Chioza' ssha nllleb kwenche gaki ben' nakle ben' wen. Na' daa chonle ka', Chioza' wsak'zi'che' le' aga ka ben' yoblə.

¹⁵iNyesh'laz gak chele, le' chli' chsedile' leya' na' le' fariseo, daa nakle ben' wxiye'! Chdale to ni to na' chyiylje

ben' wsede' daa chli' chsedile. Na' kat' chllelilene' chónlene' ben' malch aga ka le' na' chlliaiy'chlene' axt choplə ka to ba mbiayi'le.

¹⁶iNyesh'laz gak chele, le' nakle ka ben' lchol, ben' chakile' wak wchi'e sto ben' lchol! La' nale: "Shi to ben' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n." Na' chiznale: "Shi wzoe' de taschiw ora' daa de loo yoodo'na', na'chan chiya' gone' daa bchebe'." ¹⁷iLe' nakle ka ben' lchol daa bi nteyile! ¿Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios.¹⁸ Na' lekzka' chiznale: "Shi to ben' wchebe' to dii gone' na' wzoe' de taschiw gana' chzeygabe' bayix'ka' chitgabe' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiya' gone' daa bchebe'." ¹⁹iLe' nakle ka ben' lchol daa bi chajniile! ¿Abi chakbe'ile' gana' chzeygabe' bayixaa chzanile we'le Chioza' zak'chan aga ka bayixaa chzeygabe' lawinna'?, la' gana' chzeygabe'b chonan leb ba che Chios.²⁰ La' beena' chcheb wi'e to dii wi'e na' chzoe' de taschiw gana' chzeygabe'b, aga toz lennan' chzoe' de taschiw, san lekzka' len yog' daa xoa lawinnan'.²¹ Na' beena' chcheb wi'e to dii wi'e na' chzoe' de taschiw yoodo'na', aga toz yoodo'nan' chzoe' de taschiw, san lekzka' len Chiozan' daa nakan lill xlatje'.²² Na' lekzka' beena' chcheb wi'e to dii wi'e na' chzoe' de taschiw yabana', aga toz yabanan' chzoe' de taschiw, san len Chiozan' daa nakan gana' chñabi'e.

²³iNyesh'laz gak chele, le' chli' chsedile leya' na' le' fariseo, daa nakle ben' wxiye'! Choe'le Chioza' diézmona' axt len yixweja', aníza', na' cominna', per bi chonle daa lliotech daa nllia Chioza' bia' goncho. Dii lliotech

goncho daa nak shli, yiyesh'lalicho ben', na' gonlilall'cho Chioza' do yichj do lall'cho. Diikin chiya! gonle, per lekzka' bi chiya! wsanle gonle diika' sto. ²⁴¡Le' nakle ka to ben' l'chol ben' chakile' wak wchi'e sto ben' l'chol! Na' chonle ka to ben' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

²⁵¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! Nakle ka xig' yeen' dii nxi nyech kolliinna' per lo'inna' bi nxe bi nzak' nakan, daa chonle ka chaki ben' nakle ben' wen per le chzelall'le bi dii de che ben' na' chbanlen. ²⁶Na' le' fariseo, ¡nakle ka ben' l'chol daa bi chajniile! Li yiyaj yileni daa chonle kwenche gakle ben' wen ka chaki ben' nakle, na'ch gakle ka xig' yeen' dii nxi nyech ka loolə ka koll'lin.

²⁷¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! La' nakle ka to lill ben' wet dii nyebgake' yiw' na' nla' lawinna' xochi, per lo'inna' lle' lla'n llit wetka' na' bichlə dii zban. ²⁸Kan' nakle le' daa chonle ka chaki ben' nakle ben' li ben' shao' per loo yichjall'do'lena' lle' lla'n de wxiye' na' dii mal.

²⁹¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! Chonshao'zle gana' bkwash'gake' dii ben'ka' wdixjee daa goll Chioza' legake' kani'yi, na' chonle xochi gana' bkwash'gake' nochlə ben'ka' gok ben' li ben' shao'. ³⁰Na' nale: "Shel'ka' neto' ba zoanto' kana' wzoa dii xozxto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'." ³¹Per kwinzkzlen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'. ³²¡Na' li yisyoll li yisto li gon dii mala' daa bi biyoll gon dii xozxto'leka'!

³³¡Le' nakle ka bel' znia! Bi gaki-ile shi wilale lo yi' gabi!a'. ³⁴Daan wselaa ben' chixje'gakile' le' daa yep-gakee. Wselaa ben' sin' ben' chajni kwenche wli' wsedgakile' le' cho'a xtil-laana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwill-le Chioza', na' zi balgake' lljalagle to to yel-lka' gana' illingake'. ³⁵Na' daa gonle ka', yidobile yel' wit che yog'lol ben' li ben' shao'ka' bet dii xozxto'leka', wzolozin dii Abela' beena' gok ben' li ben' shao', axt dii Zacari'aza', xiin Berequ'aza', beena' betgake' latja' daa de cho'a yoodo'na', kwit gana' chzeygake' bayix'ka'. ³⁶Dii li nia' le', ka le' zoale naa chido'le sak'zi'le che yog' daa ben dii xozxto'leka'.

Jesúza' gokyeshile' che ben' Jerusalénka'

(Lc. 13:34-35)

³⁷¡Le' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakile' le' cho'a xtilleena'! ¡Zan shii goklallaa gon' chele ka chon jeda' chiyellb xi-indo'bka' xan xilba', na' bi goklall'le! ³⁸Na' naa ba wlej yichj Chioza' le', na' gani lle'le idesh iloan. ³⁹Na' nia' le', bich ile'ile nad' axt kat'ch illin lla inale: "¡Gaklenshga Xancho Chioza' beeni ba bselee!"

Jesúza' bi'e dill' yiyinj yoodo'na'

(Mr. 13:1-2; Lc. 21:5-6)

24 Na' ka bichej Jesúza' loo yoodo'na' kwenche yiyaje' gan yoblə, ben'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'. ²Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' l'jwellin.

Diika' gak kat' ba zoa te che yell-lioni*(Mr. 13:3-23; Lc. 21:7-24; 17:22-24)*

³Na'ch biyajgake' lo Yaa Olívoza', na' ka chi' Jesúsza' lo yaana' na'ch wbig' ben'ka' nakgake'ne' txen na' xochiteza wñabgake'ne', che'gake':

—Cheeninto' ino' neto' batran gak daa ba wno'. ¿Nakran gak kat' ba zoa yiyedo' dii yoblə na' kat' ba zoa te che yell-lioni?

⁴Na'ch che' Jesúsza' legake':

—Wsak'yen'gale kwenche kono siye'z le'. ⁵La' ben' zan ichej inazgake': “Nadaan Crístona'.” Na' ben' zan shajle'.

⁶Na' yenile chak wdil to ni to na', per bi gakshejlall'le. La' dii chiyal'kz gakan, per aga ba bllin lla te che yell-lionin kat' ba chak ka'. ⁷La' yidil-len ljjwell yellka' na' ben' wñabia'ka' yidil-len ljjwellgake', na' kwe' yillwe', kwe' wbin, na' zan yell gak bedxo' wal. ⁸Kat' ba chak diiki, shinz chzolo ka nak daa yen ile'i ben' yell-lioki.

⁹Na'ch gongake' le' lo na' ben'ka' wchi' wsak' le', na' witgake' le', na' yog' ben' yell-lioki gakzbangakile' le' daa nonlilall'le nad'. ¹⁰Na' kat' ba chak diiki ben' zan bich gonlilall'gake' nad', na' gakzbani ljwelle' na' gon ljwellgake' lo na' ben' malka'. ¹¹Na' ichej zan ben' gonzgake' ka ben' chyixjee daa che' Chioza' legake', na' ben' zan shajle'. ¹²Na' daa kwe'chachga dii mala', ben' zan bich gaggakile' Chioza' ni bish' ljwelle'ka'. ¹³Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kani. ¹⁴Na' ka nak dill' wen dill' kob che yel' wñabia' che Chioza', chonan byen lljtixjee'gake'n doxen yell-lioni kwenche yog'lol' ben' yengakile'n, na' kana'chan te che yell-lioni.

¹⁵Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wñitan balaan cheyinna', na' chiyal' sele wñeyi bin zejlin. Na' kat'

ile'ile'n loo yoodo'na' ¹⁶kanan' ben'ka' zoa Judeana' chiyal' wxonjgake' shajgake' yaa yaoka'. ¹⁷Na' beena' lliia koll' lille'na' ni bich gal' yiyetje' lljaleje' dii de loo yoo lille'na'. ¹⁸Na' beena' chda lyixaa ni bich gal' yiyaje' lille'na' lljaxi'e xe'na'. ¹⁹iNyesh'laz gak che noolka' noa' na' noolka' chwall' chxop llana' gak ka'. ²⁰Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaanchō. ²¹La' yel' zak'zi' wal inlleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde gokan kochno yen ile'i ka len. ²²Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' ben'ka' ba wleje' kwenche nakgake' lall' nee.

²³Na' llaka' chak ka' shi no ina le': “Li wwia, ni ze Crístona'”, wa ine' le': “Na' zie’”, bi shajle'le. ²⁴La' wchej ben' siye'gake', inazgake': “Nadaan Crístona'”, wa “Nadaan chyixji'a daa na Chioza'”. Na' lekzka' gongake' dii gonan ka yibani ben', na' gongake' yel' wak xen kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee. ²⁵Na' naa ba bzenid' le' ka nak daa zi' gak. ²⁶Daan shi no inaz le': “Crístona' zoe' latja' gana' bibi chashj chleb’”, bi shajle; wa shi no inaz le': “Loo yoonā zoe'”, bi shajle'le. ²⁷La' kat' nad', Ben' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'. ²⁸La' gana' de ba weta' nan' chllag llodka'.

Kat' yiyed Jesucrístonā*(Mr. 13:24-37; Lc. 21:25-33; 17:26-30, 34-36)*

²⁹Na' kate yiyoll yel' zak'zi'ka', lii gakte shgasj shchol' lao wbillā na' be-waa bich wzeeni'n na' beljka' ixopgakan, na' yog' diika' lliia xan yabana' inibgakan. ³⁰Na'ch yog' ben' lle' yell-lioni

ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak na' balaan xen. Na' yog' ben'ka' lle' doxen yell-lioni kwellyesh'gake'. ³¹Na' ka kwell trompeta' zillj wselaa anjl cha'ka' zbii zkaan yell-lioni kwenche yitopgake' ben'ka' wlej Chioza' nak lall' nee.

³²'Na' li wwia ka chak che yag yixwewa': kat' ba chzolo chibia xlaguina', na' chakbe'ile ba zoa yiyoo la'o linna'. ³³Ka'kzan, kat' ile'ile ba chak yog' diika' ba wnia' le' gakə, na' gakbe'ile ba zoa gaoshosh te che yell-lioni. ³⁴Dii li nia' le', aga ba wit ben'ki zoa naa kat' gak yog' diiki llia bia' gakə. ³⁵Yabana' na' yell-lioni te chegakin, san cho'a xtilaana' biga te cheyin na' gak ka nan.

³⁶'Kono nezi bi lla bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

³⁷'Na' ka gok kana' wzoo dii Noéna', ka'kzan chak kat' nad', Ben' Bsel' Chioza' Yell-lioni, yiyed dii yoblə. ³⁸La' ben'ka' wzoo kana' zi' gak yej ziw' wala', cheej chaogake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xoolena' loo barkwa'. ³⁹Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Ben' Bsel' Chioza' Yell-lioni, zizaa. ⁴⁰Kana'n, gana' lle' chop ben' lyixaa, toe' yichi'a na' beena' sto yigaane'. ⁴¹Na' gana' lle' chop noolə chotgake', toe' yichi'a na' stoe' yigaane'.

⁴²'Daan li se kwas kwezle nad' nak' Xanle, la' bi nezile bi lla bi gor zizaa. ⁴³Li shajni'kachi dga, shel' xan yoonā nezile' bi gor illin ben' wbanna' lille'na', aga wes yele' kwenche bi wi'e latj sho' wbanna' lille'na'. ⁴⁴Na' daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

Jempl che wen llinka', beena' chon wen na' beena' bi chon wen

(Lc. 12:41-48)

⁴⁵'Na' li gak ka to wen llin ben' chajni na' chone' daa chiya' gone' na' kat' chza' xane'na' chone' lall' nee lille'na' kwenche wi'e dii yeej gao wen llinka' sto gor cheyin. ⁴⁶Chakomba wen llinna' daa chilalile' chone' daa chidolee gone' kat' yillin xane'na'. ⁴⁷La' dii li nia' le', xane'na' gone' lall' nee yog' dii de che'. ⁴⁸Per shi wen llinna' nake' ben' mal na' gakile': "Wllaljachkzi xan'na' yilee." ⁴⁹Na' soloe' wit chine' wen llinka' nak lall' nee na' yeej gaolene' weezoka'. ⁵⁰Na' llana' bi nonyen'le' lez, tokonganz yillin xane'na'. ⁵¹Na' daa bi chone' wen, na' wsak'zi'ene' ka sak'zi' ben' wxiye'ka' gana' kwellyesh'gake' na' gaoxaxj leye'ka' daa le gakshejlall'gake'.

Jempl che shi bi' nool wew'ka'

25 'Yel' wñabia' che Chioza' chzak lebin daa gok che shi bi' nool wew' wyaj to wishagna', na' bex'gakb' kandil cheb'ka' jlezgakb' bi' byona' lill noola'. ²Na' gay'gakb' nteyi na' zi gay'gakb' bi nteyi. ³Bi'ka' bi nteyi kontele wza'len kandil cheb'ka', per bich bex'gakb' seta' yigaagakba'n. ⁴Na' bi'ka' nteyi, bex'gakb' kandil cheb'ka' na' bex'tegakb' seta' yigaagakba'n. ⁵Na' bi' wishagna'na' wle'ib' na' bi' nool wew'ka' chbez gokxwesgakb' na' wtesgakb'. ⁶Na' do ka chel besyaa to ben', chi'e: "iBa za' bi' wishagna'na', li sho' ll-jatilchob!" ⁷Na' wyas bi' nool wew'ka' wzologakb' chiyonshao' kandil cheb'ka'. ⁸Na' bi' nool wew'ka' bi nteyi gollgakb' bi'ka' zi gay': "Li gongach neto' lat' set chelena' la' ba chibill chento'ni." ⁹Per bi'ka' nox' seta' che'gakb': "Bi gonnto'n, kwenche ki iyalljichon ganga. Wenlə li shaj li lljxi' chelena' gana' chiteen." ¹⁰Na' shlak zejgakb' zjxi'gakb' seta', blin

bi' wishagna'na' na' bi'ka' nox' seta' wyoologakb' ben'ka' loo yoonā' gana' chak wishagna'na', na'ch wyej puerta'.
 11 Na' ka billin bi' nool wew'ka' jxi' seta', wnegakb' xan yoonā' che'gakb': "¡Ben'do', bsaljgach shoonto!"
 12 Per xan yoonā' chi'e legakb': "Bi' wsalj', la' bi nombi'a le'."

13 Na'ch che' Jesúza' ben'ka':

—Ka'kzə le', chiyal' se kwasle, la' aga nezile bi lla bi gor zizaa.

Jempl che ben'ka' bgaanlen xmech xane'ka'

14 'Yel' wñabia' che Chioza' zaklebin dga wsesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

15 'Na' toe' bi'e gayaa mil mech de or, na' stoe' chopā milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'.
 16 Na' beena' bi'e gayaa milan, benlene'n llin na' bene' gan zi gayaa milan.
 17 Na' lekzka' beena' bi'e chopā milan, benlene'n llin na' bene' gan zi chopā milan.
 18 San beena' bi'e to milan, jtene' to yech na' bkwashen.

19 'Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'.
 20 Na'ch zigaa beena' bi'e gayaa mil mech de or blline' lawe'na', chi'ene': "Xan', ni de de gayaa mila' beno' nad', na' ni de zi gayaa mil daa benlena'n gan."
 21 Na' che' xane'na'ne': "Le wen beno', to wen llin wen inleeb nako', beno' ka chiyal' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'."
 22 Na'ch wdena' bllin wen llinna' bkwaanlene' chopā mil, chi'ene': "Xan', ni de de chopā mila' beno' nad', na' ni de zi chopā mil daa benlena'n gan."
 23 Na'ch che' xane'na'ne': "Le wen beno', to wen llin inleeb wen nako', beno'

ka chiyal' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'."
 24 Per ka bllin wen llinna' bkwaanlene' to mil, na' golle' xane'na': "Xan', nezid' nako' ben' zña, na' to chizi'zo' banez daa chon ben' yoblə.
 25 Na'chan bbleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' chekzo'n."
 26 Na'ch che' xane'na'ne': "Ben' lia, bikz bi llin yejni'alallii chono'. Nezteilo' to chizi'z' banez daa chon ben' yoblə.
 27 Na' daa nezilo' kan' chon', çberaçe ki joo xmechaa gana' chon yichjin shlak bi wzoa'? Shel' beno' ka', na' naa ba biyed' yiyono'n lente yichjinna', shel'ka'."
 28 Na'ch golle' ben'ka' lle' na': "Li yikaa mecha' daa bkwaanlene' na' li we'n beena' nap shi milan.
 29 La' kan' nakan, beena' chgone' llin daa yoo lo nee, gonche' lall' nee dii xench axt gat' kwe'chile'; san beena' bi chgone' llin daa yoo lo nee, axt daa ngoo lo nee lat' yidojo.
 30 Na' wen llinni bi yejni'alallii, li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee."

Ka gak kat' wchoglo Jesúza' che ben'

31 'Kat' ziza' nad', Ben' Bsel' Chioza' Yell-lioni, len balaan xen cha'na' na' yog' anjl cha'ka', na' wli'a yel' wñabia' choo yel' wñabia' xen cha'na'.
 32 Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'.
 33 Na' wzoa' shlaa de shli cha'ni ben'ka' zaklebi xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni.
 34 Na' nad', ben' wñabia', yep' ben'ka' lle' shlaa de shli cha'ni: "Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie' yell-liona'.
 35 La' ka wdon', bwaole nad'; na' ka

wbilid, benle dii weej'; na' ka wda' ka ben' zit', bleble nad' lill-lena'. ³⁶Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'." ³⁷Na' yog' ben' li ben' shao'ka' inagake' nad': "Xan', ¿batran ble'into' li' chdono' na' bwaonto' li'? ¿Batran ble'into' li' chbililo' na' bennto' daa weejo'? ³⁸¿Batran ble'into' li' chdo' ka ben' zit' na' blebnto' li' loo yoo lillnto'na'? ¿Batran ble'into' li' chdo' bibi xalaano' de na' bennto'n? ³⁹Na' ¿batran gokbe'into' bi shawoo wa gotoo lillyana' na' bidwianto' li'?" ⁴⁰Na' nad', ben' wnabia', yepgakee: "Dii li nia' le', yog' daa benle che ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan benile ka'."

⁴¹'Na'ch yep' ben'ka' lle' shlaa de robesi: "Li kwas ka'lə, le' wen dii mal. Lo yi' gabiła' daa chal' zejli kani chido!le' yiyajle gana' ba non Chioza' sak'zi' dii xiwaa len anjl cheyinka'. ⁴²La' ka wdon' bi benle dii gaw'; na' ka wbilid' bi benle dii yeej'. ⁴³Na' ka wda' ka ben' zit', aga bleble nad' loo yoo lill-le. Na' ka byallj xalaana', aga bi benle; na' ka bi shawaa wa gotaa lillyana', aga bidwiale nad'." ⁴⁴Na' inagake' nad': "Xan', ¿batran wdono', wa wbililo', wa wdoo ka ben' zit', wa bibi xalaano' got', wa bi shawoo, wa gotoo lillyana' na' bi goklennto' li'?" ⁴⁵Na' yepgakee: "Dii li nia' le', daa bi goklenle ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan bi goklenle." ⁴⁶Na' ben' malkan' yiyajgake' gana' tegake' yel' sak'zi'na' zejli kani, na' ben'ka' nak ben' li ben' shao' soalengake' nad' zejli kani.

Wloogake' xnezin gox'gake' Jesúza'

(Mr. 14:1-2; Lc. 22:1-2; Jn. 11:45-53)

26 Na' ka biyoll be' Jesúza' yog' dill'ka', na'ch golle' ben'ka' nakgake'ne' txen:

²—Ba nezczile zi chop llazan chyallj gal' lni Paskwa', na' nad', Ben' Bsel' Chioza' Yell-lioni, gak' lo na' ben'ka' witgake' nad' lee yag cruza'.

³Na'ch b'oxzka' chnabia' na' ben'ka' chli' chsedi leya' na' ben' golka' chnabia' ben' Israelka' bdopgake' lill b'oxz choo b'oxz xenna', beena' le Caifás. ⁴Na' wloogake' xnezin gox'gake' Jesúza' xochizi, ka ki gakbe'i ben', na' witgake'ne'. ⁵Na' che' ljwelle':

—Bi gox'chone' shlak chal' lina' kwenche bi wta wnecho ben'.

To noolə bwazje' set zixa' yichj Jesúza'

(Mr. 14:3-9; Jn. 12:1-8)

⁶Na' ka zoa Jesúza' Betániana' len ben'ka' nakgake'ne' txen, wyajgake' lill to ben' le' Simón, beena' gok yillwe' daa le lepra. ⁷Na' shlak chi' Jesúza' cho'a mesa', bllin to noolə noxee to lmet de yaj xochi na' yollan set dii chla' zix' dii zak' mech xen, na'ch bwazje'n yichj Jesúza'. ⁸Na' ka ble'i ben'ka' nak Jesúza' txen daa ben noola', le bllaagake' na' che' ljwelle':

—¿Biche benditjz beeni seta'? ⁹Shel' bet'chokle'n, la' dii xen zakaan, na' bi'e xmechinna' ben' yesh'ka', shel'ka'.

¹⁰Na' beni Jesúza' ka choe'gake' dill', na' golle' legake':

—¿Biche chnezle che nooli? La' daa ba bene' cha' nakan dii wen. ¹¹Ka nak ben' yesh'ka', toshiizi soagake' ladjlena', san nad', aga toshiizi soalen' le'. ¹²Daa ba bwazj nooli nad' set zixa', bene' ka' kwenche gakshao'zega kwerp cha'ni kat' wkwash'gake' nad'. ¹³Na' dii li nia' le', gattezə we'gake' dill' wen dill' kob che Chioza' lo yell-lioni, lezkka' we'gake' dill'

ka nak dii wenna' daa ba ben nooli na' lljadingakile'ne'.

**Juda' bdie' Jesúza' lo
na' b̄oxzka' ch̄n̄abia'**

(Mr. 14:10-11; Lc 22:3-6)

¹⁴ Na'ch beena' le Jud Scariot, beena' nak txen beṅ'ka' shllin, wyaje' lao b̄oxzka' ch̄n̄abia'. ¹⁵ Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat. ¹⁶ Na'ch lo llana'tez wzolo Juda' chinoe' nakan gone' kwenche gone' Jesúza' lo na' beṅ'ka'.

**X̄ancho Jesúza' wdaolene' beṅ'ka'
nakgake'ne' txen xshe'na'**

(Mr. 14:12-25; Lc. 22:7-23;

Jn. 13:21-30; 1 Co. 11:23-26)

¹⁷ Lla nech che l̄ni Paskwa', llana' chaogake' yetxtila' daa bi n̄chix lev-adúrana', beṅ'ka' nak Jesúza' txen wyajgake' kwite'na' che'gake'ne':

—¿Ga cheenilo' lljasini'anto' xshe' che l̄ni Paskwi?

¹⁸ Na'ch che' Jesúza' legake':

—Li shaj yell Jerusalénna', na' beena' yillagle ye'lene': “Maestrona' ne' ba zoa gak daa llia bia' gak che', na' lillo'na' cheenile' wsini'anto' daa gaolennto'ne' xshe' che l̄ni Paskwi.”

¹⁹ Na'ch beṅ'ka' nakgake'ne' txen bengake' kon ka golle' legake', na' jasini'agake' xshe' che l̄ni Paskwa'.

²⁰ Na' ka goḷ, wche'len Jesúza' beṅ'ka' shllin cho'a mesa'. ²¹ Na' shlak chaogake' che' Jesúza' legake':

—Dii l̄i nia' le', tole gonle nad' lo na' beṅ'ka' chakzi' chakzbani nad'.

²² Na' ka golle' legake' ka' le gokyesh'gakile' na' to toe' che'gake'ne':

—X̄an', ¿anadaan gon' ka', lla?

²³ Na'ch che' Jesúza' legake':

—Beena' ba bl̄eejlene' nad' yetxtil che'na' loo yeena', beena'kzan' gone' nad'

lo na' beṅ'ka' chakzi' chakzbani nad'. ²⁴ Ka nak nad', Beṅ' Bsel' Chioza' Yellioni, wit beṅ' nad' kon ka na Cho'a Xtill' Chioza', per jnyesh'laz gak che beena' gone' nad' lo na' beṅ'ka'! jNaklan wen shel'ka' bi golje'!

²⁵ Na'ch Juda', beena' wdie' Jesúza' lo na' beṅ'ka', chi'ene':

—Maestro, ¿anadaan gon' ka'?

Na'ch che' Jesúza'ne':

—Kan' ba wno'z.

²⁶ Na' shlak chaogake', beṅ' Jesúza' yetxtila' na' bi'e Chioza' yeḷ' choḷken, na' b̄oxje'n na'ch bi'en beṅ'ka' nakgake'ne' txen, chi'e:

—Li gao dga. L̄nennan' kwerp ch̄a'ni.

²⁷ Na'tech bexee to kop dii yoll vino, na' bi'e Chioza' yeḷ' choḷken na' bi'en legake', na' golle':

—Yog'le l̄i yeej dga yoll loo kopi, ²⁸ ja' l̄nennan' xchen'na' daa gon ka gak l̄i dii koba' b̄cheb Chioza' gone'. Na' l̄aljan kwenche yiyakxen saaxya che beṅ' zan. ²⁹ Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' ch̄n̄abia' X̄a' Chioza', kana'chan yeejlana'n le' dii yobl̄.

**Jesúza' chi'e bi w̄cheb
Pédrona' shi nombi'ene'**

(Mr. 14:26-31; Lc.

22:31-34; Jn. 13:36-38)

³⁰ Na' ka bidaogake', belgake' be'la'ogake' Chioza' na'ch biyajgake' lo yaa Olívoza'. ³¹ Na' ka ziyajgake', che' Jesúza' legake':

—Yog'le kwej yichjle nad' naanlle'. L̄a' kin na Cho'a Xtill' Chioza': “Wit' beena' chap xil'ka' na' illeshlesgakb.” ³² Per ka yiban' ladj beṅ' wetka', yiyaa Galileana' lljalez' le'.

³³ Na'ch che' Pédróna'ne':

—L̄a'kzi yog' beṅ'ki kwej yichjgake' li', nad' bi kwej yichj' li'.

³⁴ Na'ch che' Jesúza'ne':

—Dii li nia' li', naanlle' shon shii bi wchebo' shi nombi'o nad' ka zi' kwell shikwteza'.

³⁵ Na' Pédróna' chi'ene':

—La'kzi guetlentia' li', biga inia' bi nombi'a li'.

Na' ka'kzə goll yog'loł ben'ka' nakgake'ne' t xen.

**Jesúza' be'lwille'
Chioza' latja' le Getsemani'**

(Mr. 14:32-42; Lc. 22:39-46)

³⁶ Na' ka bllinlen Jesúza' ben'ka' nakgake'ne' t xen latja' le Getsemani', na'ch golle' legake':

—Nizə li kwe' shlak shaa daa ka'lə llje'lwil' Chioza'.

³⁷ Na' bchi'e Pédróna' na' chop bish'te xiin Zebedewa', na' wzolo chakyeshile' dii wal inleeb. ³⁸ Na' golle' legake':

—Axt chaklikazid' lii guettia' daa le chakyeshii yichjlall'dawaani. Li igan niza' na' bi guesle.

³⁹ Na' blee legake' zi lat' na' bchek' yichje'na' lo yona' na' be'lwille' Chioza', chi'e:

—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

⁴⁰ Na'ch biyaje' gana' lle' ben'ka' shon, na' ble'ile' ba chesgake'. Na' golle' Pédróna':

—¿Abikzə bchejlat'gaile la'ch' tgor kwezle nad' bi guesle? ⁴¹ Bi guesle. Li we'lwil' Chioza' kwenche bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

⁴² Na'ch wyaje' de wchop shii jelwille' Chioza', chi'e:

—Xadawaa, shi ba nakten idil' illag' dga, gakkzə ka cheenilo'.

⁴³ Na' ka billine' dii yoblə lekzka' chesləgake' daa bi wzogakile' bishgala'. ⁴⁴ Na' bikzə bisbane' legake', na' wzee sto shii jelwille' Chioza' de wyon shii na' golle'ne'

ka ba gollkze'ne'. ⁴⁵ Na'ch biyaje' gana' bgaan ben'ka', na' golle' legake':

—¿Ani chestkile? Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'. ⁴⁶ Li chas na' li sho'. Ba za' beena' wdie' nad' lo neeka'.

Bex'gake' Jesúza'

(Mr. 14:43-50; Lc. 22:47-53; Jn. 18:2-11)

⁴⁷ Bilan' yiyoll yee Jesúza' ka' ka bllin Juda' beena' nak t xen ben'ka' shllin, nchi'e ben' zan ben'ka' bsel' bəozka' chnabia' len ben' golka' chnabia' ben' Israelka'. Na' nox'gake' no spad na' no yag. ⁴⁸ Na' Juda' ba bzajniile' ben'ka' nchi'e nakan gone' wli'e beena' gox'gake', golle': "Kon beena' wnop', len gox'le."

⁴⁹ Na' ka bllinlene' ben'ka' kwit Jesúza', lii wbig'tie' lawe'na' chi'ene':

—¿Chiox naa, maestro!

Na'ch bnope'ne'. ⁵⁰ Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te ben'ka' bex'gake' Jesúza'.

⁵¹ Na' ka bex'gake'ne', to beena' nake'ne' t xen wleje' spad che'na' na' wdine'n xmos bəoz choo bəoz xenna', bchogtie' tlaa nague'na'. ⁵² Na'ch goll Jesúza'ne':

—Bigooshao' spad cho'na', la' yog' ben'ka' chitgakile' ben' yesya, lekzka' len guetgakile'. ⁵³ ¿Achakile bi gak inabid' Xa'na' gaklene' nad' na' lii wsel'tie' anjl zan inleeb, she'ka'? ⁵⁴ Per shi ka' gon', ¿nakra gak yillini Cho'a Xtill' Chioza' gana' nan chonan byen gak ki?

⁵⁵ Na'ch goll Jesúza' ben'ka' ba nox'gake'ne':

—¿Achakile' no wban no nad' za'lenzle no spad no yag kwenche gox'le nad'? Yog' lla bli' bseidid' ben' loo yoodo'na', ¿bi'che bi bex'le nad' shlak bli' bseidid' ben' na'? ⁵⁶ Per daa chonle ki, chillinin ka na Cho'a Xtill' Chioza' daa bzej dii ben'ka' ba wdi'jee daa golle' legake'.

Na'ch yog'lo! ben'ka' nak Jesúza' txen bxonjgake' na' bkwaan'gake' toze'.

**Jwa'gake' Jesúza' lao ben'ka'
chnabia' ben' Israelka'**

(Mr. 14:53-65; Lc. 22:54-55,
63-71; Jn. 18:12-14,19-24)

⁵⁷ Na' ben'ka' bex'gake' Jesúza' jwa'gake'ne' lill Caifáza', beena' nak bꝑoz choo bꝑoz xen, na' lille'na' ba ndop nllag ben'ka' chli' chsedi leya' na' ben' golka' chnabia'. ⁵⁸ Na' Pédróna' janoe' Jesúza' de zit'lá, bllintie' lesh' chyoo che bꝑoz choo bꝑoz xenna' na' jche'lene' ben'ka' chap yoodo'na' kwenche ile'ile' ka gak che Jesúza'.

⁵⁹ Na' bꝑozka' chnabia' len ben'ka' chnabia' ben' Israelka' wdiljgake' ben' chiljlallee che Jesúza' kwenche wchoglogake' guete'. ⁶⁰ Na' la'kzi ben' zan ben'ka' biya dii biyiljall'gake' che Jesúza', aga bidili cho'a dill' che'ka', axt ki bllin chop ben' ⁶¹ be'gake' toz dill', che'gake':

—Ki wna beeni: “Nad' wak yichinj' yoodo' che Chioza' na' shon llazə yiyontia'n dii yoblə.”

⁶² Na'ch wzolla' bꝑoz choo bꝑoz xenna', gollé' Jesúza':

—¿Abikz bi ino' cheyi dga nagake' cho'?

⁶³ Na' Jesúza' bikzə wnie'. Na'ch che' bꝑoz choo bꝑoz xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiine'.

⁶⁴ Na' goll Jesúza'ne':

—Awe, kan' nakan. Na' lekzka' nia' le', wle'ile nad', Ben' Bsel' Chioza' Yell-lioni, kwi'a shlaa de shli che Chioza', beena' zeelo nap ye! wak choo ye! wak xenna', na' lekzka' ile'ile nad' zizaa ladj bejka' ze xan yabana'.

⁶⁵ Na'ch bsho' bchez' xa bꝑoz choo bꝑoz xenna'. Na' daa bene' ka', bli'e nan le blee, na' wne:

—¿Kwinle ba benile naz beeni nake' Xiin Chioza'! Bich chyalljicho ben' gao xya che'. ⁶⁶ ¿Bi ka inale?

Na'ch gollgake'ne':

—Chiyal' guete'.

⁶⁷ Na'ch bllaa xeneeka' cho'alaó Jesúza' na' wdap' wlall'gake'ne'. ⁶⁸ Na' che'gake'ne':

—Shi lin' Crístona', wnashki non wdap' wlall' li'.

**Pédróna' bi bchebe'
shi nombi'e Jesúza'**

(Mr. 14:66-72; Lc. 22:56-62;
Jn. 18:15-18, 25-27)

⁶⁹ Na' shlak chak ka', Pédróna' chi'e lesh' chyooona' ka bllin to noolə wen mandad kwite'na' chi'ene':

—Lenon' nako' txen Jesúza', ben' Galileana'.

⁷⁰ Na' lao yog' ben'ka' lle' na', aga bcheb Pédróna' shi nake' Jesúza' txen, na' gollé' noola':

—Bi nezid' bin no'.

⁷¹ Na' ka ziyaje' cho'a puerta' bizle'i sto ben' yoblə le' na' chi'e ben'ka' lle' na':

—Len beenin nake' txen Jesúza', ben' Nazareta'.

⁷² Na' lekzka' aga bizcheb Pédróna' shi nake' Jesúza' txen, bzoatie' Chioza' de taschiw, chi'ene':

—Bi nombi'a beena'.

⁷³ Na' gokzə xtit na' jabig' ben'ka' lle' na' kwit Pédróna' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

⁷⁴ Na'ch wzolo Pédróna' chone' znia, chi'e:

—¿Dii balkzan nia' bi nombi'ane'! ¿Chioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'. ⁷⁵ Na'ch jadini Pédróna' daa goll Jesúza'ne': “Shon shii bi wchebo' shi nombi'o nad' ka zi' kwell shikwteza'.” Na'ch biza' Pédróna' chbellyeshee.

Jwa'gake' Jesúza' lao Pilátona'*(Mr. 15:1; Lc. 23:1-2; Jn. 18:28-32)*

27 Na' ka wyeeni', yog'lol' b̄xozka' ch̄n̄abia' na' ben' golka' ch̄n̄abia' ben' Israelka' bengake' toz dill' witgake' Jesúza'. ²Na' b̄chejgake'ne' jwa'gake'ne' lao Pilátona' beena' ch̄n̄abia' gana' mbani Judeana'.

Wit Juda'

³Juda', beena' bene' Jesúza' lo na' ben'ka', ka gokbe'ile' ba nakan witgake' Jesúza' na' wdao bdiachgan le'. Na'ch wyaje' lao b̄xozka' ch̄n̄abia' na' lao ben' golka' ch̄n̄abia' jasane' shichoate mech de plata' daa be'gake'ne'. ⁴Na' chi'e legake':

—Le malchga ben' daa b̄dia' to ben' bibi dol' nape' lo na'lena'.

Na' legake' che'gake'ne':

—¿Bera kwent che neto? Li'z nezilo' bin beno'.

⁵Na' jaza! Juda' mecha' loo yoodo'na', na' tech jayet kwine' jaloo do yene'.

⁶Na' b̄xozka' ch̄n̄abia' bitopgake' mecha' na' che' ljwellgake':

—Bi gak yiyonchon toz mech che yoodo'na', la' nakan dii ba nap xya.

⁷Na' be'gake' dill' yizi'gakile' mecha' to yell-lío dii le Yell-lío che Ben' Wen Yes' gana' wkwash'gake' ben' zit'ka'.

⁸Daan axt naanlla yell-liona' len Yell-lío Chen. ⁹Na' daa gok ka', billinin ka wna dii Jeremíaza', beena' wdixjee daa goll Chioza'ne', ka wne': "Bikaagake' shichoa mech plat daa b̄chogbia' ben' Israelka' zak' beena'. ¹⁰Na' kon len wxi'gakile' Yell-lío che Ben' Wen Yesaa, kon kana' wna Xancho Chioza' nad'."

Bllin Jesúza' lao Pilátona'*(Mr. 15:2-5; Lc. 23:3-5; Jn. 18:33-38)*

¹¹Ka bllin Jesúza' lao Pilátona', na'ch che' Pilátona'ne':

—¿Alin' ben' wn̄abia' che ben' Israelka'?

Na' che' Jesúza'ne':

—Kan' ba wno'.

¹²Na' shlak b̄xozka' ch̄n̄abia' na' ben' golka' ch̄n̄abia' ben' Israelka' chaogake' xya che', bibi dill' billi'e legake'. ¹³Na'ch goll Pilátona'ne':

—¿Abi chenilo' diika' chaogake' xya cho'?

¹⁴Per Jesúza' ni to diika' chaogake' xya che' ni sh̄cho'a dill' bi billi'e, na' le bibanchgayi Pilátona'.

B̄choglogake' guet Jesúza'*(Mr. 15:6-20; Lc. 23:13-25; Jn. 18:38–19:16)*

¹⁵Na' ben' wn̄abia'na' yooloe' yog' yiz chisane' to ben' de lillyana' lla l̄ni Paskwa', kon beena' inab yog' ben' yell yisane'. ¹⁶Na' de to ben' lillyana', ben' le zeyi che' nake' ben' mal, na' lie' Barrabás. ¹⁷Na' ka ndop nllag ben' yellka', che' Pilátona' legake':

—¿No ben'ki cheenile yisan'?, ¿aBarrabáza', awa Jesúzi, beeni nsi'gake' Cristo?

¹⁸Golle legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

¹⁹Shlak chi' Pilátona' gana' chone' yel' jos̄chisa', bsel' xoolo'na' to rson, chi'ene': "Bi gaklebilo' ben'ka' chao xya che beena', la' aga bi dol' che' de, la' nll'e'yi w̄neid' to yel' che', na' le bsheban nad'."

²⁰Per b̄xozka' ch̄n̄abia' na' ben' golka' ch̄n̄abia' ben' Israelka' wlooyel'gake' ben'ka' lle' lla' na' inabgake' yisane' Barrabáza' na' gone' mandad guet Jesúza'. ²¹Na' Pilátona' sto shii wn̄abile' legake':

—¿No ben'ki chop cheenile yisan'?

Na' ben'ka' che'gake'ne':

—¿Bisan Barrabáza'!

²²Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'lole' che'gake'ne':

—¡Bdee lee yag cruza'!

²³ Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¡Bdee lee yag cruza'!

²⁴ Na' ka gokbe'i Pilátona' bich bi de gone' daa zizikchli ba chaklleshgakile', bene' mandad jxi'gake' nisa' kwenche bi-nee lao yog' ben'ka', na' chi'e:

—Aga bi dol' nap' nad' daa guet beeni. Len' gak xbag'lene'.

²⁵ Na' yog'lol' ben'ka' che'gake'ne':

—¡Neto' len xiinto'ka' idobinto'ne'!

²⁶ Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

²⁷ Na' soldadka' bche'gake' Jesúza' gana' chon Pilátona' ye! joschisa' na' biti'agake' yog'lol' soldadka' nakgake'txen. ²⁸ Na'ch wdingake' xa Jesúza' na' bwakwgake'ne' to lech' xna ka che to ben' wñabia'. ²⁹ Na' bengake' to bxoond de xis yesh' na' bllingake'n yichje'na' ka to corona, na' nee de shlina' bgox'gake'ne' to bar. Na'ch bchek' xibe'ka' lawe'na' na' btitjgakile'ne' che'gake':

—¡Toshiizi sechgayi che beeni chñabia' ben' Israelka'!

³⁰ Na'ch no chlla' xeneeka' le', no chikaagake' bara' daa bgox'gake'ne' na' chyingake'n yichje'na'. ³¹ Na' ka wde btitjgakile'ne' na'ch biyingake' lechaa bwakwgake'ne' na' biwakwgake' xe'na' nakwkze'. Na'ch bche'gake'ne' kwenche wda'gake'ne' lee yag cruza'.

Bda'gake' Jesúza' lee yag cruza'

(Mr. 15:21-32; Lc.

23:26-43; Jn. 19:17-27)

³² Na' ka ba chchejgake' cho'a yell Jerusalénna', billaggake' to ben' Cirene,

ben' le Simón, na' bengake' byen bi'e yag cruz che Jesúza'.

³³ Na' ka' bllingake' latja' le Gólgota, na' zejin Latj che llit yichj ben' wet. ³⁴ Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

³⁵ Na' ka biyoll bda'gake'ne' lee yag cruza', soldadka' bengake' to wyitj kwenche got'bia' nogake' yidol' xa Jesúza'. ³⁶ Na'tech wche'gake' wdapgake'ne'. ³⁷ Na' yichj yag cruz che'na' bda'gake' to dii choe'n dill' biche nda'gake'ne' na', na' nan: "Beenin Jesúza', ben' wñabia' che ben' Israelka'."

³⁸ Na' lezkza' bda'gake' chop ben' wban shlaa wej kwit yag cruz che Jesúza'. ³⁹ Na' ben'ka' chde gana' dee, chta yichje'ka' na' chgoogake'ne' belban, ⁴⁰ che'gake'ne':

—Li' wno' yichinjo' yoodo'na' na' shon llazə yiyontio'n, ¡bisla kwino' lee yag cruzi shi leilo' nako' Xiin Chios!

⁴¹ Na' lezkza' bxoza' chñabia' na' ben'ka' chli' chsedi leya', na' fariseoka' len ben' golka' chñabia' btitjgakile'ne', che' ljwelle':

⁴² —Gok bisle' ben' yoblə per bi chak yisla kwine'. Shi leile' len' ben' wñabia' chechona', cho' ben' Israel, yiyetjshk-ile' lee yag cruza' naa kwenche shajle'cho che'. ⁴³ Nxenilallee Chioza'. Yis-lashkile'ne' naa shi leile' chakile'ne', la' wne' nake' Xiin Chios.

⁴⁴ Na' axt wbanka' da' lee yag cruza' kwite'na' lezkza' biya dii che'gake'ne'.

Wit Jesúza'

(Mr. 15:33-41; Lc.

23:44-49; Jn. 19:28-30)

⁴⁵ Na' do ka gobill kat' bichol doxen yell-lioni axt do ka chida shonch biy-eeeni'. ⁴⁶ Na' do ka chida shonə besyaa Jesúza' zilljə, ne':

—Elí, Elí, ¿lama sabactani? —na' ze-jin: Chios cha', Chios cha', ¿biche ba wlej yichjo' nad'?

⁴⁷ Na' baḷ ben'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

⁴⁸ Na' toe' lii zejdotie' jxi'e to dii bleeje' loo vino daa nak zichj zla', na'ch bzoe'n to lo xis na' jazoe'n cho'a Jesúza' kwenche yeeje'n. ⁴⁹ Na' ben'ka' sto che'gake':

—Jwayishkile'na', la'shki shi wid Elíaza' kwenche yidsle'ne'.

⁵⁰ Na' ka biyoll besyaa Jesúza' zilljə dii yoblə, na' wite'. ⁵¹ Na' ka wite', lechaa ze loo yoodo'na' lii bchez'ten gokan choplə. Na' gok to bedxo' na' wlaa yajka'. ⁵² Na' lekzka' axt biyalj gana' bgash' ben' wetka'. Na' zan ben' wetka', ben'ka' ben'ilall' Chioza', biban-gake' sto shii ⁵³ na' bichejgake' gana' bgash'gake'. Na' ka bibanch Jesúza', biy-oogake' yell Jerusalénna', na' ben' zan ble'gakile' legake'.

⁵⁴ Na' xan soldadka' len ben'ka' chaplene' Jesúza' le bllebgake' ka wxo' na' bichlə diika' gok. Na' wna'gake':

—Dii likzan Xiin Chios beeni.

⁵⁵ Na' zan noolka' wno Jesúza' dezd gana' mbani Galileana', ben'ka' goklengake'ne' che bi dii byalljile', lle'gake' de zit'lə bwiagake' doxen ka gok. ⁵⁶ Na' ladje'ka' len María, ben' yell Magdálana', na' María beena' nak xna' Jacóbona' len Joséna', na' xna' ben'ka' nak xiin Zebedewa'.

Bkwash'gake' Jesúza'

(Mr. 15:42-47; Lc.

23:50-56; Jn. 19:38-42)

⁵⁷ Na' ka chzeles yela' bllin to ben' wni'a lie' José, beena' nak ben' yell Arimatea na' goke' txen Jesúza'. ⁵⁸ Na' wyaje' lao Pilátona' janabe' kwerp che Jesúza', na' Pilátona' bene' mandad

biyoe'gake'ne'. ⁵⁹ Na' bikaa Joséna' kw-erp che Jesúza' na' bitobe'ne' to lech' xtil. ⁶⁰ Na' jlo'ene' to loo ba kob dii zi' benschawee to lee yaj. Na'tech bdee to yaj xen cho'ayinna'. Na'ch bizee. ⁶¹ Na' María, ben' yell Magdálana', len Mariana' sto wche'gake' cho'a bana'.

Ben'ka' wdap cho'a ba che Jesúza'

⁶² Na' betiyo, llana' chombaən ben' Israelka', wyaj bxo'zka' chnabia' len fariseoka' lao Pilátona', ⁶³ che'gake'ne':

—Ben'do', ba jadininto' ka wna dii ben' wxiye'na' kana' mbane', wne' yiyon lla yibane' dii yoblə ladj ben' wetka'. ⁶⁴ Na' bsel'gach ben' lljtape' gana' bkwash'gake'ne' axt ka gakch shon lla kwenche bi shaj ben'ka' nakgake'ne' txen do wal' chel lljalejgake' kwerp che'na', na' tena' ye'gake' ben': "Ba bibane' dii yoblə ladj ben' wetka'." La' shi ba bengake' ka', na'ch gongake' to dii wxiye' walch aga ka dii necha'.

⁶⁵ Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gagkake'.

⁶⁶ Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

Biban Jesúza' ladj ben' wetka'

(Mr. 16:1-8; Lc. 24:1-12; Jn. 20:1-10)

28 Na' ka wde lla sabda', llana' chombaangake', ni baḷ lla nech che xman'na' sto, wyaj María nool Magdálana', len Mariana' sto jawiagake' cho'a bana'. ² Na' wzolo to bedxo' xen wal daa betj to anjl che Xancho Chioza' yabana', na' ka blline' cho'a bana' na' bikwase' yaja' daa nsejan cho'a bana' na' wllie' lawinna'. ³ Na' anjla' chey cheeni'e kakzə ga chep yes na' xe'na' nakan xtil inleeb. ⁴ Na' ka ble'i soldadka' le' axt bx-

iztitgake' daa le bllbgake' na' axt witgake' shlet. ⁵Na'ch che' anjla' noolka':

—Bi illeble. Ne^zid' Jesúzan' chiyilje, beena' wit lee yag cruza'. ⁶Koch no de ni. Ba bibane' kon ka wne'. Li dakachi wwiale gani wdixjgake'ne'. ⁷Na' li yiya-jdo li lljayell ben'ka' nakgake'ne' txen: “Ba bibane' ladj ben' wetka' na' ba ziyaje' Galileana' lljaleze' le', na' na'kzə ile'ile'ne'.” Na' ba wnia' le' ka'.

⁸Na'ch biza'do noolka' cho'a bana' chllbgake' na' le chibagakile' zjadixje'gakile' ben'ka' nak Jesúza' txen daa goll anjla' legake'. ⁹Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wde'lgake' ni'ena' be'la'ogake'ne'. ¹⁰Na' che' Jesúza' legake':

—Bi illeble. Li lljayell ben' bishaaka' shajgake' Galileana' na' ile'gakile' nad' na'.

Wxi' laxj soldadka' kwenche bi we'gake' dill' biban Jesúza'

¹¹Na' ka biza' noolka', ba' soldadka' wdap gana' bkwash'gake' Jesúza' biyajgake' yell Jerusalénna' jayellgake' bxo^zka' chn^abia' yog' diika' gok. ¹²Na'ch wyaj bxo^zka' chn^abia' je'lengake' ben' golka' chn^abia' dill' naklə ka gongake' daa goll soldadka' legake'. Na' ka biyoll

be'gake' dillaa, na'ch be'gake' soldadka' mech xen, ¹³che'gake':

—Inatezle wa' chel shlak chesle, ben'ka' nak Jesúza' txen bidlejgake' kw-erp che'na'. ¹⁴Na' shi ba binezi Pilátona' dga, neto'kzə lljazajniinto'ne' nakan gok kwenche bibi gonile' le'.

¹⁵Na'ch soldadka' be'x'gake' mecha' na' biza'gake' jazegake'n dill' kon ka gollgake' legake'. Na' axt naanlla ben' Israelka' ni nagake' ka'.

Jesúza' golle' legake' we'gake' xtilleena' doxen yell-lioni

(Mr. 16:14-18; Lc.

24:36-49; Jn. 20:19-23)

¹⁶Na' wyaj ben'ka' shnej, ben'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'. ¹⁷Na' ka ble'gakile' Jesúza', be'la'ogake'ne', per ba'lgake' gokchoplall'gake'. ¹⁸Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni. ¹⁹Daan, li shaj doxen yell-lioni, li lljali' lljasedi yog' ben' kwenche gagkake' nad' txen. Na' wchoale legake' nis daa ba non'li'lgake' Xacho Chioza', na' nad', Xiine', len Espíritu Sántona'. ²⁰Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiixi axt ka te che yell-lioni.

Dill' wen dill' kob daa bzej Márcona'

Juanna', beena' bchoa ben' nis

(Mt. 3:1-12; Lc. 3:1-9,
15-17; Jn. 1:19-28)

1 Ki wzolo dill' wen dill' kob che Jesu-
crístona', beena' nak Xiin Chioza'.

² Gok ka wna dii Isaíaza', beena' wdix-
jee daa goll Chioza'ne':

Wselaa to ben' kwialoe' lawo'na',
wi'e xtilloona' kwenche ba lle' ben'
wzenague' cho' kat' illino'.

³ To ben' wnie' zilljə to lo latj gana' bibi
chashj chleb, chi'e:

“Li se kwas wzenagle che Xanchona' na'
wsalj yichjlall'do'leka' kat' zee.”

⁴ Na' bllin Juanna' latja' gana' bibi chashj
chleb. Bchoe' ben' nis, na' wdixje'ile' ben'
chiya' yiyaj yilengakile' na' choagake'
nis kwenche yizi'xen Chioza' saaxya
che'ka'. ⁵ Na' yog' ben'ka' lle' gana'
mbani Judeana' na' ben'ka' lle' yell
Jerusaléna' jazenaggake' dillaa cho'e.
Na' bixoadol'gake' saaxya che'ka', na'
bchoa Juanna' legake' nis loo yao
Jordánna'.

⁶ Na' xa Juanna' gokan de xa kamey na'
bchej lsineena' to yid. Na' wdawe' bish'zo
na'ch shin baser dii de lyixaa. ⁷ Na'
wdixje'ile' ben'ka' cho'a xtil' Chioza',
chi'e:

—Zi' za'lə beena' napch yel' wak
xench ka nad', na' ni bi zakaa gak'
xmose' kwenche wle'chj' xe'le'na'. ⁸ Nad'
ba bchoa' le' nisa', san le', gone' ka yidsoa
Espíritu che Chioza' loo yichjlall'do'léna'.

Jesúza' wchoe' nisa'

(Mt. 3:13-17; Lc. 3:21-22)

⁹ Na' kana'yen' Jesúza' wzee yell
Nazareta' daa lliá gana' mbani Galileana'
na' wyaje' cho'a yao Jordánna' gana'
bchoa Juanna'ne' nisa'. ¹⁰ Na' shlak

chichej Jesúza' loo nisa', ble'ile' byalj
yabana' na' betj Espíritu che Chioza'
jsoalene'ne' na' ble'ile' Espírituna' ka to
palom. ¹¹ Na' bengakile' wne Chioza'
yabana', chi'e Jesúza':

—Lin' nako' Xiin', chakchga'id' li' na' le
chibaid' li'.

Dii xiwaa goklalliin kooyela'n Jesúza' gone' ka cheenin

(Mt. 4:1-11; Lc. 4:1-13)

¹² Na' lii bche'te Espíritu che Chioza'
le' latja' gana' bibi chashj chleb. ¹³ Na'
wzoe' na' choa lla ladj ba zniaka', na' Sa-
tanáza' daa chnabia' dii xiw'ka' goklal-
liin kooyela'n le' gone' ka cheenin. Na'
ka wde, jaklen anjlka' le'.

Wzolo Jesúza' choe'lene' ben' xtil' Chioza' gana' mbani Galileana'

(Mt. 4:12-17; Lc. 4:14-15)

¹⁴ Biyoll wloogake' Juanna' lillyana',
Jesúza' wyaje' gana' mbani Galileana'
na' je'lene' ben' dill' wen dill' kob che
Chioza', ¹⁵ chi'e:

—Ba bllin lla inabia' Chioza' loo
yichjlall'do'léna'. Li yiyaj yileni dii
malka' chonle na' li shajle' dill' wen dill'
kob che'na'.

Jesúza' goxe' tap ben' wxen bel'

(Mt. 4:18-22; Lc. 5:1-11)

¹⁶ Shlak ngoo Jesúza' nez cho'a niso'd
che Galileana', ble'ile' Simónna' len ben'
bishee Andréza', chzal'gake' yixj daa
chzengakile' belka' loo niso'dna', la' len-
nan' noni xshingake'. ¹⁷ Na' goll Jesúza'
legake':

—Li da, dino nad'. Na' ka chonle chbe-
jle belka' loo nisi, ka'kzan gonle yibejle
ben' lao dii mala'.

¹⁸ Na' ka biyoll golle' legake' ka', lii
bkwaan'tegake' yixja' daa chzengakile'
belka' na' zejlengake'ne'.

¹⁹ Ka ba wza'gake' zi lat', ble'i Jesúza'
Jacóbona' len ben' bishee Juanna',

ben'ka' nak xiin Zebedewa, lle'gake' loo barkwa' chiyonshao'gake' yixja' daa chzengakile' bel'ka'. ²⁰Na' lii wnetie' legake', na' bkwaan'gake' xe'ka', beena' le Zebedeo, len ben'ka' chaklen legake' loo barkwa', na' wyajlengake' Jesúza'.

Jesúza' bibeje' dii xiwaa yoo to ben'
(Lc. 4:31-37)

²¹Na' bllingake' yell Carpernaúma'. Na' lla sabda', llana' chombaan ben' Israe'ka', wyaj Jesúza' gana' chdop chllagake' choe'lwillgake' Chioza' na' wzoloe' chli' chsedile' legake'. ²²Na' bibani ben'ka' lle' na' ka chli' chsedi Jesúza', la' bli' bsdile' legake' lega ben' nap yel' wñabia', na' bi chli' chsedile' ka ben'ka' chli' chsedi leya'. ²³Na' ladj ben'ka' chdop chllag gana' chli' chsedile' legake', len to ben' yo'e dii xiwaa, na' besyaan, che'n:

²⁴—jJwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li' na' nezid' nako' dowalj ben' li ben' shao' che Chios.

²⁵Na' Jesúza' bsheshlene'n, chi'e:

—jLlizə wzoa! jBichej loo yichjall'do' beeni!

²⁶Na' dii xiwaa wchoonan beena' na' bchix bto'lan le' na' bichejan chosyaadian. ²⁷Na' yog' ben'ka' lle' na' bibangakile', na' che' ljwellgake':

—¿Bi dii kob dga chli' chsedi beeni, lla? jNakbia' nape' yel' wñabia', la' axt len dii xiw'ka' chsheshlene' na' chzoagakan xtillee!

²⁸Na' lii wzete dill' doxen gana' mbani Galileana' ka nak daa chon Jesúza'.

**Jesúza' biyone' tobiin
che Simón Pédrona'**

(Mt. 8:14-15; Lc. 4:38-39)

²⁹Na' biza' Jesúza' gana' chdop chllaggake' na' biyajlene' Jacóbona' len Juanna' lill Simónna' na' Andréza'. ³⁰Na' tobiin che Simónna' die' yo'e dii la. Na'

gollgake' Jesúza' daa chak che'. ³¹Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

Jesúza' biyone' ben' zan
(Mt. 8:16-17; Lc. 4:40-41)

³²Na' ka ba wxoa wbillla', jwa'gake' lao Jesúza' yog' ben'ka' bi shao' na' ben'ka' yoo dii xiwaa. ³³Na' yog' ben'ka' lle' yella' bdi'a bllaggake' cho'a yooná gana' zoe'. ³⁴Na' Jesúza' biyone' ben' chak wde wdeli yillwe'. Na' lekzka' bibeje' dii xiw'ka' yoo ben', na' bi bi'e latj inegakan daa nombia'gakan le'.

**Jesúza' cho'e cho'a xtil' Chioza'
gana' mbani Galileana'**
(Lc. 4:42-44)

³⁵Na' Jesúza' wyase' ni bal, na' bcheje' yella' jelwille' Chioza' ga kono ben' lle'. ³⁶Na' wyaj Simónna' len ben'ka' nakgake'ne' txen jadjlgake'ne', ³⁷na' ka billelgakile'ne' na'ch gollgake'ne':

—Yog'z ben' chiyiljgake' li'.

³⁸Na' che' Jesúza' legake':

—Li sho' yellka' sto, diika' llia gaozə, kwenche lekzka' llje'len' cho'a xtil' Chioza' ben'ka' lle' na', la' ni cheyinnan' bid'.

³⁹Na' wda Jesúza' yog' yellka' llia doxen gana' mbani Galileana' choe'lene' ben'ka' cho'a xtil' Chioza' yog' gana' chdop chllag ben' Israe'ka' choe'lwillgake' Chioza', na' bibeje' dii xiw'ka' yoo ben'.

**Jesúza' biyone' to ben' chak
yillwe' daa le lepra**

(Mt. 8:1-4; Lc. 5:12-16)

⁴⁰To ben' chak yillwe' daa le lepra blline' lawe'na' na' bçhek' xibe'na' lawe'na', chi'e:

—Shi cheenilo', wak yikwaso' yillwe'ni chak'.

⁴¹ Na' biyesh'lallii Jesúza'ne', na' b̄xo'a neena' yichje'na' chi'e:

—Cheenid'x. Na' naate yikwasa'n.

⁴² Na' katena' lii bikwaste léprana' na' biyakile'. ⁴³ Na' Jesúza', chi'ene':

⁴⁴ —Kono yoo dga ba ben' cho'. San wyaj jali'lawo' lao b̄xoza', na' jwa' daa chiya! l̄joo lao Chioza' ka nllia dii Moiséza' bia' goncho kwenche inezile' ba biyakilo'.

⁴⁵ Per ka bizee, wzoloe' bi'e dill' lao yog'lol' ben' daa gokə. Na' daa bene' ka', bich gok sho' Jesúza' ka n̄la'zə yel-lka', san bigaane' ga kono ben' lle'. Per bia'kzə wyaj ben' za' wde wdeli yell jawiagake'ne'.

Biyon Jesúza' to ben' net ni'a neena'

(Mt. 9:1-8; Lc. 5:17-26)

2 Wde to chop lla, Jesúza' billine' sto shii yell Capernaúma'. Na' ka w̄nezi ben'ka' lle' na' ba billine' yooná' gana' wzoe', ² na' bdi'a bllag ben' zan inlleb loo yooná' axt bich chaki lesh' chyooná' she'gake'. Na' bli' b̄sedile' legake' cho'a xtill' Chioza'. ³ Na' bllin tap ben' n̄len-gake' to ben' net ni'a neena'. ⁴ Na' daa bi gok illingake' gana' zete Jesúza' daa lle' ben' zan inlleb, na' wzologake' bsalj-gake' koll' yooná' na' b̄letjgake'ne' do daa che'na'. ⁵ Na' ka gokbe'i Jesúza' chajle'gake' che', golle' ben' we'na':

—Xiin, ba biyakxen saaxya cho'ka'.

⁶ Na' chi' bal' ben'ka' chli' chsedi leya', na' wza'lall'gake': ⁷ “¿Berache naz beeni ka'? Chonz kwine' ka Chioza'. Kono zoa sto ben' gak yizi'xen saaxya che ben', san toz Chioza' gak yizi'xene'n.” ⁸ Na' lii gokbe'teyi Jesúza' daa chza'lall'gake', na' w̄nabile' legake', chi'e:

—¿Berache chza'lall'zle ka'? ⁹ ¿Achakile chyalljchid' ye! wak xench yep' beeni: “Ba bizi'xen' saaxya cho'na'”, ka daa yepée: “Biyas na' bigoo nez”? ¹⁰ Na' wliid' le', nad' Ben' Bsel' Chioza' nap'

ye! w̄nabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

¹¹ —Nia' li', biyas, bitob daa cho'na', na' biyaj lillo'na'.

¹² Na' lii biyastie' bitobe' daa che'na' na' bizee chwiate ben'ka' lle' na'. Na' yog'zgake' bibani na' be'la'ogake' Chioza', che'gake':

—Bigan' ile'icho ka dga.

Jesúza' goxe' Levína' kwenche gake'ne' txen

(Mt. 9:9-13; Lc. 5:27-32)

¹³ Na' wyaj Jesúza' sto shii cho'a nisdona' na' ben' zan janogake'ne', na' bli' b̄sedile' legake'. ¹⁴ Na' wde Jesúza' gana' chi' Levína', xiin Alfewa', chchixje' daa chkaa ben' Rómaka'. Na' chi'ene':

—Da, dino nad'.

Na' wzolla' Levína' janoe'ne'.

¹⁵ Na' to shii Jesúza' len ben'ka' n̄kagake'ne' txen cheej chaogake' lill Levína', na' zan ben' w̄ichixjka' na' ben'ka' zeyi chegake' n̄kagake' ben' mal cheej chaolengake'ne', la' ben' zan ba nak ben'ka' no le'. ¹⁶ Na' bal' fariseoka', ben'ka' lekzka' chli' chsedi leya', ka ble'gakile' cheej chaolen Jesúza' ben'ka', na' gollgake' ben'ka' n̄kagake'ne' txen:

—¿Berache cheej chaolenz beena' chli' chsedi le' ben' w̄ichixjka' na' ben' malka'?

¹⁷ Na' ka beni Jesúza' che'gake' ka', na'ch chi'e:

—Ben'ka' zoa shi'a shao' aga no wen rmech chyalljgakile', san ben'ka' bi shawaan chyalljgakile'ne'. Ka'kzə nad', aga bid' ni che ben'ka' nak ben' li ben' shao', san ni che ben' malkan' bid'.

W̄nabgakile' Jesúza' bighe bi chon ben'ka' n̄kagake'ne' txen wbasaa

(Mt. 9:14-17; Lc. 5:33-39)

¹⁸ To shii ben'ka' nak Juanna' txen na' ben'ka' nak fariseoka' txen choogake'

wbas'. Na' baḷ beṅ' wyajgake' lao Jesúza' na' che'gake'ne':

—Beṅ'ka' nak Juanna' txen na' beṅ'ka' nak fariseoka' txen chozagake' wbas'. ¿Berache beṅ'ka' nakgake' li' txen bi chongake'n?

¹⁹ Na' che' Jesúza' ḷegake':

—¿Awak soa beṅ'ka' chaxe' to ga chak wishagna' wbasaa shlak chak ḷṅina'? Bi gakan, ḷa' shlak zoalen beena' chshagna' ḷegake' aga wak soagake' wbasaa. ²⁰ San wllin ḷa kat' yikwas beṅ' beena' chshagna' ladje'ka', kana'chan soagake' wbasaa.

²¹ 'Ni to beṅ' bi chida' chichollee ḷee lech' gola' lat' lech' kob, ḷa' lech' koba' yibe'n kat' chibe'n na' zizikli wchez'chan lech' gola', na' dii xench gak gana' nchez'.

²² Ni biga zoa beṅ' chguee vino koba' ḷoo yid golka', ḷa' vino koba' wchezaan yid gola' na' kwiayi' vino koba' lente yid gola'. Na' daan, chiyal' sholl vino koba' ḷoo yid koba'.

Beṅ'ka' non Jesúza' txen chyishjgake' do che trigona' ḷlana' chombaangake'

(Mt. 12:1-8; Lc. 6:1-5)

²³ Na' to ḷa sabd, ḷlana' chombaan beṅ' Israelka', wdelen Jesúza' beṅ'ka' nakgake'ne' txen to ga naz to beṅ' trigo, na' wzolo beṅ'ka' nakgake'ne' txen wdishjgake' trígona' wdaogake'n. ²⁴ Na' goll fariseoka'ne':

—¿Berache chonz beṅ'ki nako' txen daa bi chiyal' gongake' ḷlani chombaanch'o?

²⁵ Na' golle' ḷegake':

—¿Ani shlin biṅ' wlable daa ben dii Davina' to shii kon beṅ'ka' nakgake'ne' txen ka byallj daa gaogake'? ²⁶ Kana' nak Abiatara' b̄xoz choo b̄xoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki che Chioza' na' wdaolene'n beṅ'ka' nakgake'ne' txen, ḷa'kzi toz b̄xozkan' chiyal' gaogake'n.

²⁷ Na' ḷekzka' golle' ḷegake':

—Chioza' wleje' ḷlani chombaanch'o kwenche gaklenan benecha', aga b̄xe bsile' benecha' kwenchezə we'la'ogake' ḷlani chombaanch'on. ²⁸ Daan, nad', Beṅ' Bsel' Chioza' Yell-lioni, chṅabi'a lao ḷlani chombaanch'o.

Beena' net neena' ḷḷaa

(Mt. 12:9-14; Lc. 6:6-11)

3 Na' sto shii wyaj Jesúza' gana' chdop chllaggake' choe'ḷwillgake' Chioza' na' ladj beṅ'ka' lle' na' len to beṅ' net neena' ḷḷaa. ² Na' chwiayen'gake' shi wiyon Jesúza'ne' ḷa sabda', ḷlana' chombaangake', kwenche gaogake' xya che'. ³ Na' che' Jesúza' beena' net neena' ḷḷaa:

—Wzolla' na' wze gchol beṅ'ki.

⁴ Na'ch wṅabile' beṅ'ka' ndop nllag na':

—¿Beran na leya' chiyal' goncho ḷa sabdka'? ¿Agoncho daa nak wen, anti goncho daa nak mal? ¿Ayislacho beṅ', anti witchone'?

Na' kokzno billii xtilleena'. ⁵ Na' ka chwie' beṅ'ka' lle' na', blee na' gokyeshile' daa nakgake' beṅ' lall'do chech, na' chi'e beena':

—Bli noona'.

Na'ch bli na' beena' na' lii biyakteyin. ⁶ Na' bichej fariseoka' na' wzologake' chgoogake' xnezin len beṅ'ka' non Heródeza' txen kwenche witgake' Jesúza'.

Beṅ' zan bdop bllag cho'a nisdona' gana' chda Jesúza'

⁷ Na' biza' Jesúza' gana' zoe' na' zejlene' beṅ'ka' nakgake'ne' txen cho'a nisdona' na' beṅ' zan beṅ' Galiléaka' wnogake' ḷegake'. ⁸ Na' beṅ' zan beṅ'ka' lle' gana' mbani Judeana', na' yell Jerusalénna', na' gana' mbani Idumeana', na' beṅ'ka' lle' shḷaa yao Jordánna' na' yellka' ndil nllag yell Tírona' na'ch yell Sidónna', ka wnezgakile' chon Jesúza' dii zan yel' wak, na' wyajgake' jawiagake'ne'.

⁹Na' daa lle' ben' zan inleeb, golle' ben'ka' naggake'ne' txen yisbig'gake' to barkw gana' lljshie' kwenche bi idak-wyill' ben' be ben' zilka' le'. ¹⁰La' ben' zan inleeb ba biyone' na' yog' ben'ka' bi shao' chdi'a chllaggake' lawe'na' kwenche gox'gake'ne' na' yiyakgakile'. ¹¹Na' dii xiw'ka' yoo bal' ben'ka', ka chle'gakin Jesúza', chongakan ka chchek' xib ben'ka' lawe'na' na' chosyaagakan, che'gakan:

—jLin' nako' Xiin Chioza'!

¹²Na' Jesúza' bsheshlene'gakan kwenche bi inagakan ka' ga lle' lla' ben'.

Jesúza' chbeje' shllin' postlka'

(Mt. 10:1-4; Lc. 6:12-16)

¹³Ka biyoll ben Jesúza' diika', na' wleje' bal' ben'ka' wyazlallee gagkake'ne' txen na' wyajlengake'ne' to lo yaa. ¹⁴Na' wleje' shllin' ben'ka' kwenche tal-engake'ne' txen na' kwenche wselee legake' llje'gake' cho'a xtill' Chioza', na' bsi'e legake' postl. ¹⁵Na' bi'e legake' yel' wñabia' kwenche yiyongake' ben'ka' bi shao' na' yibejgake' dii xiw'ka' yoo ben'. ¹⁶Ben'kin wleje' shllin': Simónna', beena' bisi'e Pedro; ¹⁷Jacóbona' len ben' bishee Juanna', ben'ka' nak xiin Zebedewa', (ben'ka' bsi'e Boanerges, daa zeji ben' nak ka yi' wziw' dii chashj chtin); ¹⁸na' Andréza', Felipena', Bartoloména', Matewa', Tomáza', Jacóbona', xiin Alfewa', Tadewa', Simón, beena' wlen cananistka', ¹⁹na'ch Jud Scariota', beena' bene' Jesúza' lo na' ben' malka'.

Wnagake' che Jesúza' bchine' yel' wak che dii xiwaa

(Mt. 12:22-32; Lc. 11:14-23; 12:10)

²⁰Na' Jesúza' len ben'ka' naggake'ne' txen biyajgake' gana' zoagake'. Na' daa bizdi'a bizllag ben' zan inleeb, ni bi gok latj gaogake'. ²¹Ka wñezi ben'ka' nak bish' ljwell Jesúza', wyaj-

gake' nan lljaxi'gake'ne', la' gokgakile' ba chaktonte'n.

²²Na' lekzka' ben'ka' chli' chsedi leya', ben'ka' zaak Jerusalénna', nagake' che':

—Bezlo daa chñabia' dii xiw'kan' yo'e, na' yel' wak cheyinnan' chisheshile' dii xiw'ka'.

²³Na' gox Jesúza' legake' na' bzo'e to jempl lawe'ka', chi'e:

—¿Nakra gon Satanáza' yibej ljwell dii xiwiinna'? ²⁴Ben'ka' lle' toz yell shi til-len ljwellgake' na' gagkake' choplə, aga ssha soagake'. ²⁵Na' ben'ka' lle' toz yoo shi illaa ljwellgake' na' gagkake' choplə, aga ssha soagake'. ²⁶Na' shi Satanáza' na' dii xiw'ka' nak lall' na'yin yiyakdilgakan na' gagkakan choplə, bi idiagakan, san ba bllin lla kwiayi'gakannan', shi ñaa.

²⁷'Kono gak sho' loo yoo lill to ben' wal na' kwane' bi de che' shi bi wcheje'ne' zigaate, na'chan wtesh wlo'e loo lille'na'.

²⁸'Dii li' nia' le', Chioza' yizi'xene' yog'lo' saaxya na' yog'lo' dii mal daa chbell chne ben' che'; ²⁹san beena' ine zban che Espíritu Sántona', biga yizi'xene' che', na' toshiizi gag xbageue cheyi daa wchell wñie' che'.

³⁰Golle' legake' ka' daa wnagake' che' dii xiwaan yo'e.

Xna' Jesúza' na' ben' bisheeka'

(Mt. 12:46-50; Lc. 8:19-21)

³¹Na'ch bllin xna' Jesúza' len ben' bisheeka', wzegake' lesh' chyoonna' na' bsel'gake' ben' janegake'ne'. ³²Na' ben'ka' chi' kwit Jesúza' gollgake'ne':

—Ba chiyilj xñoona' li' len ben' bishooka'.

³³Na' chi'e legake':

—¿Añezile noran xña'na' na' ben' bishaaka'?

³⁴Na' chwie' ben'ka' chi' kwite'na' na'ch chi'e:

—Ben'kin xña'na' na' ben' bishaaka'.

³⁵Nottezə beena' chon ka cheeni Chioza',

len' ben' bishaana', ben' zanna' na'ch
xna'na'.

Jempl che to ben' goz goon

(Mt. 13:1-9; Lc. 8:4-8)

4 Sto shii wzolo Jesúza' bli' bsdile'
ben' cho'a niso'da', na' daa bdog
bllag ben' zan inleeb jshie' to loo barkw
daa chi' cho'a niso'da', na' ben'ka' bdi'a
bllag wll'e'gake' cho'a niso'da'. ²Na' dii
zan dii bli' bsdile' legake' na' bchine'
jemplka', na' golle' legake':

³—Li wzenag dga. To ben' goz goon
wzee zeje' goza'. ⁴Na' ka zej chzalee
binna', balan bxop cho'a neza' na' bllin
byinka' wdaogakban. ⁵Na' zi balan bxop
ladj yajka', gana' bitek bi yo chi'. Na'
tolbe' bilaan, daa bi chi'tekan yona'. ⁶Per
ka bla' wbillan, bkwedgakan. Na' daa
bi bde loinna', wbillan. ⁷Na' zi balan
bxop ladj yag yesh'ka' na' yag yesh'ka' bi
be'gakan latj igolgakan na' bibi wllian.
⁸Na' zi balan bxop gana' chi' yo wenna',
na' bgolgakan na' le wlliangakan. Balan
wllia shichoa wej, na' zi balan guiyon
wej, na'ch to guiyoa wej.

⁹Na' chi'e' legake':

—Ka le' chenile dga nia', li sen wneyi.

Jesúza' bzajniile' legake' biche chseesee jemplka'

(Mt. 13:10-17; Lc. 8:9-10)

¹⁰Na' ka bgaan stoz Jesúza', ben'ka'
wll'e' gaoshosh kwite'na' len ben'ka'
shllin, wnaabgakile'ne' bi zeji jempla' daa
bseesile' legake'. ¹¹Na' chi'e' legake':

—Chioza' cho'e' latj inezile daa kono
wnezi che ye'l' wnaabia' che'na'. Per
ben'ka' bi chzenag che', chseesid' legake'
jemplka' ¹²kwenche la'kzi ile'tegakile' ka
chon', bi shajni'gakile' bi zejin, na' la'kzi
yentegakile' xtilaana', bi shajni'gakile'n,
kwenche bi yiyag yilengakile' lao Chioza'
na' bi yizi'xene' chegake'.

Jesúza' bizajniile' bi zeji jempla'

(Mt. 13:18-23; Lc. 8:11-15)

¹³Na' chi'e' legake':

—Shi bi chajniile jempli, ¿nakra gonle
shajniile diika' sto? ¹⁴Beena' chaz zak-
lebile' beena' choe' cho'a xtil' Chioza'.
¹⁵Zoa ben' chengakile' cho'a xtil' Chioza'
na' kat' ba bengakile'n, lii zejte dii xi-
waa chikwasan daa loo yichjlall'do'eka'.
Na' chak chegake' ka gok che binna'
daa bxop cho'a neza'. ¹⁶Zi balgake'
chak chegake' ka gok che binna' daa
bxop ladj yajka' na' aga bi logakin bde.
La' ka chengakile' cho'a xtil' Chioza'
chiba chizak'gakile' chzenaggake'n ¹⁷per
shlollchga chajle'gake'. Na' kat' bi chen
chle'gakile' ni che cho'a xtil' Chioza', lii
chbej yichjtegake'n. ¹⁸Zi balgake' chak
chegake' ka gok che binna' daa bxop
ladj yag yesh'ka'. Chengakile' cho'a xtil'
Chioza', ¹⁹per chi' yichjgake' diika' chak
chegake', na' zetegake' wneyi che ye'l'
wni'ana' na' chzelall'tegake' yog'loite daa
de yell-lioni. Na' legakannan' chsej chl-
longakan gon xshin cho'a xtil' Chioza'
loo yichjlall'do'eka'. ²⁰Na' zoa zi bal ben'
chengakile' cho'a xtil' Chioza' na' cha-
jle'gake' do yichj do lall'gake', na' chon
xshinin loo yichjlall'do'eka'. Na' chak
chegake' ka binna' bxop lo yo wenna' daa
wllia shichoa wej, na' guiyon wej na'ch
to guiyoa wej.

Jempl che to kandil

(Lc. 8:16-18)

²¹Na' lekzka' chi'e' legake':

—Biga zoa ben' chxene' kandila' na'
chdose'n to dii wkwashaan len wa
chni'en xan xlague'na', san chzoe'n sibó
kwenche wzeeni'n doxen loo yoonan'.
²²Na' lekzka' yog'loite dii ngash' naa
wllin lla yila' lawin, na' daa kono nezi
naa wllin lla inezi benaan. ²³Le' chenile
dga nia', li sen wneyi.

²⁴Na' lekzka' chi'e' legake':

—Li se wneyi cheyi dga chzenagle. Na' shi gonle ka dii le, Chioza' wzajni'chile' le' dii xench. ²⁵ Beena' chzenag, zizikchli shajni'chile', na' beena' bi chzenag, axt daa ba benile' lat' yiyał-lallee.

Jempl che binna' daa chgol

²⁶ Na' lekzka' chi'e legake':

—Yel' wñabia' che Chioza' zaklebin daa chak che binna' chaz ben'. ²⁷ Beena' chaz chaan, chila' daa chaze' na' chgolan la'kzi chese' wa chechj chdaze', ka'kzə shi wał wa tella, na' ni bi nezile' nak chak chgolan. ²⁸ Lo yell-lioni chla' daa chaz ben': zigaate chila'n, na' chgolan, na' chzen do, na'tech chbian. ²⁹ Na' kat' ba gol daa chbian, na' chizi' chilape'n.

Jempl che sa mostásana'

(Mt. 13:31-32; Lc. 13:18-19)

³⁰ Lekzka' che' Jesúza' legake':

—¿Bera ka wsaklebicho yel' wñabia' che Chioza', lla? wa ¿bera ka jempl wchincho wsaklebichon? ³¹ Yel' wñabia' che Chioza' nakan ka sa mostásana' daa chazgake'. La'kzi lennan' binna' daa li-izelozi nesh'ch, ³² kat' ba bla'n na'ch chgolan na' chakan dii xench ka yog'te yix' kwan yoblə, na' chak xoziinka' dii xen axt byindo'ka' wak lljshiagakban na' sho'gakb xol cheyinna'.

Jesúza' bchine' jempl ka bli' bsdile' ben'

(Mt. 13:34-35)

³³ Dii zan jempl bchin Jesúza' ka bli' bsdile' ben'ka' cho'a xtill' Chioza', bene' kon ga zeelo wyajni'gakile'. ³⁴ Na' toshi-izi bzoe' jemplka' lao ben'ka' bdi'a bllag, na' toz ben'ka' nakgake'ne' txen bizajni-ile' bi zejın yog' diika'.

Jesúza' bkweze' to yejpe' wal lo nisdona'

(Mt. 8:23-27; Lc. 8:22-25)

³⁵ Na' ka goł, golle' ben'ka' nakgake'ne' txen:

—Techo shłaa nisdona'.

³⁶ Na' biza'gake' kwit ben'ka' bdi'a bllag na' biche'gake' Jesúza' loo barkwa' daa chi' cho'a nisdona', na' lench barkw yoblə ziyajlengake'. ³⁷ Na' wze to yejpe' wal na' wzolo nisdona' chas chataan axt ba chiyollan loo barkwa', na' ba wzolo chbe'n yel. ³⁸ Na' ba de Jesúza' chese' xaninna' nkogtie' to dii nkogue', na' jas-bangake'ne' che'gake':

—¿Maestro! ¿Abikzə chakbe'ilo' ba chbe'cho yel?

³⁹ Na' wyase' bsheshlene' be'na', na' chi'e nisdona':

—Lliz wzoa.

Na' wlez be'na' na' wche'lli nisdona'.

⁴⁰ Na' golle' ben'ka' nakgake'ne' txen:

—¿Biche' chllebzle? ¿Abikzan' gonlilall'le nad'?

⁴¹ Na' le' bblebgake', na' che' ljwellgake':

—¿Nora beeni, lla?, axt be'na' na'ch nisdona' choagakan xtillee.

Bibej Jesúza' dii xiwaa yoo ben' Gadárana'

(Mt. 8:28-34; Lc. 8:26-39)

5 Na'ch bllingake' gana' mbani Gadárana' daa llia shłaa nisdona'. ² Na' ka bichej Jesúza' loo barkwa', na' wbig' to ben' yo'e dii xiwaa. Na' beeni bcheje' loo kapsanta' ³ gana' none' ka lill xlatje'. Na' kono gok wchej le', ni gdenna' bi ben llin. ⁴ Zan shii bchejgake' ni'a neena' gdenka', na' tolbe'do' chchogue'gakan, na' kono wzoyi le'. ⁵ Ka wał ka tella chechj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'. ⁶ De zit'lə ble'ile' zej Jesúza' na' bxonjdoe' jatile'ne' na'

jaçhek' xibe'na' lawe'na', ⁷ na' besyee zillj, chi'e:

—iBi wlalli' cho' kon nad', Jesús, Xiin Chios, ben' choo ben' xen! Chat'yoid' li, j̄b̄cheb lao Chioza' bi wsak'zi'o nad'!

⁸ Gollan ka' daa goll Jesúza' len:

—iDii xiw', bichej loo kwerp che beeni!

⁹ Na' goll Jesúza' len:

—¿Bin lio'?

Na' che'n:

—Legiónan lia', la' zannto' nak.

¹⁰ Na' got'yochgain Jesúza' bi wselee-gakan gan yoblə. ¹¹ Na' gaozə kwit yaana' gana' lle'gake', lle' zan kush chaogakb. ¹² Na' got'yoi dii xiw'ka' le', che'gakan:

—Bsel' neto' gana' lle' kushka' na' be' latj yiyoonto' legakb.

¹³ Na' bi'e latj chegakin, na' bichej-gakan jayoogakan kushka'. Na' nakgakb ka chopa mil, na' wzologakb chxonj-dogakb jabixgakb loo nisdona', na' jche'gakb yel.

¹⁴ Na' ben'ka' chap kushka' ziyajdogake' jayellgake' ben'ka' lle' yella' na' ben'ka' lle' lyixaa daa ble'gakile', na' ben' zan jawia daa gok. ¹⁵ Na' ka bllingake' gana' ze Jesúza', ble'gakile' beena' wyoo dii xiw'ka' chi'e kwite'na' ba biyakw xe'na' na' ba biyeen biyeeniile', na' bllebgake'. ¹⁶ Na' ben'ka' ble'i daa gok che beena' wyoo dii xiw'ka' na' daa gok che kushka', be'gake'n dill' lao ben'ka' bllin. ¹⁷ Na' got'yogakile' Jesúza' yiyaje' gan yoblə.

¹⁸ Ka chiyoo Jesúza' loo barkwa', beena' wyoo dii xiw'ka' got'yoile'ne' wi'e latj shajlene'ne'. ¹⁹ Per bi bi'e latj, san chi'ene':

—Biyaj lillo'na' gana' lle' bish' l̄jwello'ka', na' jayellgake' ka nak diiki ba ben Xancho Chioza' cho' na' ka ba biyesh'lallile' li'.

²⁰ Na'ch biza' beena' na' jaye' dill' doxen gana' mbani Decápoliza' daa ben Jesúza' che', na' yog' ben' bibani.

Biyon Jesúza' noola' bex' xe'na' na' lekzka' xiin Jairona'

(Mt. 9:18-26; Lc. 8:40-56)

²¹ Ka billinlen Jesúza' barkwa' sh̄laa nisdona', na' bdi'a bllag ben' zan cho'a nisdona' gana' billine'. ²² Na' bllin to ben' le Jairo, nake' to ben'ka' chgoogake' xnezi diika' chon ben' Israelka' gana' chdop chllaggake' choe'lwillgake' Chioza'. Na' ka blline' gana' ze Jesúza', b̄chek' xibe' lawe'na' ²³ na' benyesh'chgue', chi'e:

—Ba chet bi' cha'na'. Ben goklen sho'gach w̄xoə noona' yichjbaa kwenche yiyakib' na' ibanchb'.

²⁴ Na' wyajlen Jesúza' le', na' ben' zan inlleb nogake'ne' axt bdakwyillgake'ne'.

²⁵ Na' ladj ben' zan walka' len to noolə ba gok shllin yiz chzoe' wbaa. ²⁶ Dii zan dii ba ben ble'ile' lao ben' wen rmechka', na' ba blliyee yog' dii de che' na' bi gokkze' rmech, san gokxinlile'. ²⁷ Na' ka benile' xtill' Jesúza', j̄ni'e ladj ben' zan walka' no le' na' jexee xe'na'. ²⁸ La' gokile': "La'ch' xe'na' shel' ba bexaa, na' yiyakid'." ²⁹ Na' katena' wlez wbaana' na' gokbe'ile' ba bigaa yillwe' che'na'. ³⁰ Na' gokbe'i Jesúza' bchej yel' wak che'na', na' biyechje' chi'e ben'ka':

—¿Noran bex' xa'na'?

³¹ Na' ben'ka' non le' txen che'gake'ne':

—Ben' zan walan ndakwyill li'. ¿Biche nazo': "Non ba bex' nad'?"

³² Na' ze Jesúza' chwie' ben'ka' lle' kwite'na' kwenche inezile' non bex' le'.

³³ Na'ch noola', daa ba gokbe'ile' biyakile', de chall chlllezile' wdie' na' b̄chek' xibe'na' lawe'na' na' golle' le' doxen daa ba gok che'. ³⁴ Na' che' Jesúza'ne':

—Xiin', daa chonlilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

³⁵Na' ni chshaljte Jesúza' ka bllin to chop ben' wza' lill Jairona', chi'ene':

—Ba wit bi' cho'na'. Bich gonilo' mae-
stroni zed.

³⁶Na' bi ben Jesúza' legake' kwent, na' golle' Jairona':

—Bi illebo'. Kon b̄xenilall' nad'.

³⁷Na' bi bi'e latj shajlen ben' yoblə le', lete Pédrona' na' chop bish'te, Jacóbona' na'ch Juanna'. ³⁸Na' ka bllingake' lill Jairona', ble'ile' le chakyeshii ben'ka' lle' na' na'ch chbellgake' na' le chosyaagake'. ³⁹Na' jabigüee gana' lle'gake' na' golle' legake':

—¿Berache chonzle dane na' chbellzle? Aga ba wit bi'do'nan', san cheszbaan.

⁴⁰Na' bxillgakile' Jesúza'. Na' bisheshe' yog'ləle' na' wyoolene' x̄ax̄na'baa na' ben'ka' zejləne' txen gana' de bi'do'na'.

⁴¹Na' bexee na'baa na' golle'b':

—Talita, cumi[§] —na' zejın: Bi' nooldo', nia' li' biyas.

⁴²Na' bi' nooldo'na' lii biyasteb' na' bidab', la' ba gokkzib' shllin yizan. Na' bibanchgayi ben'ka' lle' na'. ⁴³Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

Billin Jesúza' yell Nazareta'

(Mt. 13:53-58; Lc. 4:16-30)

6 Na' biza' Jesúza' biyaje' lalle'na', na' ben'ka' nakgake'ne' txen ze-
jlengake'ne'. ²Na' ka bllin lla sabda', llana' chombaan ben' Israelka', wyaje' gana' chdop chllaggake' choe'lwillgake' Chioza' na' wzoloe' bli' bsedile' ben'ka' lle' na'. Na' zan ben'ka' bzenag xtilleena' bibangakile', na' che'gake':

—¿Gara jasedz beeni diiki, lla? ¿Gara za' ye'l' sin' che beeni, na' ye'l' wakka' chone', lla? ³¿Aaga beenin karpin-
tera', beena' nak xiin Maríana', na' ben'

bish' Jacóbona', Joséna', Júdaza' na'ch Simónna'? Na' lekzka' ben' zane'ka' zoa-
gake' lallchoni.

Na' bi wyajle'gake' che'. ⁴Na' che' Jesúza' legake':

—To ben' chyixjee daa che' Chioza'ne', gattez chgoogake'ne' balaan, san lall lille'na' aga no chgoo le' balaan.

⁵Na' aga bitek ye'l' wak gok gone' na', lete xonjchga ben' we'ka' b̄xoə neena' yichje'ka' na' biyone' legake'. ⁶Na' biban-
ile' daa bi chajle' ben'ka' che'. Na' wde' bli' bsedile' ben'ka' lle' to to yellka' llia gaozə yell Nazareta'.

Jesúza' bselee ben'ka' shllin llje'gake' cho'a xtil' Chioza'

(Mt. 10:5-15; Lc. 9:1-6)

⁷Na' wnie' ben'ka' shllin, na' bselee chop weje', na' bi'e legake' ye'l' w̄nabia' kwenche yibejgake' dii xiw'ka' yoo ben'.

⁸Na' golle' legake' bibi gox'gake' kat' koogake' nez; bi chiyal' wa'gake' yixj ga koo xshinlaze'ka', ni dii gaogake', ni mech, san twejz yag bar gox'gake'.

⁹Na' shkwe'z xelgake' wlej, na' zi shkwe'z xe'ka' gawk. ¹⁰Na' chi'e legake':

—Yoona' gana' illinle, na'z soale ax̄t ka illinch lla yiza'le. ¹¹Na' yella' gana' bi wlebgake' le' ni bi wzenaggake' chele, ka yiza'le na', yishible bishtena' llia ni'aleka' kwenche gakbe'gakile' aga wenan chong-
gake' bi chlebgake' cho'a xtil' Chioza'. Dii li nia' le', kat' illin lla w̄choglo Chioza' che ben', ben'ka' lle' yella' gana' bi wlebgake' le', ile'gakile' ye'l' zak'zi' xench aga ka ben'ka' wlle' yell Sodómana' na' yell Gomórrana'.

¹²Na' wza'gake' zjtixje'gakile' ben' chiyal' yiyaj yilengakile' saaxya che'ka'. ¹³Na' bibejgake' zan dii xiw'ka' yoo ben', na' bshongake' lat' wej seta' yichj ben'ka' bi shao' na' biyagkakile'.

[§]5:41 Talita, cumi: dill'ki nakgakan dill' arameo.

**Betgake' Juanna',
beena' bchoa ben' nis**

(Mt. 14:1-12; Lc. 9:7-9)

¹⁴ Na' Heródeza', beena' wñabia' gana' mbani Galileana', benile' yog' daa chon Jesúza', daa le ba zeyi che'. Baḷ ben'ka' che'gake':

—Dii Juanna', beena' bchoa ben' nisan' ba biban, daan chone' yel' wakka'.

¹⁵ Zi baḷe' che':

—Elíazan' ba biyed.

Na' zi baḷe' che':

—Nake' ben' chyixjee daa che' Chioza'ne', ka ben'ka' wzoa kani'yi.

¹⁶ Ka beni Heródeza' dill'ki, na' chi'e:

—¡Beenan' dii Juanna', beena' ben' mandad wchog yichje'na'! ¡Ba bibane' ladj ben' wetka'!

¹⁷ La' kwín Heródeza' bene' mandad beḡgake' Juanna' na' bseje'ne' lillyana' daa bseshlene'ne' daa bikee Herodíaza', xool ben' bishee, Felípena'. ¹⁸ Juanna' golle'ne':

—Xya nleeb nakan bikoo xool ben' bishoona'.

¹⁹ Na' bllaa Herodíaza' Juanna' na' goklallee wite'ne', per bibi gok gone' ²⁰ daa chlleb Heródeza' Juanna', daa nezele' nake' to ben' li ben' shao' ben' nak lall' na' Chioza', na' bi bi'e latj no bi goni le'. Na' la'kzi chakchoplallee che dill'ka' cho'e, bibaile' bzenague' che'.

²¹ Per ka wyayi Heródeza' yiz, bene' to lni na' goxe' ben'ka' chñabia', na' xan soldadka', na' ben'ka' mbejlawin gana' mbani Galileana'. Na' got' xlatjin gon Herodíaza' ka cheenile'. ²² Na' bi' nool wew' che Herodíaza' byaab' lao ben'ka' lle' lina', na' le bibayi Heródeza' len ben'ka' chaolene' ka byaab'. Na' golle'b':

—Wñab bittezə cheenilo' na' gona'n.

²³ Na' bchebe' wi'eb' daa cheenib', la'kzi ax̄t gashj gana' chñabi'e wi'eb'.

²⁴ Na' bichejb' janabib' xña'baa:

—¿Bera ka inab', lla?

Na' che' xña'baa:

—Wñab yichj Juan wichoa nisa'.

²⁵ Na' lii biyooteb' gana' chi' Heródeza', na' che'b':

—Cheenid' yichj Juanna' to lo plat lilij ñaate.

²⁶ Na' le gokyeshii Heródeza', per daa ba bcheble' lao yog' ben'ka' goxe', bi goklallee wllonile'b' daa chñabib' le'.

²⁷ Na' lii bsel'tie' to soldad jachogue' yen Juanna' loo lillyana' ²⁸ na' bllie' yichje'na' to lo plat. Na' bi'en bi' nool wewaa na' le'b' be'baan xña'baa.

²⁹ Ka wnezi ben'ka' nak Juanna' txen, na' jaxi'gake' kwerp che'na' na' jakwash'gake'ne'.

Bwao Jesúza' gayaa mil ben'

(Mt. 14:13-21; Lc. 9:10-17; Jn. 6:1-14)

³⁰ Ka billin postlka' gana' zoa Jesúza', na' gollgake'ne' yog' diika' jengake' na' daa jali' jasedgakile' ben'. ³¹ Na' che' Jesúza' legake':

—Li sho' shajcho ga kono ben' lle' kwenche yizi'lall'lat'cho.

Golle' ka' daa le chdia chllag ben' zan lawe'ka', na' ni bi chak latj gaogake'. ³² Na' wyoogake' to barkw wyajgake' ga kono ben' lle'. ³³ Na' ben' zan ble'gakile' ka wza'gake' na' biyombia'gake' legake', na' wza'do ben'ka' lle' to to yell zejdogake' gana' illin barkwa' na' nechlögake' bllin. ³⁴ Na' ka bichej Jesúza' loo barkwa' ble'ile' ba bdi'a bllag ben' zan inleeb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsdile' legake'. ³⁵ Na' ka wlle', ben'ka' nakgake'ne' txen wbig'gake' lawe'na' che'gake'ne':

—Ba wlle' ñaa, na' gani lle'cho kono zoa wit' dii gaocho. ³⁶ Goll ben'ki yiya-jgake' ranshka', na' yellka' lliia gaozə kwenche lljxi'gake' daa gaogake'.

³⁷ Na' che' Jesúza' legake':

—Len', li we' dii gaogake'.

Na' che'gake'ne':

—¿Nakra gonnto' lljxi'nto' yetxtilka' gao yog' beṅ'ki? la' wyejljain che chop guiyoa lla che laxj beṅ'.

³⁸ Na' che' Jesúza' legake':

—Li lljawia ka'k' yetxtilka' naple.

Na' ka wnezgakile' ka'ka'n de, na' che'gake'ne':

—De gayaan, na' zi chop bel.

³⁹ Na'ch goll Jesúza' legake' kwekgake' xonj wej beṅ'ka' lo yixa'. ⁴⁰ Na' wche' to guiyoa wejgake' na' shiyon wejgake'. ⁴¹ Na' bex' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choxken, na' bxoxje' yetxtilka' bi'en beṅ'ka' nakgake'ne' txen kwenche be'gake' che che beṅ'ka'. Na' lekzka' yog'gake' be'gake' belka'. ⁴² Na' yog'lolgake' wdaogake' ka beljgakile'. ⁴³ Na' postilka' bitopgake' yetxtilka' len belka' bichoonan, na' biyakan zi shllin xet'. ⁴⁴ Na' beṅ'ka' wdao, to beṅ' byoka'zə gokgake' gayaa mil.

Jesúza' wzee lo nisdona'

(Mt. 14:22-27; Jn. 6:16-21)

⁴⁵ Na' ka wde, bigoo Jesúza' beṅ'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa llia zi shlaa nisdona', shlak bisee beṅ'ka' bdi'a bllag na'. ⁴⁶ Na' ka biya beṅ'ka' billesh, na' wyaje' lo yaana' jelwille' Chioza'. ⁴⁷ Na' ka gol, ba zej barkwa' gchol nisdona' na' stoz Jesúza' bgaane' gana' biza'n. ⁴⁸ Na' ble'ile' le chllaglogaken' daa za' be'na' gana' zejlagake'. Na' ni bal wlo'e nez tlo nisdona' zeje' gana' ziyajlgake'. Na' ba zoa yidie' lawe'ka' ⁴⁹ ka ble'gakile'ne' zeje' tlo nisdona' na' gokgakile' yel bzenzan. Na' besyaagake' ⁵⁰ daa le bllebgabe' daa ble'gakile'. Na' lii wnetie' legake', chie':

—Bi illeble, nad'kzan.

⁵¹ Na' biyepé' loo barkwa' na' wche'lli be'na'. Na' le bibangakile', ⁵² la' aga ba wyajni'gakile' yel' waka' daa bene' che yetxtilka' daa gokgake' beṅ' lall'do' wal.

Jesúza' biyone' beṅ'ka' bi shao' gana' mbani Genesareta'

(Mt. 14:34-36)

⁵³ Na' ka biyoll wdegake' lo nisdona' na' bllingake' yell-lío daa mbani Genesareta', na' bda' barkw che'ka' yag cho'a nisdona'. ⁵⁴ Ka bchejgake' loo barkwa', lii biyombia'te beṅ' Genesaretka' Jesúza'. ⁵⁵ Na' wdadogake' doxen gana' mbani lalle'ka' btopgake' beṅ' bi shao', na' lo daazə nxoagake' legake' chjwa'gake' legake' gana' nezgakile' bllin Jesúza'. ⁵⁶ Na' gattezə chaje' laa yelldo'ka' laa yell xenka', wa laa ranshka', chyixjgake' beṅ'ka' bi shao' tneza' gana' chdie'. Na' chat'yogakile'ne' wi'e latj gox'gake' la'ch' xe'na'. Na' yog' beṅ'ka' gok bex'gake'n biyakgakile'.

Diika' chxinj chlenan yichjlall'do'chona'

(Mt. 15:1-20)

7 Fariseoka' len zi bal beṅ'ka' chli' chsedi leya', beṅ'ka' zaak Jerusalenna', bllingake' lao Jesúza'. ² Na' ka ble'gakile' bal beṅ'ka' nak Jesúza' txen bi bixis biyib neeka' ka zi gaogake', na' wdaogake' xya chegake'. ³ (La' fariseoka' len yog'z beṅ' Israelka' ni nogake' daa bli' bsemi dii xozxtoe'ka' legake' nan bi gak gaogake' shi bin' yixis yiyib neeka'. ⁴ Na' ka chiyoll chajgake' lao yaana' shi bi yixis yiyib neeka' bi gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'.) ⁵ Na' fariseoka' len beṅ'ka' chli' chsedi leya' wñabgakile' Jesúza', che'gake':

—¿Bi'che bi chon beṅ'ki nako' txen ka bli' bsemi dii xozxto'choka' cho'?, la' bi chixis chiyib neeka' kat' cheej chaogake'.

⁶ Na' che' Jesúza' legake':

—Kwasolj inlleban wne dii Isaiáza' chele, le' beṅ' wxiye', kana' bzeje' daa na:

Ka nak beṇ'ki, de cho'a dill'zan choe'la'ogake' nad', na' aga choe'la'ogake' nad' do yichj do lall'gake'.

⁷ Bibi zjanayin chongake' ka choe'la'o nad';

na' daa chli' chsedgakile' nakan dii chyiljall'z beṇ'.

⁸ Na' le' chbej yichjle daa nllia Chioza' bia' gonle kwenche gonle daa chyiljall' beṇ' yell-lioni.

⁹ Na' lekzka' golle' legake':

—Chzoale ka'lə daa nllia Chioza' bia' gonle kwenche gonle daa bli' bsemi dii xoxzto'leka' le'. ¹⁰ Moiséza' wne': “Li koo xaxna'lēna' balaan”, na’ “Beena' ine zban che xaxneena' chiyal' guete.” ¹¹ Na' le' choe'le latj yee beṇ' xaxneena': “Bi gak gaken' le', la' yog' dga de cha' ba ncheb' wi'an Chioza'.” ¹² Na' daa nale ka', bich chonle byen gaken beṇ' xaxneena'. ¹³ Na' daa chonle ka', chzoale cho'a xtil' Chioza' ka'lə kwenche chonle daa bli' bsemi dii xoxzto'leka' le'. Na' dii zanch ka dga chonle.

¹⁴ Na' wne Jesúsza' yog' beṇ'ka' lle' na', na' golle' legake':

—Li wzenag dga inia' le', na' li shajniin: ¹⁵ Aga daa cheej chao beṇ' yell-lionin chxinj chlenan le'. San daa chalj chxe loo yichjlall'do'enan' chxinj chlenan le'. ¹⁶ Ka le' chenile dga nia', li sen wneyi.

¹⁷ Na' ka bikwase' kwit beṇ'ka' lle' na' biyo'e loo yona' gana' zoagake', na' beṇ'ka' nakgake'ne' txen wṇabgakile'ne' bi zevin daa golle' beṇ'ka'. ¹⁸ Na' golle' legake':

—¿Ani le' bi chajniilen? ¿Abi chajniile aga daa cheej chao beṇaan chxinj chlenan le'? ¹⁹ La' aga loo yichjlall'do'enan' illinan, san loo li'enan' lljche'n, na'tech yichejan.

Na' daa golle' ka', zevin bittezə yeṇ' wao wak yeej gaocho. ²⁰ Na' lekzka' golle':

—Daa chchej loo yichjlall'do' beṇ' yell-lioni, lennan' chxinj chlenan le'. ²¹ La'

loo yichjlall'do'ekan' chalj chxe diiki bi nak wen: yeṇ' chza'lall' mal, yeṇ' chne-len ljwellin, yeṇ' chiyit ljwellin, ²² yeṇ' wban, yeṇ' wzelall', yeṇ' wen dii mal, yeṇ' wxiye', yeṇ' wenlen kwerp cheyinna' daa bi nxe bi nzak', yeṇ' xe', yeṇ' wylj wzan dill' che beṇ', yeṇ' chep cha'lall', na' yeṇ' nchoṇ' nṇiti. ²³ Yog'loṇ' dii malki chalj chxegakan loo yichjlall'do' beṇ' na' chxinj chlenagan legake'.

To noolə bi nake' beṇ' Israel beṇ'ilallee Jesúsza'

(Mt. 15:21-28)

²⁴ Na' biza' Jesúsza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inezin, per bi gok wkwashēe. ²⁵ Na' to noolə, beṇ' zoa to bi' nool che' yoob' dii xiwaa, ka wnezele' bllin Jesúsza', lii wyajtje' jachek' xibe'na' lawe'na'. ²⁶ Na' noola' nake' beṇ' griego, na' golje' gana' mbani Sirofeníciana'. Na' got'yoile' Jesúsza' yibeje' dii xiwaa yoo bi' nool che'na'. ²⁷ Na' goll Jesúsza' le':

—Yog'zə beṇ' zigaate chwawe' xi-ine'ka'. La' bi nakan wen koyocho daa chao xiinchoka' na' wzaṇ'chon lao bekw'ka'.

²⁸ Na' che' noola' le':

—Lekzilo'n, beṇ'do', per bekw'ka' chbe'gakb xan mesa' na' chitopgakb blaaka' chxop.

²⁹ Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

³⁰ Na' ka billin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

Biyon Jesúsza' to beṇ' kwell na' bi chak inetie'

³¹ Na' biza' Jesúsza' gana' mbani Tírona' na' bidie' yell Sidónna' na' billine' gana' de nido' che Galileana', gana' mbani Decápoliza'. ³² Na' jwa'gake' lawe'na' to

ben' kwell na' leyi bi cha'yen' inie', na' got'yogakile'ne' w_xoa neena' yichje'na'.³³ Na' b_che' Jesúza'ne' ka'lə gana' kono lle', na' b_ne' xbene'na' loo nague'na', na' bllaa xeneena' lo xbene'na', bshile'n lo loll' beena'.³⁴ Na' blis jalawe'na' cha'lə, wkaalallee, na' golle'ne':

—jÉfata! —zejin: jByalj!

³⁵ Na' lii byaljte nague'na', na' gok bita lolleena' na' bishalje' wen.³⁶ Na' che' Jesúza' ben'ka' ble'i kono ye'gake' ka'. Na' la'kzi golle' legake' ka', zizikli bzegake'n dill'.³⁷ Na' le bibangakile', che'gake':

—Yog'lojte chak gon beeni, chiyone' ben'ka' bi cheni, na' ben'ka' bi chak ine, chone' ka chnegake'.

Jesúza' bwawe' tapa mil ben'

(Mt. 15:32-39)

8 Do kana', ben' zan inlebb bdop bllag. Na' daa bibi de yeej gaogake', w_ne Jesúza' ben'ka' nakgake'ne' txen chi'e legake':

²—Chiyeshid' ben'ki, la' ba gok shon lla zoalengake' nad' na' bibi de yeej gaogake'.³ Na' shi yise_laa legake' bi neej naogake', xoll ichol'-lall'gake' tneza', la' balgake' za'gake' zit'.

⁴Na' ben'ka' nakgake'ne' txen che'gake'ne':

—¿Gatg lljxi'cho dii gao yog' ben'ki?, la' gani lle'cho kono zoa wit' dii gaocho.

⁵Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

⁶Na' bene' mandad kwe' ben'ka' lo yona', na' bexee gallte yetxtilka', na' ka biyoll bi'e Chioza' ye'l choxken, na' bxoxje'n na' bi'en ben'ka' nakgake'ne' txen kwenche chisgake' che che ben'ka'.⁷ Na' lekzka' nox'gake' zto chop be_l. Na' bi'e Chioza' ye'l choxken, na' golle' ben'ka' nakgake'ne' txen we'gake' che che ben'ka'.⁸ Na' yog'lolgake' weej wdao-gake' axt ka beljgakile', na' bitopgake' zi

gall xet' diika' bichoonan.⁹ Ben'ka' weej wdao gokgake' ka tapa mil. Na' Jesúza' bisee legake'¹⁰ na' bizee biyoolene' ben'ka' nakgake'ne' txen loo barkwa' na' ziyajgake' gana' mbani Dalmanútana'.

Fariseoka' goklall'gake' gon Jesúza' to ye'l wak lawe'ka'

(Mt. 16:1-4; Lc. 12:54-56)

¹¹Na' bllin fariseoka' na' wzologake' chakguedlengake' Jesúza'. Na' daa goklall'gake' wchixgake'ne', w_nabgakile'ne' gone' to ye'l wak lawe'ka' kwenche gak-bia' shi Chioza'kzan bseleene'.¹² Na' Jesúza' axt wkaalallee, golle':

—¿Berache le' zoale naa chnabzle gon' to ye'l wak dii ile'ile'? Dii li nia' le', aga bi ye'l wak gon' ile'ile'.

¹³Na' bizee kwite'ka', na' biyo'e loo barkwa' sto shii ziyaje' sh_laa niso'na'.

Dill' wxiye' che fariseoka' zaklebin levadúrana'

(Mt. 16:5-12)

¹⁴Na' ben'ka' nak Jesúza' txen gol'-lall'gake' wa'gake' yetxtil che'ka', na' tlish'chga dii noa'gake' loo barkw che'ka'.¹⁵ Na' che' Jesúza' legake':

—Wsak'gale bi shajle'le dill' wxiye' che fariseoka' na' che Heródeza', daa zaklebi levadúrana'.

¹⁶Na' ben'ka' nakgake'ne' txen che' ljwellgake':

—Daa bi bi'acho yetxtilan' ne' ka'.

¹⁷Na' gokbe'i Jesúza' dillaa choe'gake', na' golle' legake':

—¿Berache chakzile daa bi bi'ale yetxtilan' nia' ka'? ¿Abin' shajni'kzile' ni bin' gakte'ile ka nak diika' chon'? ¿Abin' iyalj yichjlal'do'lenen'?¹⁸ Zoate jalaoleka' na' bi chle'ile, na' zoate nagleka' na' bi che-nile'. ¿Abi chjadinile ka ben'?¹⁹ Kana' bxoxj' gay' yetxtilka' na' wdao ben'ka' gaya' mil, ¿ba_l xet' diika' bichoonan?

Na' gollgake'ne':

— Shllinan.

²⁰—Na' kana' bxoꝑj' gall yetxtilka' na' wdao ben'ka' tapa mil, ꝑbaꝑ xet' diika' bichoonan?

Na' che'gake'ne':

—Zi gallan.

²¹Na' che' Jesúza' legake':

—ꝑAna' ni ka' biꝑ' shajni'kzile?

**Jesúza' biyone' to ben'
lꝑhoꝑ yell Betsáidana'**

²²Na' bllingake' yella' le Betsaida, na' ben'ka' lle' yella' jwa'gake' to ben' lꝑhoꝑ lao Jesúza' na' got'yogakile'ne' gox'gache'ne'. ²³Na' bex' Jesúza' na' ben' lꝑhoꝑa' na' wleje'ne' yella'. Na' bll'e' xeneena' jalawe'na' na' bꝑoa neena' yichje'na', na' wnable'ne' shi ba chle'ile'.

²⁴Na' che' ben' lꝑhoꝑa':

—Chle'id' xonj ben', na' nakgake' ka yag dii chza'.

²⁵Na' Jesúza' bexee jalawe'na' sto shii, na' biyakile'. Na' ble'ile' kwasloꝑ yog'loꝑte. ²⁶Na' bisel' Jesúza'ne' shꝑicha lille'na', chi'ene':

—Bi lljayoo dill' yella'.

**Pédrona' bi'e dill'
Jesúzan' nake' Crístona'
(Mt. 16:13-20; Lc. 9:18-21)**

²⁷Na' biza'len Jesúza' ben'ka' nakgake'ne' txen wyajgake' yellka' mbani Cesarea de Filípona'. Na' shlak ngogake' nez, wnable' legake', chi'e:

—ꝑNon na ben' nak'?

²⁸Na' che'gake'ne':

—Balgake' nagake' lin' dii Juanna', beena' bchoa ben' nisa', na' zi balgake' nagake' lin' Elíaza', na' zi balgake' nagake' nako' sto ben' wdixjee daa goll Chioza'ne' kani'yi.

²⁹Na' chi'e legake':

—Shera le', ꝑnora nale nak'?

Na' che' Pédróna':

—Lin' Crístóna', beena' nꝑheb Chioza' wselee.

³⁰Na' che' Jesúza' legake' kono ye'gake' ka'.

Jesúza' cho'e dill' guete'

(Mt. 16:21-28; Lc. 9:22-27)

³¹Na' wzolo Jesúza' bli' bsdile' legake' nan le', Ben' Bsel' Chioza' Yell-lioni, chonan byen sak'zi'e dii xen, na' ben' golka' chꝑabia' na' bꝑozka' chꝑabia' na'ch ben'ka' chli' chsedi leya' gaxzban-gakile'ne', na' chonan byen witgake'ne' na' yibane' ka gak shon' lla. ³²Na' bshaljlene' legake' kwasloꝑ daa gak ꝑhe'. Na'ch wlej Pédróna'ne' ka'lə na' wzolo golle'ne' bi koo cho'e daa. ³³Na' biyechj Jesúza' chwie' ben'ka' nakgake'ne' txen, na' bsheshlene' Pédróna', chi'ene':

—ꝑKwas ka'lə, Satanás!, la' bi chajni-ilo' daa cheeni Chioza' gone', san de yell-liozan chajniilo'.

³⁴Na' wꝑe Jesúza' ben'ka' nakgake'ne' txen len ben'ka' lle' na', na' chi'e:

—Shi no cheeni gake' nad' txen, chiyaꝑ' wsanall' kwine' na' izanile' yeꝑ' mban ꝑhe'na' yen ile'ile' bittez ni ꝑha', na' gone' ka chazlallaa. ³⁵La' beena' bi chzanile' yeꝑ' mban ꝑhe'na', beenan' kwiayi', san beena' chzanile' yeꝑ' mban ꝑhe'na' ni ꝑha' na' ni ꝑhe dill' wen dill' kob ꝑha'na', beenan' gat' to yeꝑ' mban ꝑhe' zejli kani.

³⁶Bibi zjanayin gap ben' yog'loꝑ daa de yell-lioni, shi le' kwiayee. ³⁷Na' aga zakii chixje' kwenꝑhe yisla yeꝑ' mban ꝑhe'na'. ³⁸Nottezə beena' chido'i wꝑebe' nombi'e nad' wa wi'e cho'a xtillaana' lao ben' saaxyaka' ben'ka' bi chonlilall' nad', ka'kzə nad', Ben' Bsel' Chioza' Yell-lioni, yiyi yido'id' le' kat' yiyedlen' anj ꝑha'ka' na' zinsa' balaꝑ xen ꝑhe Xa' Chioza'.

9 Na' lekzka' golle' legake':

—Dii li nia' le', baꝑ-le lle'leni, ni mbanle ile'ile ka chꝑabia'len Chioza' yeꝑ' wak xen ꝑhe'na'.

Jesúza' biyake' nlla'lə

(Mt. 17:1-13; Lc. 9:28-36)

²Wde xop lla, Jesúza' wyaje' to lo yaa sibə, na' bchi'e Pédróna', Jacóbona' na'ch Juanna'. Na' lawe'ka' biyake' nlla'lə. ³Na' xe'na' axt chep cheeni'n, na' biga zoa ben' chibe'n xtil inleeb ka gokan. ⁴Na' ble'gakile' Elíaza' na'ch dii Moiséza' chshaljengake' Jesúza'. ⁵Na' che' Pédróna' Jesúza':

—Maestro, jwen inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

⁶Kon bi billet-lallee golle', daa chlle-bchgagake'. ⁷Na' wze to bej bkwashaan legake', na' loo beja' wne Chioza', chi'e:

—Beenin xiinaa, na' le chakidee. Li wzenag che'.

⁸Na' ka bwiagake' gana' wlle' ben'ka' shon, stoz Jesúza' ze.

⁹Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Ben' Bsel' Chioza' Yell-lioni, ba bibane' ladj ben' wetka'.

¹⁰Na' daa golle' ka', ni to kono ben' yoblə gollgake' daa ben ble'gakile', la'kzi wñabi ljwellgake', bi zejin daa golle' yibane' ladj ben' wetka'. ¹¹Na' wñabgakile' Jesúza', che'gake'ne':

—¿Biche naz ben'ka' chli' chsedi leya' nan zigaate Elíazan' yiyed?

¹²Na' chi'e legake':

—Dii li, Elíaza' yide' zigaate yidgwee xnezi yog'lofte. ¿Abi nezile biche Cho'a Xtill' Chioza' nan Beena' Bsel' Chioza' Yell-lioni chonan byen sak'zi'chgue' na' gakzbani ben' le'? ¹³Na' nia' le', ba biyed Elíaza', na' bengakile'ne' daa nazan chegake', kon ka na Cho'a Xtill' Chioza' gongake' che'.

Biyon Jesúza' to bi' yoo dii xiw'

(Mt. 17:14-21; Lc. 9:37-43)

¹⁴Na' ka billingake' gana' lle' ben'ka' sto, ben'ka' naggake'ne' txen,

na' ble'gakile' lle' ben' zan inleeb kwite'ka', na' len bal ben'ka' chli' chsedi leya' chakguedlengake' legake'. ¹⁵Na' ben'ka' lle' na' ka ble'gakile' Jesúza', bibangakile' na' wza'dogake' jawapgabe'ne' chiox. ¹⁶Na' chi'e legake':

—¿Bi cheyin chakguedlenile ben'ka'?

¹⁷Na' to beena' len ladj ben'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoo' to dii xiw' na' chllonan ineb'. ¹⁸Gatteza' chdab' dii xiwaa choxa'n le' na'ch chchoonan le' lo yona'. Na' chbia bllin' cho'abaa, na' chaoxaj ley-baa na' chzecha kwerp che'baa. Na' ba gosh' ben'ki nako' txen yibejgabe' dii xiwaa yoo' per bi chakgabe'.

¹⁹Na' che' Jesúza' legake':

—¿Le' ben' bi chajle! ¿Zi' kak'tek chiya' soalen' le'? ¿Zi' kak'tek chiya' soid' le'? Li lljxi'shki' ni.

²⁰Na' jwa'gabe'b' lawe'na'. Na' ka ble'i dii xiwaa Jesúza', benan ka wyazb' shona'. Na' billee' lo yona' na' wbi' wto' na' wllia bllin'na' cho'abaa. ²¹Na' wñabi Jesúza' xabaa, chi'e:

—¿Btrate wzolo chakb' ki?

Na' che' xabaa:

—Kana' nakteb' bi'do' chakb' ka'. ²²Na' zan shii ba bzal' dii xiwaa' lo yi'na' na' loo nisa' kwenche witan le'. Na' shi wak yiyono'b', biyesh'lall'gachi neto' na' goklengach neto'.

²³Na' che' Jesúza':

—¿Biche nazo' shi wak'?, la' beena' chonlilall' Chioza' aga bi dii lallj gat' che'.

²⁴Na' besyaa xabaa, chi'e:

—Chonlilallaane'. ¿Goklen nad' gonlilall'chee!

²⁵Na' ka ble'i Jesúza' ba chdop chllag ben' zan inleeb, na' bsheshlene' dii xiwaa, chi'en:

—Dii xiw', lin' chono' kwenche bi cheni bi'ni ni bi chak ineb', nad' nia' li', bichej, na' bich gak yiyoo sto shii.

²⁶ Na' besyaa dii xiwaa, na' bxizan leb' zibia' wal na' bichejan, na' gotb' ka bi' wet. Na' ben' zan wnagake': "Ba witb'." ²⁷ Na' bex' Jesúza' na'ba' kwenche bisolleeb'.

²⁸ Na' ka biyoo Jesúza' to loo yoo, ben'ka' nakgake'ne' txen wñabgakile'ne' to lezgake', che'gake':

—¿Berache bi gok yibejnto' dii xiwaa?

²⁹ Na' chi'e legake':

—Kwenche gak yichej dii xiw' ka dga, chiya' soale wbas' na' we'llwill-le Chioza'.

Jesúza' sto shii cho'e dill' guete'

(Mt. 17:22-23; Lc. 9:43-45)

³⁰ Na' biza'gake', na' bidegake' gana' mbani Galileana'. Na' Jesúza' bi gok-lallee no inezi gan zoagake' ³¹ daa chzajniile' ben'ka' nakgake'ne' txen. Na' chi'e legake':

—Nad', Ben' Bsel' Chioza' Yell-lioni, gon ben' nad' lo na' ben' malka' na' witgake' nad', na' ka gak shon lla, yiban' ladj ben' wetka'.

³² Na' bi wyajni'gakile' daa chi'e legake', na' bi biyaxjgakile' inabgakile'ne' biche che'ze' ka'.

¿Noran zak'chi?

(Mt. 18:1-5; Lc. 9:46-48)

³³ Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi cheyin chakguedzle shlak zin-goocho neza'?

³⁴ Na' ni togake' bi wñe, daa gokguedgake' che noyen'gaken' nak ben' zak'chi. ³⁵ Na' wche' Jesúza' na' goxe' ben'ka' shllin, chi'e legake':

—Shi nole cheenile gakle ben' zakii, chiya' gon kwine ka wen llin che ben'.

³⁶ Na'ch bzoe' to bi'do' ladje'ka'. Na' blene'b' chi'e legake':

³⁷ —Nottezə ben' wlebe' to bi'do' ka bi'do'ni daa chonlilallee nad', nad'kzan

chlebe'. Na' beena' chlebe' nad', lezkza' chlebe' Chioza', beena' bsel' nad'.

**Beena' bi chakzbani cho',
txenkzan nake' cho'**

(Lc. 9:49-50; Mt. 10:42)

³⁸ Na' che' Juanna' le':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben' na' bllonnto' gone' ka', la' bi nake' cho' txen.

³⁹ Na' che' Jesúza':

—Bi wllonle gone' ka', la' beena' chzetje' lia'na' kwenche chone' yel' wak, aga wak inie' zban cha'. ⁴⁰ La' beena' bi chakzbani cho', txenkzan nake' cho'. ⁴¹ Na' nottezə beena' gone' le' la'ch' lat' nis yeeje daa nakle nad' txen, dii li nia' le', de dii si'e banez.

Diika' gon ka ibixcho lao dii mala'

(Mt. 18:6-9; Lc. 17:1-2)

⁴² 'Nottezə beena' gon ka ibix to ben' zi' chzolo chonlilallee nad', naklan wen wwal'gake' yene'na' to yaj che molinna' na' lljaza'gake'ne' loo niso'na' aga ka daa gone' ka ibix ben' lao dii mala'.

⁴³ Na' shi noona' chonan ka ibixo' lao dii mala', bchogan. Wenchlan bi de noona' tlaa yillino' kwit Chioza' aga ka daa yiyaj doxentio' lo yi' gabi'la' daa biga yiyol, ⁴⁴ gana' ni bzogaa bi chet ni biga chiyol yi'na'. ⁴⁵ Na' shi ni'ona' chonan ka chono' to dii mal, bchogan. Wenchlan bi de ni'ona' tlaa yillino' kwit Chioza' aga ka daa yiyaj doxentio' lo yi' gabi'la', ⁴⁶ gana' ni bzogaa bi chet ni biga chiyol yi'na'. ⁴⁷ Na' shi jalawo'na' chonan ka chono' to dii mal, wlejan. Wenchlan bi de jalawo'na' tlaa yillino' gana' zoa Chioza' chnabi'e aga ka daa yiyaj doxentio' lo yi' gabi'la', ⁴⁸ gana' bi chet bzogaa ni biga chiyol yi'na'.

⁴⁹ 'Ka yog'te diika' chzangakile' choe'gake' Chioza' chgoogake'n zed', ka'kzan yog'te ben'ka' nonlilall' nad'

yen ile'gakile' yel' zak'zi'na' yell-lioni.
⁵⁰Zedaa nakan dii wen, per shi bich nakan zxi', aga wakch yiyonchon zxi' dii yoblə kwenche wchinchon. Chiyal' soalen ljjwell-le mbalaz, na' shi gonle ka', nakle ka yel' wao daa yoo zed' na' sian.

Bi chiyal' yilaa ben'ka' nshagna'

(Mt. 19:1-12; Lc. 16:18)

10 Biza' Jesúza' Capernaúma' ziyaje' gana' mbani Judeana' na' lo yell-liona' daa de shlaa yao Jordánna'. Na' bizdi'a bizllag ben' zan lawe'na' na' wzoloe' chli' chsedile' legake' kon ka ba yooloe' chone'. ²Na' bal' fariseoka' wbig'gake' lawe'na', na' kwenchezə wchixgake'ne' wñabgakile'ne' shi de lsens yilaa xool ben'. ³Na' chi'e legake':

—¿Bin bllia dii Moiséza' bia' gonle?

⁴Na' che'gake'ne':

—Dii Moiséza' bi'e latj yichoon ben' byona' xoolena' na' wi'ene' to yish daa cho'e dill' ba bilaagake'.

⁵Na' che' Jesúza' legake':

—Dii Moiséza' bllie' bia' gonle ka' daa nakle ben' widenag. ⁶Per dii nech ka wxe wzil yell-lioni, Chioza' "bene' ben' byona' na'ch noola'." ⁷"Daan, ben' byona' wlee xaxneena' kwenche soalene' xoolena' ⁸na' gakgake' toz." Na' bich nakgake' chop, san ba nakgake' toz. ⁹Na' ben'ka' ba non Chioza' toz, ni to ben' yell-lio bi chiyal' yilee legake'.

¹⁰Ka billingake' yooná' gana' zoagake', ben'ka' nakgake'ne' txen wñabgakile'ne' cheyi daa golle' ka'. ¹¹Na' che' Jesúza' legake':

—Beena' yilee nool che'na' na' yishag-nee nool yoblə, chone' ka beena' zoakzə nool che' na' chdalene' nool yoblə. ¹²Na' shi noola' yilee ben' che'na' na' yikee ben' yoblə, chone' ka beena' zoakzə ben' che' na' chdalene' ben' yoblə.

Jesúza' chonleeye' bi'do'ka'

(Mt. 19:13-15; Lc. 18:15-17)

¹³Na' bal' ben' jwa'gake' bi'do' che'ka' lao Jesúza' kwenche wxoa neena' yichjb'ka' na' gonleeye' legakb'. Na' ben'ka' nakgake'ne' txen wzologake' chsheshlengake' ben'ka' zjwa' bi'do'ka'. ¹⁴Na' ka ble'i Jesúza' chsheshlengake' ben'ka', blee na' chi'e legake':

—Li we' latj yid bi'do'ki lawa'ni, bi wlonle, la' Chioza' chnabi'e loo yichjllal'do' ben'ka' nak ka legakb'. ¹⁵Dii li nia' le', beena' bi yiyak yichjllal'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

¹⁶Na' blene' bi'do'ka', na' bxoá neena' yichjb'ka' na' benleeye' legakb'.

**To bi' wew', bi' wni'a,
bshaljem' Jesúza'**

(Mt. 19:16-30; Lc. 18:18-30)

¹⁷Ka ba chiza' Jesúza' yigwee nez, bllindo to bi' wew' bchek' xibbaa lawe'na' che'bee:

—Maestro, li' nako' ben' wen. ¿Beran chiyal' gon' kwenche gat' to yel' mban cha' zejli kani?

¹⁸Na' che' Jesúza' le'b':

—¿Berache nazo' nad' ben' wen? Toz Chioza' nake' ben' wen. ¹⁹Ba nezkzilo' daa nllia Chioza' bia' goncho: "Bi wito' ben', bi soaleno' nool bi nak nool cho', bi kwano', bi chiljllalloo bizə gon ino' che ben', ni bi siyoo, na' wdap balaan xaxnoo."

²⁰Na'ch che'bee:

—Maestro, kana' naktia' bi' xkwid' chon' yog' diika'.

²¹Na' bwia Jesúza' le'b' kon yel' chaki, chi'e:

—Stozə daa chyalj gono': jayet' yog' dii de cho' na' be'n ben' yesh'ka', na' gat' to yel' shao' cho' yabana'. Na' da dino' nad'.

²² Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.

²³ Na' bwia Jesúza' ben'ka' lle' na', na' chi'e ben'ka' nakgake'ne' txen:

—¡Lallj inleeb chonan che ben' wni'aka' we'gake' latj inabia' Chioza' legake'!

²⁴ Na' bibani ben'ka' nakgake'ne' txen daa golle' ka'. Na' chizi'e legake':

—Le' xiindawaa, chonan lallj che ben' wni'ana' yilline' yabana' gana' chnabia' Chioza'. ²⁵ Lobe'ch te to kamey to xan yesh' aga ka to ben' wni'a yilline' yabana' gana' chnabia' Chioza'.

²⁶ Ka bengakile' golle' ka', zizikli bibangakile', na' che' ljwellgake':

—¿Notg gak yillin lao Chioza', shka'?

²⁷ Na' bwia Jesúza' legake' chi'e:

—Ni to ben' yell-lío bi' gak gone' dga, per Chioza' aga bi' dii lallj che' de, la' yog'lołte chak gone'.

²⁸ Na' Pédróna' chi'ene':

—Neto' ba wlej yichjnto' yog'loł dii napnto' kwenche nonnto' li' txen.

²⁹ Na' che' Jesúza':

—Dii li' nia' le', nottezə ben' ba bzanile' no lille', no xaxnee, no ben' bishee, no ben' zane', no xiin' xooole', no yell-lío che' ni cha' nad' na' ni che dill' wen dill' kob cha'na', ³⁰ lo yell-lioni Chioza' yiyo'ene' dii zanch ka diika' wlej yichje', no lille', no ben' bishee, no ben' zane', no xiine', no yell-lío che' la'kzi chiya dii wsak'zi' ben' le', na' illin lla gat' to yel' mban che' zejli kani. ³¹ Per ben' zan nakgake' ben' zakii naa, wllin lla bich bi' sak'gake', na' ben' zan bi' nakgake' ben' zakii, wllin lla gagkake' ben' zakii.

De wyon shii Jesúza' cho'e dill' guete'

(Mt. 20:17-19; Lc. 18:31-34)

³² Ka ziyajgake' Jerusalénna', na' zil-lialo Jesúza' lao ben'ka' nakgake'ne' txen. Na' le' chibangakile', na' ben'ka' zinoch le' le' chllebgake'. Na' bche' Jesúza' ben'ka'

shllin' ka'lə na' wzoloe' cho'e dill' lawe'ka' daa gak che', ³³ chi'e legake':

—Ba gokbe'kzile' ba ziyajcho Jerusalénna', na' nad', Ben' Bsel' Chioza' Yell-lioni, gongake' nad' lo na' b̄xozka' chnabia' na' ben'ka' chli' chsedi leya', na' w̄choglogake' cha' guet' na' gongake' nad' lo na' ben' zit'ka'. ³⁴ Na' w̄tittgakile' nad', na' wlla' xeneeka' nad', na' wit chingake' nad', na' w̄itgake' nad'. Na' ka gak shon lla yiban' ladj ben' wetka'.

To dii w̄nab Jacóbona' len Juanna' lao Jesúza'

(Mt. 20:20-28)

³⁵ Na' Jacóbona' len Juanna', ben'ka' nak xiin' Zebedewa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga inabinto' li'.

³⁶ Na' chi'e legake':

—¿Beran cheenile' gon' chele?

³⁷ Na' che'gake'ne':

—We'gacho' latj kwe'nto' sh̄laa wej kwito'na' kat' solo inabi'o gana' de bal-aan xen cho'na'.

³⁸ Na' che' Jesúza' legake':

—Aga nezile' bin chnabile. ¿Awzoile' w̄til-le ka yel' zak'zi'ka' idil' illag' na' gak chele ka gak cha'?

³⁹ Na' che'gake'ne':

—Wzointo'n.

Na' che' Jesúza' legake':

—Dii li, w̄til-le ka yel' zak'zi'ka' idil' illag' na' gak chele ka gak cha'. ⁴⁰ Per daa nale kwe'le sh̄laa wej kwitaa bi' nak lo na' gona'n, san ben'ka' ba mbej Chiozan', gakan chegake'.

⁴¹ Ka beni ben'ka' zi shi, na' bllaa-gake' Jacóbona' na'ch Juanna'. ⁴² Na' w̄ne Jesúza' legake', chi'e:

—Nezkzile ben'ka' chnabia' yell-lioni na' ben'ka' zakii chongake' byen chzenag ben' chegake'. ⁴³ Per aga kan' chiya' gonle. Shi nole cheenile' gakle ben' mbejlawin chiya' gon kwintle ka wen llin

che ben'. ⁴⁴Na' shi nole cheenile gakle ben' zakii, chiyal' gakle ka ben' ndoo lla yel chone' xshin ben'. ⁴⁵La' nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'na' kwenche yisla' ben' zan lao saaxyana'.

**Jesúza' biyone' ben'
lchoła' le Bartimeo**

(Mt. 20:29-34; Lc. 18:35-43)

⁴⁶Na' bllingake' Jericóna', na' ka ba chichej Jesúza' yella' kon ben'ka' nakgake'ne' txen na' len ben' zanch zino-gake'ne', na' chi' to ben' lchol' cho'a neza' cheenile' no we' le' mech, na' lie' Bartimeo, xiin to ben' le Timeo. ⁴⁷Na' ka benile' nan Jesús, ben' Nazaretan', wdena', na' wzoloe' chosyee, chi'e:

—¡Jesús, xiin dia che dii Daví, biyesh'lall'gachi nad'!

⁴⁸Na' ben' zan bsheshlengake'ne' daa chosyee, na' zizikli chosyaache', chi'e:

—¡Xiin dia che dii Daví, biyesh'lall'gachi nad'!

⁴⁹Na' wlez Jesúza' chi'e:

—Li inie'.

Na' wnegake'ne', che'gake':

—Btiplaloo, wzolla', ba chnie' li'.

⁵⁰Na' bzalee ka'lə lechaa n̄xoá kolleena' na' wzollee jsie' lao Jesúza'.

⁵¹Na' wñabile'ne', chi'e:

—¿Bin cheenilo' gon' cho'?

Na' che' ben' lchoła'ne':

—Maestro, cheenid' ile'id'.

⁵²Na' che' Jesúza'ne':

—Wak yiyajo'. Daa ba ben'lilaloo nad', ba biyakilo'.

Na' katena' lii ble'teile' na' wnoe' Jesúza'.

Ka billin Jesúza' Jerusalénna'

(Mt. 21:1-11; Lc. 19:28-40; Jn. 12:12-19)

11 Ka ba zoa yillingake' Jerusalénna', na' wdegake' gaozə gana' llia yell Betfagéna' na'

yell Betániana', kwit Yaa Olívoza', na' Jesúza' bselee chop ben'ka' nakgake'ne' txen, ²chi'e legake':

—Li shaj yella' daa llia gaozə, na' ka illinle na', ile'ile to burr chbando', ba konon' kwia, da'b yaga'. Na' wsell-leb wche'leb nilə. ³Na' shi no inaz le': "¿Berache chsellzleb?", na' ye'lene': "Xancho-nan' chyalljile'b xtit, na' yiyontie'b."

⁴Na'ch wyaj ben'ka' bselee, na' ble'gakile' to burr da'b to cho'a yoo gana' chde neza', na' bsellgake'b.

⁵Na' ben'ka' lle' na' wñabgakile' legake':

—¿Bin chonle? ¿Biçe chsellzleb?

⁶Na' gollgake' legake' daa goll Jesúza', na' be'gake' latj bche'gake'b. ⁷Na' b̄xoá-gake' xe'ka' koll' burra' na' jasangake'b lao Jesúza', na' wllie'b. ⁸Na' ben' zan bshiljgake' xe'ka' tneza', na' zi bale' bchoggake' no zin na' wdixjgake'n tneza'.

⁹Na' ka ben'ka' llialo lao Jesúza' ka ben'ka' nogake'ne', chosyaagake', nagake':

—¡Li we'la'o Chioza'! ¡Gonleeyshga Xancho Chioza' beeni ba bselee!

¹⁰¡Gonleeyshga Xancho Chioza' yel' wñabia' che beeni zee lo dia che dii xozxto'cho Davina'! ¡Li da we'la'ocho Chioza' zoa yabana'!

¹¹Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll' bwie' doxenten na' ziyaje' Betániana' len ben'ka' shllin, daa ba wlle'.

**Bllaa Jesúza' daa bibi dii
zix llia yag yixwewa'**

(Mt. 21:18-19)

¹²Na' betiyo ka biza'gake' Betániana', wdon Jesúza'. ¹³Na' zit'lə ble'ile to yag yixwew llia xlaguinna', na' jawie' shi lekzka' llian yixwewa'. Na' ka blline' zeelo xlaguiinna' llia, la' aga tiemp che yixwew kana'. ¹⁴Na'ch golle' yaga':

—¡Batch kwio' dii gao ben'!

Na' beni ben'ka' nakgake'ne' txen ka golle'n.

**Jesúza' bisheshe' ben'ka' chit'
chde lesh' chyoodo'na'**

(Mt. 21:12-17; Lc. 19:45-48; Jn. 2:13-22)

¹⁵Na' ka billingake' Jerusalénna', Jesúza' wyo'e lesh' chyoodo'na' na' wzoloe' bisheshe' bichee'ne' ben'ka' chit' chde na' ben'ka' cha'o chzi'. Na' bishi'e mes che ben'ka' chshaa mecha' na' bzoles bzolline' gana' chi' ben'ka' chit'gake' palomka'. ¹⁶Na' bi bi'e latj no sho'lensch dii wit' wdie' lesh' chyoodo'na'. ¹⁷Na' wzoloe' chli' chsedile' ben'ka' lle' na', chi'e:

—Cho'a Xtill' Chioza' nan: “Lilla'na' nakan ga choe'lwill yog'te ben' lle' doxen lo yell-lioni nad'”, per le', ba nonzlen ka to ga chdop chllag wban.

¹⁸Na' ka beni b̄oxzka' ch̄n̄abia' na' ben'ka' chli' chsedile' leya' ka wne', wzologake' wdiljall'gake' nak gongake' witgake'ne', daa le chllbgake'ne', la' yog' ben' chibangakile' ka chli' chsedile' le-gake'. ¹⁹Na' ka gol, biza'len Jesúza' ben'ka' nakgake'ne' txen Jerusalénna'.

Wbill yag yixwewa'

(Mt. 21:20-22)

²⁰Na' betiyo shzila' ka wdegake' gana' zoa yag yixwewa', ble'gakile' ba wbill axt loinna'. ²¹Na' jadini Pédróna' daa goll Jesúza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

²²Na' che' Jesúza' legake':

—Li gonjilall' Chioza'. ²³Dii li nia' le, nottezə beena' yee yaani: “Bkwás ka'lə na' jsoa loo nisdona'”, na' bi gonchoplallee, san shajli'e, na' gak ka ine'. ²⁴Daan nia' le', bittezə inable kat' we'lwill-le Chioza', li shajle' ba nakkzan gone'n, na' ikaalen. ²⁵Na' kat'ka' choe'lwill-le Chioza', li si'xen che bish' ljwell-lena' shi bi chone' chele kwenche

Xalena' beena' zoa yabana' si'xene' saaxya cheleka'. ²⁶La' shi le' bi si'xen che ljwell-le, lekzka' Xalena', beena' zoa yabana', bi si'xene' saaxya cheleka'.

Yel' w̄n̄abia' che Jesúza'

(Mt. 21:23-27; Lc. 20:1-8)

²⁷Na' billingake' Jerusalénna' sto shii, na' shlak chda Jesúza' lesh' chyoodo'na', wbig' b̄oxzka' ch̄n̄abia', len ben'ka' chli' chsedile' leya' na' ben' golka' ch̄n̄abia', ²⁸na' che'gake'ne':

—Wnashki neto', ¿nora lsens cheyi chono' diiki? ¿No ben' li' yel' w̄n̄abia'na' kwenche chono' diiki?

²⁹Na' che' Jesúza' legake':

—Lekzka' nad', de to dii inabid' le'. Na' shi le' inale nad' daa inabid' le', na' inia' le' no lsens cheyin chon' yog' diiki. ³⁰¿Noran bsel' Juanna' kwenche bidchoe' ben' nisa? ¿AChiozan' bseleene', anti ben' yell-liona'zan? Li inashki nad'.

³¹Na'ch choe'len ljwellgake' dill', che'gake':

—Shi ye'chone' Chioza' bseleene', lobe' ine' cho': “¿Berache ki wyajle'le che', lla?” ³²Na' bite gak yize'chone' nozə beñaan bseleene'.

Bi biyaxjgakile' ye'gake'ne' ka' daa bllebgake' ben' yellka', la' yog'zgake' yoo yichjgake' Juanna' goke' to ben' wdxjee daa goll Chioza'ne'. ³³Na' gollgake' Jesúza':

—Bi nezinto'.

Na' che' Jesúza' legake':

—Lekzka' nad', bi inia' le' no ben' nad' yel' w̄n̄abia'na' chon' diiki.

**Jempl che wen llinka'
ben'ka' nak ben' mal**

(Mt. 21:33-46; Lc. 20:9-19)

12 Na' wzolo Jesúza' bseesile' legake' to jempl, chi'e:

—To ben' biyaze' yag uva. Na' wlo'en leeja', na' beshawee gana' wsigake'

uvaka', na' bene' to yoo sibə, gana' kwia beena' gap wwie'n.

¹Na'tech bene'n lo na' to chop ben' na' wzee zeje' zit'. ²Na' ka bllin lla yishibgake' uvaka', bselee to wen llin che'na' lao ben'ka' chap yag uvaka' kwenche lljaxi'e daa chidolee. ³Per ben'ka' bex'gake' wen llin che'na', na' bet wdingake'ne' na' bilaggake'ne' to ka che'. ⁴Na' xan yag uvaka' bselee sto wen llin che' lawe'ka', na' blaagake' yichje'na', na' chiya dii bengakile'ne'. ⁵Na'ch bselee stoe', na' betgake'ne'. Na'tech bselee zanch ben' yoblə; na' balgake' bengakile' zibia', na' zi balgake' betgake'.

⁶Na' ni chgaan bi'na' nakyen' xiine', bi'na' le chakile'. Na' bseleeb', la' gokile': "Waggake' balaan bi' cha'ni." ⁷Na' ben'ka' nak lo na'gake' yag uvaka' che' ljjwellgake': "Bi'nin gaki cheb' dga chapcho. Li da witchob', na' gakin checho." ⁸Na' bex'gake'b' na'ch betgake'b' na' bibejgake' kwerp chebaa gana' lle' yag uvaka'.

⁹Na' wñabi Jesúza' legake':

—¿Beraka chakile gon xan yag uvaka'? De de shaje' na' lljete' ben'ka' na' yiyone' yell-lío che'na' gana' lle' yag uvaka' lo na' ben' yoblə.

¹⁰¿Abigan' wlable Cho'a Xtill' Chioza'?, gana' na: Yaja' daa bi wyoolall' wen yooka', leyen'lannan' yaja' daa ba nchejcha yoonā.

¹¹Dgan ben Xancho Chioza' na' nakan to dii yibanicho.

¹²Na'ch goklall'gake' gox'gake' Jesúza' daa gokbe'gakile' bchine' jempla' daa bi chajle'gake' che'. Per daa chllibgake' ben'ka' ndop nllag, biza'gake' bibi bengakile'ne'.

Janabgakile' Jesúza' shi chiyal' chixjgake' daa chñab ben' Rómaka'

(Mt. 22:15-22; Lc. 20:20-26)

¹³Na' bsel'gake' lao Jesúza' bal' fariseoka' na' zi bal' ben'ka' nak Heródeza' txen, kwenchezo kweyjelgakile'ne' na' lljadaogake' xya che'. ¹⁴Na' wyajgake' lawe'na', che'gake'ne':

—Maestro, nezinto' dillaa choo nakan dii li. Na' biga chshoo cho'a xtilloona' lao nottez ben', la' bi chwio' shi no nakgake'. San chli'o nez li che Chioza' kon ka nakan. Wnashki neto': ¿Achiyal' chixjcho daa chñab beena' chñabia' Rómāna', anti bi chiyal' chixjchon?

¹⁵Na' gokbe'i Jesúza' aga do lall'gake'ne' che'gake'ne' ka', na'ch chi'e legake':

—¿Berache chyiljall'zle wchixle nad'? Li gonshki ni to mech kwenche ile'ida'n.

¹⁶Na' be'gake'ne'n, na' che' Jesúza' legake':

—¿Nora cho'alawin na' no lein da' lee mech?

Na' che'gake'ne':

—Che beena' chñabia' Rómanan'.

¹⁷Na' che' Jesúza' legake':

—Na'len li we' beena' chñabia' Rómāna' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

Wñabgakile' Jesúza' nak gak kat' yiban ben' wetka'

(Mt. 22:23-33; Lc. 20:27-40)

¹⁸Na' wyaj bal' saduceoka' lao Jesúza'. Na' daa nagake' bich yiban ben' wetka', wñabgakile'ne' dga:

¹⁹—Maestro, ley daa bzej dii Moiséza' nan shi to ben' byo guete' na' yigaan xoolena' wizeb na' kono xiingake' wzoa, ben' bisheena' chiyal' yikee nool wizeba' kwenche soa xiin dia che dii ben' bisheena'. ²⁰Na' to shii wzoa gall bish' ben'. Na' ben' necha' bshagnee, na'

wite' na' kono xiine' wzoa. ²¹Na' ben' wchopina' bikee noola', na' lekzka' wite' na' kono xiine' wzoa. Na' ka'kzə gok che ben' wyonina'. ²²Na' gall bish'te ben'ki wzoalengake' noola' na' kono xiingake' wzoa. Na' ka wde wit yog'lolgake', lekzka' wit noola'. ²³Na' kat' yiban ben' wetka', ζnorayen'en' gak ben' che noola', lla? la' gall bish'tegaken' wkaagake'ne'.

²⁴Na' che' Jesúza' legake':

—Naklejzilen, daa bi nombia'le Cho'a Xtill' Chioza' ni yel' wak che'na'. ²⁵Kat'ka' yiban ben' wetka', koch no ikaa ljwellin, ni koch no wit' wde xiinin, san yiyak-gake' ka anjlka' lle' yabana'. ²⁶Na' ka nak daa yiban ben' wetka', ζabin' wlable daa bzej dii Moiséza' gana' cho'en dill' che yagdo'na' cha', na' goll Chioza' dii Moiséza': “Nadaan Chios che Abrahama', Isaaca', na'ch Jacoba'”? ²⁷Na' bi nake' Chios che ben' wet, san nake' Chios che ben' ban. Dii xen inleeb naklejile.

**Daa llialach lao diika' bllia
Chioza' bia' goncho**

(Mt. 22:34-40)

²⁸Na' beni to ben' chli' chsedi leya' ka golle' legake'. Na' daa gokbe'ile' le wen billi'e xtilleeka', na' wñabile'ne':

—ζBeran lliachte nllia leya' bia' goncho?

²⁹Na' che' Jesúza'ne':

—Daa lliachte lao diika' nllia Chioza' bia' goncho, len daa na: “Li wzenag, le' ben' Israel, Xancho Chioza' zeelo nake' Chios. ³⁰Goki Xano' Chioza' do yichj do lalloo, axt ga zeelo chajniilo', na' do ka nak fuerz cho'na'.” ³¹Na' de wchopina' nakan ka dii necha: “Chiyal' gakilo' bish' ljwello'na' ka chaki kwino'.” Bich de dii zak'chi ka diiki.

³²Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'. ³³Na' daa gakicho Chioza' do yichj do lall'cho, na' axt ga zeelo chajni-

icho, na' do ka nak fuerz chechona', na' gaki bish' ljwellchona' ka chaki kwino', zak'chan aga ka yog'lolte bayix'ka' chit-gake' na' chzeygake'b lao Chioza'.

³⁴Na' ka gokbe'i Jesúza' kayen'nan bil-lii beena' xtilleena', na' chi'ene':

—Zi lat'zə chyalljilo' kwenche inabia' Chioza' yichjlall'do'na'.

Na' koch no biyaxji inabchile'ne'.

**Crístona' nake' xiin dia
che dii rey Davina'**

(Mt. 22:41-46; Lc. 20:41-44)

³⁵Na' shlak chli' chsedi Jesúza' ben'ka' lesh' chyoodo'na', na' chi'e legake':

—ζBerache nazə ben'ka' chli' chsedi leya' nan Crístona', beena' ba mbej Chioza' inabi'e, nake' xiin dia che dii Davina'? ³⁶La' kwino' dii Davina' bi'e dill' daa goll Espíritu che Chioza'ne', kana' wne':

Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li'.”

³⁷Len kwino' dii Davinan' golle' Crístona': Xan', ζberache nazgake' Crístona' nake' xiin dia che dii Davina'?

Na' ben' zanka' ndop nllag bibagakile' xtilleena'.

**Jesúza' chawe' xya che
ben'ka' chli' chsedi leya'**

(Mt. 23:1-36; Lc. 11:37-54; 20:45-47)

³⁸Na' ka chli' chsedi Jesúza' ben'ka', chi'e legake':

—Wsak'gale bi gonle ka ben'ka' chli' chsedi leya'. Le chibagakile' gon xe'ka' dii ton, na' cheengakile' yog'zə ben' gaggake' legake' balaan ladj lkwe' ben'. ³⁹Na' gana' chdop chllagcho choe'llwillcho Chioza' le chibagakile' kwe'gake' gana' chbe' ben'ka' zakii, na' ka'kzə chongake' ga de yel' wao. ⁴⁰Na' lekzka' chkaatez-gake' lill nool wizebka', na' kwenche ina ben' le shlichə zəj ben'ki lao Chioza',

chongake' ka choe'lwill Chioza' ssha nleb. Na' daa chongake' ka, ba nakten ile'chgakile' ye'l' zi' walch.

Daa bzani to nool wizeb, bi'en Chioza'
(Lc. 21:1-4)

⁴¹To shii chi' Jesúza' gaozə gana' ch-googake' mech che yoodo'na' na' chwie' ben'ka' chgoogake' mecha'. Na' ben' zan ben' wni'aka' wloogake' mech xen. ⁴²Na' bllin to nool wizeb, ben' yesh', wlo'e chop sintabdo'. ⁴³Na' wne Jesúza' ben'ka' naggake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te ben'ka' wloo mech xench. ⁴⁴La' yog'gake' daa chichoonzannan' be'gake', san le', naktie' nool yesh', ba wlo'e doxen daa nape' la'kzi chyalljile'n.

**Jesúza' bi'e dill' wllin
lla kwiayi' yoodo'na'**

(Mt. 24:1-2; Lc. 21:5-6)

13 Ka chichej Jesúza' lesh' chyoodo'na', to ben'ka' naggake'ne' txen chi'ene':

—Maestro, bwiakachi ka xochi nak yajki na' yooki.

²Na' che' Jesúza' le':

—Ka nak yooki chwiale naa, wllin lla kwiayi' yogaan na' ni sto yaj bich kwia koll' ljwellin.

Diika' gak kat' ba zoa te che yell-lioni

(Mt. 24:3-28; Lc. 21:7-24; 17:22-24)

³Na' ziyajgake' lo Yaa Olívoza' gana' nla' yoodo'na'. Na' shlak chi' Jesúza' na', Pédrona', Jacóbona', Juanna', na'ch Andréza' wna'bgakile'ne' to lezgake':

⁴—Cheeninto' ino' neto' batran gak daa ba wno'. ¿Bera ka ile'into' gak kwenche inezinto' nan ba zoa gaoshosh gakan?

⁵Na' che' Jesúza' legake':

—Bi we'le latj no siye' le'. ⁶La' ben' zan ichej na' inazgake': “Nadaan Cristona”, na' ben' zan shajle'.

⁷Na' ka yenile chak wdil' to ni to na', bi illeble. La' chonan byen gaggakan, per aga ba bllin lla te che yell-lionin. ⁸La' yidil-len ljwell yellka' na' ben' wna'bia'ka' yidil-len ljwellgake'. Na' zan latj gak bedxo', na' gat' wbin, na' kwe' wdil' wishesh. Kat' ba chak diiki shinz chzolo ka nak daa yen ile'i ben' yell-liokin.

⁹Wsak'gale, la' gongake' le' lall' na' ben'ka' chna'bia' cho' ben' Israel, na' wit chingake' le' gana' chdop chllagcho choe'lwillcho Chioza'. Na' daa nakle nad' txen, lljwa'gake' le' lao ben' wna'bia' xenka' na' lao nochlə ben'ka' chna'bia', na' ka' gak we'le xtillaana' lawe'ka'. ¹⁰Na' ka zi' te che yell-lioni, chiyal' illilj dill' wen dill' kob cha'na' doxen yell-lioni.

¹¹Na' kat' ba zjwa'gake' le' lao ben'ka' chna'bia', bi sele wneyi bin ye'le legake', san daa wzajni Chioza' len' inele, la' aga tobialall'zlen inele, san Espíritu Sántonan' ine. ¹²Beena' zoa ben' bish' golje', leteze' gone'ne' lo na' ben'ka' witgake'ne', na' beena' zoa xiine', leteze' gone' xiine'na lo na' ben'ka' witgake'ne', na' bal ben', xiine'ka'tezə gongake' xaxneeka' lo na' ben'ka' witgake' legake'. ¹³Na' yog'zə ben' gatzbangakile' le' daa nonlilall'le nad'. Per beena' so saki bittez dii yen ile'ile' axt ka yiyoll diika' yen ile'ile', beenan' gat' to ye'l' mban che' zejli kani.

¹⁴Na' kat' ile'ile' ba zoa daa nak dii zban inlebb latja' gana' bi chiyal' soan, na'ch ben'ka' lle' Judeana' chiyal' wxonjgake' shajgake' lo yaaka'lə. (Le' chlable dga, li shajniin.) ¹⁵Na' beena' llia koll' lille'na' ni bi gal' yiyetje' ljaleje' dii de loo lille'na'. ¹⁶Na' beena' chda lyixaa, ni bich gal' yiyaje' lille'na' kwenche lljadoyoe' xe'na'. ¹⁷iNyesh'laz gak che noolka' noa' na' noolka' chwall' chxop llana' gak ka'! ¹⁸Li inabi Chioza' bi gak

dga kat'ka' chbe' dii zaga', ¹⁹la' ye'l' zak'zi' wal inleban nak daa yen ile'ile, daa konon' yen ile'kzi dezd ka bxe bsil Chioza' yell-lioni axt naa, na' kat' ba wde gokan kochno yen ile'i ka len. ²⁰Na' shi Xancho Chioza' bi wzeshee llaka' gak ka', kono yila shel'ka'. Per wzesheen daa chakile' ben'ka' ba wleje' nakgake' lall' nee.

²¹'Na' kat' gak diika', shi no ina le': "Li wwia, ni ze Crístona'", wa ine', "Li wwia, na' zie'", bi shajle'le. ²²La' wchej ben' siye'gake' inazgake': "Nadaan Crístona'", na' ben' chonz ka chyixjee daa che' Chioza'ne', na' wli'gake' no ye'l' wak kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee. ²³Wsak'gale. Ba bzenid' le' ka nak yog' diiki zi' gak.

Kat' yiyed Crístona' dii yoblə

(Mt. 24:29-35, 42-44; Lc. 21:25-36)

²⁴'Na' kat' ba biyoll wde ye'l' zak'zi'ka', lli yicholte lao wbilla' na' beo'do'na' bich wzeeni'n. ²⁵Na' beljdo'ka' ixopgakan na' yog' diika' lli xan yabana' inibgakan. ²⁶Na' ile'gakile' nad', Ben' Bsel' Chioza' Yell-lioni, zizaa ladj bejka' kon ye'l' wak choo ye'l' wak xen cha'na' na' balaan cha'na'. ²⁷Na' wselaa anjl cha'ka' tap laate yell-lioni axt gana' zeelo chiyollan kwenche yitopgake' ben'ka' nak lall' na'.

²⁸'Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'. ²⁹Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni. ³⁰Dii li nia' le', aga ba wit ben'ki zoa naa kat' gak yog' diiki. ³¹Yabana' na' yell-lioni te chegakin, san cho'a xtillaana' aga wde bi gak ka nan.

³²'Na' kono nezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' nezile'n.

³³'Li wsak', na' li se kwas, na' li we'llwill Chioza', la' bi nezile bat illin lla gakan. ³⁴Nakan ka ben to ben' ba zoa see shaje' to yell zit', na' golle' ben'ka' chon xshine'na' gapgake' lille'na'. Na' to togake' bene' lall' na'gake' daa gongake', na' golle' beena' chap cho'a leej che'na' bi guetlalleen. ³⁵Li se kwas, la' bi nezile bat yila' xan yoona'; shi yilee chaldo'za, wa yilee chel, wa kat' chbell tezkwa, wa yilee cheeni'lesdo'. ³⁶Shi tokonganza yilee na' yidolile' le' bich ze kwasle. ³⁷Dga nia' le', lekzka' yog'lol' banaan chep' ka', li se kwas.

Wloogake' xnezin gox'gake' Jesúza'

(Mt. 26:1-5; Lc. 22:1-2; Jn. 11:45-53)

14 Chyallj zi chop llazə gal' lni Paskwa', kana' chaogake' yetxtila' bi yoo lewadúrana', na' bxo'zka' chnabia' na' ben'ka' chli' chsedi leya' biyiljllal'gake' naklə siye'gake' Jesúza' kwenche gox'gake'ne' na' witgake'ne'. ²Na' che' ljwellgake':

—Bi gox'chone' lo lnina' kwenche bi wsees wcheencho ben' yell.

Bwazj to noolə set zixə' yichj Jesúza'

(Mt. 26:6-13; Jn. 12:1-8)

³Ka zoa Jesúza' Betániana', wyaje' lll beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoolan set zix de nardo na' dii xen zakaan. Na' wdishje' yen lmeta' na' bwazje' set zixə' yichj Jesúza'. ⁴Na' bal' ben'ka' lle' na' bllaagake', na' che' ljwellgake':

—¿Berache benditjz nooli set zixə'? ⁵Shel' bet'chokle'n na' bi'e mecha' ben' yesh'ka', la' zakaan che shon' guiyoa lla che laxj ben'.

Na' bsheshlengake' noola' daa bene' ka'.

⁶Na' che' Jesúza':

—Bibi ye'lene'. ¿Berache chsheshlenezene'? Daa ba bene' cha' nakan dii

wen. ⁷Ka nak ben' yesh'ka', toshiizi soa-gake' ladjlena', na' wak gaklenle legake' kat'ka' cheenile'; san nad', aga toshiizin soalen' le'. ⁸Ka nak nooli ba bene' daa zeelo gok bene'. Ba bwazje' nad' set zixa' kwenche gakshao'zega kwerp cha'ni kat' kwash'gake' nad'. ⁹Dii li nia' le', gat-tezo we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

**Juda' chchebe' gone'
Jesúza' lo na' ben' malka'**

(Mt. 26:14-16; Lc. 22:3-6)

¹⁰Na' Jud Scariota', beena' nake' txen ben'ka' shllin, wyaje' lao bxoza' chnabia' kwenche gone' Jesúza' lo na'gake'. ¹¹Na' ka golle' ka', bibagakile' na' bchebgake' we'gake'ne' mech. Na' wzolo Juda' chinoe' nakan gone' kwenche gone' Jesúza' lo na'gake'.

Lle'na' zeelo wdaolengake' Jesúza'

(Mt. 26:17-29; Lc. 22:7-23;

Jn. 13:21-30; 1 Co. 11:23-26)

¹²Na' lla nech che lnina' kat' chaogake' yetxtila' daa bi nchixə levadúrana', llana' chitgake' xil'do'na' chaogake' lni Paskwa', ben'ka' nak Jesúza' txen wñabgakile'ne':

—¿Ga cheenilo' lljasini'anto' xshe' che lni Paskwi?

¹³Na' bselee chopgake', chi'e legake':

—Li shaj yell Jerusalenna' na' yillagle to ben' byo zino'e to chee nis, na' lljanólene'. ¹⁴Na' gana' yiyo'e, li yee xan yooná: “Maestrona' ne': ¿Garan zoa yooná gana' gaolene' ben'ka' naggake'ne' txen lle' lni Paskwi?” ¹⁵Na' wliile' le' to yoo xen dii llia shkvia cha'lə ga ba non-shao'tie'. Na' nan' wsini'ale daa gaocho xshe'na'.

¹⁶Na' wza' ben'ka' bselee, wyajgake' yella'. Na' gok kon kayen' golle' legake'.

Na' bsini'agake' daa gaogake' lle' lni Paskwa'.

¹⁷Na' ka goł billinlen Jesúza' ben'ka' shllin yooná. ¹⁸Na' shlak chi'gake' cho'a mesa' chaogake', goll Jesúza' legake':

—Dii li nia' le', tole chi'le ni chaolenle nad' gonle nad' lo na' ben'ka' chakzi' chakzbani nad'.

¹⁹Na' gokyesh'gakile', na' wzolo to to-gake' chñabgakile'ne':

—¿Anadaan gon' ka, lla?

²⁰Na' che' Jesúza' legake':

—Ladjleni, ka le' nakle shllin chlee-jlenle nad' yetxtila' loo yeeni, len beena' gon ka'. ²¹Ka nak nad', Ben' Bsel' Chioza' Yell-lioni, wit ben' nad' ka na Cho'a Xtill Chioza'. Per nyesh'laz gak che beena' gone' nad' lo na' ben'ka'. Naklan wen shel'ka' bi golje'.

²²Na' shlak chaogake', bex' Jesúza' yetxtila' na' bi'e Chioza' yel' choxken, na' bxoje'n na' bi'en legake', chi'e:

—Li gao dga. Lennan' kwerp cha'ni.

²³Na' bexee kopa', na' bi'e Chioza' yel' choxken na' bdie'n lawe'ka' na' yog'lołgake' weejgake' daa yollan. ²⁴Na' chi'e legake':

—Lennan' xchen'na' daa gon ka gak li dii koba' bcheb Chioza' gone'. Na' laljan kwenche gaklenan ben' zan. ²⁵Dii li nia' le', bichga yeej' xis uvana' axt ki illin lla yeeja'n gana' chñabia' Chioza'.

**Jesúza' golle' bi wcheb
Pédrona' shi nombi'ene'**

(Mt. 26:30-35; Lc.

22:31-34; Jn. 13:36-38)

²⁶Na' ka biyoll belgake' be'la'ogake' Chioza', na'ch wyajgake' lo Yaa Olívoza'.

²⁷Na' che' Jesúza' legake':

—Yog'le le' kwej yichjle nad'. La' Cho'a Xtill Chioza' nan: “Wit' beena' chap xil'ka', na' guesles xil'ka' chape'.” ²⁸Per kat' ba biban' ladj ben' wetka', na' yiyaa Galileana' lljalez' le'.

²⁹Na' che' Pédróna'ne':

—La'kzi yog' ben'ki choonlall'gake' li, nad' bi gon' ka'.

³⁰ Na' che' Jesúza'ne':

—Dii li nia' li', naanyel ka zi' kwel teza' de wchop shii, shon shii wi'o dill' nan bi nombi'o nad'.

³¹ Na' zeyid Pédrona' chi'ene':

—La' guetlencia' li', biga inia' bi nombi'a li'.

Na' yog'zgake' che'gake'ne' ka'.

Be'lwill Jesúza' Chioza' gana' le Getsemaní

(Mt. 26:36-46; Lc. 22:39-46)

³² Na' wyajgake' to latj gana' le Getsemaní, na' che' Jesúza' ben'ka' nakgake'ne' txen:

—Nizə li kwe' shlak lje'lwill' Chioza'.

³³ Na' b'chi'e Pédrona', Jacóbona', na'ch Juanna', na' wzoloe' chakyeshile' na'ch chakchgaile' dii wal inleeb. ³⁴ Na' chi'e legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁵ Na' wzee zi lat' kwite'ka', na' b'chek' xibe'na' lo yona' na' be'lwille' Chioza' chi'ene' shi wak ten ka'zə daa wtil'e'.

³⁶ Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil illag'. Per aga gak ka cheenid', san gak ka cheenilo' li'.

³⁷ Na' biyaje' gana' lle'gake' na' ble'ile' ba chesgake'. Na' chi'e Pédrona':

—Simón, ¿Aba cheson? ¿Abikzə bchejlat'gailo' la'ch' tgor bi gueso'? ³⁸ Bi guesle, li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'chona' gonchon per beli chenna' bi chizoin.

³⁹ Na' wyaje' sto shii jelwille' Chioza', na' toz ka golle'ne'. ⁴⁰ Na' ka billine'

gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billelgakile' ye'gake'ne'. ⁴¹ Na' ka billine' de wyon shii, chi'e legake':

—¿Ani cheszkze? Ba gok. Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'. ⁴² Li chas. Li sho'. Ba za' beena' gone' nad' lo na'gake'.

Bex'gake' Jesúza'

(Mt. 26:47-56; Lc. 22:47-53; Jn. 18:2-11)

⁴³ Ni choe'te Jesúza' dill' ka bllin Juda', beena' wlen ben'ka' shllin, lene' ben' zan ben'ka' bsel' b'xozka' chnabia' len ben'ka' chli' chsedi leya' na'ch ben' golka' chnabia', nox'gake' spad, na' no yag. ⁴⁴ Na' Juda', beena' bene'ne' lo na' ben'ka', ba be'le' dill', chi'e:

—Beena' wnop', len' gox'le, na' wche'lene'.

⁴⁵ Na' ka bllingake', jabigee lao Jesúza' na' chi'ene':

—¡Maestro!

Na'ch bnop'e'ne'. ⁴⁶ Na' lii bex'tegake' Jesúza' b'che'gake'ne'.

⁴⁷ Na' to beena' len na' wleje' spad che'na' b'chogue' shlaa nag xmos b'xoz choo b'xoz xenna'. ⁴⁸ Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no ben' wban? ⁴⁹ Yog' lla wzoa' ladjlena' bli' bse-did' loo yood'ona', na' biga bex'le nad'. Per chonan byen gak ka na Cho'a Xtill Chioza'.

⁵⁰ Na' yog'lol' ben'ka' ben Jesúza' txen wchoonlall'gake'ne' na' bxonjgake'.

Bi' xkwidaa bixonj

⁵¹ Na' to bi' xkwid' nob' le' ndobb' to lech'. Na' ka bex'gake'b' ⁵² bsam' lechaa ndobb' na' bxonjb' gal'yidzb'.

**Bdegake' Jesúza' lao ben'ka'
chnabia' ben' Israelka'**

(Mt. 26:57-68; Lc. 22:54-55,
63-71; Jn. 18:12-14, 19-24)

⁵³ Na' jwa'gake' Jesúza' lao b̄xoz choo b̄xoz xenna', na' bdi'a yog'lol̄ b̄xozka' chnabia' na' ben' golka' chnabia' na'ch ben'ka' chli' chsedi leya'. ⁵⁴ Na' zit' zit'lə jano Pédrone'ne' bllintie' lesh' lill b̄xoz choo b̄xoz xenna'. Na' wche'lene' ben'ka' chap yoodo'na' chbillgake' cho'a yi'na'.

⁵⁵ Na' b̄xozka' chnabia' na' yog'lol̄ ben'ka' chnabia' ben' Israelka' lle' na' chiyiljyollgake' ga si' sengake' kwenche wchoglogake' che Jesúza' guete', per bi bllel dii gao xya che'. ⁵⁶ La'kzi ben' zan chiya de wxiye' che'gake' che', bi bidili cho'a dillaa choe'gake'. ⁵⁷ Balgake' wzolla'gake' chziye'gake' na' chaogake' xya che', che'gake':

⁵⁸ —Neto' ba beninto' ne': “Nad' wchinj yoodo'ni dga ben ben' yell-lioki. Na' ka gak shon̄ lla yilis' ston na' aga ben' yell-lionichan gone'n.”

⁵⁹ Na' la'kzi wxiye'gake', bi bidili cho'a xtilleeka'.

⁶⁰ Na' b̄xoz choo b̄xoz xenna' wzollee ladj ben'ka' na' chi'e Jesúza':

—¿Abikz bi ino' cheyi dga na ben'ki cho'?

⁶¹ Na' Jesúza' wzie' lliz bibi gollkze'. Na' b̄xoz choo b̄xoz xenna' chizi'ene':

—¿Alin' Crístona', Xiin Chioza'?

⁶² Na' che' Jesúza'ne':

—Awe, nadaan. Na' ile'ile nad', Ben' Bsel' Chioza' Yell-lioni, chi'a de shli che Chioza', ben' ye'l' wak choo ben' ye'l' wak xenna', na' lekzka' ile'ile' zizaa ladj bejka' ze xan yabana'.

⁶³ Na' b̄xoz choo b̄xoz xenna' bsho' bchez' xe'na' kwenche chli'n nan le chllée. Na' chi'e:

—Bich chyalljicho ben' gawe' xya che beeni. ⁶⁴ Kwinle ba benile ka chnie' che Chioza'. ¿Nakra gonchon?

Na' yog'lol̄gake' bchoglogake' che' nan chiyal' guete'.

⁶⁵ Na' balgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' ben'ka' chap yoodo'na' wdap'gake' xague'na'.

Bi b̄cheb Pédrone' shi nombi'e Jesúza'

(Mt. 26:69-75; Lc. 22:56-62;
Jn. 18:15-18, 25-27)

⁶⁶ Na' Pédrone' zie' lesh' chyoon'a de lli'lə ka bllin to noolə, ben' nak xmos b̄xoz choo b̄xoz xenna'. ⁶⁷ Na' ka ble'ile' Pédrone' chbille' cho'a yi'na', na' wzie' chwie'ne' chi'e:

—Lenon' nako' txen Jesús, ben' Nazareta'.

⁶⁸ Na' bi b̄cheb Pédrone', san chi'e:

—Bi nombi'a beena', ni bi nezid' bi dil-laan choo.

Na' bicheje' na' jazie' cho'a leeja'. Na' wchell to tez. ⁶⁹ Na' ble'i noola'ne' sto shii, na' golle' ben'ka' sto:

—Beenin lene' ben'ka' nak Jesúza' txen.

⁷⁰ Na' sto shii bi b̄chebe' nake'ne' txen. Na' ka gok zi shloll, ben'ka' lle' na' goll-gake'ne' sto shii:

—Dii li lenon' nako'ne' txen, la' nakbia' nako' ben' Galilea.

⁷¹ Na' Pédrone' wzoloe' chone' znia, chi'e:

—Chioza' gone' ye'l' zi' cha' shi chziye'zan nia' bi nombi'ane'.

⁷² Na' katena' lii wchellte teza' de wchop shii. Na' jadini Pédrone' daa goll Jesúza'ne': “Ka zi' kwell teza' de wchop shii, na' gak shon̄ shii bi wchebo' shi nombi'o nad'.” Na' wzoloe' chbelle'.

Bdegake' Jesúza' lao Pilátona'

(Mt. 27:1-2, 11-14; Lc.
23:1-5; Jn. 18:28-38)

15 Na' ka wyeeni' bidi'a b̄xozka' ch̄n̄abia' len beṅ' golka' ch̄n̄abia', na' beṅ'ka' chli' chsedi leya' na'ch yog'lol' beṅ'ka' ch̄n̄abia'gake' yell Israela'. Na' b̄chejgake' Jesúza' jwa'gake'ne' lao Pilátona'. ²Na' w̄n̄abi Pilátona'ne', chí'e:

—¿Alin' nako' beṅ' w̄n̄abia' che beṅ' Israelka'?

Na' che' Jesúza'ne':

—Kan' ba wno'.

³Na' b̄xozka' ch̄n̄abia' dii zan dii chaogake' xya che'. ⁴Na' che' Pilátona'ne' sto shii:

—¿Abibi inakzo'? Bwialat', dii zan dii chaogake' xya cho'.

⁵Na' bibi goll Jesúza'ne'. Na' bibani Pilátona' daa bibi golle'ne'.

B̄choglogake' guet Jesúza'

(Mt. 27:15-31; Lc. 23:13-25;
Jn. 18:38-19:16)

⁶Na' kat' chal' Inina', Pilátona' chisane' to beṅ'ka' nseje' lillyana', beena' inab beṅ' yellka' wsane'. ⁷To beṅ' le Barrabás die' lillyana' len beṅ'ka' benlene' xyana' daa b̄xegake' wdila'. ⁸Na' b̄di'a bllag beṅ' yellka', na' che'gake' Pilátona' gone' ka chonkze' yog' yiz. ⁹Na' che' Pilátona' legake':

—¿Acheenile' yisan' beṅ' w̄n̄abia' che-
leni, le' nakle beṅ' Israel?

¹⁰L̄a' chakbe'ile' nan b̄xozka' ch̄n̄abia' daa chakxe'zgakile'nen' jwa'gake'ne' lawe'na'. ¹¹Na' b̄xozka' ch̄n̄abia' bta b̄negake' beṅ'ka' lle' na' kwenche inabgake' yisane' Barrabáza'. ¹²Na' che' Pilátona' legake':

—Na' bera cheenile' gonid' beena' nale nake' beṅ' w̄n̄abia' chele, le' beṅ' Israel.

¹³Na' besyaagake' che'gake':

—¿Bdee lee yag cruza'!

¹⁴Na' che' Pilátona' legake':

—¿Bera dii malan' bene'?

Na' zizikli besyaagake' che'gake':

—¿Bdee lee yag cruza'!

¹⁵Na' daa goklall' Pilátona' yigaane' wen lao beṅ'ka' lle' na', bisane' Barrabáza'. Na' bene' mandad wit chingake' Jesúza', na'tech bene'ne' lo na' beṅ'ka' wda'gake'ne' lee yag cruza'.

¹⁶Na' b̄che' soldadka' Jesúza' lesh' chy-
oona' gana' chon Pilátona' yel' jos̄chisa', na' biti'a bishaggake' yog' soldadka' lle' na'. ¹⁷Na' bwakwgake'ne' to lech' x̄na, na' bengake' to b̄xoon de xis yesh' na' bllingake'n yichje'na' ka to corona. ¹⁸Na' wzologake' chosyaagake' nagake':

—¿Soashga beṅ' w̄n̄abia' che beṅ' Is-
raelka' mbalaz!

¹⁹Na' wdingake' xisa' yichje'na', na' bllaa xeneeka' le', na' b̄chek' xibe'ka' lawe'na' bengake' ka beṅ' chgwee balaan. ²⁰Ka biyoll btitjgakile'ne', bikwasgake' lech' x̄nana' daa b̄xoogake' kolleena' na' biwakwgake'ne' xe'na'kz̄o. Na' wlejjake'ne' kwenche lljada'gake'ne' lee yag cruza'.

Bda'gake' Jesúza' lee yag cruza'

(Mt. 27:32-44; Lc.
23:26-43; Jn. 19:17-27)

²¹To beṅ' yell Cirene lie' Simón, x̄a Alejándrona' na' Rúfona', zizee lyix̄aa. Na' ka billague' legake', bengake' byen bi'e yag cruz che Jesúza'.

²²Na' b̄che'gake' Jesúza' latja' le Gól-
gota, na' zejín: Latj che llit yichj beṅ' wet. ²³Na' bshabgakile'ne' vino daa n̄chix̄e mírrana', per bi weeje'n. ²⁴Na' bda'gake'ne' lee yag cruza'. Na' soldadka' bengake' to wyitj kwenche yilaagake' xe'na' na' ikaagake' daa yidoj' to togake'.

²⁵Na' chida ga kana' bda'gake'ne' lee yag cruza'. ²⁶Na' yichj yag cruz che'na' bda'gake' to dii cho'en dill' biche nda'gake'ne' lee yag cruza', nan: "Beenin beṅ' w̄n̄abia' che beṅ' Israelka'." ²⁷Na' bda'lengake'ne' chop beṅ' wban, toe'

wda' kwite' de shlina', na' stoe' kwite' de robes'a'. ²⁸Na' billinin ka na Cho'a Xtill' Chioza' daa nan: "Ble'gakilene' ka to ben' mal."

²⁹Na' ben'ka' chde na', chnelegakile'ne', na' chta yichje'ka' che'gake':

—Lin' wnazo' yichinjo' yoodo'na' na' lo shon' llazo' yiyono'n, ³⁰bislashki kwino' na' biyetj' lee yag cruza'!

³¹Na' lekzka' chon bhozka' chnabia' len ben'ka' chli' chsedi leya', chnelegakile'ne', che'gake':

—Ben' yoblə gok bisle', na' bi chak yisla kwine'. ³²Shi leile' len' Crístona', ben' wnabia' chechona', cho' ben' Israel, yiyetjshkile' lee yag cruza' naa kwenche' ile'teicho na' shajle'cho che'.

Na' axt len ben'ka' da'lene' lee yag cruza' chnelegakile'ne'.

Ka wit Jesúza'

(Mt. 27:45-56; Lc.

23:44-49; Jn. 19:28-30)

³³Ka bllin gobill, doxen yell-liona' bichol, blinte chida shon. ³⁴Na' chida shon' besyaa Jesúza' zillj, chi'e:

—Eloí, Eloí, ¿lama sabactani?**—na' zejín: Chios cha', Chios cha', ¿biche ba wlej yichjzo' nad'?

³⁵Na' bal' ben'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

³⁶Na' zejdo toe' na' bleeje' to dii chzi' nisa' gana' yollə vino daa zichj zla' na' bzoen' to lo xis kwenche' bzoen' cho'ena' xope'n, na' chi'e:

—Jwayishkile'na', wwiashkicho shi wid Elíaza' yiletje'ne'.

³⁷Na' besyaadia Jesúza', na'ch wite'. ³⁸Na' ka wite', lechaa ze loo yoodo'na' bcheza'n gokan choplə. ³⁹Na' beena' chnabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiin Chioza'.

⁴⁰Lekzka' zi bal' noolka' lle'gake' de zit'lə chwiagake'. Na' ladje'ka' len María ben' Magdálana', na' Saloména', na'ch María, beena' nak xna' Joséna' len Jacóbona', ben' neshaa. ⁴¹Noolkin wnogake' Jesúza' na' goklengake'ne' kana' zoe' gana' mbaní Galileana'. Na' lekzka' len zanch noolka' ben'ka' wyajlengake'ne' Jerusalénna'.

Bkwash'gake' Jesúza'

(Mt. 27:57-61; Lc.

23:50-56; Jn. 19:38-42)

⁴²Na' llana' gok ka' nakan llana' chsini'a ben' Israelka' che' llana' chombaangake'. Na' ka gol, ⁴³bllin José ben' Arimatéana', beena' nak txen ben'ka' chnabia' ben' Israelka', na' lene' none' lez beena' wsel' Chioza' inabi'e. Na' biyaxjile' wyaje' lao Pilátona' janabe' lsens yiletje' kwerp che' Jesúza'. ⁴⁴Na' bibani Pilátona' daa ba wite'. Na' goxe' beena' chnabia' soldadka' kwenche' inabilene' shi dii likzan ba witen'. ⁴⁵Na' ka che' beena' chnabia' soldadka' ba wite' na' wx-enlallee, na' bi'e lsens biletj Joséna' kwerp che'na'. ⁴⁶Na' wxi' Joséna' to lech' de lino na' biletje' kwerp che' Jesúza' na' bitobe'ne' lechaa. Na' jlo'ene' to loo blej, na' bisejile'n to yaj xen. ⁴⁷Na' María ben' yell Magdálana', na' María, xna' Joséna', chwiayen'gake' gana' jlo'ene'.

Biban Jesúza' ladj ben' wetka'

(Mt. 28:1-10; Lc. 24:1-12; Jn. 20:1-10)

16 Na' ka wde lla sabda', llana' chombaang ben' Israelka', María ben' Magdálana' len Saloména', na'ch María, xna' Jacóbona', wxi'gake' di-ika' chla' zix kwenche' wllagake'n kwerp che' Jesúza'. ²Na' lla nech che' xmanña', shinə chla' wbilldo'na', wyaj-

gake' cho'a ba che'na'. ³Na' ka zejgake' che' l'jwellgake':

—¿Nora gaklen cho' wkwase' yaja' daa chi' cho'a ba che'na', lla?

⁴Per ka bllingake', ble'gakile' bich chi' yaj xenna' cho'a bana'. ⁵Na' ka wyoogake' loo bana', ble'gakile' chi' to ben' xkwid' de shli che bana' nakwe' to lech' llyish dii ton. Na' le bbleb noolka'.

⁶Na' chi'e legake':

—Bi illeble. Le' chiyilje Jesús, ben' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixjgake'ne'. ⁷Li yiyaj lao ben'ka' nakgake'ne' txen na' len lao Pédróna', na' li lljayellgake': “Ba ziyaje' zjaleze' le' Galileana', na' na' yile'ile'ne' sto shii, kon ka wne' le'.”

⁸Na'ch bichej noolka' loo bana' ziyajdogake' axt chxiztitgake' daa le chlllebgake'. Na' kono bi gollgake' daa le bblebgake'.

**Bli'lao Jesúsua María
ben' yell Magdálana'**

(Jn. 20:11-18)

⁹Na' ka biban Jesúsua' ladj ben' wetka' lla nech che xmanna' shzildo', zigaate bli'lawe' María ben' yell Magdálana', beena' bibej Jesúsua' gall dii xiw'ka'.

¹⁰Na' Maríana' wyaje' lao ben'ka' wdalen Jesúsua' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúsua'. ¹¹Na' ka beni ben'ki mban Jesúsua' na' ba ble'teyi Maríana'ne', bi wyajle'gake'.

**Bli'lao Jesúsua' chop
ben'ka' nakgake'ne' txen**

(Lc. 24:13-35)

¹²Ka biyoll gok ka', chop ben'ka' nak Jesúsua' txen ngoogake' nez zejgake' ly-

ixaa, na' bli'lawe' legake' na' nake' nlla'lə. ¹³Na' biyajgake' gana' lle' ben'ka' sto, jayellgake' legake' ba ble'gakile'ne', na' ni chegake' bi wyajle'gake'.

**Jesúza' golle' ben'ka' nakgake'ne' txen
we'gake' xtilleena' doxen lo yell-lioni**

(Mt. 28:16-20; Lc.

24:36-49; Jn. 20:19-23)

¹⁴Na' wdetect, bli'lao Jesúsua' ben'ka' shnej shlak chi'gake' chaogake'. Na' bsheshlene' legake' daa bi chajle'gake' na' daa nakgake' lall'do' chech, la' bi wyajle'gake' che ben'ka' ble'gakile'ne' ka wde bibane'. ¹⁵Na' chi'e legake':

—Li shaj doxen yell-lioni, li lljtixje'i yog'lol ben' dill' wen dill' kob cha'na'.

¹⁶Beena' shajle' na' choe' nisa', gat' ye'l mban che' zejli kani, san beena' bi shajle', chogbi'a kwiayee. ¹⁷Na' diikin gon ben'ka' nonlilall' nad': wchingake' lia'na' yibejgake' dii xiwaa yoo ben'; na' inegake' dill' kob dii bi nombia'gake'; ¹⁸na' shi gonzin gox'gake' no bel' wa yeejgake' dii nak yierb, aga bi gaggakile'. Na' lekzka' wxoa neeka' yichj ben' we'ka' na' yiyakgakile'.

Biyep Jesúsua' yabana'

(Lc. 24:50-53)

¹⁹Ka biyoll bshaljlene' legake', Xancho Jesúsua' biyep'e yabana' na' jachi'e kwit Chioza' shlaa de shlina'.

²⁰Na' ben'ka' nakgake'ne' txen wyajgake' doxen jtixje'gake' cho'a xtilleena' na' Xancho Jesúsua' goklene' legake' bengake' ye'l wakka' kwenche wyajle' ben' dillaa be'gake' nakan dii li.

Dill' wen dill' kob daa bzej

Lúcaza'

Dga bzej Lúcaza' na' bseleen lao Teófilona'

1 Ben' zan ba goklall'gake' wzejgake' to to diika' ba gok ladjnto'ni ²kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'. ³Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki, ⁴kwenche inezilo' daa ba bli' bsdgakile' li' nakan dowalj dii li.

Wdixjee anjla' galj Juanna'

⁵Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xoole', Elizabeta', lezkza' goke' xiin dia che dii bñoz Aaronna'. ⁶Na' chop xooltie' chongake' wen lao Chioza', na' chongake' yog'lojte daa nllie' bia'. ⁷Na' aga no xiingake' wzoa daa nak Elizabeta' nool will; na' ba naktegage' ben' gol.

⁸Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake', ⁹bengake' to wiyitj, ka yoologake' chongake', kwenche got'bia' noe' yidol' lljlo' llen yala' loo lill xlatj Xancho Chioza'. Na' bidol' Zacaríaza' gone'n. ¹⁰Na' shlak chgwee llen yala' loo yoodo'na', ben' zan bgaan chyoolə choe'llwillgake' Chioza'. ¹¹Na' bli'lao to anjl che Xancho Chioza' Zacaríaza', na' anjla' zie' shjaa de shlina' gana' chzeygake' yala'. ¹²Ka ble'i Zacaríaza' anjla', bikzə bi billet-lallee gone' daa le bllibe'. ¹³Na' anjla' chi'ene':

—Bi illebo' Zacarías, la' Chioza' ba bzenague' daa chñabilo'ne', na' xoolo'

Elizabeta' sane' to xiino' na' wsi'ob' Juan. ¹⁴Na' yibachgailo' kat' galjb', na' lezkza' ben' zan yibayi, ¹⁵la' xiino'na' gakb' to ben' zakii lao Chioza'. Bi chiya'l wñixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjləb'. ¹⁶Na' yigoob' ben' zan xiin dia che Israela' lo xñez Chioza', beena' nak Xangake'. ¹⁷Na' kwialob' lao Xanchona', na' soalen Espíritu che Chioza' le'b' ka wzoalene' Elíaza', na' gapb' ye'l wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

¹⁸Na'ch che' Zacaríaza' anjla':

—¿Nakra gak inezid' shi lezkzilo'n?, la' ba nak' ben' gol na' lezkza' nool cha'na'.

¹⁹Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni. ²⁰Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

²¹Na' ben'ka' lle' chyoolə chbezgake' yichej Zacaríaza', gokllejgake' daa wllaile' loo yoodo'na'. ²²Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

²³Na' ka biyoll' ben' Zacaríaza' daa llia bia' gone' yoodo'na', na'ch biyaje' lille'na'. ²⁴Na' ka wde gok diiki, na' bia' xoole', Elizabeta'. Na' lao gay' beo' bichkzə ga bcheje', na' wne': ²⁵“Xancho Chioza' ba goklene' nad' kwenche bich sia' ye'l zto' lao ben'.”

Wdixjee anjla' galj Jesúza'

²⁶Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana',

²⁷ gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'. ²⁸ Na' wyoo anjla' gana' zoa Maríana' na' chi'ene':

—¡Chwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleyeche' li' aga ka yog'loite nool.

²⁹ Na' Maríana' bibanile' daa golle'ne' ka', na' gokile' berache naz beeni nad' ka'.

³⁰ Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'. ³¹ Na' naa woo to bdo' na' kat' galjb' na' wsi'ob' Jesús. ³² Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho Chioza' gone'b' to ben' wñabia' ka dii xoxzto'b' Davina' ³³ kwenche toshiizi inabia'b' le' ben' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

³⁴ Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

³⁵ Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi ben' choo ben' xen, soalenan li'. Na' bi'do'na' galj' gakb' lall' na' Chioza' na' ye'gake'b' Xiin Chios. ³⁶ Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e. ³⁷ Aga bi de dii bi chak gon Chioza'.

³⁸ Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

³⁹ Na' lii wza'te Maríana' wyaje' to yell dii llia yaa yao che Judeana'. ⁴⁰ Na' blline' lill Zacaríaza' na' bwape' Eliz-

abeta' chiox. ⁴¹ Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena', ⁴² na' wñie' zillj, chi'ene':

—Chioza' ba benleyeche' li' ladj yog'lol nool, na' lekzka' bdo' cho'na'. ⁴³ ¿Nora nak' nad' zidwia'zə xna' Xan'na' nad', lla? ⁴⁴ La' kon ka bwapo' nad' chiox, lii bxit'te bdo' cha'ni loo li'ani daa chibaib'. ⁴⁵ Chakomba li' wyajli'o ka wna anjla', la' yog' daa wna Xanchona', aga wde bi gakan.

⁴⁶ Na'ch wna Maríana':

Do yichj do lallaa choe'lawaa Xancho Chioza'.

⁴⁷ Chibayi yichjlall'dawaani lao Chioza', beena' chisla nad'.

⁴⁸ Ba biyesh'lallile' nad' nak' xmose', naa solo yog' ben' ine' nad': “Chakomba li'.”

⁴⁹ La' Chioza', beena' nap yel' wak choo yel' wak xen, ba bene' dii wen inleb cha'.

Nake' liizelozi ben' li ben' shao',

⁵⁰ na' chiyesh'lallile' yog'te ben'ka' chall chllebgake'ne'.

⁵¹ Dii zakii nleeb ba benlene' yel' wak che'na'.

Ba bchinj bselle' yog'lol daa nan gon ben'ka' chep cha'lall'.

⁵² Ba bikwase' yel' wñabia' che ben' wñabia'ka',

na' ben'ka' ble'gakile' nakzi, Chioza' ba bene' legake' ben' zakii.

⁵³ Na' ben'ka' chbil' chdon, ba bzhesh bzeljile' legake' kon dii wen dii shao' che'na',

na' bilague' ben' wni'aka' to ka cha'gake'.

⁵⁴ Ba goklene' cho' ben' Israel, cho' nakcho xmose',

na' toshiizi chiyesh'lallile' cho',

⁵⁵ kon ka bchebe' gone' che dii xoxzto'cho Abrahama'

na' yog' ben' zizaak lo dia che'na'.

⁵⁶ Na' Maríana' bgaane' ka do shon beo' lill Elizabeta', na'ch bizee ziyaje' lille'na'.

Golj Juanna'

⁵⁷ Na' ka bllin lla wxan Elizabeta', wx-ane' to bi' byodo'. ⁵⁸ Na'ch ka wnezi ben' wlill che'ka' na' ben' dialla che'ka', wyagake' bibalengakile'ne' daa ba biyeshii Xancho Chioza' le'. ⁵⁹ Na' ka gokib' to xman, jloogake'b' sen daa ne' circunción, na' goklall'gake' wsi'gake'b' Zacarías ka le xabaa. ⁶⁰ Na' che' xna'baa:

—¿Bi gakan! Juanan chiyal' wsi'nto'b'.

⁶¹ Na' gollgake'ne':

—¿Bi che wsi'zo'b' ka'? La' aga no dialla cho' le ka'.

⁶² Na'ch bengake' sen kwenche wñab-gakile' xabaa bi cheenile' wsi'e bdo'na'.

⁶³ Na'ch wñabe' to yagla'do' kwenche bzeje'n, na' daa bzeje' nan: “Juanan wsi'nto'b'.” Na' yog' ben'ka' bibani. ⁶⁴ Na' lii gokte bine Zacaríaza', na'ch wzoloe' choe'lawee Chioza'. ⁶⁵ Na' ben' wlill che'ka' bllebgake' ka nak daa gok, na' yog' yellka' lle' ladj yaa yao che Judeana' wze dill' ka gok. ⁶⁶ Na' yog' ben'ka' beni ka gok, gogkakile':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza' leb'.

Daa wna Zacaríaza'

⁶⁷ Na' Espíritu Sántona' wñabi'e yichjlall'do' xab' Zacaríaza' na' bi'e cho'a xtill' Chioza', wne':

⁶⁸ Choe'lawaa Xanchona', beena' nak Chios checho, cho' ben' Israel, la' ba bide' ladjchoni, cho' nakcho ben' yell che', kwenche yisle' cho' lawi dii mala'.

⁶⁹ Na' ba bselee to ben' nap yel' wak xen yisle' cho', na' zee lo dia che dii Davina', beena' gok xmose'.

⁷⁰ Ba chak ka bchebe' gone' kani'yi daa golle' dii ben'ka' wdi'jee cho'a xtilleena', ben'ka' gok lall' nee.

⁷¹ Bchebe' yisle' cho' lao ben'ka' bi chle'shii cho', na' lao yog' ben'ka' chakzi' chakzbani cho'.

⁷² Na' golle' dii xozxto'choka' yiyeshile' legake', na' bi gal-lallee ka nak diika' bchebe' gone'.

⁷³ Ki nak daa bcheb Chioza' gone' che dii xozxto'cho Abrahama':

⁷⁴ Bchebe' yisle' cho' lao ben'ka' bi chle'shii cho'

kwenche we'la'ochone' na' bibi wwall wsheban cho',

⁷⁵ na' gon kwincho lall' nee na' goncho ka yiyoolallile' shlak mbancho.

⁷⁶ Na'ch Zacaríaza' chi'e bdo' che'na':

Na' li', xiindawaa, ina ben' li' ben' chy-ixjee daa na Chioza', beena' nak li-izelozo ben' choo ben' xen.

Na' kwialozego' lao Xanchona' kwenche wzenaggake' che' kat' zee.

⁷⁷ Wzenilo' ben' wlall chechoka' daa chiyal' gongake'

kwenche yizi'xen Chioza' saaxya che'ka' na' yisle' legake' bi tegake' lo yel' zak'zi'na'.

⁷⁸ La' Chios chechona' chakile' cho' na' chiyesh'lallile' cho',

na' wselee to ben' za' yabana' nsee to beeni' che yichjlall'do' ben' yell-lioni

⁷⁹ kwenche sho' beeni'na' loo yichjlall'do' ben'ka' chda gani nak shgasj shchol ni che dii mala' daa nsa' yel' wit, na' wliile' cho' nez li' che'na' na' soacho mbalaz.

⁸⁰ Shlak bgol Juanna', ben Chioza'ne' ben' wal. Na' wzoe' to latj gana' bibi chashj chleb axt ka bllin lla wzoloe' be'lene' ben' Israelka' cho'a xtill' Chioza'.

Golj Jesúza'*(Mt. 1:18-25)*

2 Kana' chnabia' César Augústona', bene' byen ibab bał ben' lle' to to yell doxen yell-liona' gana' chnabi'e. ²Na' ka wbabgake' dii nech, beena' le Cirenio nake' gobernador che Síriana'. ³Na' benan byen biyaj yog' ben' yell che chegake' kwenche jada' lie'ka'. ⁴Na' daa nak Joséna' xiin dia che dii Davina', bizee yell Nazareta' daa llia gana' mbani Galileana', na' biyaje' yell Belénna' gana' golj dii Davina', daa llia gana' mbani Judeana'. ⁵Na' kwenche ibabgake' biyaje' yell Belénna' len Maríana', beena' ba nakan ikee. Na' Maríana' ba no'e. ⁶Na' shlak zoagake' Belénna', bllin lla sane'. ⁷Na' wxane' to bi' byodo' nakb' bi' nech, na' btobe'b' lechaa na' wdixje'b' gana' chao bayix'ka', la' bich bi latj bllel gana' chigaan ben'.

Jtixje'i anjla' ben'ka' chap xil'ka' ba golj Jesúza'

⁸Na' lle'na' goljb', gaozə yell Belénna' lle' xonj ben' chapgake' xil' che'ka'. ⁹Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le bllebgake'. ¹⁰Na' che' anjla' legake':

—Bi illeble, la' zidtxje'id' le' dill' wen dill' koba' daa gonan ka yibachgayi yog' ben'. ¹¹La' naa yell che dii Davina' ba golj beena' yisla le' lao dii mala'. Na' len' Xancho Crístona', beena' chbezle wsel' Chioza'. ¹²Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

¹³Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

¹⁴¡We'la'ochó Chioza' zoa yabana'!
Mbalaz ben'ka' zoa yell-lioni, ben'ka' ba bli'yi Chioza' yel' goklen che'na'.

¹⁵Na' ka biza' anjlka' ziyajgake' yabana', na'ch che' ljjwell ben'ka' chap xil'ka':

—Li yidoshki Belénna', li sho' di-wiashki daa ba gok, daa ba wdixje'i anjl che Xanchona' cho'.

¹⁶Na'ch ziyajdogake' Belénna' na' bllingake' gana' zoa Maríana' len Joséna', na' bdo'na' deb' gana' chao bayix'ka'. ¹⁷Na' ka biyoll ble'gakile'b', na' be'gake' dill' lao ben' wllall che'ka' daa goll anjla' legake' che bdo'na'. ¹⁸Na' yog' ben'ka' beni ka wna wap xil'ka' bibangakile' ka dillaa be'gake'. ¹⁹Na' Maríana' kon ka biyoll bzenague' dill'ka' na' bgaanan loo yichjllal'do'ena', na' gokile' bera zejín dga. ²⁰Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

²¹Na' ka gokib' to xman, wloogake'b' sen' daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

²²Na' kon ka na ley che dii Moiséza' gongake', wlezkake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'. ²³Bengake' ka', la' ley che Xanchona' nan: “Bi' byo nech che yog'loł ben', chiyal' gongake'b' lo na' Chioza'.” ²⁴Na' jaake' je'la'ogake' Xancho Chioza' jengake' ka na leya' daa nan chiyal' witgake' chop ngolbex wa chop palom.

²⁵Na' kana' jwa'gake' Jesúza' yoodo'na', zoa to ben' le Simeón Jerusalénna'. Nake' to ben' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' ben' Israelka'. Na' zوالen Espíritu Santo che Chioza' le'. ²⁶Na' Espíritu Sántona' ba bzenile'ne' nan aga wete' shi bin' ile'ile' Crístona', beena' chbezgake' wsel' Xancho

Chioza' kwenche inabi'e. ²⁷ Na' Espiritu Sántona'kz bseleene' yoodo'na', na' na' zie' ka bllinlen xaxna' Jesúza' leb' kwenche gongakile'b' ka na leya'. ²⁸ Na'ch bñen Simeónna' leb' na' be'lawee Chioza', chi'e:

²⁹ Chios cha', be' latj guet' mbalaz naa, la' ba beno' daa bchebo' gono' cha', nad' nak' xmoso'.

³⁰ La' ba ble'id' beena' yisla neto',

³¹ beena' ba bse'loo lao yog'lo' ben' yell-lioki.

³² Len' kwee beeni'na' loo yichjlall'do' ben'ka' bi nakgake' ben' Israel.

Na' gone' ka neto' ben' Israel sho'nto' bal-aan, neto' naknto' yell cho'.

³³ Na'ch Joséna' len xna'ba bibangakile' ka nak daa wna Simeónna' cheb'.

³⁴ Na'ch wñabi Simeónna' Chioza' gak-lene' legake', na' chi'e Mariana', xna' Jesúza':

—Ba nchogbi'a Chioza' che bi'do'ni gom' kwenche zan ben' Israelka' kwiayi'gake' na' lekzka' zane' yila. Na' wliib' ben' ka nak ye'l' wak che Chioza', na' ben' zan inegake' zban cheb' na' bi shajle'gake' cheb', ³⁵ na'ch gakbia' ka chza'lall' ben' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

³⁶ Na' lekzka' yoodo'na' zoa to nool goldo', ben' chyixjee daa che Chioza'ne', na' lie' Ana. Nake' xiin dii Fanuela' na' xiin dia che dii Asera'. Ben' xkwid'ze' bshagnee, na' gall yizchga wzoalene' ben' che'na' ka wite'. ³⁷ Nake' noolə wizeb na' ba gokile' taplalj tap yiz. Na' toshiizi zoe' yoodo'na', na' ka wal' ka tella zoe' choe'lawee Chioza', na' tlizi chzoe' wbas' na' choe'lwille'ne'. ³⁸ Na' lekzka' wbiguee kwite'ka' na' bi'e Chioza' ye'l' choxken daa ba bselee beena' gaklene' ben' Israelka'. Na' bi'e dill' che Jesúza' lao ben' Jerusalénka', ben'ka' chbez wse'l' Chioza' beena' yisla legake' lao dii mala'.

Biyajgake' Nazareta'

³⁹ Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'. ⁴⁰ Na' Jesúza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashaljlem' ben' sin'ka' yoodo'na'

⁴¹ Xaxna' Jesúza' chajgake' Jerusalénna' yog' yiz kat' chal' lni Paskwa'. ⁴² Na' ka goki Jesúza' shllin yiz, wyajlengake'b' lnina' kon ka yoologake'. ⁴³ Na' ka wde lnina' biza' xaxna'baa, na' bi gokbe'gakile' bigaan Jesúza' Jerusalénna'. ⁴⁴ Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na' ben'ka' nombia'gake' ⁴⁵ aga billelgakile'b'. Na' bibiigake' jadiljgake'b' Jerusalénna'.

⁴⁶ Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtillleeka' na' chñabib' legake' che daa choe'gake' dill'. ⁴⁷ Na' yog' ben'ka' chzenag xtill'baa chibangakile' ye'l' chajni che'baa na' ka chilliib' xtill' ben'ka' chli' chsedi leya'. ⁴⁸ Na' ka ble'i xaxna'baab' bibangakile'. Na'ch che xna'baa:

—Xiindawaa, ¿biche benzilo' neto' ka? Xoni na' nad' ba gokshejlall'chgainto' biyiljnto' li'.

⁴⁹ Na'ch che Jesúza' legake':

—¿Biche chiyiljzle nad'? ¿Abi nezile chiya' soa' lill' Xa'na'?

⁵⁰ Na' aga wyajni'gakile' bi zejñ daa gollb' legake'.

⁵¹ Na'ch Jesúza' biyajlem' legake' Nazareta' na' bzenagb' chegake' toshiizi. Na' xna'baa aga go'l-lallee diika' gok.

⁵² Na' Jesúza' zejch bgolb' na' wdapchb'

yel' sin', na' Chioza' bibachile'b', na' lekzka' bibayi ben' leb'.

Juanna', beena' bchoa ben' nis

(Mt. 3:1-12; Mr. 1:1-8; Jn. 1:19-28)

3 Na' ka gok shin' yiz chnabia' César Tibériona', na' Poncio Pilátona' chnabi'e gana' mbani Judéana', na' Heródeza' chnabi'e gana' mbani Galileana', na' ben' bishee Felípena' chnabi'e gana' mbani Ituréana' len Traconítana', na' Lisániaza' chnabi'e gana' mbani Abilíniana', ² na' Anáza' len Caifáza' nakgake' b̄xoz choo b̄xoz xen che ben' Israelka'. Na' kana'yen' w̄ne Chioza' Juanna', xiin Zacaríaza', kana' zoe' to latj gana' bibi chashj chleb. ³ Na'ch wyaj Juanna' jte' doxen yell-liona' de cho'a yao Jordánna' na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' chegake'. ⁴ Bene' kon ka bzej dii Isafaza' gana' nan: To ben' gosyee latja' gana' bibi chashj chleb, na' ine':

“Li se kwas wzenagle che Xanchona' na' wsalj yichjlall'do'leka' kat' zee.

⁵ La' le' gone' ka chon ben' chillée ga nak xitj yao, na' ka ben' chchinj yaa kwenche chileshe'n.

Na' chilie' yog'loł nez dii nyok nlew, na' chillée xitjka' chi' lo neza'.

⁶ Na' yog'loł ben' ile'gakile' ka gon Chioza' yisle' ben' lawi dii mala'.”

⁷ Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—iLe' naklikzle ka bel z̄nia! ¿Achak-ile wak wxonjile' yel' zak'zi' daa wsel' Chioza'? ⁸ Li gon ka gakbe'i ben' nan dii li ba biyaj bilenile'. Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abrahama'.” Ni inia' le' axt yajki wak gon Chioza' xiin dia che dii Abrahama'. ⁹ Yog'loł-le shi bi chonle ka

chiyoolallii Chioza' na' gak chele ka chak che to yag dii choe' dii zix dii bi nak wen, na' lii chchogtegage'n na' chzal'gake'n lo yi'na'.

¹⁰ Na' ben'ka' chzenag xtilł Juanna' che'gake'ne':

—¿Beran chiyal' gonnto', shka'?

¹¹ Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

¹² Na' lekzka' bllin bal ben' w̄chixjka' kwenche wchoa Juanna' legake' nisa', na' w̄nabgakile'ne':

—Maestro, ¿beran chiyal' gonnto', shka'?

¹³ Na'ch che' Juanna' legake':

—Bi w̄chixjle dii xenchl̄e ka to daa chiyal' w̄chixjle.

¹⁴ Na' lekzka' bal ben'ka' nak soldad w̄nabgakile'ne':

—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble ben' kwenche ikaazle bi de che', ni bi wtobilene' dii bi nak ka'. Li gon banez laxjlēna'.

¹⁵ Na' ben' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'. ¹⁶ Na' Juanna' golle' legake':

—Zi' za' beena' napch yel' wak xench ka nad'. Na' nad' ni bi zakaa gak' xmose' kwenche wle'chj' xele'na'. Nad' chchoa' le' nis daa chiyaj chilenile, san len' gone' ka yidsoa Espíritu Sántona' loo yichjlall'do'lēna', na' ben'ka' bi chiyaj chilēni, wselee legake' lo yi' gabila'. ¹⁷ Na' daa gon Crístona' che ben' chzaklebin ka daa chon beena' nox' yag xoz' daa chpa'ile' trígona', na' yitope' trígona' kooshaween na' wzeye' beb cheyinna' lo yi'na' daa biga yiyolkz̄e.

¹⁸ Kan' nak diika' bzajni Juanna' ben'ka', na' dii zanch dill' dii be'lene'

legake' kana' bi'e dill' wen dill' kob che Chioza'. ¹⁹Na' Juanna' lekzka' bsheshlene' Heródeza', beena' wñabia' Galileana', daa bikee Herodíaza', xool beñ' bishee Felípena', na' che bichlò dii malka' ba bene'. ²⁰Na'ch Heródeza' benche' bish' l'jwell dii malka' ba bene' daa wlo'e Juanna' lillyana'.

Wchoa Jesús'a nisa'

(Mt. 3:13-17; Mr. 1:9-11)

²¹Kana' chchoa Juanna' beñ' nisa', len Jesús'a bchoe'n. Na' shlak choe'lwill Jesús'a Chioza', byalj yabana' ²²na' betj Espíritu Sántona' jsoalene'ne', na' ble'gakile' Espírituna' ka to palom. Na' bengakile' shii Chioza' za'n yabana', chí'e:

—Lin' nako' Xiin', chakchgaid' li' na' le chibaid' li'.

Ben'ka' nak dia che Jesucristona'

(Mt. 1:1-17)

²³Na' do shichoa yizi Jesús'a ka wzoloe' bene' yog' daa llia bia' gone'. Na' yog' beñ' wñagake' xiin Josénan'. Na' Joséna' goke' xiin Elína', ²⁴Elína' goke' xiin Matata', Matata' goke' xiin Levína', Levína' goke' xiin Mélquina', Mélquina' goke' xiin Jánana', Jánana' goke' xiin Joséna'. ²⁵Joséna' goke' xiin Matatíaza', Matatíaza' goke' xiin Amóza', Amóza' goke' xiin Nahuma', Nahuma' goke' xiin Éslina', Éslina' goke' xiin Nagaina'. ²⁶Nagaina' goke' xiin Maata', Maata' goke' xiin Matatíaza', Matatíaza' goke' xiin Semeina', Semeina' goke' xiin Joséna', Joséna' goke' xiin Judána'. ²⁷Judána' goke' xiin Joánana', Joánana' goke' xiin Résana', Résana' goke' xiin Zorobabela', Zorobabela' goke' xiin Salatiela', Salatiela' goke' xiin Nérina'. ²⁸Nérina' goke' xiin Mélquina', Mélquina' goke' xiin Ádina', Ádina' goke' xiin Cosama', Cosama' goke' xiin Elmodama', Elmodama' goke' xiin Era'.

²⁹Era' goke' xiin Josuéna', Josuéna' goke' xiin Eliezera', Eliezera' goke' xiin Jorima', Jorima' goke' xiin Matata'. ³⁰Matata' goke' xiin Levína', Levína' goke' xiin Simeónna', Simeónna' goke' xiin Judána', Judána' goke' xiin Joséna', Joséna' goke' xiin Jonánna', Jonánna' goke' xiin Eliaquima'. ³¹Eliaquima' goke' xiin Meleana', Meleana' goke' xiin Mainána', Mainána' goke' xiin Matátana', na' Matátana' goke' xiin Natánna'. ³²Natánna' goke' xiin Davina', Davina' goke' xiin Isaína', Isaína' goke' xiin Obedá', Obedá' goke' xiin Booza', na' Booza' goke' xiin Salmónna', Salmónna' goke' xiin Naasónna'. ³³Naasónna' goke' xiin Aminadaba', Aminadaba' goke' xiin Arama', Arama' goke' xiin Ezroma', Ezroma' goke' xiin Fáreza', Fáreza' goke' xiin Judána'. ³⁴Judána' goke' xiin Jacoba', Jacoba' goke' xiin Isaaca', Isaaca' goke' xiin Abrahama', Abrahama' goke' xiin Taréna', Taréna' goke' xiin Nacora'. ³⁵Nacora' goke' xiin Seruga', Seruga' goke' xiin Ragauna', Ragauna' goke' xiin Pelega', Pelega' goke' xiin Hebera', Hebera' goke' xiin Sálana'. ³⁶Sálana' goke' xiin Cainánna', Cainánna' goke' xiin Arfaxada', Arfaxada' goke' xiin Sema', Sema' goke' xiin Noéna', Noéna' goke' xiin Lameca'. ³⁷Lameca' goke' xiin Matusalénna', Matusalénna' goke' xiin Enoca', Enoca' goke' xiin Jareda', Jareda' goke' xiin Mahalaleela', Mahalaleela' goke' xiin Cainánna'. ³⁸Cainánna' goke' xiin Enóza', Enóza' goke' xiin Seta', Seta' goke' xiin Adánna', na' Adánna' goke' xiin Chioza'.

Dii xiwaa goklalliin kooyela'n Jesús'a gone' ka cheenin

(Mt. 4:1-11; Mr. 1:12-13)

4 Ka biza' Jesús'a cho'a yao Jordanna', Espíritu Sántona', beena' chñabia' loo yichjlall'do'ena', bchí'ene' latja' gana'

bibi chashj chleb. ²Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'. ³Na'ch che' dii xiwaane':

—Shi leilo' nako' Xiin Chios, goll yaji yiyakan yetxtil.

⁴Na'ch che' Jesúsza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

⁵Na'ch ka wde, bche' dii xiwaa Jesúsza' to lo yaa sib wal, na' tolbe'do' bliin le' yog' yellka' llia yell-lioni. ⁶Na'ch che'n le':

—Gon' li' doxen yel' wnabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. ⁷Na' gona'n li' shi wchek' xibo'na' we'lawoo nad'.

⁸Na' che' Jesúsza':

—Cho'a Xtill' Chioza' nan: “Be'la' toz Xano' Chioza' na' kon daa ine', lennan' gono'.”

⁹Na'ch ka wde, bizche' dii xiwaa Jesúsza' Jerusalenna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni. ¹⁰La' Cho'a Xtill' Chioza' nan:

Chioza' wselee anjl che'ka' gap wwia-gake' li',

¹¹na' gox'gake' li'

kwenche ki koo wchewo' yajka'.

¹²Na'ch che' Jesúsza':

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenche xenlaloo shi gone' ka ba wne'.”

¹³Na' ka bi gok kooyel' dii xiwaa Jesúsza' gone' ka cheenin, na'ch bkwasan kwite'na' shloll.

Wzolo Jesúsza' bi'e Cho'a Xtill' Chioza' Galileana'

(Mt. 4:12-17; Mr. 1:14-15)

¹⁴Jesúza' billine' gana' mban Galileana' ziyoochgue' yel' wak che Espíritu Sántona', na' doxenzə na' wze dill' daa chone'. ¹⁵Na' chjali' chjasedile' ben' Israelka' gana' chdop chllaggake' choe'lwillgake' Chioza', na' yog' ben' nagake' le xochi cho'e dill'.

Billin Jesúsza' yell Nazareta'

(Mt. 13:53-58; Mr. 6:1-6)

¹⁶Na'ch biyaje' Nazareta', yella' gana' bgole'. Na' ka bliin lla sabda', llana' chombaan ben' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'. ¹⁷Na' be'gake'ne' yisha' daa bzej dii Isafaza', beena' wdixjee daa goll Chioza'ne', na' ka bzeshe'n blabe' gana' na:

¹⁸Espíritu che Xancho Chioza' zoalene' nad',

na' Chioza' ba bzoe' nad' zidyelen' ben' yesh'ka' dill' wen dill' kob che'na'.

Ba bselee nad' kwenche zidtip' lall' ben'ka' chakyeshii yichjlal'do'eka', na' zidtxje'id' ben' wak yisell yilaagake', na' gon' ka ile'i ben' lcholka', na' gaklen' ben'ka' chchi' chsak' ben' legake',

¹⁹na' wi'a dill' ba bliin lla gaklen Xanchona' ben' yell-lioki.

²⁰Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'. ²¹Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

²²Na' yog' ben'ka' lle' na' che' ljwell-gake' le chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiin Joséna?

²³ Na'ch che' Jesús'a' legake':

—Wnaljale cha' ka dillaa de: “Wen rmech, biyon kwino.” Na' lekzka' wnaljale nad': “Daa beninto' beno' Capernaúma' lekzka' benschkin lallchoni.”

²⁴ Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'. ²⁵ Na' nia' le', zan nool wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli. ²⁶ Na' bi bse!' Chioza' Elíaza' kwenche' gaklene' nool wizebka' lle' ni, san bseleene' to yell zit' daa le Sarepta, daa lia gaozə yell Sidónna', gana' goklene' to nool wizeb zoa na'. ²⁷ Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

²⁸ Na' yog' ben'ka' lle' gana' chdop chllaggake' le' blaaagake' daa wna Jesús'a' ka'. ²⁹ Na' lii wzolla'tegake' bibejgake' Jesús'a' yella', na' bche'gake'ne' to ga ze bdiinj xen wal, goklall'gake' lljachixgake'ne'. ³⁰ Per Jesús'a' bicheje' ladje'ka' na' ziyaje'.

Bibej Jesús'a' dii xiwaa yoo to ben'

(Mr. 1:21-28)

³¹ Jesús'a' wyaje' Capernaúma', sto yell daa lia gana' mbani Galileana', na' bli' bsedile' ben'ka' lla sabda', llana' chomba' ben' Israelka'. ³² Na' bibangakile' ka chli' chsedi Jesús'a', la' bli' bsedile' le-gake' lega ben' nap yel' wñabia'.

³³ Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

³⁴ —¿Jwayi neto', Jesús, ben' Nazaret! ¿Abido' kwenche' wlliaayoo neton'? Nad'

nombi'a li', na' ne'zid' nako' liizelozi ben' li ben' shao' che Chios.

³⁵ Na'ch bsheshlen Jesús'a' dii xiwaa, golle'n:

—¿Llizə wzoa! ¡Bichej!

Na' chwiate ben'ka' bchix' btoł dii xiwaa beena', na' bichejan na' bikzə gayile' bi goki. ³⁶ Na' yog' ben'ka' lle' na' bibangakile', na' che' ljwellgake':

—¿Naktekan nak cho'a xtil' beeni, lla? Ka chneze' chillesh dii xiw'ka' yoo ben' daa napchgue' yel' wñabia' na' yel' wak.

³⁷ Na' doxen na' wze dill' ka nak daa chon Jesús'a'.

**Biyon Jesús'a' tobiin
che Simón Pédróna'**

(Mt. 8:14-15; Mr. 1:29-31)

³⁸ Na' biza' Jesús'a' gana' chdop chllaggake' na' biyaje' lill Simónna'. Na' tobiin' che Simónna' bi shawee, yoochgue' dii lana', na' wñabgakile' Jesús'a' gaklene'ne'. ³⁹ Na'ch wbig' Jesús'a' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

Jesús'a' biyone' ben' zan

(Mt. 8:16-17; Mr. 1:32-34)

⁴⁰ Na' ka ba chxoa wbillá', ben'ka' lle' na' jwa'gake' lao Jesús'a' ben'ka' chak wde wdeli yillwe'. Na' bxoə neena' to togake' na' biyagkakile'. ⁴¹ Na' bibeje' dii xiwaa yoo ben' zan, na' ka bichejgakan chosyaagakan zillj inleeb, che'gakan:

—Lin' nako' Xiin Chioza'.

Na'ch bsheshlen Jesús'a' legakan. Bi bi'e latj inegakan la' ne'zgakin len' nake' Crístóna', beena' chbez ben' Israelka' wse!' Chioza' inabi'e.

**Wda Jesús'a' bi'e Cho'a
Xtill' Chioza' Galileana'**

(Mr. 1:35-39)

⁴² Ka wyeeni', bchej Jesús'a' yella' na' wyaje' ga kono lle'. Per ben' yellka' biy-

iljgake'ne', na' ka bllingake' kwite'na', goklall'gake' wzag'gake'ne' kwenche yigaa'nlene' legake'. ⁴³Na'ch goll Jesúza' legake':

—Lekzka' chiyal' chixje'id' ben'ka' lle' yell yoblə ka nak yel' wñabia' che Chioza', la' daan bselee nad'.

⁴⁴Na' wda Jesúza' wdxixje' cho'a xtill' Chioza' to to gana' chdop chllag ben' Israelka' choe'lwllgake' Chioza'.

Wxengake' bel zan

(Mt. 4:18-22; Mr. 1:16-20)

5 To shii bllin Jesúza' cho'a nisdó' che Genesareta' na' bllin ben' zan wal axt bdakwyillgake'ne', daa cheengakile' wzenaggake' cho'a xtill' Chioza'. ²Na' ble'i Jesúza' chop barkw chi'gakan cho'a nisdó'na'. Ba bichej ben' wxen belka' na' ba chiyibgake' yixj che'ka'. ³Na'ch wyoo Jesúza' loo barkw che Simónna', na' wñabile'ne' wllig' zilateen loo nisdó'na'. Na' wche' Jesúza' loo barkwa' na' wzoloe' bli' bsdile' ben'ka'. ⁴Na' ka biyoll bli' bsdile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle belka'.

⁵Na'ch che' Simónna':

—Maestro, do yel ba bennto' llinna' na' ni tlish'b bi bdolinto', per shi kan' no', wzal'chnto' yixjki.

⁶Na' ka bzal'gake' yixj che'ka', wxenan bel zan inleeb. Na' ka nan yibegake' yixja' wzolo chcheza'n. ⁷Na' blaa neeka' ben'ka' lle' loo barkwa' sto kwenche jaklengake' legake'. Na' ka bllin ben'ka', na'ch bissha'chagake' chopte barkwka' axt ba chakgakan ka dii kwe' yel. ⁸Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' ben' saaxyaz nad'.

⁹Golle'ne' ka' daa bibanile', na' ka'kzə ben'ka' lene' bibangakile' daa bdol' bel zan inleeb. ¹⁰Na' lekzka' bibani Jacóbona' len Juanna' xiinj Zebedewa',

la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' belki loo nisi, ka'kzan gono' yibejo' ben' lao dii mala'.

¹¹Na' ka billinlengake' barkwka' cho'a nisdó'na', na'zə bkwaangake'n len xshinlaze'ka' na'ch janogake' Jesúza'.

Biyon Jesúza' to ben' chake' yillwe' daa le lepra

(Mt. 8:1-4; Mr. 1:40-45)

¹²Na' shlak zoa Jesúza' to yell, bllin to ben' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

¹³Na'ch Jesúza' bxoá neena' yichj beena', na' chi'ene':

—Cheenid'x. Na' naate yikwasan'.

Na' kon ka golle' ka' lii biyakteyi beena'. ¹⁴Na'ch che' Jesúza'ne':

—Kono yoo ka ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiyal' lljoo che Chioza' daa nllia dii Moiséza' bia' kwenche inezi ben' ba biyakilo'.

¹⁵Na' la'kzi golle'ne' ka', zizikchli wzeyi che', na' ben' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'. ¹⁶Per Jesúza' yooloe' chaje' ga kono ben' chak kwenche chjelwille' Chioza'.

Biyon Jesúza' to ben' net ni'a neena'

(Mt. 9:1-8; Mr. 2:1-12)

¹⁷To lla ka chli' chsedi Jesúza', xonj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e.

Na' yel' wak che Chioza' wzoalenan Jesúza' kwenche gok biyone' ben'ka' bi shao'.¹⁸ Na'ch bllin to chop ben' nlen-gake' to ben' net ni'a neena' nxoagake'ne' to lo daa. Goklall'gake' sho'lengake'ne' loo yoon'a kwenche lljwa'gake'ne' lao Jesúza',¹⁹ per bi gok sho'lengake'ne' daa nyichachga ben'ka' loo yoon'a. Na'ch wyepgake' koll' yoonalə na' bkwasgake' dexka' kwenche gok bletjgake'ne' do daa che'na' ladj ben'ka' lle' na' kwenche blline' lao Jesúza'.²⁰ Na' ble'i Jesúza' le nxenilall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

²¹ Na'ch ben'ka' chli' chsedi leya' na' fariseoka' wza'lall'gake', chakgakile': “¿Nora beeni chonz kwine' ka Chioza'? ¿La' toz Chiozan' chak chizi'xene' saaxya che ben'!”

²² Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'?

²³ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepée: “Biyas na' bigoo nez?”

²⁴ Na' wliid' le', nad', Ben' Bsel' Chioza', nap' yel' wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Naa nia' li', biyas, bitob daa cho'na' na' biyaj lillo'na'.

²⁵ Na' lii biyaste beena' chwiate ben'ka' lle' na', bitobe' daa che'na' bizee ziyaje' lill-le' choe'lawee Chioza'.

²⁶ Na' yog'lol' ben'ka' bibangakile' na' be'la'ogake' Chioza', na' do chllibzgake' che'gake':

—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

²⁷ Ka biza' Jesúza', na' ble'ile' to ben' wichixj lie' Leví, chi'e gana' chchixjgake'. Na' chi'ene':

—Da, dino nad'.

²⁸ Na'ch lii wzolla'te Levína', wlej yichje' xshine'na' na' janoe' Jesúza'.

²⁹ Na' Levína' bene' to lni xen che Jesúza' lille'na'. Na' wyaj ben' zan ben' wichixjka' na' zi bal ben' yoblə wdaogake' txen.³⁰ Na' fariseoka' na' ben'ka' chli' chsedi leya' wzologake' chakdił-lengake' ben'ka' nak Jesúza' txen, che'gake':

—¿Berache cheej chaolenle ben' wichixjka' na' ben' malka'?

³¹ Na'ch che' Jesúza' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'.³² Aga bid' ni che ben'ka' nak ben' li ben' shao', san bid' kwenche yep' ben' saaxyaka' chiyał' yiyaj yilengakile'.

Wñabgakile' Jesúza' che wbasaa

(Mt. 9:14-17; Mr. 2:18-22)

³³ Na' wñabgakile' Jesúza', che'gake'ne':

—Ben'ka' nak Juanna' txen na' ben'ka' nak fariseoka' txen zekizezi chozagake' wbas' na' choe'łwillgake' Chioza'. Na' ¿berache ben'ki nakgake' li' txen bi chozagake' wbas'?

³⁴ Na' chi'e legake':

—Kat' de to yel' wishagna', aga wak gonle byen ben'ka' chdop chllag soagake' wbasaa shlak zoalengake' bi'na' chshagna'. Na' ka'kzan ben'ki nakgake' nad' txen, cheej chaogake' naa zolen' legake'.³⁵ Per wllin lla wkwas ben' nad' ladje'ka', kana'chan soagake' wbasaa.

³⁶ Na' lezkka' bzoe' sto jempl, chi'e legake':

—Ni to ben' bi chchogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wñelebin lech' koba'.³⁷ Na' ni kono chgaa vinona' daa zi' chchejte to loo yid gola'. La' shi no gon ka', vino koba' wchezaan yid gola' na' chopten kwiaiy'.

³⁸San vino koba' chiyał' shollan loo yid koba'. ³⁹Na' lekzka' to ben' ba yooloe' cheeje' vino gola' aga weenile' yeeje' dii koba', daa chziachile' dii gola'.

Wdishjgake' do che trígona' lla sabda'

(Mt. 12:1-8; Mr. 2:23-28)

6 To lla sabd, llana' chombaan ben' Israelka', wdelen Jesúza' ben'ka' nalgake'ne' txen to ga naz ben' trígona', na' ben'ka' zejlgake'ne' wzolo wdishjgake' trígona' na' wxobgake'n wdaogake'n. ²Na' bał fariseoka' gollgake' legake':

—¿Biçe chonzle daa bi chiyał' goncho llani chombaancho?

³Na'ch che' Jesúza' legake':

—¿Abin' wlable gana' cho'en dill' ka ben dii Davina' len ben'ka' nalgake'ne' txen ka wdongake'? ⁴Wyoe' loo lill xlatj Chioza' na' wdoyoe' yetxtilka' daa naki che Chioza' daa toz b̄oxzka' de lsens gaogake'. Na' lekzka' bi'en ben'ka' nalgake'ne' txen.

⁵Na' lekzka' chi'e fariseoka':

—Nad', Ben' Bsel' Chioza' Yell-lioni, chnabi'a lao llani chombaancho.

Biyon Jesúza' to ben' lla sabda'

(Mt. 12:9-14; Mr. 3:1-6)

⁶Na' sto lla sabd, llana' chombaan ben' Israelka', wyaj Jesúza' gana' chdop chllaggake' choełwillgake' Chioza' na' wzoloe' chli' chsedile' legake'. Na' ladj ben'ka' len to ben' net nee de shłina'. ⁷Na' fariseoka' na' ben'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaangake', kwenche gaogake' xya che'. ⁸Na' gokbe'i Jesúza' daa chza'lall'gake', na'ch golle' beena' net t̄laa neena':

—Wzolla' na' wze gchoła'.

Na'ch wzolla' beena', wzie' gchoła'.

⁹Na'ch goll Jesúza' ben'ka':

—Ni inabid' le': ¿Beran na leya' chiyał' goncho lla sabdka'? ¿Agoncho dii wenna' anti goncho dii mala'? ¿Ayisłacho ben' anti witchone'?

¹⁰Na'ch bwia Jesúza' legake', na' chi'e beena' net t̄laa neena':

—Bli' noona'.

Na'ch bli' neena' na' biyakin. ¹¹Na' fariseoka' na' ben'ka' chli' chsedi leya' le bllaagake' na' choe'gake' dill' nak ka gongake' che Jesúza'.

Wlej Jesúza' postlka' shllin

(Mt. 10:1-4; Mr. 3:13-19)

¹²Na' wyaj Jesúza' to lo yaa kwenche jelwille' Chioza', na' do yel bełwille'ne'.

¹³Ka wyeeni', goxe' ben'ka' nalgake'ne' txen na' ladj ben'ka' wleje' ben'ki shllin na' bsi'e legake' postl: ¹⁴Simónna' beena' bsi'e Pedro, len ben' bishee Andréza', na' Jacóbona', Juanna', Felípena', Bartoloména', ¹⁵Matewa', Tomáza', Jacobo xiin Alfewa', Simónna', beena' bsi'gake' Zelote, ¹⁶Judas, ben' bish' Jacóbona'†† na' Jud Scariota', beena' bene' Jesúza' lo na' ben' malka'.

Bli' bsemi Jesúza' ben' zan

(Mt. 4:23-25)

¹⁷Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' ben' zan inleeb, ben' zaak doxen gana' mbani Judeana' na' yell Jerusalénna', na' ben' zaak cho'a nido'na' gana' mbani yell Tírona' na' yell Sidónna'. ¹⁸Wyajgake' kwit Jesúza' kwenche wzenaggake' xtilleena' na' yiyakgake' bi yillwe' dii chakgake'. Na' lekzka' biyaki ben'ka' chsak'zi' dii xiw'ka' legake'. ¹⁹Yog'z ben' goklall'gake' idi'gake' Jesúza' daa ba nezgake' chchej yel' wak che'na' na' chiyaki yog' ben'.

††6:16 Ben' bish' Jacóbona': ben'ka' nsed nagake' chiyał' inan xiin Jacóbona'.

**Ben'ka' zoa mbalaz
na' ben'ka' bi zoa mbalaz**

(Mt. 5:1-12)

20 Na'ch bwia Jesúza' ben'ka' nakgake'ne' txen, na' chi'e legake':

—Chakomba le' nakle ben' yesh' daa chleble yel' wnabia' che Chioza'.

21 'Chakomba le' chbił chdonle naa; wllin lla yesh yeljile.

'Chakomba le' chbell-le naa; wllin lla yixill-le.

22 'Chakomba le' shi chakzbani ben' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to ben' wen dii mal ni cha', nad', Ben' Bsel' Chioza' Yell-lioni. 23 Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xozxtə'ka' ben'ka' wdixjee daa goll Chioza' legake' kani'yi.

24 'Nyesh'laz gak chele, le' nakle ben' wni'a, la'kzi le wen chak chele naa.

25 'Nyesh'laz gak chele, le' de dii cheej chaole naa, la' wllin lla ibił idonle.

'Nyesh'laz gak chele, le' chiyitj chxill-le naa; wllin lla kwelyesh'le.

26 'Nyesh'laz gak chele, le' choe'la'o yog' ben' le', la' ka'kzə be'la'o dii xozxtə'leka' dii ben'ka' benzə ka chyixjee daa che' Chioza' legake'.

**Chiyał' gakicho ben'ka'
chakzbani cho'**

(Mt. 5:38-48; 7:12)

27 'Le' chzenagle naa, nia' le', li gaki ben'ka' chakzbani le'. Li gonigake' wen.

28 Li inabi Chioza' gone' ka gak wen che ben'ka' chyishj bia' blag' chele. Li inabi Chioza' gaklene' ben'ka' chiya dii nagake' chele. 29 Shi no kap' xag'ləna' tlaa, li wze daa zi shlaa. Na' shi no koyo xachel-ləna', li we'tega len xkamisləna'. 30 Not-tezə ben' shi bi inabe' chele, li we'n. Na' ka', shi no ikaa bi de chele, bi yinabzi-

lene'n. 31 Li goni ben' kon ka cheenile gongakile' le'.

32 'Shi to ben'ka' nllagzile chakile, țgaran de dii wenna' daa chonle? La' ka'klen chon ben' saaxyaka'. 33 Lekzka' shi to ben'ka' chonzi le' wen chiyonile wen, țgaran de dii wenna' chonle? La' ka'klen chon ben' saaxyaka'. 34 Na' shi choe'le bi choe'le ben' daa nezile yig-wee wzonna', țgaran de dii wenna' daa chonle? La' ka'klen chon ben' ssaxyaka', choe'gake' bi choe'gake' daa nongake' lez wigoogake' wzon che'ka'. 35 Na' le', naalla, chiyal' gakile ben'ka' chakzbani le', na' gonle wen chegake'. Na' shi we'le dii we'le legake', bi gonle lez ziyongake'n. Shi ka' gonle, Chioza' yiyone' dii xench chele, na' inezi ben' nakle xiın Chios, beena' nak ben' choo ben' xen, la' le' chone' wen che ben'ka' bi choe' le' yel' choxken na' ben' wen dii malka'. 36 Chiyał' yiyeshii lıjwell-le ka chiyeshii Xacho Chioza' yog' ben'.

Bi wwia wyile bi chon ben'

(Mt. 7:1-5)

37 'Bi wwia wyile bi chon ben', kwenche bi gon Chioza' xya chele. Bibi wtobile' ben', kwenche bi gaple do! lao Chioza'. Li si'xen che lıjwell-le, na' Chioza' si'xene' chele. 38 Li we' ben' bi chyalljile' na' Chioza' yiyone'n. Na' ziyonchle' dii xench, ka chon ben' chzanile' do yichj do lallee kat' bi wi'e, choayaa chzoalline'n. La' kon ka chonle chzanile' we'le ben' bi de chele, ka'kzan goni Chioza' le'.

39 Na' bzoa Jesúza' to jempl, chi'e legake':

—Nezicho bi gak to ben' lchoł wchi'e sto ben' lchoł, la' choptegake' lıjabix-gake' to loo yech. 40 Na' beena' chsed bi gak ine': "Chonch' ka beena' chli' chsedile' nad'." Kat'ch yiyoll yido wsede', kana'chan gake' ka beena' bli' bsedile'ne'.

⁴¹ ¿Biche chwiazó' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴² Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Ben'shki yibej' bicha' yoo loo jalawo'na'?" ¿Ben' wxiye!' Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa

(Mt. 7:17-20; 12:33-35)

⁴³ 'Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. ⁴⁴ Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. ⁴⁵ Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chche-jan loo yichjlall'do'chona'.

Chop ben' bengake' twej yoo

(Mt. 7:24-27)

⁴⁶ ¿Berache nazle nad' "Xan, Xan'", na' bi chonle daa nia' le'? ⁴⁷ Ni inia' le' no zaklebi beena' chone' nad' txen na' chzenague' cha' na' chone' ka nia'. ⁴⁸ Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. ⁴⁹ Na' beena' cheni cho'a xtillaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlliaiy'tekkan.

Biyon Jesúza' xmos xan soldadka'

(Mt. 8:5-13)

7 Ka biyoll be'len Jesúza' ben'ka' dill', biyaje' Capernaúma'. ² Na' yella' zoa to ben' Roma ben' chnabi'e to guiyoa soldad, na' zoa to xmos' lille'na', beena' le'

chakile', na' chake' to yillwe' dii chonan ka witan le'. ³ Na' ka beni xan soldadka' choe'gake' xtill' Jesúza', na'ch bselee bal ben' golka' chnabia' Israela' kwenche ll-jet'yogakile'ne' lljayene' beena' bi shao'. ⁴ Na' ka bllin ben' golka' kwit Jesúza', got'yogakile'ne', che'gake':

—Xan soldadka' chidolee gakleno'ne', ⁵ la' le' chakile' cho' ben' Israel na' len' bene' yona' gana' chdi'anto' choe'llwillnto' Chioza'.

⁶ Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bal ben' nllaguile' kwenche jell-gake' Jesúza' dill'ki:

—Xan', bi sio' wneyi yido', la' bi chido'laa shoo loo lillii. ⁷ Daan bi biyaxjid' yid' kwin' yiditi' li'. La'ch' to chop cho'a dill' shel' ino' na' yiyakile'. ⁸ La' zoa no chnabia' nad', na' lekzka' chnabi'a soldad cha'ka'. Na' kat' chep' toe': "Wyaj ni", na' chaje'. Na' kat' chep' stoe': "Da ni", na' chide'. Na' kat' chep' xmosaa: "Ben dga", na' chone'n.

⁹ Na' ka beni Jesúza' xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gonlilall'likze' nad' ka chonlilall' beeni nad'.

¹⁰ Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmosena'.

Bisban Jesúza' xiin to nool wizeb bi' ba wit

¹¹ Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə. ¹² Na' ka bllingake' cho'a yella', ble'gakile' zjakwash' ben'ka' to bi' wet. Na' bi'na' wit nakb' bi' tlish', na' xna'baa nake' noolə wizeb. Na' ben' zan ben' yellka' zjakwash'gake'b'. ¹³ Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

¹⁴Na'ch jabigüee bexee gana' xoa bi' weta', na' wlez ben'ka' n̄lengake'b'. Na' golle' bi' weta':

—Bi' xkwid', nia' li', j̄biyas!

¹⁵Na' bi' weta' lii bibanteb' na' bibe'b' na' wzolo ch̄neb', na' biyon Jesúsza'b' lo na' x̄na'baa. ¹⁶Na' ka ble'i ben'ka' daa bene', yog'lolze' blleb na' wzologake' choe'la'ogake' Chioza', nagake':

—Ladjchoni ba bla' to ben' zakii ben' chyixjee daa che' Chioza'ne'.

Na' lekzka' nagake':

—Chiozan' ba blee kwenche gaklene' cho' nakcho yell che'.

¹⁷Na' doxen gana' mbani Judeana' na' yellka' llia gaozə w̄nezgakile' daa ben Jesúsza'.

Ben'ka' bsel' Juanna' lao Jesúsza'

(Mt. 11:2-19)

¹⁸Na' ben'ka' nongake' Juanna' txen jayellgake'ne' yog' diika' chon Jesúsza'. Na'ch Juanna' w̄nie' chope' ¹⁹na' bselee legake' gana' zoa Jesúsza' kwenche janabgakile'ne' shi leyen'en' beena' llia bia' yid wa shi chiya'l' kwezgake' sto ben' yoblə. ²⁰Na' ka bllin ben'ka' bsel' Juanna' kwit Jesúsza', che'gake'ne':

—Juanna', beena' chchoa ben' nisa', bselee neto' kwenche zidnabinto' li' shi li'yen'kzan nako' Crístona', beena' chbeznto' wsel' Chioza' kwenche inabi'e, wa shi chiya'l' kwezento' stoe'.

²¹Na' shlak zegake' na', biyon Jesúsza' ben' zan ben' chak yillwe', na' lekzka' bibeje' dii x̄iw'ka' yoo ben', na' bene' ka ble'i ben' zan ben' l̄cholka'. ²²Na'ch che' Jesúsza' ben'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' l̄cholka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwelka' chengakile', na' chiban ben' wetka', na' chyixje'id' ben' yesh'ka' dill' wen dill' kob

che Chioza'. ²³Chakomba beena' chajle' cha' na' bi chakchoplallee.

²⁴Na' ka biza' ben'ka' bsel' Juanna', Jesúsza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj ch̄leb? ¿Anake' to ben' chakchoplallii che dill'ka' cho'e? ²⁵Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezgzile ben'ka' nakw lech' dii zakii, na' naptegage' bittezə dii chze-lall'gake', zoagake' lill ben' w̄nabia'ka', aga zoagake' latja' gana' bibi chashj ch̄leb. ²⁶Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'. ²⁷La' che beenin cho'e Cho'a Xtill' Chioza' dill' gana' nan:

Wselaa beena' kwialo lawo'na', na' chixji'e xtilloona' kwenche soa ben' wzenaggake' cho' kat' illino'.

²⁸Na' nia' le', lao yog'lolte ben' yellioni, ni to konon' ichej ben' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

²⁹Na' yog'lol ben'ka' bchoa Juanna' nisa', no ben' wichixjka' na' zan ben' yoblə, ka bengakile' daa wna Jesúsza', gokbe'gakile' dill' li dill' shao' nak cho'a xtill' Chioza'. ³⁰Na' fariseoka' na' ben'ka' chli' chsedi leya' bi goongakile' wchoa Juanna' legake' nisa', ni bi goklall'gake' gon Chioza' dii wenna' cheenile' gone' chegake'. ³¹Na'ch goll X̄ancho Jesúsza' legake':

—¿Bi ka wsaklebid' le' mbanle naa? ¿No ka inia' nakle? ³²Nakle ka bi'do'ka' chbe' gana' chak yaana' na' chosyaagakb' che' ljwellb': “Bkwellnto' blleja' na' bi byaale, na' be'lnto' dii chon nyesh', na' ni bi wchell-le.” ³³La' bid Juan wchoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.”

³⁴Na'ch bid' nad', Ben' Bsel' Chioza' Yellioni, na' chle'ile cheej chaw', na' nale cha': "Le ben' waoxat nak beeni na' cheejtie', na' nllagteile' ben' saaxyaka' na' ben' wichixjka'." ³⁵Per yel' sin' che Chioza' chli'lawin ka nsa' che ben'ka' chzenagake' cheyin.

Jesúza' wyaje' lill Simónna', beena' nak fariseo

³⁶To fariseo wnie' Jesúza' kwenche gaogake' lille'na'. Ka blline' na' wchi'e cho'a mesa'. ³⁷Na' to noolə wda zoa yella', ka wpezile' zjtao Jesúza' lill farisewa', na'ch wyaje' noxee to lmet de yaj xochi na' yollan set zix'. ³⁸De chbellzile' jabigee xni'a Jesúza' na' bis-bisile' ni'ena' nis xchell che'na'. Na' bisbillile'n yish' yichje'na', na' bnopen na' bwazje'n set zixa'. ³⁹Na' farisewa', beena' wnie' Jesúza' lille'na', ka ble'ile' ka chon noola', na' gokile': "She'l'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ni'ena' nake' ben' saaxya." ⁴⁰Na'ch che' Jesúza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

⁴¹Na'ch che' Jesúza':

—Chop ben' chbag'gake' mech che to ben' chon yichjin. Toe' chbaguee gay' guiyoa mech plat^{‡‡}, na' stoe' chbaguee shiyonan. ⁴²Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no ben'ka' chop gachile'ne'?

⁴³Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

⁴⁴Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beno' nisa' kwenche chib ni'ani, per nooli ba wdibile' nis xchell che'na' ni'ani na' bisbillile'n yish' yichje'na'. ⁴⁵Bi bnopo' nad', per nooli kon ka wyo'a chnoptezi chnope' ni'ani. ⁴⁶Bi wdebo' yichjii set, per nooli ba bwazje' set zixa' ni'ani. ⁴⁷Daan nia' li', la'kzi dii zan saaxya ba ben nooli, ba biyaxkengakan daa le chakchgaile' nad'. Na' beena' lat'zo biyaxken che', lekzka' lat'chga chakile' nad'.

⁴⁸Na'ch golle' noola':

—Ba biyaxken saaxya cho'ka'.

⁴⁹Na' ben'ka' chi'lengake' Jesúza' txen wzologake' che' ljwellgake':

—¿Nora beeni, lla, axt saaxyaka' chizi'xene'?

⁵⁰Na' Jesúza' chi'e noola':

—Daa chonlilalloo nad', ba bilo' lao yel' zak'zi'na'. Biyaj mbalaz.

Noolka' goklengake' Jesúza'

8 Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chnabi'e loo yichjlall'do' ben'ka' chzenag che'. Na' postl che'ka' shllin chdalengake'ne' txen. ²Na' lekzka' len bal' noolka' ba biyone'. Bale' bibeje' dii xiw'ka' wyoogake', na' zi bale' gok-gake' yillwe' na' biyone' legake'. Na' ladjeka' len Mariana', noola' nsi'gake' Magdalena, beena' bibej Jesúza' gall dii xiw'ka'. ³Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' ben'ka' jano Jesúza' na' bchingake' dii de chegake' kwenche goklengake'ne'.

^{‡‡}7:41 Mech plat: dill' griegona' nan denario, na' nakan to mech dii zak' che shlla llin.

Jempl che to ben' goz goon

(Mt. 13:1-9; Mr. 4:1-9)

⁴ Ben' zan bllesh to to yell jawiagake' Jesúza', na' ka bdoḡ ben' zan wal na'ch bseesile' legake' to jempl, chi'e:

⁵ —To ben' goz goon wzee zeje' goza'. Na' ka zej chzalee binna', balan bxop cho'a neza' na' blej bshoshj ben' len, na' bllin byinka' wdaogakban. ⁶ Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. ⁷ Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan. ⁸ Na' zi balan bxop lo yo wenna', na' le bgolgakan na' axt do to guiyoa wej wllia to ton.

Na' ka biyoll bseesee jempla', na'ch wnie' zilljə chi'e:

—Le' chenile dga nia', li sen wneyi.

Bzajni Jesúza' bi che chzoe' jemplka'

(Mt. 13:10-17; Mr. 4:10-12)

⁹ Na'ch wḡab ben'ka' nakgake'ne' txen bi zejin jempla' daa bseesee. ¹⁰ Na' che' Jesúza' legake':

—Chioza' cho'e latj inezile daa kono nezkzi, ka chḡabi'e loo yichjall'do' ben'ka' chzenaggake' che'. Na' ben'ka' sto chseesid' legake' shgal' jempl, la' la'kzi chle'gakile' bin chon', kon chongake' ka ben' bi chle'i. Na' la'kzi chengakile' bin nia', aga chajni'gakile'n.

Bzajni Jesúza' bi zeji jempl che ben' goz goona'

(Mt. 13:18-23; Mr. 4:13-20)

¹¹ Kin zeji jempl che ben goz goona': cho'a xtill' Chioza' nakan ka binna' daa goze'. ¹² Na' zoa ben' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che binna' daa bxop cho'a neza'. ¹³ Na' zoa ben' chibagakile' chzenaggake' cho'a

xtill' Chioza' na' chlebgake'n, per kat' chak bi chak chegake' na' chbej yichj-gake'n. Chak chegake' ka gok che binna' bi bde loinna' daa bxopan lo yaja'. ¹⁴ Na' zoa ben' chzenague' cho'a xtill' Chioza', per chi'ch yichjgake' daa chak chegake' na' che yel' wni'ana', na' che bichlə dii chzelall'gake', na' bi chakchagake' lo xnez Chioza'. Chak chegake' ka gok che binna' bxop ladj yag yesh'ka'. ¹⁵ Na' zoa ben' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bitteza dii chak chegake'. Ben'kin chak chegake' ka gok che binna' bxop lo yo wenna' daa le wllia.

Jempl che to kandil

(Mr. 4:21-25)

¹⁶ Biga zoa to ben' chxene' kandila' na' chdose'n to dii wkwashaan daa wa chzoe'n xan xlague'na', san chzoe'n sibə kwenche ile'i ben'ka' sho' loo yoonā'. ¹⁷ Na' lekzka' yog'loite dii ngash' naa, wllin lla yila' lawin, na' daa kono nezi naa, wllin lla inezi beḡaan.

¹⁸ Li wzenag dga nia' le' naa. Beena' chzenag zizikchli shajni'chile', na' beena' bi chzenag, daa ba bzenague' lat', yog'loḡan yiyal-lallee.

Xḡa' Jesúza' len ben' bisheeka'

(Mt. 12:46-50; Mr. 3:31-35)

¹⁹ Na'ch bllin xḡa' Jesúza' len ben' bisheeka' gana' zoe', na' bi gok ibig'gake' kwite'na' daa lle' ben' zan. ²⁰ Na' wbig' to ben' golle' Jesúza':

—Xḡoona' len ben' bishooka' lle'gake' lesh' chyoonā' na' cheengakile' wshajlengake' li'.

²¹ Na' goll Jesúza':

—Ben'ka' chzenaggake' cho'a xtill' Chioza' na' chongake' ka nan, legaken' nakgake' xḡa' na' ben' bishaa.

Jesúza' bkweze' to be' wal lo nisdona'
(Mt. 8:23-27; Mr. 4:35-41)

²²To lla wyoo Jesúza' to loo barkw len ben'ka' nakgake'ne' txen na' golle' legake':

—Techo shlaalə nisdoni.

Na'ch wza'gake'. ²³Na' shlak ngoo barkwa' nez, wtes Jesúza'. Na'ch wze to be' wal lo nisdona' na' wzolo chas chat'nisa' na' biyollan loo barkwa', na' zi lat'zə nan kwe'n yel. ²⁴Na' jasangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len nisdona'. Na' wlezwakan, bich bi gok. ²⁵Na'ch golle' legake':

—¿Abi chonlilall'kzle nad'?

Na' legake' le chllébgake' na' le chiban-gakile' na' che' l'jwellgake':

—¿Nora beeni lla?, axt be'na' na' nisdona' chzenaggakan che'.

**Bibej Jesúza' dii xiwaa
yoo to ben' Gadara**

(Mt. 8:28-34; Mr. 5:1-20)

²⁶Na'ch bllingake' yell-lío che ben' Gadáraka', daa lliá shlaa nisdona' ndil yell-lío che Galileana'. ²⁷Ka bichej Jesúza' loo barkwa' jabig' to ben' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'. ²⁸Na' ka ble'ile' Jesúza', besyee na' jachek' xibe' lawe'na', na' zillj inlleb chi'e:

—Jwayiz nad', Jesús Xiin Chios, ben' nak liizelozi ben' choo ben' xen. Ben goklen bi wsak'zi'o nad'.

²⁹Gollan ka' daa ba chon Jesúza' byen yichejan. Ba wlla chnabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono ben' lle'. ³⁰Na' che' Jesúza':

—¿Bin lio'?

Na' chi'e:

—Legiónan lia'.

Golle' ka', la' zanannan' yo'e. ³¹Na' got'yogakin Jesúza' bi wseleegakan gana' kwiayi'gakan. ³²Na' gaozə zoa to yaa gana' lle' kush zan chaogakb. Na' dii xiw'ka' wzeyidgakan wñabgakin Jesúza' wi'e latj yiyoogakan kushka', na' bi'e latj. ³³Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bđinj na' jshoogakb loo nisa' na' witgakb.

³⁴Na' ben'ka' chap kushka' ka ble'gakile' daa gok, biyajdogake' jazengakile'n ben'ka' lle' yella' na' ben'ka' lle' lyixaa. ³⁵Na'ch bllesh ben'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'. ³⁶Na' ben'ka' ble'gakile' daa gok, gollgake' ben'ka' zi' bllin nakan gok biyaki beena' wyoo dii xiw'ka'. ³⁷Na' yog'lo' ben' Gadáraka' got'yogakile' Jesúza' yizee lalle'ka' daa le chllébgake' ka bene'. Na' biyo'e loo barkwa' ziyaje'. ³⁸Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

³⁹—Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

**Biyon Jesúza' noola' bexee
xe'na' na' lekzka' xiin Jairona'**

(Mt. 9:18-26; Mr. 5:21-43)

⁴⁰Ka billin Jesúza' shlaa nisdona', le chiba chizaki ben'ka' lle' na', la' yog'zgake'n chbezgake' le'. ⁴¹Na'ch bllin to ben' le Jairo, nake' to ben'ka' ch-goo xnezi cheyi diika' chon ben' Israelka' gana' chdop chllaggake' choe'lwillgake' Chioza'. Na' bchek' xibe'na' lao Jesúza'

na' got'yoile'ne' shaje' lille'na', ⁴² daa ba chakshwet bi' nool che'na'. Nakb' to bi' tlish' tyaj, na' ka do shllin yizib'. Na' shlak zej Jesúza' ben' zan janogake'ne' axt bdakwyillgake'ne'.

⁴³ Na' ladj ben'ka' zjano Jesúza' len to noolə ba gok shllin yiz chzoe' wbaana'. Na' ba blliyee yog' dii de che' daa chajzei chaje' lao ben' wen rmechka', na' ni to kono gok yiyon le'. ⁴⁴ Na'ch wbiguee koll' Jesúza' bexee xe'na', na' katena' lii biyakteile'.

⁴⁵ Na'ch goll Jesúza' ben'ka' zjano le':

—¿No beena' ba bex' nad'?

Na' ni to kono bcheb. Na'ch goll Pédróna'ne':

—Maestro, ben'kin chdakwyillgake' li' na' chllig'gake' li' to ki to ka'lə. ¿Biche nazo': "Non ba bex' nad'?"

⁴⁶ Na' che' Jesúza' legake':

—Nochodan' ba bex' nad', la' gokbe'teid' bchej ye'l' wak cha'na'.

⁴⁷ Na' noola', ka gokbe'ile' aga wak wk-washee, do chllebbe' jachek' xibe'na' lao Jesúza'. Na' lao yog'lo'l' ben'ka' lle' na', golle' biche bex'ze' xe'na' na' daa bexeen lii biyakteile'. ⁴⁸ Na'ch goll Jesúza'ne':

—Xiin', daa chonlilaloo nadaan biyakilo'. Biyaj mbalaz.

⁴⁹ Ni choe'telə Jesúza' dill' ka bllin to ben' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

⁵⁰ Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

⁵¹ Na' ka bllingake' lille'na', aga be' Jesúza' latj sho' ben' yoblə, lete Pédróna', Jacóbona', Juanna' na' xaxna' bi' weta'zə. ⁵² Yog'lo'l' ben'ka' lle' lill Jairona' chbell-gake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

⁵³ Na' bxill-ləgake' che', la' nezgakile' ba witbaan. ⁵⁴ Na'ch bex' Jesúza' na' bi' wetdo'na' na' wnie' zilljə, chi'e':

—Biyas, bi'do'.

⁵⁵ Na'ch bibam' na' lii biyasteb'. Na' goll Jesúza' legake' we'gake' dii gaob'. ⁵⁶ Na' xaxna'baa le bibangakile', na' che' Jesúza' legake' ni to kono ye'gake' daa gok.

Ben'ka' shllin jtixje'gake' cho'a xtill' Chioza'

(Mt. 10:5-15; Mr. 6:7-13)

9 Na' bitop Jesúza' ben'ka' shllin, na' bi'e legake' ye'l' wak na' ye'l' wñabia' kwenche yibejgake' yog'lo'l' dii xiw'ka' yoo ben' na' yiyongake' ben' che'i yillwe'. ² Na' bselee legake' kwenche llje'gake' dill' ka nak ye'l' wñabia' che Chioza', na' yiyongake' ben'ka' bi shao'. ³ Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale. ⁴ Na' yoonā' gana' illinle, na'tezə soale axt ka illinch lla yiza'le. ⁵ Na' yella' gana' bi wlebgake' le', kat' yiza'le, yishible bishtena' lliā ni'aleka' kwenche gakbe'gakile' aga wenan chongake' bi chlebgake' cho'a xtill' Chioza'.

⁶ Na'ch wza' ben'ka' nakgake'ne' txen na' wyajgake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa'

(Mt. 14:1-12; Mr. 6:14-29)

⁷ Heródeza', beena' wñabia' gana' mbani Galileana', benile' yog' daa chon Jesúza'. Na' chakile' nora beena', la' bal' ben' nagake' dii Juan wichoa nisan' ba bibane' dii yoblə. ⁸ Na' zi bale' nagake' Elíazan' ba bila' dii yoblə. Na' zi bale' nagake' nochod' dii ben'ka' wdixjee daa goll Chioza' legake' kani'yin ba biban ladj ben' wetka'. ⁹ Na' Heródeza' wne':

—Nad' ben' mandad wchog yen dii Juanna'. ¿Noraz beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

Jesúza' bwawe' gayaa mil beṇ'

(Mt. 14:13-21; Mr. 6:30-44; Jn. 6:1-14)

¹⁰Na' ka billin postlka' shllin, na' gollgake' Jesúza' yog'lol' diika' jengake'. Na'ch bchi'e to lezgake' yella' le Betsaida.

¹¹Na' ka wṇezi beṇ'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' legake' na' bza-jniile' legake' ka nak yeṇ' wṇabia' che Chioza', na' biyone' beṇ'ka' bi shao'.

¹²Na' ka ba wlle', beṇ'ka' shllin jabig'gake' kwit Jesúza' na' gollgake'ne':

—Goll beṇ'ki yiyajgake' yellka' wa no ranshdo'ka' llia gaozə lljadiljgake' dii gaogake' na' ga guesgake', la' ga ni zoa-cho bikzə bi de.

¹³Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chnto' che yoguee.

¹⁴Gollgake'ne' ka' la' ka do gayaa mil beṇ' byoka' lle' na'. Na'ch che' Jesúza' beṇ'ka' shllin:

—Li ye'gake' kwe' shiyon wejgake'.

¹⁵Na' bzoagake' xtillie na' wlekgake' beṇ'ka'. ¹⁶Na'ch bex' Jesúza' yetxtilka' gay' na' belka' chop. Na' blis jalawe'na' yabana' bi'e Chioza' yeṇ' choḵken, na' bx-oxje'n na' bi'en beṇ'ka' nakgake'ne' txen na'ch be'gake' che che beṇ'ka'. ¹⁷Na' yog'gake' wdao ka beljgakile', na' diika' bichoonan bitopgake'n biyakten shllin xet'.

Pédrona' bi'e dill' nan Jesúza'n beena' wlej Chioza' inabi'e

(Mt. 16:13-19; Mr. 8:27-29)

¹⁸To shii ka choe'lwill Jesúza' Chioza', na' lle' beṇ'ka' nakgake'ne' txen, na' wṇa-bile' legake':

—¿Non na beṇ'ka' nak'?

¹⁹Na' che'gake'ne':

—Baḷe' nagake' nako' dii Juan wichoa nisa', na' zi baḷe' nagake' nako' Elíaza', na' zi baḷe' nagake' nako' to beṇ' wdxjee daa goll Chioza'ne' kani'yi, na' ba bibane' ladj beṇ' wetka'.

²⁰Na'ch chi'e legake':

—Shera le', ¿nora nale nak'?

Na'ch che' Pédróna'ne':

—Lin' Crístóna', beena' ncheb Chioza' wselee.

²¹Na'ch goll Jesúza' legake' ni to kono ye'gake' ka'.

Goll Jesúza' postl che'ka' wit beṇ' le'

(Mt. 16:20-28; Mr. 8:30–9:1)

²²Na' chi'e legake':

—Kon ka nchogbia' cha', nad', Beṇ' Bsel' Chioza' Yell-lioni, biya dii wchi' wsak'gake' nad'. Na' beṇ' golka' chṇabia' wzoagake' nad' ka'lə na' ka'kzə bḵozka' chṇabia' na' beṇ'ka' chli' chsedi leya'. Na' chonan byen witgake' nad', na' ka gak shon lla yiban' ladj beṇ' wetka'.

²³Na'ch golle' yog'lol'e':

—Shi no cheeni gon nad' txen, chiya'l wsanlall' kwine' na' izanile' yeṇ' mban che'na' yen ile'ile' bittez ni cha', na' gone' ka chazlallaa. ²⁴La' beena' bi chzani yeṇ' mban che'na' yen ile'ile' bittez ni cha', beenan' kwiayi'. San beena' chzani yeṇ' mban che'na' ni cha', beenan' gat' to yeṇ' mban che' zejli kani. ²⁵Bibi zjanayin gap beṇ' yog'lol' daa de yell-lioni, shi le' kwiayee. ²⁶Nottezə beṇ' chiyi chido'i nad' na' che cho'a xtillaana', ka'kz nad', Beṇ' Bsel' Chioza' Yell-lioni, yiyi yido'id' le' kat' yiyed' kon balaan xen cha'na', na'

che Xa' Chioza' na' che anjl che'ka'. ²⁷ Na' dii li nia' le', ba-le lle'le ni, ni mbanle kat' wli' Chioza' ye! wñabia' che'na'.

Jesúza' biyake' nlla'lə

(Mt. 17:1-8; Mr. 9:2-8)

²⁸ Ka gok do to xman wna Jesúza' ka', na'ch wyaje' to lo yaa kwenche jel'wille' Chioza' na' bchi'e Pédróna', Juanna' na' Jacóbona'. ²⁹ Na' shlak choe'l'wille' Chioza', biyak cho'alawe'na' nlla'lə, na' biyak xe'na' xtil ax̄t chey cheeni'n. ³⁰ Na' gokxe chop ben' bshajlengake'ne', toe' dii Moiséza' na' beena' sto Elíaza'. ³¹ Na' ye! chey cheeni'na' nechjan legake'. Na' chshajlengake'ne' che ka nak ye! wita' ile'ile' Jerusalénna'. ³² Na' Pédróna' len Juanna' na' Jacóbona' le chakxweskake', per bendiplall'gake' bi wtesgake', na'ch ble'gakile' ye! chey cheeni' che Jesúza' na' che ben'ka' zi chop bllin kwite'na'. ³³ Na' ka ba chikwas dii Moiséza' na' Elíaza' kwit Jesúza', Pédróna' golle' Jesúza':

—Maestro, ¡le wen zoacho nizə! Gonnto' shonə ransh, to cho', to che dii Moiséza' na' sto che Elíaza'.

Na' ni bi gokbe'i Pédróna' bin golle'. ³⁴ Na' ni choe'tie' dill', ka wze to bej gana' lle'gake' na' bkwashaan legake'. Na' le bllebgake' ka gokbe'gakile' ba yoogake' loo beja'. ³⁵ Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

³⁶ Na' ka wde goll Chioza' legake' ka', na' ble'gakile' stoza Jesúza' ze. Na' ni to kono gollgake' daa ben ble'gakile'.

Biyon Jesúza' to bi' wew' yoo dii xiwaa

(Mt. 17:14-21; Mr. 9:14-29)

³⁷ Betiyo, ka biyetjgake' lo yaana', ben' zan wal jatilgake' legake'. ³⁸ Na'ch ladj ben'ka' wne to ben' byo zillj, chi'e Jesúza':

—Maestro, ben goklen bwiagach bi' cha'ni, la' tlish' tyajchgabaan zoa. ³⁹ Dii xiwaa choxa'n leb' na' tokonganz chosyaab', na' chonan ka chazb' shon ax̄t chbia bllin' cho'abaa. Na' chiya dii chonin leb', na' aga cheenin wsanán leb'. ⁴⁰ Ba got'yoid' ben'ki nakgake' li' txen yibejgachgake' dii xiwaa yoo'b', na' bi gokgake' yibejgake'n.

⁴¹ Na'ch che' Jesúza':

—¡Zi'tegalə chelena', le' ben' mal na' ben' bi chajle! ¿Zi ka'k'tek chiyal' soalen' le'? Na' ¿zi ka'k'tek chiyal' soid' le'? Da diwa' bi' cho'na' ni.

⁴² Na' ka zej bi'na' kwit Jesúza' na' wchoon dii xiwaa leb' lo yona' na' wyazb' shona' sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa. ⁴³ Na' yog' ben'ka' lle' na' bibangakile' daa ble'gakile' ye! wak xen che Chioza'.

Sto shii wdixjee Jesúza' witgake'ne'

(Mt. 17:22-23; Mr. 9:30-32)

Na' shlak chibani yog' ben'ka' ble'i daa ben Jesúza', na' golle' ben'ka' nakgake'ne' txen:

⁴⁴—Li wzeyen' nagle dga inia' le': gongake' nad', Ben' Bsel' Chioza' Yell-lioni, lall' na' ben'ka' chakzi' chakzbani nad'.

⁴⁵ Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllebgake' inabgakile'ne' bi zejín daa golle' legake'.

¿Noran zak'chi?

(Mt. 18:1-5; Mr. 9:33-37)

⁴⁶ Na' wzolo chakdil'-len ljwellgake' nogaken' nak ben' zak'chi. ⁴⁷ Ka gokbe'i Jesúza' daa chza'lall'gake', na'ch wdooye' to bi'do' na' bzie'b' kwite'na'. ⁴⁸ Na' chi'e legake':

—Nottezə ben' wlebe' laa to bi'do'zə ka bi'do'ni daa chonililallee nad', nad'kzan chlebe'. Na' beena' chlebe' nad', lekzka'

chlebe' Chioza', beena' bseɫ' nad'. Na' beena' chaki bibi zakee lao yog'le, len' nake' beɫ' zak'chi ladjlena'.

**Beena' bi chakile' cho' zi',
txenkzan nake' cho'**

(Mr. 9:38-40)

⁴⁹ Na'ch goll Juanna'ne':

—Maestro, ba ble'into' to beɫ' chzetje' lio'na' kwenche chibeje' dii xiw'ka' yoo beɫ'. Na' bllonnto' gone' ka', la' bi nake' cho' txen.

⁵⁰ Na' che' Jesúza' le'gake':

—Bi wllonle gone' ka', la' beena' bi chakile' cho' zi', txenkzan nake' cho'.

**Jesúza' bsheshlene'
Jacóbona' len Juanna'**

⁵¹ Na' ka ba zoa yiyaj Jesúza' yabana', na'ch btoblaltee yiyaje' Jerusalénna'.

⁵² Na' bselee beɫ' wllialozegagake' na' wyajgake' to yell daa mbani Samáriana' jtiljgake' gana' yigaane'. ⁵³ Na' beɫ' Samáriaka' bi blebgake'ne' daa nezgake'le' Jerusalénna'lan yiyaje'. ⁵⁴ Na' chop beɫ'ka' nakgake'ne' txen, Jacóbona' len Juanna', ka ble'gake'le' ka ben beɫ' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega beɫ'ki?

⁵⁵ Na' biyechj Jesúza' bsheshlene' le'gake', chi'e:

—Aga nezile non chnabia' yichjlall'do'lena' nazle ka'. ⁵⁶ Nad', Ben' Bsel' Chioza' Yell-lioni, aga zaa kwenche wlliyaya' yeɫ' mban che beɫ', san zaa kwenche yisla' yeɫ' mban che'kan'.

Na'ch biyajgake' yell yoblə.

Ben'ka' goklall' lljano Jesúza'

(Mt. 8:19-22)

⁵⁷ Na' ka zejgake' tneza', to beɫ' chi'e Jesúza':

—Xan', cheenid' sa'len' li' gattezə shajo'.

⁵⁸ Na' che' Jesúza'ne':

—Zoa yech ga chiyoo bez'ka', na' by-indo'ka' non lilldo'gakb, san nad', Ben' Bsel' Chioza' Yell-lioni, biga de yigaan'.

⁵⁹ Na'ch che' Jesúza' sto beɫ':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xana'.

⁶⁰ Na'ch che' Jesúza'ne':

—Bibi gakilo', wikwash'kzə ljwell beɫ' wetka'. San li', jtixje'i beɫ' ka nak yeɫ' wɫnabia' che Chioza'.

⁶¹ Na'ch sto beɫ' yoblə chizi'e Jesúza':

—Xan', cheenid' sa'len' li' per zigaate be' latj lljalaach' dill' bish' ljwell'ka'.

⁶² Na' che' Jesúza'ne':

—To beɫ' chwaane' goon, aga wak wwie' gozkoll'lə. Na' ka'kzan nakan che beena' noe' nad', shi bi nchoglaltee aga wak gone' ka cheeni Chioza'.

**Jesúza' bselee guiyon shllin beɫ'
jtixje'gake' cho'a xtilleena'**

10 Na' ka wde dga, Jesúza' wleje' zi guiyon shi beɫ'^{¶¶} na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'. ² Na' golle' le'gake':

—Dii li' nia' le', dii xen wal daa yizi' yilaple de, na' to choptgui wen llinka' zoa. Na' li' inabi Chioza', beena' nak xan llinna' wsel'stoe' wen llinka' kwenche yizi' yilapgake'n. ³ Li' shajshki naa, nad' chselaa le' ka xil'do' ba zej ladj ba znia. ⁴ Bi wa'le ga koo xshinlazle, ni mech, ni zi shkwe' xel-le; na' bi shazile wwaple beɫ' chiox tneza'. ⁵ Na' ka sho'le to lill beɫ', zigaate wwaplene' chiox, ye'lene': "Soashgale mbalaz, le' zoale yooni." ⁶ Na' shi zoa beɫ' cheenile' soe' mbalaz, na' yeɫ' mbalaza' yigaanlenan le'.

Na' shi bi cheenile', na' yibiilenan le'.
 7 Na' yoonā' gana' illinle na'tezə yigaanle
 na' yeej gaole kon bi gongake' le', la' to
 wen llin chiya! ikaa laxje'. Na' bi lljsoale
 to to yoo. 8 Kat' illinle to yell ga wlebgake'
 le', yeej gaotezle bittezə dii gongake'
 le'. 9 Na' yiyonle ben'ka' bi shao'
 yella', na' ye'le legake': "Ye! wñabia' che
 Chioza' ba bla'n laoleni." 10 Na' shi illinle
 to yell ga bi wlebgake' le', li yide lyell,
 li ye'gake': 11 "Axt bishte che yell che-
 leni willia ni'anto'ni chibibnto'n kwenche
 gakbe'ile aga wenan chonle bi chleble
 cho'a xtill' Chioza'. Na' li koosha yichjle
 dga inanto' le', ye! wñabia' che Chioza'n
 ba bla'n laoleni." 12 Na' nia' le', ben'ka' lle'
 yellka' gana' bi wlebgake' le', dii xench
 nak ye! zak'zi'na' ile'gakile' aga ka ben'
 yell Sodómaka' llana' wchoglo Chioza'
 che ben'.

Ben'ka' bi bzenag xtill' Jesúza'

(Mt. 11:20-24)

13 'iNyesh'laz gak chele, le' ben' yell
 Corazín na' le' ben' yell Betsaida! La'
 shel' gok ye! wakka' yell Tírona' na'
 Sidónna' ka diika' ba gok ladjlena',
 kana'telja biyaj bilengakile' saaxya
 che'ka', na' ba wche'gake' bwazjgake'
 dena' yichjlaogake' na' gokwgake' lech'
 zeshaa, kwenche wli'gake' nan ba biyaj
 bilengakile' daa chongake', shel'ka'.
 14 Kat' illin lla wchoglo Chioza' che
 ben', ye! zi' xench ile'ile aga ka ben'
 yell Tíroka' na' ben' yell Sidonka'. 15 Na'
 le' ben' yell Capernaúm, bi gonle lez
 yillinle yabana', la' Chioza' wzalee le'
 gana' sak'zi'le.

16 Na'ch che' Jesúza' ben'ka' bselee:

—Ben'ka' chzenaggake' chele,
 cha'kzan chzenaggake'. Na' ben'ka' bi
 chlebgake' le', nad'kzan bi chlebgake'.
 Na' beena' bi chlebe' nad', lekzka' bi
 chlebe' Chioza', beena' bsel' nad'.

Billin ben'ka' guiyon shi

17 Na' ben'ka' guiyon shi^{§§} le chiba-
 gakile' ka billingake' kwit Jesúza', na'
 che'gake'ne':

—Xan', axt dii xiw'ka' chilleshgakan ka
 chzetjnto' lio'na'.

18 Na'ch che' Jesúza' legake':

—Ble'id' Satanáza' daa chñabia' dii
 xiw'ka' bxopan yabana' ka chxop to yi'
 wziw'. 19 Nad' ba ben' le' ye! waka'
 kwenche la'kzi gad' no bel zña wa
 no bexjoni' le' aga bi gakile', na' wlej
 wshoshjtele yog' daa chon dii xiwaa.
 20 Per bi yibaile daa chisheshle dii
 xiw'ka', san li yibayi daa ba da' lelana'
 lee libra' de yabana'.

Jesúza' bibaile'

(Mt. 11:25-27; 13:16-17)

21 Na' katena' Espíritu Sántona' bene'
 ka bibachgayi Jesúza', na' wne':

— Xa, li' nako' Xan yabana' na' yell-
 lioni, na' choe'lawa li' daa ba bliilo'
 ben'ka' bibi chajni daa bi bliilo' ben'
 sin'ka' na' ben'ka' nteyi. Kan' ba wyazlal-
 loo gono', Xa.

22 'Xa'na' ba none' lall' na' yog'te dii de.
 Na' ni to kono nezi noyen'an' nak' nad'
 Xiine'; toz Xa'na' nezile'n. Na' ni to kono
 nezi noyen'an' nak' Xa'na'; toz nad' Xiine'
 nezid', na' chon' ka inezi ben'ka' cheenid'
 inezgakile'n.

23 Na'ch biyechje' bwie' ben'ka'
 nakgake'ne' txen, chi'e legake':

—Chakomba ben'ka' chle'gakile' diika'
 chle'ile naa. 24 Nia' le' ka', la' zan ben'ka'
 wdixjee daa goll Chioza' legake' na' zan
 ben' wñabia'ka' goklall'gake' ile'gakile'
 diiki chle'ile naa, na' bi ble'gakile'n. Gok-
 lall'gake' yengakile' dga chenile naa, na'
 bi bengakile'n.

To ben' Samaria bene' to dii wen

²⁵ Na'ch wbig' to ben' chli' chsedi leya' wñabile' Jesúza' kwenchezə inezile' shi wak yillii Jesúza' xtilleena', na' wñabile'ne':

—Maestro, ¿bin chiya' gon' kwenche gat' to yel' mban cha' zejli kani?

²⁶ Na'ch che' Jesúza'ne':

—¿Bin na leya' chiya' goncho? ¿Bi na daa chlabo'?

²⁷ Na'ch beena' chli' chsedi leya' chi'e:

—“Chiya' gakicho Xancho Chioza' do yich' do lall'cho, do ka nak fuerz chechona', na' axt ga zeelo chajniicho; na' gaki bish' ljjwellcho ka chaki kwinchó.”

²⁸ Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kani.

²⁹ Na' beena' bi goklall' wñit kwine', na'ch chi'ene':

—¿Noran bish' ljjwell'?

³⁰ Na'ch che' Jesúza'ne':

—To ben' ziyoe' nez daa ziza' Jerusaléna' daa ziyaj Jericóla, na' bchej wbanka' tneza' wlangake' yog'te diika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'.

³¹ Na' shintk gok ka' ka wde to bxo'z lo neza'. Na' ka ble'ile' beena' de na', to wdeze' ka'lə. ³² Na' lekzka' wde to ben' nake' xiin dia che dii Levína'. Na' ka ble'ile' chto' beena' na', lekzka' to wdeze' ka'lə. ³³ Na' sto ben' Samaria lekzka' zeje' tneza' ka ble'ile' beena' chto' na', na' biyeshile'ne'. ³⁴ Na' jabigüee kwite'na', na'ch blie' lo we'na' set na'ch vino, na' bcheje'n. Na' bilepe'ne' koll' bayix' che'na', bichi'ene' to yoo gana' wdape'ne'. ³⁵ Na' betiyo, ka ba zoa yiza' ben' Samariana', wleje' chop mech

plat*, na' bi'en xan yoona' kwenche gap wwie'ne' zan lla, na' chi'ene': “Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə.” ³⁶ Na' ¿nora ben'ki shon' chakilo' beni bish' ljjwell beena' wlan ben' wbanka'?

³⁷ Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiya' gono'.

Jesúza' jawie' Mártana' na' Maríana'

³⁸ Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'. ³⁹ Na' zoa to ben' bil Mártana' lie' María, na' Maríana' wchi'e lao Jesúza' chzenague' dillaa cho'e. ⁴⁰ Na' Mártana', dechga daa gone' na' wzeche' wneyi cheyin, na'ch wyaje' kwit Jesúza', chi'ene':

—Xan', goll-lat' ben' bila'ni gaklene' nad'. Toz' ndakw' yog' mandadka'.

⁴¹ Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'. ⁴² Per toz daa de nakan dii llialloch na' Maríani ba wleje'n, na' kono' gak yikaan lawe'na'.

Bli' Jesúza' nak we'llwillgake' Chioza'

(Mt. 6:9-15; 7:7-11)

11 Shlin choe'llwill Jesúza' Chioza' to latj, na' ka biyoll be'llwille'ne', to beena' nake'ne' txen golle'ne':

—Xan', bli'yi neto' nakan chiya' we'llwillnto' Chioza', ka ben Juanna' bli' bsdile' ben'ka' bengake'ne' txen.

² Na'ch che' Jesúza' legake':

—Kat' we'llwill-le Chioza' kin inale: Xanto' Chios, ben' zoa yaba, we'la'oshga yog'lol ben' li'. Na' inabia'gacho' loo yichjlall'do' yog'lol ben'

*10:35 Mech plat: dill' griegona' nan denario, na' nakan to mech dii zak' che shlla llin.

kwenche gak lo yell-lioni ka chazlalloo,
kon ka chak yabana'.

³ Ka nak daa chono' cheej chaonto' yog'
lla, bengachan naanlla.

⁴ Wxi'xen chento', ka chon neto'
chzi'xennto' bittezə dii choni ben'
neto'.

Bi we'gacho' latj ibixnto' gonnto' daa bi
nak wen, san bislagach neto' lo ni'a
na' dii mala'.

⁵ Na'ch che' Jesúza' legake':

—Inatezcho shi zoa to ben' nllaguile
na' do chel shajle lille'na' na' ye'lene':
“Ben' bish'dawaa, ben' shloll nad' shon
yetxtil, ⁶la' ba bla' lilla'na' to ben' nllaguid',
zee zit', na' bikzə bi de cha' wshabidee.”
⁷ Na'ch beena' yoo loolə lii inatie' le':
“Bi gonzilo' nad' zed, ba nsejl' lillii na'
ba delen' bi' cha'ki. Aga wak chas' gon'
daa chyalljilo'.” ⁸ Na' nia' le', la'kzi
nllagteile'ne', bi chase' wi'ene' daa
chnabile'ne'. San shi seyide' inabe'n,
chen ki cheenile' chase' wi'e yog' daa
chyalljile. ⁹ Daan nia' le': Li inabi
Chioza' bin cheenile na' gone'n. Li
yiyiljan na' willelkzilen. Li wtankw
lee puerta', na' wsaljke'n. ¹⁰ La' beena'
chnabile' to bi chnabile' ben', cho'ene'n;
na' beena' chiyilje' bi chiyilje', chil-
lelkzile'n; na' beena' chtankwe' to lee
puert, na' chsaljkzgake'n.

¹¹ Ka chak chele le' nakle ben' chis-
gol chischoo bi'do', ka inabi xiinlena'
le' yetxtila', aga we'leb' to yaj. Wa shi
inabib' le' to bej gaob', aga we'leb' to bej
znia. ¹² Wa shi inabib' le' to lit gaob',
aga we'leb' to bexjoni'. ¹³ Le' naktele ben'
mal, chak we'le xiinleka' daa nak dii
wen. iNa' Xacho Chioza' zoa yabana'
nakteche' ben' wench! Na' wi'e Espíritu
Santo che'na' soe' loo yichjlall'do' yog'
ben' inabe'ne'.

**Nagake' Jesúza' chibeje' dii xiw'ka'
kon yel' wak che Bezlona'**

(Mt. 12:22-30; Mr. 3:19-27)

¹⁴ Jesúza' chibeje' to dii xiw' yoo to
ben' bi chak inie', na' ka bichejan na'ch
gok binie'. Na' ben'ka' lle' na', bibangak-
ile' daa bene'. ¹⁵ Na' bale' che'gake':

—Kon yel' wak che Bezlona', daa
chnabia' dii xiw'kan', chibeji beeni dii
xiw'ka'.

¹⁶ Na' zi bale' wñabgakile'ne' gone' to
yel' wak dii ile'gakile' kwenche wli'n
shi Chioza'kzan bseleene'. ¹⁷ Na' ba ne-
zli Jesúza' daa chza'lall'gake', na'ch chi'e
legake':

—Shi ben'ka' lle' to yell gagkake' cho-
plə na' til-len ljwellgake', na' kwiayi'
yella', shi naa. Na' lekzka' shi ben'ka' lle'
toz yoo til-len ljwellgake', aga ssha soa-
gake' toz. ¹⁸ Na' ka'kzə Satanáza' na' dii
xiw'ka' yoo lo na'yin, shi gagkakan cho-
plə na' kwiayi' yel' wñabia' cheyinna'.
Nia' le' ka' daa nale yel' wak che Be-
zlonan'† chibejid' dii xiw'ka' yoo ben'.
¹⁹ Shi chibej' dii xiwaa yoo ben' kon yel'
wak che Bezlona',‡ ¿sheralə ben'ka' nakle
txen? ¿Ale'kzka' lennan' chibejlengake'
dii xiwaa yoo ben'? Daa bi nakan ka',
chli'n nakllejilen. ²⁰ Na' daa chibej' dii xi-
waa yoo ben' kon yel' wak che Chioza',
lennan' chli'n ba bla' yel' wñabia' che
Chioza' ladjleni.

²¹ Kat' to ben' wal nape' dii gonile' znia
na' chape' lille'na', aga no gak lltoyo dii
de che'. ²² Per shi illin sto ben' walch til-
lene'ne', na' gone'ne' gan, na'ch yigoyoe'
yog' daa none' lez wñiaile', na' kwantie'
yog' daa yoo loo lille'na' na' wi'e lat' wej
che ben'ka' nakgake'ne' txen.

²³ Beena' bi nake' nad' txen, chakzban-
ile' nad'. Na' beena' bi chaklen kwenche

†11:18 Bezlona': lekzannan' Beelzebú de xtil na' nakan sto le Satanáza'.

‡11:19 Bezlona' : lekzannan' Beelzebú de xtil na' nakan sto le Satanáza'.

wzenag ben' cho'a xtil' Chioza', len' chsej
chllone' wzenaggake'n.

**Chillin dii xiwaa sto
shii gana' bichejan**

(Mt. 12:43-45)

²⁴ 'Kat' chichej to dii xiw' dii yoo ben',
na' chjadan ga bibi dekwə na' chyljan
gana' yizi'lalliin. Na' shi bi chllelin gana'
yizi'lalliin na'ch chakin: "Yiyaachkz' dii
yoblə gana' bichejkz'." ²⁵ Na' ka chillinan
gana' bichejan, nakan ka to loo yoo dii
nxi nloa na' nakan xochi. ²⁶ Na'ch chza'n
chjxi'n zi gall dii xiw'ka' daa nakch dii
malch aga ka len, na' yogaan choogakan
beena'. Na' chaktechlə mal che beena'
aga ka gok che' dii nech.

**Chakomba beena' chzenag
cho'a xtil' Chioza'**

²⁷ Na' shlak che' Jesúza' ka', to noolə
zie' ladj ben'ka' lle' na' wnie' zilljə, chi'e:
—iChakomba noola' wxane' li' na'
bwall bxo'pe' li'!

²⁸ Na' che' Jesúza'ne':

—iMbalazch ben'ka' chzenaggake'
cho'a xtil' Chioza' na' chongake' ka nan!

**Ben'ka' bi chajle' che Jesúza'
wnabgake' wli'e to yel' wak**

(Mt. 12:38-42; Mr. 8:12)

²⁹ Na' bdi'a bllagch ben'ka' kwit Jesúza'
na' golle' legake':

—Le' zoale naa, nxinj yichjlall'do'leka'.
Chnabile wliid' le' to yel' wak, na' aga
wliid' le' daa cheenile. Lete ile'ile to dii
nak ka yel' waka' daa ben Chioza' che
dii Jonáza'. ³⁰ Daa gok che Jonáza' bli'n
yel' wak che Chioza' lao ben' Níniveka'.
Kakzə nad', Ben' Bsel' Chioza' Yell-lioni,
wli'a yel' wak che Chioza' laolena', le'
zoale naa. ³¹ Na' llana' wchoglo Chioza'
che ben', na' yiban noola' wnabia' do
lli'lə, na' gawe' xya chele lao Chioza',
le' zoale naa, ine' chiya' sak'zi'le. La'
noola', zit' wal wzee bidzenague' dill'

sin'na' daa be' dii Salomónna', na' nad'
zoa' ni, nak' ben' zak'chi ka dii Sa-
lomónna', na' bi chzenagle cha'. ³² Na'
lekzka' llana' wchoglo Chioza' che ben',
na' yiban ben' Níniveka' na' gaogake' xya
chele lao Chioza', le' zoale naa, inagake'
chiya' sak'zi'le. La' legake' biyaj bileni
saaxya che'ka' ka be'len Jonáza' legake'
cho'a xtil' Chioza', na' nad' zoa' ni, nak'
ben' zak'chi ka dii Jonáza', na' bi chzena-
gle cha'.

**Jalaochona' nakan ka to yi'
che kwerp chechona'**

(Mt. 5:15; 6:22-23)

³³ Na' lekzka' chi'e legake':

—Biga zoa ben' chxene' to kandil na'
chzoe'n to ga ngash' wa wdoseen to
dii wkwashaan len, san chzoe'n sibə
kwenche ile'i ben'ka' sho' loo yoonā'.
³⁴ Jalawo'ka' nakan ka to yi' che kw-
erp cho'na'. Shi jalawo'na' nakan wen,
doxen kwerp cho'na' zoan lo beeni'na'.
San shi bi chle'i jalawo'na', kwerp cho'na'
zoan lo yel cholā'. ³⁵ Na' bsak' wze wneyi
kwenche ki lwaa to' lo beeni'na', tazo' lo
yel cholā'lə. ³⁶ Shi doxen kwerp cho'na'
yoon beeni', na' ni to dii shgasj shchol' bi
yoon, na' ile'ilo' kwaslo' ka chle'ilo' kat'
ze to yi' chzeeni'n doxen.

**Jesúza' chsheshlene' fariseoka'
na' ben'ka' chli' chsedi leya'**

(Mt. 23:1-36; Mr.

12:38-40; Lc. 20:45-47)

³⁷ Na' ka biyoll be' Jesúza' dillaa, na'
bche' to fariseo le' lljtawe' lille'na'. Na'
wyoo Jesúza' lille'na' na' wchi'e cho'a
mesa'. ³⁸ Na' farisewa' bibanile' ka ble'ile'
bi bina' Jesúza' ka yoologake' chongake'
ka zi' gaogake'. ³⁹ Na'ch che' Xancho
Jesúza'ne':

—Le' fariseo nakle ka xig' yeen dii
nyib xise' tcho'a tlawin na' lo'inna' bes-
jan. Chaki ben' le' ben' wen nakle, len
le' chibaile chkaale bi de che ben' na'

chibaile chonle bichlə dii mal. ⁴⁰¡Le' ben' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjlall'do'choni? ⁴¹Li izani bi de chele, li we'n ben' bibi de che', na'ch yixi' yiyech yichjlall'do'lena'.

⁴²¡Nyesh'laz gak chele, le' fariseo! Choe'le Chioza' lat' wej' no yixwej, no kwanirod na' bichlə yix' kwan dii mbekle. Na' bi chonle daa nak shlichana' bi chakteile' Chioza'. La' daayen'an llialloch gonle per lekzka' bi wsanle kwelje daa chnab Chioza'.

⁴³¡Nyesh'laz gak chele, le' fariseo! Le chibaile kwe'le gana' chbe' ben'ka' zakii gana' chdop chllagcho choe'lwillcho Chioza', na' cheenile yog' ben' kwee le' balaan ga lle' lla' ben'.

⁴⁴¡Nyesh'laz gak chele, daa nakle ben' wxiye! Nakle ka to ba che ben' wet dii bi nla' lawinna' dii bi chle'i ben' na' chaj chdegake' lawinna', ni bi chakbe'gakile' bin naki loolə.

⁴⁵Na'ch to beena' chli' chsedi leya' golle' Jesúsza':

—Maestro, daa no' ka' len neto' chzoazi'yoo.

⁴⁶Na' goll Jesúsza':

—¡Lekzka' nyesh'laz gak chele, le' chli' chsedile leya'! Dii zan dii che'le ben' chiyal' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche' gakenle legake'.

⁴⁷¡Nyesh'laz gak chele! Le' chonshao'zle cho'a ba che dii ben'ka' wdixjee daa goll Chioza' legake', ben'ka' bet dii xozxto'leka'. ⁴⁸Na' daa chonle ka' zejín chonle txen dii xozxto'leka' ka nak daa bengake'. La' legaken' betgake' ben'ka', na' le' chonshao'le cho'a ba che'ka'.

⁴⁹Na' daan, lo yel' sin' che Chioza' wne': “Wselaa ben' chixjee daa yepée na' len ben' wi'e cho'a xtilaana', na' bale'

witgake' na' zi bale' biya dii gongakile'ne'.” ⁵⁰Na' le' zoale naa, lenle ile'ile ka yel' zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxe wzil yell-lioni. ⁵¹Le' zoale naa, lenle chido!le sak'zi'le ni che yel' wit che dii Abela' axt dii Zacariaza', beena' betgake' cho'a yoodo'na' kwit gana' chzeygake' bayix'ka'.

⁵²¡Nyesh'laz gak chele, le' chli' chsedile leya'! La' nazle chsedile ben' che Chioza', per ni le' bi cheenile wzenagle daa nan, na' chllontele shajnni ben'ka' chzenagan.

⁵³Na' ka goll Jesúsza' ka', ben'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wñabgakile'ne' chiya dii nak lallj, ⁵⁴goklall'gake' we' Jesúsza' dill' dii wchixa'n le'.

Dill' wxiye' che fariseoka' zaklebin lewadúrana'

12 Na'ch bdop bllag ben' zan illebb gana' zoa Jesúsza' axt chdakw ljjwellgake', na' wzoloe' zigaate be'lene' ben'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi lewadúrana'. ²La' daa kono nezi naa, wllin lla inezi beñaan, na' yog'lo! daa ngash' naa, wllin lla ila' lawin. ³Na' yog' daa chakile kono beni daa wnale, wllin lla inezgakile'n. Na' daa wnale ka yoole loolə nsejshoshle yoonaa, axt gosya'i ben' wzie'n dill'.

Beena' chiyal' illebbcho

(Mt. 10:26-31)

⁴Le' nllaguid', nia' le' bi illeble ben'ka' witgake' le', la' kachokzan zeelo gak gongakile' le'. ⁵Per ni inia' le' non chiyal' illeble: li illebb Chioza', la' ka yiyoll yikee yel' mban chelena' lekzka' nape' yel'

^{11:42} Lat' wej: literalmente la décima parte.

wñabia' wzalee le' lo yi' gabiła'. Len', li illeb.

⁶'Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'. ⁷Na' ka'kzə le', axt to to yish' yichjlēna' mbab. Na' bi illeble, la' zak'chle aga ka zan byindo'ka'.

**Ben'ka' chchebgake'
nagake' Cristona' txen**

(Mt. 10:32-33; 12:32; 10:19-20)

⁸'Na' nia' le', beena' wcheb lao ben' nake' nad' txen, lekzka' nad', Ben' Bsel' Chioza' Yell-lioni, wi'a dill' lao yog'lol anjl che Chioza', yepgakee beeni nake' nad' txen. ⁹San beena' bi wcheb nake' nad' txen, lekzka' nad', wi'a dill' lao yog'lol anjl che Chioza', yepgakee beeni bi nake' nad' txen.

¹⁰'Na' beena' biz gon ina cha', nad', Ben' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

¹¹'Kat' ljwa'gake' le' lao ben'ka' chñabia' gana' chdop chllagcho choe'lwill-cho Chioza', wa lao ben' chchogbia' che ben' wa lao joschis, bi sele wneyi naklə yilliile cho'a xtill' ben'ka' wa bin inale. ¹²La' kat' inele, Espíritu Sántona'kzan wzajniile' le' daa chiyal' inale.

Dii nxolla' nsa' yel' wni'ana'

¹³Na' ladj ben'ka' ndop nllag wne to ben', golle' Jesúza':

—Maestro, gollgach ben' bishaana' gone' daa chidol' ikaa che dii xanto'na'.

¹⁴Na' che' Jesúza'ne':

—¿Nora bzoa nad' ladjleni ka to ben' chon yel' joschis che ben' wa ben' chłaa bi dii de che ben'?

¹⁵Na' lekzka' chi'e:

—Li wsak' kwenche bi selall'le gat'ch bi gat' chele, la' aga dii kan' llialo lo yel' mban chelena'.

¹⁶Na'ch bzoe' to jempl, chi'e legake':

—Wzoa to ben' wni'a na' dii zan bizi' bilape' lo yell-lío che'na'. ¹⁷Na'ch chak-ile': “¿Nakra ka gona'n naa? Biga de kooshawaa dga bizi' bilap'.” ¹⁸Na'ch wne': “Ba nezid' bi gon'. Yichinj' yoona' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichlə dii de cha'.” ¹⁹Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz.” ²⁰Na' goll Chioza'ne': “Li', ben' bi nteyi, naanlle' gueto' na' daa ngoosha-woo, nola cheyi gakan.” ²¹Kan' gak che beena' chtop chshag yel' wni'ana', na' bibi zakee lao Chioza'.

Chioza' chap chwie' ben'ka' nak xiine'

(Mt. 6:25-34)

²²Ka wde dga, Jesúza' golle' ben'ka' nagake'ne' txen:

—Naa nia' le': Bi sele wneyi che daa yeej gaole, ni bi sele wneyi che xalaan-lēna'. ²³La' zak'techlə yel' mban chelēna' aga ka daa yeej gaole, na' zak'tech xkwerplēna' aga ka xalaanlēna'. ²⁴Li wwiakachi bechjka', la'kzi bi chaz chaangakb na' bibi chizi' chilapgakb, ni bi zoa ga chgooshaogakb dii gaogakb, len chweej chwaokz Chioza' legakb. Na' le', naa, zak'techle aga ka bado'ka' ze lo llazə. ²⁵Ni tole bi gak yischoochle yel' mban chelēna' ni zi tgor la'kzi nall inlleb selen wneyi. ²⁶Shi dga nak diido'zə bi chak gonlen, ¿berache zezle wneyi che bichlə dii yoblə?

²⁷Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ²⁸Shi Chioza' none' xochi yejdo'ka' ze lyixaa, la'kzi xtitchgan mbanan na'ch wtop ben' len wlli'en lo yi'na', ¿alechlin ki gone' chele, la'kzi bitek chajle'le gaklēne' le'? ²⁹Na' daan bi setekle wneyi ga sa' daa yeej gaole.

³⁰La' ben'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen. ³¹Li se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

³²'Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. ³³Li wit' wde bi de chele, na' li gaken ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. ³⁴Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúza'

³⁵⁻³⁶Na' lekzka' chi'e legake':

—Li gaktō ka wen llinka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n. ³⁷Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'. ³⁸Chakomba ben'ka' chbezgake' yillin xane'ka' la'kzi yilline' do chel wa do zbalzə. ³⁹Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. ⁴⁰Ka'kzan le' chiyal' sele wneyi toshiizi kwezle nad', Ben' Bsel' Chioza' Yell-lioni, la' tokonganzə yiyed'.

Wen llinna' chon wen na' beena' bi chon wen

(Mt. 24:45-51)

⁴¹Na'ch wñabi Pédrona' Jesúza', chi'ene':

—Xan', ¿ato neto'zan no' ka', anti che yog' benaan no' ka'?

⁴²Na'ch goll Xancho Jesúza':

—¿Nakra chakile chon to wen llin wen, ben' nezi nak gone' llinna', shi xane'na' gone' lall' nee yog'te ben'ka' zoa loo yoo lille'na' kwenche wweej wwawe' legake' gor cheyin? ⁴³Chakomba wen llinna' chilalile' chone' daa nak lall' nee ka yillin xane'na'. ⁴⁴Dii li nia' le', xane'na' gone' lall' nee yog'lo! dii de che'. ⁴⁵Na' shi wen llinna' gakile': “Akza naa yila xan'na'”, na'ch soloe' gonile' zban wen llinka' sto, ka nool ka ben' byo, na' soloe' yeej gawe' na' sollile'. ⁴⁶Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che ben'ka' bi chongake' daa chiyal' gongake'.

⁴⁷'Ben' wen llinna' nezi bin cheeni xane'na' gone', na' bi chone'n ni bi zie'n wneyi, na' wit' chinchga xane'na' le'. ⁴⁸Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lo!te diika' bene' lall' nee.

Gak ben' choplə ni che Jesúza'

(Mt. 10:34-36)

⁴⁹'Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ninan. ⁵⁰Biya dii yen ile'id', na' le ba chakyeshid' axt ni illini llana'. ⁵¹¿Achakile bid' yell-lioni kwenche gon' ka soalen ljwell ben' mbalaz? Aga kan', san daa bid' illaa ljwellgake' na' gaggake' choplə. ⁵²La' naa, shi to yoo lle' gayee, na' gaggake' choplə, shone' til-lengake' ben'ka' chop, na' ben'ka' zi chop til-lengake' ben'ka' zi shonə. ⁵³Xa bi' byona' til-lene'b', na' leb' til-lem' xabaa. Na' xna' bi' noola' til-lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

**Bi chajni'gakile'
bi zejın daa chon Jesúza'**

(Mt. 16:1-4; Mr. 8:11-13)

⁵⁴Na' lekzka' che' Jesúza' ben'ka' lle' na':

—Kat' chle'ile ziza' beja' gana' chxoalə wbillə, lii natele: “Wakə yeja’”, na' kayen' chak. ⁵⁵Na' kat' chde be'na' daa za' lli'lə, na' nale: “Le zey'chga yizak’”, na' kayen' chak. ⁵⁶Le' ben' wxiye! Kat' chle'ile bin chak xan yabana' na' lo yell-lioni nezile beran gak. ¿Bi'che bi chakbe'ile bin zeji daa chon Chioza' llaki zoacho naa?

**Chiya! yiyoe'xencho
ben'ka' chao xya checho**

(Mt. 5:25-26)

⁵⁷¿Bi'che ki chiyil'je to kwinzle daa nak dii li dii shao'? ⁵⁸Shi no chao xya chele na' wchi'e le' lao jos'chiska', li gon byen yiyoe'xenlene' tneza'. La' shi lljwee le' lao beena' ch'oghbia' che ben', na' le' gone' le' lo na' beena' wseje' le' lillyana'. ⁵⁹Na' nia' le', aga wicheje lillyana' axt ki chixje doxen daa chiya! chixje.

**Chiya! yiyaj yilenicho
dii malka' choncho**

13 Na' lo llana'tezə bllin ba! ben' lao Jesúza' gollgake'ne' ka ben Pilátona' bene' mandad betgake' ba! ben' Galiléaka' ka chitgake' bayix'ka' choe'la'ogake' Chioza'. Na' xchene'ka' biyakan toz kon x'chen bayix'ka' betgake'. ²Na' che' Jesúza' legake':

—¿Achakile ben' Galiléaka' betgake' nakchgake' ben' malch aga ka nochlə ben' wllal' che'ka'? ³Nia' le' bi nakan ka'. Shi le' bi yiyaj yilenile dii malka' chonle, lekzka' yog'le kwiayi'. ⁴Shera ben' Jerusalénka' shin'shonə, ben'ka' wit daa bdakwgake' yoo siba' daa zoa Siloéna', ¿achakile' napchgake' dol' aga ka ben' wllal' che'ka'? ⁵Nia' le' bi nakan

ka'. Na' shi le' bi yiyaj yilenile dii malka' chonle, lekzka' yog'le kwiayi'.

Jempl che yag yixwewa' daa bi wllia

⁶Na'ch bzoa Jesúza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian. ⁷Na'ch chi'e beena' chap yell-lío che'na': “Ba gok shon yiz chid-wia' shi llian yixwewa', na' ni to bibi chbian. B'choghchoklan, la' n'lanchozkan yell-lioni.” ⁸Na' beena' chape' yell-lío che'na' chi'e: “Xan', zi' zoashkin zi twiz na' w'cheen' xaninna' na' wllan' ben'na'. ⁹Shera shicholə wbian. Na' shi bi wlliakzan, na' w'chogon'.”

**Biyon Jesúza' to noolə llana'
chombaən ben' Israelka'**

¹⁰Na' to lla sabd, llana' chombaən ben' Israelka', chli' chsedi Jesúza' ben'ka' chdop chllag gana' choe'lwilgake' Chioza'. ¹¹Na' len to noolə ba gok shin'shon yiz nlew dii xiwaa le', na' bichkzə gok yizie' shli. ¹²Na' ka ble'i Jesúza'ne' w'nie'ne' na' golle'ne':

—Noolə, ba bikwas yillwe' cho'na'.

¹³Na'ch b'xoa neena' koll' noola' na' katena' lii bizetie' sh'icha, na' wzoloe' choe'lawee Chioza'. ¹⁴Na' beena' chgoo x'nezi cheyi diika' chongake' gana' chdop chllaggake' bllée daa biyon Jesúza' noola' llana' chombaəngake', na'ch chi'e ben'ka' lle' na':

—De xop lla goncho llinna', na' bit-tezə llaka' yidle kwen'che yiyakile, na' bi gonle lez yiyakile' llani chombaəncho.

¹⁵Na'ch che' Xancho Jesúza' legake':

—Le' ben' wxiye', ¿abi wsell-le goon cheleka' wa burr cheleka' lljaweejle-gakb nisa' llani chombaəncho? ¹⁶Nooli nake' xiin' dia che dii Abrahama', na' ba gok shin'shon yiz Satanáza' daa ch'nabia' dii xiw'ka' nonan le' ka ben' n'cheje'.

¿Ana' chakile bi nakan wen biyonee llani chombaanchō?

¹⁷ Na' ka goll Jesúza' ka', yog' ben'ka' chakzbangakile'ne' biyii bido'gakile', na' yog' ben'ka' sto bibagakile' daa ble'gakile' yel' wakka' chone'.

Jempl che sa mostásana'

(Mt. 13:31-32; Mr. 4:30-32)

¹⁸ Na'ch wna Jesúza':

—¿Nakra ka nak yel' wñabia' che Chioza', lla? Na' ¿bera ka wsaklebida'n?

¹⁹ Zaklebin sa mostásana' daa goz to ben' lo yell-lío che'na', na' ka bla'n na' bgolan gokan to yag xen na' axt byindo'ka' ben lillbka' lo xoziiinna'.

Jempl che levadúrana'

(Mt. 13:33)

²⁰ Na' lekzka' chize' Jesúza':

—Dga sto wsaklebida'n yel' wñabia' che Chioza'. ²¹ Zaklebin levadúrana' daa chchix to noolə shōna rob yezj kwenche yisgolan kwa che yetxtila'.

Chiyal' sho'cho puertdo'naz

(Mt. 7:13-14, 21-23)

²² Shlak ziyaj Jesúza' Jerusalénna', bi-die' yell yel'ka' na' yelldo'ka' na' bli' bsdile' ben'. ²³ Na' bchej to ben' wñabile'ne', chi'ene':

—Maestro, ¿ato chopchga ben' yila bi kwiayi'gake'?

Na'ch che' Jesúza'ne':

²⁴ —Li gon byen sho'le cho'a puert daa nak diido'zə kwenche soalenle Chioza'. La' ben' zan gaklall'gake' sho'gake'n, na' bi gak sho'gake'. ²⁵ Na' ka solla' xan yoonā' wseje' puerta', na' le', igaanle cho'a puerta' wtankwle le'inna' na' ye'lene': "Ben'do', bsaljgach kwenche sho'nto'." Na' xan yoonā' ine' le': "Bi nombi'a le' ni bi nezid' ga ben' le'." ²⁶ Na'ch ye'lene': "Weej wdaolennto' li' txen, na' bli' bsdilo' neto' yell chento'na'." ²⁷ Na'ch ine' le':

"Bi nombi'a le', ni bi nezid' ga ben' le'. Li lljayaak do na'lə yog'lo!-le le' ben' wen dii mal." ²⁸ Na' kwelchgale axt gaōxaxj leylena' daa le gakshejlall'le ka ile'ile dii Abrahamā', dii Isaaca', dii Jacoba' na' yog' dii ben'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole. ²⁹ Na' wde wdeli ben' lle' zbii zkaan yell-lioni yillingake' yabana' gana' chñabia' Chioza' na' kwe'gake' gaogake'. ³⁰ Na' bal ben' bi nak ben' zakii naa gakgake' ben' zakii, na' ben'ka' nak ben' zakii naa bich gakgake' ben' zakii.

Wchell Jesúza' ni che ben' Jerusalénka'

(Mt. 23:37-39)

³¹ Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

³² Na' che' Jesúza' legake':

—Li yiyaj na' li lljayell ben' wxiye'na': "Nin soa' to chop shōn lla kwenche yibej' dii xiw'ka' yoo ben' na' yiyon' ben' bi shao', na' sheelo diika' chon'." ³³ Chonan byen kooch' nez naa, wxē len willj kwenche yiyaa Jerusalénna' gana' chit-gake' ben'ka' chyixjee daa che' Chioza', la' agagan' witgake' legake' gan yoblə.

³⁴ 'iLe' ben' Jerusalén, chitle ben'ka' chiditixjee daa che' Chioza' legake', na' yaja' chitile ben'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'. ³⁵ Li koo yichjle dga inia' le', Chioza' kwej yichje' gani zoale. Na' nia' le', aga wle'chile nad' axt kat'ch illin lla inale: "¿Gaklenshga Xancho Chioza' beeni ba bselee!"

Jesúza' biyone' to ben' yo'e yi

14 To lla sabd, llana' chombaanchō ben' Israelka', wyaj Jesúza' jtawe' lill to fariseo, ben' chñabia', na' fariseoka'

sto china! chinogake'ne'. ²Na' lawe'na' ze to ben' yo'e yi. ³Na'ch Jesúza' wñabile' fariseoka' na' ben'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaanchō, anti bi den?

⁴Na' legake' bikzə bi gollgake'ne'. Na'ch Jesúza' bexee beena' yoo yina' na' biyone'ne', na' golle'ne':

—Wak yiyajo'.

⁵Na'ch chi'e fariseoka':

—Shi to burr chele wa to goon chele ixopb to loo yech to lla chombaanchō, ¿abi yibejleb katena' la'kzi nakan llana' chombaanchō?

⁶Na' bikz bi billet-lall'gake' ye'gake'ne'.

Ben'ka' chaxgake' to ga chak wishagna'

⁷Na' ble'i Jesúza' ka chon ben'ka' wdaolene' lill farisewa', wche'gake' gana' chbe' ben'ka' zakii. Na'ch bseese to jempl, chi'e legake':

⁸—Kat' no gax le' to ga chak wishagna', bi kwe'le gana' chbe' ben'ka' zakii. La' shera shi ila' ben' zak'chi ka le', ⁹na' beena' goxe' le' ine': "Wzolla' kwenche kwe' beeni gani chi'o." Na'ch do chido'zile yizolla'le na' lljache'le xanteyin. ¹⁰Na' bi gonle ka'. San kat' no gax le', chiyal' lljche'le xanteyin kwenche kat' ila' beena' goxe' le' na' ine': "Bish'dawaa, nilə wda kwi'o gani zak'chi." Na' ka' sho'le balaan lao ben'ka' chi'lenle cho'a mesa'. ¹¹La' beena' chon kwine' ben' choo ben' xen, Chioza' gone'ne' ben' bibi zakii; na' beena' chakile' bibi zakee, Chioza' gone'ne' ben' choo ben' xen.

¹²Na' lekzka' che' Jesúza' beena' goxe'ne' lille'na':

—Kat' cheenilo' wwawo' ben', bi gaxo' ben' zoalanzo' wen, no ben' bishoo, no ben' dialla cho', ni no ben' wllill cho', ben' nake' ben' wni'a, la' legake' lekzka' wak yigoogake' wzonna' yiwaogake' li'

ka beno' chegake'. ¹³Aga kan' gono', san byi ben' yesh', ben' net ni'a nee, ben' bi chak sa' wen na' ben' lchol. Ben'kan' chiyal' gaxo', ¹⁴na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' ben' wenka' ladj ben' wetka'.

Jempl che to ben' ben to lñi xen

¹⁵Na' to beena' chi'lene' Jesúza' cho'a mesa', ka benile' wne' ka', na' chi'ene':

—¿Chakomba ben'ka' lljadaogake' gana' chñabia' Chioza'!

¹⁶Na'ch che' Jesúza'ne':

—Wzoa to ben' bene' to lñi xen, na' goxe' ben' zan kwenche shajgake' lille'na' lljtaogake'. ¹⁷Na' ka gol' gaogake', bselee to wen llin che'na' jelle' ben'ka' ba bye': "Li dagach, la' ba gok daa gaocho." ¹⁸Na' yog' ben'ka' janie' wzologake' chche'gake' dill'. Toe' golle'ne': "Zi' bizi'a lat' yell-lío na' chonan byen lljawia'n. Ye'gacho'ne' si'xene' bi gak yid'." ¹⁹Na' beena' sto chi'ene': "Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'." ²⁰Na' beena' sto chi'ene': "Zi' bshagna', na' bi gak yid'." ²¹Na'ch biza' wen llinna' jayelle' xane'na' yog' daa goll ben'ka' le'. Na'ch bllaa xane'na' na' chi'e wen llin che'na': "Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen." ²²Na' ka jasane' ben'ka' jatope', na'ch chi'e xane'na': "Xan', ba ben' ka wno', na' ni dech latj sho' ben'." ²³Na'ch che' xane'na': "Wyaj do yawi nezka' na' ben byen yid ben'ka' yillago' kwenche yilla' loo lilla'ni. ²⁴Na' nia' le', ka nak ben'ka' bya' dii nech, ni toe' bi gaogake' daa ba bsini'a."

Ye'l zak'zi'na' yen ile'icho ni che Jesucristona'

²⁵Ben' zan zjanogake' Jesúza', na'ch biyechje' chi'e legake':

²⁶—Shi nole cheeni gake nad' txen, chiyal' gachile nad' aga ka xaxna'le, xool-le, xiinle, ben' bish'le, ben' zanle, na' axt yel' mban chelena'. Shi bi gake' nad', aga wak gake nad' txen. ²⁷Na' lekzka' beena' bi chzanile' yel' mban che'na', gake bittezə dii gake che', kwenche gone' daa chazlallaa, aga wak gake' nad' txen. ²⁸Shi nole cheenile gonle to yoo sib wal, zigaate chiyal' wwiiale ka'k' gaki na' shi waki xmechlena' sheeloin. ²⁹La' shi ba wlekwle leninna' na' tena' bich bi de wzeeloilen, na' yog' ben'ka' ile'gake' bi biyollan wxillgake' le'. ³⁰Na' inagake': "Kon wdishj beena' len yoonā' na' bi goki xmeche'na' wzeeloe'n." ³¹Na' ka'kz to ben' wñabia', shi cheenile' til-lene' sto wñabia' yoblə, na' lekzka' chiyal' wsakee shi wzoi shi mil ben'ka' nape' til-lengake' beena' nap galja mil ben'. ³²Na' shi gake'ile' bi soi ben'ka' nape', na' zi' illinlə ben' wñabia'na' sto, wselee to chop ben' lljellgake'ne': "Bizə tilcho." ³³Na' ka' le', shi bi choonlall'le yog' dii de chele, aga wakə gake nad' txen.

Kat' bich xzi' zedaa

(Mt. 5:13; Mr. 9:50)

³⁴Zedaa nakan dii wen, na' shi bich xzi'n aga wakch yiyonchon xzi' dii yoblə kwenche wchinchon. ³⁵Ni bi gake wchinchon lwaa ben', san choonchon. Na' le' chenile dga nia', li sen wneyi.

Jempl che xilaa wnit

(Mt. 18:10-14)

15 Yog' ben' wixhixjka' na' ben' saaxyaka' jabig'gake' kwit Jesúza' kwenche bzenaggake' dillaa cho'e. ²Na' fariseoka' na' ben'ka' chli' chsedi leya' wzologake' biz chon chnagake' che Jesúza', che'gake':

—Chlebtezə beeni ben' saaxyaka' na' chaolenteze' legake'.

³Na'ch bzoa Jesúza' to jempl, golle' legake':

⁴—Shi tole naple to guiyoa xil' na' nit tob, na' wkwaanle baka' taplalj twalj lyixaa na' lljadiljle bana' wnit, na' axt kon ka yillelb gonle. ⁵Na' ka yillelb, yibaile yixoaleb yaaxizlena'. ⁶Na' ka yillinle lill-lena' wtope ben'ka' nllaguile na' ben' wlill cheleka', na' ye'le legake': "Li yibaleni nad', la' ba billeg xil' cha'na' bana' wnit." ⁷Na' nia' le', ka'kzan chibayi Chioza' len anjl che'ka' yabana' kat' to ben' wen dii mal chiyajile' saaxya che'na' aga ka taplalj twalj ben'ka' bi chonan byen yiyajgake'.

Jempl che mecha' wnit

⁸Wa shi to noolə de shi mech plat che' na' nit ton, na' wxene' yi' che'na' na' wlo'e' loo lille'na' na' yiyilje'n axt ki yillelile'n. ⁹Na' ka yillelile'n na' wtope' noolka' nllaguile' na' ben' wlill che'ka', na' yee legake': "Li yibaleni nad', la' ba billeg mech cha'na' daa wnit." ¹⁰Na' nia' le', ka'kzan chibayi Chioza' len anjl che'ka' kat' chiyaj chileni to ben' saaxya.

Jempl che bi'na' benditj xmech xabaa

¹¹Na' lekzka' che' Jesúza' legake':

—To ben' wzoa chop xiine', ¹²na' bi' neshaa gollb' xabaa: "Xa, blaā daa de cho' na' ben' nad' daa chiyal' ikaa." Na'ch blaā xabaa daa de che' na' bi'en legakb'. ¹³Na' aga wlla, biyit' bide bi' neshaa daa bi'eb', na' mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. ¹⁴Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'. ¹⁵Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nlllee kushka' kwenche jtapb' legakb'. ¹⁶Na' daa le' chdom' goklall'b' gaob' daa chao kushka', na' ni len bi be'gake'b'. ¹⁷Na' gokib': "Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni. ¹⁸Ba ziyaaachoklə kwit

xa'na' na' yepee: Xadawaa, ba bxinj' blen' lao Chioza' na' lawo'na'.¹⁹ Bich chidolaa gak' xiino', san beni nad' ka nottezə wen llin cho'ki." ²⁰ Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zedoe' jatile'b' na' wdeleb' na' bnope'b'.²¹ Na'ch che'b' xabaa: "Xadawaa, ba bxinj' blen' lao Chioza' na' lawo'na', bich chidolaa gak' xiino'." ²² Na' xabaa chi'e wen llin che'ka': "Lobe'zə li lljlej tgot lech' daa liizelozi nakch na' li wwak-wba'n, na' lekzka' li wllin to niy xbe-maa na' li wllin yel ni'abaa. ²³ Na' li lljxi' me'do'na' mbejchlawin, li witb kwenche gaochob na' goncho to lni, ²⁴ la' xiindawaaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengage' lnina'.

²⁵ Na' ka wzolo lnina', xiine' bi' necha' chdab' lyixaa. Na' ka billim' gaozə lillbaa, benib' chkwel' wikwellka' na' chakte wiyaana'. ²⁶ Na'ch wneb' to wen llinka' na' wñabibee bin chak lillbaa. ²⁷ Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'." ²⁸ Na' xiine' bi' necha' bllaab' na' bi goonib' yiyoob'. Na'ch bchej xabaa got'yoile'b' kwenche yiyoob'. ²⁹ Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtillona'. Na' bigan' gono' nad' la'ch' to shibdo' kwenche wit'b yeej gaolem' bi'ka' nllaguid'. ³⁰ Na' naa bila' xiino'ni biyit' bideb' yog' daa bi'ob' na' benditj' xmecho'na' kon noolə wdaka', na' ba betzo' me'do'na', bana' le nak, ni cheb'." ³¹ Na'ch che' xabaa: "Xiindawaa, li' zoaleno' nad' toshiizi, na' yog' bi' de cha' chekzo' daa. ³² Per chonan byen naa yibaicho na' goncho lnini, la' ba bila' bi'

bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

Jempl che wen llinna', beena' benditj daa de che xane'na'

16 Na' lekzka' goll Jesúsza' ben'ka' nakgake'ne' t xen:

—Wzoa to ben' wni'a nape' to wen llin che', na' bene' lo nee yog' dii de che'. Na' wyaj bal' ben' jellgake'ne': "Le chonditj beena' daa beno' lo nee." ² Na'ch wne xane'na' le', chi'ene': "Ba benid' ka nage' chono', na' chiya' yidio' kwent di-ika' ngoo lo no', la' bich gon' xshino'na'." ³ Na'ch chaki wen llinna': "¿Nakra gona'n naa, bich gon' xan'na' llinna' gon'? Bi soid' gon' llin wal, na' chido'id' yep' ben' yiyesh'gakile' nad' gongake' lat' wej xmech'. ⁴ Ba nezid' nak gon' kwenche wleb' ben' nad' lille'ka' kat' bich gat' llin cha'na'." ⁵ Na'ch goxe' to to ben'ka' chal'gake' che xane'na', na' ben' necha' wñabile'ne', chi'ene': "¿Ka'k' chaloo che xan'na'?" ⁶ Na' beena' chi'e: "Chalaa to guiyoa medid[§] set." Na'ch chi'ene': "Ni de yisha', lobe'zə wche' na' bda'n shiyonzannan' chaloo." ⁷ Na' ka wde, wñabile' beena' sto, chi'ene': "¿Shera li? ¿Ka'k' chaloo?" Na' beena' chi'ene': "Chalaa to guiyoa gush trigo." Na'ch chi'ene': "Ni de yisha' na' bda'n taplalj gushzannan' chaloo." ⁸ Na' xan'na' wen llinna' be'lawee wen llin mal che'na' daa biyiljallee naklan gone'n. La' ben'ka' zech wneyi che daa chak lo yell-lioni, chiyiljal'ch'gake' nak soalen ljwellgake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlal'do'eka'.

⁹ Na' nia' le', li wchin yel' shawaa de chele yell-lioni kwenche gakenle ben', na' kat' ba wde che yel' shawaa, Chioza' wlebe' le' soalenlene' zejli kani.

[§]16:6 Medid: to to medidki gokan ka do 37 litr.

¹⁰'Na' beena' chon ka chiyaḷ' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiyaḷ' kon daa nak lall' nee, ka'kzə gone' shi bitekchlə dii xench koo lall' nee. ¹¹Shi bi chonle ka chiyaḷ' kon yel' shawaa de yell-lioni, bi gonzle lez ikaale yel' shawaa de yabana'. ¹²Na' shi bi chonle ka chiyaḷ' kon yel' shawaa nak lall' na'le yell-lioni, ɔnakra gon Chioza' gone' le' yel' shawaa daa gaki chele?

¹³'Aga ga zoa to ben' wḷane' xshin chop ben', la' wakzbanile' beena' to, na' gakhile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

¹⁴Na' fariseoka' le chzelall'gake' mecha', na' ka bengakile' dillaa choe' Jesúza', bxillgakile'ne'. ¹⁵Na'ch che' Jesúza' legake':

—La'kzi nale nakle ben' wen, Chioza' nezile' nakan nak yichjlall'do'lena'. La' daa chaki ben' yell-lioni nakan dii llialote, leyen'lannan' chakzbani Chioza'.

Leya' na' yel' wḷabia' che Chioza'

¹⁶Na' lekzka' che' Jesúza':

—Leya' na' daa bli' bsemi dii ben'ka' wdixjee daa goll Chioza' legake', legakannan' wḷabia'gakan axt ka bllin lla bid Juanna'. Na' ka bid Juanna', wzolo chzenag ben' dill' wen dill' kob che yel' wḷabia' che Chioza', na' chongake' to dii byen kwenche inabi'e loo yichjlall'do'eka'.

¹⁷'Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

Bi chiyaḷ' yilaa ben'ka' nshagna'

(Mt. 19:1-12; Mr. 10:1-12)

¹⁸'Shi to ben' byo yilee xoolle'na' na' yi-kee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa ben'

che'na' le', lekzka' chone' ka chon beena' zoalente nool che'na' na' chdalene' noolə yoblə.

Ben' wni'ana' na' Lázaron'a'

¹⁹Na' chize' Jesúza' ben'ka':

—Wzoa to ben' wni'a na' chakwe' shgal' lech' dii wen na' yog' lla chaoshawe'. ²⁰Na' lekzka' wzoa to ben' yesh' wlie' Lázaro, na' lli'a we'na' doxen kwerp che'na'. Na' tlizi chjchi'e cho'a yoo che ben' wni'ana', ²¹gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llie'. ²²Na' bllin lla wit ben' yeshaa, na' bi'che' anjl che Chioza'ne' kwenche jazoalene' dii Abrahama'. Na' lekzka' wit ben' wni'ana' na' bkwash'gake'ne'. ²³Na' dii ben' wni'ana' chdezi'chgue' gana' lle' ben' wetka', na' blis jalawe'na' na' zit'lə ble'ile' dii Lázaron'a' chi'e kwit dii Abrahama'. ²⁴Na'ch wnie' zilljə chi'e: "Xadawaa Abraham, biyesh'gachi nad' na' bsel' Lázaron'a' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni." ²⁵Na' Abrahama' chi'ene': "Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o. ²⁶Na' ziznakan sto, ze to bdiinj xen gcholi, na' aga wak te ben'ki yidgake' gana' lle'le, na' ben'ka' lle' na' aga wak tegake' yidgake' gani zoanto'." ²⁷Na'ch che' ben' wni'ana'ne': "Chnabid' li' shka', xadawaa Abraham, ben goklen bsel'gach Lázaron'a' lill xa'na' ²⁸gana' zoa zi gay' ben' bishaaka', lljelene' legake' dill' kwenche bi lengake' yiyedgake' gani de yel' zak'zi'ni." ²⁹Na' Abrahama' chi'ene': "Napkgake' daa bzej dii Moiséza' na' daa bzej dii ben'ka' wdixjee daa goll Chioza'. jNa' chiyaḷ' wzenaggake'n!" ³⁰Na' che' ben' wni'ana'ne': "Aga wakan, xadawaa Abraham, san shel' to ben' ba wit

yibane' na' yiyaje' lljaye'lene' legake' dill', na' wiyaj wilengakile' saaxya che'ka'." ³¹ Na' che' Abrahamane': "Shi bi chzenaggake' daa bzej dii Moiséza' na' daa bzej dii ben'ka' wdixjee daa goll Chioza', lekzka' aga wyajle'gake' la'kzi yiban to ben' wet."

**Bi goncho ka ixop ben'
yoblə gone' dii mala'**

(Mt. 18:6-7, 21-22; Mr. 9:42)

17 Na'ch che' Jesúza' ben'ka' nakkage'ne' txen:

—Bia'kzə de dii gon ka ixop ben' gone' dii mala', per jnyesh'laz gak che beena' wchixə' ben' yoblə gone' dii mala'! ² Wenlan shel' wwal'gake' yene'na' to yaj che molin na' lljaza'gake'ne' loo nisdona' aga ka daa wchixə' to ben'ki chajle'gake' cha'. ³ Daan, li wsak'.

'Shi to bish' ljjwell-le gone' mal chele, li wsheshlene', na' shi yiyajile' daa bene' chele, li yizi'xen che'. ⁴ La'kzi axt gall shii shlla gone' bi gone' chele, na' gall shiite inə' le': "Chiyajid' daa ben' cho'", chiyal' yizi'xenle che'.

Daa gak gon to ben' chajle'

⁵ Na'ch goll postlka' Xancho Jesúza':

—Goklen neto' gonllilal'chnto' Chioza'.

⁶ Na'ch che' Xancho Jesúza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': "Blall'shki, na' jsoa loo nisdə' na'lə", na' gon yaga' daa ye'len, shel'ka'.

Daa chiyal' gon to wen llin

⁷ Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': "Biyoo, na' wche' kwenche gawo'." ⁸ Aga we'lene' ka', san ye'l-lene': "Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'." ⁹ Na' ni bi we'lene' yel' choxken daa ba bene' daa che'lene'

gone'. ¹⁰ Lekzka' le', kat' ba biyoll benle yog' daa non Chioza' mandad gonle, chiyal' inale: "Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'."

**Biyon Jesúza' shi ben' chak
yillwe' daa le lepra**

¹¹ Na' shlak zjada Jesúza' Jerusalénna', wdie' gana' ndil' yell-lioka' mbani Samáriana' na' Galileana'. ¹² Na' ka blline' to cho'a yelldo', blesh shi ben' chakgake' yillwe' daa le lepra kwenche lljatilgake'ne', na' de zit'lə wzegake' ¹³ besyaagake' zilljə, che'gake'ne':

—¡Jesús, Maestro, biyesh'lall'gachi neto'!

¹⁴ Na' ka ble'i Jesúza' legake', na' golle':

—Li shaj lao bxozka' kwenche ile'gakile' le'.

Na' shlak zejgake' bigaa yillwe' che'ka'.

¹⁵ Na'ch toe' bibi'e ka gokbe'ile' ba biyak-ile', na'ch axt chosya'ile' choe'lawee Chioza'. ¹⁶ Na' bchek' xibe'na' lao Jesúza' na' bdose' lo yona' kwenche bi'ene' yel' choxken. Na' beena' ben ka' nake' ben' Samaria. ¹⁷ Na'ch che' Jesúza':

—¿Aaga shigaken' biyaki? ¿Garan ben'ka' zi ga? ¹⁸ ¿Atochga ben' zitiin bibi'e choe'lawee Chioza'?

¹⁹ Na'ch che' Jesúza' beena':

—Bizolla' na' biyaj. Ba biyakilo' daa wyajli'o' cha'.

Yel' wñabia' che Chioza'

(Mt. 24:23-28, 36-41)

²⁰ Na'ch wñabi fariseoka' Jesúza' battran solo inabia' Chioza' lo yell-lioni. Na' chi'e legake':

—Ka nak yel' wñabia' che Chioza', aga nakan ka to dii ile'tekzicho. ²¹ Aga no ina: "Ni chñabia' Chioza'", wa "Na' chñabi'e", la' ladljenikzan ba bla' yel' wñabia' che'na'.

²² Na'ch chi'e ben'ka' nakkage'ne' txen:

—Wllin lla kat' gaklall'le la'ch' zi shlla ile'chile inabi'a, nad', Ben' Bsel' Chioza' Yell-lioni, na' aga wle'chile nad'. ²³ Na' ichej ben' ine': "Ni zoe'", wa "Na' zoe'." Na' bi shajle, ni bi gonle ben'ka' txen. ²⁴ La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni. ²⁵ Na' chonan byen zigaate biya daa yen ile'id', na' ben'ki zoa naa wzoagake' nad' ka'lə. ²⁶ Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni. ²⁷ Kana' wzoa dii Noéna', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' bllinte llana' wyoo dii Noéna' loo barkwa'. Na' wzolo chak yejsiwaa yell-lioni axt billa'cha lawinna' nisa', na' blliaiyi'n yog'ləle'. ²⁸ Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'. ²⁹ Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'. ³⁰ Na' ka'kzan gak llana' kat' yiyed', nad', Ben' Bsel' Chioza' Yell-lioni.

³¹ Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetjze' kwenche lljaleje'n. Na' shi to ben' zeje' lyixaa, bi yiya-jze' lille'na'. ³² Li lljadini ka gok che dii xool Lota'. ³³ Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kani.

³⁴ Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan. ³⁵ Na' gana' lle' chop noolə chotgake', toe' yichi'a na' stoe' yigaan. ³⁶ Na' chop ben' byo chongake' llin lyixaa, toe' yichi'a na' beena' sto yigaane'.

³⁷ Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

Jempl che to nool wizeb na' to ben' wen yel' joschis

18 Na' bzoa Jesúza' to jempl kwenche bli' bsdile' legake' bi lljshyagakile' we'llwillgake' Chioza'. ² Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'. ³ Na' yella' wzoa to noolə wizeb na' chajtezi chaje' lawe'na', chi'ene': "Bensha yel' joschis cha'ni." ⁴ Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': "La'kzi bi chall chlleb' Chioza' na' ni bibi chakid' shi bi chiyoolallii ben' ka chon', ⁵ gonch' yel' joschis che nooli kwenche bich yidyem-beguile' nad'."

⁶ Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb Chioza'. ⁷ ¿Achakile Chioza' bi gaklene' ben'ka' ba wleje' nakgake' lall' nee, ben'ka' choe'llwillgake'ne' ka wał ka tella? ¿Awllaile' gaklene' legake'? ⁸ Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch ben' nonlilall' nad' yell-lioni, lla?

Jempl che to fariseo na' to ben' wixhixj

⁹ Na' bzoa Jesúza' sto jempl che ben'ka' chakgakile' nakgake' ben' wen lao Chioza' na' chongakile' ben' yoblə nakzi. Na' wne':

¹⁰ —Chop ben' wyajgake' yoodo'na' kwenche je'llwillgake' Chioza'. Toe' nake' fariseo na' beena' sto nake' ben' wixhixj. ¹¹ Na' farisewa' zie' chshalj chshon che kwine', chi'e: "Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, aga-

gan' kwej yichj' nool cha'na' kwenche soalen' nool yoblə, na' ni bi chon' ka chon ben' wichixji. ¹² Chop shii to xman chzoa' wbas', na' lawi yog' daa chon' gan chbej' daa chidoḷoo ikoo."** ¹³ Na' ben' wichixja', zit'lə wzie' na' ni bi biyaxjile' wliis lawe'na' wwie' yabana', san chballee cho'a lcho'ena' chi'e: "iChios cha', biyesh'gachi nad' daa nak' ben' saaxya!" ¹⁴ Na' nia' le', Chioza' bzenague' che ben' wichixja' na' bizee biyaje' lille'na' ba biyaxxen saaxya che'na'. San bi bzenague' che farisewa'. La' beena' chon kwine' ben' choo ben' xen, Chioza' gone'ne' ben' bibi zakii. Na' beena' chak-ile' bibi zakee, Chioza' gone'ne' ben' choo ben' xen.

Benleey Jesúza' bi'do'ka'

(Mt. 19:13-15; Mr. 10:13-16)

¹⁵ Na' lekzka' ben' zan jwa' bi'do' che'ka' lao Jesúza' kwenche bxoə neena' yichjb'ka' na' wnable' Chioza' gaklene'gakb'. Na' ka ble'i ben'ka' nakgake'ne' txen, bsheshlengake' legake'. ¹⁶ Na' Jesúza' goxe' bi'do'ka', na' chi'e ben'ka' nakgake'ne' txen:

—Li we' latj yid bi'do'ki lawa'ni, bi wl-lonle, la' Chioza' chnabi'e loo yichjlall'do' ben'ka' nak ka legakb'. ¹⁷ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

To ben' zakii ben' nak ben' wni'a be'lene' Jesúza' dill'

(Mt. 19:16-30; Mr. 10:17-31)

¹⁸ To ben' zakii wnable' Jesúza', chi'ene':

—Maestro, li' nako' ben' wen. Wna nad' beran chiya' gon' kwenche gat' to yel' mban cha' zejli kani.

¹⁹ Na'ch che' Jesúza'ne':

—iBerache nazo' nad' ben' wen? Toz Chioza' nake' ben' wen. ²⁰ Ba nezczilo' daa nllia Chioza' bia' goncho: "Bi soaleno' nool bi nak nool cho', bi wito' ben', bi kwano', bi chiljlalloo bizə gon ino' che ben', na' wdap balaan xaxnoo."

²¹ Na'ch che' beena'ne':

—Kana' naktia' bi' xkwid' chon' yog' diika'.

²² Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n ben' yesh'ka'. Na' shi gono' ka', na' gat' to yel' shao' cho' yabana'. Na' da, dino' nad'.

²³ Na' ka beni beena' ka goll Jesúza'ne', le gokyeshile', la' ben' wni'a nlliban'.

²⁴ Na' ka ble'i Jesúza' le gokyeshile', na' chi'e:

—iLallj inleeb chonan che ben' wni'aka' we'gake' latj inabia' Chioza' legake'! ²⁵ Lobe'ch te to kamey xan yeshaa aga ka to ben' wni'a yiyo'e yabana'.

²⁶ Na' ben'ka' beni, gollgake'ne':

—iNoran yila shka'?

²⁷ Na'ch che' Jesúza' legake':

—Daa bi chak gon be'necha', Chioza' chak gone'n.

²⁸ Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

²⁹ Na'ch che' Jesúza' legake':

—Dii li nia' le', nottezə ben' ba bzanile' no lille', no xaxnee, no ben' bishee, no ben' zane', no xiin xooole' kwenche cho'e latj chnabia' Chioza'ne', ³⁰ Chioza'kzə wi'e dii zak'chi che' yell-lioni aga ka di-ika' wlej yichje', na' ka yilline' yabana' wi'ene' to yel' mban zejli kani.

**18:12 Daa chidoḷoo ikoo: literalmente la décima parte.

De wyon shii wdixjee Jesúza' guete'*(Mt. 20:17-19; Mr. 10:32-34)*

³¹ Na'ch wlej Jesúza' ben'ka' shllin ka'lə, ben'ka' nakgake'ne' txen, chi'e legake':

—Dga ziyajcho Jerusalénna' naa, yillinin daa bzej dii ben'ka' wdixjee daa goll Chioza' kani'yi daa gak cha', nad', Ben' Bsel' Chioza' Yell-lioni. ³² La' gongake' nad' lo na' ben'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. ³³ Na' wit chingake' nad' na'tech witgake' nad', na' yiyon lla yiban' ladj ben' wetka'.

³⁴ Na' ben'ka' nakgake'ne' txen ni lat' bi wyajni'gakile' daa golle' legake', na' ni bi wnezgakile' berache chi'e legake' ka', la' daa golle' legake' nakan dii bi gak shajni'gakile'.

Biyon Jesúza' to ben' lchoł yell Jericóna'*(Mt. 20:29-34; Mr. 10:46-52)*

³⁵ Na' ka ba chllin Jesúza' yell Jericóna', na' chi' to ben' lchoł cho'a neza' chnabile' ben' yiyesh'lall'gakile'ne' we'gake' lat' wej xmeche'. ³⁶ Na' ka benile' chde ben' zan na'ch wñabe' bin chak. ³⁷ Na' gollgake'ne':

—Jesús, ben' Nazaretan', chda ni.

³⁸ Na'ch besyee, chi'e:

—¡Jesús, Xiin dia che dii Daví, biyesh'lall'gachi nad'!

³⁹ Na' ben'ka' llialo lao Jesúza' chsheshlengake'ne' kwenche kwi'e llizə, na' zizikchlə chosyee, chi'e:

—¡Xiin dia che dii Daví, biyesh'lall'gachi nad'!

⁴⁰ Na'ch wlez Jesúza' na' bene' mandad lljxi'gake'ne'. Na' ka bllin ben' lchoła' lawe'na' na'ch wñabile'ne':

⁴¹ —¿Beran cheenilo' gon' cho'?

Na'ch che' ben' lchoła'ne':

—Xan', cheenid' ile'id'.

⁴² Na'ch che' Jesúza'ne':

—Daa ba chonllalloo nad' na' ile'ilo'.

⁴³ Na' katena' lii bile'teile', na'ch jano'e' Jesúza' choe'lawee Chioza'. Na' yog' ben'ka' ble'i daa ben Jesúza' be'la'ogake' Chioza'.

Jesúza' na' Zaquewa'

19 Na'ch bllin Jesúza' yell Jericóna' na' wdie' gchoł yella'. ² Na' yella' zoa to ben' wni'a lie' Zaqueo, na' ngoo lall' nee xonj wichixjka'. ³ Na' gok-lallee ile'ile' Jesúza', per bi gok ile'ile'ne' daa nake' ben' bchekwdo' na' daa zejlen Jesúza' ben' zan. ⁴ Na'ch wllialo-doe' lawe'ka' na' wyepe' to lo yag xen kwenche ile'ile'ne' ka tie'. ⁵ Na' ka bllin Jesúza' xan yaga', na' blis lawe'na' chi'ene':

—Zaqueo, btalalloo biyetj, la' lillo'nan' yigaana' naa.

⁶ Na'ch biyetjdo Zaquewa' chibaile' bichi'e Jesúza' lille'na'. ⁷ Na' ka ble'i ben'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill ben' saaxyani, na.

⁸ Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' ben' yesh'ka', na' yog' ben'ka' ba bchixj' dii xench, yiyoe'gakee taplə ka daa ba wlan' chegake'.

⁹ Na'ch che' Jesúza'ne':

—Naaanlla ba bisla Chioza' ben'ki zoa loo yooni kwenche bi kwiayi'gake', daa len Zaquewi nake' xiin dia che dii Abraham'a'. ¹⁰ La' ka nak' nad', Ben' Bsel' Chioza' Yell-lioni, bid' kwenche yiyilj' na' yisla' ben'ka' yoo nez daa wlliaiyn' legake'.

Jempl che beena' bkwaanlen wen llin che'ka' mech

¹¹ Shlak chzenag ben'ka' daa che' Jesúza', bseesile' legake' to jempl, daa ba zoa illine' Jerusalénna' na' legake' gok-

gakile' daa nake' ben' bsel' Chioza' lii solotie' inabi'e. ¹² Na'ch chi'e legake':

—To ben' zakii bcheje' wyaje' to yell zit' wal kwenche' lljalane' yel' wñabia' che lalle'na', na' ka yilline' inabi'e. ¹³ Na' ka zi' see, wñie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mechi, li gonle-nan delgens shlak bi soa'.” ¹⁴ Na' ben' wllal che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche' jellgake'ne': “Bi cheeninto' inabia' beeni neto'.” ¹⁵ Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche' inezile' ka'k' wej ben mecha' gan daa bkwaanlene' to toe'. ¹⁶ Na' ka bllin ben' necha' lawe'na' na' chi'ene': “Xan', xmecho'na' bkwaan'leno' nad' bena'n gan shin.” ¹⁷ Na'ch ben' wñabia'na' chi'ene': “Wenkzan beno'. Daa beno' ka chiyal' kon lat' mecha' bkwaanlen' li', wzoa' li' inabi'o shi yell.” ¹⁸ Na' ka bllin beena' sto lawe'na' na' chi'ene': “Xan', xmecho'na' bkwaan'leno' nad' bena'n gan gayaan.” ¹⁹ Na' lekzka' chi'e beena': “Wzoa' li' inabi'o gay' yell.” ²⁰ Na'ch bllin stoe' lawe'na' na' chi'ene': “Xan', ni de xmecho'na' bkwaan'leno' nad'. Bllal'tipteza'n to lech' na' wlooshawaan ²¹ daa bllib' li', la' le ben' zñia nako'. Chkaatezo' dii bi naki cho', na' chizi' chilaptezo' dii goz goon ben' yoblə.” ²² Na'ch che' ben' wñabia'na' le': “Bikzbi yejni'alallii beno'. Kon ka ba wno' ka'kzan gak cho'. Nezil' nak' ben' zñia, na' chkaatez' dii bi naki cha' na' chizi' chilap' dii goz goon ben' yoblə. ²³ Na' daa nezilo' ka' chon', çberache ki bi'o xmechaa gon yichjin kwenche' yikaan naa ba biyed'?” ²⁴ Na'ch chi'e ben'ka' lle' na': “Li yikaa mecha' daa bi'ane' na' li we'n beena' bene' gan shin.” ²⁵ Na'ch che' ben'ka'ne': “Xan', ba napkzə beena' shin.” ²⁶ Na' che' ben' wñabia'na' legake': “Nia' le', beena' chonlene' llin

daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee lat' yidoyo. ²⁷ Na' ka nak ben'ka' chakzbangakile' nad', ben'ka' bi cheengakile' inabi'a, li lljxi'gake' ni na' li witgake' ile'teid'.”

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

²⁸ Na' ka wde wna Jesúza' ka', na'ch bigoolene' nez ben'ka' nakgake'ne' txen ziyajgake' Jerusalénna'. ²⁹ Na' ka billingake' xñi'a yaa daa le Yaa Olivos, gaozə yellka' le Betfagé na' Betania, na'ch bselee chop ben'ka' nakgake'ne' txen, ³⁰ na' chi'e legake':

—Li shaj yella' llia na', na' ka illinle' ile'ile to burr chbando', ba konon' kwia, da'b yag. Na' wsell-leb wche'leb nilə. ³¹ Na' shi no inaz le': “çBerache chsellzleb?”, na' ye'lene': “Xanchonan' chyalljile'b.”

³² Na'ch wyaj ben'ka' bselee, na' ka bllingake' ble'gakile' to burr chbando' da'b yag, kon kayen' goll Jesúza' legake'. ³³ Na' ka chsellgake' burra' na'ch che' xama' legake':

—çBerache chsell-leb?

³⁴ Na'ch che'gake'ne':

—Xanchonan' chyalljile'b.

³⁵ Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blligake' Jesúza' koll'ba'. ³⁶ Na' shlak zej Jesúza' llie' burra', chshilj xa ben'ka' tlo neza'. ³⁷ Na' ka ba chillingake' gaozə gana' chiyetj nez daa ziza' Yaa Olivoza', yog'lol' ben'ka' nakgake'ne' txen chosyaa-gake' daa chibagakile' na' choe'la'ogake' Chioza' daa ble'gakile' yog' yel' wakka' bene'. ³⁸ Na'ch nagake':

—çGaklenshga Xancho Chioza' beeni ba bselee inabi'e! çLi da, we'la'ocho Chioza' zoa yabana' daa bene' ka zoalen-chone' mbalaz!

³⁹ Na' bal' fariseoka' len ladj ben'ka' no Jesúza', che'gake'ne':

—Maestro, goll ben'ki nakgake' li' txen soagake' llizə.

⁴⁰ Na' che' Jesúza' legake':

—Nia' le', shi ben'ki soagake' llizə, na' yaj kilə solo gosyaagakan we'la'ogakan nad'.

⁴¹ Na' ka billine' gaozə yell Jerusalenna', gokyeshile' ka ble'ile'n na' wchelle' che ben'ka' zoa na'. ⁴² Na' chi'e:

—¡She'l'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile. ⁴³ Wllin lla ila' ben'ka' chakzbangakile' le' na' wzechjgake' yelli leej na' kono gak sho' ichej. ⁴⁴ Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

**Bishesh Jesúza' ben'ka' chit'
chde lesh' chyoodo'na'**

(Mt. 21:12-17; Mr. 11:15-19; Jn 2:13-22)

⁴⁵ Na'ch ka bllin Jesúza' cho'a yoodo'na' na' bisheshe' ben'ka' chit' chde. ⁴⁶ Na' chi'e legake':

—Cho'a Xtill' Chioza' nan: “Lilla'na' nakan ga choe'lwill ben' nad'”, na' le' naa ba nonzlen ka to ga chdop chillag wban.

⁴⁷ Na' yog' lla bli' bsemi Jesúza' ben' gana' zoa yoodo'na', na' bxo'zka' chnabia' na' ben'ka' chli' chsedi leya' na' nochlə ben' wñabia' che ben' Israelka' la'kzi biyiljlall'gake' naklə gongake' kwenche witgake'ne' ⁴⁸ bikzə bi gok gongake', la' yog'zə ben' chibagakile' chzenaggake' dill'ka' cho'e.

Yel' wñabia' che Jesúza'

(Mt. 21:23-27; Mr. 11:27-33)

20 Na' bllin to lla, shlak chli' chsedi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin bxo'zka' chnabia' na' ben'ka' chli' chsedi leya' len ben' golka' chnabia'. ² Na' che'gake'ne':

—Wnashki neto', ¿bi yel' wñabia' napo' chono' diiki? Na' ¿nora ben' li' yel' wñabia'ni?

³ Na'ch che' Jesúza' legake':

—Lekzka' nad' de to dii inabid' le', li inashki nad': ⁴ ¿Noran bsel' Juanna' kwenche bidchoe' ben' nisa'? ¿AChiozan' bseleene'? ¿Anti ben' yell-liona'zan bseleene', lla?

⁵ Na'ch wzologake' choe'len ljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', łobe' ine' cho': “¿Berache ki wyajle'le che', shka'?”

⁶ Na' shi yize'chone' nozə ben' bseleene', yog' ben'ki wliagake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

⁷ Na'ch gollgake' Jesúza':

—Bi nezinto' no bsel' beena'.

⁸ Na'ch che' Jesúza' legake':

—Lekzka' nad' aga wnia' le' noran ben' nad' yel' wñabia'na' kwenche chon' diiki.

Jempl che wen llin malka'

(Mt. 21:33-44; Mr. 12:1-11)

⁹ Na' Jesúza' bseese to jempl lao ben'ka' lle' na':

—To ben' billee yag uva, na' bene'n lall' na' ben'ka' gap wwian, na' wzee wyaje' ssha gan yoblə. ¹⁰ Na' ka bizi' bilap ben'ka' uvana', xaninna' bselee to wen llin che' kwenche lljelle' ben'ka' nak lall' na'gake' yag uvaka' we'gake'ne' daa chidolee yikee. Na' ben'ka' chapgake' yag uvaka' be'gake'ne' bet wdingake'ne', na'tech bilaggake'ne' to ka' che'. ¹¹ Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'. ¹² Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

¹³ Na'ch chaki xan yag uvaka': “¿Nakra ka gona'n? Wsel'shkid' bi' cha'ni, bi'ni le' chakid'. Shera shicholə

wzenaggake' cheb'." ¹⁴Na' ka ble'i beṅ'ka' chap yag uvaka' xiṅe'na', na'ch che' l'jwelle': "Bi'nin yigaanlem' yell-lioni. Li da witchob' kwenche yigaanlenchon." ¹⁵Na' wlejgake'b' gana' lle' yag uvaka' na' betgake'b'.

Na'ch wṅabi Jesúza' beṅ'ka' chzenag:

—¿Nakra ka chakile goni xan yag uvaka' beṅ'ka', lla? ¹⁶Ba nakten shaje' na' lljete' beṅ'ka' chap yag uva che'na' na' yiyone' yell-lio che'na' lall' na' beṅ' yoblə.

Na' ka beni beṅ'ka' wne' ka', na' wnagake':

—¿Bat we' Chioza' latj gak ka'!

¹⁷Na' bwia Jesúza' legake', chi'e:

—¿Beran zejin Cho'a Xtill' Chioza' gana' na:

Yaja' daa bi wyoolall' wen yooka', leyen'lannan' yaja' daa ba nchejcha yoon'a?

¹⁸Nottezə beṅ' lljchaze' lawinna' kwiayee, na' shi idakwan beṅ', axt wshoshjan le'.

**Janabgakile' Jesúza' shi chiyal'
chixjgake' daa chṅab
beena' chṅabia' Rómána'**

(Mt. 21:45-46; 22:15-22; Mr. 12:12-17)

¹⁹Na' bxozka' chṅabia' na' beṅ'ka' chli' chsedi leya' goklall'gake' gox'gake' Jesúza' ka biyoll' golle' ka', la' gokbe'gakile' chezgaken' wṅie' daa bi chajle'gake' che'. Per blleb'gake' beṅ'ka' ndop nllag na'. ²⁰Na'ch bsel'gake' to chop beṅ' wiwia wiyi, na' bentezgake' ka beṅ' cheenchgayi wzenag che'. Per aga do lall'gaken' wyajgake', san kwenchezə kweyjelgakile' Jesúzan' na' lljadaogake' xya che' lao beena' chṅabia' gana' mbani Judeana'. ²¹Na' wṅabgakile'ne':

—Maestro, nezinto' daa no' na' daa chli'o nakan dii li, na' aga chwio' nak nak beṅ', shi nake' beṅ' zakii wa shi bi nake'. Nezinto' chli'o nez li che Chioza' kon ka nakan. ²²Wnashki neto': ¿Achiyal' chixj-

cho daa chṅab Césara', beena' chṅabia', anti bi chiyal' chixjchon?

²³Na' gokbe'i Jesúza' aga do lall'gaken' wṅabgakile'ne', na'ch chi'e:

²⁴—Li wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Che Césaran', beena' chṅabia' Rómána'.

²⁵Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

²⁶Na' ni shcho'a dill' daa bi'e lao beṅ'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizə.

**Wṅabgakile' Jesúza' nak gak
kat' yiban beṅ' wetka'**

(Mt. 22:23-33; Mr. 12:18-27)

²⁷Ka wde dga, bllin baḷ saduceoka' lao Jesúza', beṅ'ka' bi chajle' daa yiban beṅ' wetka'. Na'ch che'gake' Jesúza':

²⁸—Maestro, leya' bzej dii Moiséza' nan: shi to beṅ' byo guete' na' igaan xoolena' wizeb na' kono xiṅgake' wzoa, beṅ' bish' beṅ' weta' chiyal' yikee nool wizeba' kwenche soa xiṅ dia che dii beṅ' bisheena'. ²⁹Ki gok to shii, wzoa gall bish' beṅ', na' beṅ' necha' bshag-nee, na' wite' na' kono xiṅe' wzoa. ³⁰Na' beṅ' wchopina' bikee noola', na' lekzka' wite' na' kono xiṅe' wzoa. ³¹Na' beṅ' wyonina', lekzka' bizkee noola', na' wize-ete' na' kono xiṅe' wzoa. Na' lekzka' beṅ'ka' zi tap bizkaagake' noola' na' wite-gake', na' ni to beṅ'ka' gall bi wzoa xiṅgake' kon noola'. ³²Na' ka bllin lla lekzka' wit noola'. ³³Na' kat' yiban beṅ' wetka', ¿norayen'en' gak beṅ' che', lla?, la' galltien' wzoalene'.

³⁴Na'ch che' Jesúza' legake':

—Beṅ'ka' lle' yell-lioni naa chkaa lljwellgake', na' lekzka' choe' ye'l wishagna' che xiṅe'ka'. ³⁵San beṅ'ka' ina Chioza' zak'gake' yiyajgake' gana'

zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza', ³⁶ni koch no guet, san soagake' ka zoa anjlka'. Na' gaggake' xiin Chios daa ba bisbane' legake' ladj ben' wetka'. ³⁷Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'nin. Na' wne' Xancho Chioza' nake' Chios che Abraham', Isaaca' na' Jacoba'. ³⁸Na' Chioza' aga nake' Chios che ben' wet, san nake' Chios che ben' de yel' mban cheyin. La' yog'lol ben' n xenilallii Chioza', dekwə yel' mban chegake'.

³⁹Na'ch bal ben'ka' chli' chsedi leya' gollgake'ne':

—Maestro, ka ba wnayenoon nakan.

⁴⁰Na' bich bi biyaxjchgakile' inabchgakile'ne'.

Crístona' nake' xiin dia che dii Davina'

(Mt. 22:41-46; Mr. 12:35-37)

⁴¹Na' che' Jesúza' legake':

—¿Berache nazə ben' Crístona' nake' xiin dia che dii Davina'?, ⁴²len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

⁴³shlak wzoa' xpi'ona' ben'ka' chakzbani li'.”

⁴⁴¿Berache chakzile Crístona' nake' xiin dia che dii Davina', len kwin Davina' golle'ne': “Xan”?

Jesúza' wne' nan ben'ka' chli' chsedi leya' chongake' mal

(Mt. 23:1-36; Mr.

12:38-40; Lc. 11:37-54)

⁴⁵Na' shlak chzenag yog' ben'ka' lle' na', Jesúza' golle' ben'ka' naggake'ne' txen:

⁴⁶—Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheengakile' yog'zə ben'

gaggake' legake' balaan ladj lkwe' ben'. Na' gana' chdop chllagcho choe'lwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw. ⁴⁷Na' lekzka' chkaatez-gake' lill nool wizebka', na' chongake' ka chshaljlen Chioza' ssha nleb kwenche gaki ben' le wen chongake'. Na' daa chongake' ka', ba nakten ile'gakile' yel' zak'zi wala'.

Daa bzani to nool wizeb, bi'en Chioza'

(Mr. 12:41-44)

21 Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'. ²Na' lekzka' ble'ile' to nool yesh', ben' wizeb, wlo'e chop sintabdo'. ³Na' goll Jesúza' legake':

—Dii li nia' le', la'kzi nool wizebi nake' ben' yesh', ba be'che' dii xench aga ka yog'te ben'ka'. ⁴La' yog'gake' choe'gake' daa chichoonan che'ka', na' le', naktie' ben' yesh', wlo'e doxen daa nape', la'kzi chyalljile'n.

Jesúza' chi'e wllin to lla kwiai' yoodo'na'

(Mt. 24:1-2; Mr. 13:1-2)

⁵Na' bal ben'ka' choe'gake' xtill yoodo'na' ka xochi nak yajka' nongakile'n na' diika' bzani ben' be'gake'n yoodo'na'. Na'ch che' Jesúza' legake':

⁶—Ka nak diiki chwiale naa, wllin lla kwiai' yogaan, ni sto yaj bich kwia koll' ljwellin.

Diika' gak kat' ba zoa te che yell-lioni

(Mt. 24:3-28; Mr. 13:3-23)

⁷Na'ch wnabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa gaoshosh gakan?

⁸Na'ch che' Jesúza' legake':

—Li wsak' bi we'le latj no siye' le'.
 ̱a' ben' zan zi ichej gonzgake' ka nad',
 na' inazgake': "Nadaan Crístona", na'
 lekzka' inazgake': "Ba bllin lla kwiai'
 yell-lioni." Bi gonle legake' txen. ⁹Na'
 ka yenile chak no wdil wa chtop chshag
 ljuwell ben' kwenche soshiy'gake' ben'
 wñabia'ka', bi illeble. Chonan byen zi-
 gaate gak diiki, per aga lii tete che yell-
 lioni kat' ba chakgakan.

¹⁰Na'ch golle' legake':

—Ganga kwe' wdila' na' til yell kon
 yell. ¹¹Na' gak no bedxo' wal, na' gat'
 wbin, na' biya yillwe' kwe' lo yell-lioni,
 na' biya dii gak xan yabana' dii wwall
 wsheban ben'.

¹²'Na' ka zi gak diiki, gox'gake' le'
 na' biya dii gongakile' le'. Na' lljwa'gake'
 le' gana' chdop chllagcho choe'llwill-
 cho Chioza' na' yiya yiyilgake' le'
 na' koogake' le' lillya, na' lljwa'gake'
 le' lao ben' wñabia' xenka' na' lao
 ben' wñabia'ka' sto ni cha'. ¹³Na' kat'
 gak chele ka', na'chlə gat' latj we'le
 cho'a xtilaana' lawe'ka'. ¹⁴Na' bi se-
 zle wñeyi naklə inale kat' lljsele lao
 ben' wñabia'ka', ¹⁵la' nad'kzan wzajniid'
 le' nakan inale na' gon' le' yel' sin'na'
 kwenche ni to ben'ka' chakzbangakile' le'
 bi sogakile' inagake' bi nakan ka nale.
¹⁶Na' no xaxña'tezle, no ben' bish'le, no
 dialla chele, na' no ben' zoalenle wen
 gongake' le' lo na' ben' wñabia'ka', na'
 witgake' bal-le. ¹⁷Na' axt yog'zə ben'
 gakzbangakile' le' daa nonlilall'le nad'.
¹⁸Per li koo yichjle, Chioza' gaklene' le'
 na' ni tlish' yish' yichjlēna' bi kwiai'.
¹⁹Na' shi sechale lawi daa yen ile'ile
 na' bi gakhoplall'le, na'chan gat' to yel'
 mban chele dii bi te cheyin.

²⁰'Na' kat' ile'ile nechj soldadka'
 Jerusalenni, kanan' inezile nan ba
 zoa kwiai'n. ²¹Na'ch ben'ka' lle' gani
 mbani Judeani, chiya' wxonjgake'
 lljakwash'gake' do yaa yaoka', na'
 ben'ka' lle' yelli, chiya' wxonjgake', na'

ben'ka' zej lyixaa, bichoklə yiyedgake'
 yelli. ²²̱a' kanan' gon Chioza' yel' zi'
 che yog'ze' kwenche yillinin doxen ka
 na Cho'a Xtilleena'. ²³iNyesh'laz wal
 gak che noolka' noa' na' noolka' chwall'
 chxop llana' gak diiki! ̱a' dii xen daa
 yen ile'i ben' Israelki. ²⁴Balgake' guet lo
 wdila' na' zi bal' wche'gake' pres yell
 zit'ka'. Na' ben' zit'ka' wlej wshoshjgake'
 yell Jerusalenni axt kat'ch illin lla yiyoll
 yido ka llia bia' gongake'.

Kat'ka' yiyed Jesúza'

(Mt. 24:29-35, 42-44; Mr. 13:24-37)

²⁵'Na' lo wbillā', lo bewaa na'ch lo
 beljka' gak dii gonan ka yibani ben'.
 Na' ben'ka' lle' yell-lioni gakshejlall'gake'
 na' illebgake' kat' gon nisdo'na' sshag
 wal daa so' kwe'n. ²⁶Na' axt ichol'-lall'
 ben' daa chllebgake' kwiai'yengake' yell-
 lioni, la' axt yog' diika' llia xan yabana'
 inibgakan. ²⁷Na'ch ile'gakile' nad', Ben'
 Bsel' Chioza' Yell-lioni, zizaa to lo bej
 kon yel' wak xen na' balaan xen. ²⁸Na'
 kat' solo gak diiki, li wtipch lall'le, la' ba
 zoa gaoshosh yidsla' len'.

²⁹Na' lekzka' bsees' Jesúza' to jempl
 chi'e:

—Li wwiakachi yag yixwewa' wa
 bichlə yag. ³⁰Kat' chle'ile ba chibia
 xlaguinka', chakbe'ile ba zoa yiyoo la'o
 linna'. ³¹Ka'kzə, kat' ile'ile ba chak diiki
 ba wnia', chiya' inezile ba zoa gao wli'
 Chioza' yel' wñabia' che'na'.

³²'Dii li nia' le', aga ba wit ben'ka'
 zoa naa kat' gak yog' diiki. ³³'Yabana'
 na' yell-lioni te chegakin, san cho'a xtil-
 laana' aga wde bi gak ka nan.

³⁴'Li wsak' bi we'le latj sho' diika' wx-
 injan yichjlall'do'lēna'. Bi wlanzle yel'
 weezo, na' bi sezle wñeyi bi chak chele.
 Li wsak' kwenche aga sha chel-le chon
 llana' zizaa. ³⁵̱a' tokonganzan gak di-
 iki yen ile'i yog'te ben'ka' lle' doxen yell-
 lioni. ³⁶Na' le', li se wñeyi, li inabi
 Chioza' toshiizi gaklene' le' kwenche yi-

lale lao yog' diiki llia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

³⁷ Na' Jesúza' bli' bsdile' ben' yog' lla yoodo'na', na' ka chal, chjagaane' lo Yaa Olívoza'. ³⁸ Na' yog' zil yog' ben' chaj-gake' yoodo'na' chjaznaggake' daa chli' chsedile'.

Wloogake' xnezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-53)

22 Ba zoa gaozə lni Paskwa' kat' chaogake' yetxtil daa bi nchix levadúrana'. ² Na' bꝑozka' chꝑabia' len ben'ka' chli' chsedi leya' chiyiljall'gake' naklə gongake' witgake' Jesúza' ka kono gakbe'i, la' bllebgake' shi bi goni ben' wllal che'ka' legake'.

³ Na'ch xan dii xiw'ka' daa le Sathanás wyoon loo yichjall'do' Jud Scariota', beena' nak txen ben'ka' shllin. ⁴ Na' wyaje' lao bꝑozka' chꝑabia' len lao ben'ka' ngoo lall' na' ben'ka' chap yoodo'na', na' bi'e dill' nakan gone' Jesúza' lall' na'gake'. ⁵ Na' le bibagakile' na' bchebgake' we'gake'ne' mech. ⁶ Na'ch bchebe' gone'ne' lall' na'gake'. Na' wzolo chinoe' batan gat' latj kat' kono ben' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Na' bllin llana' chsini'agake' che lina', llana' chzolo chaogake' yetxtil daa bi' nchix levadúrana' na' chitgake' to xil'do', bana' gaogake' lle' Paskwa'. ⁸ Na'ch wlej Jesúza' Pédrone' len Juanna' na' chi'e legake':

—Li lljasini'a daa gaocho lni Paskwi.

⁹ Na'ch che'gake'ne':

—¿Garan cheenilo' lljasini'anto'n?

¹⁰ Na' che' Jesúza' legake':

—Ka sho'le Jerusalénna', na' ile'ile to ben' byo zino'e to chee nis, na' li ll-

janoe' axt yoona' gana' yilline'. ¹¹ Na' ye'le xan yoona': “Maestrona' chꝑabile' li': ¿Garan zoa yoona' wyoone' gana' gaolene' ben'ka' nakgake'ne' txen lle' Paskwi?” ¹² Na' wliile' le' to yoo xen dii llia shkwiána' cha'lə ga ba nonshao'tie'. Nan' wsini'ale daa gaocho xshe'na'.

¹³ Na' wloogake' nez zejgake', na' kon kayen' golle' legake' gok. Na' bsini'agake' daa wdaogake' lle' lni Paskwa'.

¹⁴ Na' ka go' gaogake' xshe'na', Jesúza' wche'lene' postl che'ka' cho'a mesa'.

¹⁵ Na'ch chi'e legake':

—Ba goklall'chga' yeej gaolen' le' lni Paskwi naa bin' witgake' nad'. ¹⁶ Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' ye' wꝑabia' xen che'na', kana'ch yeej gawa'n dii yoblə.

¹⁷ Na' bexee kopa' na' bi'e Chioza' ye' choxken, na' chi'e:

—Li gox' dga, li yeejan lat' wej. ¹⁸ Na' nia' le', bichga yeej' nis uvani axt ki illin lla wli' Chioza' ye' wꝑabia' xen che'na'.

¹⁹ Na'ch bexee yetxtila' na' bi'e ye' choxken Chioza'. Na' bꝑoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

²⁰ Na' lekzka' bene' ka wde wdaogake' xshe'na', bexee kopa' sto shii, na'ch chi'e:

—Dga yoll loo kopi zejín xchen'na' daa laljə ni chele daa gonan ka gakli dii koba' bcheb Chioza' gone'.

²¹ Na' naa, beena' gone' nad' lo na' ben'ka' chakzi'gakile' nad' chilene' nad' cho'a mesi. ²² La' ba bllin lla gak ka nak daa llia bia' gak cha', nad', Ben' Bsel' Chioza' Yell-lioni, per jnyesh'laz gak che beena' gone' nad' lo na' ben' malka'!

²³ Na'ch ben'ka' nakgake'ne' txen wzologake' chꝑabi ljwellgake' noen' gone'ne' lo na' ben'ka'.

**Gokgued ben'ka' nak Jesúza'
txen nogaken' zak'chi**

²⁴Na' lekzka' chakdił-len ljuwellgake' nogaken' nak ben' zak'chi. ²⁵Na' che' Jesúza' legake':

—Zoa ben' wñabia' to to nación, na' chongake' byen chzenag ben' chegake', na' nagake' che kwingake' le chaklen-gake' ben'. ²⁶San le', bi chiyal' gonle ka'. Shi nole nakle ben' zakii, chiyal' wchek' yichjle ka to bi' xkwid', na' shi nole chñabia', chiyal' gonle ka not-tezə ben' wen mandad. ²⁷¿Noran nak ben' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' ben' zak'chi. San nad', la'kzi naktia' xanle, zoa' ladjleni ka to ben' wen mandad chele.

²⁸'Le' ba wzoalenle nad' lao yog'te daa ba gok cha'. ²⁹Na' daan, gon' le' yeł' wñabia'na' ka daa ben' Xa'na' nad'. ³⁰Na' yeej gaolenle nad' gana' inabi'a. Na' kwe'le gana' inabi'a'le yizi'le kwent che shliñ kwen ben'ka' nak xiñ dia che dii Israela'.

**Jesúza' wne' bi wcheb
Pédrona' shi nombi'ene'**

(Mt. 26:31-35; Mr.

14:27-31; Jn. 13:36-38)

³¹Na' lekzka' golle' Simón Pédróna':

—Simón, Simón, Satanáza', daa chñabia' dii xiw'ka', ba wñaban le' gake lo na'yin kwenche gondinj gonganin le'. ³²Na' nad' ba wñabid' Chioza' gaklene' li', Simón, kwenche gonjilall'cho nad'. Na' kat' ba biyajilo' cheyi daa gono', na' gakleno' ben'ki nako' txen kwenche soacheghake' gonjilall'gake' nad'.

³³Na' che' Simónna':

—Xan', ba nchoglallaa laa lillyana' sal'en' li' wa ax̄t guetlen' li' txen.

³⁴Na' che' Jesúza':

—Pedro, nia' li', ñaanlle' shon shii bi wchebo' shi nombi'o nad' ka zi' kwelł shikwteza'.

Ba zoa gaoz wtił Jesúza' daa gak che'

³⁵Na'ch che' Jesúza' legake':

—¿Zyalljile bi byalljile kana' bsełaa le' na' bibi bex'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

³⁶Na'ch golle':

—Per ñaach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. ³⁷Nia' le', chonan byen gak cha' kon ka na Cho'a Xtill' Chioza' gana' na: “Gongakile'ne' ka chongakile' to ben' wen dii mal.”

³⁸Na' che'gake':

—Xan', ni napnto' chop spad.

Na' chie':

—Lliz li soachoklə.

**Bełwill Jesúza' Chioza'
gana' le Getsemaní**

(Mt. 26:36-46; Mr. 14:32-42)

³⁹Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano ben'ka' nakgake'ne' txen. ⁴⁰Na' ka bllingake' latja', na' chi'e legake':

—Li wełwill Chioza' kwenche bi we'zle latj gon beli chenna' le' gan.

⁴¹Na' bkwase' kwite'ka', ka to ga zeelo chllin to yaj dii chzał'cho, na'ch bchek' xibe'na' bełwille' Chioza'. ⁴²Na' golle':

—Xa, shi li' cheenilo', bislagach nad' lawi dga ba zoa idil illag'; per aga gak ka cheenid', san gak ka cheenilo'.

⁴³Na'ch bli'lao to anjl ben' za' ya-bana' le', na' biyo'ene' fuerz. ⁴⁴Na' daa le chakyesh'chgaile', zizikli bełwillche' Chioza' ax̄t biyaklolje'. Na' nis yes che'na' daa chxop lo yona' nakan ka to bllon wej chen.

⁴⁵ Biyoll be'lwille' Chioza', na' bizollee biyaje' gana' lle' beṅ'ka' nakgake'ne' txen, na' ka billine' kwite'ka' ba chesgake' daa chakyesh'gakile'. ⁴⁶ Na' chi'e legake':

—¿Berache chesle? Li chas na' li we'lwil Chioza' kwenche bi we'zle latj gon beli chenna' le' gan.

Bex'gake' Jesúza'

(Mt. 26:47-56; Mr. 14:43-50; Jn. 18:2-11)

⁴⁷ Ni choe'te Jesúza' dill', ka bllin beṅ' zan, na' beena' le Jud, beena' nak txen beṅ'ka' shllin, nchi'e legake'. Na' ka blline' jabigee kwit Jesúza' na' bnope' xagueena'. ⁴⁸ Na'ch che' Jesúza'ne':

—Jud, ¿akon dga bnopo' nad' chono' nad', Beṅ' Bsel' Chioza' Yell-lioni, lo na' beṅ'ki?

⁴⁹ Na' beṅ'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awniayinto' spadki?

⁵⁰ Na' toe' lii wdintie'n to mos che b̄xoz choo b̄xoz xenna' b̄chogtie' nague' de sh̄lina'. ⁵¹ Na' che' Jesúza':

—Bich bi gonile beṅ'ka'.

Na'ch bida' Jesúza' nag beena'. ⁵² Na' daa bllin b̄xozka' ch̄n̄abia' len beṅ'ka' chap yoodo'na', na' beṅ' golka' ch̄n̄abia', kwenche gox'gake'ne', chi'e legake':

—¿Berache za'zle nox'le yag na' spad kwenche zid̄n̄izle nad' ka to no beṅ' wban? ⁵³ Yog' lla wzoa' ladjlena' yoodo'na' na' bi bex'le nad'. Per naach bllin lla gonle ka cheenile na' naayen' ch̄n̄abia' dii mala' daa ch̄n̄abia' gana' shgasj sh̄chol.

Bi b̄cheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Na'ch bn̄izgake' Jesúza' na' b̄che'gake'ne' lill b̄xoz choo b̄xoz xenna', na' zit' zit'lə zjano Pédrona'ne'. ⁵⁵ Na' bxengake' yi'na' lesh' chyoo che

b̄xoz choo b̄xoz xenna' na' wche'gake' cho'a yi'na', na' wlen Pédrona' legake'.

⁵⁶ Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

⁵⁷ Na' Pédrona' aga b̄chebe', na' chi'ene':

—Noolə, aga nombi'a beena'.

⁵⁸ Na' gokzə xtit bizle'i beṅ' yoblə Pédrona' na' chizi'ene':

—Lekzka' lenon' nako' beṅ'ka' txen.

Na' Pédrona' chi'ene':

—Bi len' nak' beṅ'ka' txen.

⁵⁹ Na' wizak ka do zi' tgor na' wize' sto beṅ' yoblə:

—Dii likzan len beeni nake' txen Jesúza' la' lekzka' beṅ' Galilean.

⁶⁰ Na'ch che' Pédrona'ne':

—¿Ni bi nezid' bi dillaan choo!

Na' ni che'telə Pédrona' ka', ka wchell to shikwtez. ⁶¹ Na'ch biyechj Xancho Jesúza' bwie' Pédrona', na' Pédrona' jadinile' daa golle'ne', kana' chi'e: “Naanlle' shoṅ shii bi wchebo' shi nombi'o nad' ka zi' kwell shikwteza'.” ⁶² Na' bichej Pédrona' gana' lle' beṅ'ka' na' wchellyeshee.

Btitjgakile' Jesúza'

(Mt. 26:67-68; Mr. 14:65)

⁶³ Na'ch beṅ'ka' chapgake' Jesúza' btitjgakile'ne' na' wdap' wlall'gake'ne'.

⁶⁴ Na' bsejgake' jalawe'na', na'ch wlall'gake'ne', che'gake'ne':

—¿Wnashki non wlall' li'!

⁶⁵ Na' biya dii gollgake'ne' kwenche gakile' zi'.

Wde Jesúza' lao beṅ'ka' ch̄n̄abia'gake' beṅ' Israelka'

(Mt. 26:59-66; Mr. 14:55-64; Jn. 18:19-24)

⁶⁶ Na' ka wyeeni', bidop beṅ'ka' ch̄n̄abia' beṅ' Israelka', len b̄xozka' ch̄n̄abia' na' beṅ'ka' chli' chsedi leya'.

Na' bdegake' Jesúza' lawe'ka'. Na'ch wñabgakile'ne', che'gake':

⁶⁷—Wnashki neto' shi li'kzan Crístona', beena' chbeznto'.

Na' che' Jesúza':

—Shi inia' le': “Awe, nadaan”, aga wyajle'le cha'. ⁶⁸Na' shi inabid' le' bi dii inabid' le', aga williilen na' ni bi yisanle nad', shi ñaa. ⁶⁹Na' ñaate, nad', Ben' Bsel' Chioza' Yell-lioni, kwi'a kwit de shli che Chioza', beena' nap yel' wak xenna'.

⁷⁰Na'ch yog'ze' wñabgakile'ne':

—¿Ana' lin' nako' Xiin Chioza'?

Na'ch che' Jesúza':

—Awe, shlikzan ba wnale.

⁷¹Na'ch che' ljwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

Wde Jesúza' lao Pilátona'

(Mt. 27:1-2, 11-14; Mr. 15:1-5; Jn. 18:28-38)

23 Na'ch yog'loł ben'ka' bizolla'gake' na' jwa'gake' Jesúza' lao Pilátona'.

²Na'ch wzologake' chaogake' xya che Jesúza', che'gake':

—Ba bidolinto' beeni chta chñie' ben' wlall chento'ka'. Chi'e bi chiyał' chixjcho daa chñab César'a, beena' chñabia', na' lekzka' naze' nake' Crístona', na' daa ne' ka' zejín nake' to ben' wñabia'.

³Na'ch wñabi Pilátona' Jesúza', chi'ene':

—¿Alin' nako' ben' wñabia' che ben' Israelki?

Na'ch che' Jesúza'ne':

—Kan' nakan.

⁴Na'ch che' Pilátona' bñozka' chñabia' na' yog' ben'ka' lle' na':

—Ni to dii mal bi chillelid' chon beeni.

⁵Na' zizikchli che'gake':

—Diika' chli' chsedile' chta chñen yog'loł ben' lle' doxen lallnto'ni. Wzoloze' Galileana', na' axt Judeani ba bide'.

Bde Pilátona' Jesúza' lao Heródeza'

⁶Ka gollgake' Pilátona' ka', na'ch wñabile' legake' shi nak Jesúza' ben' Galilea.

⁷Na' ka wñezile' nake' ben' Galilea, na'ch bdie'ne' lao Heródeza', beena' ñlane' chñabi'e Galileana', la' kana'yen' zoa Heródeza' Jerusaléna'.

⁸Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' ben' xtilleena'. Na' goki Heródeza' ile'ile' gone' to yel' wak.

⁹Na' biya dii wñabile' Jesúza', na' ni to daa wñabile'ne' bi billi'e.

¹⁰Na' lekzka' na' lle' bñozka' chñabia' len ben'ka' chli' chsedileya', na' zizikli chaogake' xya che Jesúza'.

¹¹Na'ch Heródeza' len soldad che'ka' biya dii bengakile'ne', na' btitj-gakile'ne' bwakwgake'ne' to lech' ka daa chakw to ben' wñabia'.

Na'tech bizsel' Heródeza'ne' lao Pilátona'. ¹²Na' lo llana' bizoalen Pilátona' Heródeza' wen, la' kana'te chakzbani ljwelle'.

Bchoglogake' guet Jesúza'

(Mt. 27:15-26; Mr. 15:6-15; Jn. 18:39–19:16)

¹³Na'ch biti'a Pilátona' bñozka' chñabia', na' ben'ka' chñabia'gake' ben' Israelka' na'ch ben' yell, ¹⁴na' golle' legake':

—Le' bidwa'le beeni lawii, nale chta chñie' ben', na' nad' ba wñabidee laoleni, na' bi chillelid' ni to daa nale che' shi li ka chone'n.

¹⁵Na' ni Heródeza' bi billelile' shi bi dol' nap beeni, na' ba bizseleene' lao choni. Na' ba ble'teile' aga bi bene' inacho wchoglozcho guete'.

¹⁶Na' ñaa gon' mandad wit chingake'ne' na'tech yisane'e.

¹⁷Na' ka chakz yog' yiz, chiyał' yisane' to beena' nej lillyana' kat' chał' lni Paskwa'. ¹⁸Na' yog' ben'ka' ndop nllag na', wzologake' chosyaagake', che'gake':

—¿Guettega beeni! ¡Na' bisan Barrabáza'!

¹⁹ Nyixjgake' Barrabáza' lillyana' daa bxie' wdila' yell Jerusalénna', na' bettie' to ben'. ²⁰ Na' daa cheeni Pilátona' yisane' Jesúza', na' stokzə wñabile' ben'ka' shi wisane'ne'. ²¹ Na' ben'ka' zizikchli chosyaagake', che'gake':

—¡Bdee lee yag cruza! ¡Bdee lee yag cruza'!

²² Na' de wyon shiyi che' Pilátona' legake':

—¿Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisanee.

²³ Na' ben'ka' wzeyidgake' chosyaagake' chñabgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'.

²⁴ Na' bchoglall' Pilátona' gone' ka cheeni ben'ka'. ²⁵ Na' bisane' beena' wñabgake', beena' de lillyana' daa bxie' wdila' na' daa bettie' to ben'. Na' bene' Jesúza' lo na'gake' kwenche gongakile'ne' ka chaklall'gake'.

Bda'gake' Jesúza' lee yag cruza'

(Mt. 27:32-44; Mr.

15:22-32; Jn. 19:17-27)

²⁶ Na' ka nche'gake' Jesúza' lljada'gake'ne' lee yag cruza', billaggake' to ben' Cirene lie' Simón zizee lyixaa. Na' bex'gake'ne' bwa'gake'ne' yag cruz che Jesúza' na'ch janoe'ne'.

²⁷ Na' ben' zan zjanogake'ne', na' zan noolka' chbellgake' na' chosyaagake' ni che Jesúza'. ²⁸ Na' biyechj Jesúza' bwie' legake' na' golle':

—Le' nool Jerusalén, bi kwelzle cha'; li kwell che kwinle na' che xiipleka'.

²⁹ La' wllin lla kat' ina ben': "Chakomba nool willka', ben'ka' bi wxan na' bi bwall bxopgake'." ³⁰ Na'ch ben'ka' zoa llana' gak ka', solo inagake': "Shel' iyinjtega yaa yaoki idakwtegan neto'." ³¹ Shi yag yaa yag banna' chongakile'n kon daa

nazan chegake', ¿alechla ki gongakile' yag billa'?

³² Na' lezkza' nche'gake' chop ben' wen dii mal kwenche witgake' legake' txen len Jesúza'. ³³ Na' ka bllingake' latja' gana' le Llit Yichj Ben' Wet, bda'gake' Jesúza' lee yag cruza'. Na' lezkza' bda'gake' chopte ben' wen dii malka' shlaa wej kwite'na'. ³⁴ Na' ka chda'gake' Jesúza' lee yag cruza', chi'e:

—Xa, wxi'xen chegake', la' aga nezgakile' bin chongake'.

Na' soldadka' bengake' to wyitj kwenche wnezgakile' nogake' yidol' xe'na'. ³⁵ Na' lle' ben' zan chwiagake', na' axt ben'ka' chñabia'gake' ben' Israelka' btitjgakile'ne', nagake':

—Gok bisle' ben' yoblə, na' naa yis-lashki kwine' shi leile' len' Crístona', beena' ba wlej Chioza'.

³⁶ Na' lezkza' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'. ³⁷ Na' che'gake'ne':

—Shi lin' nako' ben' wñabia' che ben' Israelki, bislashki kwino'.

³⁸ Na' yichj yag cruz che'na' bda'gake' to dii cho'en dill' biçhe nda'gake'ne' lee yag cruza', nan: "Beenin ben' wñabia' che ben' Israelka'." Bzejgake'n dill' griego, dill' latín na' dill' hebreo.

³⁹ Na' to ben' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lezkza' bisla neto'.

⁴⁰ Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'.

⁴¹ Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

⁴² Na'ch golle' Jesúza':

—Jesús, lljadingachilo' nad' kat'ka' solo inabi'o.

⁴³ Na'ch che' Jesúza'ne':

—Dii li nia' li, naanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

⁴⁴Na' do ka gobill bichol doxen yell-liona', blinte do ka chida shon, ⁴⁵daa bich bzeeni' wbillá'. Na' lechaa ze loo yoodo'na' blon' gokan chop laalá.

⁴⁶Na'ch besyaa Jesúza' zilljə, chí'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

⁴⁷Na' ka ble'i beena' chnabia' soldadka' diika' gok, be'lawee Chioza', chí'e:

—Dii li beeni nake' dowalj ben' wen.

⁴⁸Na' yog' ben'ka' lle' na', ka ble'gakile' ka gok, ziyajgake' chball'gake' cho'alcho'eka'. ⁴⁹Na' yog' ben'ka' nombia'gake' Jesúza', do noolka' za'lengake'ne' axt Galileana', wzegake' zit'lə chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

⁵⁰Wzoa to ben' wlie' José, ben' yell Arimatea, daa mbani Judéana'. Na' Joséna' nake' txen ben'ka' chnabia' ben' Israelka'. Nake' to ben' wen na' to ben' chon ka cheeni Chioza', ⁵¹na' zoe' chbeze' wsel' Chioza' beena' inabia'. Na' Joséna' aga wyoolallee ka ben ben'ka' chnabia'lene' daa betgake' Jesúza', na' bi benlene' legake' txen. ⁵²Na'ch wyaje' lao Pilátona' na' wnabe' lsens yiletje' kwerp che Jesúza'. ⁵³Na' biletje'ne' lee yag cruza', na'ch bitobe'ne' to lech' xen na' jlo'ene' to loo blej daa benschawee, ga bin' wwash'gake' ni tlish' ben' wet. ⁵⁴Na' llana' gok diiki nakan lla chsini'a ben' Israelka' chegake' kwenche bibi llin gongake' lla sabda', llana' chombaangake', na' zi lat'zə chyallj solo llana' chombaangake'.

⁵⁵Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'. ⁵⁶Na'ch biza'gake', na' ka billingake' gana' zoagake', benshao'gake' daa chla' zix. Na' bizi'lall'gake' lla sabda' kon ka na leya'.

Biban Jesúza' ladj ben' wetka'

(Mt. 28:1-10; Mr. 16:1-8; Jn. 20:1-10)

24 Na' lla necha' chizolo xmanna', nox'gake' diika' chla' zix daa benschao'gake', na' wyaj zi bal' noolə yoblə kon legake'. ²Na' ble'gakile' aga chí'ch yaja' cho'a bana'. ³Na' wyoogake' loo bleja', na' ble'gakile' aga bich bi kwerp che Xancho Jesúza' de na'. ⁴Na' shlak chakgakile' bera zevin dga, kat'kzali ble'gakile' chop ben' byo, nakwgake' lech' dii chey cheeni', zegake' kwite'ka'. ⁵Na' noolka' bllebchgagake' na' bchek' yichje'ka' axt lo yona'. Na'ch ben'ka' zena' che'gake':

—¿Berache chiyiljzle beena' mban ladj ben' wetki? ⁶Kochno de ni. Ba bibane' ladj ben' wetki. Li lljadini daa wne' le' kana' zoalene' le' Galileana'. ⁷Wne' chonan byen Beena' Bsel' Chioza' Yell-lioni gake' lo na' ben' malka', na' witgake'ne' lee yag cruza', na' ka yiyon lla yibane' ladj ben' wetka'.

⁸Na'ch jadini noolka' daa goll Jesúza' legake'. ⁹Na' biza'gake' biyajgake' gana' lle' postlka' shnej len yog' ben'ka' sto gokgake'ne' txen, na' be'gake' dill' yog' daa gok chegake'. ¹⁰Na' noolkin jayellgake' postlka' daa gok chegake': María ben' yell Magdálana', Juánana', María xna' Jacóbona', na' len zi bal' nool yoblə. ¹¹Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

¹²Na' Pédróna' wzee zejdoe' cho'a bana', na' ka blline', bwie' loo bleja' na' ble'ile' lech'ka' chí'gakan ka'lə. Na'ch

bizee zjade' gana' zoe' chibanile' ka nak daa ba gok.

Bli'lao Jesúza' chop ben' tnez Emaúza'

(Mr. 16:12-13)

¹³Na' lo llana' gok ka', chop ben'ka' nak Jesúza' txen wyajgake' to yell dii le Emaús, na' nlaa ljwellin ka do shnej kilometro kon Jerusalénna'. ¹⁴Na' lo zej ngoogake' nez choe'gake' dill' cheyi diika' ba gok. ¹⁵Na' shlak choe'gake' dill' cheyi diika' gok, na' jabig' kwin Jesúza' kwite'ka' na' zejlene' legake' txen. ¹⁶Na' la'kzi chwiagake'ne', aga gokbe'gakile' no beena'. ¹⁷Na'ch wnabi Jesúza' legake':

—¿Bera dillaan choe'le za'le ni? ¿Berache chakyesh'zile?

¹⁸Na' toe', beena' le Cleofas, chi'ene':

—Yog'zə ben' nezgakile' daa ba gok Jerusalénna' llaki ba wde. ¿Astozo' li' bi nezilo' daa ba gok?

¹⁹Na'ch chi'e legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel' wak na' bi'e dill' zakii dii nak shli' lao Chioza' na' lao ben'. ²⁰Na' bəoxka' chnabia' na' ben'ka' chnabia'gake' cho' ben' Israel bengake'ne' lo na' joschiska' kwenche' bchoglogake' che' guete', na' bda'gake'ne' lee yag cruza'. ²¹Neto' nonnto' lez nan len' yibeje' cho' ben' Israel lo na' ben' zit'ka'. Na' ba gok shon' lla gok diiki. ²²Na' bal' noolka' nak neto' txen wyajgake' cho'a bana' daa baabali, na' le bibaninto' ka wna'gake' ²³bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, ben' goll legake' mbankzə Jesúza'. ²⁴Na'ch wyaj bal' ben' byoka' nonlennto' txen cho'a bleja', na' nakan kon ka wna' noolka', per aga no Jesúza' ble'gakile'.

²⁵Na'ch che' Jesúza' legake':

—¿Le' ben' bi chajni! ¿Bi llabia' bat shajle'le daa bzej dii ben'ka' wdixjee daa goll Chioza' legake'! ²⁶¿Abi nezile lliakzə bia' biya daa yen ile'i beena' nak Cristona' ka zi' yiyo'e gana' sho'e balaan xenna'?

²⁷Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

²⁸Na' ka bllingake' yella' gana' zejgake', bentezə Jesúza' ka ben' shaj gan yoblə. ²⁹Na' ben'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chał.

Na'ch wyoo Jesúza' bigaanlene' legake'. ³⁰Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bəoxje'n na' bi'en legake'. ³¹Na'ch biyombia'yen'gake' nan len' Jesúza', na' to binitloze'. ³²Na'ch che' ljwelle':

—¿Bera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

³³Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlə ben'ka' nalgake'ne' txen, ³⁴na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

³⁵Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bəoxje' yetxtila' bi'en legake'.

Jali'lao Jesúza' ben'ka' nalgake'ne' txen

(Mt. 28:16-20; Mr.

16:14-18; Jn. 20:19-23)

³⁶Na' shlak ni choe'gake' dillaa, tokonganzi jaze Jesúza' ladje'ka' na' bwape' legake' chiox, chi'e legake':

—Soashgale mbalaz.

³⁷ Na' le bllebgake' daa chakgakile' yel bẏenzan chwiagake'. ³⁸ Na' che' Jesúza' legake':

—¿Berache chllebzle? ¿Biçe chak choplall'zle? ³⁹ Li wwia n̄i'a na'ki kwenche inezile nad'kzan. Li gox' nad' kwenche inezile aga nak' to yel bẏen, la' to yel bẏen bibi bel' bibi llit yoon ka nak' nad'.

⁴⁰ Na' ka golle' legake' ka', bliile' legake' n̄i'a neena'. ⁴¹ Na' yel' chiba chizaki che'ka' na' yel' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

⁴² Na'ch be'gake'ne' lat' bel' ba bwey'gake' lo yi'na'. ⁴³ Na' beẏeeb wdawe'b chwiategake'. ⁴⁴ Na' chi'e:

—Ka nak daa ba gok cha', lennan' wnia' le' kana' ni zoalen' le', kana' wnia' llia bia' yillinin gak cha' yog' diika' bzej dii Moiséza', na' diika' bzej dii ben'ka' wdixjee daa goll Chioza' legake' na' diika' da' lee sálmoka'.

⁴⁵ Na'ch ben Jesúza' ka wyajni'gakile' diika' na Cho'a Xtill' Chioza', ⁴⁶ chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon̄ lla yibane' ladj ben' wetka'. ⁴⁷ Na' lekzka' nan: ides cho'a xtilleena' daa nan shi yiyaj yileni ben' dii malka' chongake' na' yiyakxen chegake'. Na' solozan Jerusalénni na' illiljan doxente. ⁴⁸ Na' le' chiyal' ye'le ben' yog' diiki ba ble'ile gok cha'. ⁴⁹ Na' nad' wsełaa beena' bcheb Xa' Chioza' gone' gaklene' le', na' li soatezə Jerusalénni axt kat'ch Xa'na' gone' le' yel' waka' daa za' yabana'.

Biyep Jesúza' yabana'

(Mr. 16:19-20)

⁵⁰ Na'ch bche' Jesúza' legake' wyaj-gake' yell Betániana'. Na' blis neena' benleeye' legake'. ⁵¹ Na' ni chonleeytie' legake', ka bikwase' kwite'ka' na' biyep'e yabana'. ⁵² Na' ben'ka' nakgake'ne' txen, biyoll be'la'ogake'ne', biza'gake' ziyaj-gake' Jerusalénna' chiba chizakgakile'. ⁵³ Na' wzoatezi wzoagake' be'la'ogake' Chioza' yoodo'na'.

Dill' wen dill' kob daa bzej

Juanna'

Beena' nak Xtill'

Chioza' golje' goke' to ben'

1 Ba zoakzə beena' le Xtill' Chios ka wxe wzil yog'lołte dii de. Len' ba zoalene' Chioza', na' lekzen' Chioza', ²na' dezd nechte ba zoalenkze' Chioza'. ³Len' bene' yog'te dii de, na' biga de to dii bi bene'. ⁴Len' cho'e yel' mban, na' nake' beeni' che ben' yell-lioni. ⁵Na' beeni' che'na' chzeeni'n yell-lioni gani nak shgasj shchol' ni che dii mala', na' yel' chol'a' bi bizoyin yisolani beeni'na'.

⁶Wzoa to ben' bsel' Chioza' wlie' Juan. ⁷Juanna' bidyee dill' che beena' nsa' beeni'na' kwenche yog' ben' gonlilall'gake'ne'. ⁸Aga Juanna'yen'nan nsee beeni'na', san to bidtixje'ze' che beena' nsa' beeni'nan'. ⁹Beena' nsa' beeni'na' daa nak dowalj daa wzeeni'n lao yog'loł ben', ba zee yell-lioni.

¹⁰Na' beena' nsa' beeni'na' bidsoe' yell-lioni, na' la'kzi le' bxe bsile' yell-lioni, ben'ka' lle' lawinna' aga gokbe'gakile' non nake'. ¹¹Blline' ladj ben'ka' nak ben' yell che', na' legake' bi blebgake'ne'. ¹²Per yog' ben'ka' blebgake'ne' na' benlilall'gake'ne', bene' legake' xiin' Chios. ¹³Na' aga daa nakgake' ben' de beli chenan, wa daa cheeni ben' soalen ljwellen', ni aga daa cheeni ben' soa xiinen', san daa benlilall'gake'nen' gokgake' xiin' Chios.

¹⁴Na' beena' le Xtill' Chios golje' goke' to ben' de beli chen na' wzoe' ladjnto'ni. Na' ble'into'ne' nake' ben' zakii nleb daa nake' Xiin' tlis' tyaj Xacho Chioza', na' nake' ben' lall'do' xen inleb na' bli'e do ka nak dii lina'. ¹⁵Na' Juanna' bi'e dill' che' wne':

—Che beenin bzajniid' le' kana' wnia': “Beena' zi' za' nake' ben' zak'chi aga ka nad', la' ba zoakze' kana' zi' soa' nad'.”

¹⁶Daa nake' ben' wen inleb na' daa chakchgaile' cho', dii zan dii wenka' ba bene' che yog'cho. ¹⁷Dii Moiséza' bzajniile' cho' diika' bllia Chioza' bia' goncho; per Jesucristona' bli'e yel' chiyesh'lalli che Chioza' len dii li che'na'. ¹⁸Ni to konon' ile'i Chioza', per Xiine'na' nak tlis' tyaj, beena' zoalene'ne', len' bidlile' cho' ka nake'.

Juanna', beena' bchoa ben' nisa', bi'e xtill' Jesucristona'

(Mt. 3:11-12; Mr. 1:7-8; Lc. 3:15-17)

¹⁹Ben' wñabia' che ben' Israelka' lle' Jerusalenna' bsel'gake' to chop bxož na' sto chop ben'ka' nak xiin' dia che dii Levina' kwenche janabgakile' Juanna' non nake'. ²⁰Na' bi bkwashee non nake', san golle' legake':

—Aga nadaan Cristona', beena' chbezcho wsel' Chioza'.

²¹Na'ch wiznabgakile'ne':

—¿Norakzan nako' shka'? ¿Alin' Elíaza', beena' wdixjee daa goll Chioza'ne' kani'yi?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche chixji'e daa che' Chioza'ne', shka'?

Na' che' Juanna':

—Akza le' nad'.

²²Na'ch che'gake'ne':

—¿Norakzə li', shka'? Cheeninto' inezinto' kwenche lljayellnto' ben'ka' bsel' neto' non nako'. ¿Bi ka ino' che kwino'?

²³Na'ch che' Juanna' legake':

—Dii Isafaza', beena' wdixjee daa goll Chioza'ne' kani'yi, dill' chan' bi'e kana' wne': “To ben' gosyee zillj latja' gana' bibi chashj chleb, na' ine': Li se kwas kwenche wzenagle che Xanchona' kat' zee.”

²⁴ Na' beṇ'ka' bseḷ' fariseoka'
²⁵ wṇabgakile'ne':

—¿Berache chchoazo' beṇ' nis shi aga lin' Crístona', ni Elíaza', ni beena' llia bia' wseḷ' Chioza' kwenche chixji'e daa chi'ene'?

²⁶ Na' che' Juanna' ḷegake':

—Nad' chchoa' beṇ' nis, per ladjleni zoa to beṇ' bi nombia'le, ²⁷ na' ḷen' zi' wli'lawe'. Na' nad' ni bi zakaa gak' xmose' kwenche galj' ḷa'ch' xele'na'.

²⁸ Yog' diiki gok gana' le Betania, daa llia shḷaa yao Jordanna', gana' bchoa Juanna' beṇ' nisa'.

**Jesúza', beena' bseḷ' Chioza',
 zaklebile' xil'do'na' chitgake'**

²⁹ Na' betiyo ble'i Juanna' Jesúza' zeje' kwite'na', na' chi'e:

—ḷi wwia, beenin bseḷ' Chioza' na' zaklebile' xil'do'na' chitcho, ḷa' ḷen' yikwase' saaxya che beṇ' yell-lioni. ³⁰ Na' xtill' beenin bi'a kana' wnia': "Zi' za' to beṇ' zak'chi ka nad', na' ba zoakz beeni kana' zi' soa'." ³¹ Ni nad' bi wṇezid' no xtilliin bi'a, per kwenche gombia' beṇ' Israelki ḷe', bidchoa' beṇ' nis.

³² Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' ḷe'.

³³ ḷa' ni nad' bi wṇezid' no xtilliin bi'a, per Chioza', beena' bseḷ' nad' chchoa' beṇ' nis, wne': "ḷe'ilo' yetj Espíritu cha'na' llj-soalene' beena' wlej', na' ḷen' gone' ka yidsoa Espíritu Sántona' loo yichjlall'do' beṇ'." ³⁴ Ba ble'id' gok ka wna Chioza' nad', na' naa nia' le' beenin Xiin Chioza'.

Beṇ'ka' bengake' Jesúza' txen dii nech

³⁵ Na' betiyo Juanna' zelene' chop beṇ'ka' naggake'ne' txen. ³⁶ Na' ka ble'ile' chda Jesúza' na', na'ch chi'e:

—ḷi wwia, beenin bseḷ' Chioza' na' zaklebile' xil'do'na' chitcho kwenche chiyakxen saaxya chechoka'.

³⁷ Na' chop beṇ'ka' nak Juanna' txen, ka bengakile' wna Juanna' ka', na' janogake' Jesúza'. ³⁸ Na'ch ka biyechj Jesúza', ble'ile' zjanogake'ne' na' chi'e ḷegake':

—¿Bin cheenile?

Na' che'gake'ne':

—Rabí, ¿garan zo'?

(Na' Rabí zejín: beṇ' chli' chsedi beṇ'.)

³⁹ Na' che' Jesúza':

—ḷi da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana', ḷa' ka do chida tapan billinlengake'ne' gana' zoe'.

⁴⁰ Na' beena' le Andrés, beṇ' bish' Simón Pédróna', len sto beṇ' yoblə gok-gake' chopə janogake' Jesúza' ka bengakile' daa wna Juanna' che'. ⁴¹ Na' Andréza' lii jadiljtie' beṇ' bishee Simónna', na' chi'ene':

—Ba billelinto' beena' nak Mesíaza'—.
 Na' Mesías zejín Cristo, beena' chbez-gake' wseḷ' Chioza' kwenche inabi'e.

⁴² Na'ch Andréza' bchi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiin Jonáza', na' naa yilio' Cefas—. Na' Cefas zejín Pedro.

**Jesúza' golle' Felípena' len
 Natanaela' gagkake'ne' txen**

⁴³ Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':

—Da dino nad'.

⁴⁴ Felípena' nake' beṇ' yell Betsaida, gana' nak lall Andréza' na' Pédróna'.

⁴⁵ Na'ch jadilj Felípena' Natanaela' na' chi'ene':

—Ba billelinto' beena' bzej dii Moiséza' xtilleena' lee libr che leya'. Na' ḷekzka' chen' bzej dii beṇ'ka' wdixjee daa goll Chioza' ḷegake' kani'yi. ḷen' Jesúza', beṇ' Nazareta', xiin Joséna'.

⁴⁶ Na' Natanaela' chi'ene':

—¿Aka Nazareta' ichej to ben' zakii?

Na' Felípena' golle'ne':

—Dakachi kwenche gakbe'ilo'.

⁴⁷Na' ka ble'i Jesúza' zej Natanaela' gana' zie', golle':

—Ni za' to ben' nak dowalj ben' Israel, to ben' bi nak ben' wxiye'.

⁴⁸Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yidnelə Felípena' li', ble'id' li' xan yag yixwewa'.

⁴⁹Na' goll Natanaela'ne':

—Maestro, lin' nako' Xiin Chioza'. Na' lin' beena' zidnabia' neto' ben' Israel.

⁵⁰Na' goll Jesúza'ne':

—¿Aadaa wnia' ble'id' li' xan yag yixwe-wan' chajli'o cha'? Zi' ile'chilo' dii xench aga ka dga.

⁵¹Na' lekzka' gollch Jesúza':

—Dii li' nia' le', ile'ile yabana' nyal-jan, na' ben'ka' nak anjl che Chioza' chep chetjgake' lawa', nad', Ben' Bse! Chioza' Yell-lioni.

Got' to wishagna' yella' le Caná

2 Na' biyon lla got' to wishagna' yella' le Caná daa llia gana' mbani Galileana', na' na' len xna' Jesúza'. ²Na' lekzka' goxgake' Jesúza' na' ben'ka' nakgake'ne' txen. ³Na' shlak chak lnina' bibill vino che'ka', na' goll xna' Jesúza'ne':

—Ba bibill vino che ben'ki.

⁴Na'ch che' Jesúza'ne':

—¿Berache nazo' nad' ka'? Bin' gal' gon' daa llia bia' gon'.

⁵Per xneena' golle' wen mandadka':

—Li gon kon bin ine' le'.

⁶Na' na' zoa xop yes' xen de yaj, dii choll nis, diika' chon llin kat' ben' Israelka' chixi chiyechgake' kon ka na ley che'ka'. Na' to to yes'ka' chollan ka do shon yid nis. ⁷Na' che' Jesúza' wen mandadka':

—Li kaa nisa' loo yes'ki.

Na' wda'gake'n axt ka billa'chagakan.

⁸Na'ch che' Jesúza' legake':

—Li gash' lataan naa na' li lljeen beena' ngoo lo neen.

Na' bengake' ka golle'. ⁹Na' beena' ngoo lo neen bnixe' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna', ¹⁰chi'eb':

—Yog' ben' zigaate chdie' vino wenna', na' kat' ba weej ben'ka' len lnina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹Yel' waki dga ben Jesúza' yell Canána' daa llia gana' mbani Galileana', lennan' bene' dii nech. Na' ka' bli'e yel' wak che'na' nape', na'ch ben'ka' nongake' le' txen ben'li' lall'gake'ne'.

¹²Na' ka wde, biyaje' Capernaúma' len xneena', len ben' bisheeka' na' len ben'ka' nakgake'ne' txen, na' wzoagake' na' to chop shon lla.

Bishesh Jesúza' ben'ka' chit' chde lesh' chyoodo'na'

(Mt. 21:12-13; Mr.

11:15-18; Lc. 19:45-46)

¹³Na' ka ba zoa gal' lni Paskwa' daa chon ben' Israelka', wyaj Jesúza' Jerusalenna'. ¹⁴Na' ka blline' lesh' chyoodo'na', ble'ile' lle' ben' chit'gake' goon, xil', na' palom, na' lekzka' na' chi' ben'ka' chisha' mecha'. ¹⁵Na' ka ble'ile' ka chak, bene' to do tashj, na' kon len bisheshile' yog'lole' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'. ¹⁶Na' ben'ka' chit' palomka', golle' legake':

—¿Li yishesh baki ni! ¿Bi gonzle lill Xa'na' ka lao yaa!

¹⁷Na'ch ben'ka' nakgake'ne' txen jadin-gakile' Cho'a Xtill' Chioza' gana' nan: “Daa le chakid' lill xlatjo'na' len wlliyai'n nad'.”

¹⁸ Na'ch ben' Israelka' lle' na' che'gake' Jesúza':

—¿Bi yel' wak gono' dii wli'n napo' yel' wñabia' kwenche chono' diiki?

¹⁹ Na' che' Jesúza' legake':

—Li yichinj yoodo'ni na' lo shoñə llazə yiyona'n.

²⁰ Na'ch che' ben' Israelka' le':

—Xopiyon yiz bengake' yoodo'ni, na' li' nazo' shoñə llazə yiyono'n.

²¹ Per daa goll Jesúza' legake' ka', kwerp che'nan' bsaklebile' yoodo'na'. ²² Na'ch ka' biban Jesúza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtill' Chioza' na' dill'ka' be' Jesúza'.

Nombia' Jesúza' yichjlall'do' yog'cho

²³ Na' shlak zoa Jesúza' lni Paskwa' Jerusaléna', ben' zan wyajle'gake' che' daa ble'gakile' yel' wakka' bene'. ²⁴ Per Jesúza' bi bñenilallee legake', la' nombi'e yichjlall'do' yog'lo' ben'. ²⁵ Aga byalljile' no yee le' nakan nak benecha', la' kwaslo' nombi'e yichjlall'do'eka'.

Jesúza' bshaljlene' Nicodémona'

3 Wzoa to fariseo ben' wle Nicodemo, na' goke' to ben' wñabia' ladj ben' Israelka'. ² Na' Nicodémona' wyaje' jawie' Jesúza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi' wak gono' yel' wakka' chono' shel' bi' zoalen Chioza' li'.

³ Na'ch Jesúza' chi'ene':

—Dii li' nia' li', beena' bi' yiyalj dii yoblə aga wak lljazoe' gana' chñabia' Chioza'.

⁴ Na' che' Nicodémona'ne':

—¿Nakra gon to ben' gol yiyaljze' dii yoblə? La' aga wak yiyo'e loo lee xneena' kwenche yiyalje' sto shii.

⁵ Na' Jesúza' chi'ene':

—Dii li' nia' li', kono' gak yiyaj gana' zoa Chioza' chñabi'e shi biñ' galjlenile' nis' ^{††}na' yikob Espiritu che Chioza' yichjlall'do'ena' kwenche gake' ka' ben' galj sto shii. ⁶ Beena' nak xiin ben' de beli chen, de beli chenchokzan nake'. Per beena' chikob Espiritu che Chioza'ne', nake' xiin Chios na' de to yel' mban che' daa bi te cheyin. ⁷ Bi yibanilo' daa nia' li': “Yog' ben' chiyal' galje' dii yoblə.” ⁸ Kat' chze be'na' na' chajan kon ga cheenin, na' la'kzi chenicho ka' sshag chonan aga nezicho galan za'n, ni bi nezicho galan zejan. Lekzkan' aga nezicho nakan chon Espiritu che Chioza' kwenche chiyalj ben' dii yoblə.

⁹ Na'ch wiznabi Nicodémona'ne':

—¿Nakra gak gakz dga?

¹⁰ Na' che' Jesúza'ne':

—Len naktio' to ben' chli' chsedi ben' Israelki, ¿ana' bi nezilo' diiki? ¹¹ Dii li' nia' li', choe'nto' dill' che daa nezinto' na' daa ben ble'into', per bi chajle'le daa nanto' le'. ¹² Shi bi chajle'le daa wnia' le' che diika' chak yell-lioni, ¿alechlə shi we'len' le' dill' che daa nak che yabana'?

¹³ Ni to konon' shep yabana', toz nad', Ben' Bsel' Chioza' Yell-lioni, nak' ben' za' yabana'. ¹⁴ Na' ka' ben dii Moiséza' gana' bibi chashj chleb bdee bel' de broncena' lee yaga', ka'kzan gongakile' nad', Ben' Bsel' Chioza' Yell-lioni. Wda'gake' nad' lee yaga' ¹⁵ kwenche nottez ben' gonlilall' nad' bi kwiayee, san gat' to yel' mban che' zejli kani.

Chaki Chioza' yog' ben' yell-lio

¹⁶ Daa le' chakchgayi Chioza' ben' yell-lioni, bselee Xiine'na' tlish' tyaj kwenche nottez ben' gonlilalleene' bi kwiayee, san gat' yel' mban che' zejli kani. ¹⁷ Chioza' bselee xiine'na' yell-lioni aga kwenche

^{††}3:5 Galjlenile' nis: bal ben'ka' nsed nagake' zejin daa chchoacho nisa', na' zi bal-gake' nagake' zejin nisa' daa chzani xna'chona' cho', na' zi balgake' nagake' zejin daa chixis chiyib Espirituna' cho' kat' chonlilall'cho Cristona'.

wlliaeye be_{na}an, san kwen_{che} yisle' legaken'.

¹⁸ Beena' nonlilall' Xiin Chioza', bich nchoglo che' sak'zi'e, san beena' bi nonlilalleene', ba nchoglo che' kwiayee daa bi nonlilallee Xiin tlish' tyaj Chioza'.

¹⁹ Ba nchoglo kwiayi' ben' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel chol'a' aga ka beeni'na'. ²⁰ Yog' ben'ka' chon diika' bi yejni'alalii chakzbangakile' beeni'na', na' aga willjabig'lat'gake' lawinna' daa chllibgake' wli'lawi dii mala' chongake'. ²¹ San ben'ka' zoagake' chongake' ka na dill' li che Chioza', chbig'gake' lao beeni' che'na' kwen_{che} gakbia' chongake' ka cheeni Chioza'.

Juanna', beena' bchoa ben' nisa', be'che' xtill' Jesúza'

²² Ka wde, wyaj Jesúza' Judeana' len ben'ka' nakgake'ne' txen na' wzoagake' na' xtít wen, na' bchoagake' ben' nis. ²³ Na' Juanna' lekzka' chchoe' ben' nis gana' le Enón, gaozə gana' le Salim, la' na' de nis zil, na' chaj ben' kwen_{che} chchoe' legake' nisa'. ²⁴ Diiki gokgakan kana' zi' koogake' Juanna' lillyana'.

²⁵ Na'ch ben'ka' nakgake' Juanna' txen gokdil'-lengake' sto ben' Israel ni cheyi diika' yoologake' chongake' kwen_{che} chixi chiyechgake' lao Chioza'. ²⁶ Na' wyajgake' jellgake' Juanna':

—Maestro, beena' wzeleno' sh_laa yao Jordanna', beena' bi'o xtilleena', ba chchoe' ben' nis na' yog'zə ben' chajgake' kwite'na'.

²⁷ Na'ch che' Juanna' legake':

—Kono gak bi gon shi Chioza' bi wi'e latj. ²⁸ Kwinkzle benile kana' wnia' aga nadaan Crístona', beena' chbezcho wsel' Chioza', san nak' to ben' bselee kwen_{che} kwialoa' lawe'na' na' yep' ben' wzenagake' che'. ²⁹ To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwitbaa, le chibaib' ka

chenib' chshaljb'. Kayen'nan chak cha', le chibaid' daa chzenaggake' che Crístona'. ³⁰ Len' zizikchli seyi che', na' nad' bichtek seyi cha'.

Beena' za' yabana'

³¹ 'Ka nak beena' za' yabana', len zak'chi' aga ka yog'lol ben'. Na' ben'ka' lle' yell-lioni, chinogake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte ben', ³² na' choe' dill' cheyi diika' ba ben ble'ile' yabana', per balchga ben' chajle' xtilleena'. ³³ Na' nottez beena' chajle' che', chli'e Chioza' cho'e dill' li. ³⁴ Beena' bsel' Chioza', cho'a xtill' Chiozan' cho'e, la' Chioza' no'ene' do ka nak Espíritu che'na'. ³⁵ Chioza' chakile' Xiine'na', na' ba bene' lall' nee yog'lolte dii de. ³⁶ Na' beena' gonlilall' Xiin Chioza' gat' yel' mban che' zejli kani. Per beena' bi cheeni gonlilalleene' bi gat' yel' mban che' zejli kani, san ile'ile' yel' zak'zi'na' we' Chioza'.

Bshaljlen Jesúza' to nool Samaria

4 Fariseoka' gokbe'gakile' ben' zanch nakgake' Jesúza' txen, na' ben' zanch chchoe' nisa' aga ka Juanna', ² la'kzi aga kwín Jesúzan' bchoe' ben' nisa', san ben'ka' nakgake'ne' txenan. ³ Na' ka gokbe'i Jesúza' ba nezi fariseoka' ben' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

⁴ Na' kwen_{che} yilline' gana' mbani Galileana' chiya' yidie' gana' mbani Samáriana'. ⁵ Na' billingake' to yell dii le Sicar, daa lliá gana' mbani Samáriana'. Na' yella' llian gaozə gana' de yell-liona' be' dii Jacoba' xiine' dii Joséna'. ⁶ Na' lo yell-liona' lliá posa' wden dii Jacoba'. Na'ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill. ⁷⁻⁸ Na' ben'ka' nakgake'ne' txen zejgake' yella' zjxi'gake' daa gaolen-

gake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Ben' lat' nis yeej'.

⁹Na'ch che' noolə Samáriana'ne':

—¿Berache chnabzilo' nad' nisa' yeejo?', la' ben' Israel li', na' nool Samaria nad'.

Golle' ka' la' ben' Israelka' bi zoalen-gake' wen ben' Samáriaka'. ¹⁰Na'ch che' Jesúza'ne':

—Shel'ka' nezshailo' daa chon Chioza' na' no nad' chnabid' li' nisa' yeej', ba wna-bilo' nad' gon' daa yeejo', shel'ka', la' nap' to nis yaa nis ban daa gon' li'.

¹¹Na' noola' chi'ene':

—Ben'do', bibi noxoo wlepilo' nisa', na' posi le zitjan. ¿Gara lljxi'o nis yaa nis banna' gon' nad' nazo' ka'? ¹²Dii xoxzto'cho Jacoba' bkwaanlene' neto' posi gani weeje', na' weej xiine'ka' na' bayix' che'ka'. ¿Achakilo' zak'chilo' ka' le'?

¹³Na' che' Jesúza'ne':

—Nottezə ben' cheeje' nis che posi, wbilchkzile' dii yoblə. ¹⁴San beena' yeej nisa' daa wi'ane', aga wbilchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kanj.

¹⁵Na'ch che' noola'ne':

—Ben'do', ben' nad' nisa' no' ka' kwenche bich ibilid' na' bich yid beja' ni.

¹⁶Na' che' Jesúza'ne':

—Biyaj jane ben' cho'na', na' dalene' ni.

¹⁷Na' che' noola'ne':

—Aga no ben' cha' zoa.

Na' Jesúza' chi'ene':

—Lekzilo' no' ka', aga no ben' cho' zoa.

¹⁸La' ba gok gay' ben' cho'ka', na' beena' zoaleno' naa ni bi nshagna'lenkzo'ne'. Shlikzan ba wni'o.

¹⁹Na'ch noola' chi'ene':

—Ben'do', ba gokbe'id' nako' to ben' chyixjee daa na Chioza'. ²⁰Dii

xoxzto'nto'ka' be'la'ogake' Chioza' lo yaani, na' le' ben' Israel nale chonan byen we'la'ochone' Jerusalénna'.

²¹Na' che' Jesúza'ne':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusalénna' kwenche we'la'ole Xacho Chioza'. ²²Le' ben' Samaria ni bi nombia'le non choe'la'ole, san neto' ben' Israel nombia'nto' Chioza', beena' choe'la'onto', la' ladjnto'nan' ichej beena' yisle' ben' kwenche bi kwiayi'gake'. ²³Ba zoa illin lla, wa ba bllinkz llana' ben'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'. ²⁴Chioza' nake' Espiritu, na' ben'ka' cheengakile' we'la'ogake'ne', chiya' we'la'ogake'ne' dowalj na' do yichj do lall'gake'.

²⁵Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

²⁶Na' che' Jesúza'ne':

—Nad'kzan' beena' no' ka', na' len' chshaljlene' li'.

²⁷Na' shlak choe'lene' noola' dill', billin ben'ka' nakgake'ne' txen na' biban-gakile' daa chshaljlen Jesúza' to noolə. Per ni toe' bi biyaxji inabile'ne' bin cheeni noola' wa bi dillaan chshalj-lene'ne'. ²⁸Na'ch noola' bkwaane' chee nis che'na' na'zə, na' biyaje' jayelle' ben' wlall che'ka':

²⁹—Li da lljawiacho to ben' ba wne' nad' yog' diika' ba ben'. ¿Aaga len' Cris-tona', lla?

³⁰Na'ch blleshgake' yella' wyajgake' gana' chi' Jesúza'. ³¹Na' shlak ziyaj noola' zeyid ben'ka' nak Jesúza' txen che'gake'ne':

—Maestro, wdao lat'.

³²Na' Jesúza' chi'e legake':

—De to yel' wao cha' daa bi nombia'le.

³³ Na'ch che' l'jwell ben'ka' nakgake'ne' t'xen:

—¿Anti no ba bidwa' dii wdawe', lla?

³⁴ Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'. ³⁵ Le' nazle: “Chyalljch zi tap beo' kwenche yizi' yilapcho.” Per nad' nia' le', li wwiakachi ba de daa yizi' yilapcho. ³⁶ Beena' chyixjee cho'a xtill' Chioza' naa, zaklebile' to ben' ba chilalile' chizi' chilape'. Na' ben'ka' chzenag daa chyixj'e, gat' to yel' mban che-gake' zejli kani, na' beena' goz yibalenile' beena' chizi' chilap. ³⁷ Nakan ka dillaa de daa na: “Ben' yoblan chaz na' ben' yoblə chizi' chilap.” ³⁸ Nad' ba bselaa le' ljalaple gana' bi bllaglole gozle, la' le' gonle ka wzenag ben' cho'a xtill' Chioza' daa wdixjee ben' yoblə.

³⁹ Ben' zan ben' Samáriaka', ben'ka' lle' yell Sicara' benlilall'gake' Jesúza' daa goll noola' legake': “Ba wne' nad' yog'te dii ba ben'.” ⁴⁰ Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaane' na' chop lla. ⁴¹ Na' ben' zanch benlilall'gake'ne' daa bengakile' dillaa cho'e. ⁴² Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' nezinto' dii li lekzen' beena' yisla ben' yell-lioni kwenche bi kwiayi'gake'.

Jesúza' biyone' xiin to ben' wñabia'

⁴³ Na' ka gok chop lla, bizee biyaje' gana' mbani Galileana'. ⁴⁴ Kwinkz Jesúza' wne' nan to ben' chyixjee daa che' Chioza'ne' aga no chgoo le' balaan lalle'na'. ⁴⁵ Na' ka billine' gana' mbani Galileana', blebgake'ne' daa ble'gakile' yog' daa bene' Jerusalénna' ka gol' lni Paskwa'.

⁴⁶ Na' dii yoblə wizaj Jesúza' yell Canána' daa llia gana' mbani Galileana',

gana' biyone' nisa' vino. Na' yella' zoa to ben' zakii ben' chon llin che ben' wñabia'na', na' zoa to xiine' bi' byo bi shao'b'. ⁴⁷ Na' ka wñezile' ba billin Jesúza' Galileana' zizee Judeana'lə, na' wyaje' lawe'na' got'yoile'ne' shaje' ll-jayene' bi' che'na' daa ba chakshwetb'. ⁴⁸ Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹ Na' ben' wñabia'na' chi'ene':

—Ben'do', ben goklen dagach naate, shategali bin' guet bi' cha'na'.

⁵⁰ Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee. ⁵¹ Na' ka ba zoa yilline' lille'na' jatil xmore'ka' le', che'gake'ne':

—Ba biyaki bi' cho'na'.

⁵² Na'ch wñabile' legake' ka do bi gor wzolo chiyakshao'lall'b'. Na' che'gake'ne':

—Daa neji do ka chida to bichejb' dii lana'.

⁵³ Na'ch gokbe'i xabaa biyakshao'lall'b' ka gora' goll Jesúza'ne': “Biyaj jawia. Aga wet bi'na'.” Na' le' len yog' ben'ka' zoa lille'na' benlilall'gake' Jesúza'.

⁵⁴ Dga gok de wchopi yel' wakka' ben Jesúza' Galileana' ka zizee Judeana'.

Biyon Jesúza' to ben' net ni'a nee

5 Ka wde gok diiki, gol' to lni che ben' Israelka' Jerusalénna', na' biyaj Jesúza' lina'. ² Na' Jerusalénna', gaozə cho'a puerta' le Puert Che Xil'ka' llia to tang dii le Betesda dill' hebreo. Na' gay' koridor nechjan tanga'. ³ Na' loo koridorka' de ben' zan ben' we', no ben' lchol, no ben' bi chak sa' wen, na' no ben' net ni'a nee, chbezgake' ta nisa'. ⁴ La' zoa kat' chetj to anjl cho'a tanga' chte' nisa', na' beena' chyobi cho'e loo nisa' chiyoll chta anjla'n chiyakile' bittezə yillwe' che'ile'. ⁵ Na' ladj ben'ka' lle' na' len to ben' ba gok shin'shonichoa yiz bi shawee. ⁶ Na'

ble'i Jesúza'ne' na' gokbe'ile' ba wlla die' ka', na'ch chi'ene':

—¿Acheenilo' yiyakilo'?

⁷Na'ch beena' bi shao' chi'ene':

—Ben'do', aga no zoa cha' wletje' nad' loo nisi kat' chdan. Na' kat' chakid' yetj' loo nisa', ben' yoblə lii chjsho'tie' lo'inna'.

⁸Na'ch che' Jesúza'ne':

—Biyas, bitob daa cho'na' biyoa'n na' bigoo nez.

⁹Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'.

¹⁰Na' ben'ka' chnabia' ben' Israelka' goll-gake' beena' biyaki:

—Lla chombaanchō naa. Aga bi lsens de woo daa cho'na'.

¹¹Na'ch che' beena' legake':

—Beena' biyone' nad' len' wne': “Bitob daa cho'na' biyoa'n na' bigoo nez.”

¹²Na'ch che'gake'ne':

—¿Nora beena' wna li': “Bitob daa cho'na' biyoa'n na' bigoo nez?”

¹³Na' beena' biyaki aga nezile' non biyon le', la' Jesúza' ba bikwase' ladj ben'ka' lle' na'. ¹⁴Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwenche ki wtilcho' dii walch.

¹⁵Na'ch beena' biyaje' lao ben' wnabia' che ben' Israelka' jayelle' legake' nan Jesúza' biyone'ne'. ¹⁶Na' daa ben Jesúza' yel' waka' lla sabda', llana' chombaangake', goklall'gake' witagake'ne'. ¹⁷Na' Jesúza' chi'e legake':

—Xa'na' bittezə lla chone' llin na' ka'kzə nad'.

¹⁸Na'ch ben' wnabia' che ben' Israelka' goklall'gake' witagake'ne' aga toz daa wdishje' leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wnabia' daa nap Xiin Chioza'

¹⁹Na' Jesúza' chi'e legake':

—Dii li nia' le', nad', Xiin Chios, aga bi gak gon' tobialoz', san daa chle'id' chon Xa'nan' lekzannan' chon'. ²⁰La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techlə ka diiki, dii gonan ka yibanchile. ²¹Ka chon Xa'na' chisbane' ben' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə ben' cheenid' wi'an. ²²Na' Xa'na' aga ga chhogloe' che ben', san nad' nak' Xiine', ba bene' lall' na' wchogloa' che yog'lo' ben'. ²³Bene' ka' kwenche yog' ben' koogake' nad' balaanna' ka daa chgoogake' Xa'na'. Beena' bi chgwee nad' balaan, nad' nak' Xiin Chios, lekzka' bi chgwee Xa'na' balaan, beena' bsel' nad'.

²⁴'Dii li nia' le', beena' chzenag xtil-laana' na' chonjilallee beena' bsel' nad', gat' yel' mban che' zejli kani. Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin. ²⁵Dii li nia' le', wllin lla kat' ben' wetka' yengakile' inia' legake', nad' nak' Xiin Chios, na' ben'ka' yengakile' kat' inia' na' yibangake'. ²⁶Xa'na' nape' yel' wak kwenche wi'e yel' mban che ben' daa bi te cheyin. Ka'kzə ba bene' nad' Xiine' yel' wak kwenche wi'a yel' mban che ben' daa bi te cheyin. ²⁷Na' lekzka' ba bene' nad' yel' wnabia' kwenche gon' yel' joschis daa nak' Ben' Bsel' Chioza' Yell-lioni. ²⁸Bi yibanile daa nia' ka', la' wllin lla wllin gor yeni yog'te ben' wetka' kat' inia' legake'. ²⁹Na' ka yengakile' inia' na'ch yichejgake' loo bana'. Na' ben'ka' ben dii wenna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kani.

Jesúza' bli'e yel' wnabia' che'na'

³⁰'Ni to bibi gak gon' tobialoz', san chhogloa' che ben' kon ka nllia Chioza' bia' gon', na' kon ka nakan-

nan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'. ³¹Na' shi nad' wi'a dill' che kwini', nezid' aga no shajle' cha'. ³²San zoa to ben' cho'e xtillaana', na' nezid' daa ne' cha' nakan shlich'a. ³³Le' bsel'le ben' janabgakile' Juanna' bi ka ine' cha', na' dillaa daa bi'e cha' nakan dii li. ³⁴La'kzi nad' bi chyalljid' we' ben' yell-lioni xtillaa; nia' le' diiki kwenche yillale na' bi kwiayi'le. ³⁵Juanna' goke' ka to yi' dii bzeeni' na' le bibaile bzenagle che' tolde. ³⁶Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'. ³⁷Xa'na', beena' bsel' nad', lekzka' ba bi'e dill' cha'. Ni shlin bigan' yenile inie' ni bin' ile'ilene' nak nake'. ³⁸Na' cho'a xtilleena' bin' sho'n loo yichjlall'do'lana', la' bi chajle'le cha', nad' ben' bselee. ³⁹Le' chsedchgale Cho'a Xtill' Chioza' daa chakile le'inna' yillele nakla ka gonle kwenche gat' yel' mban chele zejli kani. Na' la'kzi Cho'a Xtill' Chioza' choe'n xtillaana', ⁴⁰aga cheenile gakle nad' txen kwenche gat' yel' mban chele daa bi te cheyin.

⁴¹Aga chyalljid' no koo nad' balaan. ⁴²Na' nombia' le', na' nezid' aga chakile Chioza'. ⁴³Xa' Chioza' bselee nad' na' ba bid', na' bi chzenagle cha'. San shi yid ben' yoblə tobialo'ze', beena'lan le gak chele. ⁴⁴¿Nakrakə gonle shajle'le cha'? La' gangazə chgoo ljwell-le balaan, na' bi chinole sho'le balaan che beena' zeelo nak Chios. ⁴⁵Bi gakile nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle lez gaklene' le', len' gawe' xya chele lao Xa' Chioza'. ⁴⁶La' shel' chajle'le daa bzej dii Moiséza', lekzka' wyajle'le cha', shel'ka'. La' len' bzeje' xtilleana'. ⁴⁷Na' daa bi chajle'le che daa bzej dii Moiséza', ¿nakra gonle shajle'le che diiki nia'?

Bwao Jesúza' wdeli gayaa mil ben'

(Mt. 14:13-21; Mr. 6:30-44; Lc. 9:10-17)

6 Na' ka wde, Jesúza' wyaje' shlaa nido' che Galileana', daa lekzka' le nido' che Tiberias. ²Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'. ³Na'ch wyep Jesúza' to lo yaa na' wche'lene' ben'ka' nakgake'ne' txen. ⁴Na' ba zoa gal' Ini Paskw che ben' Israelka'. ⁵Ka ble'i Jesúza' ben' zan ba bllin gana' chi'e, na' chi'e Felípena':

—¿Gara lljxi'cho dii gao yog' ben'ki?

⁶Golle' ka' daa chakile' la'shki bi yee Felípena', la' ba nezakile' nakan gone'.

⁷Na' Felípena' chi'ene':

—Aga waki laxj to ben' che xon' beo' lljxi'yicho dii gao yog' ben'ki lat' wej.

⁸Na' sto beena' nak Jesúza' txen lie' Andrés, ben' bish' Simón Pédrona', chi'ene':

⁹—Ni ze to bi' xkwid' no'ab' gay' yetxtil de cebada na' zi chop bel'. Per bizə daa par yog' ben'ki.

¹⁰Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil. ¹¹Na'ch bex' Jesúza' yetxtilka', na' bi'e Chioza' yel' choxken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' axt ka beljgakile'. Na' lekzka' bene' che bel'ka'. ¹²Na' ka beljgakile', na'ch chi'e ben'ka' nakgake'ne' txen:

—Li yitop yog'lol' dii lao'ka' bichoonan kwenche bibi gaktitj.

¹³Na'ch bitopgake'n, biyakte shllin xet' diika' bichoonan lao yetxtilka' gay'.

¹⁴Na' ka ble'i ben'ka' yel' waka' daa ben Jesúza', na'ch che' ljwellgake':

—Dii li beenin nake' beena' lli'a bia' yid yell-lioni kwenche chixji'e daa che' Chioza'ne'.

¹⁵ Na' daa gokbe'i Jesúza' cheengakile' yiche'gake'ne' kwenche wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

Wza' Jesúza' lo nisdo'na'

(Mt. 14:22-27; Mr. 6:45-52)

¹⁶ Ka ba chal, ben'ka' nak Jesúza' txen biyetjgake' cho'a nisdo'na'. ¹⁷ Na' biyoogake' to loo barkw kwenche ziyajgake' yell Capernaúma'. Ba goj na' bin' yillin Jesúza' kwite'ka'. ¹⁸ Na'ch wzolo wzechga be'na' na' wzolo chas chat' nisdo'na'. ¹⁹ Na' ka do gay' wa xop kilómetro ba wza'len barkwa' legake' lo nisdo'na' kat' ble'gakile' Jesúza' zeje' tlo nisdo'na' zjatile' barkwa' na' le blleb-gake'. ²⁰ Na' Jesúza' chi'e legake':

—Nad'kzan, jbi illeble!

²¹ Na' chibagakile' bigoogake'ne' loo barkwa', na' lii bllintekzgake' gana' chwiagake' illingake'.

Zan ben' chiyiljgake' Jesúza'

²² Na' betiyo gokbe'i ben'ka' bigaan shlaa nisdo'na' nan tochgá barkwa' got' na' to ben'ka' nonz Jesúza' txen biyoogake'n na' bi len Jesúza' biyoolene' legake'. ²³ Na' gaozə gana' wdaogake' yetx-tilka' ka wde be' Xancho Jesúza' Chioza' yell choxken, bllin sto chop barkw dii za' yell Tibériaza'. ²⁴ Na' ka gokbe'i ben'ka' aga no Jesúza' nla' ni ben'ka' nakgake'ne' txen, na'ch biyoogake' loo barkwka' ziyajgake' Capernaúma' jadjiljgake'ne'.

Jesúza' nake' ka to yel' wao dii choṇa'n yel' mban

²⁵ Na' ka bllingake' shlaa nisdo'na' jadjigake'ne', na' gollgake'ne':

—Maestro, ¿bat biyedo' ni?

²⁶ Na' Jesúza' chi'e legake':

—Dii li nia' le', chiyiljle nad' aga daa wyajni'lati'le bi zejin yel' wakka' benan', san daa wdaozele axt ka beljilen. ²⁷ Bi yilal yizodzile kwenche gat' dii yeej gaole,

la' dii te cheyin nak daa. San li gal' kwe'no daa gon yel' mban chele zejli kani, daa gon' nad', Ben' Bsel' Chioza' Yell-lioni. La' Xa' Chioza' ba bene'n lall' na' wi'an.

²⁸ Na' che'gake'ne':

—¿Beran chiyal' gonnto' kwenche gonnto' daa cheeni Chioza'?

²⁹ Na' che' Jesúza' legake':

—Daa cheeni Chioza' gonle, gonli-lall'le nad', ben' bselee.

³⁰ Na'ch che'gake'ne':

—¿Bera yel' wak gono' ile'into' kwenche shajle'nto' cho'? ¿Bi ka gono'?

³¹ Dii xoxxto'choka' wdaogake' daa le maná latja' gana' bibi chashj chleb, ka na Cho'a Xtill' Chioza' gana' na: “Yel' wawa' daa za' yabana' bi'en wdaogake'.”

³² Na' che' Jesúza' legake':

—Dii li nia' le', aga dowaljyen' yel' wao daa za' yabanan' be' dii Moiséza' legake', san Xa'na' chone' daa nak dowalj yel' wao daa za' yabana'. ³³ La' nad', ben' za' yabana', nak' ka to yel' wao dii choe' Chioza' ben' yell-lioki kwenche ibangake'.

³⁴ Na'ch che'gake'ne':

—Ben'do', bengach neto' toshiizi yel' wawa' no' ka'.

³⁵ Na' che' Jesúza' legake':

—Nad' nak' ka yel' wawa' daa choe'n yel' mban che ben'. Beena' gake' nad' txen, gake' ka ben' nelj nlla'i toshiizi. Na' beena' gonlilallee nad', gake' ka to ben' bichga ibili. ³⁶ Per kon ka ba wnia' le', la'kzi ba ble'ile nad' bi chajle'le. ³⁷ Yog' ben'ka' chon Xa'na' lall' na', gakgake' nad' txen. Na' beena' gake' nad' txen aga wzoa'ne' ka'la. ³⁸ La' zaa yabana' na' zoa' yell-lioni aga kwenche gon' daa nazan chan', san zaa kwenche gon' daa cheeni Xa'na', beena' bsel' nad'. ³⁹ Na' Xa'na', beena' bsel' nad', cheenile' bi wi'a latj kwiayi' ni to ben'ka' ba wleje' kwenche gakgake' nad' txen. San cheenile' yisban' legake' ladj ben' wetka' kat' illin

lla te che yell-lioni. ⁴⁰Na' dgan cheeni Xa'na', beena' bse! nad': chaklallee gat' yel' mban zejli kani che yog!ol ben' gakbe'i nak' Xiine' na' gonlilallee nad'. Na' nad' yisbanee ladj ben' wetka' kat' te che yell-lioni.

⁴¹Na'ch ben' wñabia' che ben' Israelka' wzologake' biz chon chnagake' che Jesús'a daa wne': "Nad' nak' yel' wao daa za' yabana'." ⁴²Na' che'gake':

—¿Aaga beenin Jesús, xiin Joséna'? Nombia'cho xaxna' beeni. ¿Berache naze': "nad' za' yabana'?"

⁴³Na'ch che' Jesús'a legake':

—Bibi gon inazle cheyi daa wnia' le'.

⁴⁴Ni to kono gak gon nad' txen shi Xa'na', beena' bse! nad', bi gone' le' lall' na'. Na' ben'ka' nak nad' txen, yisban' legake' kat' te che yell-lioni. ⁴⁵Lee librika' bzej dii ben'ka' wdixjee daa goll Chioza' legake' kani'yi nan: "Chioza' wli' wsedile' yog!olte ben'." Na' yog' ben' chzenag che Xa'na' na' chajni'gakile' daa ne', legaken' chongake' nad' txen.

⁴⁶'Aga ga zoa ben' ba ble'ile' Xa'na'; toz nad', ben' za' yabana', ba ble'idee. ⁴⁷Dii li nia' le', nottez ben' nonlilallee nad' de yel' mban che' zejli kani. ⁴⁸Nadaan nak' ka yel' wawa' daa choe'n yel' mban che ben' zejli kani. ⁴⁹Dii xozxto'leka' wdaogake' daa le maná latja' gana' bibi chashj chleb na' bia'kzə witgake'. ⁵⁰San nad' cho'a dill' che yel' wao daa za' yabana', na' beena' gawe'n aga bi yel' wit zejli kani ile'ile'. ⁵¹Nadaan nak' yel' wao daa za' yabana' daa cho'en yel' mban che ben'. Beena' gao yel' wawi, ibane' zejli kani. Na' yel' wawa' daa wi'ane', lënnan' beli chen cha'ni daa chzanid' kwenche gat' yel' mban che ben' yell-lioni.

⁵²Na'ch ben' Israelka' wzolo chshesh chnegake', che' l'jwelle':

—¿Nakra gon beeni gone' beli chen che'na' gaochon?

⁵³Na' che' Jesús'a legake':

—Nad', Ben' Bse! Chioza' Yell-lioni, dii li nia' le', shi bi gaole kwerp cha'ni na' shi bi yeejle chen cha'ni, aga wat' yel' mban chele daa bi te cheyin. ⁵⁴La' ben'ka' gaogake' kwerp cha'ni na' yeejgake' chen cha'ni, ben'kan' gat' yel' mban chegake' zejli kani. Na' kat' illin lla te che yell-lioni, nad' yisbangakee ladj ben' wetka'. ⁵⁵La' kwerp cha'ni nakan dowalj yel' wao, na' chen cha'ni nakan dowalj dii cheeje'. ⁵⁶Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen. ⁵⁷Xa'na', beena' bse! nad', zoe' zejli kani na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'. ⁵⁸Beli chen cha'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii xozxto'leka' na' bia'kzə witgake'. Beena' gao yel' wawa' daa za' yabana', ibane' zejli kani.

⁵⁹Diikin wna Jesús'a shlak bli' bsdile' ben' gana' chdop chllag ben' Israelka' choe'lwillgake' Chioza' yell Capernaúma'.

Dill' dii nsa' yel' mban

⁶⁰Na' zan ben'ka' nogake'ne', ka ben-gakile' daa wna Jesús'a, na' wnagake':

—Lallj inleeb nak dga chli' chsedi beeni. ¿Notgui gon ka ne'?

⁶¹Na' Jesús'a gokbe'ile' bi wyazlall'gake' xtillee'na', na'ch wñabile' legake':

—¿Achakzbanile dga ba wnia' le'? ⁶²¿Nakra gonle shel'ka' ile'ile nad', Ben' Bse! Chioza' Yell-lioni, yiyep' gana' wzaa? ⁶³Espíritu che Chioza' cho'e yel' mban che ben', la' beli chenna' aga bi za-kiin. Dill'ka' ba wnia' gonan ka soalen Espírituna' le' na' gat' yel' mban chele. ⁶⁴Per bia'kzə zoa ba!-le bi chajle'le.

Goll Jesús'a legake' ka', la' dezd nechte ba nezskzile' no ben'ka' bi chajle' che' na'

non gon le' lo na' ben' malka'. ⁶⁵Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

⁶⁶Na' lo llana'tez ben' zan ben'ka' nakgake'ne' txen bkwasgake' bich janogake'ne'. ⁶⁷Na'ch che' Jesúza' ben'ka' shllin, ben'ka' nakgake'ne' txen:

—¿Alekzka' lenle cheenile yiyajle?

⁶⁸Na' Simón Pédróna' chi'ene':

—Xan', aga nochlə cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kani.

⁶⁹Ba wyajle'nto' cho', na' nezinto' lin' Crístona', Xiin Chios yaa Chios banna'.

⁷⁰Na' Jesúza' chi'e legake':

—Ba wlej' shllinle gake' nad' txen. Per tole nakle dii xiwaa txen.

⁷¹Wne' ka' che Jud Scariota', xiin to ben' le Simón, la' nezile' nan Juda' gone'ne' lall' na' ben' malka', la'kzi wlene' ben'ka' shllin.

Ben'ka' nak ben' bish' golj Jesúza' bi wyajle'gake' che'

7 Ka wde dga, Jesúza' wde' doxen gana' mbani Galileana'. La' bi gok-lallee shaje' gana' mbani Judeana' daa cheeni ben' wñabia' che ben' Israelka' witgake'ne'. ²Na' ka ba zoa gal' lni che ranshdo'ka' daa chon ben' Israelka' yog' yiz, ³ben'ka' nak ben' bish' golj Jesúza' che'gake'ne':

—Bi yigaano' niza, san wyaj Judeana' kwenchē ben'ka' ba non li' txen ile'gakile' yel' wakka' chono'. ⁴La' beena' cheeni seyi che', aga chkwashee diika' chone'. Bachgali chono' yel' wakki, jentegan lao yog'lol' ben'.

⁵La' ni ben' bisheekan' bi wyajle'gake' che'. ⁶Na'ch che' Jesúza' legake':

—Bin' illin lla illin gor gon' daa llia bia' gon'. San le', bat'tez wak shajle. ⁷Ben' yell-lioki bibi de dii gonan ka gakzban-gakile' le', san nadaan chakzbangakile' daa chepgakee malan' chongake'. ⁸Li

shaj le' lnina'. San nad' bi saa, la' bin' illin lla illin gor gak cha' daa llia bia'.

⁹Biyoll golle' legake' ka' na' bigaane' Galileana' zi xtit.

Wyaj Jesúza' lnina'

¹⁰Na' ka wde wza' ben' bisheeka', lekzka' wzee wyaje' lnina' do ngash'z.

¹¹Na' ben'ka' chñabia' ben' Israelka' chiy-iljgake'ne' lo lnina', che' ljwellgake':

—¿Garanzi beena', lla?

¹²Na' ladj ben'ka' lle' lnina', ben' zan choe'gake' xtill' Jesúza'. Bale' che': "Nake' ben' wen." Na' zi bale' che': "Bi nake' ben' wen, la' chdaze' chziyee ben'."

¹³Per ni to kono biyaxji we' xtill' Jesúza' ka nla'z daa chllebgake' ben'ka' chñabia' ben' Israelka'.

¹⁴Na' ba zej shon tap lla chak lnina' ka bllin Jesúza' gana' zoa yoodo'na' na' wzoloe' chli' chsedile' ben'. ¹⁵Na' chibani ben' Israelka', na' che' ljwelle':

—¿Nakra chak chli' chsedi beeni ben', len aga bi nsede'?

¹⁶Na' che' Jesúza' legake':

—Diika' chli' chsedid' aga nakan dii chyiljlall'z', san beena' bsel' nad', len' bli' bsdile' nad' diiki. ¹⁷Nottez ben' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chyiljlall'z'. ¹⁸Beena' tobia'loze' cho'e xtillee, balaan che kwizen' chyilje', san beena' chyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

¹⁹Dii Moiséza' bene' le' ley che Chioza', na' ni tole bi chonle ka nllian bia' gonle. ¿Biche cheenzile witle nad'?

²⁰Na'ch ben'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

²¹Na' che' Jesúza' legake':

—Tochga yel' waka' ba ble'ile ben' llana' chombaanchō na' yog'le chibanile. ²²Dii li dii Moiséza' bene' byen yog'tele nakle ben' byo chiya' sho'le sen' daa

le circuncisión, la'kzi aga len' wzololene'n, san dii xozxto'leka'ten. Daan chgoole bi' byodo'ka' senna' la'kzi nakan lla chombaanchō. ²³Na' shi choe'le latj sho' bi' byodo'ka' sen daa le circuncisión lo llana' chombaanchō kwenche gak ka na leya' daa bzej dii Moiséza', ¿biche chllaazle nad' daa biyon' to ben' llana' chombaanchō? ²⁴Bi wchoglizle che ben' shi bi chle'ile chone', san cheenin inezile nakyen'an nakan kwenche we'le dill' kon ka nakan.

Jesúza' wne' zee gana' zoa Chioza'

²⁵Na'ch bal' ben' Jerusalénka' nagake':

—¿Aaga beenin cheengakile' witgake', lla? ²⁶Li wwia ka cho'e dill' ladj lkwe' ben', na' ni to kono bi che'. ¿Anti ba chajle'lzə ben' wñabia'ka' nan dii li beeni nake' Crístona', beena' wsel' Chioza' inabi'e, lla? ²⁷Cho' nezicho ga ben' beeni. San kat' yid beena' nak Crístona', ni to kono inezi galə za' beena'.

²⁸Jesúza' chli' chsedile' ben'ka' yoodo'na', na' ka benile' daa wna ben'ka' che', na' wñie' zillj chi'e:

—Chakzile nombia'le nad' na' nezile ga ben' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene', ²⁹san nad' nombi'ane', la' gana' zoen' wzaa, na' len' bselee nad'.

³⁰Na'ch bal'e' goklall'gake' gox'gake'ne', per ni toe' bi bex' le', la' bin' illin lla illin gor gak che' daa llia bia'. ³¹Na' ben' zan wyajle'gake' che', na' wñagake':

—Kat' yid beena' nak Crístona', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

³²Na' fariseoka' bengakile' dillaa daa choe' ben'ka' che Jesúza'. Na' legake' len bxoza' chñabia' bsel'gake' ben'ka' chap

yoodo'na' kwenche lljex'gake' Jesúza'. ³³Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'. ³⁴Na' yiyilje nad' per aga willelile nad' daa bi gak yidle gana' lljaoza'.

³⁵Na'ch ben' Israelka' che' ljwellgake':

—¿Garan yiyaj beeni na' bich yillelilichone', lla? ¿Anti gana' lle' ben' wllall chechoka', ben'ka' lle' lall ben' zit'kan' shaje' kwenche lljasedile' ben' griegoka', lla? ³⁶¿Beran zejín daa ne': "Yiyilje nad', per aga willelile nad' daa bi gak yidle gana' lljaoza'?"

Espíritu che Chioza' nake' ka nis yaa nis ban

³⁷Na' llana' zeelo gok lñina', llana' nak lla choo lla xen, wzolla' Jesúza' na' wñie' zillj, chi'e:

—Shi nole chbili, li da yeeje nisa' daa gon' le'. ³⁸Na' gak kon ka na Cho'a Xtill' Chioza' gana' nan beena' gonlilallee nad', gak loo yichjlall'do'ena' ka ga chaltit nis yaa nis ban.

³⁹Na' daa wna Jesúza' ka', zejín soa Espiritu che Chioza' loo yichjlall'do' beena' gonlilall' le'. La' ka gora' bin' yidsoa Espirituna' loo yichjlall'do' ben' daa bin' sho' Jesúza' balaanna' daa llia bia' sho'e kat' yiyepe' gana' zoa Chioza'.

Gok ben'ka' chop shon kwenlə

⁴⁰Na' bal' ben'ka' bengakile' daa wna Jesúza' na' wñagake':

—Dii li beeni nake' beena' llia bia' yid kwenche chixji'e daa che' Chioza'ne'.

⁴¹Na' zi bale' che'gake':

—Beenikzan' Crístona', beena' chbezcho wsel' Chioza' inabi'e.

Na' zi bale' che'gake':

—¿Achakile ladj ben' Galileaka' ichej beena' wsel' Chioza' inabi'e? ⁴²Cho'a xtill' Chioza' nan lo dia che dii Davina' galj beena' nak Crístona', na' gake' ben' yell Belén ka dii Davina'.

⁴³ Ka' gok, gokgake' chop shon kwenlə ni che Jesúza'. ⁴⁴ Bałe' goklall'gake' gox'gake'ne', per ni toe' bi biyaxji.

**Ben'ka' wñabia' ben' Israela'
bi wyajle'gake' che Jesúza'**

⁴⁵ Na'ch ben'ka' chap yoodo'na' billingake' gana' zoa fariseoka' len b̄xozka' chñabia'. Na'ch che'gake' legake':

—¿Biche bi bche'lene'?

⁴⁶ Na' ben'ka' chap yoodo'na' che'gake':
—Ni to konon' we' dill' ka dillaa choe' beena'.

⁴⁷ Na'ch che' fariseoka':

—¿Alezkza' lenle ba wxiyee? ⁴⁸ Ni to ben' wñabia' chechoka', ni neto' fariseo bi chajle'nto' che'. ⁴⁹ Per ben'ki bi nom-bia'gake' leya', ba wlliaiy'gake'.

⁵⁰ Na' farisewa' le Nicodemo, beena' wyaj lao Jesúza' wał-lə, chi'e legake':

⁵¹ —Ley chechona' nan aga wak wchoglocho che to ben' inacho chone' mal shi bin' wzenagcho dillaa wi'e kwenche inezicho bin chone'. ¿Anti aga kan' nakan?

⁵² Na'ch che'gake'ne':

—¿Alezkza' ben' Galilea li'? Bsed kwenche inezilo' ni to ben' chyixjee daa che' Chioza'ne' bin' ichej gana' mbani Galileana'.

⁵³ Na'ch billeshgake' ziyaj lill che chegake'.

Noola' bidol'len ben' byona'

8 Na' Jesúza' wyaje' lo Yaa Olívoza'. ² Na' betiyo ka wyeeni' wizaje' yoodo'na'. Na' ben' zan inleeb wbig' kwite'na', na' wchi'e wzoloe' bli' bsedile' legake'. ³ Na'ch ben'ka' chli' chsedi leya' len fariseoka' nche'gake' to noolə bidol'lene' to ben' byo, na' bzegake'ne' ladj ben'ka' lle' na'. ⁴ Na' che'gake' Jesúza':

—Maestro, ba bidolinto' nooli kon to ben' byo. ⁵ Na' nezinto' leya' daa bzej dii

Moiséza' nan chiyal' wicho noolka' chon ka' kon yaj. ¿Shera li', bi ka ino'?

⁶ Che'gake'ne' ka' kwenchez kwejgake'ne' dill' ga si' sengake' na' gaogake' xya che'. Na'ch Jesúza' bchekee bzeje' lo yona' kon xbene'na'. ⁷ Na' daa zeyidgake' chñabgakile'ne', na' bibe'shawee chi'e legake':

—Beena' bibi saaxya che' de, wak soloe' wtakwe'ne' yaja'.

⁸ Na'ch bizchekee chizzeje' lo yona'. ⁹ Na' ka goll Jesúza' legake' ka', na' biza' twej tweje', wzolozan ben' golka' na'tech ben' xkwid'ka', na' stoz noola' bgaan-lene' Jesúza'. ¹⁰ Na' bibe'shao' Jesúza' dii yoblə, na' chi'ene':

—Noolə, ¿garan ben'ka' chao xya cho'?

¿Ani toe' bibi beni li'?

¹¹ Na' che' noola'ne':

—Ni toe', ben'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj wleno'.

Jesúza' nsee beeni' che ben' yell-lioni

¹² Na'ch Jesúza' bizoloe' choe'lene' ben'ka' lle' na' dill', chi'e:

—Nad' nak' beeni' che ben' yell-lioni. Beena' gone' nad' txen bich soe' lo yel chol' che dii mala', san loo yichjlall'do'ena' gape' beeni' daa nsa' yel' mban zejli kani.

¹³ Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

¹⁴ Na' che' Jesúza' legake':

—La'kzi choa' dill' che kwin', nezid' nakan dill' li, la' nezid' gan zaa na' gan yiyaa. San le', aga nezile gan zaa, ni bi nezile gan yiyaa. ¹⁵ Le' chchoglole che ben' lega ben' yell-lio. San nad' bi chchogloa' che ben'. ¹⁶ Per shi nad' wchogloa' che ben', kon ka nakan-nan' wchogloa'n, la' aga tobialozaan chchogloa'n, san Xa'na', beena' bsel' nad', naknto' txen chchoglonto' che ben'.

¹⁷ Ley chelena' nan shi chop ben' toz ka chitili xtilleeka' chiya! shajle'cho che-gake'. ¹⁸ Na' nak chopnto', nad' cho'a dill' che kwina', na' lekzka' Xa'na', beena' bsel' nad', cho'e dill' cha'.

¹⁹ Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

²⁰ Jesúza' bi'e dill'ki shlak bli' bsdile' ben' latja' gana' chi' daa chgoogake' mech che yoodo'na', per ni to kono bex' le' daa bin' illin lla bin' illin gor gak che' daa llia bia'.

Jesúza' wne' kono gak yiyaj gana' yiyaje'

²¹ Na'ch Jesúza' wizi'e legake':

—Nad' yiyaa, na' yiyiljle nad', na' gana' yiyaa aga wak sa'le, la' lao saaxya cheleka' guetle.

²² Na'ch ben' wnabia' che ben' Israelka' che' ljwellgake':

—¿Acheenile' yiyit kwina', lla? ¿Aadan naze': "Gana' yiyaa bi gak sa'le"?

²³ Na'ch che' Jesúza' legake':

—Le' nakle ben' yell-lío, na' nad' zaa yabana'. Le' chonle lega ben' yell-lío, san nad' bi chon' ka le' ben' yell-lío. ²⁴ Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

²⁵ Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wniakz' le' dii nechte. ²⁶ Dii zan dii gak inia' dii gao-gakan xya chele. Per beena' bsel' nad' cho'e dill' li, na' daa wne' nad' lennan' choe'len' ben' yell-lioni dill'.

²⁷ Na' legake' aga wyajni'gakile' shi xtill' Xe'nan' choe'lene' legake'. ²⁸ Na' daan chi'e legake':

—Kat' ba bda'le nad', Ben' Bsel' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsemi Xa'na' nad', lennan' cho'a dill'. ²⁹ La' Xa'na', beena' bsel' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

³⁰ Na' ka biyoll' be' Jesúza' dill'ka', ben' zan benlilall'gake'ne'.

Ben'ka' chnabia' dii mala' yichjlall'do'eka'

³¹ Na'ch che' Jesúza' ben' Israelka' ba chajle' che':

—Shi le' soachechehle gonle ka ba wnia', dii li txenan ba nakle nad', shi naa. ³² Na' gombia'le dill' li cha'na', na' kat' ba nombia'len, gakle ka to ben' ba biyell' bila' lao daa ntakw nchejan le'.

³³ Na'ch che'gake'ne':

—Neto' naknto' xiin dia che dii Abra-hama' na' axt naanlla aga non' inabia' neto' kwenche gonznto' kon daa ine'. ¿Berache nazo' yiyell' yila'nto'?

³⁴ Na' che' Jesúza' legake':

—Dii li nia' le', nottez beena' chon dii mala' nake' ka ben' ndoo lawinna' daa chnabi'an le'. ³⁵ To wen llin aga toshi-izi soe' lill' xane'na', san xiin xan llinna', toshiizi soe' lill' xe'na'. ³⁶ Na' shi nad', Xiin Chios, yisell' yilaa le' lawi dii mala', dii li wiyell' wila'le lawinna'. ³⁷ Nezkzid' nakle xiin dia che dii Abrahama', per cheenile witle nad' daa bi chleble cho'a xtilaani. ³⁸ Nad' cho'a dill' che daa ba ble'id' gana' zoa Xa'na', na' le', chonle ka na' xalena'.

³⁹ Na' che'gake'ne':

—Xiin dia che dii Abrahama' neto'.

Na' Jesúza' chi'e legake':

—Shel' nakle dowalj xiin dia che dii Abrahama', kon ka ben dii Abrahama' chonle, shel'ka'. ⁴⁰ La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle. ⁴¹ Le' chonle kon ka chon' xalena'.

Na'ch che'gake'ne':

—Aga naknto' ka to ben' bi wyoo xayin. Toz Chioza' nake' Xanto'.

⁴²Na'ch che' Jesúza' legake':

—Shel' lezkzile Chioza' nake' Xale, wak-ile nad' shel'ka', la' kwite'nan' wzaa. Aga tobia'lozaan bid', san Chiozan' bselee nad'. ⁴³Na' aga chajniile diika' nia' le' daa bi cheenile wzenagle dill'ka' cho'a. ⁴⁴Dii xiwaan nak xale na' chibaile chonle daa chaklalliin. La' kana'te dii xiwaan nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozi dii wxiye' na' nakten xan yel' wxiye'na'. ⁴⁵Na' nad', daa cho'a dill' lina' aga chajle'le cha'. ⁴⁶Ni tole bi gak wli'le shi de saaxya cha'. Na' shi cho'a dill' li, ¿berache bi chajle'le cha'? ⁴⁷Beena' nak xiin Chioza' chzenague' xtilleena'. Na' le', bi chzenaglen daa bi nakle xiine'.

Ba zoakz Cristona' kana' zi' galj dii Abraham'a'

⁴⁸Na'ch ben' wñabia' che ben' Israelka' che'gake'ne':

—Aga naznto' nanto' nako' ben' Samaria na' yootio' to dii xiw'!

⁴⁹Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chñit chdele nad'. ⁵⁰Aga chyilj' koo ben' nad' balaan. San zoa beena' cheeni sho'a balaan, na' len' chçhogloe' che ben' kon ka nakan. ⁵¹Dii li nia' le', beena' chon ka nia', ibane' zejli kani.

⁵²Na'ch ben' wñabia' che ben' Israelka' che'gake'ne':

—Naach ba wñezinto' dii xiw'kzan yoo. Dii xozxto'cho Abraham'a' wite' na' lezkza' yog' ben'ka' wdixjee daa goll Chioza' legake' kani'yi. Na' li' naa, nazo: “Beena' chzenag cha' ibane' zejli kani.” ⁵³¿Achakilo' zak'cho' aga ka dii xozxto'cho Abraham'a'? Le' wite' na'

ka'kzə dii ben'ka' wdixjee daa goll Chioza' legake' kani'yi. ¿Noraka chakzi kwino'?

⁵⁴Na'ch che' Jesúza' legake':

—Shel' nadaan chgwaa kwinn' balaan aga bi zakiin, shel'ka'. Per Xa'na', beena' nale nake' Chios chele, len' chgwee nad' balaan. ⁵⁵La'kzi bi nombia'lene', nad' nombi'ane'. Shel'ka' nia' bi nombi'ane', na' nak' ka le' ben' wxiye'. Per nombi'ane' na' chon' ka ne'. ⁵⁶Dii xozxto'cho Abraham'a' bibaile' daa wñezile' ile'ile' llaki zoa' yell-lioni. Na' ba ble'ile'n na' bibaile'.

⁵⁷Na'ch ben'ka' chñabia' ben' Israelka' che'gake'ne':

—Ni shiyon yiz bin' gakilo' na' nazo' zle'ilo' dii Abraham'a'.

⁵⁸Na'ch che' Jesúza' legake':

—Dii li nia' le', kana' zi' galjte dii Abraham'a', bakz zoa' nad'.

⁵⁹Na'ch lii wdoyotegake' yaja' nan wtakwgake'ne'n, per lii bkwash'tie' na' bizee gana' zoa' yoodo'na'. Na' ni bi gokbe'gakile' bidie' ladje'ka' ziyaje'.

Biyon Jesúza' to ben' lçhol'

9 Ka zej Jesúza' na' ble'ile' to ben' byo ben' golje' nçhol'e'. ²Na' ben'ka' nakgake'ne' txen che'gake'ne':

—Maestro, ¿berache golj' beeni nçhol'e', lla? ¿Ançhol'e' ni che saaxya che'na', anti ni che saaxya che xaxneekan', lla?

³Na' che' Jesúza' legake':

—Aga ni che saaxya che'nan' ni aga ni che saaxya che xaxneekan', san kwenche wli'lawi yel' wak che Chioza' lo yel' mban che'nan' nake' ka'. ⁴Shlak naa ni de latj, chiyal' goncho xshin beena' bse' nad'. La' wllin lla kat' kochno bi gak gon. ⁵Shlak ni zoa' yell-lioni nak' beeni' che ben' yell-lioni.

⁶Na' ka biyoll wna Jesúza' ka', na'ch blle' xeneena' lo yona' na' bene' lat' benj kon xeneena', na'ch wdebe'n jalao ben' lçhol'a'. ⁷Na' chi'ene':

—Wyaj jadib jalawo'na' cho'a tanga' daa le Siloé —na' Siloé zejín Ben' Nselee.

Na'ch wyaj ben' l'choła' jadib jalawe'na', na' ka bizee na', ba chle'ile'.
 8 Na'ch ben' wlill che'ka' na' ben'ka' ble'gakile'ne' kana' n'chole' che'gake':

—¿Aaga beenin chbi'e chnabe' mecha'?

9 Na' bale' che':

—Awe, len'.

Na' zi bale' che':

—Aga len', per ka'tekzə nake'.

Na' beena' chi'e:

—Nad'kzan'.

10 Na'ch wñabgakile'ne':

—¿Nakra gok ba chle'ilo'?

11 Na' chi'e legake':

—To ben' le Jesús bene' benja' na' wdebe'n jalaw'ki na'ch wne' nad': “Wyaj gana' lliá tanga' daa le Siloé na' jadib jalawo'na'.” Na'ch wyaa na' ka biyiba'n, na' gok ble'id'.

12 Na'ch che'gake'ne':

—¿Garan beena' no' ka'?

Na' chi'e legake':

—Bi ñezid'.

Wñabyolli fariseoka' nak gok ble'i ben' l'choła'

13 Na'ch jwa'gake' beena' gok ben' l'chol' lao fariseoka'. 14 Na' llana' wdeb Jesús'a' benja' jalao beena' kwenche ble'ile' nakan lla chombaangake'. 15 Na'ch fariseoka' lekzka' wñabgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

16 Na'ch bal' fariseoka' che'gake':

—Aga Chiozan' bselee beena', la' chone' daa bi chiyal' goncho llani chombaanch'o.

Na' zi bale' che'gake':

—¿Nakra gon to ben' saaxya gone' yel' wak ka diiki chon beeni'?

Na'ch gokgake' choplə. 17 Na'ch dii yoblə gollgake' beena' gok ben' l'chol':

—¿Shera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to ben' chyixjee daa che' Chioza'ne'.

18 Na' ben'ka' chñabia' ben' Israelka' bi wyajle'gake' shi dii li gok beena' ben' l'chol' na' naa ba chle'ile'. Na'ch goxgake' xaxneena', 19 na' wñabgakile' legake':

—¿Abeenin xiinlena', beena' nale n'chole' ka golje'? Na' ¿nakra gok ba chle'ile' naa, shka'?

20 Na' xaxneena' billiigake' xtilleeka':

—Ñezinto' beenin xiinnto'na' na' golje' n'chole'. 21 Per aga ñezinto' nak gok chle'ile' naa, ni bi ñezinto' non biyon le'. Li inabile', la' aga nake' bi'do' inacho bi gak ine' non biyon le'.

22 Goll xaxneena' ka' daa chllébgake' ben'ka' chñabia' ben' Israelka', la' ba bgaangake' dill' nottezə ben' ine' Jesús'a' nake' Críston'a' bi wlebgake'ne' gana' chdop chllaggake' choe'lwillgake' Chioza'. 23 Daan golltezə xaxneena': “Li inabile', la' aga nake' bi'do' inacho bi gak ine' non biyon le'.”

24 Na'ch dii yoblə goxgake' beena' gok ben' l'chol', che'gake'ne':

—Bzoashki Chioza' de taschiw shi leilo' choo dill' li, la' ñezinto' beena' biyon li' nake' ben' saaxya.

25 Na'ch golle' legake':

—Bi ñezid' shi nak beena' ben' saaxya. Lete dii ñezid', golj' n'chol' na' naa ba chle'id'.

26 Na'ch che'gake'ne':

—¿Beran benile' li'? ¿Nak bene' kwenche chle'ilo'?

27 Na' chi'e legake':

—Ba wniakz' le', na' bi chzi'le cho'a xtillaana'. ¿Bi'che cheenzile inia'n dii yoblə? ¿Anti lekzka' lenle ba cheenile gonlene' txen?

28 Na'ch wnegake'ne' zibia', che'gake'ne':

—Lin' nako' beena' txen, san neto' Moisézan' naknto' txen. 29 Nezinto' Chioza' wnie' Moiséza', san beena', ni bi nezinto' ga zee.

30 Na'ch beena' gok ben' lchoj chi'e legake':

—iNakkzan dii yibanicho daa bi nezile ga za' beena' na' ba bene' ka chle'id'!

31 Nezkzicho aga chzenag Chioza' che ben' saaxyaka', san chzenague' che ben'ka' choe'la'ogake'ne' na' chongake' daa chazlallee. 32 Dezd ka wxe wzil yellioni bin' yenicho shi zoa ben' chak chone' ka chle'i to ben' golje' nchole'. 33 Shel' beeni bi nake' to ben' bsel' Chioza', ni to yel' wak bi gak gone', shel'ka'.

34 Na'ch che'gake'ne':

—Dezd ka goljo' nako' ben' saaxya. ¿Ana' chakilo' wli' wsedilo' neto'?

Na'ch bibejgake'ne' ladje'ka'.

Ben'ka' nchoj nniti yichjlall'do'eka'

35 Na' wnezi Jesúza' bibej fariseoka' beena' gok ben' lchoj ladje'ka', na' ka bilague'ne' na'ch chi'ene':

—¿Achonlilalloo Beena' Bsel' Chioza' Yell-lioni?

36 Na' beena' chi'ene':

—Ben'do', wnashki nad' nora beena' kwenche gonlilallaane'.

37 Na' che' Jesúza'ne':

—Ba ble'kzilo'ne', na' lekzen' chshaljleno' naa.

38 Na'ch lii bchek'te xibe'na' lao Jesúza', na' chi'ene':

—Chonlilallaa li', Xan' —na'ch be'laweene'.

39 Na'ch che' Jesúza':

—Ba bid' yell-lioni kwenche wchogloa' che ben' yell-lioni. Zaa kwenche ben'ka' nak ka ben' lchoj ile'gakile', na' ben'ka' chakgakile' chle'gakile' yiyakgake' ka ben' lchoj.

40 Na'ch bal' fariseoka' lle' na', ka ben-gakile' chi'e ka', che'gake'ne':

—¿Achakilo' lennton' naknto' ben' lchoj?

41 Na'ch che' Jesúza' legake':

—Shel' nakle ben' lchoj, aga bi xtol'le de, shel'ka'. Per daa nale chle'ile, daan de xtol'le.

Jempl che leej che xil'ka'

10 Dii li nia' le', beena' bi choo cho'a leej che xil'ka' san chiyiljallee cho'e gan yoblə, beenan' ben' wbanna'. 2 San beena' choo cho'a leeja', len' ngoo lall' nee chape' legakb. 3 Na' beena' chap cho'a leej chebka' chsalje'n kwenche cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' legakb loo leej chebka'. 4 Na' chde chbeje' yog' xil' che'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'. 5 Aga willjanogakb ben' yoblə, san wxonjdogakib le' daa bi nombia'gakb shi'ena'.

6 Bzoa Jesúza' jempli kwenche bzajni-ile' ben'ka'. Per legake' aga wyajni'gakile' bin zeji daa golle' legake'.

Jesúza' chapshi'e cho' ka ben' chapshi'e xil' che'

7 Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'. 8 Yog' ben'ka' bid kana' bin' yid', naggake' ka ben' wban. Na' ben'ka' nia' naggake' xil' cha' bi bzenaggake' che-gake'. 9 Nad' nak' ka cho'a leej che xil'ka', na' beena' gonlilallee nad' bi kwiaayee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

10 Ka nak wbanna', za'ze' kwenche kwane' na' wite' na' wliayee legake'. San nad', zaa kwenche wi'a to yel' mban shao' chegake', na' soagake' mbalaz. 11 Nad' nak' ka to ben' chapshi'e xil' che'na', beena' axt chzani yel' mban

che'na' ni che xil'do'ka' nape'.¹² San beena' chap xil'ka' ni che mba laxje'na', ka chle'ile' ba za' to ba zña gaob xil'ka', lii chchoonlall'tie'gakb na' chxonje' daa bi nakgakb ba che'. Na'ch chllin ba zñiana' chox'b xil'ka' na' chsheshlesb legakb.¹³ Beena' chzi' laxje'na' chxonjezile' xil'ka', la' daa ikaaz laxje'nan' chibaile', na' bi chakile' legakb.

¹⁴ 'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombia'gake' nad'.¹⁵ Ka chak che Xa'na' nombi'e nad', na' nad' nombi'ane', ka'kzan nad' nombi'a legake', na' chzanid' yel' mban cha'ni ni chegake'.¹⁶ Na' lekzka' zoach ben' yoblə, ben' zi' gonlilall' nad', na' lekzka' nakgake' ka xil' cha', per bin' gagake' txen xil' cha'ka'. Na' chiya' gaxgakee kwenche wzenag-gake' cha', na' yog'gake' gagake' tozə, na' toz nad' gag lall' na'gake'.

¹⁷ 'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii.¹⁸ Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lekzka' nap' yel' wñabia' kwenche yiban'. La' kan' nllia Xa'na' bia' gon'.

¹⁹ Na'ch dii yoblə ben' Israelka' lle' na' gogkake' choplə ka bengakile' daa wne'.

²⁰ Zane' che'gake':

—¿Biçhe chzenagzle che beena'? Dii xiwaan yo'e, na' chaktonte'n.

²¹ Na' zi ba'le' che'gake':

—Aga choe' beeni dill' ka ben' yoo dii xiw', la' aga bi yel' wak nap dii xiwaa yiy-onan to ben' lçhol'.

Ben'ka' chñabia' ben' Israelka' bi bzenagake' che Jesúza'

²² Na' do kana', gol' lnina' Jerusalénna' daa chisa'lall'gake' llana' bengake' lall' na' Chioza' yoodo'na', na' nak beo' zag.
²³ Na' chda Jesúza' loo koridor che dii

Salomónna' daa ze kwit yoodo'na'.²⁴ Na' ben'ka' chñabia' ben' Israelka' wyeçhjy-obgake'ne', che'gake'ne':

—¿Axt batrakzə yikwaso' yel' chakçhoplall' çento'ni? Shi li'kzan Cristona', beena' chbeznto' wsel' Chioza', lla wnatega neto' kwenche inezinto'.

²⁵ Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wñabia' che Xa'na', na' chli'n nan len' bselee nad'.²⁶ Na' le', bi chajle'le daa bi nakle txen ben'ka' nia' nakgake' xil' cha'.²⁷ Nombi'a ben'ka' nia' nakgake' xil' cha', na' legake' chzenaggake' xtillaana' na' nogake' nad'.²⁸ Na' cho'a legake' yel' mban zejli kani, na' bi kwiyai'gake'. Na' ni to kono gag yibej legake' lo ni'a na'ni.
²⁹ Xa'na' ba bene' legake' lall' na' gapshigakee, na' len' chñabia'che' lao nottez. Na' ni to kono gag yikwas legake' lo ni'a neena'.³⁰ Ka Xa'na'kz, nad'.

³¹ Na'ch ben' Israelka' bizgoyogake' yaja' kwenche nan wtakwgake'n Jesúza'.

³² Na' chi'e legake':

—Dii zan dii wen ba ble'ile chonlen' yel' wak che Xa'na'. Na' çnonnan' bi choolall'le daa cheenile' wtakwle nad' yaja'?

³³ Na' ben'ka' chñabia' ben' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' ben'zə li'.

³⁴ Na'ch che' Jesúza' legake':

—Ley çhelena' nan, Chioza' ne': "Nad' wnia' le' nakle chios." ³⁵ Cho'a Xtill' Chioza' toshiizi nakan ka wne', na' shi cho'en dill' bsi'e "chios" ben'ka' wdixjee xtilleena',³⁶ ¿biçhe nazle nad' chñia' che Xacho Chioza' daa nia' nak' Xiine', len' len' wleje' nad' na' bselee nad' yell-lioni?

³⁷ Shi bi chon' ka chon Xa'na', aga wya-jle'le cha'.³⁸ Na' shi chle'ile chon' ka di-ika' chon Xa'na', li shajle' che diika' chon', la'kzi bi cheenile shajle'le cha', kwenche

inezyen'ile Xa'na' zoalene' nad' na' nad' zoalenee.

³⁹Na'ch dii yoblə goklall'gake' gox'gake'ne' na' bene' gan bile' lawe'ka'.

⁴⁰Na'ch bizyaj Jesúza' dii yoblə shłaa yao Jordánna' jazoe' latja' gana' bchoa Juanna' ben'ka' nisa' kana'. ⁴¹Na' ben' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

⁴²Na' ben' zan wyajle'gake' che Jesúza' na'.

Wit Lázaroná'

11 Yell Betániana' wzoa to ben' bi shao' wlie' Lázaro, na' lekzka' na' wzoa ben' zane'ka' Maríana' len Már-tana'. ²Maríana', ben' zan Lázaroná', len' bwazje' set zixa' ni'a Xancho Jesúza' na' bisbillile'n yish' yichje'na'. ³Na' chop bilte ben' zan Lázaroná' bsel'gake' rson lao Jesúza' che'gake'ne':

—Xan', bi shao' ben' zannto'ni, beeni nllaguilo'.

⁴Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiine', sho'a balaan.

⁵La'kzi Jesúza' chakchgaile' Már-tana', na' ben' bile'na' na' Lázaroná', ⁶ka benile' rson bi shao' Lázaroná', wllachile' zi chop lla gana' zoe'. ⁷Na' ka wde, chi'e ben'ka' nakgake'ne' txen:

—Li sho' Judeana' sto shii.

⁸Na'ch ben'ka' nakgake'ne' txen che'gake'ne':

—Maestro, kani batchgana' goklallii ben' Israelka' lle' na' witgake' li' kon yaja'. ¿Ana' cheenilo' yizajo' na'?

⁹Na' che' Jesúza' legake':

—¿Aaga shllin goran' de beeni'na' shlla? Na' beena' chda tellalə aga will-jachewee daa de beeni'na' yell-lioni.

¹⁰San shi chde' wal-lə, willjachewee daa bi nla'.

¹¹Na'tech golle' legake':

—Ba ches Lázaroná', beena' nllagui-cho, na' sha' lljasbanee.

¹²Na'ch che' ben'ka' nakgake'ne' txen:

—Xan', shi ba chese', wiyakshao'lall'kzile'.

¹³Jesúza' golle' ka' daa nezile' ba wit Lázaroná', na' legake' chakgakile' daa cheszen' golle' ka'. ¹⁴Na'ch be'len Jesúza' legake' dill' ka' to shajni'gakile', chi'e:

—Ba wit Lázaroná'. ¹⁵Na' chibaid' bi wzoa', la' chyalljch gon' ka' shajle'chle cha'. Li sho' shajcho gana' die'.

¹⁶Na'ch Tomáza', beena' che'gake' Dídimo^{††}, chi'e ben'ka' sto:

—Li sho'lene' kwenche lencho guetlen-chone' shi witgake'ne'.

Jesúza' chak yisbane' ben' wetka'

¹⁷Na' ka bllingake' yella', na' che'gake'ne' ba gok tap lla bgash' Lázaroná'. ¹⁸Na' Betániana' llian gaozə Jerusalénna', ka do shon kilómetro nlaagakan. ¹⁹Na' ben' zan ben' Israelka' lle' Jerusalénna' wyajgake' jenxenlall'gake' Már-tana' len Maríana' daa wit ben' zane'ka'. ²⁰Na' ka wnezi Már-tana' ba zoa illin Jesúza', na'ch jatile'ne', per Maríana' bigaane' lille'ka'. ²¹Na' ka blline' kwite'na', chi'ene':

—Xan', she' zo' ni kana' wlen yillwe' che ben' zan'na' bi wite', she'ka'. ²²Na' naa la'kzi ba wite', nezid' gon Chioza' bit-tezə dii inabilo'ne'.

²³Na' che' Jesúza'ne':

—Wiban ben' zano'na'.

²⁴Na'ch che' Már-tana':

—Awe, nezid' wibane' kat' yiban ben' wetka' llana' te che yell-lioni.

²⁵Na' che' Jesúza'ne':

—Nad' chon' ka chiban ben' wetka' na' nap' yel' mban dii bi te cheyin.

Beena' chonlilallee nad', la'kzi ba wite', wibanchkze'. ²⁶ Na' yog' ben'ka' mban na' chonlilall'gake' nad' bi guetgake' toshiizi. ¿Achajli'o dga nia' li'?

²⁷ Na' che' Márтана'ne':

—Awe, Xan', chajli'a lin' nako' Cris-tona', na' lin' Xiin Chioza', beena' llia bia' yid yell-lioni.

Wchell Jesúza' gana' bkwash'gake' Lázaron'a'

²⁸ Na' biyoll wna Márтана' ka', na'ch ziyaje' zjanie' ben' bile' Maríana', na' chi'ene' xochizi:

—Ba bid Maestrona' chnie' li'.

²⁹ Na' kon ka golle' Maríana' ka', lii wzolla'tie' jawie' Jesúza'. ³⁰ Bilan' sho' Jesúza' yella', ni zetie' gana' jatił Már-tana'ne'. ³¹ Na' ben' Israelka', ben'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgakile' lljchelle' cho'a banan'.

³² Na' ka bllin Maríana' kwit Jesúza', lii bchek'te xibe'na' lawe'na' chi'ene':

—Xan', shel' zoasho' ni, bi wit ben' zan'na', shel'ka'.

³³ Na' ka ble'i Jesúza' chbell Maríana', na' ka'kzə ben'ka' zejlangake'ne', na' to dii wal inleeb gokile'. ³⁴ Na' chi'e legake':

—¿Gara jakwash'lene'?

Na'ch che'gake'ne':

—Sho' lljawicho gana' die', Xan'.

³⁵ Na' wchell Jesúza'. ³⁶ Na'ch che' ljjwell ben' Israelka' lle' na':

—Li wwia ka gokchgaile'ne'.

³⁷ Na'ch bale' che'gake':

—Beeni bene' ka ble'i ben' lchola', ¿Aaga zak bisle' Lázaron'a', na' bi wite' shel'ka', lla?

Bisban Jesúza' Lázaron'a' ladj ben' wetka'

³⁸ Na'ch Jesúza' wizakile' dii wal ka bllingake' cho'a bana'. Na' bana' nakan

to blej, na' chi' to yaj nkwasha'n cho'ayinna'. ³⁹ Na'ch che' Jesúza':

—Li yikwas yaja' ka'lə.

Na' Márтана', ben' zan ben' weta', chi'ene':

—Xan', ba chl'a beena' zban, la' ba gok tap lla wite'.

⁴⁰ Na' che' Jesúza'ne':

—¿Aaga ba wnia' li' shi shajli'o, na' ile'ilo' ye'l' wak choo ye'l' wak xen che Chioza'?

⁴¹ Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e:

—Xa, choxkeno' ba bzenago' cha'.

⁴² Nezid' toshiizi chzenago' cha', per chnia' li' kwenche shajle' ben'ki lle' ni nan lin' bseloo nad'.

⁴³ Na' ka biyoll wne' ka', na'ch wnie' zillj, chi'e:

—¿Lázaro, bichej na'!

⁴⁴ Na' lii bichejte Lázaron'a' ndob ni'a neena' lech'ka', na' cho'alawe'na' ndoban to lech'. Na'ch che' Jesúza' legake':

—Li yizeshe' lechaa na' li yisane' yiyaje'.

Wloogake' xnezin gox'gake' Jesúza'

(Mt 26:1-5; Mr. 14:1-2; Lc 22:1-2)

⁴⁵ Na' zan ben' Israelka', ben'ka' jen Maríana' txen daa wit ben' zane'na', ble'gakile' ka ben Jesúza' na' benlilall'gake'ne'. ⁴⁶ Per bale' wyaj lao fariseoka' na' jellgake' legake' ka ben Jesúza'. ⁴⁷ Na'ch bxožka' chnabia' na' fariseoka' bitopgake' yog' ben'ka' chnabia' ben' Israelka', na' che'gake':

—¿Nakraz ka gonchon, lla? La' zan ye'l' wak chli' beeni. ⁴⁸ Na' shi inacho jwayi beena', yog'z ben' gonlilall'gake'ne' na'ch yid ben' Rómaka' na' wlliaiy'gake' yoodo' chechoni len yell chechoni.

⁴⁹ Na' len to ben' le' Caifás, nake' bxož choo bxož xen ka lo yiza'. Na' chi'e legake':

—Bi nezzilen, ⁵⁰ni bi chakbe'ile wenzan toz ben' guet ni che ben' wllall chechoka', aga ka daa kwiayi' doxen lallchoni.

⁵¹Na' aga kon ka wnaz Caifáza' kan', san daa nake' b̄oxoz choo b̄oxoz xen lo yizan', ben Chioza' ka bi'e dill' guet Jesúza' ni che ben' Israelka'. ⁵²Na' aga ni che toz ben' Israelkan' guet Jesúza', san lekzka' ni che yog' ben'ka' ba wleje' gaggake' xiin'e doxen yell-lionin, kwenche gaggake' toz. ⁵³Na' daa goll Caifáza' ka', lo llana' wzolo bengake' toz dill' kwenche witgake' Jesúza'.

⁵⁴Na' daa wzolo chongake' ka', aga wdatekch Jesúza' ladj ben' Israelka', san wzee wyaje' to yell dii le Efraín, daa llia gaozə latja' gana' bibi chashj chleb, na' na'z wzoe' len ben'ka' nakgake'ne' txen.

⁵⁵Na' ba zoa gao gal' lni Paskw che ben' Israelka', na' ben' zan ben' yell yoblə wyajgake' Jerusalénna' ka zi' gal' lina' kwenche yixi yiyechgake' ka nllia leya' bia'. ⁵⁶Na' chdagake' chiyiljgake' Jesúza', na' shlak lle'gake' lesh' chyoodo'na', chnabi ljwelle':

—¿Beraka chakile? ¿Awide' lina', lla?

⁵⁷Na' b̄oxozka' chnabia' len fariseoka' bengake' mandad shi no nezi ga chda Jesúza' do na' lljellgake' legake' ka' kwenche gox'gake'ne'.

Bwazj Maríana' set zixa' ni'a Jesúza'

(Mt 26:6-13; Mr. 14:3-9)

12 Zi' xop lla gal' lni Paskwa' wyaj Jesúza' yell Betániana', gana' zoa Lázaroná', beena' bisbane' ladj ben' wetka'. ²Na' ben'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázaroná' wche'lene' Jesúza' cho'a mesa' na' nochlə ben'ka' wdaolengake'ne'. ³Na'ch bex' Maríana' ka do gashj litr set zixa' daa le nardo, daa le zak'chga, na' bwazje'n ni'a Jesúza', na' tech bisbillile'n yish' yichje'na'. Na' doxen loo yooná' wche'

shii set zixa'. ⁴Na' len Jud Scariota', beena' nak Jesúza' txen, beena' gone'ne' lo na' ben' malka'. Na' golle':

⁵—¿Berache bi betee set zixa' na' wi'e mecha' gaklenan ben' yesh'ka', lla? Len la' ka che twiz laxj benaan zakaan.

⁶Juda' wne' ka' aga inacho daa chiyeshile' ben' yesh'ka', san daa nake' to ben' wbanan. La' len' gok lall' nee xmeche'ka' na' chbane' lat' wejan. ⁷Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' wkwash'gake' nad'. ⁸Ka nak ben' yesh'ka', toshiizin soakz ben'ka' ladjleni, san nad', aga toshiizin soalen' le'.

Wloogake' xnezin witgake' Lázaroná'

⁹Na' zan ben' Israelka' wnezagakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázaroná', beena' bisban Jesúza' ladj ben' wetka'. ¹⁰Na'ch b̄oxozka' chnabia' bengake' toz dill' witgake' len Lázaroná'. ¹¹La' daa biban Lázaroná' ladj ben' wetka', zan ben' Israelka' ben'ilall'gake' Jesúza' na' bich bzenaggake' che b̄oxozka'.

Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

¹²Na' betiyo ben' be ben' zil, ben'ka' lle' yell Jerusalénna' daa chal' lni Paskwa', wnezagakile' ba ngoo Jesúza' nez yilline' yella'. ¹³Na'ch wyajgake' jlezgake'ne' nox'gake' zinka', na' choe'la'ogake'ne', nagake':

—¿Li we'la'o Chioza! ¿Gonleeyshga Xancho Chioza' beeni ba bselee inabi'e cho' ben' Israel!

¹⁴Na' blleli Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

¹⁵Le' ben' yell Jerusalén, bi illeble. Li wwia, ni ba za' beena' inabia' le' na' llie' to burr chbando'.

¹⁶Na' ben'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj ben' wetka', kana'ch gokbe'gakile' nan Cho'a Xtill' Chioza' daa bzej ben'ka' kani'yi choe'n dill' che', na' che diika' bengakile'ne'.

¹⁷Na' ben'ka' lle'len Jesúza' kana' bis-bane' Lázarona' ladj ben' wetka', ben'ka' bengakile' biñie'ne' kwenche bicheje' loo bana', legaken' be'gake' dill' daa bene'.

¹⁸Daan ben' zan jatilgake' Jesúza' daa bengakile' ka nak yel' waka' bene'.

¹⁹Na'ch fariseoka' che' l'jwellgake':

—Li wwia ka ba chak, bibi de goncho. Li wwia, yog'lolzə ben' ba nogake' le'.

Baḷ ben' griegoka' chiyiljgake' Jesúza'

²⁰Ladj ben'ka' wyaj lnina' Jerusalénna' je'la'ogake' Chioza' na' len baḷ ben' griego. ²¹Na' ben'ki jabig'gake' gana' ze Felípena', beena' nak ben' yell Betsaida daa llia yell-lío daa mbani Galileana', na' che'gake'ne':

—Ben'do', cheeninto' we'lennto' Jesúza' dill'.

²²Na' Felípena' jelle' Andréza' ka', na' choptie' wyajgake' jellgake' Jesúza' ka'.

²³Na'ch che' Jesúza' legake':

—Ba bllin lla, nad', Ben' Bsel' Chioza' Yell-lioni, sho'a balaan xenna'. ²⁴Dii li nia' le', shi to biñ che trígona' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyakan dii zan wal. ²⁵Beena' ze wneyi che yel' mban che'na' yell-lioni, len' kwiayee. San beena' chzani yel' mban che'na' bit-tezə dii gak che', beenan' gat' yel' mban che' zejli kani. ²⁶Nottezə ben' cheenile' gone' xshin'na' chiyal' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

²⁷'Naatek chakyeshid' dii wal inlleb. ¿Awnabid' Xa'na' yisle' nad' lawi dga

wtil', lla? Bi gak gon' ka', la' ni cheyi dgayen'kzan bid'. ²⁸Na'ch golle':

—Xa, benshki ka shoo balaan.

Na'ch wne Chioza' yabana', chi'e:

—Ba ben' kwenche wyo'a balaan, na' naa gon' ka sho'a balaan sto shii.

²⁹Na' ben'ka' lle' na' bengakile' shii Chioza', na' bale' wngake' wziwa'zan wne. Na' zi bale' wna to anjlan' ba wnie' le'.

³⁰Na'ch Jesúza' chi'e legake':

—Aga ni cha' nadaan wne Chioza', san ni che len'. ³¹Na' ba bllin lla gone' yel' joschis che yog' ben' lle' yell-lioni, na' naa kweje' dii xiwaa daa chnabia' yell-lioni. ³²Na' kat'ka' wligake' yaga' cha'lə gana' nda'gake' nad', kanaan' gat' latj gonlilall' nottezə ben' nad'.

³³Na' daa wne' ka', bzajniile' legake' nakan guete'. ³⁴Na' ben'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Crístona', beena' wsel' Chioza' inabi'e, soe' zejli kani. Na' ¿biche nazo' Beena' Bsel' Chioza' Yell-lioni wligake'ne' cha'lə wwia ben' le' lee yaga' gana' dee? ¿Nora Beena' Bsel' Chioza' Yell-lioni no' ka'?

³⁵Na'ch che' Jesúza' legake':

—Nad' nak' beeni' che ben' yell-lioni, per zi shlollchga soalen' le'. Li sho' lo nez lina' shlak ni de beeni'na' kwenche bi gak chele ka chak che to ben' chalile' kat' ng-wee' nez. La' beena' chda' gana' shchol' bi nezile' galan zeje'. ³⁶Li gonlilall' nad' naa shlak ni zoalen' le' kwenche sho' beeni' cha'na' loo yichjlall'do'lena'.

Biyoll wna Jesúza' ka' na'ch bizee jak-washi'le' legake'.

Ben' zan ben' Israelka' bi wyajle'gake' che Jesúza'

³⁷La'kzi ben' Israelka' ble'gakile' yel' wak zan daa ben Jesúza', zangake' bi benlilall'gake'ne'. ³⁸Na' daa bengake' ka',

gok ka wna dii Isaíaza', beena' wdxjxee daa goll Chioza'ne' kani'yi, daa wne':

Xan' ¿azoa ben' ba wyajli'e dillaa chyixje'nto'?

Na' ¿azoa ben' ba gokbe'ile' bli'o yel' wak cho'na'?

³⁹ Na' bi wyajle'gake', la' Chioza' bene' chegake' ka na sto dii bzej dii Isaíaza':

⁴⁰ Bene' legake' ka ben' lchol' na' lall'do' chech

kwenche bi gakbe'gakile' bi zejin diika' chle'gakile',

ni bi shajni'gakile' diika' chengakile',

kwenche ki yiyaj yilengakile' na' yiyone' legake' ben' wen.

⁴¹ Wna Isaíaza' ka' daa ble'ile' ka nak bal-aan xen wala' nap Jesúza', na' bi'e dill' che'.

⁴² Na' la'kzi ka', ben' zan ben' Israelka' lente no ben' wñabia' che'ka' benlilall'gake' Jesúza'. Per bi be'gake'n dill' daa bllebgake' bich wleb fariseoka' legake' gana' chdop chllaggake' choe'lwillgake' Chioza', ⁴³ la' wyoolall'chgake' ina ben' nakgake' ben' wen aga ka daa ina Chioza' nakgake' ben' wen.

Cho'a xtil' Jesúza' nakan dii llialo

⁴⁴ Na'ch wne Jesúza' zillj chi'e:

—Nottez ben' chonlilall' nad', aga toz' nadaan chonlilallee, san len beena' bsel' nadaan chonlilallee. ⁴⁵ Na' nottezə ben' chle'ile' nad', lezkza' chle'ile' beena' bsel' nad'. ⁴⁶ Zaa yell-lioni kwenche beena' gonlilallee nad' te' lo beeni' cha'na' na' bich soe' lo yel cho'la'. ⁴⁷ Na' shi no ben' chenile' cho'a xtilaani na' bi chone' ka nia', aga nadaan wchogloa' che', la' aga zaa kwenche wchogloa' che' ben' yell-lionin, san zaa kwenche yislagakee na' bi kwiayi'gake'. ⁴⁸ Beena' bi cheenile' gonlilallee nad' na' bi chzenague' cha', de daa gawan xya che'. Cho'a xtilaana' daa ba bi'a, lennan' gawan xya che' kat' illin lla te che yell-lioni. ⁴⁹ La' dillaa daa ba bi'a

aga to bia'lozan' wnia' ka'. Xa'na', beena' bsel' nad', len' nllie' bia' bin chiya' inia' na' bin chiya' wli' wsedid' ben'. ⁵⁰ Na' nezid' dill' daa nllia Xa'na' bia' inia' nsa'n yel' mban zejli kani. Daan, yog'lol' diika' nia', nakan kon ka wna Xa'na' nad'.

Wdib Jesúza' ni'a ben'ka' nakgake'ne' txen

13 Ka ba zoa gal' lni Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' nonlilall'gake'ne' yell-lioni, na' ka' gokile' legake' axt ga zeelo.

² Na' ka chaogake' xshe'na', ba wloolə dii xiwaa loo yichjall'do' Jud Scariota', xiin Simónna', gone' Jesúza' lo na' ben' malka'. ³ Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yoblə.

⁴ Na' lo zej chaogake' xshe'na', wzolla' Jesúza' na' bkwase' xe' dii tonə' ka'lə, na' bchele' to lech' lsineena'. ⁵ Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa ncheje' lsineena'.

⁶ Na' ka bidol' chibe' ni'a Simón Pédrone', na'ch che' Pédrone'ne':

—Xan', ¿ali'lə chibzo' ni'ani?

⁷ Na' che' Jesúza'ne':

—Aga chajniilo' dga chon' naa, per techlə shajniilo'n.

⁸ Na'ch che' Pédrone'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

⁹ Na'ch chize' Pédrone'ne':

—Shi kan' nakan, Xan', aga toz' ni'ani chibo' san len yichji na' na'ki.

¹⁰ Na'ch che' Jesúza'ne':

—Beena' nosh' nazje', toz' ni'enan' chiya' shech, la' ba nechkz kwerp che'na'. Ka'kzan le', ba nxi nyechle, la'kzi aga yog'le.

¹¹ Daa nezi Jesúza' non gon le' lo na' ben' malka', daan chi'e legake': "Aga yog'le ba nxi nyech."

¹² Na' ka biyoll wdibe' ni'eka', na'ch biyakwe' xe' dii tona' na' jachi'e cho'a mesa' sto shii. Na' chi'e legake':

—¿Anezile bi zejín dga ba ben'? ¹³ Le' nale nad' Maestro na' Xan', na' lezkzile, la' kan' nakan. ¹⁴ Na' shi nad', naktia' Maestro chele na' Xanle, ba wdib' ni'alena', lezkzka' le' chiyal' chib' ni'a' ljjwell-le. ¹⁵ Ba ben' dga kwenche bliid' le' kan' chiyal' gon che ljjwell-le. ¹⁶ Dii li nia' le', aga zak'chi to mos ka xane'na', na' to ben' zej mandad aga zak'che' ka beena' bseleene'. ¹⁷ Shi chajniile diiki ba wnia' na' gonlen, na' soale mbalaz.

¹⁸ 'Na' aga yog'len nia' ka'. Nejid' nolen ba wlej' kwenche nonlilall'le nad'. Na' chiyal' gak ka na Cho'a Xtill' Chioza', gana' na: "Beena' chaolentie' nad' txen ba chiyechje' nad' gone' mal cha'." ¹⁹ Naa nia' le' dga zi' gak, kwenche kat' ba chakan shajle'le nak' beena' ba wnia' nak'. ²⁰ Na' dii li nia' le', beena' wlebe' nottezə beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

Wdixjee Jesúza' ka gon Juda' wdie'ne' lo na' ben' malka'

(Mt 26:20-25; Mr. 14:17-21; Lc 22:21-23)

²¹ Na' biyoll wna Jesúza' ka', le gokyeshii loo yichjlall'do'ena', na' bi'e dill' kwasol, chi'e:

—Dii li nia' le', tole gonle nad' lo na' ben' malka'.

²² Na'ch ben'ka' nakgake'ne' txen chwia ljjwellgake' chakgakile' nogaken' chi'e ka'. ²³ Na' to beena' nak Jesúza' txen, beena' chakchgaile', chi'e kwite'na'. ²⁴ Na' Simón Pédróna' bene' sen kwenche inabi beena' chi' kwit Jesúza' noen' chi'e ka'. ²⁵ Na'ch

jabig'ch beena' gaoch kwit Jesúza' na' wñabile'ne', chi'ene':

—¿Noran gon ka', Xan'?

²⁶ Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiin beena' le Simón. ²⁷ Na' kon ka biyoll be' Jesúza' Juda' yetxtila', lii wyoote Satanáza' loo yichjlall'do'ena'. Na'ch che' Jesúza'ne':

—Daa ba ngoo yichjo' gono', bentegan.

²⁸ Na' ni to ben'ka' chaolengake'ne' bi wyajni'gakile' biche gollze'ne' ka'. ²⁹ Bale' gogkakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech ben' yesh'ka'. La' len' nak lall' nee xmeche'ka'. ³⁰ Na' ka wde wdao Juda' yetxtila' daa be' Jesúza'ne', lii wza'tie'. Na' ba gol' ka wzee.

Dii koba' daa nllia Chioza' bia'

³¹ Na' ka wde wza' Juda', na'ch che' Jesúza':

—Ba bllin lla sho'a balaan, nad', Ben' Bsel' Chioza' Yell-lioni, na' lezkzka' dga gon', gonan ka sho' Chioza' balaan. ³² Na' daa gon' ka sho' Chioza' balaan, lezkzka' kwín Chioza' gone' kwenche nad', Ben' Bsel' Chioza' Yell-lioni, sho'a balaan, na' lii gontie'n. ³³ Le' xiindawaa, zi shlollchga zoalen' le'. Na' yiyilje nad', na' chiznia' le' ka gosh' ben'ka' chñabia' ben' Israelka': Gana' yiyaa, bi gak sa'le. ³⁴ Na' to dii kob chllia' bia' gonle naa: Li gaki ljjwell-le. Ka chakid' le', kan' chiyal' gaki ljjwell-le. ³⁵ Shi gaki ljjwell-le, na'ch inezi yog'lo'lte ben' nakle nad' txen.

Wdixjee Jesúza' bi wcheb Pédróna' shi nombi'ene'

(Mt. 26:31-35; Mr. 14:27-31; Lc. 22:31-34)

³⁶ Na'ch Simón Pédróna' wñabile' Jesúza', chi'ene':

—Xan', ¿garan yiyajo?

Na' che' Jesúza'ne':

—Aga wak soo gana' yiyaa naa, per willin lla soo.

³⁷ Na'ch che' Pédrona'ne':

—Xan', ¿berache bi gak sa'len' li' naa? Ba nchoglallaa guet' ni cho'.

³⁸ Na' Jesúza' chi'ene':

—¿Achakilo' ba nchoglalloo gueto' ni cha'? Dii li nia' li', shon shii bi wchebo' shi nombi'o nad' ka zi' kwell-lə shikwteza'.

Jesúza' nake' neza' chillin kwit X'e' Chioza'

14 Bi gakshejlall'le. Li gonlilall' Chioza' na' lekzka' li gonlilall' nad'. ²Lill xlatj Xa'na' dii xen latj de. Shel' bi nakan ka', ba wnia' le' ka', shel'ka'. Na' naa yiyaa lljayenshawaa gana' yidzoale. ³Na' kat' ba benschawaan, na'ch yiyed' yidxia' le' kwenche lenle soale gana' zoa'. ⁴Na' ba nombia'le neza' daa chillin gana' lljazoa'.

⁵ Na'ch Tomáza' chi'ene':

—Xan', bi nezinto' gan yiyajo. ¿Nakran gonnto' yillelinto' neza'?

⁶ Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a ben' yel' mban zejli kani. Aga no yillin kwit Xa'na' shi bi gonlilallee nad'. ⁷Daa ba nombia'le nad', lenkz Xa'nan' ba nombia'le. Na' naa ba nombia'lene' na' ba ble'ilene'.

⁸ Na'ch che' Felípena'ne':

—Xan', ben ka ile'into' Xo'na' na' xenlall'nto'.

⁹ Na'ch billii Jesúza' xtilleena', chi'e':

—Felipe, ba wlla zoalen' le', ¿ana' bikzan' gombia'yenoo nad'? Beena' ba ble'ile' nad' lekzka' ba ble'ile' Xa'na'. ¿Berache chnabzo' gon' ka ile'ilene'? ¹⁰ ¿Abi chajli'o zoalen Xa'na' nad' na' nad' zoaleene? Diika' nia' le' aga to bia'lozan'

chnia'n, san daa cheeni kwín Xa'na', beena' zoalene' nad', lennan' cho'a dill' na' lennan' chon'. ¹¹Li shajle' daa nia' zoalen Xa'na' nad', na' nad' zoalen' le'. Na' shi bi chajle'le dga nia', la'ch' li shajle' cha' ni che yel' wakki chle'ile' chon'. ¹²Dii li nia' le', nottez ben' chonlilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit Xa'na'. ¹³Na' gon' bittez daa inabile Xa'na' daa nakle nad' txen kwenche sho'e balaan ni cha'. ¹⁴Nad' gon' bitteza daa inabile daa nakle nad' txen.

Bcheb Jesúza' wselee Espíritu Sántona'

¹⁵Shi chakile nad', li gon diika' nllia' bia' gonle. ¹⁶Na' inabid' Xa'na' wselee sto ben' gaklene' le' na' soalene' le' toshizi. ¹⁷Len' Espíritu Sántona', beena' chli' daa nak dii li. Na' ben' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjlall'do'lena'. ¹⁸Aga wikwaan' le' ka bi' wizeb, san wiyedch' soalen' le'. ¹⁹Aga chllach bich ile'i ben' yell-lioni nad', san le' wle'chkzile nad'. Na' daa mban' toshizi, lekzka' le' toshiizi ibanle. ²⁰Kat' illin llana' nia' ka', na' gakbe'ile zoalen' Xa'na', na' le' zoalenle nad' na' nad' zoalen' le'. ²¹Nottez ben' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki Xa'na'ne', na' nad' lekzka' gakidee na' gon' kwenche gombia'che' nad'.

²²Na' Júdaza' (beena' sto, aga Jud Scariota,) chi'ene':

—Xan', ¿berache to neto'z gonzo' ka gombia'chnto' li' na' bi len ben' yell-lioki, ben'ka' bi chonlilall'gake' li'?

²³Na' billii Jesúza' xtilleena':

—Beena' chakile' nad', wzoe' xtillaa, na' Xa'na' gakile'ne', na' nad' kon Xa'na' yidsoalennto'ne'. ²⁴Na' beena' bi chak-

ile' nad', bi chzoe' xtillaa. Na' diika' chli' chsedid' aga dii chyiljallaaan, san Xa'na', beena' bsel' nad', chzajniile'n nad'.

²⁵Yog' diiki choe'len' le' dill' naa shlak ni zoalen' le'. ²⁶Na' kat' bich soa' len le', Espíritu Sántona', beena' wsel' Xa'na', gaklene' le' na' wzajniile' le' yog' dii chiyal' inezile, na' gone' ka lljadinile yog' diika' ba wnia' le'.

²⁷Yel' mbalaza' chkwaanlena'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble. ²⁸Ba benzkzile nia' yiyaa gana' zoa Xa'na' na' lekzka' wiyedchkz' yidzoalen' le'. Na' shi chakile nad', chiyal' yibaile daa yiyaa gana' zoa Xa'na', la' zak'che' aga ka nad'. ²⁹Na' ba nia' le' diiki zi' gak kwenche kat' gakan shajle'le.

³⁰Na' bich bitek dill' we'lench' le' naa, la' ba za' dii xiwaa, daa chnabia' yell-lioni. Per aga wak inabia'n nad'.

³¹La' chon' kon ka nllia Xa'na' bia' gon' kwenche inezi ben' yell-lioki chakid' Xa'na'. Li yizolla'. Li yidó.

Jesúza' chzaklebi kwine' to yag uva

15 Nad' nak' ka yag uva daa nak dowalj, na' Xa'na' nake' ka beena' chaz chaanan. ²Na' yog' loj' xoz' xka'inna' daa bi chbia, chchogue'n. Na' diika' chbia, chonshao'che'n kwenche zizikli kwian. ³Na' le', nakle ka xoz' xka'inna' daa chbia, daa bzenagle ka nak dill'ka' be'len' le'. ⁴Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndil' nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

⁵Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gakte ka xoz' xka'inna' daa chbi-achga. Shi le' bi nakle nad' txen aga bi gak gonle. ⁶Beena' bi gone' ka dii le gone'

nad' txen, nake' ka xoz' xka'inna' daa ba bchogue' na' ibillan, na' yitope'n wzaleen lo yi'na' kwenche sheyan.

⁷Shi le' soatezi soale gonle nad' txen na' toshiizi chzoale xtillaana', li inab daa cheenile na' gakan. ⁸Xa'na' cho'e balaan kat' chonle dii wenna', na' daa chonle ka', chli'lawin dii li nakle nad' txen. ⁹Ka chaki Xa'na' nad', ka'kzan chakid' le'. Li soatezi soa gonle nad' txen kwenche gakte'ile chakid' le'. ¹⁰Shi gonle daa nllia' bia' gonle, na'ch gakte'ile le chakid' le', ka chon' nad', chon' daa nllia Xa'na' bia' gon', na' ka' chakte'id' le chakile nad'.

¹¹Ba wnia' le' ka' kwenche yiba yizaklenile' nad', na' yiyoll' yido soale mbalaz. ¹²Na' dgan nllia' bia' gonle: Gaki lljwellle ka chakid' le'. ¹³Bich bi yel' chaki dii xench de ka che beena' chzani yel' mban che'na' guete' ni che ben'ka' nllaguile'. ¹⁴Len' nakle ben'ka' nllaguid' shi chonle ka nllia' bia' gonle. ¹⁵Bich gon' le' ka mos, la' beena' nak mos aga nezile' bin chon xane'na'. San nakle ben' nllaguid' la' ba bzajniid' le' yog' diika' wna Xa'na' nad'. ¹⁶Aga len' wlejle nad', san nadaan wlej' le' na' ba bzoa' le' shajle ljenle dii wenna' daa bi te cheyi. Na' Xa'na' gone' yog' daa inabilene' daa nakle nad' txen. ¹⁷Na' dgan chllia' bia' gonle: Gaki lljwellle ganga.

Ben'ka' bi nombia' Chioza' gaktebangakile' ben'ka' nak Crístona' txen

¹⁸Bibi gakte' shi ben'ka' bi nombia' Chioza' gaktebangakile' le', la' nezakzile ka'kzan gokzbangakile' nad'. ¹⁹Shel' nakle legake' txen na'ch gakte'le' le', shel'ka'. Per daa ba wlej' le' kwenche gakte'le' txen, daan chaktebangakile' le'. ²⁰Li lljadini ka ba wniakz' le': "Aga inachcho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtillaana',

lekzka' wzenaggake' chele. ²¹Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

²²Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'. ²³Beena' chakzbanile' nad' lenkz Xa'nan' chakzbanile'. ²⁴Aga bi dol' napgake' shel'ka' bi bli'a yel' wakka' daa konon' gon ladje'ka'. Na' la'kzi ba ble'gakile' diika' chon', bia'kzə chakzbangakile' nad' na' Xa'na'. ²⁵Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

²⁶'Na' wselaa Espiritu che Xa' Chioza', beena' gaklene' le'. Espirituna', beena' chli' daa nak dii li, see gana' zoa Xa' Chioza' na' yidye' xtillaa. ²⁷Na' lekzka' lenle we'le cho'a xtillaana', la' ba gokle nad' txen ka wzoloa' chli' chsedid' ben'.

16 'Ba wnia' le' diiki kwenche bi yidinjile' daa chonlilall'le nad'. ²La' bich wlebgake' le' gana' chdop chllagcho choe'lwillcho Chioza', na' wllin lla axt wit ben' le' daa gakile' kan' chazlall' Chioza'. ³Gongake' ka' daa bi nombia'gake' Xa'na', ni bi nombia'gake' nad'. ⁴Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

Daa chon Espiritu Sántona'

⁵'Na' naa yiyaa lljazoalen' Xa'na' beena' bsel' nad', na' ni stole bich chnabile nad' gan yiyaa. ⁶Na' daa ba wnia' le' ka' le chakyesh'zi'le'. ⁷Per dii li nia' le', wakch wen chele shi yiyaa. La' shi bi yiyaa, beena' gaklene' le' bi yidsoalene' le'. San shi ba ziyaa, na' wselaaane'. ⁸Na' kat' yide', gone' kwenche gakbe'i ben' yell-lioki nakgake' ben' saaxya daa bi

biyombia'gake' beena' nak dowalj ben' li ben' shao', na' gakbe'gakile' chidol'gake' wchoglo Chioza' chegake' ni che xtoleeka'. ⁹Yiyakbe'gakile' napgake' dol' daa bi chonlilall'gake' nad'. ¹⁰Na' yiyakbe'gakile' nak ben' li ben' shao' daa yiyaa gana' zoa Xa'na' na' aga wle'chile nad'. ¹¹Na' lekzka' yiyakbe'gakile' Chioza' wi'e yel' zak'zi' che ben'ka' bi chzenag cha', la' ba bchogloe' sak'zi' dii xiwaa daa chnabia' yell-lioni.

¹²'Dii zanch de dii inia' le', dii bi shajniile naa. ¹³Per kat' ila' Espiritu Sántona', beena' chli' daa nak dii li, len' wza-jniile' le' kwaslo' daa nak dii li. La' aga dii chiljlall'ze'n ine', san ine' daa che' Xa'na'ne', na' chixje'ile' le' diika' zi' za' gak. ¹⁴Na' gone' ka sho'a balaan, la' wza-jniile' le' diika' ba wnia'. ¹⁵La' yog'lo'lte daa na Xa'na' lennan' cho'a dill'. Daan nia', Espirituna' wzajniile' le' diika' ba wnia'.

Yel' chakyeshiina' yiyakan yel' xaba

¹⁶'Aga chllach bich ile'ile nad', na' lekzka' aga wlla yizle'ile nad'.

¹⁷Na' bal' ben'ka' nakgake'ne' txen wnabi ljwelle':

—¿Bera zejin daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'? ¹⁸¿Bi zejin daa naze' "aga chllach"? Bi chajniicho biche naze' ka'.

¹⁹Na' Jesúza' gokbe'ile' cheengakile' inabgakile'ne' bi zejin daa wne', na'ch chi'e legake':

—¿Achnabi ljwell-le bi zejin daa wnia' le' aga chllach bich ile'ile nad', na' lekzka' aga wlla yizle'ile nad'? ²⁰Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi gakyeshile, yel' chakyeshii che-lena' yiyakan yel' xaba. ²¹Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa

to bi'do' che' yell-lioni. ²²Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

²³'Na' kana'chan bich bi inabile nad'. Dii li nia' le', bittezə dii inabile Xa'na', gonkze'n, daa nonlilall'le nad'. ²⁴Axt naa ni to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucristona' ba bene' gan daa chnabia' yell-lioni

²⁵'Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen. ²⁶'Na' kat' ba bllin llana', kanan' inabile Xa'na' bittezə dii inabilene' daa nonlilall'le nad', na' bi chonan byen kwin' inabidee gaklene' le', ²⁷la' kwinkz Xa'na' chakile' le' daa chakile nad' na' daa chajle'le bselee nad'. ²⁸Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiyaa gana' zoe'.

²⁹Na'ch che' ben'ka' nakgake'ne' txen:

—Naach ba choo dill' dii najnii, na' bich bi jempl chchino'. ³⁰'Na' chakbe'into' nez nle'ilo' yog'loite, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li zoo gana' zoa Chioza'.

³¹'Na' che' Jesúza' legake':

—¿Anaach chajle'le? ³²Ba zoa illin lla, wa ba bllinkz llana', illeshlesle na' gala ikaa twej twejle, na' yikwaanle toz'. Per aga tozan' yigaana', la' zoalenkz Xa'na' nad'. ³³Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li gondiplall', la' ba ben' gan daa chnabia' yell-lioni.

Be'llwill Jesúza' Chioza' che ben'ka' nakgake'ne' txen

17 Na' ka wde wna Jesúza' diika', na' blis jalawe'na' bwie' yabalə, na' golle':

—Xa, ba bllin gor illagloa' daa llia bia wtil'. Wloo nad' balaan, nad' nak' xiino', kwenche lekzka' nad' kwaa li' balaan. ²La' ba beno' lo na' inabia' lao yog'lol ben', kwenche gon' ka gat' ye'l mban zejli kani che ben'ka' wlejo' gonlilall'gake' nad'. ³Na' daa gat' ye'l mban zejli kani che ben', zejlin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

⁴'Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'. ⁵'Na' naa, Xa, yiyongacho' nad' balaanna' kat' yiyed' kwito'na' ka balaanna' daa wdapkz' kana' wzoalen' li' ka zi' xe sil yell-lioni.

⁶'Ba beno' nad' ben'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'. ⁷'Na' naa ba nezgakile' yog' dill'ka' bi'a nakan dii wno'. ⁸La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li wzaa gana' zo' na' ba wyajle'gake' lin' bseloo nad'.

⁹'Chnabid' li' gakeno' legake'. Aga chnab' gakeno' yog' ben' yell-lioki, san chnab' gakeno' ben'ka' wlejo' kwenche gonlilall'gake' nad', la' lall' non' nakgake'. ¹⁰'Na' yog' ben'ka' nak lall' na' lekzka' nakgake' lall' no'. Na' legake' ba wloogake' nad' balaan.

¹¹'Na' naa ba chiza' yell-lioni. Na' legake' yigaangake' ni. Xa, li' nako' dowalj ben' wen ben' shao'. Wdapgach ben'ka' ba beno' nonlilall'gake' nad' kon ye'l wak cho'na' kwenche gakgake' toz, ka nakcho cho' nakcho toz. ¹²Shlak wzoalen' legake' yell-lioni ba wdap bwia' legake'

kon yel' wak cho'na'. Na' ni toe' bi wlliyai', letechokzə beena' ba nakan kwiayee, kwenche gak ka na Cho'a Xtilloona'.

¹³ Na' naa ba zizaa gana' zo'. Na' nia' li' diiki shlak ni zoa' yell-lioni kwenche ben'ki gapgake' yel' xaba ka daa nap'. ¹⁴ Nad' ba bzajniid' legake' cho'a xtilloona', na' ben'ka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen ben'ka' bi nombia' li'. ¹⁵ Aga chnabid' li' yikoo ben'ki nonlilall' li' lo yell-lioni, san chnab' wkweejgachgako'ne' kwenche ki chitj seni dii mala' daa chda yell-lioni legake'. ¹⁶ Bi nongake' txen ben'ka' bi nombia' li', ka chon' nad' bi chon' ben'ka' txen. ¹⁷ Bengach kwenche ben'ki nonlilall' nad' gakchgake' ka chazlalloo daa chzenaggake' dill' li cho'na', la' cho'a xtilloona' nakan dii li. ¹⁸ Ka beno' bseloo nad' kwenche bidsoa' yell-lioni, ka'kzan chselaa legake' kwenche shajgake' ladj ben' yell-lioki. ¹⁹ Chzanlallaa kwin' gon' ka no' ni chegake', kwenche lekzka' gongake' ka no' daa ba chzenaggake' dill' li cho'na'.

²⁰ Aga chnabid' li' gakleno' to legake', san lekzka' chnab' gakleno' ben'ka' gonlilall' nad' kat' wzenaggake' cho'a xtilloona' daa we' ben'ki. ²¹ Xa, chnabid' li' gonshgo' ka gak yog'gake' toz, ka nakcho cho' nakcho toz. Lekzka' chnab' gagkake' cho' toz kwenche ben'ka' bi nonlilall' li' shajle'gake' lin' bseloo nad'. ²² Ba wlo'a legake' balaan ka daa wloo nad', kwenche gagkake' toz ka nakcho cho' nakcho toz. ²³ Nad' nakgakee toz ka nakcho cho' nakcho toz. Bengach ka gagkake' toz ka chiyal', kwenche ben'ka' bi nonlilall' li' gakbe'gakile' lin' bseloo nad', na' gakbe'gakile' chakilo' ben'ka' nonlilall' nad' ka chakilo' nad'.

²⁴ Xa, li' ba beno' nad' legake', na' cheenid' soalengake' nad' gana' soa' kwenche ile'gakile' balaan cha'na' daa

beno' nad' ka zi' xe silte yell-lioni daa chakilo' nad'. ²⁵ Xa, li' nako' ben' li' ben' shao'. La'kzi ben'ka' bi nonlilall' nad' bi nombia'gake' li', nad' nombi'a li' na' ben'ki nonlilall' nad' nezgakile' lin' bseloo nad'. ²⁶ Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gagkake' ben', na' nad' soalenzgakee.

Bex'gake' Jesúza'

(Mt. 26:47-56; Mr.

14:43-50; Lc. 22:47-53)

18 Na' ka biyoll wna Jesúza' ka', wza'lene' ben'ka' nakgake'ne' txen wyajgake' shlaa yao Cedronna', na' wyoolene' legake' to yell-lion ga lle' lla' yag olivo. ² Na' Juda', beena' bene' Jesúza' lo na' ben' malka', lekzka' nombi'e latja', la' Jesúza' zan shii wyajlene' legake' na'. ³ Na' bllinlen Juda' ben' zan soldad na' zi xonj ben'ka' chap yoodo'na', ben'ka' bsel' boxzka' chnabia' len fariseoka'. Zejgake' nox'gake' no kandil, no yi' yech, na' dii wniagakile'. ⁴ Na' Jesúza' ba nezgzile' yog' daa zi' gak che', na'ch bcheje' jatile' legake', na' chie':

—¿Non chiyiljle?

⁵ Na' che'gake'ne':

—Jesús, ben' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'. ⁶ Na' ka goll Jesúza': “Nadaan”, to biza'zgake' jayetgake' wza'che'lə. ⁷ Na'ch wiznabi Jesúza' legake':

—¿Noran chiyiljle?

Na' che'gake'ne':

—Jesús, ben' Nazaretan'.

⁸ Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyiljle, li' we' latj yiyaj ben'ki.

⁹ Golle' legake' ka' kwenche billinin daa wne': “Xa, ba wdap' ben'ka' beno' nad' na' ni toe' bi wlliyai'.” ¹⁰ Na' Simón Pédrone' no'e to spad, na'ch wleje'n

b̄hogue' t̄laa nag to ben' le Malco, de sh̄lina'. Na' Málcona' nake' xmos b̄xoz choo b̄xoz xenna'. ¹¹ Na'ch che' Jesúza' Pédrona':

—Bigoo spad cho'na' loo lillinna'. La' chonan byen gak cha' daa ba nllia X̄a'na' bia' gak.

Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

¹² Na'ch soldadka' len x̄ane'ka', na' ben'ka' chap yoodo' che ben' Israelka', bex'gake' Jesúza' na' b̄chejgake'ne'. ¹³ Na' zigaate jwa'gake'ne' lao Anáza' xtobiin che Caifáza', na' Caifáza' nake' b̄xoz choo b̄xoz xen lo yiza'. ¹⁴ Na' Caifáza', len' beena' golle' ben'ka' ch̄nabia' ben' Israelka' wenchlan witgake' toz Jesúza' aga ka daa kwiayi' yog' ben' wlall che'ka'.

Bi b̄cheb Pédrona' shi nombi'e Jesúza'

(Mt 26:69-70; Mr. 14:66-68; Lc 22:55-57)

¹⁵ Na' Simón Pédrona' len sto ben' nake' Jesúza' txen janogake'ne'. Na' beena' zejlen Pédrona' txen nombia' b̄xoz choo b̄xoz xenna'ne', daan gok wyoolene' Jesúza' lesh' chyoo che b̄xoz choo b̄xoz xenna'. ¹⁶ Na' Pédrona' wzie' cho'a leeja'. Na'ch beena' nombia' b̄xoz choo b̄xoz xenna', bicheje' jashaljlene' bi' nool we-waa chap cho'a leeja' kwenche be'b' latj wyoo Pédrona'. ¹⁷ Na'ch bi' nool wewaa chap cho'a leeja' che'b' Pédrona':

—¿Aaga lenon' nako' beeni txen?

Na' che' Pédrona'b':

—Bi len' nakee txen.

¹⁸ Na' moska' len ben'ka' chap yoodo'na' wlekake' yi'na' kwenche wbillgake' daa ba chak zag. Na' jselen Pédrona' legake' cho'a yi'na' kwenche billa'ile'.

W̄nabyolli Anáza' Jesúza'

(Mt 26:59-66; Mr. 14:55-64; Lc 22:66-71)

¹⁹ Na' beena' nak b̄xoz choo b̄xoz xen w̄nabyollile' Jesúza' no ben'ka' nakgake'ne' txen na' beran chli' chsedile'. ²⁰ Na' che' Jesúza'ne':

—Ladj lkwe' beñaan ba bi'a dill'. Ba bli' b̄sedid' ben' lesh' chyoodo'na' na' gachl̄e chdop chllag ben' wlalka' choe'l̄willgake' Chioza'. Na' bibi dill' bi'a do ngash'z̄ə. ²¹ ¿Berache ch̄nabzilo' nad'? W̄nabi ben'ka' ba bli' b̄sedid' kwenche inagake' li' beran ba goshgakee. La' nez-gakile' bin ba bli' b̄sedid' legake'.

²² Na' ka wde wna Jesúza' ka', to ben'ka' chap yoodo'na' wdape' x̄agueena', chi'ene':

—¿Bīche chilliizo' b̄xoz choo b̄xoz xenni dill'?

²³ Na' che' Jesúza'ne':

—Shi bi dii mal ba wnia', wnashki beran ba wnia'. Na' shi sh̄likzan ba wnia', ¿berache chitzo' nad'?

²⁴ Na'ch de nchejzi Jesúza' bde Anáza'ne' lao Caifáza', beena' nak b̄xoz choo b̄xoz xen.

Sto shii bi b̄cheb Pédrona' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

²⁵ Na' shlak ze Pédrona' chshee cho'a yi'na', ben'ka' lle' na' che'gake'ne':

—¿Aaga lenon' nako' beeni txen?

Na' bi b̄chebe', san chi'e:

—Bi nakee txen.

²⁶ Na' to xmos b̄xoz choo b̄xoz xenna', beena' nak bish' l̄jwell beena' b̄chog Pédrona' nague'na', chi'ene':

—¿Aaga lenon' ble'lenid' Jesúza' gana' lle' yag olívoka'?

²⁷ Na' stokz̄ə bi b̄cheb Pédrona', na' lii wchellte shikwteza'.

Bdegake' Jesúza' lao Pilátona'

(Mt. 27:1-2, 11-14; Mr.
15:1-5; Lc. 23:1-5)

²⁸Na' cheeni'lesdo' bichejgake' lill Caifáza' na' biche'gake' Jesúza' gana' chon Pilátona' yel' joschisa'. Na' ben' Israelka' aga wyoolengake' Jesúza' gana' chon Pilátona' yel' joschisa', la' aga wak gaogake' daa chsini'agake' che Paskwa' shi ba wyoogake' loo yona'. ²⁹Na'ch bchej Pilátona' chi'e legake':

—¿Bi xyan chaole che beeni?

³⁰Na' che'gake'ne':

—She'l' bibi dii mal chone' aga widwa'nto'ne' lawo' ni, she'l'ka'.

³¹Na'ch che' Pilátona' legake':

—Li yichi'e na' li gon yel' joschis che' kon ka na ley chelena'.

Na' ben'ka' chnabia' ben' Israelka' che'gake'ne':

—Aga bi lsens chento' de witnto' ben'.

³²Na' daa gok ka', billinin ka wna Jesúza' gak kat'ka' guete'. ³³Na'ch biyoo Pilátona' gana' chone' yel' joschisa', na' goxe' Jesúza' chi'ene':

—¿Alin' nako' ben' wñabia' che ben' Israelki?

³⁴Na' che' Jesúza'ne':

—¿Adii chza'z lalloon no' ka'? ¿Awa ben' yoblan ba be'lene' li' xtillaana'?

³⁵Na'ch che' Pilátona'ne':

—¿Achakilo' ben' Israel nad'? Ben' wlall cho'kikzan na' bñozka' chnabia' le', ba bengake' li' lo na'. ¿Beran beno'?

³⁶Na'ch che' Jesúza'ne':

—Aga nak yel' wñabia' cha'na' ka che ben' yell-lioki. She'l' nakan ka', ben'ka' nak nad' txen wllongake' nad' kwenche bi gox' ben' wlall cha'ki nad', she'l'ka'. Per aga nak yel' wñabia' cha'na' de yell-lioz.

³⁷Na'ch che' Pilátona'ne':

—¿Ana' ben' wñabia'kzan nako', shka'? Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa

nak dii li. Na' yog'lo'l ben'ka' chzenag-gake' dill' lina', chzenaggake' cha'.

³⁸Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr.
15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' ben' wñabia' che ben' Israelka', na' chi'e legake':

—Ni to dii mal bi chillelid' chon beeni.

³⁹Na' kon ka yoolole chak yog' yiz chsan' to ben' de lillyana' kat' chal' lni Paskwi, ¿abi cheenile yisan' ben' wñabia' cheleni, le' nakle ben' Israel?

⁴⁰Na'ch yog'gake' besyaagake' zillj, che'gake'ne':

—¿Aga beenan' yisano! ¡Barrabázan' bisan!

Na' Barrabáza' nake' to ben' wban.

19 Na' ka' gok ben Pilátona' mandad bet wdingake' Jesúza'. ²Na' soldadka' bengake' to bxoön de xis yesh' na' bllingake'n yichje'na' ka corona na' bwakwgake'ne' to lech' de morad. ³Na'ch wbig'gake' lawe'na' chtitjgake'ne', chongake' ka ben' chgoo le' bal-aan, che'gake':

—¿Toshiizi sechgayi che beeni chñabia' ben' Israelka'!

Na' wdapgake' xagueena'.

⁴Na'ch bizchej Pilátona', chi'e ben' Israelka':

—Li wwia, ni kwejee kwenche inezile ni to dii mal bi chillelid' bene'.

⁵Na' bchej Jesúza' mbinte bxoön de xis yeshaa yichje'na' na' nakwtie' lech' morada'. Na'ch che' Pilátona' legake':

—Ni ze beeni chaole xya cheyin.

⁶Na' bñozka' chñabia' na' ben'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¿Bdee lee yag cruza! ¡Bdee lee yag cruza!

Na' che' Pilátona' legake':

—Li yichi'e, shka'. Na' li wdee, le'. La' nad', ni to dii mal bi chillelid' bene'.

⁷Na' ben' wñabia' che ben' Israelka' che'gake'ne':

—De to ley chento' daa na chiyal' guete' daa nalze' nake' Xiin Chios.

⁸Na' ch gollgake' Pilátona' ka', zizikchli b'lebe'. ⁹Na'ch biyo'e sto shii gana' chone' yel' joschisa' na' chi'e Jesúza':

—¿Gara ben' li'?

Na' Jesúza' bikzə bi dill' billi'e.

¹⁰Na'ch che' Pilátona'ne':

—¿Berache ki chilli'o xtillii? ¿Abi nezilo' nap' yel' wñabia' kwenche wdaa li' lee yag cruza' na' naptia' yel' wñabia' kwenche yisan' li'?

¹¹Na'ch che' Jesúza'ne':

—Aga bi yel' wñabia' napo' bi gonilo' nad' shel' bi non Chioza'n li'. Daan, beena' bdie' nad' lawo' ni, dol' xench nape' aga ka li'.

¹²Na'ch ka beni Pilátona' wne' ka', biy-iljallee naklə ka gone' kwenche yisane' Jesúza', per ben'ka' chñabia' ben' Israelka' axt chosyaayigake', che'gake'ne':

—Shi yisano'ne' bi nako' txen Césara', la' nottez beena' ina nake' ben' wñabia', Césaran' chizoshi'e.

¹³Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yel' joschisa', gana' le Gábata de dill' hebreo, na' zejin latj ga ntaogake' yaj. ¹⁴Na' gok dga llana' chsini'agake' che lni Paskwa'. Na' ka do gobill goll Pilátona' ben' Israelka':

—Ni ze ben' wñabia' cheleni.

¹⁵Na'ch legake' chosyaagake'. Zeyidgake', che'gake':

—¿Wdoyo beena'! ¿Bdee lee yag cruza' Na'ch che' Pilátona' legake':

—¿Acheenile wi' a lens wda'gake' ben' wñabia' cheleni lee yag cruza'?

Na' b'xozka' chñabia' che'gake'ne':

—Toz Césaran' chñabi'e neto'. Koch no ben' yoblə zoa.

¹⁶Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch b'che'gake'ne'.

Bda'gake' Jesúza' lee yag cruza'

(Mt 27:32-44; Mr.

15:21-32; Lc 23:26-43)

¹⁷Na'ch bwa'gake' Jesúza' yag cruz che'na', na' b'che'gake'ne' gana' le Gólgota de dill' hebreo, na' zejin Latj che llit yichj ben' wet. ¹⁸Na' na' bda'gake' Jesúza' lee yag cruza', na' lekzka' bda'gake' zi twej ben' shlaa wej. ¹⁹Na' Pilátona' bzeje' to dii bda'gake' yichj yag cruz che Jesúza', na' nan ki: “Jesús, ben' Nazaret, ben' wñabia' che ben' Israelka'.” ²⁰Na' bzeje'n dill' hebreo, dill' latín na' dill' griego. Na' zan ben' Israelka' blabgake' daa da' yichj yag cruza', la' gana' bda'gake' Jesúza' lee yag cruza' chgaanān gaozə yell Jerusalénna'. ²¹Daan b'xozka' chñabia' ben' Israelka' gollgake' Pilátona':

—Bi chiyal' inan “Ben' wñabia' che ben' Israelka'”; san inan “Beenin nalze' nake' ben' wñabia' che ben' Israelka'.”

²²Na' Pilátona' chi'e legake':

—Kon ka ba bzeja'n, ka'kzan igaanan.

²³Na' biyoll bda' soldadka' Jesúza' lee yag cruza', na'ch be'x'gake' xe'na' na' bengake'n taplə kwenche bikaa twej chegake'. Na' lekzka' be'x'gake' xe' dii tona' daa nak to shwilizə. ²⁴Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: “Bilaagake' xa'na', na' bengake' to wyitj kwenche got'bia' nogake' wkaan.”

²⁵Na' kwit yag cruz che Jesúza' ze xneena' len ben' bile'na', na' len María, xool Cleófaza', na' María ben' yell Magdálana'. ²⁶Na' ka ble'i Jesúza'

xneena', na' lekzka' ble'ile' gaozə ze to beena' nake'ne' txen, beena' le' chakile', na'ch chi'e xneena':

—Beenin yiyoni xiino' naa.

²⁷ Na'ch chi'e beena' nake'ne' txen:

—Beenin yiyoni xnoo naa.

Na' lo llana' bichi'e xna' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

²⁸ Na' ka wde, nezi Jesúza' ba gok yog' daa lliá bia' gaka', na' kwenche yillinin ka na Cho'a Xtill' Chioza', wne':

—Chbilid'.

²⁹ Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis^{ff} kwenche bzoagake'n cho'ena'. ³⁰ Na' wde weej Jesúza' daa nak zichj zla', na'ch wne':

—Ba gok yog' daa lliá bia' gak naa.

Na' bchek' yichje'na', na' wite'.

To soldad wllibe' to ya dii nla' lawinna' kwit lee Jesúza'

³¹ Na' ben'ka' chnabia' ben' Israelka' bi goongakile' yigaan kwerp che ben'ka' lee yag cruzka' llana' chombaangake'. Daan gollgake' Pilátona' gone' mandad lljtishjgake' ni'a ben'ka' da' lee yag cruza' kwenche yob guetgake' na' yiletjgake' kwerp che'ka' lee yag cruzka'. ³² Na'ch bselee soldad che'ka', na' jtishjgake' chop laate ni'a ben' necha' da' kwit Jesúza', na' lekzka' bengake' che beena' sto da' zi shlaa kwite'na'. ³³ Na' ka jabig'gake' gana' da' Jesúza' ble'gakile' ba wite', na' bi wdishjgake' ni'ena'.

³⁴ Na' to soldada' wllibe' to ya lo tosh' kwit li'ena' na' lii bchejten chen len nis.

³⁵ Na' beena' choe' dill' cheyi diiki, len' ble'ile' ka gok, na' cho'e dill' kwenche

lenle shajle'le. Na' le' nezile' dill' lin cho'e. ³⁶ Gok diiki kwenche billinin ka na Cho'a Xtill' Chioza' gana' na: “Ni to llitka' yo'e bi chishjgake'.” ³⁷ Na' gan yoblə lee Cho'a Xtill' Chioza' chiznan: “Wwiagake' beena' wllibgake' yana'.”

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

³⁸ Na' ka wde gok diiki, José ben' yell Arimatéana', wnable' Pilátona' wi'e latj yikee kwerp che Jesúza'. Joséna' goke' txen Jesúza' do ngash'zə daa bllebe' ben'ka' chnabia' ben' Israelka'. Na' Pilátona' bi'e latj, na'ch wyaj Joséna' bi-kee kwerp che Jesúza'. ³⁹ Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chla' zix daa nongake' de mirra na' nchixan daa le áloe. ⁴⁰ Na'ch btobgake' kwerp che Jesúza' to lech' ton na' blla'gake'n daa chla' zix, kon ka chon ben' Israelka' kat' chkwash'gake' to ben' wet. ⁴¹ Na' gaozə gana' bda'gake' Jesúza' lee yag cruza' de to latj ga nazgake' yag dii chbia dii zix, na' na' zoa to blej kob dii bin' koogake' ni tlish' ben' wet. ⁴² Na' daa chakbyen-gakile' wsini'agake' che llana' chombaangake', lii wlootegake' kwerp che Jesúza' loo bleja' zoa gaozə na'.

Biban Jesúza' ladj ben' wetka'

(Mt. 28:1-10; Mr. 16:1-8; Lc. 24:1-12)

20 Na' lla nech che xman'na', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'. ² Na'ch bizee ziyajdoe' gana' zoa Simón Pédróna' na' sto beena' nak Jesúza' txen, beena' le' gokile', jayelle' legake':

—Ba jalejgake' Xanchóna' loo bana' na' bi nezinto' galə jaloogake'ne'.

^{ff}19:29 To lo xis: literalmente en una rama de hisopo.

³Na'ch wza' Pédrona' len beena' sto zejgake' cho'a bana'. ⁴Choptie' zejdogake', per beena' to bxonjche' aga ka Pédrona' na' zigaate le' blline' cho'a bana'. ⁵Na' bchekee bwie' loo bana' na' ble'ile' lech'ka' chi' na', per bi wyo'e. ⁶Na' ka bllin Simón Pédrona' na' wyo'e loo bana' na' lezkka' ble'ile' lech'ka' chi' na'. ⁷Na' lecha' dbod yichje'na' aga lenan chi' kwit lech'ka', san ndoban chi'n ka'lə. ⁸Na'ch lezkka' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúzan'. ⁹La' kana' aga ba wya-jni'yen'gakile' Cho'a Xtill' Chioza' gana' cho'en dill' yiban Jesúza' ladj ben' wetka'. ¹⁰Na'ch ben'ka' chop non Jesúza' txen biyajgake' gana' zoagake'.

**Jali'lao Jesúza' María,
ben' yell Magdálana'**

(Mr. 16:9-11)

¹¹Na' Maríana' bigaane' cho'a bana' chbelle'. Na' lo zej chbelle' bchekee kwenche bwie' loo bana'. ¹²Na' ble'ile' chop anjl zoagake' do xtil, chi'gake' loo bana', toe' chi' yichjinna' na' stoe' chi' xni'alin gana' got' kwerp che Jesúza'. ¹³Na'ch che'gake' Maríana':
—¿Berache chbellzo', noolə?
Na' golle' legake':
—Chbell' daa ba bidlejgake' kwerp che Xan'na', na' bi neqid' galə jalooagake'ne'.
¹⁴Shintg wne' ka', ka bllii jalawena' na' ble'ile' ze Jesúza' kolleena', per bi biyombi'e shi Jesúzan'. ¹⁵Na'ch che' Jesúza'ne':

—¿Berache chbellzo', noolə? ¿Nodaa chiyiljo'?

Na' Maríana' chakile' beena' chap yag zixkan', na' chi'ene':

—Ben'do', shi ba bibejo'ne', wnagach nad' galə jadixjo'ne' kwenche yichi'ane'.

¹⁶Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejjin: ben' chli' chsedi ben'.

¹⁷Na' che' Jesúza'ne':

—Bi goxoo nad', la' bin' yiyep' kwit Xa'na'. Lete biyaj, jane ben'ka' nak nad' txen jayellgake' ba ziyaa kwit Xa'na', beena' lezkka' nak Xale. Lljazoalen' Chios cha'na', beena' lezkka' nak Chios chele.

¹⁸Na'ch biza' María, ben' yell Magdálana', jayelle' ben'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

**Jali'lao Jesúza' ben'ka'
nagkake'ne' txen**

(Mt 28:16-20; Mr.

16:14-18; Lc 24:36-49)

¹⁹Na' ka gol lo llana' bibane', lla nech che xmanna', ba ndop nllag ben'ka' nak Jesúza' txen na' nsejtegake' yoona' daa chllibgake' ben'ka' chnabia' ben' Israelka', ka gokbe'gakile' ba ze Jesúza' ladjeka', na' chi'e legake':

—Soashgale mbalaz.

²⁰Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' ben'ka' nagkake'ne' txen le bibagakile' ble'gakile'ne'. ²¹Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' llje'le cho'a xtilaana' yell-lioni.

²²Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántona'. ²³Na' ben'ka' yizi'xenle saaxya che'ka', wiyakxenan. Na' ben'ka' bi yizi'xenle cheyin, bi yiyakxen chegake'.

**Tomáza' bi wyajli'e shi biban
Jesúza' ladj ben' wetka'**

²⁴Tomáza', beena' che'gake' Dídimo nake' txen ben'ka' shllin, na' bi lene' ka jali'lao Jesúza' legake'. ²⁵Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na' wde na'ni kwit li'ena', aga wyajli'a.

²⁶Na' ka wde xon' lla, dii yoblə bidop ben'ka' nongake' Jesúza' txen loo yooná' na' len Tomáza'. Na' la'kzi nsejtegake' yooná', wyoo Jesúza' jsie' ladje'ka'. Na' chi'e legake':

—Soashgale mbalaz.

²⁷Na'ch chi'e Tomáza':

—Bwia na'ni, na' bñe'n xbeno'na'; na' bñe' noona' kwit li'ani. Bi gakchoplaloo, san wyajle'.

²⁸Na'ch che' Tomáza'ne':

—iLin' nako' Xan' na' naktio' Chios cha'!

²⁹Na' che' Jesúza'ne':

—Galj ble'ilo' nad' na'ch chajli'o. Chakomba ben'ka' chajle'gake' la'kzi bin' ile'gakile' nad'.

Bzej Juanna' libri kwenche shajle' ben' Jesúza' nake' Xiin Chios

³⁰Zan yel' wak daa ben Jesúza' lao ben'ka' nakgake'ne' txen bi nyojgakan lee libri. ³¹Per diiki nyojgakan kwenche shajle'le Jesúza' nake' Xiin Chioza' na' len' Crístoná', beena' wleje' inabi'e, na' daa gonlilall'lene' gat' yel' mban chele dii bi te cheyin.

Jali'lao Jesúza' ben'ka' nakgake'ne' txen

21 Ka wde, Jesúza' jali'lawe' sto shii ben'ka' nakgake'ne' txen cho'a Nisdo' che Galileana' daa lekzka' le Nisdo' che Tiberias. Na' ki gok: ²Simón Pédróna' len Tomáza', beena' nsigake' Dídimó, na' Natanaela', ben' yell Canána' daa lliá gana' mbani Galileana', na' chopte xiin Zebedewa' na' zi chop ben'ka' nongake' Jesúza' txen lle'gake' Galileana'. ³Na' Simón Pédróna' chi'e legake':

—Sha'ch' lljxen' belá'.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen belá', na' ni tlish' kono wxengake' do yel. ⁴Na' cheeni'lesdo' bllin Jesúza' cho'a nisdo'na', na' ben'ka' nakgake'ne' txen aga chakbe'gakile' shi len'. ⁵Na'ch Jesúza' wñie' legake', chi'e:

—Le' ben' bish'dawaa, çabin' senle belá' gaocho?

Na' che'gake'ne':

—Aga no de.

⁶Na'ch che' Jesúza' legake':

—Li wza'! yixj chelena' shlaa de shli che barkwa' na' ido'lgakb.

Na' bengake' ka golle', na' ka nan yigoyogake' yixja' loo nisa' aga chizogak-ile'n daa nyichachgan belka'. ⁷Na' beena' le chaki Jesúza'ne', golle' Pédróna':

—iXanchonan'!

Na' kon ka beni Pédróna' golle'ne' ka', lii biyakwte xe'na', na' bxitee loo nisa'. ⁸Na' ben'ka' sto biyajlengake' barkwa' cho'a nisdo'nalə, zingoyon yixja' daa zinyichachga belka', la' aga nakchan zit', ka sto guiyoa metrzan. ⁹Na' ka bichejgake' loo barkwa', ble'gakile' ba chi' yi'na' xna' na' xoa to bel lawinna', na' dete yetxtil. ¹⁰Na' che' Jesúza' legake':

—Li yiyox'to belka' zi' wxenle.

¹¹Na'ch wyoo Simón Pédróna' loo barkwa' kwenche jaselle' yixj belá' na' bigoyoe'n axt cho'a nisdo'na'. Na' la'kzi tolla'cha nak yixja' daa ziyoon to guiyoa shiiniyon bel yelka', bi bcheza'n. ¹²Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxjgakile' ye'gake'ne': “¿Nora li'?” La' gokbe'gakile' Xancho Jesúza'kzan'. ¹³Na'ch wbig' Jesúza' na' bexee yetxtila' len belá' na' bi'e che chegake'.

¹⁴Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshaljlen Jesúza' Simón Pédróna'

¹⁵ Na' ka bidaogake' xsila', na'ch che' Jesúza' Simón Pédróna':

—Simón, xiin Jonás, ¿achakchilo' nad' aga ka to chaki beṅ'ki nad'?

Na' Pédróna' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia beṅ'ka' chonli-lall'gake' nad', beṅ'ka' nak ka xil'do' cha'.

¹⁶ Na' de wchop shii wiznable'ne', chi'ene':

—Simón, xiin Jonás, ¿achakilo' nad'?

Na' Pédróna' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia beṅ'ka' chonli-lall'gake' nad', beṅ'ka' nak ka xil' cha'.

¹⁷ Na' de wyon shii wiznable'ne', chi'ene':

—Simón, xiin Jonás, ¿ana' chakilo' nad'?

Na' gokyeshii Pédróna' daa ba gok shon shii chṅab Jesúza' shi chakile'ne', na' chi'ene':

—Xan', nez nle'ilo' yog'loṭe, na' nezkzilo' chakid' li'.

Na'ch che' Jesúza'ne':

—Na'len wdap bwia beṅ'ka' chonli-lall'gake' nad', beṅ'ka' nak ka xil'do' cha'.

¹⁸ Dii li nia' li', ka goko' beṅ' wew', gokw xalaano' to kwanzo' na' wyajo' kon ga wnan cho'. Per kat' ba goxoo, wli nooka'

na' yiwakw beṅ' yoblə xalaano'na', na' wchi'e li' ga bi cheenilo' shajo'.

¹⁹ Na' daa goll Jesúza'ne' ka', bzajniile' legake' ka guet Pédróna', na' daa guete' ka' sho' Chioza' balaan. Na' ka wde golle' Pédróna' ka', chi'ene':

—Btiplaloo beṅ'ilall' nad' toshiizi.

Beena' le chaki Jesúza'ne'

²⁰ Na' biyečhj Pédróna' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wnable'ne', chi'ene': “Xan', ¿norakznton' gon li' lo na' beṅ' malka'?” ²¹ Na' ka ble'i Pédróna'ne', na'ch chi'e Jesúza':

—Xan', ¿shera beeni?

²² Na' che' Jesúza'ne':

—Shi cheenid', ni mbankz beeni kat' ziyed'. Bi sio' beena' wneyi. Lin' btiplaloo beṅ'ilall' nad' toshiizi.

²³ Na' daa golle' ka', wze dill' ladj beṅ'ka' chonli-lall' Jesúza' nan aga wet beena'. Per bi goll Jesúza' Pédróna' bi guet beena', san chi'ene': “Shi cheenid', ni mbankze' kat' ziyed'. Bi sio' beena' wneyi.”

²⁴ Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' nezinto' dillaa cho'e nakan dii li.

²⁵ Dii zanch dii ben Jesúza' na' bi nyojan. She' nyoj yog' diika' bene', chakid' bi gaki yell-lioni ikwa' librka' she'ka'.

Diika' ben postlka'

Bcheb Jesúza' wselee Espíritu Sántona'

1 Teófilo, lee libr necha' bzej', na' bzej' yog' dii wenka' ben Jesúza' na' di-ika' bli' bsedile' dezd ka wzoloe' ²axt ka bllin lla biyep'e' yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'. ³Na' ka wde wite' na' bibane' ladj ben' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che ye! wñabia' che Chioza'.

⁴Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. ⁵Dii li Juanna' bchoe' ben' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶Na' ben'ka' ndop nllag kwit Jesúza', wñabgakile'ne':

—Xan', ¿awibejo' cho' ben' Israel lo ni'a na' ben' zit'ka' naa kwenche inabi'o neto'?

⁷Na' Jesúza' golle' legake':

—Bi chido!le inezile bi lla bi gor gon Xacho Chioza' daa gone', la' toze' len' chñabi'e' na' ba bllie' bia' batan gone'n. ⁸Na' ka yidsoa Espíritu Sántona' loo yichjlall'do'lena' na' gone' le' ye! wak, na' we'le xtillaana' yell Jerusalénna', na' doxen gani mbani Judeani na' lekzka' gana' mbani Samáriana', na' doxen zbii zkaan yell-lioni.

⁹Na' ka biyoll golle' ka', wzolo biyep'e' yabana' chwiata ben'ka', na' wze to bej

bkwashaan le' na' bich ble'gakile'ne'. ¹⁰Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. ¹¹Na' gollgake':

—Le' ben' Galilea, ¿berache chwiazle yabana'? Kwin Jesúza', beena' ble'ile bichej ladjleni na' biyep'e' yabana', kakzan ile'ilene' yiyede'.

Wlejkake' Matíaza' bizoe' lo laz Juda'

¹²Na'ch biyetjkake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'. ¹³Na' ka billingake' Jerusalénna', biyepgake' yooná' lliá shkwiana' cha'lə gana' zoagake'. Na' ben'kin billin: Pédróna', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas ben' bish' Jacóbona'.^{§§} ¹⁴Yog' ben'ki chdopgake' yog' lla kon ben'ka' nak ben' bish' Jesúza' kwenche choe'lwillgake' Chioza', na' len Maríana' xna Jesúza' na' zi' bal noolka'.

¹⁵Na' llaka' wzoagake' na', Pédróna' wzie' ladj ben'ka' chonlilall'gake' Jesucristóna', nakgake' ka do to guiyoa galjə, na' golle' legake':

¹⁶—Le' ben' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill nakan gon Juda', beena' bchi'e' ben'ka' be'gake' Jesúza'. ¹⁷Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'. ¹⁸Na' mecha' daa be'ee che dii mala' daa bene', lennan' biziile' to yell-lío gana' bxope' de gozyichjlə na' goshj li'ena' na' bchej yog' xjlə'na'. ¹⁹Na' ka wñezi ben' Jerusalénka' ka gok che Juda', na' bsi'gake' yell-liona' daa bizi'e Acéldama

§§1:13 Ben' bish' Jacóbona': ben'ka' nsed nagake' chiyal' inan xiin Jacóbona'.

de xtil'gake', na' zejın Yell-lıo Chen.

²⁰La' lee libr che Sálmoka' nan:

Yidesh yiloashga lill xlatje'na',

na' ni sto kochno soan.

Na' lezkza' nan:

Ben' yoblə yiyakshga lo nee daa nan gok lo nee gone'.

²¹Na' chonan byen kwejcho to ben'ki bengake' cho' txen toshiizi kana' wzoalen Xancho Jesúsza' cho', ²²ben'ki nakgake' cho' txen dezd ka bchoa Juanna' Jesúsza' nisa' axt ka biyep'e yabana', kwenche gone' cho' txen we'cho dill' nakan gok biban Jesúsza' ladj ben' wetka'.

²³Na'ch wlejgake' chop'e: toe' le Matías, na' sto ben' yoo shonə leyin, José, Barsabás, na'ch Justo. ²⁴Na' be'llwillgake' Chioza', che'gake':

—Chios, ben' nak Xannto', li' nombi'o yichjlall'do' yog' ben'. Bliyi neto' no ben'ki chop ba wlejo' ²⁵kwenche gake' neto' txen naknto' postl, la' Juda' ba bnite' daa ndolee ye! wen dii mal che'na' na' ziyaje' latja' gana' chidolee.

²⁶Na'ch bengake' to wyitj kwenche wnezgakile' noran ba wlej Chioza', na' bido! Matíaza', na' wlene' postlka' shnej.

Ka bid Espíritu Sántona'

2 Na' ka bllin lla go! lni Pentecostéza', yog' ben'ka' chonlilall'gake' Jesúsza' tozga ndop nllaggake'. ²Na' tokonganzi bengakile' to sshag ka ga za' to be' wal, za'n yabalə na' wnin doxen loo yoon'a gana' lle'gake'. ³Na'ch ble'gakile' dii nak ka be! yi' chal'ninan, na' yog'ze' zen yichje'ka'. ⁴Na' Espíritu Santo che Chioza' wyo'e loo yichjlall'do' to toe', na' wzologake' wnegake' wde wdeli dill', kon ka goklall' Espíritu Sántona' ine to toe'.

⁵Na' lo llana' ben' zan ben' Israelka' lle' Jerusaléna' choe'la'ogake' Chioza', no ben'zaak wde wdeli yell dii lle' yell-lioni.

⁶Na' ka bengakile' sshaga' daa chak, na' bdop bllaggake' gana' chak ka'. Na'

goklej gokgangakile' ka biyombia'gake' xtilleeka' daa chne ben'ka' lle' na'. ⁷Na' le chibangakile', na' che' ljwelle':

—¿Aaga ben' Galilea yog' ben'ki choe' dill'ki? ⁸¿Nakra chak chakzgake' dill'ka' chne to tocho, lla? ⁹La' ni zoa ben' Partia, ben' Media, ben' Elam, ben' Mesopotamia, ben' Judea, ben' Capadocia, ben' Ponto, ben' Asia, ¹⁰ben' Frigia na' Panfilia, ben' Egipto na' zi bale' ben' África, ben' zaak gaozə yell Ciréna', na' lezkza' len ben' za' Rómána'te. Balcho nakcho ben' Israel, na' zi balcho choncho ben' Israelki txen. ¹¹Na' lezkza' zoa ben' Creta na' ben' Arabia. Na' yog'techo chenicho chne ben'ki xtil' to tocho, choe'gake' dill' che dii wenka' ba ben Chioza', diika' chonan ka yibanicho.

¹²Na' yog' ben'ka' bdop bllag na', bibangakile' na' goklej gokgangakile'. Na' che' ljwellgake':

—¿Bi zejın dga, lla?

¹³Na' bale' wnelegakile' legake', nagake':

—Zolli ben'kin.

Daa goll Pédrona' ben'ka' bdop bllag

¹⁴Na'ch Pédrona' wzechaile' len postlka' zi shnej, na' wnie' zillj chi'e ben'ka' ndop nllag na':

—Le' ben' Israel na' yog'le le' zoale Jerusaléni, cheenid' wzajniid' le' bi zeji dga chak, li wzenagyen' dga inia' le'.

¹⁵Ben'ki nak' txen aga zollgakilen' ka chza'lall'zle, la' shzilgaz naa. ¹⁶Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

¹⁷Kat' ba zoa illin lla te che yell-lioni, nad' Chios wi'a Espíritu cha'na' soe' loo yichjlall'do' ben'ka' lle' zbii zkaan yell-lioni.

Na' gon' kwenche xiınleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib',

na' ben' golka' inegakile' yel.

¹⁸Na' ka'kzə wi'a Espíritu cha'na' yog' ben'ka' choe'la'ogake' nad' llana' gak ka', ka ben' byo ka noolə,

na' we'gake' dill'ka' wxo'a' cho'a' lolleeka'.

¹⁹Na' xan yabana' wli'a dii gonan ka yibani ben',

na' ka'kzə lo yel-lioni

wli'gakidee chen, na' yi', na' llen.

²⁰Wbilla' bich wzeeni'n,

na' bewaa yiyakan xna ka chen

ka zi' illin lla choo lla xen che Xanchona'.

²¹Na' nottez ben' inabile' Xancho Chioza' gaklene'ne', na' yisle'ne' kwenche bi kwiayee.

²²'Na' le' nakle ben' Israel, li wzenag dga inia' le'. Nezkzile Chioza' wleje'

Jesús, ben' Nazareta', daa bi'ene' yel' wñabia'na' kwenche bidylene' ladjleni dii

zan yel' wak choo yel' wak xen na' bichlə dii benan ka bibani ben'.

²³Na' beeni goke' lall' na'le kon ka bliia Chioza' bia' gak che', na' bəx'lene' bénlene' lo na' ben' malka' kwenche betgake'ne' lee yag

cruza'. ²⁴Per Chioza' bisbane'ne' ladj ben' wetka', na' bi bi'e latj guete' toshiizi, daa

bi gok inabia' yel' wita' le'. ²⁵Dii Davina' bi'e dill' che Jesúza' kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

²⁶Daan le chibayi lall'dawaani na' cho'a' dill' ka mbalaz zoa'.

Na' beli chen cha'ni nonan lez yibanan,

²⁷la' aga wsanlaloo nad' toshiizi ladj ben' wetka',

ni bi wi'o latj gooll' iteb beli chen cha'ni daa nak' lall' no'.

²⁸Ba bliilo' nad' nakan nak neza' sho'a' kwenche gat'ch yel' mban cha',

na' yiba yizakid' daa soalen' li' toshiizi.

²⁹Le' ben' bish', nezkzicho dii xoxzto'cho Davina' wite' na' bkwash'gake'ne', na' ni nakbia'te naa

gana' bkwash'gake'ne'. ³⁰Na' dii Davina' bi'e dill' diika' goll Chioza' le', na'

wnezile' kwin Chioza' bchebe' wzoe' to xiin dia' che' inabi'e. ³¹Chioza' bliile'

dii Davina' diika' zi' gak che Crístona', na' bi'e dill' yibane' ladj ben' wetka' ka

wne' aga wigaane' ladj ben' wetka' na' ni bi gooll' iteb beli chen che'na'. ³²Na'

ka' gok, Chioza' bisbane' Jesúza' ladj ben' wetka', na' yog'nto' ble'into'ne' na'

choe'nto' dill' bibane'. ³³Na' ka biyoll bigoyoe'ne' yabana' na' wlekwe'ne'

kwite' de shlina', bene' lo nee bselee Espíritu Sántona' ladjnto'ni ka bchebe'.

Na' Espíritu Sántona' ba bene' yog' dga ba ben ble'ile naa. ³⁴Bi gakile dii

Davinan' biyep'e yabana', la' kwine', wne':

Xancho Chioza' golle' Xan'na':

“Wche' kwit' de shli ni

³⁵shlak wzoa' xni'ona' ben'ka' chakzbani li'.”

³⁶'Na' nia' le', yog'cho cho' ben' Israel chiyal' inezicho, Jesúza', beena' be-

tle lee yag cruza', Chioza' bzoe'ne' nake' Xancho, na' len' Crístona', beena' wlej

Chioza' inabi'e cho'.

³⁷Na' ben'ka' lle' na' ka bengakile' goll Pédrona' legake' ka', le nyesh'chga

gokgakile', na' wñabgakile' Pédrona' na' postlka' sto, che'gake':

—Le' ben' bish', ¿beran chiyal' gonnto' shka'?

³⁸Na'ch Pédrona' chi'e legake':

—To tole, li yiyaj yileni na' li choa nisa' shi ba chon'ilall'le Jesucrístona', na'

iyakxen xto'l'leka' na' yidsoa Espíritu Sántona' loo yichjlall'do'lena'. ³⁹Chioza'

ba bchebe' gone' le Espíritu che'na', na' len xiinleka', na' nottez ben' zit'. La'

nchebe' wi'ene' yog' ben' gaxe' kwenche gonlilall'gake'ne'.

⁴⁰Na' dii zanch dill' be'len Pédrona' legake', got'yoile' legake', chi'e:

—Li yisla kwine' lao yel' zi'na' daa ile'i ben' wen dii malka' bi chajle' che Chioza'.

⁴¹Na' ben'ka' wyajle' daa goll Pédrona' wchoagake' nisa'; na' lo llana' shona'

mil ben'ka' wlengake' ben'ka' nonlilall'
Jesúza'.

Ka ben ben'ka' benlilall' Jesucristona' dii nech

⁴²Na' yog'gake' wzegake' wneyi ben-
gake' diika' bli' bsedi postlka' legake'
na' xochi wzoagake'. Na' bdop bllaggake'
be'lwillgake' Chioza' na' weej wdaogake'
txen. ⁴³Na' yog'ze' bibani daa ble'gakile'
yel' wak zanka' ben postlka'. ⁴⁴Na' yog'
ben'ka' chonlilall'gake' Jesúza' gogkake'
toz, na' choe' llwelle' bi ka dii chyallji
to toe'. ⁴⁵Na' biyit' bidegake' no yell-lio,
no yoo chegake' wa bichlə dii napgake'
na' choe' lllwellgake' ka to dii chyallji
to toe'. ⁴⁶Na' yog' lla bdopgake' lesh'
chyoodo'na' choe'lwillgake' Chioza', na'
lekzka' bibagakile' weej wdaogake' txen
lill lllwellgake'. ⁴⁷Na' wzoatezi wzoa-
gake' be'la'ogake' Chioza' na' yog'zə ben'
gokbe'gakile' ka mba chongake'. Na' yog'
lla, Xancho Chioza' bene' ka wyanch
ben'ka' benlilall' Jesucristona'.

Biyaki to ben' bi chak sa'

3 To lla do ka chida shonə shlle'na',
ka gora' chdop chllag ben' Israelka'
choe'lwillgake' Chioza', Pédrona' len
Juanna' wyajgake' yoodo'na'. ²Na' cho'a
puert che zeena' daa nechj yoodo'na',
puert daa nsi'gake' Puert Xochi, chi'
to ben' nxinj ni'ena' ka goljtie'. Na'
yog' lla chjlekgake'ne' na' kwenche
chnabe' karidá lao ben'ka' chdop chllag
yoodo'na'. ³Na' ka bllin Pédrona' na'
Juanna' gana' chi'e, na' wnabile' legake'
izangakile' lat' mech we'gake'ne'. ⁴Na'ch
Pédrona' len Juanna' bwiagake'ne', na'
Pédrona' golle'ne':

—Bwiakachi neto'.

⁵Na' beena' bwie' legake', gokile'
mechan' we'gake'ne'. ⁶Na' Pédrona'
chi'ene':

—Bibi mech nap' gon' li', lete dii nap'
gon' li'. Kon yel' wak che Jesucristo, ben'
Nazareta', nia' li' bizolla' na' bigoo nez.

⁷Na'ch Pédrona' wdoyoe' nee de
shlina' na' bisolléene', na' lii biyakteyi
ni'ena'. ⁸Na'ch ka ben' bxit'zə bene' bi-
zollee. Na' wyoolene' legake' lesh' chy-
oodo'na' chechj chde' na' chxit'sheshe'
choe'lawee Chioza'. ⁹Na' yog' ben'ka'
lle' na' ble'gakile'ne' chde' choe'lawee
Chioza', ¹⁰na' billej bibangakile' daa
nombia'gake'ne' chbi'e chnabe' karidá
cho'a puert daa nsi'gake' Puert Xochi.

Bzajinii Pédrona' ben'ka' ndop nllag lesh' chyoodo'na'

¹¹Na' beena' biyaki ni'ena' aga bsane'
Pédrona' len Juanna', kon noe' legake'.
Na' yog' ben'ka' lle' lesh' chyoodo'na'
chillej chibangakile' na' wyajdogake'
gana' zoa koridor daa le Koridor che dii
Salomón gana' zelengake' beena' biyaki.
¹²Na' ka ble'i Pédrona' ben'ka' chdop
chllag na', golle' legake':

—Le' ben' Israel, ¿berache chibanzile
daa biyaki beeni? ¿Na' berache chwia-
zle neto'? ¿Achakile kon yel' wak
chento'nan' biyaki beeni? ¿Awa chak-
ile daa zoanto' chonnto' ka chiyoollallii
Chiozan' biyakile'? Aga daan. ¹³Chios,
beena' be'la'o dii Abrahama', dii Isaaca',
dii Jacoba', na' nochlə dii xozto'choka',
len' wlo'e Xiine' Jesúza' balaan xenna',
beena' benle lo na' ben'ka' betgake'ne'.
Na' ka goklall' Pilátona' yisane'ne', bi
be'le latj. ¹⁴Lwaa dii nan inable yisane'
Jesúza', beena' nak liizelozi ben' li
ben' shao', ben' wen xyana'lə wnable
bisane'. ¹⁵Kan' benle betle Jesúza',
beena' chon yel' mban daa nak dowalj.
Per Chioza' bisbane'ne' ladj ben' wetka',
na' neto' choe'nto' dill' daa nezinto'
bibane'. ¹⁶Daa chonlilall'nto' Jesúzan',
ba biyaki beeni chwiale na' nom-
bia'le. Dii li, daa nonlilall'nto' Jesúzan'
chwiatele ba biyakchaile'.

¹⁷Le' ben' bish', nezid', ka le' na' ka ben'ka' chnabia' le', bi gokbe'ile bin benle ka betle Jesúsza'. ¹⁸Na' Chioza' bi'e latj gok ka' kwenche billinin ka wna dii ben'ka' wdixjee xtilleena' kani'yi, daa wngake' Crístona' biya dii wchi' wsak' ben' le'. ¹⁹Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz. ²⁰Na' yiselee Crístona', beena' wleje' kwenche inabi'e, kon ka wdixjee dii ben'ka' kani'yi. ²¹Chonan byen yigaane' yabana' axt ka illin lla yiyonshao' Chioza' yog'lolte dii de, kon ka goll Chioza' dii ben'ka' wleje' wdixje'gake' cho'a xtilleena' kani'yi. ²²La' dii Moiséza' golle' dii xoxzto'choka' dill'ki: "Xancho Chioza' kweje' sto ben' ka nad' ladjleni, ben' chixje'ile' le' bi dill' we'lene'ne'. Na' li wzenag yog' daa ine'. ²³Na' beena' bi wzenag che', Chioza' kwej yichje'ne' na' bich gak gone' txen ben'ka' nak yell che Chioza'."

²⁴Na' yog'lol' dii ben'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak di-iki chak naa. ²⁵Len', naki chele daa ba bcheb Chioza' lao dii ben'ka' wdixjee daa golle' legake' kani'yi. Na' lekzka' naki chele dii wenna' daa bcheb Chioza' gone' che dii xoxzto'cho Abraham'a, ka golle'ne': "Ni che xiin dia cho'na' gon' dii wen che yog'lol' ben' lle' zbi zkaan yell-lioni." ²⁶Na' ka bsel' Chioza' Xi-ine' Jesúsza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

Pédrona' len Juanna' gokgake' lo na' ben'ka' chnabia' ben' Israelka'

4 Na' ni choe'lente Pédróna' len Juanna' ben'ka' dill' ka bllin bxozka' len beena' ngoo lo nee ben'ka' chap yoodo'na' na' len zi bal' saduceoka'. ²Le chllaagake' daa chli' chsedi Pédróna'

len Juanna' ben'ka' lle' na' nakan gok biban Jesúsza' ladj ben' wetka'. ³Na'ch bex'gake' legake', na' daa ba wlle', jloogake' legake' lillyana', axt betiyoch bibejgake' legake'. ⁴Per ben' zan ben'ka' bzenaggake' dillaa be' Pédróna' len Juanna' benlilall'gake' Jesúsza'. Na' ka', wyanch ben'ka' benlilall'gake'ne', na' gokgake' ka do gayaa mil to ben' byoka'za.

⁵Na' betiyo bidop billag ben'ka' chnabia' ben' Israelka' yell Jerusalénna', len ben' golka' chnabia', na' ben'ka' chli' chsedi leya'. ⁶Na' lekzka' len Anáza', beena' nak bxoz choo bxoz xen, na' Caifáza', Juanna', Alejándrona', na' nokchlə ben'ka' nak dialla che bxoz choo bxoz xenna'. ⁷Na'ch bzegake' Pédróna' len Juanna' gchole'ka', na' wñabgakile' legake':

—¿No lens cheyi na' no bsel' le' chonle diiki?

⁸Na' Espíritu Santo che Chioza' bzajni-ile' Pédróna' kwenche golle' legake' ki:

—Le' ben' wñabia', na' le' ben' gol chnabia'le yell Israeli, ⁹chnabile neto' ka nak dii wenna' gok che beeni, na' cheenile inezile nakan gok biyakile'. ¹⁰Cheeninto' yog'lol'-le inezile na' yog'lol' ben' Israelka' inezgakile', beeni chwiale ze laoleni biyakile' kon yel' wak che Jesucristo, ben' Nazareta', beena' betle lee yag cruza', per Chioza' bisbane'ne' ladj ben' wetka'. ¹¹Che Jesúsza' choe'n dill' daa nan "yaja' daa bi wyoolall'le le' nakle wen yoo, leyen'lannan' yaja' daa ba nchejcha yoon'a". ¹²Bichga zoa sto ben' yoblə gak yisle' cho' kwenche bi kwiayi'cho. La' kochno zoa doxen yell-lioni ben' ba wlej Chioza' kwenche yisle' cho'.

¹³Le bibani ben' wñabia'ka' daa chwia-gake' bi blleb Pédróna' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúsza' txenan chongake' ka'. ¹⁴Na' daa ze

beena' biyaki ni'ena' kwite'ka', bibi gok ye'gake' legake'. ¹⁵Na'ch bibejgake' le-gake' shlak be'len ljwellgake' dill' nak koogake' xnezin. ¹⁶Che' ljwelle':

—¿Nakra goncho che ben'ki? La' yog'zə ben' zoa Jerusalenni inezgakile' ba bengake' to yel' wak xen, na' aga wak inacho bi nakan ka'. ¹⁷Na' kwenche bich ides dill'ka' choe'gake', chiyal' kooshe-bchogake' kwenche kochno we'lengake' dill' che Jesúza'.

¹⁸Na'ch goxgake' Pédrona' len Juanna' dii yoblə, na' gollgake' legake' bich wli' wsdgakile' ben' ni bi we'lengake' legake' xtill' Jesúza'. ¹⁹Na' Pédrona' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. ²⁰Bi gak wsannto' we'nto' dill' daa ben ble'into' che Jesúza'.

²¹Na'ch ben' wñabia'ka' biya dii goll-gake' legake' kwenche nan illebgake', na'ch bisanchoklagake' legake', la' bibi billet-lall'gake' gongake' daa yog'zə ben' choe'la'ogake' Chioza' ni che daa gok. ²²Na' beena' biyaki ni'ena' kon yel' wak che Jesúza' ba wdeile' choa yiz.

Wñabgakile' Chioza' gaklene' legake' we'gake' xtilleena'

²³Na' ka bisangake' Pédrona' len Juanna', biyajgake' gana' zoa ben'ka' nonlengake' txen na' gollgake' legake' yog' daa goll bəxozka' chñabia' na' ben' golka' chñabia'. ²⁴Na' ka bengakile' daa gollgake' legake', na'ch gokgake' toz be'lwillgake' Chioza', che'gake':

—Chios, li' nako' ben' zeelo chñabia'. Li' beno' yabana', yell-lioni, na' nido'na', na' yog'te dii de lo yell-lioni. ²⁵Na' Espíritu Santo cho'na' bəxo' dill'ki cho'a loll' dii Davina' kana' wne':

¿Berache chlāa chlokz ben' yell-lioki?

¿Berache toshiizi chgoo ben'ki xnezin gongake' daa bi nxe bi nzak'?

²⁶Ben'ka' chñabia' lo yell-lioni gokgake' toz gokzbangakile' na' biniatezgake' Xancho Chioza'

len Crístona', beena' wleje' kwenche inabi'e.

²⁷Dii li yell Jerusalenni Heródeza' na' Poncio Pilátona', len ben' zit'ka' na' ben' Israelka', bdop bllaggake' gokgake' toz goklall'gake' wlliyi'gake' Jesúza', beena' nak liizelozhi ben' li ben' shao', beena' wlejo' kwenche inabi'e. ²⁸Na' daa bengake' ka', gok ka bllio' bia'. ²⁹Na' naa Chios, bwia ka ngoosheb ben' wñabia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'. ³⁰Bli' yel' wak cho'na' kwenche yiyaki ben' bi shao' na' kwenche gonnto' bichlə dii yibani ben' kon yel' wak che Xiino' Jesúza', beena' nak liizelozhi ben' li ben' shao'.

³¹Na' ka biyoll be'lwillgake' Chioza', wxo' wñib latja' gana' ndop nllaggake', na' wñabia'chga Espíritu Sántona' legake' na' bi bllebgake' we'gake' cho'a xtill' Chioza'.

Daa de che to toe' benin che yoguee

³²Na' yog' ben'ka' ba chonlilall' Jesúza', toz ka gok yichjall'do'eka'. Na' yog' daa de che to toe', benin che yoguee. Ni toe' bi wna: “Cha' dga.”

³³Na' postlka', kon yel' wak xen che Chioza', be'chgake' dill' che Xancho Jesúza' daa bibane' ladj ben' wetka', na' Chioza' dii xen goklene' yog'lolə'.

³⁴Na' ni toe' bibi byallji, la' beena' de yell-lio che' wa lille' na' chiyiteen, na' mecha' daa choxee cheyin ³⁵cho'en postlka' kwenche choe'gake' kon ka'k' wej chyallji to toe'. ³⁶Na' wzoa to ben' Chipre lie' José. Nake' dia che dii Levína', na' postlka' bs'i'gake'ne' Bernabé, na' zejín witip lall' ben'. ³⁷Na' Joséni biyitee to yell-lio dii nape', na' mecha' bi'en postlka'.

Ananíaza' na' Safirana' wxiye'gake'

5 Na' wzoa to beṇ' wlie' Ananías, na' xoole'na' wlie' Safira, na' biyit'gake' shkwe' yell-lío che'ka'. ²Na' Ananíaza' len xoole'na' gokgake' toz bkwaangake' lat' mecha' na' bentezgake' ka be' doxenan postlka'. ³Na'ch Pédróna' golle'ne':

—Ananías, ¿beraḇe be'zo' latj wṇabia' Satanáza' yichjall'do'na' na' chakilo' siyoo Espiritu Sántóna' daa bgaanleno' lat' mecha' daa wdixjgake' che yell-lío cho'na'? ⁴Cho' yell-liona' kana' zi' yiyitoo, na' cho' mecha' daa beḇoo cheyin ka biyitoo. ¿Beraḇe wloolzə yichjall'do'na' siyoo? Aga beṇ' yell-lionin chziyoo, san Chiozan' cheenilo' siyoo.

⁵Na'ch ka beni Ananíaza' daa goll Pédróna', to ka billeeze' wite'. Na' le blleb yog' beṇ'ka' wnezi ka gok che'. ⁶Na' bllin to chop bi' wew' gana' chtoḷ Ananíaza', na' bitobgakbee to lech' na' jakwash'gakbee.

⁷Na' gok ka do shoṇ gor ka bllin xoole'na', aga nezi'le bin ba gok che beṇ' che'na'. ⁸Na' wṇabi Pédróna'ne', chi'ene': —Wnashki nad', ¿aka to nakz beṇ' cho'na'n biyit'le yell-lío chelena'?

Na' Saffrana' chi'ene':

—Awe, ka'tkzan biyit'nto'n.

⁹Na'ch che' Pédróna'ne':

—¿Beraḇe benzle toz dill' kon beṇ' cho'na' chakile wak siye'le Espiritu che Chioza'? Cho'a yooni ba ziza' bi'ka' jakwash'gakb' dii beṇ' cho'na', na' naa lljakwash'gakb' li'.

¹⁰Na' lii billeete Saffrana' wite' lao Pédróna'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii beṇ' che'na'. ¹¹Na' le blleb beṇ'ka' nonjilall' Jesucristóna' len yog' beṇ'ka' wnezi ka gok che dii Ananíaza' na' dii Safirana'.

Postlka' bengake' dii zan yel' wak

¹²Na' postlka' bengake' dii zan yel' wak na' bichlə dii chonan ka yibani beṇ' ladj beṇ'ka' lle' Jerusalénna'. Na' yog' beṇ'ka' chonjilall' Jesúsza' chdop chllag-gake' loo koridor che yoodo'na' daa le Koridor che dii Salomón. ¹³Na' nochlə beṇ'ka' aga biyaxjgake' gongake' le-gake' txen, la'kzi le ble'shiigakile' le-gake'. ¹⁴Na' beṇ' zan, ka noolə ka beṇ' byo, beṇ'jilall'gake' Xancho Jesúsza'. ¹⁵Na' chyixjgake' tnezka' beṇ'ka' bi shao', nxoogake' legake' no lo yagla' na' no lo daa, kwenche kat' te Pédróna' la'ch' bḇen che'na' ten gana' degake' na' yiyakgake' ile'. ¹⁶Na' lekzka' zan beṇ' yellka' llii gaozə Jerusalénna' chajgake' lao postlka' chjwa'gake' beṇ' che'i yillwe' na' beṇ' yoo dii xiw'ka'. Na' yog' loz'gake' chiyaki.

Wloogake' postlka' lillyana'

¹⁷Na'ch bḇoz choo bḇoz xenna' na' saduceoka', beṇ'ka' nakgake'ne' txen, gokxee gokzbangakile' postlka'. ¹⁸Na'ch beḇ'gake' postlka' na' wloogake' le-gake' lillyana'. ¹⁹Na' waḷa' bllin to anjl che Xancho Chioza' bsalje' lillyana' na' bibeje' legake', na' golle':

²⁰—Li yiyaj yoodo'na', na' li wzajni beṇ'ka' chdop chllag na' doxen ka nak yel' mban zejli kani daa we' Chioza' legake'.

²¹Na'ch ka wyeeni', biyajgake' yoodo'na' ka goll anjla' legake', na' bli' bsedgakile' beṇ'ka'.

Na'ch bḇoz choo bḇoz xenna' na' beṇ'ka' nakgake'ne' txen bitopgake' yog'loḷ beṇ'ka' chṇabia' yell Israella', na' bsel'gake' beṇ' kwenche nan lljxi'gake' postlka' de lillyana'. ²²Na' ka bllin beṇ'ka' chap yoodo'na' cho'a lillyana', kochno postlka' de na'. ²³Na'ch jayellgake' beṇ'ka' chṇabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to ben' bi yoo lo'inna'.

²⁴ Na' beena' ngoo lo nee ben'ka' chap yoodo'na', len b̄oxzka' ch̄nabia', ka bengakile' che'gake' ka', na' gokgakile' gate yiyoll yido dga. ²⁵ Na' ni choe'tegake' dill', blin lo ben' chi'e legake':

—Ben'ka' wloole lillyana' lle'tgake' yoodo'na' chli' chsedgakile' ben'ka' lle' na'.

²⁶ Na'ch wyaj ben'ka' chap yoodo'na' kon beena' ch̄nabia' legake' jaxi'gake' postlka' xochi. Bibi bengakile' legake' daa bllebgabe' shi ben'ka' chzenag chegake' wllliagake' legake' yaj. ²⁷ Na' ka billinlegake' postlka' lao ben'ka' ch̄nabia' yell Israela', na' b̄oxz choo b̄oxz xenna' chi'e legake':

²⁸ —¿Abi chajle'kzlen nanto' le' bich wli' wsedzile ben' xtill' Jesúza'? Na' li wwia ka ba benle, ba bli' bsedile yog' ben' Jerusalénki cho'a xtilleena', na' cheenile wtobile neto' daa betgake'ne'.

²⁹ Na'ch Pédrona' len postlka' sto che'gake':

—Chonchan byen wzenagnto' che Chioza' aga ka che ben' yell-lioni.

³⁰ Le' betle Jesúza' na' bda'lene' lee yag cruza'. Na' Chios, beena' be'la'o dii x̄oxzto'choka', le' bisbane'ne' ladj ben' wetka'. ³¹ Na' Chioza' ba mbekene' kwite' de shlina' gana' ba chi'e ch̄nabi'e, na' nzoe'ne' kwenche yisle' ben' lao dii mala', la' cheenile' yog' ben' Israelki yiyaj yileni dii malka' chongake' kwenche yizi'xen Chioza' chegake'. ³² Na' neto' choe'nto' dill' daa ble'into' gok che Jesúza', na' daa betj Espíritu Sántona', beena' ba bzoa Chioza' loo yichjlall'do' yog' ben' chzenague' che', lekzka' chli'n nakan ka nannto'.

³³ Na' ka beni ben' w̄nabia'ka' daa goll postlka', le' bllaagake' na' gok-lall'gake' witgake' legake'. ³⁴ Na' ladj ben'ka' ch̄nabia' len to fariseo, ben' le

Gamaliel, ben' chli' chsedi leya', na' yog'z ben' chle'shi'gakile'ne'. Na' wzollee, golle' legake' kwejgake' postlka' xtit chyoolə, ³⁵ na' golle' ben' w̄nabia'ka':

—Le', ben' Israel, li wsak' shi bin gonile ben'ki. ³⁶ Li lljadini kani batz bchej to ben' le Teudas, na' wne' nake' to ben' zakii, na' ka do tap guiyoa ben' betgake'ne' txe. Na' ka betgake'ne', yog' ben'ka' gokgake'ne' txe biyeslesgake', bich bi bengake'. ³⁷ Na' ka wde gok ka', wizak dii yoblə kana' chlabgabe' bal ben' lle' to to yell, na' bizchej Judas ben' Galileana', na' ka'kzə ben' zan bengake'ne' txe. Na' lekzka' betgake'ne' na' biyesles ben'ka' gokgake'ne' txe. ³⁸ Na' naa, nia' le' bibi gonile ben'ki, la' ka nak dga chli' chsedgakile', shi nakan dii chyiyljall'zgake' winitlokzan. ³⁹ Na' shi nakan che Chios, aga wak yisol yinitlen. Chiyal' wwiayen'le kwenche bi gakkdil'lenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bl-longake' kochno wli' wsedgakile' xtill' Jesúza'. Na' biyolla' bisangake' legake'.

⁴¹ Na'ch bichej postlka' gana' ndop nllag ben'ka' ch̄nabia', na' le chibagakile' daa be' Chioza' latj bchi' bsak' ben'ka' legake' daa choe'gake' xtill' Jesúza'. ⁴² Na' yog' lla postlka' bli' bsedgakile' xtill' Jesucristona' yoodo'na' na' lill ben'.

Wlejjake' gall ben' gak lall' nagake' mandadka'

6 Na' ka zej chanch ben'ka' chonjilall' Jesúza', ben'ka' chne dill' griegona' wzolo che'gake' aga chaklebi ikaa noolə wizebka' chne dill' griegona' ka to daa chkaa nool wizebka' chne dill' hebrewa' kat' chyisgake' ye! wawa' yog' lla. ² Na'ch postlka' shllin bti'agake' yog' ben'ka' chonjilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto'

wen'to' dii yeej gao beṅ. ³Na' le' beṅ' bish', li kwej gall beṅ' ladjleni, beṅ' chon wen, beṅ' chajni, na' chṅabia' Espíritu Sántona' legake'. Na' gak lall' na'gake' chisgake' yeṅ' wawa'. ⁴Na' neto' weṅ- lall'chnto' weṅwillnto' Chioza' na' wli' wsdchinto' beṅ' cho'a xtilleena'.

⁵Na' yog'z beṅ'ka' biyoolall'gake' ka goll postlka', na' wlejgake' beena' le Esteban, nake' beṅ' nonlilal'chgue' Chioza' na' chṅabia' Espíritu Sántona' le'. Na' lekzka' wlejgake' Felípena', Prócorona', Nicanora', Timónna', Parménaza', na' Nicoláza', beṅ' Antioquána', beena' bene' txen beṅ' Israelka'. ⁶Na' jwa'gake' legake' gana' lle' postlka', na' postlka' bṅoa neeka' yichje'ka' na' wṅabgakile' Chioza' gaklene' legake'.

⁷Na' beṅ' zanch beni cho'a xtilṅ' Chioza' na' wyanchga beṅ'ka' beṅ- lall'gake' Jesúza' Jerusalénna', na' zan bṅozka' bzenaggake' na' beṅlilall'gake' Jesúza'.

Bex'gake' Estébanna'

⁸Na' Estébanna', wzoalenchga yeṅ' wak che Chioza' le', na' dii xen goklene'ne' kwenche bli'e yeṅ' wakka' na' bichlṅ' dii chonan ka yibani beṅ'. ⁹Na'ch lle' shk- wen beṅ' Israelka' ba biyell bila' lo na' beṅ'ka' wxi' legake', na' non chelṅake' chdop chllaggake' gana' choeṅwillgake' Chioza'. Na' gokgake' toz baṅ beṅ' Cirene, beṅ' Alejandría, beṅ' Cilicia, na'ch beṅ' zaak do Ásiana', gokdiṅ-lengake' Estébanna'. ¹⁰Na' aga gokgake' yeṅ' sin' che Estébanna', daa chṅie' kon ka che' Espíritu che Chioza'ne'. ¹¹Na' wdxjgake' baṅ beṅ' kwenche wxiye'gake', che'gake': "Ba beninto' Estébanna' chṅie' zban che dii Moiséza' na' che Chioza'." ¹²Na' daa gollgake' ka', bta bṅegake' beṅ' zan, len beṅ' golka' chṅabia' na' beṅ'ka' chli' chsedi leya' kwenche bex'gake' Estébanna' na' jwa'gake'ne' lao beṅ'ka'

chṅabia' beṅ' Israelka'. ¹³Na' wdiljch- gake' beṅ'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'. ¹⁴Na' ba bizeninto' chizne' Jesús, beṅ' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

¹⁵Na' yog' beṅ'ka' chi' chongake' yeṅ' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

Estébanna' bi'e dill'

lao beṅ' wṅabia'ka'

7 Na'ch bṅoz choo bṅoz xenna' wṅa- bile' Estébanna', chi'ene':

—¿Alekzi beṅ'ki ka chono'n?

²Na' Estébanna' chi'e legake':

—Le' beṅ' bish' na' le' nakle ka xanto', li wzenag dga inia' le': Chios chechona', beena' liizelozi nak beṅ' choo beṅ' xen, bli'lawe' dii xozxto'cho Abrahama' kana' zoe' yell-liona' mbani Mesopotámi- ana', kana' zi' shaje' yell Haránna'. ³Na' Chioza' golle'ne': "Bkwaan yell cho'ni na' dialla cho'ka', na' wyaj yell-lío gana' wliid' li'." ⁴Na'ch dii Abrahama' bcheje' gana' mbani beṅ' caldeoka' na' jsœ' yell Haránna'. Na'ch ka wde wit xē'na', Chioza' bizseleene' gani zoacho naa. ⁵Na' Chioza' bi bene' lo na' dii Abra- hama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi' che dii Abrahama' ba zoa ka golle'ne' ka'. ⁶Na' lekzka' Chioza' chi'ene' xiin dia che'ka' soagake' yell zit' na' inabia' beṅ'ka' legake' wgongake' legake' llinna', na' wsak'zi'gake' legake' tap guiyoa yiz. ⁷Na' lekzka' Chioza' golle'ne': "Gon' yeṅ' zi' che beṅ'ka' wchi' wsak'gake' legake', na' yiy- olla' yiza'gake' lall beṅ'ka' na' yiyedgake' ni, na' we'la'ogake' nad'." ⁸Na' ka bcheb Chioza' gone' dii wen che dii Abrahama', golle'ne' chiyaṅ' sho'e senna' daa le cir-

cuncisión, le' na' xiin dia che'na. Daan, dii Abraham'a' wlo'e dii xiine' Isaaca' senna' ka gok xon' lla goljb', na' ka'kza' ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shllin, ben'ka' gok dii xozxto'cho, cho' ben' Israel.

⁹'Na' ben'ka' nak xiin dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', ¹⁰na'ch bisle'ne' lao yog'lol dii ben ble'ile'. Na' bi'ene' yel' sin' kwenche faraónna', beena' chñabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

¹¹'Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xozxto'choka'. ¹²Na' ka wñezi dii Jacoba' de trígona' Egíptona', na' bselee bi' che'ka', ben'ka' gok dii xozxto'cho, jxi'gake'n. ¹³Na' ka wyajgake' de wchopi, dii Joséna' golle' legake' nan len' nake' ben' bish'gake', na'ch bembia' faraónna' dialla che dii Joséna'. ¹⁴Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'. ¹⁵Kan' gok jsoa dii Jacoba' Egíptona' gana' wite', na' lekzka' na' wit xiine'ka', ben'ka' gok dii xozxto'cho. ¹⁶Na' jakwash'gake' legake' loo bana' daa bizi' dii Abraham'a' yell Siquema' che xiin beena' le Hamor.

¹⁷'Na' ka ba zoa gao gon Chioza' daa bchebe' gone' che dii Abraham'a', ba wyanchga xiin dia che dii Israela', ben'ka' lle' Egíptona', ben' zan wal ba nakgake'. ¹⁸Na'ch bllin lla wzolo wñabia' sto ben' yoblə yell Egíptona', ben' bi bembie' dii Joséna'. ¹⁹Na' ben' wñabia'na' wxiyee ben' wllall chechoka' na' biya dii bchi' bsakee dii

xozxto'choka', na' bene' byen lljchoon-gake' bdo'do' che'ka' kwenche guetgakb'. ²⁰Na' kana'yen' golj dii Moiséza', nakch-gab' xochido', na' shon' beo'chga bisgol xaxna'baab' lille'ka'. ²¹Na' ka bich gok kwkash'gake'b' lille'ka', benan byen jchoongake'b' kwenche nan guetb'. Na'ch noola' nak xiin faraónna' billelile'b' na' bikeeb' na' bisgole'b' ka xiine'. ²²Ka' gok bsd dii Moiséza' yog'lol yel' sin' che ben' Egíptoka' na' bi'e dill' zakii na' leyi bene' dii zakii.

²³'Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wllall che'. ²⁴Na' ka ble'ile' to ben' Egípto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. ²⁵Na' goki dii Moiséza' ben' wllall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'. ²⁶Na' betiyo ble'ile' chop ben' wllall che', ben' Israel, chdil'gake'. Na' gokile' yizoe' legake' wen, na' chi'e legake': "¿Berache chdil'-lenzə ljwell-le?, aga ne' ben' bishee til'-lene'." ²⁷Na'ch beena' chit chyine' ben' wllall che'na' blligee dii Moiséza' na' chi'ene': "¿No bzoa li' inabi'o neto' na' koo xnezi chento'ni?" ²⁸¿Alezkza' cheenilo' wito' nad' ka beto' ben' Egíptona' daa neji'?" ²⁹Na' daa goll beeni ka', dii Moiséza' bxonje' na' jsoe' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

³⁰'Ba gok choa yiz zoe' na', ka bli'lao to anjl le' to lo yag yesh' dii chal'nin, zoan gana' bibi chashj chleb gaoz Yaa Sinaína'. ³¹Na' le' bibani dii Moiséza' daa ble'ile' daa, na' wbiguee kwenche bwaiyenee kwasloj. Na'ch benile' shii Xancho Chioza', chi'ene': ³²"Nadaan nak' Chios, beena' be'la'o dii xozxto'ka', Abraham'a', Isaaca' na' Jacoba'." Na'ch dii Moiséza' le' bllibe' axt chxiztite', na' aga biyaxjchile' wwie'. ³³Na'ch Xan-

cho Chioza' golle' dii Moiséza': "Blechj xelo'na, la' nad' zoa' latji gani zio', na' aga ka nla'z no se ni. ³⁴Nad' ba ble'id' ye'l' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' le-gake'. Na' li', chidoloo yiselaa Egíptona'."

³⁵'Na' Chioza' bseleene' kwenche yisle' ben' wllal che'ka' lo na' ben' Egíptoka', na' inabiatie' legake', la'kzi bi bzenag-gake' che' kana' wzo'e Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xpezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'nin. ³⁶Na' dii Moiséza' bene' zan ye'l' wak diika' ben ka bibani ben' Egíptoka' kana' bibeje' dii xozxto'choka' lalle'ka'. Na' bene' ye'l' wak loo nisdona' le Nisdo' Xna, na' lekzka' latja' gana' bibi chashj chleb gana' wdagake' choa yiz. ³⁷Na' golle' dii xozxto'choka': "Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'." ³⁸Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n ye'l' mban daa bikwaanlene' cho'.

³⁹'Na' dii xozxto'choka' aga goon-gakile' wzenaggake' che' dii Moiséza', bzoatezgake'ne' ka'lə na' goklall'gake' yiyajgake' Egíptona'. ⁴⁰Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." ⁴¹Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'. ⁴²Na'ch Chioza' wlej yichje' legake' na' bi'e latj be'la'ogake' beljka' lliia xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan:

Le', ben' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

⁴³Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele, na' be'la'ole belj che chios chele Refánna', diika' benlilall'le.

Na' ni cheyi diikin kwej' le' lall-leni, na' wselaa le' zit' walch aga ka yell Babilóniana'.

⁴⁴'Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bli-ile'ne'. Na' lo'inna' wlooshao'gake' yaj taaka' gana' nyoj ley che Chioza'. ⁴⁵Dii xozxto'choka' bigaanlengake' yoodo' de lechaa, na' bia'gake'n ka wyajlengake' dii Josuéna' jtil-lengake' yellka' ben Chioza' lall' na'gake', na' bgaan lallchoni ax't ka blin lla wñabia' dii Davina'. ⁴⁶Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wñabile'ne' wi'e latj gone' to lill xlatje'. ⁴⁷Per Salomónna'lə, beena' nak xiine', bene'n ⁴⁸la'kzi Chioza', beena' nak liizelozu ben' choo ben' xen, bi zoe' to loo yoo dii chon ben' yell-lioni. La' ka wna dii beena' wdixjee daa goll Chioza'ne' kani'yi:

⁴⁹Yabana' nakan gana' chi'a chñabi'a, na' lo yell-liona' nzoa' ni'ani.

¿Nakran chakile gonle yoonā' gana' soa'?, na' Xanchona'.

¿Achakile chyallj ga yizi'lallaa?

⁵⁰¿Abi chwiale nadaan ben' yog'lo' dii de?

⁵¹'Na'ch Estébanna' chi'e ben'ka' lle' na':

—Le ben' yichjlall'do' wal nakle. Bi chzenagle che Chioza' na' chonle ka ben' bi nombia' Chioza'. Nakle ben' wide-

nag ka gok dii xoxzto'choka'. Bikzə chzenagle che Espíritu Sántona'. ⁵²Dii xoxzto'choka' bchi' bsak'gake' yog' dii ben'ka' wdixjee daa goll Chioza' legake' kani'yi. Betgake' ben'ka' be' dill' nan Chioza' wselee beena' zeelo nak ben' li ben' shao'. Na' ka bide' na' bélnene' lo na' ben'ka' betgake'ne'. ⁵³La'kzi nom-bia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴Ka beni ben'ka' daa goll Estébanna' legake', le bllaagake' axt chaoyaxaxj leye'ka'. ⁵⁵Na' Estébanna', chnabia'chga Espíritu Sántona' le', na' blis lawe'na' yabana' ble'ile' yel' chey cheeni' che Chioza', na' ble'teile' ze Jesúsza' kwit de shli che Chioza'. ⁵⁶Na'ch golle' legake':

—Li wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shlina'.

⁵⁷Na' ben'ka' lle' na' bsej nague'ka' kwenche bi bengakile' xtilleena', na' de chosyaadiagake' bex'gake'ne'. ⁵⁸Na' wlejgake'ne' yell Jerusalénna' jalliagake'ne' yaja'. Na' ben'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan. ⁵⁹Na' ka chlliagake'ne' yaja', be'lwille' Jesúsza', chi'ene':

—Jesús, li' nako' Xan', bizi' bikaagach nad'.

⁶⁰Na' biyoll wne' ka', na' bchek' xibe'na' na' wnie' zillj, wne':

—Xan', wxi'xen che ben'ki dga chon-gakile' nad'.

Na' biyoll wne' ka' wite'.

Sáulona' bchi' bsakee ben'ka' choe'la'o Jesúsza'

8 Na' Sáulona' goke' toz ben'ka' bet-gake' Estébanna'.

Na' lo llana'tez wzolo bchi' bsak'gake' yog' ben'ka' nonlilall' Jesúsza' Jerusalénna'. Na' wislegake'

doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'. ²Na' to chop ben' nonlilall' Jesúsza' jakwash'gake' dii Estébanna' na' le wchellgakile'ne'. ³Na' Sáulona' bchi' bsakee ben'ka' nonlilall' Jesúsza', chaje' lill che chegake' chjtoyoe' ka nool ka ben' byo kwenche chgwee legake' lillyana'.

Be'gake' dill' wen dill' kob che Cristona' gana' mbani Samáriana'

⁴Na' ben'ka' bllesh Jerusalénna' be'gake' dill' wen dill' kob che Cristona' gattezə wyajgake'. ⁵Na' beena' le Felipe, wyaje' to yell xen che Samáriana' na' be'lene' ben'ka' dill' che Cristona'. ⁶Na' bdop bllag ben', na' yog'lolgake' bzenagyen'gake' dill' daa be' Felípena', daa ble'gakile' yel' wakka' chone'. ⁷Na' ben' zan bichej dii xiwaa, na' ka bichejgakan chosyaadiagakan. Na' lekzka' biyone' zan ben' net ni'a nee, na' ben' bi chak sa' wen. ⁸Na' daa gok ka', le biba bizaki ben'ka' lle' yella'.

⁹Na' lekzka' yella' wzoa to ben' willa' lie' Simón, na' kon yel' willa'na' chone' chziyee ben' doxen gana' mbani Samári-ana', na' ben kwine' ben' choo ben' xen. ¹⁰Yog' ben' lle' na' chzenaggake' xtilleena', ka bi' xkwid' ka ben' gol, na' nagake':

—Beenin nsi'gake' Yel' Wak Choo Yel' Wak Xen che Chios.

¹¹Na' le wyajle'gake' che, la' zan yiz ba gok chziyee legake' kon yel' willa'na' daa chone'. ¹²Na' ka bzajni Felípena' le-gake' dill' wen dill' kob che yel' wnabia' che Chioza' na' che Jesucristona', na' ben' zan wyajle'gake' xtilleena' na' wchoa-gake' nisa', ka noolə ka ben' byo. ¹³Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yel' wakka' daa chon Felípena'.

¹⁴Na' ka wnezi postika' lle' Jerusalénna' ba chajle' ben' Samáriaka' cho'a xtill' Chioza', na' bsel'gake' Pédróna' len Juanna' Samáriana'. ¹⁵Na' ka bllingake', be'llwillgake' Chioza' wñabgakile'ne' soa loo yichjlall'do' ben' Samáriaka' Espíritu Sántona'. ¹⁶La' bin' soa' Espíritu Sántona' loo yichjlall'do'eka'. Tochga ba wchoagake' nisa' daa chajle'gake' che Xancho Jesúsza'. ¹⁷Na'ch Pédróna' len Juanna' bxoá neeka' yichj ben'ka', na' jsoa Espíritu Sántona' loo yichjlall'do'eka'.

¹⁸Na' ka gokbe'i Simónna' jsoa Espíritu Sántona' loo yichjlall'do' ben'ka' biyoll bxoá na' postika' yichje'ka', na' bshabile' legake' mech, ¹⁹chi'e:

—Li gon nad' yel' waki kwenche nottez ben' ka wxoá' na'ki yichje'ka' soa Espíritu Sántona' loo yichjlall'do'eka'.

²⁰Na'ch Pédróna' golle'ne':

—Kwiayi'lenshgo' xmecho'na', daa chakilo' wak si'leno'n daa chon Chioza' ka'z. ²¹Bikz ga gak gono' ka nak dga chonnto', la' bi nak yichjlall'do'na' ka cheeni Chioza'. ²²Biyaj bileni dii mala' chono', na' be'llwill Chioza' shi yizi'xene' cheyi daa ba goklalloo gono'. ²³La' nakbia'cha bin nxe bin nzak' nak loo yichjlall'do'na', na' lënnan' ntakw nchejan li'.

²⁴Na'ch che' Simónna' legake':

—Li we'llwillgach Chioza' ni cha' kwenche bi gak daa ba wnale gak cha'.

²⁵Na' ka biyoll be' Pédróna' na' Juanna' cho'a xtill' Chioza', na' biza'gake' ziyajgake' Jerusalénna'. Na' ka zingogake' nez, be'gake' dill' wen dill' kob che Jesucrístona' zan yellka' gana' mbani Samáriana'.

Felípena' na' ben' Etiopíana'

²⁶Na'ch to anjl che Xancho Chioza' wñie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

²⁷Na' wza' Felípena' zeje', na' tneza' billague' to ben' Etiopía wyaje' Jerusalénna' je'lawee Chioza'. Na' nake' to eunuco,* ben' zakii, na' nak lall' nee mech che noolə wñabia' che Etiopíana' beena' le Candace. ²⁸Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaiáza', beena' wdixjee daa goll Chioza'ne' kani'yi. ²⁹Na'ch Espíritu che Chioza' chi'e Felípena':

—Jabig' kwit karreta'.

³⁰Na' ka jabig' Felípena' kwit karreta', benile' chlab beena' daa bzej dii Isaiáza'. Na' chi'ene':

—¿Achajniilo' daa chlabo'?

³¹Na'ch ben' Etiopíana' chi'e:

—¿Nakra gon' shajniida'n?, la' bi zoa no wzajni nad'.

Na' golle' Felípena':

—Wyepgach na' wche' kwitii.

³²Na' Cho'a Xtill' Chioza' gana' chlabe' nan:

Betgake'ne' ka chite' to xil'do'; na' ka to xil'do', ba bi chosyaa kat chshibe'b,

ka'kz le', ni shcho'a dill' bi wñie'.

³³Na' bsi'gake'ne' yel' zto', na' aga no goklen le' gone' yel' joschis che'.

Na' kono xiin dia che wzoa,

la' bsol bnitgake' yel' mban che'na'.

³⁴Na'ch ben' Etiopíana' chi'e Felípena':

—Ben goklen wna nad', ¿nora cheyin wna dii Isafaza' ka'? ¿Ache kwinen' cho'e dill', anti che ben' yoblan?

*8:27 Eunuco: zevin ben' wlejgake' xshitin wa ben' bibi nsee ka chaljtie'. Bwia glosárona'.

³⁵ Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúza'. ³⁶ Na' ka bllingake' to ga lliia nis, na' che' ben' Etiopíana' Felípena': —Ni lliia nis, ¿ade daa wsej wllonan choa' nisa'?

³⁷ Na' che' Felípena'ne':

—Shi chajli'o do yichj do lalloo, wak wchoa' li' nisa'.

Na' che' ben' Etiopíana':

—Chajli'a Jesucrístona' nake' Xiin Chioza'.

³⁸ Na'ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'. ³⁹ Na' ka bichejgake' loo nisa', Espíritu che Xancho Chioza' bichi'e Felípena' gan yoblə, na' aga ble'chi ben' Etiopíana' le', per chiba chizakile' ziyaje'. ⁴⁰ Na' Felípena' billine' yella' le Azoto, na' bidie' to to yell chyise' dill' wen dill' kob che Jesúza' axt billintie' Cesareana'.

Bisha' Chioza' yichjlall'do' Sáulona'

(Hch. 22:6-16; 26:12-18)

9 Na' Sáulona' kon chde' chwall chshebe' ben'ka' nonlilall' Xancho Jesucrístona'. Chiyiljallee nak gone' kwenche wite' legake'. Daan wyaje' Jerusalénna' jawie' bxoz choo bxoz xenna' ²na' wnable'ne' wzeje' twej yish che to to gana' chdop chllag ben' wlall che'ka' choe'llwillgake' Chioza' yell Damáscona', na' we'n lsens yiyilje' ben'ka' ba wyoo lo nez li nez shao' che Jesucrístona' na' goxee legake' kwenche yichi'e legake' pres Jerusalénna', ka noolə ka ben' byo. ³Ka ni ngwee nez, na' ba zoa illine' yell Damáscona', tokonganzi wyechj to beeni' xen wal le' dii za' yabalə. ⁴Na' Sáulona' jchaze' lo yona' na' benile' to shii ben', chi'ene':

—Saulo, Saulo, ¿bi'che ch'chi' chsak'zo' nad'?

⁵Na'ch Sáulona' chi'e:

—¿Nora li', ben'?

Na'ch billii beenan', chi'e:

—Nadaan Jesúza', beena' ch'chi' chsakoo. Na' daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b.

⁶Na'ch Sáulona' axt chxiztite' daa chllebe', na' golle'ne':

—Xan', ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiyal' gon'.

⁷Na' ben'ka' zejlengake' Sáulona' txen legatega wzegake' bibangakile' na' bllébgake', daa bengakile' chak xne, per ni to kono ble'gakile'. ⁸Na'ch biyas Sáulona' lo yona'. Na' ka bixa' jalawe'na' aga ble'chile'. Na' ben'ka' zejlene' txen bej'gake' neena' kwenche bche'gake'ne' yell Damáscona'. ⁹Na' shon lla bi gok ile'ile', ni bi weej wdawe'.

¹⁰Na' Damáscona' zoa to ben' chonjilallee Jesúza' na' lie' Ananías, na' ben' Xancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

¹¹Na' Xanchona' chi'ene':

—Wyaj, na' wyoo neza' daa le Sh'icha, na' lill Júdaza' inabo' to ben' Tarso, ben' le Saulo. Ba choe'llwille' nad', ¹²na' ba ble'do'ile' li' choo gana' zoe' na' chxoanoona'ne' kwenche yile'ile'.

¹³Ka beni Ananíaza' chi'ene' ka', na' golle'ne':

—Xan', ze xtill' beena' chsak'zi'e ben'ka' nonlilall' li' Jerusalénna'. ¹⁴Na' naa ba blee ni noxee yish daa bzej bxozka' chnabia' daa cho'en lsens goxee yog'lo'into', neto' choe'llwillnto' li', na' yichi'e neto' pres Jerusalénna'.

¹⁵Na' Xancho Jesúza' golle'ne':

—Wyaj, la' ba wlej Sáulona' kwenche wi'e xtillaana' lao ben'ka' bi nak ben' Israel, na' lao ben' wnabia' che'ka', na'

lekzka' laole le' nakle ben' Israel. ¹⁶ Nad' wliidee ka chiyal' si' sakee ni cha'.

¹⁷ Na'ch Ananiáza' wyaje' gana' zoa Sáulona' na' wyo'e loo yooná', na' b̄xoa neena'ne'. Na' chí'ene':

—Saulo, ben' bish', Xancho Jesúsza', beena' wnie' li' tneza' kana' zo' ni, ba bselee nad' kwenche gon' ka yile'ilo' na' soa Espírítu Sántona' loo yichjlall'do'na'.

¹⁸ Na' ka b̄xoa neena' Sáulona', lii bik-waste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'. ¹⁹ Na' ka wdawe', biyakshao'lallee, na' bigaanlene' ben'ka' nonlilall' Jesúsza' yell Damáscona' zan lla.

Be' Sáulona' xtil' Chioza' yell Damáscona'

²⁰ Na' lii wzolote Sáulona' cho'e xtil' Crístona' to to gana' chdop chllag ben' Israelka' choe'llwillgake' Chioza' yell Damáscona', na' chí'e ben'ka' Jesúsza' nake' Xiin Chioza'. ²¹ Na' yog' ben'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúsza' Jerusalénna'? Na' ¿aaga ni cheyinnan' bide' ni kwenche yichi'e yog'logake' pres lljasane' legake' lao b̄xozka' chñabia'?

²² Na' btipch lall' Sáulona' kwenche zizikchli bi'e dill' nan Jesúsza' nake' beena' b̄cheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sáulona' lo na' ben' Israelka'

²³ Ka ba gok zan lla choe' Sáulona' xtil' Jesúsza' yell Damáscona', na' ben' Israelka' lle' na' bshag ljwellgake' nan witgake'ne'. ²⁴ Na' gokbe'i Sáulona' ba chinogake'ne'. Ka wal' ka tella wdpagake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'. ²⁵ Na'ch ben'ka' nonlene' txen, wal-lə wloogake'ne' to loo lllom na' biletj-

gake'ne' lee zeena' nechj yella' kwenche bile'.

Billin Sáulona' Jerusalénna'

²⁶ Ka billin Sáulona' Jerusalénna', gok-ile' lene' ben'ka' nonlilall' Jesúsza', per yog'lolé' bllebgake'ne', bi wyajle'gake' shi dii li ba chonlilallee Jesúsza'. ²⁷ Na' Bernabéna' b̄chi'e Sáulona' gana' lle' postlka'. Na' golle' legake' nan Sáulona' ble'ile' Xancho Jesúsza' tneza' ka zeje' yell Damáscona', na' Jesúsza' be'lene'ne' dill'. Na' lekzka' golle' legake' bi bllebe' bi'e xtil' Jesúsza' yell Damáscona'. ²⁸ Na' ka' gok bigaané' Jerusalénna' goke' txen ben'ka' nonlilall' Jesúsza', na' wal inlleb goke' bi'e xtil' Xancho Jesúsza'. ²⁹ Na' be'lene' dill' ben' Israelka' chne dill' griegona' kwenche shajle'gake' che Jesúsza', per legake' goklall'ligake' witgake'ne'. ³⁰ Na' ka wnezi ben'ka' nonlilall' Jesúsza' ba chinogake' Sáulona' kwenche witgake'ne', b̄che'gake'ne' Cesareana'lə. Na' ka bllingake' na', na' bisel'gake'ne' Társona'lə gana' nak lalle'.

³¹ Na'ch ben'ka' nonlilall' Jesúsza' doxen Judeana', Galileana' na' Samáriana' wzoagake' mbalaz, la' koch no b̄chi' bsak'ch legake'. Na' wlooshosh yichjgake' toz Chioza'. Na' Espírítu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

³² Do kana', chda Pédróna' chjawie' ben'ka' nonlilall' Jesúsza' to to yell, na' lekzka' jawie' ben'ka' lle' yell Lídana'. ³³ Na' yell Lídana' jti'e to ben' le' Eneas. Ba gok xon' yiz die' bi chak chase' daa net ni'a neena'. ³⁴ Na' Pédróna' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. ³⁵ Na' yog' ben'ka' lle' yell Lídana' na' yell

Sarónna', ble'gakile' biyaki beena' na' benlilall'gake' Xancho Jesúsza'.

Biban Dorcaza' ladj ben' wetka'

³⁶Na' lekzka' yell Jópéna' wzoa to noolə benlilallee Jesúsza', na' wlie' Tabita,† na' dill' griegona' che'gake'ne' Dorcas. Na' nooli, shlak wbane' toshiizi bzani nī'a neena' goklene' ben', na' biyesh'lallile' ben'ka' bibi de cheyin. ³⁷Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' llia shkwiana' cha'lə. ³⁸Na' Jópéna' llian gaozə yell Lídana', na' ben'ka' wnezgakile' zoa Pédróna' yell Lídana', na'ch bsel'gake' chop ben' jellgake'ne':

—Sho'gach Jópéna' naate.

³⁹Na'ch Pédróna' wzee zejléne' ben'ka' Jópéna'. Na' ka blline', na' jwa'gake'ne' loo yooná' gana' de ben' weta', na' yog' nool wizebka' wyechjgake' Pédróna' chbellgake', na' bli'gakile'ne' xe'ka' daa ben dii Dorcaza' shlak wbane'. ⁴⁰Na' Pédróna' bibeje' yog'lolé' chyoolə, na' b'chek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bixá'te jalao Dorcaza' chwie' Pédróna'. Na'ch biyase' bibi'e. ⁴¹Na' Pédróna' bexee neena' na' bisolléene'. Na'ch binie' nool wizebka' na' nochlə ben'ka' nonlilall' Jesúsza' kwenche bizoe'ne' shi'a shbane' lawe'ka'. ⁴²Na' wze dill' doxen yell Jópéna' ka gok che Dorcaza', na' ben' zan benlilall'gake' Xancho Jesúsza'. ⁴³Na' Pédróna' bigaane' Jópéna' zan lla lill Simónna, beena' chkoll yidxa bayix'ka'.

Pédróna' na' Cornéliona'

10 Na' yell Cesareana' wzoa to ben' wlie' Cornelio, na' nak lall' nee zan soldadka', na' ben'ka' nak lall' nee wlegake' Ben' Italia. ²Na' Cornéliona'

len ben'ka' nakgake' toz loo yoo lille'na' choe'la'ogake' Chioza' na' chall chlle-bgake'ne'. Na' zoatezi zoe' choe'lwille' Chioza' na' cho'e mech xen kwenche chaklene' ben' Israelka', ben'ka' chyallj chchinin. ³To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴Na' Cornéliona' chwiayenee anjla' do chllebze', na' golle'ne':

—¿Beran cheenilo' ben'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' ben' yesh'ka'. ⁵Na' naa bsel' ben' shajgake' yell Jópéna' kwenche lljxi'gake' beena' le Simón Pedro. ⁶Zoe' lill to ben' le Simón, beena' chkoll yid, na' lille'na' zoan gaoz cho'a nisdona'. Na' Simón Pédróna' ine' li' daa chiya'l gono'.

⁷Na' ka biza' anjla' bshaljlen Cornéliona', na'ch Cornéliona' goxe' chop xmo'se'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez. ⁸Na' golle' legake' yog' daa goll anjla', na'ch bselee legake' Jópéna'.

⁹Na' betiyo do ka gobill ba zoa illin ben'ka' bsel' Cornéliona' yell Jópéna'. Na' ka lo gora', Pédróna' wyepe' koll' yooná' gana' zoe' kwenche we'lwille' Chioza'. ¹⁰Na' wdone', na' goklallee gawe' shel'ka'. Na' shlak chongake' daa gawe', ble'do'ile' ¹¹byalj yabana', na' to dii nak ka to lech' xen dii nchej tap yichjten chetjan lo yona'. ¹²Na' loo lechaa lle' biya bayix', no ba llia tap nī'a na'in, na' no ba chxobi leeb lo yona' na' no ba zoa xilin. ¹³Na'ch benile' shii to ben', chi'ene':

—Wzolla' Pedro. Bet baka', na' wdao.

¹⁴Na'ch Pédróna' golle'ne':

†9:36 Tabita: dillii nakan dill' arameo.

—Bi gaw' baka', Xan'; ni shlin bin' gaw' baki bi nak ba xilall'.

¹⁵Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

¹⁶Shon' shii golle' ka', na'ch biyep lechaa yabana'. ¹⁷Na' chibani Pédrona' chakile' bera zejín daa ble'do'ile', ka bllin ben'ka' bsel' Cornéliona' cho'a yooná gana' zoe', daa ba wñabgake' gan zoa lill beena' le' Simón, beena' chkoll' yid xa bayix'ka'. ¹⁸Na' ka bllingake', na' wñegake' zillj wñabgake' shi nan' zoa to ben' le Simón Pedro. ¹⁹Na' Pédrona' zie' wñeyi cheyi daa ble'do'ile', kat' wne Espíritu Sántona', chi'ene':

—Bwiakachi, na' lle' shon' ben' chiyilj-gake' li'. ²⁰Bizolla' na' biyetj, na' wyajlengake'. Bi gakchopilo', la' nadaan bselaa legake'.

²¹Na'ch biyetj Pédrona' gana' lle' ben'ka' bsel' Cornéliona'. Na' chi'e legake':

—Nadaan beena' chiyiljle. ¿Beran chak chele zidwiale nad'?

²²Na'ch che' ben'ka' Pédrona':

—To ben' wñabia' che soldadka' lie' Cornelio bselee neto'. Nake' to ben' zej shlj lao Chioza' na' ngooshosh yichje'ne', na' yog' ben' Israelka' ñezgake' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajniilo'ne' na' wzenague' dill'ka' we'lono'ne'.

²³Na'ch Pédrona' wlo'e legake' loo yoolə gana' zoe', na' bigaangake' shyel. Na' betiyo wyajlen Pédrona' legake' na' len to chop ben' Joje, ben' nonlilall' Jesúsá'.

²⁴Na' llana' sto bllingake' Cesareana'. Na' Cornéliona' ba btope' yog'lo' dialla che'na' na' ben'ka' nllaguile', na' ba lle'gake' lille'na' chbezgake' illin Pédrona'. ²⁵Na' ka bllin Pédrona' lill Cornéliona', lii bchejte Cornéliona'

bçhek' xibe'na' lawe'na' choe'laweene'. ²⁶Na' Pédrona' bisolléene', chi'ene':

—Bizolla', bi wçhekz' xibo' lawii, la' lekzka' ben'zə nad'.

²⁷Na'ch shlak chshaljgake' wyoogake' loo yooná, na' ble'i Pédrona' ben' zan ba lle'. ²⁸Na'ch golle' legake':

—Le' ñezile ka na ley chento'na', neto' ben' Israel bi chiyal' gonnto' txeñ le' bi nakle ben' Israel, na' ni bi chiyal' sho'nto' loo yoo lill-le. Per Chioza' ba bzajniile' nad' bi chiyal' gakið' zban nottez ben'. ²⁹Daan ka bla' ben'ki chñegake' nad', lii za'tia' bi bchia' dill'. Na' naa cheenid' inezid' biçhe bseloo ben'ki bidxi'gake' nad'.

³⁰Na'ch Cornéliona' chi'ene':

—Ba gok tap lla, do ka naayen', chida shon', choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'. ³¹Na' wne' nad': “Cornelio, Chioza' ba bzenague' daa choe'lwillono', na' lekzka' chle'ile' ka chakleno' ben' yesh'ka'. ³²Na' bsel' ben' shajgake' yell Jópena' lljxi'gake' Simón Pédrona' kwenche yide' we'lene' li' dill'. Zoe' lill to ben' le Simón, ben' chkoll yid, na' lill beeni zoan gaöz cho'a nisdona'.”

³³Daan lii bentia' wñeyi bidxi'gake' li', na' choxkeno' ba bido'. Na' ñezkzi Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédrona' dill' lill Cornéliona'

³⁴Na'ch wzolo Pédrona' bi'e dill', chi'e:

—Chakbe'id' naa, dii li Chioza' aga nakzi ben' chakile', ³⁵san chle'shiile' yog' ben' lle' gattez yell kon shi chall chllébgake'ne' na' chongake' daa nak shlj. ³⁶Chioza' bselee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bselee Jesucristona', beena' nak Xan yog'lo'cho. ³⁷Ñezkzile kwaslo' diika' gok gana' mbani Judeana', daa wzolo gana' mbani Galileana' ka wde wdixje'i dii Juanna'

ben' nan chonan byen yiyaj yilengakile' na' choagake' nis. ³⁸Nezile Chioza' bi'e Jesús, ben' Nazareta', yel' wak na' Espíritu Sántona', na' wda Jesúza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'. ³⁹Neto' choe'nto' dill' che yog'te diika' ben Jesúza' Jerusalénna' na' doxen gana' mbani Judeana'. Na' biyoll' bene' diika', betgake'ne' bda'gake'ne' lee yag cruza'. ⁴⁰Per Chioza' bisbane'ne' ladj ben' wetka' biyoyon llana', na' bidli'lawe' neto'. ⁴¹Aga yog' ben' bli'lao Jesúza' ka bibane' ladj ben' wetka', san bli'lawe' toz neto', neto' naknto' ben' ba wlej Chioza' kwenche we'nto' xtilleena'. Na' neto' weej wdaolennto'ne' ka wde bibane' ladj ben' wetka'. ⁴²Na' Jesúza' bselee neto' chixje'into' ben' nan Chioza' nzoe'ne' kwenche gone' yel' joschis che yog'lol ben', ka ben' mban na' ka ben' ba wit. ⁴³Na' lekzka' kani'yi yog' dii ben'ka' wdixjee daa goll Chioza' legake' be'gake' xtill' Jesúza', wnagake' Chioza' yizi'xene' saaxya che nottezə ben' gonlilallee Jesúza'.

Wyoo Espíritu Sántona' loo yichjlall'do' ben'ka' bi nak ben' Israel

⁴⁴Na' ni chshaljte Pédrona', kat' Espíritu Sántona' wyo'e loo yichjlall'do' yog' ben'ka' chzenaggake' xtilleena'. ⁴⁵Na' ben' Israelka' nonlilall' Jesúza', ben'ka' bllinlen Pédrona' lill Cornéliona', bibangakile' daa wyoo Espíritu Sántona' loo yichjlall'do' ben'ka' bi nak ben' Israel. ⁴⁶Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'. ⁴⁷Na' Pédrona' golle' ben' Israelka' lle' na':

—Aga no gak wllon wchoa ben'ki nisa', la' ba yoo Espíritu Sántona' loo yichjlall'do'eka' ka ba yo'e cho'.

⁴⁸Na' ben Pédrona' mandad wchoagake' nisa' daa chonlilall'gake' Xancho Jesucristona'. Na' biyolla' wnabgakile'

Pédrona' kwenche bigaanlene' legake' chop shon lla.

Pédrona' golle' ben' Jerusalénka' ka gok

11 Na' postlka' na' nochlə ben'ka' nonlilall' Jesúza' Judeana' bengakile' nan ben'ka' bi nak ben' Israel lekzka' chajle'gake' cho'a xtill' Chioza'. ²Na' ka billin Pédrona' Jerusalénna' gokdi-len xonj ben' le', ben'ka' che chonan byen sho' ben' byoka' nonlilall' Chioza' sen daa le circuncisión la'kzi bi nakgake' ben' Israel. ³Na' gollgake'ne':

—¿Biche wyoozo' loo yoo lill ben'ka' bi nak ben' Israel na' weej wdaolenzgako'ne'?

⁴Na'ch Pédrona' golle' legake' yog' ka gok, chi'e:

⁵—Kana' ni zoa yell Jópena', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. ⁶Na' ka bwiayenaa diika' llia loo lechaa, na' ble'id' lle' bayix' ba zoa tap ni'a na'b, na' no ba znia, no ba chxobi le'in lo yona', na' ba zoa xilin. ⁷Na' benid' shii to ben' ne' nad': “Wzolla' Pedro, bet baka' na' wdao.” ⁸Na' goshee: “Bi, Xan', ni tshii bin' gaw' baki bi nak ba xilall'.”

⁹Na' sto shii benid' shii beena' ne' nad': “Daa ba wna Chioza' wak gawo' bich inazo' bi nakan xilall'.” ¹⁰Gokte shon shii wne ka', na'tech biyep lech' xenna' yabana'. ¹¹Na' shintg ble'do'id' diika' kat' bidse shonə ben' cho'a yoonaa gana' zoa', zaake' yell Cesareana' ziddiljgake' nad'. ¹²Na' Espíritu che Chioza' wne' nad' bi gonchoplallaa sha'len' legake'. Na' lenz ben' bish'choki xop wza'lengake' nad', na' yog'tento' wyoonto' lill Cornéliona'. ¹³Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': “Bsel' to chop ben' yell Jópena' kwenche lljxi'gake' beena' le Simón Pedro. ¹⁴Na' le' ine' li' nakan gono'

kwenche yilaleno' ben'ka' lle' loo yoo lillo'na' bi kwiayi'le." ¹⁵Na' ka wzoloa' choe'lengakee dill', betj Espiritu Sántona' wyo'e loo yichjlall'do'eka', ka bidsoe' loo yichjlall'do'choki. ¹⁶Na'ch jadinid' daa wna Xancho Jesúza' kana' wne': "Dii li Juanna' bchoe' ben' nis, san le', dii zak'chi gak chele, daa yidsoa Espiritu Sántona' loo yichjlall'do'lena'." ¹⁷La' Chioza' bene' ka zoa Espiritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucristona'. Na' ¿nora nak' nad' wllon' gon Chioza' daa cheenile' gone'?

¹⁸Na'ch ka biyoll bzenag ben' Jerusalénka' nonlilall' Jesúza' dillaa be' Pédrona', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len ben'ka' bi nak ben' Israel ba be' Chioza' latj yiyaj yilengakile' dii malka' chongake' kwenche gat' yel' mban che-gake' zejli kani.

Ben'ka' nonlilall' Jesúza' Antioquíana'

¹⁹Na' ben' Israelka' nonlilall' Jesúza', ben'ka' bsheshlesgake' ka wde wit dii Estébanna', bale' wyaj zit' axt Feníciana', na' zi bale' bllin Chíprena' na' zibale' bllin yell Antioquíana'. Na' gana' bllin to toe' be'lengake' to ben' wlall che'ka'z xtill' Jesúza'. ²⁰Per bal' ben'ka' nak ben' Chipre na' ben' Cirene, ka bllingake' yell Antioquíana', wzologake' be'lengake' ben' bi nak ben' Israel dill' wen dill' kob che Xancho Jesúza'. ²¹Na' yel' wak che Xanchona' wzoalenan legake', na' ben' zan wlej yichjgake' diika' nxenilall'gake' na' benlilall'gake' Xancho Jesúza'.

²²Na' ben'ka' nonlilall' Jesúza' Jerusalénna', ka wnezgakile' ba nonlilall' ben' Antioquíaka' Jesúza', na' bsel'gake' Bernabéna' jawie' legake'. ²³Na' ka blline' Antioquíana', ble'ile' ba goklenchga Chioza' legake' na' le' bibaile'. Na' btipche' lall' ben'ka'

kwenche soachehgake' gonlilall'gake' Xancho Jesúza' do yichj do lall'gake'. ²⁴Na' ben' zanch benlilall'gake' Xancho Jesúza', la' Bernabéna' nake' to ben' wen, na' chnabia' Espiritu Sántona' le', na' le' benlilallee Chioza'.

²⁵Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'. ²⁶Na' wzoalengake' ben'ka' nonlilall' Jesúza' Antioquíana' twiz, na' bli' bsdgakile' ben' zan. Na' Antioquíana' dii nechdo' bsi'gake' ben'ka' nonlilall' Jesucristona' "Cristianos".

²⁷Na' do kana'kzə, bal' ben'ka' chyixjee daa che' Chioza' legake' wza'gake' Jerusalénna' bllingake' Antioquíana'. ²⁸Na' wzolla' toe', beena' le' Ágabo, na' bi'e dill' ka ba bzajni Espiritu che Chioza' le', na' golle' kwe' to wbin wal doxen yell-lioni. Na' ka' gok kana' chnabia' beena' le' Claudio gana' mbani Rómána'. ²⁹Na' ben' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' ben'ka' nonlilall' Jesúza' gana' mbani Judeana', gana' chi' wbinna'. ³⁰Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao ben'ka' ngoo lall' na' ben'ka' nonlilall' Jesúza' Judeana'.

Betgake' Jacóbona' na' wloogake' Pédrona' lillyana'

12 Na' do kana'kzə ben' wñabia' Heródeza' bexee bal' ben'ka' nonlilall' Jesúza' kwenche wchi' wsakee legake'. ²Na' bchogloe' gueti Jacóbona' yesya, beena' nak ben' bish' Juanna'. ³Na' ka gokbe'ile' bibayi ben'ka' chnabia' ben' Israelka' daa bene' ka', na'ch lekzka' bexee Pédrona' lo lñi Paskwa' kana' chaogake' yetxtila' daa bi nchix' lewadúrana'. ⁴Na' ka bdo'ile'ne', wdixje'ne' lillyana' gana'

wdap shin'to soldadka' le', na' bene' tap weje' kwenche bibeji ljwellgake' wdapgake'ne'. Na' gokile' yiyoll lni Paskwa' kweje'ne' lao ben' yellka' na' wchogloe' che' guete'. ⁵Shlak nej Pédrona' lillyana', ben'ka' nonlilall' Jesúza' toshiizi be'lwillgake' Chioza' ni che'.

Chioza' bibeje' Pédrona' lillyana'

⁶Na' lle'na' ka wxezə kwej Heródeza'ne' kwenche wchogloe' che' guete', Pédrona' die' chese' ladj chop soldadka', na' nchejgake'ne' chop gden, na' zi chop soldadka' chapgake' cho'a lillyana'. ⁷Na' tokonganzi bllin to anjl che Xancho Chioza' gana' de Pédrona' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. ⁸Na'ch che' anjla'ne':

—Bikaacha li'ona' na' bilej xelo'na'.

Na' ben Pédrona' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

⁹Na'ch zjano Pédrona' anjla', ni bi nezile' shi ka chakkzan, kon gokile' chle'do'zilen'. ¹⁰Na' bidegake' gana' lle' soldadka' shkwen, na' bidetegake' gana' lle' ben'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédrona'. ¹¹Kana'ch gokbe'i Pédrona', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non ben' Israelki lez gak cha'.

¹²Na' ka gokbe'ile' ba bicheje' lillyana', na' ziyaje' lill Maríana' xna' Juanna', beena' nsi'gake' Marcos. Na' lill Maríana' ndop nllag ben' zan choe'lwillgake'

Chioza'. ¹³Ka blline', na' wnie' cho'a leeja', na' bchej to bi' noolə le Rode, jaw- iab' no beena' chne'. ¹⁴Na' ka biyombia'b' shii Pédrona' chibachgaib', na' daa le chibaib' bikz bsalj'b'. Zigaate jayellb' ben'ka' lle' loo yoon'a' ba ze Pédrona' cho'a leeja'. ¹⁵Na'ch che'gake'b':

—Chakzilo'n.

Na' le'b' wzeyidb' che'b' len'. Na' legake' che'gake'b':

—Anjl che'na'ljan.

¹⁶Na' Pédrona' ni zie' chnie' cho'a leeja'. Na' ka bsaljgake' ble'gakile'ne', bibanchgakile'. ¹⁷Na'ch Pédrona' bene' to sen kon neena' kwenche soagake' lliza, na' golle' legake' ka ben Xancho Chioza' bibeje'ne' lillyana'. Na' chi'e' legake':

—Li ye' Jacóbona' na' yog' ben' bish'choka' ka ba ben Xanchona' cha'.

Na'ch bizee ziyaje' gan yoblə.

¹⁸Na' ka wyeeni', wche' to ye'l wban xen ladj soldadka' daa bi gokbe'gakile' nak gok bichej Pédrona'. ¹⁹Na'ch Heródeza' bta bnjie' ben'ka' biyiljgake'ne', na' bi billelgakile'ne'. Na'ch wnable' soldadka' chap lillyana' nak gok bicheje', na' bikz bi dill be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

Ka wit Heródeza'

²⁰Heródeza' chlee ben' Tíroka' na' ben' Sidónka'. Na' ben'ki gokgake' toz bshaljlengake' Blástona', to wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gaogake' gana' chnabia' Heródeza'. Na' Blástona' bshaljlene' Heródeza' kwenche wxi'xene' che ben' Tíroka' na' ben' Sidónka' na' yizoalene' legake' wen sto shii. ²¹Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe'

ben'. Na'ch jshie' gana' chchogloe' che ben', na' bi'e dill' lao ben'ka' ndop nllag na'. ²²Na' shlak cho'e dill', na' besyaa ben'ka' che'gake':

—To chioza'n chne, aga kontele beaan.

²³Na' anjl che Xancho Chioza' lii be'tie' Heródeza' to yillwe' wal benan ka chyin chlall' be' bzog'ka' loo li'ena' na' wite', daa bi'e latj wloo ben'ka' le' balaan daa chido' toz beena' nak dowalj Chios.

²⁴Na' dill' wen che Chioza' zej chliljchan doxen.

²⁵Na' Bernabéna' len Sáulona' ka wde bengake' daa chiyal' gongake' Jerusaléna', biza'gake' biyajgake' Antioquíana', na' bche'gake' Juanna', beena' lekzka' nsi'gake' Marcos.

Bernabéna' na' Sáulona' je'gake' cho'a xtill' Chioza' yell zit'ka'

13 Na' ladj ben'ka' nonlilall' Jesúza' yell Antioquíana' lengake' ben' chyixjee daa che' Chioza' na' ben' chli' chsedi cho'a xtill' Chioza'. Na' legake' ben'ki: Bernabéna', Simónna', beena' che'gake' ben' gasj, Lúciona' ben' Ciré- nena', Sáulona' na' Manaéna', beena' bgol-len Heródeza' beena' wñabia' gana' mbani Galileana'. ²Na' to shii ka zoa- gake' wbasaa na' choe'la'ogake' Chioza' wne Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

³Na' ka wyeelo be'llwillgake' Chioza' na' biyoll wzoagake' wbasaa, na' bxoaa neeka' yichj ben'ka' chop, na'ch bsel'gake' legake' gana' lljengake' xshin Chioza'.

Páblona' na' Bernabéna' be'gake' cho'a xtill' Chioza' gana' le Chipre

⁴Na'ch Espíritu Sántona' bselee Bern- abéna' na' Sáulona' yell Seleúciana' gana' wyoogake' barkwa' kwenche jwaan le-

gake' yell-lío Chíprena' daa lliia lo nisdona'. ⁵Na' ka wlez barkwa' cho'a yell Salaminana', bchejgake' na' wzolo- gake' wdixje'gake' cho'a xtill' Chioza' to to gana' chdop chllag ben' Israelka' choe'llwillgake' Chioza'. Na' nche'gake' sto ben' le Juan kwenche gaklene' le- gake'. ⁶Na' wdegake' to to yellka' lliia Chíprena'. Na' ka bllingake' yell Pá- foza', na' jadi'gake' to ben' Israel, beena' le Barjesús. Nake' to ben' willa', na' chziyee ben' chi'e nake' to ben' chyix- jee daa che' Chioza' le'. ⁷Na' beeni nl- laguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to ben' chajni, na' goxe' Bernabéna' len Sáulona' kwenche wza- jni'gakile'ne' cho'a xtill' Chioza'. ⁸Na' ben' willa'na', nsi'gake'ne' Elimas (na' ze- jin ben' willa'), goklallee gone' ka bi shajle' ben' wñabia'na' che cho'a xtill' Chioza'. ⁹Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiayenee Elímaza', ¹⁰na' golle'ne':

—Li' ben' wxiye', ben' wen dii mal, xiiñ dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'? ¹¹Na' naa Chioza' wselee yell' zi' cho', gone' ka icholo' na' shloll wen bich ile'ilo' beeni' che wbillá'.

Na' kate golle'ne' ka lii wcholtie', na' chgan chtobzile' chñabe' no yiyox' neena' daa bich chle'ile'. ¹²Na' ka ble'i ben' wñabia'na' daa gok, na' wyajli'e, na' le bibanile' ka nak cho'a xtill' Xancho Jesúza' daa chli' chsedgakile'ne'.

Páblona' na' Bernabéna' wyajgake' yell Antioquíana' daa lliia gana' mbani Pisídiana'

¹³Na'ch Páblona' na' ben'ka' chdalene' wyoogake' barkwa' yell Páfoza' na' wya- jgake' yell Pérgena' daa lliia gana' mbani Panfíliana', na' Juan Márcona' bixonje'

ziyaje' Jerusalénna'. ¹⁴Na' Páblona' len ben'ka' chdalene' na', biza'gake' yell Pér- gena' na' wyajgake' yell Antioquíana' daa llia gana' mbani Pisídiana'. Na' ka bllin lla sabda', llana' chombaan ben' Israelka', wyajgake' gana' chdop chllaggake' choe'lwillgake' Chioza', na' jche'lengake' ben'ka'. ¹⁵Na' ka biyoll blabgake' lat' ley che Chioza' na' zi lat' daa bzej dii ben'ka' wdixjee daa goll Chioza' legake', na'ch ben'ka' ch- goo xnezi cheyi diika' chongake' gana' chdop chllaggake' bsel'gake' to ben' gana' chi' Páblona' len Bernabéna' na' golle' legake':

—Le' ben' bish', shi bi dill' de we'lenle ben'ki kwenche wtipch lall'gake', wak we'len naa.

¹⁶Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia': ¹⁷Chios, beena' nonlilall'cho cho' ben' Israel, wleje' dii xozxto'choka' na' bene' ka wyangake' shlak wzoagake' Egiptona'. Na' bllin lla bibeje' legake' kon ye!' wak che'na'. ¹⁸Na' wdape' ye!' chx- enlall' che ye!' widenag che'ka' lo choa yiza' wzoagake' latja' gana' bibi chashj chleb. ¹⁹Na' bliiayee yellka' gall kwen lle' gana' mbani Canaánna' kwenche bi'e dii xozxto'choka' yell-lío che'ka'. ²⁰Kan' gok lawi tap guioa yoo gashj yiz. Na'tech, bzoa' Chioza' ben'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'. ²¹Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'. ²²Na' ka bikwas Chioza' ye!' wñabia' che dii Saúla', bi- zoe' dii Davina' inabi'e na' bi'e dill' che', wne': “Davina', xiin Isafna', nake' to ben'

chon ka chazlallaa, na' ne'zid' gone' yog' daa cheenid' gone'.” ²³Na' lo dia che dii Davina' golj Jesucristona', beena' wlej Chioza' kwenche yisle' cho' ben' Israel lawi dii mala' kon ka bchebe' gone'. ²⁴Na' ka zi' solo Jesúsza' wli' wsedile' ben', dii Juanna' golle' yog' ben' Israelka' chiyal' yiyaj yilengakile' xtoleeka' na' choagake' nisa'. ²⁵Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': “Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmose' kwenche wle'chj' xe'le'na'.”

²⁶'Le' ben' bish', le' nakle xiin dia che dii Abrahama', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' lao- choni daa cho'en dill' yisle' ben' kwenche bi kwiayi'gake'. ²⁷Ben' Jerusalénka' na' ben' wñabia' che'ka' bi gokbe'gakile' bsel' Chioza' Jesúsza'. Ni bi wyajni'gakile' di- ika' bzej dii ben'ka' wdixjee daa goll Chioza' legake' kani'yi, la'kzi chlab- gake'n yog' lla sabd gana' chdop chllag- gake' choe'lwillgake'ne'. Na' daa wna- gake' chiyal' guet Jesúsza', billinin daa bzej dii ben'ka' be' dill' daa goll Chioza' legake'. ²⁸La'kzi bibi dii mal billelgakile' ben Jesúsza' dii gonan ka wchoglogake' witgake'ne', wñabgake' Pilátona' gone' mandad witgake'ne'. ²⁹Na'ch ka biyoll bengakile'ne' yog' daa nyoj lee cho'a xtil' Chioza' gak che', na'ch biletjgake'ne' lee yag cruza' na' jakwash'gake'ne'. ³⁰Na' Chioza' bilise'ne' ladj ben' wetka'. ³¹Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna'. Na' le- gaken' choe'lengakee ben' wlall' che- choka' xtilleena' naa.

³²'Na' chyixje'into' le' dill' wen dill' kob che Jesúsza' daa bcheb Chioza' lao dii xozxto'choka'. ³³Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane'

Jesúza' ladj ben' wetka'. Gok ka nyoj Salmo de wchopina', gana' nan: "Lin' nako' Xiin', na' naa, daa solo inabi'o na' inezi ben' nadaan nak' Xo'." ³⁴ Chioza' ba bi'e dill' yilise'ne' ladj ben' wetka' na' bichga guete', na' wne': "Dii li' gaken' le' dii xen wal ka bcheb' lao dii Davina'."

³⁵ Na' lezkza' sto Salmo nan: "Bi wi'o latj gooll' iteb beli chen cha'ni, daa nak' lall' no'." ³⁶ Na' nezicho dii Davina' goklene' dii xozxto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xozxtoe'ka', na' gooll' bteb beli chen che'na'. ³⁷ Per kwerp che Jesúza', beena' bisban Chioza' ladj ben' wetka', bi wliayi'n. ³⁸ Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúza'. ³⁹ Nottez ben' gonlilalleene' yiyake' ben' li' ben' shao' lao Chioza'. Aga no yiyak ben' li' ben' shao' lao Chioza' daa chone' daa na ley che dii Moiséza'. ⁴⁰ Na' li' wsak' kwenche ki' gag chele ka bzej dii ben'ka' be' dill' daa goll' Chioza' legake' kani'yi, gana' nan:

⁴¹ Li' wwia, le' ben' wenle. Li' yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki' gag.

⁴² Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch ben'ka' bi' nak ben' Israel wñabgakile'ne' we'lene' legake' cho'a xtill' Chioza' lla sabda' sto. ⁴³ Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiyal' soachehgake' gonlilall'gake' Chioza' daa le' chakile' legake'.

⁴⁴ Na' ka bizoa xmanna' sto, llana' chombaän ben' Israelka', zi lat'z ki' biya ben'ka' lle' yella' bdop kwenche wzenaggake' cho'a xtill' Chioza'. ⁴⁵ Na' ka ble'i ben' Israelka' ben' zan ndop nllag, na'

gokxe'gakile' Páblona' na' wñegake' zban che dillaa cho'e, na' biya dii wñagake' che'. ⁴⁶ Na'ch Páblona' len Bernabéna' aga bllebgake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chido'le gon' Chioza' ye!' mban chele zejli kani, na' solochoklento' naa wzajniinto'n ben'ka' bi' nak ben' Israel. ⁴⁷ La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' ben'ka' bi' nak ben' Israel.

Na' yoo ben'ka' lle' doxen yell-lioni ka gongake' kwenche yilagake' na' bi kwiayi'gake'.

⁴⁸ Na' ben'ka' bi' nak ben' Israel, ka bengakile' daa wna Páblona' len Bernabéna', le' bibagakile' na' wñagake' le' mba nak cho'a xtill' Chioza'. Na' yog' ben'ka' ba wlej Chioza' kwenche gat' ye!' mban chegake' zejli kani benlilall'gake' Jesúza'. ⁴⁹ Ka' gok bllilj cho'a xtill' Xancho Jesúza' doxen na'. ⁵⁰ Na' ben' Israelka', ben'ka' bi' wyajle'gake' che Jesúza', wlooye'gake' ba' noolə wnia'ka', ben'ka' choe'la'o Chioza', na' ben' byoka' le' zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell' che'ka'. ⁵¹ Na'ch Páblona' len Bernabéna' ka biza'gake' wllib ni'eka' bishte che yella' daa bi goklall' ben'ka' lle' na' wzenaggake' che Chioza'. Na' wyajgake' yell' Icóniona'. ⁵² Na' ben'ka' nonlilall' Jesúza' wzoachgagake' mbalaz, na' Espíritu Sántona' wñabi'e loo yichjlall'do'eka'.

Bllin Páblona' len Bernabéna' Icóniona'

14 Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'llwillgake' Chioza'. Na'

Chioza' goklene' legake' ka be'gake' cho'a xtilleena' kwenche ben' zan benlilall'gake' Jesúza', ka ben' Israel na' ka ben' bi nak ben' Israel. ²Na' ben' Israelka', ben'ka' bi goni shajle' che Jesúza', wlooyel'gake' bal ben'ka' bi nak ben' Israel kwenche gokzbangakile' ben'ka' nonlilall' Jesúza'. ³Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllebgake', la' nxenilall'gake' zoalen Xancho Chioza' legake'. Na' Xanchona' goklene' legake' bli'gake' yel' wak che'na' kwenche gokbe'i ben' nan choe'gake' dill' li. ⁴Na' ben' Icónioka' gogkake' choplæ, bale' wda'gake' ben' Israelka' na' zi bale' wda'gake' Páblona' len Bernabéna'. ⁵Na'ch ben' Israelka' bengake' txen ben'ka' bi nak ben' Israel na' gogkake' toz len ben' wñabia'ka', gogkall'gake' yiya dii gongakile' Páblona' len Bernabéna' na' wlligake' legake' yaj. ⁶Na' ka wñezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' lliá gana' mbani Licaóniana'. ⁷Na' lekzka' be'gake' dill' wen dill' kob che Jesúza' na'.

Blligake' Páblona' yaj yell Lístrana'

⁸Na' Lístrana' jadi'gake' to ben' nx-inj ni'ena' ka goljtie'. Na' bi chak see daa bi chzoa chech ni'ena'. ⁹Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see. ¹⁰Na'ch golle'ne' zillj:

—Wzolla'.

Na' lii wzolla'tie' na' gok wzee. ¹¹Ka ble'i ben' Lístraka' daa ben Páblona', wzolo chosyaagake' chnegake' xtilleeka' daa nak dill' Licaonia che'gake':

—¡Ba betj chios chechoka' gani zoacho na' chle'gakichone' ka benech!

¹²Na' wnagake' Bernabéna' nake' chios che'ka' beena' nsi'gake' Júpiter,

na' Páblona' nake' chios che'ka' beena' nsi'gake' Mercurio, la' len' cho'e dillaa. ¹³Na' bñox che yoodo' che Júpitera', daa zoa katez choogake' yella', jwee goonka' na' nwalee legakb bga de yej, na' le', na' ben'ka' ndop nllag na', gogkall'gake' witgake' legakb kwenche we'la'ogake' Páblona' len Bernabéna'. ¹⁴Na' ka gokbe'i Bernabéna' len Páblona' bin gon ben'ka', na' wzologake' bchez' xe'ka', la' chakgakile' dii mal nllaban chon ben'ka'. Na' jsedogake' ladje'ka', na' wñegake' zillj, che'gake':

¹⁵—Le' ben'do', ¿berache chonzle ka? Lekzka' ben' yell-lioz neto', ka le', na' ba bidnto' kwenche wzajniinto' le' chiya' kweyjichjle diiki bibi zak' na' gonlilall'le Chios, ben' yaa ben' banna', beena' ben yabana', yell-lioni, na' nisdona', na' yog' dii de xan yabana', lo yell-lioni, na' loo nisdona'. ¹⁶Kani'yi Chioza' bwialoze' che benecha' bengake' kon daa nazan che-gake'. ¹⁷Na' la'kzi bwialoze' ka bengake', bliile' legake' yel' wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

¹⁸Na' la'kzi Páblona' len Bernabéna' gollgake' ka', kani' goongakile' bi witgake' goonka' daa nan we'la'ogake' legake'.

¹⁹Na' bllin bal ben' Israelka' zaak Antioquíana' na' Icóniona', na' wlooyel'gake' ben' Lístraka' kwenche blligake' Páblona' yaja'. Na' daa gogkakile' ba witen', na'ch bñobgake'ne' jadixjgake'ne' cho'a yella'te. ²⁰Na' ben'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

²¹Na' lekzka' wdixjeegake' dill' wen dill' kob che Jesúza' yell Dérbena', na' ben' zan benlilall'gake' Jesúza'. Na'tech, biza'gake' bidegake' yell Lístrana',

Icóniona' na'ch Antioquíana'. ²²Na' to to yellka' gana' bidegake' btipgake' lall' ben'ka' ba chajle' che Jesúza' kwenche soachehgake' gonlilall'chgake'ne'. Na' gollgake' chiyal' yizo yizakicho bittez dii yen ile'icho kwenche gak lljzoalencho Chioza' gana' chnabi'e. ²³Na' to to yellka' wlejgake' to chop ben' koo lall' na'gake' ben'ka' ba nonlilall'gake' Jesúza'. Na' wzoagake' wbas' be'llwillgake' Chioza', na'ch bengake' legake' lall' na' Xancho Jesúza', beena' nonlilall'gake'.

Páblona' len Bernabéna' biyajgake' yell Antioquíana' daa llia gana' mbani Síriana'

²⁴Na' wde Páblona' len Bernabéna' gana' mbani Pisídiana' na' bllingake' gana' mbani Panfílina'. ²⁵Na' be'gake' cho'a xtil' Chioza' yell Pérgena'. Na'ch biza'gake' ziyajgake' yell Atáliana'. ²⁶Na' yell Atáliana' biyoogake' to loo barkw na' billingake' yell Antioquíana' gana' lle' ben'ka' bengake' legake' lo na' Chioza' kana' bsel'gake' legake' lljen-gake' llinna' daa ba biyoll' jengake'. ²⁷Na' ka billingake' yell Antioquíana', btop-gake' ben'ka' nonlilall' Jesúza', na' goll-gake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che ben'ka' bi nak ben' Israel kwenche benlilall'gake' Jesúza'. ²⁸Na' Páblona' len Bernabéna' bigaan-gake' ssha yell Antioquíana' len ben'ka' nonlilall' Jesúza'.

Bidopgake' Jerusalénna' na' be'gake' dill'

15 Shlak zoa Páblona' len Bernabéna' yell Antioquíana', bllin bal' ben' za' Judeana' na' wzologake' bli' bsdgakile' ben'ka' nonlilall' Jesúza' nan chiyal' gongake' ka na ley che dii Moiséza' na' sho'gake' sen' daa le circuncisión kwenche Chioza' wi'e

yel' mban chegake' zejli kani. ²Na' Páblona' len Bernabéna' gokdil'-lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche llje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

³Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka' nonlilall' Jesúza' ka ba wyanchga ben'ka' bi nak ben' Israel ba yoogake' lo xnez Chioza'. Na' ka beni ben'ki dga, le bibagakile'.

⁴Ka bllin ben'ki Jerusalénna', ben'ka' nonlilall' Jesúza' len ben'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'. ⁵Na' bal' fariseoka' nonlilall' Jesúza' wzolla'gake' na' wnagake'.

—Ben'ka' bi nak ben' Israel chonan byen sho'gake' sen' daa le circuncisión ka solo gonlilall'gake' Jesúza', na' chiyal' gongake' ka na ley che dii Moiséza'.

⁶Na' bdop bllag postlka' len ben'ka' ngoo lall' na'gake' ben'ka' nonlilall' Jesúza' kwenche wwiagake' naklə ka sho' xnezi dga. ⁷Ba gok ssha chdil' cho'a xtilleeka' ka wzolla' Pédróna' na' golle' legake'.

—Le', ben' bishaa, ba nezczile kana' wlej Chioza' nad' ladjleni kwenche llji'a dill' wen dill' kob che Jesúza' lao ben'ka' bi nak ben' Israel kwenche gonlilall'gake'ne'. ⁸Chioza', beena' nombi'e yichjlall'do' yog' ben', bli'e nan chlebe' ben'ka' bi nak ben' Israel daa bselee Espíritu Sántona' zoe' loo yichjlall'do'eka' kon ka bene' checho. ⁹Toz ka ba ben Chioza' checho na' che ben'ka', la' lekzka' ba biyib bixise' loo yichjlall'do'eka' daa

ba nonlilall'gake' Jesúza'. ¹⁰Na' ¿berache bi chajle'le daa ba ben Chioza'?, na' ¿biche cheenile gon ben'ka' bi nak ben' Israel diiki? La' ni cho' ni dii xozxto'choka' bin' sakicho gonchon. ¹¹Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹²Na' yoguee wzoagake' llizə bzenag-gake' shlak Páblona' len Bernabéna' be'gake' dill' ka ben Chioza' goklene' legake' bengake' ye'l' wakka' ladj ben'ka' bi nak ben' Israel. ¹³Na' ka biyoll be' Páblona' len Bernabéna' dill', na'ch wne Jacóbona', golle':

—Le' ben' bish', cheenid' wzenagle dga inia' le': ¹⁴Simón Pédróni ba bi'e dill' ka wzolo Chioza' wleje' ben' ladj ben'ka' bi nak ben' Israel kwenche gakgake' lall' nee. ¹⁵Na' dga gok ka' chidił-lebin daa bzej dii ben'ka' wdixjee daa goll Chioza' legake' kani'yi, gana' nan:

¹⁶Ka te dga, yiyed' na' wzoa' to xiin dia che dii Davina' inabi'e.

La'kzi ye'l' wñabia' che'na' nakan ka to yoo dii ba biyinj, wllin lla yichisa'n.

¹⁷Gon' dga kwenche yog' ben'ka' bin' gonlilall'gake' nad' yiyiljgake' nad', lente yog'loł ben'ka' bi nak ben' Israel, ben'ka' ba nak lall' na'.

¹⁸Kan' wna Xancho Chioza', beena' bza-jniile' ben'ka' diiki kani'teyi.

¹⁹'Na'chan nia' le', bi chiyal' ye'cho ben'ka' bi nak ben' Israel, ben'ka' ba nonlilall'gake' Chioza', gongake' dii bi chonan byen. ²⁰Kon wzejcho to yish ye'chogake' bich gaogake' ye'l' wawa' daa chllia ben' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool ben'. ²¹La' kani'teyi zoakzə ben' to to yell chzajni'gakile' ben' ley che dii Moiséza', na' lennan' ni chlabgake' naa

gana' chdop chllaggake' choe'lwillgake' Chioza' yog' lla sabd.

**Yisha' daa bsel'gake' lao
ben'ka' bi nak ben' Israel**

²²Na'ch postlka', na' yog' ben'ka' nonlilall' Jesúza' len ben'ka' ngoo lall' na' legake' bengake' toz dill' wlejgake' to chop ben' ladje'ka' kwenche shajlengake' Páblona' len Bernabéna' Antioquíana'. Na' wlejgake' Judas, beena' lekzka' lie' Barsabás, na' Sílaza', nakgake' ben' mbejlawin ladj ben'ka' nonlilall' Jesúza'. ²³Na' bsel'engake' ben'ki to yish dii bzejgake', na' ki choe'n dill':

“Le' ben' bish' na' le' ben' zannto', le' bi nakle ben' Israel na' zoale yell Antioquíana', na' doxen gana' mbani Síriana' na' Cilíciana', neto' postl na' ben'ki ngoo lall' na' ben'ka' nonlilall' Jesúza' Jerusalénni, na' yog' ben' bish'choki lle' ni, chwapnto' le' chiox. ²⁴Ba wnezinto' ba bchej to chop ben' ladjnto'ni bidgake' to bia'lall'zgake' gana' zoale, na' benllejgakile' le' daa wnagake' chiyal' sho'le sen daa le circuncisión, na' chiyal' gonle doxen ka na leya'. ²⁵Daan, ba bennto' toz dill' wlejnto' ben'ki chop ladjnto'ni zidwiagake' le'. Na' chsel'lennto' legake' Pábloni na' Bernabéni, ben' bish'choki le' chakicho, ²⁶ben'ki chzoa dii nxoll ye'l' mban che'ka' daa chongake' xshin Xancho Jesucristona'. ²⁷Na' chsel'nto' ben'ki le' Judas na' Silas, na' legake' wzajni'gakile' le' dga chzejnto' le'. ²⁸Na' wyazlall'nto' ka bzajni Espíritu Sántona' neto' bi wzoanto' le' gonle dii bi yizoile. Diikizə chakinto' chonan byen bi gonle: ²⁹Bi gaole ye'l' wawa' daa chllia ben' lao lwaa lsak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool ben'. Shi wzenagle diiki nannto' le', wenkzan chonle. Ka'tz nak dill'ki chzejnto' le'.”

³⁰ Na'ch ka bllin ben'ka' bse!gake' Antioquíana', na' btopgake' yog' ben'ka' nonlilall' Jesúza', na' be'gake' legake' yisha' daa nox'gake'. ³¹ Na' ka blabgake'n le bibagakile' ka dillaa choe'n. ³² Na' ka nak Júdaza' na' Sílaza', daa lezkza' nakgake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'. ³³ Na' biyoll wzoalengake' legake' shlo!l wen, na'ch ben'ka' nonlilall' Jesúza' Antioquíana' mbalaz b!laagake' legake' dill' na' biyajgake' kwit ben'ka' bse! legake'. ³⁴ Na' Sílaza' wyazlallee igaane' na'z. ³⁵ Páblona' na' Bernabéna' bigaangake' Antioquíana'. Na' len zan ben' yoblə bli' bsedchgakile' ben' cho'a xtill' Xancho Jesúza'.

Sto shii wyaj Páblona' yellka' gana' ba ji'e cho'a xtill' Chioza'

³⁶ Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawiacho nak chak che ben'ka' ba wyajle'.

³⁷ Na' Bernabéna' goklallee wche'gake' Juan, beena' lezkza' nsi'gake' Marcos. ³⁸ Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfliana', na' bich jenlene' legake' xshin Chioza'. ³⁹ Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'. ⁴⁰ Na' Páblona' wzee bchi'e Sílaza'. Na' ben'ka' lle' Antioquíana', ben'ka' nonlilall' Jesúza', wñabgakile' Xancho Chioza' gaklene' legake' gattezə shajgake'. ⁴¹ Na' Páblona' len Sílaza' wdegake' gana' mbani Síriana' na' Cilíciana' kwenche goklengake' ben'ka' nonlilall' Jesúza' wzoatip wzoashoshchgake'.

Timotewa' bene' txen Páblona' len Sílaza'

16 Na'ch Páblona' len Sílaza' bllingake' yell Dərbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakb' xiin to noolə Israel, na' nooli nonlilallee Jesúza', per xabaa nake' ben' griego. ² Na' ben' Lístraka' len ben' Icónioka' nonlilall' Jesúza' be'gake' dill' le wen nsa' cheb'. ³ Na' Páblona' wñabile'b' shajlem' legake', na' wlo'eb' señ daa le circuncisión kwenche bi gakzbani ben' Israelka' le'b', la' nezgakile' xabaa bi nake' ben' Israel. ⁴ Na' yog' yellka' gana' wdegake' be'lengake' ben'ka' nonlilall' Jesúza' dill' che diika' chiyal' gongake', diika' be' postlka' dill' kon ben'ka' ngoo lall' na'gake' ben'ka' nonlilall' Jesúza' yell Jerusalénna'. ⁵ Na'ch ben'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to ben' Macedonia chñabile'ne' shaje' lalle'na'

⁶ Páblona' len Sílaza' na' Timotewa' to wdegake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani Ásiana'. ⁷ Na' ka bllingake' gaoz yell-lío gana' le Mísia, wnalall'gake' shajgake' gana' mbani Bitíniana', na' lezkza' bi be' Espíritu Sántona' latj shajgake' na'. ⁸ Na'ch wdegake' yell-lío che Mísiana' bllintegake' yell Tróaza' daa llia cho'a nisdona'. ⁹ Na' lo yela' Chioza' bene' ka ble'do'i Páblona' to ben' byo, ben' Macedonia, zie' chat'yoile'ne', chi'ene': “Dagach Macedóniani kwenche gakleno' neto'.” ¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza'

cheenile' shajnto' llje'lennto' ben'ka' lle' na' dill' wen dill' kob che Jesúza'.

**Páblona' na' Sílaza'
wyajgake' Filípoza'**

¹¹ Na' yell Tróaza' wyoonto' barkwa' na' wyajnto' shličha gana' llia to yell-lio lo nido'na' daa le Samotracia. Na' betiyo bllinnto' to yell dii le Neápolis. ¹² Na' wza'nto' Neápoliza' wyajnto' yell Filípoza'. Nakan to yell ga lle' ben' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shon lla. ¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'llwillgake' Chioza'. Na' jche'nto' na', be'lennto' dill' noolka' bdop bllag. ¹⁴ Na' ladj noolka' len to ben' le Lidia. Nake' ben' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'. ¹⁵ Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesúza', li sho' na' yigaanle lillaa.

Na' bene' byen jagaannto' lille'na'.

¹⁶ Na' to shii ka zejnto' gana' choe'llwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chneyaab'. Na' nakb' to bi' ndoo lla yel chom' xshin ben', na' dii xen chon xama' gan daa chneyaab'. ¹⁷ Na'ch bi'ni wnob' Páblona' shlak zejlennto'ne', chosyaab' zillj, nab':

—Ben'kin chongake' xshin Chioza', beena' nak ben' choo ben' xen, na' chzajni'gakile' ben' nez li che Chioza' gana' sho'cho kwenche bi kwiayi'cho.

¹⁸ Na'ch kon ka' wnaab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' wnaabia' che Jesucristona' nia' li' bichej.

Na' lii bichejte dii xiwaa.

¹⁹ Na' ka gokbe'i xam'ka' bich bi mech gongake' gan, na'ch bex'gake' Páblona' len Sílaza' na' jwa'gake' legake' lao joschiska'. ²⁰ Na' ka bllinlengake' legake' lao joschiska', na' che'gake':

—Ben' Israelki chta chnegake' ben', lallchoni. ²¹ Na' chli' chsedgakile' ben' dii bi chiyal' goncho ni bi chiyal' wlebcho, cho' nakcho ben' Roma.

²² Na' ben' zan bdi'a na' wnegake' zban che Páblona' len Sílaza'. Na'ch joschiska' bchogbia'gake' wdingake' xe'ka' na' bet wdingake' legake'. ²³ Na' ka wde bet wdinchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'. ²⁴ Na' daa gollgake' beeni ka', wlo'e legake' bill' xyoote na' bni'e yen ni'eka' to lee kwag' dii nyidjgake'.

²⁵ Na' do ka chel Páblona' len Sílaza' choe'llwillgake' Chioza' na' cho'lgake' choe'la'ogake'ne', na' ben'ka' sto de lillyana' chzenaggake' ka chongake'.

²⁶ Na' tokonganzi wde to bedxo' xen wal na' bniban doxen lillyana'. Na' lii byaljten, na' gdenka' diika' nchejgake' ben'ka' de lillyana' tolazzin biyellgakan. ²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' ben'ka' de lillyana' ba billeshgake'. ²⁸ Na' Páblona' besyee, golle'ne':

—iBibi goni kwino'! Nikz lle' yog'nto'.

²⁹ Na'ch beena' chap lillyana' wnaabe' to yi' na' wyoodoe' jawie' gana' yoo Páblona' len Sílaza', na' lii bchek'te xibe'na' lawe'ka' do chxizze' daa le bllebe'. ³⁰ Na' lii bibejtie' legake' lillyana', na' chi'e:

—¿Le', ben'do', beran chiyal' gon' kwenche bi kwiayaa?

³¹ Na' gollgake'ne':

—Ben'lilalloo Xancho Jesucristona', li' na' do xiin' xoolo', kwenche yisle' le' na' bi kwiayi'le.

³²Na' be'lengake' le' na' beṅ'ka' zoa lille'na' cho'a xtil' Xancho Jesús'a'.
³³Na'ch beena' chap lillyana' wdibe' we'na' lliagake', la'kzi nakan waḷ'chel. Na' lezkza' yog'loṭtie' lii wchoategake' nisa'.
³⁴Na' biḱhi'e Páblona' len Sílaza' lille'na' na' bweej bwawe' legake'. Na' le chibayi beeni do xiṅ'xoole' daa ba nonlilall'gake' Chioza'.

³⁵Na' ka wyeeni', josḱhiska' bsel'gake' beṅ'jellgake' beena' chap lillyana' yisane' legake' kwenche yiyajgake'.
³⁶Na' beena' chap lillyana' golle' Páblona':

—Ba bsel' josḱhiska' beṅ'ki, na' nagake' ba de lsens yisan' le'. Na' wak yiyajle' naa, kochno bi goni le'.

³⁷Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' beṅ' na' wdixjz-gake' neto' lillyani. ¿Ana' naa cheenzgak-ile' yisangake' neto' do ngash'zə? Yidch kwingake' yibejgake' neto'.

³⁸Na' jayellgake' josḱhiska' daa goll Páblona' legake', na' josḱhiska' le' blleb-gake' ka wneezgakile' Páblona' len Sílaza' ndegake' kwent ka beṅ' Roma.
³⁹Na'ch wyaj josḱhiska' jaye'xengake' Páblona' len Sílaza' na' bibejgake' legake' lillyana', na' got'yogakile' legake' bich yigaan-gake' yella'.
⁴⁰Na' ka bichej Páblona' len Sílaza' lillyana', na' biyajgake' lill Lídiana' jawiagake' beṅ'ka' ba nonlilall' Jesús'a' na' btipchgake' lall'gake', na'tech biza'gake'.

Bta bṅe beṅ' malka' beṅ' Tesalónicaka'

17 Na' ka biza' Páblona' len Sílaza', wdegade' yell Anfípoliza' na' yell Apolóniana', na' bllingake' yell Tesalóni-cana' gana' zoa yona' gana' chdop chllag beṅ' Israelka' choe'lwillgake' Chioza'.
²Na' lo shon' xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtil' Chioza',
³bzajniile' legake'

Crístona', beena' wlej Chioza' inabi'e, be-nan byen biya dii wxak'zi'e na' wite', na' bibane' ladj beṅ' wetka'. Na' chi'e legake':

—Jesúza', beena' choe'len' le' xtilleena' naa, len' Crístona', beena' wlej Chioza' inabi'e.

⁴Na' baḷ' beṅ' Israelka' wyajle'gake' na' bengake' txen Páblona' len Sílaza', na' lezkza' zan beṅ' griegoka', beṅ'ka' ba choe'la'ogake' Chioza', wyajle'gake' che Jesús'a', na' lezkza' zan noolka' zakii.
⁵Na' beṅ' Israelka' bi wyajle', gokke'gakile' Páblona' len Sílaza', na' btopgake' beṅ' wdallagka' nak beṅ' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaza' kwenche gongake' legake' lo na' beṅ' yellka'.
⁶Na' daa bi zoa Páblona' len Sílaza' na', na'ch wdoyogake' Jasónna' na' zi to chop beṅ'ka' nonlilall' Jesús'a' na' jwa'gake' legake' lao josḱhiska'. Na' wnegake' zillj che'gake':

—Beṅ'ka' chda chbkgake' dii zed doxen yell-lioni ba bla'gake' yell che-choni.
⁷Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto beṅ' wṅabia' le Jesús.

⁸Na' beṅ' yellka' len josḱhis che'ka' bllaagake' na' gokllesh'gakile'.
⁹Na' wx-enlall' josḱhiska' bllia Jasónna' mech len beṅ'ka' nakgake'ne' txen, na'ch bisan-gake' legake'.

**Páblona' len Sílaza'
 wyajgake' Bereana'**

¹⁰Na' kon ka gol, beṅ'ka' nonli-lall' Jesús'a' bisa'dogake' Páblona' len Sílaza' kwenche yiyajgake' yell Bereana'. Na' ka bllingake' yella', lii wyaj-tegake' gana' chdop chllag beṅ' Israelka' choe'lwillgake' Chioza'.
¹¹Na' beṅ' Bereaka' nakchgake' beṅ' wench aga ka beṅ' Tesalónicaka', na' bibagak-ile' bzenaggake' daa bzajni Páblona'

len Sílaza' legake'. Na' yog' lla biyilj-gake' lee Cho'a Xtill' Chioza' shi nakan ka daa chli' chsedgakile' legake'. ¹² Na' zan ben' Israelka' zoa na' benlilall'gake' Jesúza' na' ka'kzə zan ben' griegoka', ka ben' byoka' na' ka noolka' zakii. ¹³ Na'ch ben' Israelka' lle' Tesalónicana', ben'ka' bi benlilall' Jesúza', ka wnez-gakile' Páblona' choe'lene' ben' Bereaka' xtill' Chioza', na'ch wyajgake' jata jane-gake' ben' yellka'. ¹⁴ Na' ben'ka' nonlilall' Jesúza' lii bsel'tegake' Páblona' cho'a nisdona'lə, na' Sílaza' len Timotewa' bigaangake' Bereana'zə. ¹⁵ Na' ben'ka' zelijen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Sílaza' len Timotewa' wtalall'gake' shaj-gake' gana' zoe'.

Páblona' zoe' yell Aténaza'

¹⁶ Na' shlak chbez Páblona' Sílaza' len Timotewa' yell Aténaza', le bllaa yichje' daa ble'ile' to ni to na' nzoa ben' Aténaska' diika' choe'la'ogake'. ¹⁷ Ni cheyi daan bzajniile' ben' Israelka' gana' chdop chllaggake' choe'lwillgake' Chioza', na' len zi xonj ben' griego. Na' lekzka' yog' lla wyaje' gana' chak yaana' gana' lle' lla' ben' na' be'lene' legake' dill'. ¹⁸ Na' bal' epicúreoka', ben'ka' chsedgake' daa bli' bsemi beena' wle Epicúreo, len bal' estóicoka', wzologake' wdił xtilleeka' len Páblona'. Na' bale' che':

—¿Beran naz beeni chshaljchgue'?

Na' zi bale' nagake':

—¿Aaga beenin zidyelene' cho' dil-laa daa nan chiyał' we'la'ocho sto chios yoblə?

Wnagake' ka' daa chyixje'i Páblona' legake' dill' wen dill' kob che' Jesúza', chi'e legake' bibane' ladj ben' wetka'. ¹⁹ Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' inezinto' bi dii koban chli' chsedilo'. ²⁰ La' ndantekzi nak dill'ki choo, na' cheeninto' inezinto' bi zejín.

²¹ La' yog' ben' Aténaska' na' lekzka' ben' zit'ka' zoa na', bichkzə bilə chon-gake', to chinozgake' bi dill' kob wzenag-gake' na' to xtillii daazə choe'gake' yog' lla.

²² Na'ch Páblona' wzie' ladje'ka' gana' nzi' Areópago, na' golle' legake':

—Le' ben' Atenas, chakbe'id' le chibaile choe'la'ole diika' noni chios chele. ²³ La' ba ble'id' yell cheleni to to latj gana' chgoole diika' balaan, na' ble'id' to ga da' to dill' dii na: “Che Chios, beena' kono nombia'.” Na' beena' chgoole balaan la'kzi bi nombia'lene', dill' che'nan' zidyelen' le' naa.

²⁴ 'Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ni'a na' ben'. ²⁵ Na' aga bi chyallji Chioza' dii inacho gak gon ben' yell-liona' che'. La' len' none' yeł' mban che yog'lolcho, na' none' bishbe checho, na' yog' bi dii de checho.

²⁶ 'Len' bxe bsile' to ben' yell-lío, na' yog'lolcho cho' nakcho xiin dia che beena' bxe bsile', na' le'kze' ba nllie' bia' bal' yiz soacho yell-lioni na' gana' soa to tocho. ²⁷ Na' bzoe' cho' yell-lioni kwenche yiyiljcho nakan goncho gombia'chone'. Na' dii li gal' gllin zellen Chioza' to tocho, ²⁸ la' len' chone' ka mbancho na' ka chzo chdacho. Kan' bzej bal' ben' sin' cheleka', ben'ka' wna-gake': “Nakcho xiin Chioza'.” ²⁹ Na' daa nakcho xiin Chioza', bi chiyał' gakicho nake' to ben' de or, de plat, de yaj, de yag, ka chaljlall' ben'ka' chongake' diiki. ³⁰ Kana'teyi Chioza' bwialoze' ben ben'ka' daa nazan chegake' yeł' bi chajni che'ka', per naanlla chone' byen yog'lol ben' lle' doxen yell-lioni yiyaj yilengakile'. ³¹ La' Chioza' ba bllie' bia' to lla gone' yeł' joschis che to to ben' lle' yell-lioni,

na' gone' che to toe' kon ka chidolee. Na' ba bliile' cho' beena' wleje' gon yel' joschisa' daa bilise'ne' ladj ben' wetka'.

³²Na' ka bengakile' wna Páblona' Chioza' chisbane' ben' ladj ben' wetka', bale' bxillgake', na' zi bale' gollgake'ne'.

—Sto llagalə wzenagnto' cho' cheyi dga choo dill'.

³³Na' biza' Páblona' gana' lle' ben'ka'.

³⁴Na' bal' ben' bengake'ne' txen na' benlilall'gake' Jesúza'. Na' ladje'ka' len to ben' lie' Dionisio, beena' len ben'ka' zakii chdop latja' nzi' Areópago, na' lekzka' sto noolə lie' Dámaris, na' sto chop ben' yoblə.

Biyaj Páblona' yell Coríntona'

18 Ka wde biza' Páblona' yell Aténaza', na' biyaje' yell Coríntona'. ²Na' ka billine' Coríntona' billague' to ben' Israel lie' Aquila. Na' beeni nake' ben' yell Ponto na' nool che'na' lie' Priscila. Zi' bllinzgake' Coríntona' biza'gake' gana' mbani Itáliana', la' Claudiona', ben' wñabia'na', bisheshe' yog' ben' Israelka' Rómana' gana' zoe'. Na' Páblona' jawie' legake', ³na' daa nlangake' toz ka llin, bigaanlene' legake', na' wdiagake' yid xa bayix'ka' daa chchingake' lwaa yoo. ⁴Na' yog' lla sabd, Páblona' chaje' gana' chdop chllag ben' Israelka' choe'llwillgake' Chioza', na' chzajniile' ben'ka' lle' na' xtill' Jesúza', ka ben' Israel na' ka ben' bi nak ben' Israel.

⁵Na' Sílaza' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' ben' Israelka' nan Jesúza' nake' Crístona', beena' wlej Chioza' inabi'e. ⁶Per wzololəgake' chakdił-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle'.

—Le'zkzan wlliyai' kwinle. Aga bi doł' gap' nad'. Na' naa lljali' lljasedid' ben'ka' bi nak ben' Israel.

⁷Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'llwillgake' Chioza'. ⁸Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllagake', na' do xiin xoole' wyajle'gake' che Xancho Jesúza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'. ⁹Na'ch to lle' bli'lao Xancho Jesúza' Páblona', na' golle'ne'.

—Bi illebo'. Be'ch xtillaana' lao ben'ki na' bi so' llizə. ¹⁰Nad' zoalen' li', na' bi wi'a latj no bi goni li', la' ben' zan zi' gom-bia'gake' nad' yelli.

¹¹Na' bigaan Páblona' Coríntona' twiz yoo gashj bli' bsdile' ben' cho'a xtill' Chioza'.

¹²Na' kana' chñabia' beena' le Galión gana' mbani Acáyana', ben' Israelka' gokgake' toz bex'gake' Páblona' na' bche'gake'ne' gana' chon Galiónna' yel' joschisa'. ¹³Na' che'gake' Galiónna'.

—Beeni chde' chgooyelee ben' kwenche we'la'ogake' Chioza' nlla'lə aga ka na ley che Rómana' daa chñabia' cho'.

¹⁴Ka nan ine Páblona', lii wñete Galiónna' ben' Israelka', chi'e:

—Ka nak dga chaole xya, shi bi doł' nap beeni wa shi bi xya wal bene', wak gon' yel' joschis chelena'. ¹⁵San shi chaole xya che dill' daa cho'e, na' daa chzetje' le ben', na' che ley chelena', bi nakan ka dii gon' yel' joschis cheyin. Le'zə, li' wwia naklə gonlen.

¹⁶Na' bibeje' legake' gana' chone' yel' joschisa'. ¹⁷Na'ch yog' ben' griegoka' bex'gake' Sósteneza', beena' chgoo xnezin cheyi diika' chon ben' Israelka' gana' chdop chllagake' choe'llwillgake'

Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' ben'ka' nonlilall' Jesúza' na' bizee kwenche shaje' gana' mbani Sfriana'. Na' Priscílana' len Aquílana' zejlengake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'. ¹⁹ Ka bllingake' yell Efesona', Páblona' bikwaanze' Priscílana' len Aquílana', na' wzee wyaje' gana' chdop chllag ben' Israelka' choe'lwllgake' Chioza' na' be'lene' ben'ka' dill'. ²⁰ Na' ben'ka' ndop nllag na', wñabgakile' Páblona' yigaanlenche' legake', na' Páblona' bi goonile'. ²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchzk' yidwia' le' shi Chioza' w'e latj.

Na'ch bizee Efesona' biyo'e to loo barkw. ²² Na' ka betje' barkwa' Cesareana', wyaje' Jerusalénna' jawape' chiox ben'ka' nonlilall' Jesúza'. Na' bizee biyaje' Antioquíana'. ²³ Na' bigaane' shloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' ben'ka' nonlilall' Jesúza'.

Apóloza' bi'e xtill' Chioza' Efesona'

²⁴ Na' do kana' bllin to ben' Israel Efesona' lie' Apolos, ben' golj yell Alejandríana'. Na' chak cho'e dill' lao lkwe' ben', na' je' nsede' Cho'a Xtill' Chioza'. ²⁵ Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bsemi Juanna' che daa chchoa ben' nisa'. ²⁶ Na' Apóloza' bi bllibe' bi'e dill' che Jesúza' gana' chdop chllag ben' Israelka' choe'lwllgake' Chioza'. Na' ka beni

Priscílana' len Aquílana' ka chli' chsedi Apóloza', na'ch biche'gake'ne' kwenche bzajni'chgakile'ne' kwasloj ka nak xnez Chioza'. ²⁷ Ka goki Apóloza' shaje' gana' mbani Acáyana', ben'ka' nonlilall' Jesúza' btipgake' lallee na' bzejgake' to yish dii bexee che ben'ka' nonlilall' Jesúza' na', kwenche wlebgake'ne'. Na' ka blline', je' goklene' ben'ka' ba biyesh'lallii Chioza' kwenche nonlilall'gake' Jesúza'. ²⁸ Na' bli' bsemi ben' nan klelan chajni' ben' Israelka' che Jesúza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na' Jesúza' nake' Crístona', beena' wsel' Chioza' inabi'e.

Ka wzoa Páblona' Efesona'

19 Na' shlak wzoa Apóloza' Coríntona', Páblona' wdie' to to yellka' llia ladj yaa yaoka' gana' mbani Galáciana' na' Ásiana', na' bllintie' Efesona' gana' jadi'e bal ben' ba nonlilall' Jesúza'. ² Na' wñabile' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonlilall'le Jesúza'?

Na' ben'ka' gollgake'ne':

—Ni bi nezinto' shi zoa Espíritu Sántona' beena' no' ka'.

³ Na'ch Páblona' wizñabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni' dii Juanna'.

⁴ Na'ch goll Páblona' legake':

—Dii Juanna' bzajniile' ben' chiya' choagake' nisa' daa wli'n ba biyaj bilengakile' na' lekzka' golle' legake' chiya' gonlilall'gake' beena' zi' yid, na' len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'. ⁶ Na' ka bxo'a na' Páblona' yichje'ka', Espíritu Sántona' wyo'e loo yichjlall'do'eka' na' wnegake' wde wdeli dill' na' lekzka' wdi'xje'gake'

dill' daa goll Chioza' legake'. ⁷Na' ben'ki gok cheyin ka' nakgake' ka do shllin.

⁸Na' wzoa Páblona' Éfesona' shon beo' bli' bsdile' ben' Israelka' gana' chdop chllaggake' choe'llwillgake' Chioza' na' bi bllebe'. Na' be'lenche' ben'ka' dill' kwenche wyajni'gakile' ka chnabia' Chioza' loo yichjlall'do' ben'ka' nonlilall'gake'ne'. ⁹Na' bal' ben'ka' nak ben' lall'do' wal aga goongakile' shajle'gake', na' biya dii wngake' lao lkwe' ben' che nez li nez shao' che Jesucristona'. Na'ch biza' Páblona' kwite'ka', na' bichi'e ben'ka' ba nonlilall' Jesúsza', wyajlene' legake' lill to ben' le Tirano dii nak ka yoo skwel gana' chdi'a ben', na' bli' bsdchile' legake' yog' lla. ¹⁰Gokte chop yiz bli' bsdile' legake', na' yog'lol' ben'ka' lle' doxen Ásiana' bengakile' xtill' Xancho Jesúsza', ka ben' Israel ka ben' griego. ¹¹Na' Chioza' bchine' Páblona' kwenche bene' ye! wak xen dii benan ka bibanchgayi ben'. ¹²Na' axt no bachyichj, no lech' chjatigake'ne' na' chiyox'gake'n ga de ben' bi shao' na' chiyakgakile', na' lekzka' chichej dii xiwaa yoo ben'.

¹³Na' bal' ben' Israelka' chdagake' to to yell chibejgake' dii xiw'ka' yoo ben', na' chakgakile' wchingake' le Xancho Jesúsza' kwenche yibejgake'n. Na' che'gake'n:

—Kon ye! wak che Jesúsza', beena' choe' Páblona' xtillena', nannto' le', li yichej.

¹⁴Ka' ben gall xiin to ben' Israel le Esceva, beena' nak to wñabia' che bxo'zka'.

¹⁵Na' ka nan yibejgake' dii xiwaa, na' gollan legake':

—Nombi'a Jesúsza', na' lekzka' Páblona', per le', bi nezid' no le'.

¹⁶Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'. ¹⁷Na' yog' ben'ka' zoa Éfesona', ka ben'

Israel ka ben' bi nak ben' Israel, wñez-gakile' ka gok che ben'ka', na' le bllebgake' na' wloochgake' Xancho Jesúsza' balaan.

¹⁸Na' zan ben'ka' ba nonlilall'gake' Jesúsza' jaxoadol'gake' lao lkwe' ben' ka nak dii malka' ba bengake'. ¹⁹Na' zan ben'ka' blan ye! willa'na' jwa'gake' libr che'ka' daa bsdgake' na' bzeygake'n lao yog' ben'ka'. Na' bengake' kwent ka'k' zak' librka' bzeygake', na' bllinan ka do shiyona mil mech plat. ²⁰Ka' gok blliljch xtill' Xancho Jesúsza' na' ben' zanch benlilall'gake'ne' daa gokbe'gakile' xtill' Chioza' nsa'n ye! wak xen.

²¹Na' ka wde gok yog' diiki, Páblona' bchoglalee shaje' lljawie' ben'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiyal' shaa Rómána'." ²²Na'ch bselee Timotewa' na' Erástona' Macedóniana', ben'ki chop chaklengake'ne', na' le' bi-gaane' Ásiana' zi shloll wen.

Bta bñe Demétriona' ben' Éfesoka'

²³Na' got' to dii zed wal Éfesona' daa chli' chsedi Páblona' che nez li nez shao' che Jesucristona'. ²⁴Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len ben'ka' chonlengake'ne' llinna'. ²⁵Na' btope' ben'ka' chonlene' llinna' na' yog' ben'ka' nlangake' llin ka daa, golle' legake':

—Nezile llin dga nlancho dii xen chk-waanan checho. ²⁶Na' ba chen chle'ile ka chon beena' le Pablo, chde' chzajniile' ben' wllal' chechoki na' doxen gani mbani Ásiani, chi'e aga bi zakii lwaa lsak' dii chon ben' kwenche we'la'ozgake'n. Na' ben' zan ba chzenaggake' che'. ²⁷Na' nx-oll bich too diiki choncho, na' lekzka' nx-oll bich seyi che yoodo' gana' zoa xnax

Diana chechona', beena' nak ben' choo ben' xen. Na' beeni choe'la'o yog'zə ben' lle' gani mbani Ásiani na' ben' lle' doxen yell-lioni, gongakile'ne' ka to ben' bibi zakii.

²⁸ Ka goll Demétriona' legake' ka', le bllaagake' na' besyaagake', nagake':

—¡Ben' choo ben' xen nak xnax Diana chechona', cho' ben' Éfeso!

²⁹ Na' yog'lole' gokgake' toz, wlekgake' dii lchix wal yella', na' bex'gake' chop ben' Macedonia, toe' le Gayo, na' stoe' le Aristarco, ben'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'.

³⁰ Na' Páblona' gokile' sho'e ladj ben'ka' ndop nllag na' kwenche nan we'lene' legake' dill', per ben'ka' nonlilall' Jesúza' aga be'gake' latj sho'e. ³¹ Na' lekzka' ladj joschis che ben' Ásiaka' len ben' nllagui Páblona', na' bsel'gake' rson, che'gake'ne':

—Ben' goklen, bi shoo gana' lle' ben'ka'.

³² Na' ben'ka' ndop nllag na' chosyaagake', wde wdeli dii na to toe'. Na' zan ben'ka' len ladje'ka' ni bi nezgakile' biche lle'zgake' na'. ³³ Na' bal' ben' Israelka' bllig'gake' Alejándrona' lao ben'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'. ³⁴ Na' ka ble'gakile'ne' na' gokbe'gakile' nan ben' Israelan, na'ch bizologake' chosyaagake', nagake':

—¡Ben' choo ben' xen nak xnax Diana chechona', cho' ben' Éfeso!

Ka do chop gor besyaagake' che'gake' ka'.

³⁵ Na'ch beena' nak sikriban che yella' bzo'e legake' llizə. Na'ch golle' legake':

—Le' ben' wlall, yog' ben' yell-lío nezgakile' cho' ben' Éfeso chido'cho gap wwiacho yoodo' che xnax Diana chechona', beena' nak ben' choo ben' xen. Na' nezgakile' lwaa lsakeena' za'n yabalə, ³⁶ na' ni to kono gak ina aga kan'

nakan. Na' li soa llizə kwenche bi gonle to dii bi chiyal' gonle. ³⁷ Ka nak ben'ki ba bidwale ni, bi inacho ba wlangake' bi de loo yoodo' chechona', ni bi inacho ba wnegake' zban che xnax Diana chechona'. ³⁸ Na' shi Demétriona' na' ben'ka' chonlengake'ne' llinna' de dii chak chegake' kon nottezə ben', daan chi' ben'ka' chchoglogake' che ben' na' wak shajgake' lawe'ka' kwenche gongake' yel' joschis che'ka'. ³⁹ Na' shi bichlə dii cheenile gak, chiyal' yitopcho yog'lo' ben' yell na' we'chon dill'. ⁴⁰ La' ka nak dga gok naa, nxoll ina ben' to cho'zan chta chnecho ben' yell, na' zbera inacho shi ba chnabgakile' cho' che dga ba gok naa?

⁴¹ Ka wde golle' legake' ka', na' bisheshe' legake'.

Biyaj Páblona' Macedóniana' na' Gréciana'

20 Na' ka bibe'lli daa ben ben' Éfeso' soka', na'ch gox Páblona' ben'ka' nonlilall' Jesúza' na' be'lene' legake' to chop dill' dii gaklenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'. ² Na' bidie' to to yellka' lliia Macedóniana' na' be'lene' ben'ka' nonlilall' Jesúza' zan dill' dii btipan lall'gake'. Na' biyolla' billine' Gréciana', ³ na' shon' beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchoglallee bigwee nez kon ni'aze ziyaje' Macedóniana'lə. ⁴ Na' ben' zan zejlengake' Páblona' Ásiana'. Ladje'ka' len Sópatera' xiin Pírrona', ben' Bereana'; na' Aristárcona' len Segúndona', ben' Tesalónicaka'; na' Gáyona', ben' Dérbena'; Timotewa', na'ch Tíquiconá' len Trófimona', ben' Ásiaka'. ⁵ Na' yog' ben'ki wlialogake' laonto'na', na' wlezgake' neto' yell Tróaza'. ⁶ Na' ka wde lni Paskwa' kat' chaogake' yetxtila' daa bi nchix levadúrana', na'ch biza'nto' yell

Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez ben'ka' neto'. Na' wzoanto' na' gall lla.

Billin Páblona' yell Tróaza'

⁷Na' ka bllin lla dmiwa', lla nech che xmanna', bdop bllagnto' weej wdaonto' txen len ben'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, axt chelch weelo be'lene' legake' dill'. ⁸Na' ndop nllagnto' to loo yoo dii llia shkvia cha'lə, na' nakan bido yi'zi. ⁹Na' to bi' wew' lliab' cho'a ventanna', na' leb' Eutico. Na' daa bshaljlen Páblona' ben'ka' ssha, bex'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'. ¹⁰Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' ben'ka':

—Bi illeble; mbankzba'n.

¹¹Na'ch biyep Páblona' dii yoblə, bx-oxje' yetxtila' na' wdaogake'n. Na'tech bizoloe' cho'lene' legake' dill' ni ka wyee'ni'teyi. Na'ch bizee. ¹²Na' ka billesh ben'ka', chibagakile' biche'gake' bi' we-waa shi'a shbam'.

Biza' Páblona' Tróaza'

¹³Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'. ¹⁴Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. ¹⁵Na'ch biza'nto' Mítílenena', na' betiyo bidento' gaozə yell-lío Quíona' daa llia lo nisdona'. Na' gok lillj billinnto' yell-lío Sámzoza' daa llia lo nisdona', na' llana' sto wyajchnto' yell Milétona'. ¹⁶Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' lni Pentecostéza'.

Billag Páblona' ben'ka' ngoo lo na'gake' ben'ka' nonlilall' Jesúza' Éfesona'

¹⁷Na' ka zoanto' Milétona', Páblona' bselee rson na' goxe' ben'ka' ngoo lo na'gake' ben'ka' nonlilall' Jesúza' Éfesona'. ¹⁸Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani. ¹⁹Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' ben' Israelka' nad'. ²⁰Na' aga ni che ka' bsan' bich wnia' le' daa chiya' inezile, san bli' bsdchzkzid' le' gana' chdop chllagle na' ka'kzə lill to tole. ²¹Ka ben' Israel ka ben' bi nak ben' Israel, be'lengakee dill' nan chiya' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'. ²²Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'. ²³Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'. ²⁴Na' aga bi chakid' cheyi diika' gak cha', la' aga llialo yel' mban cha'ni, san lliarote yiyoll gon' yog'lo' daa ben Xancho Jesúza' lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

²⁵Na' ba bzajniid' le' ka chon Chioza' chnabi'e loo yichjlall'do' ben' chonlilalleene', na' naa ni stole le' bich ile'ile nad' yell-lioni. ²⁶Daan nia' le' naa, aga bi dol' nap' shi nole kwiayi'. ²⁷La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'. ²⁸Na' li wsak', li gap wwia ben'ka' nakle txen, la' Espíritu Sántona' wleje' le' kwenche gap wwiale ben'ka' nonlilall' Xancho Jesúza', ben'ka' biya'o bizi'lene' xchene'na' daa blalje' lee yag cruza'. ²⁹La' nezid' kat' bich soalen' le' na' yid ben' gonllejgakile' le' kwenche kwey yichjle daa nonlilall'le

Jesúza'. Gongake' ka ba znia, ba chjatao xil'do che ben'. ³⁰Na' ladjlena' ichej ben' wli' wsedile' le' daa bi nak shli kwenche gonlene' txen. ³¹Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

³²Na' naa, chon' le' lo na' Chioza' len cho'a xtilleena' daa na le chakile' cho'. La' lennan' napan ye' wak kwenche gaklennan le' soachechle gonlilall'lene'. Na' ka lljazoalene' txen len yog' ben' nakgake' lall' nee. ³³Nezkzile bibin' selalla chele, ni xmechle, ni xalaanle, ni bichlè dii naple. ³⁴Na' nezkzile ni'a na'ni benlen' llin kwenche bllelid' bi dii byalljlenid' ben'ki chonlengake' nad' xshin Chioza'. ³⁵Ben' llinna' kwenche bliid' le' ka chiya' gakencho ben' kat' bi chyalljgakile'. La' chiya' lljadinicho xtill' Xancho Jesúza' kana' wne': "Mbalazch soacho shi we'cho ben' bi we'chone', aga ka daa ikaacho bi dii gone' cho'."

³⁶Na' ka biyoll be'len Páblona' legake' dill', na'ch bchek' xibe'ka' be'llwillgake' Chioza'. ³⁷Na' yog'gake' wchell, na' wdel'gake' Páblona' na' bnopgake'ne'. ³⁸Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

Biyaj Páblona' Jerusalénna'

21 Na' ka bilaanto' ben' Éfesoka', na'ch biyoonto' loo barkwa' ziyajnto' shlichá yell-lío Coza' daa llia lo nisdona', na' betiyo billinnto' yell-lío Ródaza' daa llia lo nisdona', na' biza'nto' billinnto' yell Pátarana'. ²Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. ³Na' ka zejnto' loo barkwa' ble'into' yell-lío Chíprena' daa llia lo nisdona' na' to wdeznto' shlaana'lè zejnto' yell Tírona' daa llia gana' mbani Síriana'. Na' ka billin barkwa' Tírona',

biletjgake' yoana' noa'n na' biyetjnto'. ⁴Na' jadiljnto' ben'ka' nonlilall' Jesúza' na' bigaanlennto' legake' to xman. Na' Espíritu Sántona' golle' legake' bi chiya' yiyaj Páblona' Jerusalénna'. ⁵Na' ka gok to xman biza'nto'. Na' yog' ben'ka' ba nonlilall' Jesúza' yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a nisdona', bchek' xibnto' be'llwillnto' Chioza'. ⁶Na'ch bilaa ljwellnto' dill', na' biyoonto' loo barkwa', na' ben'ka' biyajgake' lill che chegake'.

⁷Na' biza'nto' Tírona' billinnto' yell Tolemáidana', na' bwapnto' chiox ben'ka' nonlilall' Jesúza' na', na' bigaanlennto' legake' shlla. ⁸Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen ben'ka' gall chaklengake' postlka', na' bigaannto' lille'na'. ⁹Na' zoa tap bi' nool wew' che', na' chyixje'gakb' daa che' Chioza' legakb'. ¹⁰Na' ka ba gok shon tap lla zoanto' lille'na', na' bla' to ben' Judea lie' Ágabo, ben' chyixjee daa che' Chioza' le'. ¹¹Bidwie' neto' na' wñabe' xpachlee Páblona' na' bichej ni'a na' kwine', na' chi'e:

—Ba bzajni Espíritu Sántona' nad' ne' ben' wlalka' lle' Jerusalénna' wchejgake' ni'a na' xan bachleeni ka ba nchej ni'a na'ni, na' gongake'ne' lo na' ben'ka' bi nak ben' Israel.

¹²Na' ka beninto' wna Ágabona' ka', neto' len ben' Cesareka' got'yointo' Páblona' bi yiyaje' Jerusalénna'. ¹³Na' Páblona' wne' neto':

—Bi kwell-le cha', bi gonle ka gakyeshid'. Zoakz' wti' diika', aga toz daa wchejgake' nad', san wakte witgake' nad' daa nonlilallaa Xancho Jesucrístona'.

¹⁴Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesúza'.

¹⁵ Na' ka wde, bisini'a cħento' kwenĉhe biza'nto' ziyajnto' Jerusalénna'. ¹⁶ Na' baĭ ben' Cesareaka' nonĭlall' Jesúza' wza'lengake' neto'. Na' bĉhe'gake' neto' lill to ben' le Mnasón, gana' yigaannto'. Beení nake' ben' Ćhipre na' ssha ba gok nonĭlallee Jesúza'.

**Páblona' jawie'
Jacóbona' Jerusalénna'**

¹⁷ Na' ka billinnto' Jerusalénna', le ĉhibayi ben'ka' naknto' txen nonĭlall'nto' Jesúza'. ¹⁸ Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' ben'ka' ngoo lo na'gake' ben'ka' nonĭlall' Jesúza' Jerusalénna'. ¹⁹ Na' biyoll bwap Páblona' legake' ĉhiox, na' golle' legake' to to diika' goklen Ćhioza' le' daa bene' ladj ben'ka' bi nak ben' Israel. ²⁰ Na' ka wde bzenaggake' diika' wna Páblona', be'la'ogake' Ćhioza'. Na'ch gollgake'ne':

—Li', ben' bish', nezkzilo' ben' zan wal inleeb ben' Israelka' ba nonĭlall'gake' Jesúza', na' yoguee nagake' chonan byen goncho daa na leya'. ²¹ Na' ba bengakile' rson ka chono', na' nagake' ĉhazjniilo' yog' ben' Israelka' lle' yell zit'ka' bich gongake' ka na ley ĉhe dii Moiséza', ni bi koo bi' ĉe'ka' sen' daa le circuncióń, na' bich gongake' daa yoolocho choncho. ²² ĆNakra gonchon, lla? La' lii idop illagte ben' kat' inezgakile' ba biyedó'. ²³ Waklja gonon' ki: Ladjnto'ni zoa tap ben' nĉhebe' to dii nĉhebe' lao Ćhioza', na' chonan byen wdelazgake' daa nĉhebgake'. ²⁴ Ćhial' wĉhi'o' legake' yoodo'na' kwenĉhe txen yixi yiyechle. Na' li' ĉhixjo' daa ĉhial' ĉhixjgake' kwenĉhe gak wshib yĉhje'ka' ka nllia leya' bia'. Na' shi gono' ka', yog' ben' inezgakile' bi nakan ka nagake' ĉho', na' gakbe'gakile' lekzka' ĉhzenago' daa na leya'. ²⁵ Na' ka nak ben'ka' bi nak ben' Israel na' ba nonĭlall'gake' Jesúza', ba bzejnto' legake' bi kwe' yĉhjjgake' diika' ze-

jlencho ĉho' ben' Israel. Na' gollnto'gake' daa ĉhial' gongake': bi gaogake' yeĭ wao daa ba bllia ben' lao lwaa lsak' daa ĉhoe'la'ogake', na' bi gaogake' xĉhen bayixaa, ni xpel' bana' bi wlalj xĉhema', na' bi inelenzgake' xiĭn xool ben'.

Bex'gake' Páblona' yoodo'na'

²⁶ Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenĉhe wzenile' bĉozka' bi llan sheelo daa ba nĉhebgake' kwenĉhe ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

²⁷ Na' ba zoa iza' gall lla chongake' daa ĉhial' gongake' kwenĉhe yixi yiyechgake', na' baĭ ben' Israelka', ben'ka' zaak Asiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenĉhe bex'gake' Páblona'. ²⁸ Na' wnegake' zilljə ĉhe'gake':

—Le', ben' Israel, ĭi gaklen neto'. Beení ĉhde' doxen ĉhli' ĉhsedile' ben' kwenĉhe gakzbangakile' ĉho' ben' Israel, len ley ĉĉechona' na' yoodo' ĉĉechoni. Na' naa sto dii zban wal ba bizone', ba wlo'e to ĉhop ben' griego yoodo' ĉĉechoni, la' bi de lsens sho' ben'ki lill xĭatj Ćhios ĉĉechona'.

²⁹ Wnagake' ka' daa ba ble'gakile' Trófimona', to ben' yell Éfeso, ĉhdalene' Páblona' txen Jerusalénna', na' gokgakile' lekzka' bĉhe' Páblona'ne' yoodo'na'.

³⁰ Yog'z ben' lle' yella' bllesh bĉheengake' zejdogake'. Na'ch bigoyogake' Páblona' axt de xneze' bibejgake'ne' yoodo'na', na' lii bsejtegake' puertka'. ³¹ Na' ba llagdia'gake' Páblona' ĉheengakile' wittekgake'ne' ka bllin dillaa lao ben' wñabia' ĉhe soldadka' nan ĉhak dane nllib doxen yell Jerusalénna'. ³² Na' lii btoptie' soldadka' na' ben'ka' ngoo lall' na' legake' na' wyajdogake' gana' lle' ben'ka'. Na' ben'ka' ĉhit Páblona' ka ble'gakile' ben' wñabia'na' len

soldad che'ka', na'ch bsangake' bich bet wdingake'ne'. ³³Na'ch jabig' ben' wñabia'na', na' bexee Páblona' na' bene' mandad bchejgake'ne' chop gden. Na'ch wñabile' ben'ka' no beena' na' bin bene'. ³⁴Na' ben'ka' kon chosyaagake' na' chiya dii na to toe', na' bi wyajni' ben' wñabia'na' daa zi'te chongake' sshag. Na'ch bene' mandad biche' soldadka' Páblona' gana' zoagake'. ³⁵Na' ka bllingake' cho'a shkwiaka' lle' cho'a lill soldadka' benan byen blen soldadka' Páblona' daa zej ben' Israelka' cheengakile' wñizgake'ne'. ³⁶Na' ben' zan nogake'ne' chosyaagake', che'gake':

—iLii wittegue'!

Páblona' cho'e dill' lao ben' Israelka'

³⁷Na' ka ba zoa lljloogake' Páblona' gana' zoa lill soldadka', na'ch golle' ben' wñabia'na':

—¿Awak we'len' li' to chop cho'a dill'?

Na' ben' wñabia'na' golle'ne':

—¿Achako' dill' griegona'? ³⁸¿Aaga lin' ben' Egíptona' beena' wzoshyi' ben' wñabia'ka' kani batzə, na' bchi'e tapa mil ben' wen xyaka' latja' gana' bibi chashj chleb?

³⁹Na'ch goll Páblona'ne':

—Aga le' nad'. Nad' nak' to ben' Israel, ben' yell Tarso dii nak to yell xen gana' mbani Cilíciana'. Ben goklen be' latj we'len' ben'ki dill'.

⁴⁰Na' ben' wñabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwenche soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak xtill'gake', chi'e:

22—Le' ben' bish', na' le' ben' gol, li wzenag dill' cha'ni wi'a.

²Na' ben'ka', ka bengakile' chne Páblona' dill' hebrewa' na' wlle'gake' llizə. Na' Páblona' chi'e legake':

³—Nad' nak' ben' Israel na' golj' yell Társona' gana' mbani Cilíciana', per bgol' Jerusalénni, na' bli' bsedi maestro

Gamaliela' nad' kwaslol' ka na ley che dii xozxto'choka', na' toshiizi choe'l-lallaa chon' ka chazlall' Chioza' do yichj do lallaa, ka chonkzle le' ñaanlla. ⁴Na' bchi' bsakaa ben'ka' ba wyoo lo nez li nez shao' che Jesucristona' na' goklallaa guetgake'. Na' bexaa ka nool ka ben' byo, na' wlo'a legake' lillyana'. ⁵Beena' nak bəoz choo bəoz xen na' yog' ben' golka' chñabia' ben' Israelka' nezgakile' ka ben'. Na' legake' bengake' nad' yish daa bexaa ka wzaa zyaa yell Damáscona', gokid' lljexaa yog'lol' ben'ka' nogake' xtill' Jesucristona' na' yiche'gakee Jerusalénni kwenche sak'zi'gake'.

Be' Páblona' dill' ka gok ben'jilallee Jesúza'

(Hch. 9:1-19; 26:12-18)

⁶Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa. ⁷Na' to wzoatishz' lo yona'. Na'ch benid' shii to ben' wne' nad': “Saulo, Saulo, ¿berache chchi' chsak'zo' nad'?” ⁸Na' wñabidee, chepee: “¿No li, ben'?” Na' wne': “Nadaan Jesús, ben' Nazareta', beena' chchi' chsakoo.” ⁹Na' ben'ka' zyaalen' txen ble'gakile' yi'na' daa wyalj na' bllebgake', per aga bengakile' daa wna beena' nad'. ¹⁰Na'ch goshee: “¿Beran chiyal' gon', Xan'?” Na' wne' nad': “Biyas na' wyaj Damáscona', na' na' inagake' li' yog' daa chiyal' gono'.” ¹¹Na' beeni' wala' bchołan nad', na' ben'ka' zyaalen' txen biyo'gake' na'na' na' bche'gake' nad' Damáscona'.

¹²Na' Damáscona' zoa to ben' le Ananías, na' zoe' chone' yog' daa na leya', na' yog' ben' Israelka' zoa Damáscona' nagake' che' nake' to ben' chon dii wen. ¹³Na' Ananíaza' bide' bidwie' nad', na' ka blee, wne' nad': “Saulo, ben' bish', ñaa yile'ilo' sto shii.” Na' kate wne' ka', lii bile'teid', na'ch gok ble'idee. ¹⁴Na'ch wne' nad': “Chioza',

beena' be'la'o dii xoxxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak liizelozu beṇ' wen, na' benteilo' kwine'n ba bshaljlene' li'. ¹⁵ Na' li' wi'o xtilleena' doxen yell-lioni, na' we'leno' beṇ' dill' yog'loḷ di-ika' ba ben ble'ilo'. ¹⁶ Na' naa, bibi wsej willon choaatego' nisa' na' wṇabi Xancho Jesúza' yisol yinite' saaxya cho'ka'."

¹⁷ Na' ka biyed' Jerusalénni, wyaa yoodo'na' je'lwill' Chioza', na' Chioza' bene' ka ble'do'id'. ¹⁸ Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtillaana' daa we'lengako'ne'." ¹⁹ Na'ch chepee: "Xan', legake' nezgake' ile' ka wya' to to gana' chdop chllagnto' choe'lwillnto' Chioza' jexaa beṇ'ka' nonlilall' li', na' bet wdingakee na' bi'che'gakee ni, bsejgakee lillyana'. ²⁰ Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa beṇ'ka' bet le'." ²¹ Na' Jesúza', beena' nak Xan', wne' nad': "Wloo nez, wyaj yell zit'ka' na' je'len beṇ'ka' bi nak beṇ' Israel xtillaana'."

Páblona' goke' lo na' beṇ' wṇabia' che soldadka'

²² Zeelo diika'z bzenaggake' che Páblona', na'ch wzolo chosyaagake' che'gake':

—¡Bisol binittegue' yell-lioni! ¡Aga chiyaḷ' soach ka le'!

²³ Na' bikzə bsangake' chosyaagake' daa le chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə. ²⁴ Na' beṇ' wṇabia' che soldadka' bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa beṇ'ka' le'. ²⁵ Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to beṇ' nde kwent Rómana' la'kzi bin' yiyiljyoll-le bin bene'?

²⁶ Na' ka goll Páblona' xan soldadka' ka', na'ch jelle' beṇ' wṇabia' che'ka':

—Wsak'shkilo', nde beeni kwent yell Rómana', na.

²⁷ Na' beṇ' wṇabia' che soldadka' wyaje' kwit Páblona' na' wṇabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

²⁸ Na'ch beṇ' wṇabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

²⁹ Na' daa goll Páblona' ka', beṇ'ka' nan wit chingake'ne' lii bikwastegake' kwite'na'. Na' axt beena' chṇabia' soldadka', ka gokbe'ile' Páblona' ndie' kwent yell Rómana', le bllebe' daa bene' mandad bchejgake'ne' gdenka'.

Bzegake' Páblona' lao beṇ'ka' chṇabia' beṇ' Israelka'

³⁰ Na' betiyo, beṇ' wṇabia' che soldadka' btope' b'xozka' chṇabia' na' yog'loḷ beṇ'ka' chṇabia' beṇ' Israelka'. Na' bselle' gdenka' daa nchej ni'a na' Páblona', na' wleje'ne' bzie'ne' lao beṇ'ka' daa cheenile' inezile' bi'che' chao beṇ' Israelka' xya che'.

23 Na'ch Páblona' bwie' beṇ'ka' chṇabia' beṇ' Israelka' na' golle' legake':

—Le' beṇ' bish', nezi yichjlall'dawaani axt naa chon' daa chazlall' Chioza'.

² Na'ch Ananíaza', beena' nak b'xoz choo b'xoz xen, golle' beṇ'ka' ze kwit Páblona' kwall'gake' cho'ena'. ³ Na' Páblona' golle'ne':

—¡Chioza' wit chine' li', wxiye'! Li' chi'oni kwenche yiya yiyiljo' nad' kon ka

na leya', per chyishjo' daa na leya' daa beno' mandad wllall'gake' cho'ani.

⁴Na'ch ben'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak b̄xoz choo b̄xen che Chioza'?

⁵Na'ch Páblona' golle' legake':

—Le' ben' bish', bi nezid' shi len' b̄xoz choo b̄xoz xenna'. She'l'ka' nezid', aga goshee ka', la' Cho'a Xtill' Chioza' nan: “Bi inio' zban to ben' w̄nabia' che yell cho'na'.”

⁶Na' Páblona' gokbe'ile' ben'ka' ch̄nabia' nakgake' chop kwenl̄ə. Bale' nak txen saduceoka' na' bale' nak txen fariseoka'. Na'ch w̄nie' zillj chi'e:

—Le' ben' bish', nad' nak' fariseo na' naktia' xiin fariseo. Na' chaole xya cha' daa non' lez yiban ben' wetka'.

⁷Ka goll Páblona' ka' na' gok to wishesh wal ladj fariseoka' len saduceoka'. Na' gokgake' chopl̄ə. ⁸La' saduceoka' nagake' aga wibanch ben' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban ben' wetka'. ⁹Na' yog'gake' besyaa-gake' choe'gake' wde wdeli dill'. Na'ch wzolla' bal' ben'ka' chli' chsedi leya' nakgake' txen fariseoka', na' che'gake':

—Ni to dii mal bin' gon beeni. Shera shi to ben' bi gak ile'icho wa to anjlan' ba w̄nie' le'. Bi chiyal' soshi'cho Chioza'.

¹⁰Na' daa zi'tel̄ə gokdił-len ljjwell ben'ka', bxolli ben' w̄nabia' che soldadka' wxoxj wtingake' Páblona'. Na'ch w̄nie' soldadka' yibejgake' Páblona' ladje'ka' na' lljaloogake'ne' dii yobl̄ə gana' zoa lille'ka'.

¹¹Na' llana' sto ka gol, bli'lao X̄ancho Jesúsza' Páblona' na' golle'ne':

—Bendiplaloo Pablo, ka ba be'kzo' xtillaana' Jerusalénni, ka'kzan chonan byen lljeno' Rómána'.

Chgoogake' x̄nezin witgake' Páblona'

¹²Na' betiyo bal' ben' Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak bin' witgake'ne'.

¹³Wdeli choa ben'ka' wloo cho'agake' witgake' Páblona'. ¹⁴Na'ch wyajgake' lao b̄xozka' ch̄nabia' na' lao ben' gol che'ka' ch̄nabia' ben' Israelka' na' jellgake':

—Ba b̄chebnto' wsak'zi' Chioza' neto' shi yeej gaoznto' na' bin' witnto' Páblona'. ¹⁵Na' le' nakle ben' w̄nabia' ch̄ento', li gak toz na' li inabi ben' w̄nabia' che soldadka' kweje'ne' wx̄e na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

¹⁶Na' bi' che ben' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. ¹⁷Na' Páblona' w̄nie' to ben' nak x̄an to guiyoa soldadka', golle'ne':

—Jwa'gach bi'ni lao ben' w̄nabia' che soldadka', la' de to dii ye'b' le'.

¹⁸Na' x̄an soldadka' jweeb' lao ben' w̄nabia' che yog' soldadka', na' golle'ne':

—Páblona', beena' nej lillyana', w̄nabile' nad' yidwa' bi'ni lawo'ni, la' de to dii inab' li' na.

¹⁹Na' ben' w̄nabia' che yog' soldadka' b̄x̄ee na' bi'na', na' b̄chi'eb' ga kono lle'. Na'ch w̄nabile'b':

—¿Beran cheenilo' ino' nad'?

²⁰Na' bi' xkwidaa gollb' le':

—Ben' Israelka' ba gokgake' toz kwenche inabgakile' li' kwejo' Páblona' wx̄e na' wsełoone' lao ben'ka' ch̄nabia' legake', na' wda'tezgakile'n yiyiljyollgake' berakzan bene'. ²¹Na' bi shajli'o ch̄egake', la' wdeli choa ben'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgage' na'

bin' guete'. Na' ba chbezgake' gono' ka cheengakile'.

²²Na'ch ben' wñabia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

**Bsel'gake' Páblona' lao
ben' wñabia'na' le Félix**

²³Na'ch ben' wñabia' che soldadka' wñie' chop xan soldad che'ka' na' bene' mandad wzengakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyoagake' shajgake' ni'azgake', na' giyonshigake' kwiagake' kabay na' zi chop guiyoagake' gox'gake' lanza.

²⁴Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix'a, beena' chñabia'.

²⁵Na'ch bgoxee legake' to yish dii na ki:

²⁶“Si'xengacho' ben' wñabia' Félix, nad' Claudio Lisias chzej' li', na' chwap' li' chiox. ²⁷Ka nak beeni chselaa lawo'na', ben' Israelka' bex'gake'ne' na' ba zoa witgake'ne' shel' ki nad' jasla'ne' len soldad cha'ka', la' wnezid' ndie' kwent yell Rómana'. ²⁸Na' daa goklallid' inezid' berache chaogake' xya che', jwaane' lao ben'ka' chñabia' ben' Israelka'. ²⁹Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. ³⁰Na' ka wnezid' ben' Israelka' ba ngoogake' xnezin witgake'ne', bchoglallaa wselaaane' lawo'na'. Na' ba gosh' ben'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

³¹Na'ch soldadka' lle' na' bche'gake' Páblona' zejlengake'ne', bllinentegake'ne' yella' le Antípatris kon ka goll ben' wñabia' che'ka' legake'.

³²Na' betiyo, soldadka' zej ni'azgake' bibiigake' ziyajgake' Jerusalénna'. Na'

ben'ka' llia kabayka' zejlengake' Páblona'. ³³Na' ka bllingake' Cesareana', be'gake' ben' wñabia'na' yisha' nox'gake' na' bengake' Páblona' lo nee. ³⁴Na' ka wde blab ben' wñabia'na' yisha', na'ch wñabile' Páblona' ga benaan. Na' ka wnezile' Páblona' nake' ben' yell Tarso, daa llia gana' mbani Cilíciana', ³⁵na'ch golle'ne':

—Na' wzenagshkid' bin ino' kat' yid ben'ka' chao xya cho'.

Na'ch bene' mandad ljasejgake'ne' yoonaa' ben dii Heródeza', gana' chzoa ben' wñabia'ka'.

Be' Páblona' dill' lao Félix'a

24 Gok gay' lla zoa Páblona' Cesareana' ka bllin bxo'z choo bxo'z xenna', beena' le Ananías, na' nchi'e bal ben' golka' chñabia' na' kon to ben' wide dill', ben' le Tértulo. Na' bllingake' lao beena' chñabia' kwenche gaogake' xya che Páblona'. ²Na'ch bdegake' Páblona' lao ben' wñabia'na' le Félix na' wzolo Tértulona' chawe' xya che', chi'e:

—Cho'xkeno' li', ben' wñabia', zoanto' mbalaz na' chak wen chento' lallnto'ni daa chak koo xnezi yog'lo'lte kon yell sin' cho'na'. ³Na' daan, gattez zoanto' toshiizi nanto' li' cho'xkeno' dii zan las, li' ben' wñabia'. ⁴Na' kwenche bich wshayinto' li', chñabinto' li' gono' goklen wzenago' to chop ka nak dga inanto' li'. ⁵Ka nak beeni ze lawo'ni, nezinto' nake' to ben' chbek dii zed, na' chdaze' doxen yell-lioni chta chnie' ben' kwenche neto' ben' Israel gaknto' choplæ, na' ngoo lo nee xonj ben' chonjilall' to ben' Nazaret. ⁶Ga biyollin, goklallee kwee loo yoodo'na' ben' bi nak ben' Israel. Daan bex'nto'ne'. ⁷Na' wyaz ben' wñabia' che soldadka', beena' le Lisias, na' bigoyoe'ne' lo na'nto'na'. ⁸Na' wne' neto' chiya' yidnto' lawo'ni kwenche gaonto' xya che'. Na' kwino' naa, wak

inabilo' Pábloni kwenche inezilo' biche chaonto' xya che'.

⁹Na' ben' Israelka' lle'lengake' na', bischopgake' dillaa che'gake': "Ka nakanan'." ¹⁰Na'ch ben' wñabia'na' bene' sen lao Páblona' kwenche wi'e dill', na'ch wzolo Páblona' chi'e:

—Ñezid' ba gok zan yiz chono' yel' joschis che ben'ki lle' gani mbanilo'. Daan chibaid' wi'a dill' daa chak cha' lawo'ni. ¹¹Zi' gok shllin' lla billin' Jerusalénna' jaye'lawa Chioza', na' shi cheenilo' gakiyilo'n, wak inabo' kwenche xenlalloo ka nakannan'. ¹²Na' kono ble'i nad' chakdil-len' ben' wa chbekw' wdił wishesh ladj ben', ni loo yoodo'na' ni gan yoblə ga chdop chllagnto' choe'lwillnto' Chioza' ni gachli yella'. ¹³Na' ka nak diiki na ben'ki cha', ni ton bi gongake' gan inagake' ka nakannan'. ¹⁴Lete to dii wchēb' lawo'ni choe'lawa Chioza', beena' be'la'o dii xozxto'nto'ka', kon ka nak nez li nez shao' che Jesucristona' daa yo'a, daa na ben'ki bi zejan shli. Per chajli'a yog' daa na ley che Chioza' na' diika' bzej dii ben'ka' wdiłjee daa golle' legake'. ¹⁵Na' ka ben'ki chao xya cha' na' ka nad', toz ka nonnto' lez yisban Chioza' ben' wetka', ka ben' wen ka ben' mal. ¹⁶Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao ben' yell-lioni.

¹⁷"Ba gok zan yiz chda' yell zit'ka', na' billin' Jerusalénna' kwenche wi'a mech dii gaklenan ben' wlall cha'ka' na' lekzka' wi'a bi dii wi'a yoodo'na'. ¹⁸Na' diikin chon' ka biyoll bixi biyech' kon ka na leya', kat' to chop ben' Israel, ben' zaak Ásiana', ble'gakile' nad' yoodo'na'. Aga no ben' ntop nshag' na' ni to wdił wishesh bi mbek'. ¹⁹Legaken' chiyał yidgake' ni gaogake' xya cha' shi bin ble'gakile' chon'. ²⁰Wa ben'ki zoa ni, inashkigake' shi bi dii mal billelgakile' cha' kana' jwa'gake' nad' lao ben' wñabia'

chento'ka'. ²¹¿Awa shi daa besyaa gosh-gakee: "Chaozle xya cha' daa chajli'a wllin lla yiban ben' wetka'?"

²²Na' ka biyoll beni Félix'a' wna Páblona' ka', na' bsane' bich bene' yel' joschis che'na', la' ba wñezile' nakan nak diika' chajle' ben'ka' yoo lo nez li nez shao' che Jesucristona'. Na' golle' ben'ka':

—Kat' yid Lísiaza', beena' chñabia' soldadka', kana' inezyen'id' nakran nak dga chak chele.

²³Na'ch Félix'a' golle' xan soldadka' wseje' Páblona', per bi wllone' sho' ben'ka' nombia' le' na' llje'gake'ne' bi dii chyaljile'.

²⁴Na' ka wde chop shon' lla, bizllinlen Félix'a' xoolena' le Drusila, to nool Israel. Na'ch ben Félix'a' mandad bllin Páblona' lawe'ka' kwenche wzenaggake' dillaa daa cho'e daa ne' chiyał gonlilall'cho Jesucristona'. ²⁵Na'ch be' Páblona' dill' chi'e chiyał goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félix'a' xtilleena', le bllebe'. Na'ch golle' Páblona':

—Ba gokz to ka't', na' kat' gat' latj cha'na' inia' li' dii yoblə.

²⁶Félix'a' lekzka' goklallee we' Páblona' le' mech kwenche yisane'ne'. Daan zekizezi wñie'ne' kwenche be'lene'ne' dill'.

²⁷Ka'z wde chop yiz, na' ka bichej Félix'a' bich wñabi'e na' wyoo to ben' yoblə lie' Porcio Festo. Na' kwenche ile'shii ben' Israelka' Félix'a', bi bisane' Páblona'.

Páblona' bi'e dill' lao Féstona'

25 Na'ch ka bllin Féstona' Cesareana' kwenche inabi'e, na' wzoe' shon' lla. Na'tech wzee wyaje' Jerusalénna'. ²Na' bñozka' chñabia' na' nochlə ben'ka' chñabia' ben' Israelka' ka wñezgakile' ba blline' Jerusalénna', na'ch jtaogake' xya che Páblona' lawe'na'. ³Na' wñabgakile'ne' gone' to goklen yiselee Páblona' Jerusalénna' kwenche gak yel' joschis

che'na'. Gollgake'ne' ka' daa goklall'gake' witgake'ne' tneza'. ⁴Per goll Féstona' legake':

—Cesareana'zkaə yigaan Páblona', na' aga chllach yiyaa na'lə.

⁵Na' golle' legake':

—Ben'ka' chnabia' le' chiyal' sa'langake' nad' Cesareana' kwenche gaole xya shi bi dii malan bene'.

⁶Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' ye'l' joschisa' na' bene' mandad jxi'gake' Páblona'. ⁷Na' ka wyoo Páblona' gana' chi' Féstona' lii wbig'te ben' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi ben-gake' gan ye'gake' ka nakannan'. ⁸Na'ch Páblona' bzoa rson che', chi'e legake':

—Nad' ni tlis'h dii mal bin' gon', ni bin' chishj' ley chento'na' neto' ben' Israel, ni bin' wnit' balaan che yoodo' chento'na', ni bigan' inia' zban che César'a' beena' chnabia'.

⁹Na' daa goklall' Féstona' ile'shii ben' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' ye'l' joschis cho'na' na'lə?

¹⁰Na' Páblona' chi'ene':

—Ba zia' lawo'ni, na' ben' wñabia' César'a' ba nzoe' li' ni kwenche gono' ye'l' joschis, na' nin chiyal' gak ye'l' joschis cha'na'. Nezkzilo' aga bi ben' che ben' wlall' cha'ki. ¹¹Shi ba ben' dii chon ka chidolaa guet', wakkzə guet'. Per shi bibi ben' che ben'ki chao xya cha', kono gak gon nad' lo na'gake'. Na' chñab' wdio' nad' lao ben' wñabia' César'a' kwenche kwine' gone' ye'l' joschis cha'na'.

¹²Na'ch Féstona', ka wde be'lene' dill' ben'ka' chaklen le' chone' ye'l' joschisa', na'ch chi'e Páblona':

—Ba wñabo' tio' lao ben' wñabia' César'a' kwenche gone' ye'l' joschis cho'na', na' wselaa li' lawe'na'.

Páblona' bi'e dill' lao ben' wñabia' Agrípana'

¹³Na' gok chop shon lla na'ch bllin ben' wñabia' Agrípana' len Berenícena' yell Cesareana' jawapgake' Féstona' chiox. ¹⁴Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to ben' bi ben' Félix'a' ye'l' joschis che'na'. ¹⁵Ka wya' Jerusalénna', ben' wñabia' che bxo'zka' na' ben' golka' chnabia' ben' Israelka' wdaogake' xya che' lawa'na', goklall'gake' wchogbi'a guete'. ¹⁶Na' gosh'gakee ka choncho cho' ben' Roma, aga lii wchogbia'tezcho guet to ben' shi bi sie' wzoa rson che' lao ben'ka' chao xya che'. ¹⁷Daan, ka bid ben'ka' bidtao xya che', bi bshe'ida'n, san betiyo'z lii bentia' wñeyi jxi'gake'ne' kwenche gon' ye'l' joschis che'na'. ¹⁸Na' ben'ka' bidtao xya che', ni tlis'h di-ika' wza'lallaa bene' bi wñagake'. ¹⁹Daa zeelo nagake' che', nlla'lə chajli'e che Chioza' na' chde' cho'e dill' che to ben' wle Jesús, beena' ba wit, na' le' ne' mbankze'. ²⁰Na' daa bi ne'zid' nak gon' ye'l' joschis che ben'ki, wñabid' le' shi cheenile' yiza'lene' nad' Jerusalénna' kwenche gak ye'l' joschis che'na' na'. ²¹Per Páblona' wñabe' tie' lao César Augústona' kwenche gone' ye'l' joschis che'na', na' ben' mandad shejze' axt kat'ch gak wselaa'ne' Rómána'.

²²Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

²³Na' betiyo bllin Agrípana' lega ben' zakii, len Berenícena' na' len bal' ben'ka' chñabia'gake' soldadka', na' ben'ka' mbejlawin yella'. Na'ch Féstona' bselee ben' jxi'gake' Páblona'. ²⁴Na' wñe Féstona', chi'e:

—Li' ben' wṇabia' Agripa, na' yog'le le' lle'le ni, ka nak beeni ze ni, yog' ben' Israelka', ka ben' lle' Jerusalénna' na' ka ben' lle' Cesareani, chaogake' xya che', na' chongake' byen ḥogbi'a guete'.²⁵ Na' nad' chakbe'id' aga bi dii mal ba ben beeni kwenḥe ḥogbi'a guete'. Na' kwine' ba wṇabe' tie' lao César Augústona' kwenḥe gone' yel' josḥis che'na', na' ba bḥeb' wdia'ne' na'lə. ²⁶ Per bi chillelid' bin ben Pábloni kwenḥe wzej' Césara' yepée bin bene'. Daan ba nzia'ne' laoleni na' lawo'niyen'kzə li', ben' wṇabia' Agripa, kwenḥe inabyollichone' bin bene', na' ka' wllia' lee yisha'.²⁷ La' chakid' bi nakan wen wseḷaa to ben' lawe'na' kwenḥe wḥogloe' che' na' bi nzej' bin bene'.

Páblona' bzo'e rson ḥe' lao Agrípana'

26 Na' Agrípana' golle' Páblona':
—Bzoashki rson ḥo'na' naa.

Na'ch Páblona' blis neena' na' wzoloe' bi'e dillaa, chí'e:

²—Li' ben' wṇabia' Agripa, mbalaz wal chakid' daa gak wzoa rson ḥa'ni lawo'ni che yog' diika' chao ben' Israelka' xya ḥa'.³ La' nezkzilo' ka yoolo neto' ben' Israel chonnto', na' lekzka' che diḷ ḥix ḥento'ka'. Daan ḥṇab' gapgacho' yel' ḥxenlall' na' wzenaggacho' ka nak dga inia' li' naa.

⁴Yog'lol ben' Israelka' nezgakile' ka bsa' ḥa' ladje'ka', ka yell ḥa'na' gana' bgol' na' ka Jerusalénna'.⁵ Na' lekzka' nezgakile' toshiizi nak' toz fariseoka', ben'ka' chzenagḥgake' che ley che dii Moiséza' aga ka nochlə ben' yoblə. Na' wak yizi' cho'agake'n shi gueengakile'.⁶ Na' naa chaogake' xya ḥa' daa non' lez wllin lla gon Chioza' ka bḥebe' lao dii xozxto'nto'ka'.⁷ Na' neto' naknto' shllin kwente dia che dii Israela', nonnto' lez gon Chioza' daa bḥebe' gak, na' daan choe'la'onto' Chioza' ka tella ka wal. Na' daa non' lez gak daa bḥeb' Chioza',

daan chao ben' Israelki xya ḥa', li' ben' wṇabia'.⁸ ¿Berache bi ḥajle'le wak yisban Chioza' ben' wetka'?

**Páblona' bi'e dill' ka bsak'zi'e
ben'ka' nonlilall' Jesúza'**

⁹Lekzka' nad' gokid' chiyal' wsak'zi'a ben'ka' nonlilall' Jesús, ben' Nazareta'.¹⁰ Na' ka' ben' Jerusalénna'. Na' bḥozka' ḥṇabia' bengake' lsens wlo'a lillyana' ben'ka' nonlilall' Jesúza', na' ka betgake' legake' lekzka' len' chakid' kan' chiyal' gak.¹¹ Zan shii wya' gana' ḥdop chllagnto' choe'wllnto' Chioza' na' biya dii benid' legake' kwenḥe inegake' zban che Jesucristona'. Na' le bllaachga' legake', axt yell zit'ka' wya' jasak'zi'gakee.

**Sto shii be' Páblona' dill' ka
gok blla' yichjlall'do'ena'**

(Hch. 9:1-19; 22:6-16)

¹²Na' lekzka' nan ljenid' ben'ka' nonlilall' Jesúza' yell Damáscona', na' bḥozka' ḥṇabia' bse'gake' nad' na' bengake' lsens lljasak'zi'gakee.¹³ Na' ki gok ḥa', li' ben' wṇabia'. Ka zyaa ngwaa neza', do ka gobill ble'id' to yi' wal dii za' yabana' dii ḥzeeni'ch aga ka wbillā', na' wyeḥjan nad' len ben'ka' zyaalen'.¹⁴ Yog'tento' wzoatishnto' lo yona', na'ch nad' benid' shii to ben' wnie' nad' dill' hebreo, ne': "Saulo, Saulo, ¿berache ḥḥi' chsak'zo' nad'? Daa chono' ka', zi' che kwinzon' chono' na' chak ḥo' ka chak che goona' chilibb xisa' daa ḥbibe'b kwenḥe sa'b." ¹⁵Na'ch wnia', chepee: "¿Nora li', ben'?" Na' wne': "Nadaan Jesúza', beena' ḥḥi' chsakoo." ¹⁶Na' naa biyas. Ba bli'law' li' kwenḥe gono' ka cheenid' na' kwenḥe wi'o dill' che dga chen chle'ilo' naa na' ḥeyi diika' zi' wliid' li'. ¹⁷Na' wseḷaa li' gana' lle' ben'ka' bi nak ben' Israel, na' gaklen' li' kwenḥe ni legake' na' ni ben' Israelka' bi witgake' li'. ¹⁸Na' wseḷaa li' kwenḥe lljali' lljasedilo' legake' kwenḥe sho'

beeni' cha'na' loo yichjall'do'eka' na' bich tagake' lo yel chola'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' ben'ka' nak lall'nee."

¹⁹ 'Kan' gok cha', li' ben' wñabia' Agripa, na'chan bzenag' daa wna Jesúza' ka bli'lawe' nad'. ²⁰ Na' zigaate ben' Damáscoka' bli' bsedid' cho'a xtil' Jesucristona', na'tech ben' Jerusalénka', na' ben' lle' doxen yell-lío Judeana', na' lekzka' ben'ka' bi nak ben' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i ben' nan ba biyaj bilengakile'. ²¹ Na' ni cheyi diikin, be' ben' wlall cha'ka' nad' yoodo'na' na' nan witgake' nad'. ²² Per Chioza' chaklene' nad' kwenche choe'ch' xtilleena' lao ben' ax't naanlla, ka lao ben' zakii na' ka lao ben' bi zakii. Na' kon ka wnakz dii Moiséza' gak na' ka wnakzə dii ben'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'. ²³ La' legake' wna-gake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' ben' necha' yibane' ladj ben' wetka', na' chixje'ile' ben' Israelka' na' ben'ka' bi nak ben' Israel nakan chiyal' gongake' kwenche sho' beeni' che'na' loo yichjall'do'eka'.

Páblona' goklallee gonlilall' Agrípana' Jesúza'

²⁴ Na' shlak Páblona' chzoa rson che'na', besyaa Féstona', chi'ene':

—¡Chaktonto'n, Pablo! Daa zi'telə chsedo' ba chontontin li'.

²⁵ Na' Páblona' chi'ene':

—Aga chaktonta'n, ben'do', san dill' lin cho'a, na' nakan dii shajle'cho. ²⁶ Na' ben' wñabia' Agrípani nezile' che yog' diiki nia' le', daan chiyaxjid' cho'a dill' lawe'ni.

Aga inacho bi nezile' diika' gok, la' ga lle' lla' bənaan gokan. ²⁷ Na' li', ben' wñabia' Agripa, ¿achajli'o cho'a xtil' Chioza' daa bzej dii ben'ka' wdixjee daa golle' legake' kani'yi? Nad' nezid' chajli'o.

²⁸ Na'ch Agrípana' chi'e Páblona':

—¿Achakilo' xtitz wshajlino' nad' cho'a xtil' Jesúza' na' gonlilallaane'?

²⁹ Na'ch Páblona' chi'ene':

—La' xtitzə wa la' ssha wshajlen' li', Chioza' w'e latj aga tozo' li' shajli'o san yog' ben'ki lle' ni chengakile' dillii cho'a shajle'gake' ka ba wyajli'a nad', per aga nia' wchejgake' legake' gden ka nchejgake' nad'.

³⁰ Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' ben'ka' wche'lengake'.

³¹ Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiyal' gatee lillyana'.

³² Na'ch Agrípana' golle' Féstona':

—Wak yislacho beeni shel'ka' ki ba wñabe' tie' lao ben' wñabia' Césara' kwenche gone' yel' joschis che'na'.

Bsel'gake' Páblona' yell Rómána'

27 Na'ch ka bchogllall'gake' wsel'gake' neto' Itáliana' loo barkwlə, bengake' Páblona' kon sto chop pres yoblə lo na' beena' le Julio, nake' xan to guioa soldadka' ben'ka' nzi' soldad che beena' chñabia' Rómána'. ² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to ben' le Aristarco neto'. Nake' ben' Tesalónica, daa llia gana' mbani Macedóniana'. ³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' ben'ka' nombi'e yella' kwenche be'gake'ne' bi dii byalljile'. ⁴ Na' ka biza'nto' Sidonna' na' wdeteznto' yichjlə yell-lío Chíprena' daa llia lo nisdona' kwenche bkweejan neto' daa le ze be'na'. ⁵ Na' wdetento' lo

nisdona' daa de tcho'a yell-lio gana' mbani Cilíciana' na' Panfílana', na' bllinnto' cho'a yell Mírana', daa lliana' gana' mbani Líciana'.

⁶Na' yell Mírana' xan soldadka' bllelile' to barkw dii za' Alejandríana' na' zejan Itáliana', na' bidie' neto' lo'inna'. ⁷Na' zan lla wyajlennto' barkwa' sho'llal'zə, na' kani bllinnto' cho'a yell Gnídona'. Na' daa ze be'na' klelə, na' wyeçhnto' yell-lio Crétana' daa lliana' lo nisdona', wdeteznto' cho'a yell Salmónna'. ⁸Na' kani gok zejnto' tcho'a nisdona' axt ni bllintento' gana' le Buenos Puertos, gaozə yell Laseana'.

⁹Zan llate ba wllainto' na' ba chonan dii nxoll shajchnto' lo nisdona' daa ba zoa yilen dii zaga'. Na' goll Páblona' legake':

¹⁰—Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'. ¹²Na' daa bi nak latja' wen yigaannto' na'z shlak chi' dii zaga', zangake' bçhoglall'gake' shajchnto' kwençe illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nisdona'

¹³Na'ch wzolo ze to be'les dii za' lli'lə, na' ben'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lio che Crétana' daa lliana' lo nisdona'. ¹⁴Ka gok shloll, wzolo to be' wal dii za' cha'lə. ¹⁵Na'ch wzolon chlligaa barkwa' na' bikzə bi gok gonnto', na' bsanall'choklənto'n nllig' be'na' len. ¹⁶Na' ka wdento' gaozə to yell-liodo' le Clauda daa lliana' lo nisdona', na'

bich zetek be'na'. Na'ch barkwdo'na' ngoyo barkw xenna' bilepnto'n loo barkw xenna', per kani gokan. ¹⁷Na' ka biyoll bilepnto'n, na'ch bçhejgake' barkw xenna' rietka' kwençe goklenan daa. Na' daa bllebake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwençe shajan kon ga wlligan len. ¹⁸Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bzal'gake'n loo nisdona' kwençe bichtek gok barkwa' zii. ¹⁹Na' ka gok shon lla, axt len xshinlaz barkwa' bzal'nto' loo nisdona'. ²⁰Na' zan lla bi bli'lao wbillana' ni beljka', na' daa zechga be'na', bich bennto' lez yilanto'.

²¹Na' ka ba gok zan lla bin' gaonto', na'ch Páblona' wzie' ladj ben'ka' na' chi'e legake':

—She'l' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'. ²²Na' naa bikzə gonçhoplall'zle, la' ni tole bi guet. Toz barkwi kwiayi'. ²³La' daa nll'e'yi Chios cha'na' beena' chonlilal-laa bselee to anjl bli'lawe' nad'. ²⁴Na' anjla' wne' nad': “Bi illebo' Pablo. Chonan byen illino' lao ben' wñabia' Césara', na' ni cho' li' yiyesh'lallii Chioza' yog' ben'ka' zejleno' txen loo barkwi na' bi guet-gake'.” ²⁵Na' naa, li wtiplall'le, la' nxenilallaa Chioza' na' nezyenid' kon ka wna anjla' nad' kayen'nan gak. ²⁶Per chonan byen wwiacho naklə goncho kwençe yichoonan cho' to lo yell-liodo' dii lliana' lo nisdona'.

²⁷Na' ba gok shda' wbill ka bllinnto' gana' de Nisdo' Adriáticono', na' ni chllig' be'na' barkwa' to ki to ka'lə lo nisdona'. Na' ka bllin chel, ben'ka' chsa' barkwa' gokbe'gakile' ba chllinnto' gana' de yo billa'. ²⁸Na'ch bletjgake' to ya kwençe bchixgake' ka'k' zitj nisa', na' ka bchixgake'n zitjan shin'toyichoa metr. Na'ch

ka wza'n zilat' na'ch bizchixgake'n dii yoblə na' zitjan gallichoa metr. ²⁹Na' daa bllebgake' lljsho' barkwa' lee yajka', bletjgake' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te. ³⁰Na' ben'ka' chsa' barkwa' goggakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'. ³¹Na'ch Páblona' golle' xan soldadka' na' soldad che'ka':

—Shi ben'ki bich yigaangake' loo barkwi, aga wilalat'le shi naa.

³²Na'ch soldadka' bchoggake' rietka' daa nchej barkwdo'na' na' bxopan loo nisa'.

³³Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble. ³⁴Na' nia' chonan byen gaolat'le kwenche yiyak-shao'lall'le, la' ni tole bi kwiaiyi'.

³⁵Na' ka biyoll wna Páblona' ka', na' bexee to yetxtil na' bi'e Chioza' yel' choxken lao ben'ka' lene' na' bxoxje'n na' wzoloe' chawe'. ³⁶Na' ka ble'gakile' chawe', na'ch yoguee bendiplall'gake' wdaogake'. ³⁷Yog'lol' neto' yoonto' loo barkwa' naknto' chop guiyoa guiyonshin'to. ³⁸Na' ka beljgakile', na'ch bzal'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa' yel

³⁹Na' ka wyeeni', ben'ka' chsa' barkwa' aga biyombia'gake' yell-liona', per ble'gakile' to ladj lchi ga choo xoz' nisa' gana' goggakile' wak sho' barkw che'ka'. Na' bchoglall'gake' lljlekwwgake'n lo yoxa'. ⁴⁰Na' bchoggake' riet che ya xenka' daa chzagaan barkwa' na' wchoonlall'gake'n loo nisa'. Na'ch bisellgake' yaga' daa chaklenen chzechj chlliin barkwa', na' bizeshgake' lechaa daa ze yichjinna' kwenche bllig' be'na'n,

na' wzolo barkwa' zjabigaan cho'a nisa'. ⁴¹Na' jshia xin' barkwa' to ga zoayaa yoxa' loo niso'na' na' gogaan, na' aga gokch yichejan. Na'ch bli che niso'na' wzolon bxoxj btinan xan barkwa'. ⁴²Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. ⁴³Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate ben'ka' chak xoa yela' wxit'gake' loo nisa' kwenche yillingake' lo yo billa', ⁴⁴na' ben'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lolnto' billinnto' shi'a shao' lo yo billa'.

Páblona' wzoe' Máltana'

28 Na' ka biyoll billin yog'nto' shi'a shao' lo yo billa', na' wpezinto' yell-liona' len Malta. ²Na' ben'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'. ³Na'ch Páblona' btope' xonj xis bill, na' ka bzaleen lo yi'na' bichej to bel' ladjinna' na' wdinyaab neena'. ⁴Na' ka ble'i ben' Máltaka' nal' bel'a' na' Páblona', na'ch che' ljwelle':

—Ben' wen xyalja beeni. La'kzi bile' lo niso'na', Chioza' aga wi'e latj ibane'.

⁵Na'ch Páblona' wllib neena' kwenche bxop bel'a' lo yi'na', na' aga bi gok-ile'. ⁶Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷Na' gaozə gana' bllinnto' de yell-lío che beena' chnabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon' lla na' bensi'e neto'. ⁸Na' xa Públiona' die' yo'e dii la' na' chaktie' besa'. Na'ch wyaj Páblona' jawie'ne', na' ka biyoll be'lwille'

Chioza' b̄xoā neena' yichje'na' na' biyak-ile'. ⁹Na' ka w̄nezi beṅ' Máltaka' daa ben Páblona', na'ch wyaj yog' beṅ'ka' bi shao' lawe'na' na' biyagakile'. ¹⁰Na' beṅ'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómana'

¹¹Shoṅ' beo' wzoanto' Máltana'. Na' ka biza'nto' biyoonto' to loo barkw dii bchej Alejandríana' daa lekzka' bigaanan Máltana' shlak wde dii zaga'. Na' xin' barkwa' da' chop lwaa lsak' chios che beṅ' griegoka', beṅ'ka' le Cástor na' Pólux. ¹²Na' ka bllinnto' yell Siracúsana', na' wzoanto' shoṅə lla. ¹³Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'. ¹⁴Na' Puteólina' billagnto' baḷ beṅ'ka' nak neto' txen chonlilall'nto' Jesúza', na' w̄nabigake' neto' yigaanlento' legake' to xman. Na' ka wde xmana', na'ch biza'nto' zejnto' Rómana'. ¹⁵Na' beṅ' Rómaka' nonlilall' Jesúza', ka w̄nezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shoṅ Yoo Ga Chigaan Beṅ'. Na' ka ble'i Páblona' legake', bi'e yel' choxken Chioza' na' biyondiplatee. ¹⁶Na' ka bllinnto' Rómana', x̄an soldadka' bene' preska' lall' na' beena' ch̄nabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

Páblona' bi'e xtil' Jesúza' Rómana'

¹⁷Na' ka gok shoṅ lla zoa Páblona' na', na'ch goxe' beṅ' Israelka' zakii, beṅ'ka' lle' Rómana'. Na' ka bdopgake' na' golle' legake':

—Le' beṅ' bish', shlak wzoa' Jerusalénna' beṅ' wllall chechoka' lle' na' bex'gake' nad' na' bengake' nad' lo na' beṅ' Rómaki la'kzi aga bi

ben' chegake' na' bin' chishj' diika' wna dii xozxto'choka' chiyal' goncho. ¹⁸Na' biyoll w̄nabyollgakile' nad' bin ben', beṅ' w̄nabia'ka' goklall'gake' wsangake' nad', la' aga bi ben' kwenche w̄chogbia'gake' guet'. ¹⁹Per beṅ' wllall chechoka' lle' Jerusalénna' aga be'gake' latj yisangake' nad'. Na' benan byen w̄nab' tia' lao beṅ' w̄nabia' Césara' kwenche gone' yel' joschis cha'na'. Per aga gaw' xya daa ben beṅ' wllall chechoka' cha'. ²⁰Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' beṅ' Israelan, nchejgake' nad' gdenki.

²¹Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to beṅ' wllall chechoka' bin' ila' biz gon inagake' cho'. ²²Na' cheeninto' wzenagnto' bi dil-laan wi'o, la' nezinto' doxenz chnegake' zban che beṅ'ka' nakgake' txen dii koba' chliile.

²³Na'ch bzoagake' to lla kwenche idopgake'. Na' ka bllin llana' bliigake' bia', beṅ' zan bdop gana' zoa Páblona'. Na' be'lene' legake' dill' do lla, bzajni-ile' legake' che yel' w̄nabia' che Chioza'. Na' bene' to dii byen kwenche shajle' beṅ'ka' che Jesúza'. Bzajniile' legake' di-ika' nyoj che Jesúza' lee ley che dii Moiséza' na' diika' bzej dii beṅ'ka' wdix-je daa goll Chioza' legake'. ²⁴Na' bale' wyajle'gake' diika' goll Páblona' legake', na' zi baḷe' bi wyajle'. ²⁵Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Sh̄lichakzan goll Espíritu Sántona' dii Isaíaza', daa bi'e dill' lao dii xozxto'choka' chi'e legake':

²⁶Wyaj na' jellsha beṅ' Israelka':
La'kzi wzenagle bi shajni'kzile
Na' la'kzi chle'teile bi gakbe'kzile bin
zejin.

²⁷ Bikzə bi rson chazle, daa naklikzle
 lall'do' wal,
 na' chonle ka kwell lchol,
 ni bi cheenile wzenagle,
 ni bi cheenile ile'ile,
 na' ni bi cheenile shajniile
 kwenche yiyaj yilenile
 na' gon' ka yiyakshao' yichjlall'do'lena'.
²⁸ Chiyal' inezile Chioza' ba ngwee xnezi
 yisle' ben'ka' bi nak ben' Israel kwenche

bi kwiayi'gake', na' lelgake' wlebgake'
 cho'a xtilleena'.

²⁹ Ka biyoll goll Páblona' legake' ka',
 na'ch ziyajgake' chakdil'-len ljwellgake'.

³⁰ Chop yizyen' bigaan Páblona' yoonā'
 gana' wdixje', na' blebe' nottezə ben'
 jawia le'. ³¹ Na' aga no bsej blon bzajni
 Páblona' ben'ka' nakan nak ye!' wñabia'
 che Chioza' na' bli' bsedile' ben' cho'a
 xtil' Xancho Jesucristona'.

**Kart daa bzej Páblona' na'
bseleen lao ben'ka' nonlilall'
Jesucristona' yell Rómána'**

1 Nad' Pablo, nak' wen llin che Cristo Jesúza'. Chioza' gox wñabe' nad' gak' postl che', na' bene' lall' na' wi'a dill' wen dill' kob che'na' ² cheyi daa bchebe' gone', na' dii ben'ka' wdixjee daa golle' legake' kani'yi bzejgake'n lee Cho'a Xtilleena'. ³⁻⁴ Na' cho'en dill' che Xiine' Jesucristona', beena' nak Xancho, daa goke' benech, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak ben' ye' wak choo ye' wak xen daa bibane' ladj ben' wetka'. ⁵ Na' daa nonlilall'nto' Jesucristona', Chioza' ba goklene' neto', na' nzoe' neto' naknto' postl che Jesucristona', na' bene' lall' na'nto' lljtixje'nto' xtilleena' kwenche doxen yell-lioni soa ben' gonlilall'gake'ne' na' wzenaggake' che', na' sho'e balaan. ⁶ Na' lenle ba gox wñab Chioza' kwenche gake lall' na' Jesucristona'.

⁷ Chzej' yog'lol-le, le' lle'le yell Rómána', le' ba gox wñab Chioza' nakle lall' nee na' chakile' le'. Xacho Chioza' na' Xancho Jesucristona' gaklenshgagake' le' na' wzoagake' le' mbalaz.

⁸ Zigaate nia' le', ni cheyi daa ben Jesucristonan' chak wi'a Chioza' ye' choxken che yog'loltele, la' doxen choe' ben' dill' ba nonlilall'le Jesucristona'. ⁹ Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' tlizi chñabidee gaklene' le' kat' choe'willee. ¹⁰ Na' toshiizi chñabidee wi'e latj yidwía' le', na' shi cheenile' yid', lekze' kwee xnezin. ¹¹ Le chzelallaa yidwía' le' na' we'len' le' dill' daa gaklenan le' soachechchle gonlilall'chle Jesucristona'. ¹² La' cheenid' wtipch lall' ljwellcho daa nonlilall'chone'.

¹³ Le' ben' bish' na' le' ben' zan', cheenid' inezile zan shii ba goklallaa yidwía' le' per axt naa bikzan' gakan. Cheenid' yidwía' le' kwenche gachachle gonlilall'le Jesucristona' na' soach ben' gonlilall'gake'ne' ladjlena', ka ba gok che ben'ka' bi nak ben' Israel yellka' gana' ba wyaa. ¹⁴ Nezd' chonan byen we'len' yog' ben' xtil' Cristona', ka ben' griego na' ka ben' bi nak ben' griego, ka ben' sin' na' ka ben' bi nteyi. ¹⁵ Daan, cheenid' lekzka' chixje'id' le' dill' wen dill' kob che'na', le' zoale Rómána'.

¹⁶ Bi chiyi chido'id' wi'a dill' wen dill' kob che Jesucristona', la' nsa'n ye' wak che Chioza' kwenche yislan nottez ben' gonlilalleene', zigaate ben' Israelka', na' lekzka' ben'ka' bi nak ben' Israel. ¹⁷ Na' dill' wen dill' kob che'na' chliin cho' nakan goncho yiyakcho ben' li ben' shao' lao Chioza'. Na' chzajniin cho' chiya' gonlilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak ben' li ben' shao' daa nonlilalle nad', beenan' ibane'."

¹⁸ Ye' zak'zi che Chioza' za'n yabana' ni che ben'ka' bi chzenag che' na' chongake' chiya dii mal, diika' chsej chlongakan gombia'gake' daa nak dii li. ¹⁹ Daa cheeni Chioza' inezgakile' che', ba nezkgakile'n, la' Chioza'kzan ba bliile'n legake'. ²⁰ La'kzi bi chle'icho Chioza', chle'icho diika' bene' na' chakbe'icho ka nake'. Daa bxe bsile' yell-lioni nakbia'cha nake' Chios na' ye' wak che'na' biga te cheyin. Na' bibi de dii wda'i ben' inagake' bi nezgakile' shi zoe'. ²¹ La' la'kzi nezgakile' zoa Chioza', bi choe'la'ogake'ne' ni bi choe'gake'ne' ye' choxken. San yoolə yichjgake' diika' bi zakii na' ncholl'nniti yichjlall'do'eka' daa bi ntegakile'. ²² La'kzi nazgake' nakgake' ben' sin', daa chongake' chli'n nakgake' ben' bi nteyi. ²³ Lwaa dii nan koogake' Chioza' balaan, beena' biga te cheyin, lwaa lsak' benecha'lə, ben'ka' chde cheyin,

wloogake' balaan, na' axt no lwaa lsak' ba ze xan yabana', na' lwaa lsak' ba zoa tap ni'a na'yin, na' lwaa lsak' ba chxob le'in.

²⁴Na' daa chongake' ka', Chioza' ba wchoonlallee legake' kwenche gonch-gake' dii zbanka' cheeni beli chen che'ka', na' benlen ljjwellgake' diika' nak zban.

²⁵Lwaa dii nan shajle'gake' daa nak dii li che Chioza', wyazlall'chgake' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

²⁶Daan, Chioza' ba wchoonlallee legake' kwenche gonch-gake' dii zbanka' cheeni beli chen che'ka', na' axt noolka' chiyat'len ljjwell noolgake' na' chongake' daa bi noe' Chioza' latj gongake'.

²⁷Na' kakzə ben' byoka', lwaa dii nan soalengake' noolə, chibalgakile' chiyat'len ljjwell ben' byogake', na' chonlen ljjwellgake' daa nak dii zban. Na' chzak'zi'len beli chen che'ka' yel' zak'zi'na' daa chidol'gake' daa chongake' dii malka'.

²⁸Na' daa bi goklall'gake' wzenag-gake' che Chioza', wlej yich'je' legake' kwenche gontegagake' dii mala' kon ka nan loo yichjlall'do'eka' daa nxinj.

²⁹Shgal' dii bi yejni'alallii chongake', choe'gake' cho'a xbayi beli chen che'ka', chzelall'gake' gat' kwe'gakile', chibagakile' gongake' dii malka'. Nakgake' ben' xe' ben' xga', ben' wen xya, ben' wishagdilə, ben' wxiye', ben' chibayi gon mal che ben', ben' wichitj dill', ³⁰ben' chyilj chzan xtill' ben', ben' chakzbanii Chioza', ben' bibi nalli, ben' cha'sibə na' ben' chshalj chshon. Chiyiljlall'gake' bi dii mal gongake', bi chzenaggake' che xaxna'gake', ³¹bi ntegakile', bi chongake' daa chchebgake', bi chakgakile' ben', ni bi chiyesh'gakile' ben'. ³²La'kzi nezagakile' ba bchoglo Chioza' chiyal' guet

ben'ka' chon ka', zizikchli chongake'n, na' axt chiba chizak'gakile' kat' chon ben' yoblan.

2Na' li' naa, nottezə nako', kat' chchoglo' che ben' nape' dol' lao Chioza', lekzka' che kwinon' chnio', la' lenkzo' chono' diika' chongake', na' bibi de wda'ilo'n ino' bibi xtoloo de. ²Na' nezicho Chioza' chone' kon ka chiyal' gone' kat' chchogloe' sak'zi' ben'ka' chon dii malka' nak ka'. ³Na' li' no' che ben'ka' chon dii malka' napgake' dol', bi gakkzilo' wilo' lo yel' zak'zi' che Chioza', la' ka'kzan chono'. ⁴¿Achakzilo' bi wsak'zi' Chioza' li' ni che daa chono'? ¿Abi chakbe'ilo' ni che yel' ben' wen che'nan' chiyesh'lallile' cho' na' chape' yel' chxenlall' checho, daa cheenile' yiyaj yilenicho che dii malka' choncho? ⁵Per daa nako' yichjlall'do' chech na' bi cheenilo' yiyaj yilenilo', kwintezo' chkwa' chti'azo' yel' zak'zi'ka' illaglo' kat' illin lla wchoglo Chioza' che ben' kon ka chiyal' gone'. ⁶La' Chioza' gone' ka gak che to to ben' kon ka chidolee. ⁷Ben'ka' zoatezi zoagake' chongake' daa nak wen kwenche sho'gake' balaan, wi'e yel' mban chegake' zejli kani na' biga lliia ile'gakile' yel' wita'. ⁸Na' ben' yaalall'ka', ben'ka' choagake' ka'lə daa nak dii li na' nogake' diika' bi yejni'alallii, wsak'zi'e legake' daa le chillee legake'. ⁹Yel' zak'zi' wal yen ile'i yog' ben'ka' chon dii mala', zigaate ben' Israelka' na'tech ben'ka' bi nak ben' Israel. ¹⁰Per ben'ka' chon dii wenna', sho'gake' balaan na' soagake' mbalaz, zigaate ben' Israelka' na'tech ben'ka' bi nak ben' Israel. ¹¹La' Chioza', tlap chone' yel' joschis, aga nakzi ben' chakile'. ¹²Yog' ben'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi bi nezagakile' daa nan. Na' yog' ben'ka' ben dii mala' na' neztegakile' daa na leya', choglo chegake' kon ka na leya' gak chegake'. ¹³La' kono yiyak ben' li ben' shao' lao Chioza' daa nombia'ze'

leya', san beena' chon kon ka nan, len' yiyake' ben' li ben' shao' lawe'na'.¹⁴ Ka nak ben'ka' bi nak ben' Israel na' bi nezgakile' bin na ley che dii Moiséza', shi tobja'lozgake' chongake' ka na leya', nakbia' yoo to ley loo yichjlall'do'eka'.¹⁵ Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bəngake'.¹⁶ Kan' gak llana' gon Chioza' lo na' Jesucristona' wchogloe' che diika' yoo loo yichjlall'do' ben' yell-lioni, kon ka na dill' wen dill' kob che'na' daa cho'a dill'.

¹⁷Na' li' nako' ben' Israel, chakilo' nako' ben' wen lao Chioza' daa nezilo' daa na ley che dii Moiséza' na' chep cha'lalloo daa nombi'o Chioza'.¹⁸ Chakilo' nezilo' daa cheeni Chioza' gono' daa chli' chsedi leya' li' gono' daa nakch wen.¹⁹ Chakilo' wak koo ben' lo nez li che Chioza' na' gaktio' ka beeni' lao ben'ka' chda lo yel cho'a'.²⁰ Na' chakilo' wak wzajniilo' ben' bi nteyi na' wakte wli' wsedilo' ben'ka' bin' shajni'yenii daa nombi'o leya' daa nsa' do ka nak yel' chajni na' daa nak dii li.²¹ Na' shi li' chli' chsedilo' ben' yoblə, ¿berache bi chli' chsedi kwino'? Na' shi chsedilo' ben' bi kwane', ¿berache li'lə chbanzo'?²² Na' li' chsedilo' ben' bi chiyal' soalene' nool bi nak nool che', wa ben' byo ben' bi nak ben' che', ¿berache li'lə chonzo' ka'? Na' li' chwiilo' lwaa lsak' diika' choe'la'o ben', ¿berache chzi' chbanzo' bi de loo lill xlatjinka'?²³ Chshalj chshono' daa nombi'o leya', per chnit chdio' Chioza' daa bi chono' ka nan.²⁴ Dii liyen'nan na Cho'a Xtil' Chioza': "Ben'ka' bi nak ben' Israel chnegake' zban che Chioza' ni chele daa chonle mal."

²⁵Dii li sen' daa le circuncisión daa yoo kwerp cho'na' zak'kzin shi chzenago' daa na leya', per shi bi chzenago'n bibi zjanayi daa yoo senna'.²⁶ Na' shi beena'

bi yoo senna' chone' ka na leya', lao Chioza' nake' ka ben' yoo sen'.²⁷ Na' beena' chon ka na leya' la'kzi bi yo'e senna', yili'e lawo' napo' do! daa bi chono' ka na leya' la'kzi nombi'on na' yootio' senna'.²⁸ Bi gakzilo' nako' dowalj ben' Israel daa chono' yog' diika' yoolocho choncho cho' ben' Israel, ni daa yoo kwerp cho'na' senna'.²⁹ San dowalj ben' Israel nak beena' nonlilal' Chioza' do yichj do lallee, na' daa ba bikob Espiritu che'na' yichjlall'do'ena' nakan ka senna' daa chli'n nake' lall' na' Chioza'. Na' che beenin we' Chioza' xtillee chone' wen, aga ben' yell-lionin.

3 Na' ¿bera yel' goklen che ben' Israelka' de? Na' ¿bera banez si'gake' daa yoogake' sen' daa le circuncisión?² Dii xen wal banez chegake' de. La' zigaate, legaken' be' Chioza' Cho'a Xtilleena'.³ ¿Anti chakile ni cheyi daa bi chajle' bal' ben' Israelka' che', ba wlej yichje' legake'?⁴ Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gag che ben' saaxyana' nakbia'chan zejan shli, na' gakbe'gakile' chono' yel' joschis kon ka chiyal' gakan.

⁵Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon mal? (Nia' ka' daa chaki ben' yell-lioki ka'.)⁶ Per ¿bi nakan ka! La', shel'ka' Chioza' bi nake' ben' li ben' shao', aga wak gone' yel' joschis che ben' yell-lioni.

⁷Na' zoa ben' nagake', shi yel' wxiye' chechona' chli'n yel' li che Chioza' na' chisgolan balaan' che'na', ¿biche naze' nakcho ben' saaxya, shka'?⁸ Na' daa chakgakile' ka', wnaljagake': "Goncho dii mala' kwenche sho'che' balaan'." Zoa ben' nagake' kan' chli' chsedinto', per bi

nakan ka'. Na' ben'ka' naz ka' chido!gake' yel' zak'zi' che Chioza'.

⁹ ¿Nakra lla? ¿Anakchnto' neto' ben' Israel ben' wench aga ka ben' yoblə, lla? ¿Bi nakan ka! La' ba wniakz' yog'cho, ka neto' ben' Israel na' ka'kzə ben'ka' bi nak ben' Israel, toz ka napcho dol' lao Chioza' daa ba bencho dii mala'. ¹⁰ La' Cho'a Xtill' Chioza' nan:

Kono ben' li ben' shao' zoa, ni tlišee.

¹¹ Ni to ben' bi chajniile' daa nak dii li, ni kono zoa ben' chiyilj Chioza'.

¹² Yog'z ben' ba wlaagake' lo nez lina', na' yog'zgake' nxinj yichjlall'do'eka'.

Ni togagake' bi chon dii wen.

Ni tliš' ben' chon wen bi zoa.

¹³ Ka zban chla' to loo ba che ben' wet dii nyalj, kan' nak dill' zbanka' chchej cho'a lolleeka'.

Kon cho'a lolleeka' chziye'gake'.

Na' ka yierb che bel' nak dill'ka' choe'gake'.

¹⁴ Lillinzə chyishjgake' bia' blag' che ben' na' choe'gake' dill' zi'bia'.

¹⁵ Bi nallgakile' chittezgake' ben'.

¹⁶ Gattezə zejgake' chlliayi' chlliadegake' na' chgoogake' yel' zi' yel' yesh'.

¹⁷ Bi nombia'gake' bi daa ne' soalengake' ben' mbalaz.

¹⁸ Bi chall chllibgake' gon Chioza' xya chegake'.

¹⁹ Na' nezicho ben'ka' nagake' chongake' daa na ley che Chioza' chiyal' gongake' doxen ka nan. Na' daa kono gok gonan, ba bhoglo Chioza' che yog'lolcho, cho' ben' yell-lío, ka neto' ben' Israel na' ka ben' bi nak ben' Israel, napcho dol', na' ni to kono gak ina: "Bibi dol' nap'." ²⁰ Daan, ni to ben' bi gak ine' nake' ben' li ben' shao' lao Chioza' daa chone' ka na leya'. La' leya' chonan ka chakbe'icho nakcho ben' saaxya.

²¹ Na' naa Chioza' ba bliile' cho' nakan goncho kwenche yiyakcho ben' li ben' shao' lawe'na', na' aga daa goncho ka na leyan'. La' ka leya', na' ka diika' bzej dii

ben'ka' wdixjee daa goll Chioza' legake', toz ka choe'gakan dill' cheyin. ²² Chioza' ne' yog'lol ben' gonlilallee Jesucristona' yiyake' ben' li ben' shao' lawe'na', nottezə nake'. ²³ La' yog'lolzə ben' bxinj blengake' na' ni to kono nak dowalj ben' wen ka nak Chioza'. ²⁴ Per daa nak Chioza' ben' wen, chiyone' ben' ben' li ben' shao' daa wdixj Cristo Jesúsza' saaxya che'ka', na' bibi zak'gakile'n. ²⁵ Chioza' bselee Crístona' blalj xchene'na' na' wite' ni che saaxyaka' bencho. Na' ni che xchene'na', nottezə ben' gonlilalleene', Chioza' yizi'xene' saaxya che'na'. Na' ka chli'e nan nake' ben' chon daa nak shli. La' daa nape' yel' chxenlall', bene' ka'z saaxyaka' ben ben' kana' bin' wselee Crístona'. ²⁶ Na' naa, daa bselee Jesucristona' chli'e nake' ben' chon daa nak shli daa ne' nottezə ben' gonlilallee Jesúsza' nake' ben' li ben' shao' lawe'na'.

²⁷ Kono gak wshalj wshon ine' nake' ben' li ben' shao' lao Chioza' ni che ba bene' ka na leya'. La' aga no chon doxen ka nan, san Chioza' ne' nottezə ben' gonlilallee Crístona' nake' ben' li ben' shao' lawe'na'. ²⁸ Na' ba nezicho chiyakcho ben' li ben' shao' lao Chioza' daa chonlilall'cho Jesucristona' na' aga daa choncho daa na leyan'.

²⁹ ¿Achakile Chioza' nake' Chios che to ben' Israelka'zə? ¿Bi nakan ka! Lekzka' nake' Chios che ben'ka' bi nak ben' Israel. ³⁰ La' toz Chiozan' zoa, beena' chiyone' ben' li ben' shao' ben'ka' chonlilall' Crístona'. Na' toz ka chone' che nottezə ben' chonlilalleene', ka ben' Israel, ben'ka' yoo sen daa le circuncisión, na' ka ben' bi nak ben' Israel. ³¹ ¿Achakile daa chonlilall'cho Jesúsza' chzoacho leya' ka'lə? ¿Bi nakan ka! La' nezicho nakan to dii zakii.

4 ¿Bera ka inacho che dii xozxto'cho Abrahama'? Nak gok biyake' ben' li ben' shao' lao Chioza'. ² Shel'ka' biyak dii Abrahama' ben' li ben' shao' lao

Chioza' ni cheyi diika' bene', zaklja bshalj bshone' lao ben' yell-lioni, per aga lao Chioza'. ³La' Cho'a Xtill' Chioza' nan: "Dii Abrahamama' wyajli'e che Chioza', na' Chioza' wne' nake' ben' li ben' shao' lawe'na'." ⁴Kat' to wen llin chkaa laxje', bi nakan to dii chzani ben' cho'ene', san nakan dii chiyal'kz wi'ene'. ⁵Per shi to ben' shajli'e che Chios, beena' chiyon ben' saaxyana' ben' li ben' shao', Chioza' ile'ile'ne' ben' li ben' shao' daa gonlilalleene', la'kzi bibi bene' kwenche idolee yel' goklen che Chioza'. ⁶Dii Davina' bi'e dill' che yel' mbalaz che beena' na Chioza' nake' ben' li ben' shao' la'kzi bibi bene' kwenche bdolile'n. ⁷Ki wna dii Davina':

Chakomba beena' ba biyakxen xtoleena', na' ba biyol binit saaxya che'na'.

⁸Chakomba beena' bi yizi' Xancho Chioza'ne' kwent.

⁹¿Achakile to ben'ka' yoozgake' sen daa le circuncisión wak soagake' mbalaz? Bi nakan ka', san lekzka' ben'ka' bi yoo senna' wak soagake' mbalaz. La' ba wniakz' Chioza' wne' dii Abrahamama' goke' ben' li ben' shao' lawe'na' daa wyajli'e che'. ¹⁰Na' ¿batran wna Chioza' ka'? ¿Aba wyoo dii Abrahamama' senna' kana' wna Chioza' nake' ben' li ben' shao'? ¿Awa bin' sho'en? Chioza' wne' ka' kana' bin' sho'en. ¹¹Na'techlə wloo kwine' sen daa le circuncisión na' senna' bli'n ba nake' ben' li ben' shao' lao Chioza' daa benlilalleene'. Daan, dii Abrahamama' nake' xozxto' yog' ben' nak ben' li ben' shao' lao Chioza' daa nonlilall'gake'ne', la'kzi bi yoogake' senna'. ¹²Na' dii Abrahamama' lekzka' nake' xozxto' neto' yoonto' sen daa le circuncisión. Per aga daa yoonto' senna'zan, san daa nonlilall'nto' Chioza', beena' ba nonlilall' dii Abrahamama' kana' zi' sho'e senna'.

¹³Chioza' bchebe' gaki che dii Abrahamama' len xiin dia che'ka' doxen yell-

lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abrahamama' Chiozan', wna Chioza' nake' ben' li ben' shao' lawe'na'. ¹⁴La' shel' to ben'ka' chonz ka na leyan' gaki chegake' daa bcheb Chioza' wi'e dii Abrahamama', bibi zjanayin gonlilall'cho Chioza' na' aga bi zakii daa bchebe' gone', shel'ka'. ¹⁵Leya' nsa'n yel' zak'zi' che ben'ka' bi chon ka nan. Per shi bibi ley de, aga bi de dii inan napgake' dol'.

¹⁶Ka nak daa bcheb Chioza' gone' che dii Abrahamama', nakan to goklen daa chone' che nottez ben' nonlilalleene' kwenche yog'zə xiin dia che'ka' ikagake' daa we' Chioza' legake'. Bi nakan che to ben'ka' chonz ka na leya', san lekzka' nakan che nottezə ben' chonlilall' Chioza' ka benlilall' dii Abrahamama' le'. La' dii Abrahamama' nake' xozxto' yog'cho cho' nonlilall'chone'. ¹⁷Ka na Cho'a Xtill' Chioza': "Ba nzoa' li' kwenche gako' xaxna' ben' zan inleeb." Na' Chioza', beena' benlilall' dii Abrahamama', nape' yel' wak yisbane' ben' wetka' na' wxə wsile' diika' bin' gak.

¹⁸Kana' bich non dii Abrahamama' lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xozxto' ben' zan inleeb, kon ka goll Chioza'ne', chi'e: "Kan' shesh shan xiin dia cho'ka'." ¹⁹Biga gokchoplallee che Chioza', la'kzi chakbe'ile' ba nake' ben' golə par soa xiine', la' ba zoa gakile' to guioa yizan. Na' ni bi gokchoplallee la'kzi gok dii Sárana' nool will. ²⁰Bi gokchoplallee, san zizikli benlilallee gak daa bcheb Chioza' gone' na' be'laweene'. ²¹La' wnezile' kwaslo' Chioza' nape' yel' wak kwenche gone' yog' diika' chchebe'. ²²Daan ble'i Chioza'ne' ben' li ben' shao' daa wyajli'e che'.

²³Na' daa nan "Chioza' ble'ile'ne' ben' li ben' shao'", aga che tozen' nan ka', ²⁴san lekzka' cho'en dill' checho

cho' nonlilall'cho Chioza', beena' bisbane' Xancho Jesucristona' ladj ben' wetka', la' lenchon chle'i Chioza' ben' li ben' shao' daa nonlilall'chone'. ²⁵ Bzani Chioza' Xancho Jesucristona' wite' ni che saaxya chechoka' na' bisbane'ne' ladj ben' wetka' kwenche biyakcho ben' li ben' shao' lawe'na'.

5 Chioza' ba biyone' cho' ben' li ben' shao' daa ba nonlilall'chone', na' ba bizoalenchone' wen daa wit Xancho Jesucristona' ni checho. ² Na' daa ba nonlilall'cho Crístoná', Chioza' toshizi chonile' cho' wen na' chibaicho daa noncho lez lljazoalenchone'. ³ Na' aga to dgazan yibaicho, san lekzka' yibaicho yel' zak'zi'ka' chle'icho yell-lioni, daa nezicho chongakan ka soachechcho gonlilall'chone'. ⁴ Na' shi zoachechcho chonlilall'chone' shlak chllaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'. ⁵ Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espíritu Santo che'na' loo yichjlall'do'choni.

⁶ Kana' ni nakcho ben' wen dii mal na' aga bi gok goncho kwenche bi kwiayi'cho, kana'yen' bid Crístoná' wite' ni checho cho' nakcho ben' saaxya. ⁷ Aga ga zoa to ben' lii izanteyi kwine' guete' ni che to ben' nak ben' li ben' shao'. Kayaadia shi yiyaxji to ben' izani kwine' guete' lwaá to ben' wen. ⁸ San Chioza' bli'e ka chakile' cho' daa bzani' Crístoná' wite' ni checho kana' ni nakcho ben' saaxya. ⁹ Daa blalj xchen Crístoná' wite' ni checho, ba biyon Chioza' cho' ben' li ben' shao' lawe'na'. Na' daa wite' ni checho, ¿alechlin ki yisle' cho' lao yel' zak'zi'na' kat' illin lla wchoglo Chioza' che yog'lol ben'? ¹⁰ Shi kana' chakzbanicho Chioza', bselee Xiine'na' wite' ni checho kwenche bizoalenchone' wen, ¿alechlin naa ba bisbane'ne' ladj ben' wetka' ki yisle' cho'

daa ba zoalenchone' wen? ¹¹ Na' aga di-ika'z chibaicho, san lekzka' daa nombia'cho Chioza', la' ni che Xancho Jesucristonan' bizoalencho Chioza' wen.

¹² Ni che yel' widenag che toz beanaan golj wxe saaxyana' yell-lioni, na' ni che saaxyana' wyoo yel' wita'. Ka' gok wzolo chet yog' ben', la' yog'zə ben' chongake' dii mala'. ¹³ Kana' zi' we' Chioza' dii Moiséza' ley che'na', ba chonkzə ben' yell-lioni dii mala'. Per shi bibi ley de, aga bi de dii gawan xya chegake'. ¹⁴ La'kzi aga bi ley got' dii gawan xya chegake', yel' wita' wñabia'n lao yog'lol ben'ka' ben dii mala' wzololenzan dii Adánna' blinten kana' wban dii Moiséza', la'kzi bi wdishjgake' cho'a xtill' Chioza' ka ben dii Adánna'. Ni che dii Adánna' wyoo yel' wita' yell-lioni, san Jesucristona', beena' wloo Chioza' xnezin wselee kani'teyi, bxie' yel' mban zejli kani.

¹⁵ Per ka nak dii mala' ben dii Adánna', bi gak wsaklebichon ka dii wenna' ben Chioza' checho, dii xen wal nlla'n. Daa bxinj blen dii Adánna' yog'zə ben' chet, san daa bsel' Chioza' Jesucristona' kwenche wite' ni checho, bene' to dii wen inlleb che yog' ben' gonlilalleene'. ¹⁶ Bi gak wsaklebicho daa ben dii Adánna' kon yel' goklen daa ben Chioza' checho. La' wchogbia' che yog'lol ben' guetgake' ni che toz dii mala' daa ben dii Adánna'; san yel' goklen che Chioza' daa chone' checho chiyone' cho' ben' li ben' shao' lawe'na', la'kzi nakcho ben' saaxya nllleb. ¹⁷ Shi yel' wita' wñabia'n daa bxinj blen dii Adánna', ¿alechlin ki inabia' ben'ka' ba biyon Chioza' ben' li ben' shao' daa nake' ben' wen inlleb, ni che Jesucristona', beena' be' to yel' mban kob chegake'?

¹⁸ Dii mala' ben dii Adánna' benan ka bchoglo Chioza' che yog' ben' guetgake', na' ka'kzə dii wenna' daa ben Jesucristona' benan ka yog' ben'ka' gonli-

lall'gake'ne' yiyakgake' ben' li ben' shao' na' gat' yel' mban chegake' daa bi te cheyin. ¹⁹Daa gok dii Adánna' wide-nag, wchoglo che yog' ben' nakgake' ben' saaxya, per daa gok Crístona' ben' wizoá dill', ben' zan yiyak ben' li ben' shao'.

²⁰Chioza' bi'e ley che'na' kwenche wyanch xtol' ben' yell-lioni daa bi bzenaggake' cheyin. Per la'kzi wyanch xtoleeka', Chioza' bli'che' yel' chiyesh'lallii che'na'. ²¹Na' daa chet yog' ben', chli'n saaxyana' napan yel' wak wsi wchogan cho'. Per lekzka' yel' chiyesh'lallii che Chioza' chli'n napan yel' wak yiyonan cho' ben' li ben' shao' na' gonan yel' mban checho zejli kani ni che Jesucrístoná', beena' nak Xancho.

6 ¿Beran inacho naa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'? ²¿Aga kan' goncho! La' cho' ba nakcho ka ben' ba wit lao saaxyana' daa bich chnabi'an cho'. Daan, bich chiya' gonchon txen. ³¿Abi nezile ka wchoacho nisa' daa nakcho Cristo Jesús'a txen, lekzka' zevin witlenchonen'? ⁴Daa wchoacho nisa' zevin witlenchone' na' bgash'lenchone' kwenche gat' to yel' mban kob checho ka gok che Crístoná' kana' bisban Xacho Chioza' le' kon yel' wak xen che'na'.

⁵Na' daa ba witlenchone', ka'kzan yibancho ka bibane' ladj ben' wetka'. ⁶Nezicho yel' mbanna' nsa'cho kana', wliayi'n ka wit Crístoná' lee yag cruza' kwenche bich we'cho cho'a xbayi beli chenna' na' bich inabia' dii mala' cho'. ⁷La' kat' to ben' ba wite', bich chnabia' dii mala' le'. ⁸Na' shi ba witlencho Crístoná', ba nxenlall'cho lekzka' ibanlenchone'. ⁹Nezicho biban Crístoná' ladj ben' wetka' na' bich guete' dii yoblə, la' bich so saki yel' wita' le'. ¹⁰Na' ka wit Crístoná', shlin shlaxjzan bsol bnite' yel' wak che saaxyana'. Na' daa mbane' naa, zoe' chone' ka cheeni Chioza'. ¹¹Na' ka'kzə le', chiya' gakbe'ile ba nakle

ka ben' ba wit lao saaxyana' daa bich chnabi'an le', per mbanle lao Chioza' na' zoale chonle ka cheenile' daa nakle Xancho Cristo Jesús'a txen.

¹²Daan bi chiya' we'le latj inabia' dii mala' le' kwenche we'zle cho'a xbayi beli chen chelena' daa ile'i yel' wita'. ¹³Bi chiya' gon kwerp chelena' lall' na' saaxyana' kwenche gonle dii mala', san chiya' gon kwindle do ka nakle lall' na' Chioza' kwenche gonle ka cheenile'. La' wak inacho Chioza' ba bisbane' le' ladj ben' wetka' daa ba bene' le' to yel' mban kob. ¹⁴Bich chiya' inabia' dii mala' le', la' bich zoale xni'a leya', san daa biyesh'lallii Chioza' le', ba zoalenle yel' goklen che'na'.

¹⁵¿Nakrazə, lla? Naa ba biyesh'lallii Chioza' cho', na' bich zoacho xni'a leya', ¿agonchcho dii mala'? ¿Bi chiya' goncho ka! ¹⁶Nezkzile shi ba ben kwinchcho lo na' ben' kwenche goncho bittez daa ne', choe'cho latj chnabi'e chon'. Ka'kzan, shi chzenagcho che dii mala', na' inabia'n cho' na' wliayi'n cho'. Na' shi we'cho latj inabia' Chioza' cho', wiyone' cho' ben' li ben' shao'. ¹⁷Per choxken Chioza', la'kzi kana' wnabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'. ¹⁸Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'. ¹⁹Ba bi'a dill' che daa chak checho cho' benech kwenche shajniile dga nia' le'. Kana' ben kwindle lall' na' saaxyana' len dii zbanka' cheeni beli chen chelena' kwenche benle dii malka'. Na' naa, li gon kwindle lall' na' Chioza' kwenche soale gonle ka cheenile'.

²⁰Shlak be'le latj wnabia' dii mala' le', aga bzenagle che Chioza' na' bi benle ka cheenile'. ²¹Na' aga bi banez wxi'le che dii mala' benle na' naa chiyii chido'lenile'n, la' yel' witchokzan nsa'n. ²²San naa ba bisell bila' Chioza' le' lo ni'a na' dii mala' na' ba chonle ka chee-

nile', de banez cheyin daa zejch chonle daa nak wen, na' gat' ye! mban chele zejli kani. ²³Laxj beena' chon saaxyana' nakan ye! wit, san daa chzani Chioza' w'e beena' gonlilallee Xancho Cristo Jesúza' nakan to ye! mban zejli kani.

7 Le' ben' bish' na' le' ben' zan', nom-bia'le leya' na' nezile leya' chnabi'an ben' shlak mbane'. ²Na' ka nak leya', cho'en dill' nan noola' nshagna' chiyal' soalene' ben' che'na' shlak mbane', per shi guet ben' che'na', wak yikee ben' yoblə. ³Shi ljsaalene' ben' yoblə shlak ni mban ben' che'na', nakan xya. Per shi ba wit ben' che'na', leya' nan wak yikee ben' yoblə, na' bi nakan xya.

⁴Na' ka'kzan chele le', nakcho txen nonlilall'cho Crístona', le' ben' bish'dawaa na' le' ben' zandawaa. Daa nonlilall'le Crístona', beena' wit ni checho, zejín lekzka' ba nakle ka ben' ba wit lao leya' na' bich chnabi'an le'. Na' naa ba biyakle lall' na' ben' yoblə, beena' wite' na' bibane' ladj ben' wetka', kwenche goncho ka cheeni Chioza'. ⁵Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n ye! wit. ⁶Per naa, ba nakcho ka ben' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza' daa ba bikob Espíritu Sántona' yichjlall'do'choni, na' bich chnabia' leya' cho'.

⁷Bi chiyal' inacho leya' nakan dii mal. La' lennan' bzajniin nad' nan malan' chon'. Aga nezid' shi nakan mal selal-laa bi de che ben' shel'ka' ki leya' nan: "Bi selaloo bi de che ben'." ⁸Per dii mala' yoo loo yichjlall'dawaani bchinan dga bllia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho ben' wixinj wilen, shel'ka'. ⁹Kana' bin' inezid' daa

na leya', gokid' le wen nsa' cha', per ka wnezid' daa nllia leya' bia', zizikli benz' dii mala' daa wlliyi' nad'. ¹⁰Daa bllia Chioza' bia' goncho kwenche gaklenan cho' gat' ye! mban checho, bchoglolan cha' nan chiyal' guet'. ¹¹La' dii mala' yoo loo yichjlall'dawaani bchinan leya' na' wxiye'n nad' kwenche blliyi'n nad'.

¹²Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen. ¹³Leya' nakan wen na' aga lennan' be-nan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche blliyi'n nad'. Na' daa nakan ka', ni che leya' bli'lao saaxyana' nakan dii mal inleeb.

¹⁴Nezicho leya' nakan che Chioza', san nad', lega ben' de beli chen chon', na' chnabia' dii mala' nad' daa chon' ka nan. ¹⁵Bi chajniid' ka chon', la' bi chon' dii wenna' daa cheenid' gon', san dii mala' daa chakzbanid', lelan chonz'. ¹⁶Na' kat' chon' daa bi cheenid' gon', chakbe'id' leya' nakan wen. ¹⁷Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'. ¹⁸Nad' nezid' aga bi dii wen cheeni beli chenni gonan. Na' la'kzi le lliallalaa gon' dii wenna', bi chak gona'n. ¹⁹Bi chizoid' gon' dii wenna' daa cheenid' gon', san dii mala' daa bi cheenid' gon', lelan chonz'. ²⁰Na' daa chon' daa bi cheenid' gon', zejín aga nadaan chona'n, san dii mala' daa chnabia' loo yichjlall'dawaanin chonan daa.

²¹Chakbe'yenid' la'kzi cheenid' gon' daa nak wen, dii malalə chon'. ²²La'kzi chibayi loo yichjlall'dawaani ley che Chioza', ²³chakbe'id' de daa chsej chllonan gon' daa nezid' nak wen, la' dii mala' daa chnabia' nad' chtakw chchejan nad' kwenche gon' daa bi nak wen.

²⁴Le nyesh' chak cha'! ¿Notgui yisell yila' nad' lao beli chenni dga ba

nchogbia' kwiayi'? ²⁵ Cho'a Chioza' ye'l' choxken daa wit Xancho Jesucristona' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

8 Na' naa, bich bi ye'l' zak'zi' che Chioza' yen ile'i ben'ka' nak Cristo Jesús'a txen, ben'ka' bich chongake' ka na beli chen che'ka', san ba chongake' ka cheeni Espiritu che Chioza'. ² La' daa nonlilal'cho Cristo Jesús'a, Espiritu che Chioza' ba bene' ye'l' mban kob checho, na' daa chnabia' Espirituna' cho', bich chnabia' saaxyana' cho' daa nsa' ye'l' wita'. ³ Ley daa bzej dii Moisés'a' bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxya, na' wdixje' saaxya chechoka' ka wite' kwenche bich inabia'n cho'. ⁴ Chioza' bselee Crístona' ni checho kwenche so sakicho goncho wen lawe'na' ka na ley che'na'. Na' bich soacho goncho ka cheeni beli chenna' san soacho goncho ka cheeni Espiritu che Chioza'.

⁵ Ben'ka' ni chzenag che dii mala' yoo loo yichjlall'do'eka', toz len zegake' wneyi chongake'; san ben'ka' chzenag che Espiritu che Chioza', zegake' wneyi gongake' daa cheenile'. ⁶ Ben'ka' yoo yichjgake' gongake' dii mala', kwiayi'gake'; san ben'ka' yoo yichjgake' gongake' ka na Espiritu che Chioza', gat' ye'l' mban chegake' zejli kani na' soagake' mbalaz. ⁷ Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan. ⁸ Ben'ka' ni chibayi chon dii mala', Chioza' bi chazlallee ka chongake'.

⁹ Per le', bich chzenagle che dii mala' san chzenagle che Espiritu che Chioza', shi ba zoe' loo yichjlall'do'lena'. Na' shi no bi zoa Espiritu che Crístona' loo yichjlall'do'ena', bi nake' lall' na' Crís-

tona'. ¹⁰ La'kzi ba nakan guet kwerp che-lena' daa nakle ben' saaxya, per shi nakle Crístona' toz, Espiritu che'na' zoe' loo yichjlall'do'lena' na' dekwé ye'l' mban kob chele daa ba biyakle ben' li ben' shao' lao Chioza'. ¹¹ Na' shi Espiritu che Chioza', beena' bisbane' Jesús'a' ladj ben' wetka', zoe' loo yichjlall'do'lena', Chioza' lekzka' gone' to ye'l' mban kob che kwerp che-lena' daa guet, daa zoa Espiritu che'na' loo yichjlall'do'lena'.

¹² Daan, le' ben' bish' na' le' ben' zan', chonan byen goncho ka cheeni Chioza' na' bi goncho kon daa nazan che beli chenni. ¹³ La' shi we'chcho cho'a xbayi beli chenni, na' guetcho; san shi we'cho latj gaklen Espiritu che Chioza' cho' kwenche kwey yichjcho dii mala' daa nan goncho, na' gat' ye'l' mban checho zejli kani.

¹⁴ Yog' ben'ka' chzenaggake' che Espiritu che Chioza' na' chongake' ka cheenile', legaken' nakgake' xiin Chios. ¹⁵ Cho' ba zoa Espiritu che Chioza' loo yichjlall'do'choni, bich chak checho ka chak che beena' zoa ben' chnabi'ene' na' chall chllebe'ne', san daa zoa Espiritu che'na' loo yichjlall'do'chonan', zejin ba wkaa Chioza' cho' ka xiine'. Na' daa zoalen Espirituna' chon', chak che'chone': "Xadawaa." ¹⁶ Na' Espiritu che'na' lekzka' chzajniile' cho' kwenche chnezicho nakcho xiin Chios. ¹⁷ Na' daa nakcho xiin Chioza', lekzka' wllin lla ikaalencho Crístona' daa gone', la' shi goncho banez ye'l' zak'zi'ka' ka diika' ben ble'i Crístona', na' gakchone' txen sho'lenchone' balaan.

¹⁸ Na' ka nak ye'l' zak'zi'ka' chen chle'icho yell-lioni, aga wllinlebin ka balaan xenna' sho'lenchone'. ¹⁹ Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'. ²⁰ La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gagkakan

ka', la' Chiozan' bllie' bia' gaggakan ka', per lekzka' bene' kwenche chbezgakan yiyakshao'gakan. ²¹ La' wllin lla kat' yog' diika' bxe bsile' bich gaggakan dii kwiaiyi', san yiyakgakan mbalaz inlleb ka' gag checho, cho' nakcho xiine'. ²² Na' nezicho axt naanlla yog' diika' bxe bsile' chak chegakin ka' chak che to nool chllagloe' sane' bi'do' che'na'. ²³ Na' aga toz diika' ben Chiozan' chak chegakin ka', ka'kzan chak checho, cho' ba yoocho Espiritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiine'. ²⁴ Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez. ²⁵ Per shi ni noncho lez ile'icho daa zi' gag, chiya' gapcho yel' chxenlall' shlak ni chbezcho gakan.

²⁶ Na' lekzka' Espiritu che Chioza' chaklene' cho' choncho daa bi chak goncho. La' aga nezicho nakan chiya'yen' we'llwillcho Chioza', per kwin Espiritu che'na' chbellyeshee chnabe' checho lawe'na'. Na' la'kzi aga bi dill' chchine', ²⁷ Chioza', beena' nombi'e yichjlall'do' yog'cho, nezile' bin chnab Espiritu che'na' checho. La' daa chaklall' Chiozan' chnabe' checho, cho' nakcho lall' nee.

²⁸ Na' nezicho Chioza' chchine' yog' diika' chen chle'icho kwenche gakkengakan cho', cho' ba chakichone', cho' ba wleje' kwenche gakcho lall' nee kon ka goklallee. ²⁹ Kana' bin' soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiine' Jesucristona', kwenche Jesucristona' gake' ben' llialo ladjchoni, cho' nakcho ben' bishee na' ben' zane'. ³⁰ Chioza' wleje' cho' kani'teyi, na' lekzka' gox wñabe' cho' kwenche gokcho lall' nee, na' biyone' cho' ben' li ben' shao' lawe'na'. Na' cho'

ba biyone' ben' li ben' shao', ba nakan sho'cho to balaan xen.

³¹ ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gag bi goni cho'? ³² Shi Chioza' axt ni Xiine'na' bi biyeshile' san bzanile'ne' wite' ni checho, ¿alechlin ki gone' cho' yog'lol' diika' bchebe'? ³³ Aga no gag gao xya checho lao Chioza', la' len' ba wleje' cho' na' biyone' cho' ben' li ben' shao'. ³⁴ Na' aga no gag wchoglo checho guetcho. La' Cristo Jesúsza' wite' ni checho, na' bibantie' ladj ben' wetka'. Na' chi'e kwit de shli che Chioza', chnabe' gaklene' cho'. ³⁵ Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbi'l chdoncho, ni daa bi de xalaancho, ni daa zoacho dii nxoll, wa shi wit ben' cho'. ³⁶ Chak ka na Cho'a Xtill' Chioza' daa na:

Daa choanto' xtilloona' toshiizi de dii nxoll chento' witgake' neto'. Chongakile' neto' ka xil'do'ka', baka' nzoagake' witgake'.

³⁷ Per Crístona', beena' chakile' cho', chaklene' cho' kwenche goncho gan lao yog'lol'te diika' chen chle'icho. ³⁸ Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anjlka', ni dii xiw'ka', ni daa chak naa, ni daa zi' gakə, ³⁹ ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxe bsil Chioza' bi gag gonan ka bich gakile' cho', la' ba bli'e le chakile' cho' daa wit Xancho Cristo Jesúsza' ni checho.

9 Daa nonlilallaa Crístona' cho'a dill' li, na' bi chziyaa. Na' lekzka' Espiritu Sántona' chzajniile' nad' kwenche nezi yichjlall'dawaani dga nia' nakan dii li. ² Le nyesh' zoa' na' toshiizi le chjeli lall'dawaani, ³ na' axt shel' wx'e'id' bich gakklen Crístona' nad' na' kwiaayaa kwenche shicholə gakklenan ben' Is-

raelka' beṅ'ka' nak beṅ' wllal cha' na' beṅ' bishaa. ⁴Chioza' wleje' dii xozxto'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gake' yell che', na' bi'e le-gake' ley che'na'. Na' bzajniile' legake' ka chiya' we'la'ogake'ne', na' dii zan dii bchebe' gone' chegake'. ⁵Neto' beṅ' Israel naknto' dia che dii Abrahama', dii Isaaca' na' dii Jacoba', na' Cristona' lekzka' golje' lo dia chento'na' ka bide' yell-lioni. Na' chiya' we'la'ochone' zejli kani, la' len' nake' Chios na' chnabi'e lao yog'loṭte dii de. Kan' nakan.

⁶Na' bi inacho Chioza' bi bene' ka bchebe' gone' chento', san daa gok, aga yog' beṅ'ka' golj lo dia che dii Israela' nakgake' dowalj beṅ' Israel. ⁷Aga yog' beṅ' goljgake' lo dia che dii Abrahama' nakgake' dowalj xiin dia che'. Chioza' gollene': "Xiino' Isaaki gake' xaxna' yog'loṭ xiin dia cho'ka' zi' zaak." ⁸Dga chzajniin cho' nan aga ni che nakgake' xiin dia che dii Abrahama' nakgake' xiin Chios, san beṅ'ka' chajle' gone' ka bchebe' gone', legaken' noni xiine'. ⁹Ki nak daa bcheb Chioza' gone' che dii Abrahama', chi'e: "Zi twiz ka naa zaa dii yoblə, na' Sárana' sane' to xiino' bi byo."

¹⁰Na' aga dgazan. Lekzka' Rebécana' wxane' chop bi'do' che dii xozxto'nto' Isaaca'. ¹¹⁻¹²Na' kana' zi' galj bi' kweshka', na' ni biṅ' gongakb' dii wen ni dii mal, Chioza' bshaljlene' Rebécana', gollene': "Bi'na' galjə nech wlexj yichjb' lao bi'na' galjə koll'baa." Gollene' ka' kwenche chakbe'icho Chioza' chbeje' beena' gak xiine' kon ka ba bliie' bia' gak, na' chaxe' beṅ'ka' cheenile' gak xiine', ni bi chone' kwent shi bi ba bengake'. ¹³Nakan kon ka na Cho'a Xtill' Chioza' daa na: "Gokid' Jacoba', na' bwiyyid' Esaúna'."

¹⁴¿Bera ka inacho, naa? ¿Awak inacho Chioza' bi chone' wen? ¿Bi nakan ka!

¹⁵La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaklen' na' gaklenee." ¹⁶Daan, nezicho aga daa le cheeni beṅ' gake' xiin Chiozan' kwej Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'. ¹⁷La' Cho'a Xtill' Chioza' cho'en dill' ka golle' faraónna', beena' wṅabia' Egíptonona': "Bzoa' li' chnabi'o kwenche gon' ka ile'i beṅ' yel' wak cha'na' na' kwenche gake'bi yog' beṅ' lle' doxen yell-lioni nad' nak' Chios." ¹⁸Na' kan' nakan, Chioza' chiyesh'lallile' beṅ'ka' cheenile' yiyesh'lallile', na' lekzka' chone' chech yichjlall'do' beṅ'ka' cheenile' gake' beṅ' widenag.

¹⁹Na' wnaljo': "Shi choncho kon ka ba nllia Chioza' bia' goncho, bi gak ine' napcho doṭ' lawe'na', la' aga wakə wsej wlloncho gak ka cheenile'." ²⁰Na' shi ka' chakilo', ¿nora nako' wsheshlenzo' Chioza'? Aga wak ine' to yes' yo yeen beena' banan: "¿Bi'che benzo' nad' ki?" ²¹La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga lliarote, na' sto dii wchine' che bittez.

²²Na' ka'kzə ba ben Chioza'. Ni che dii mala' chon beṅ' yell-lioni goklallee wliile' legake' yel' chllaa che'na' na' gone' ka wli'lao yel' wak che'na', per wzoile' wdape' yel' chxenlall' che beṅ'ka' chidoṭ' yel' zak'zi'na', beṅ'ka' ba nakan kwiaiyi'. ²³Na' lekzka', ba bli'e ka liizelozu beṅ' wen inleeb nake' daa ba biyesh'lallile' cho' na' bizi'xene' checho, na' biyone' cho' beṅ' li beṅ' shao' kwenche idol'cho balaan ka yillincho lawe'na'. ²⁴Na' ba gox wṅab Chioza' cho', aga baṭz neto' naknto' beṅ' Israelan', san len baṭ-le bi nakle beṅ' Israel. ²⁵Chak ka wna Chioza' daa bzej dii Oseaza', daa na: Beṅ'ka' bi nak yel' cha', yepgakee: "Nakle yel' cha'."

Na' ben'ka' bi gokid', yepgakee: “Chakid' le'.”

²⁶Na' latja' gana' golle' legake' bi nakgake' yell che', wsi' ben' legake' xiin Chios yaa Chios ban.

²⁷Ki wna dii Isafaza' che ben' Israelka': “La'kzi shesh shan ben' Israelka' axt gakgake' ben' zan ka yox daa chi' cho'a nisdona', balchokzgaken' yilagake' kwenche bi kwiayi'gake'.” ²⁸La' Xancho Chioza' lobe' wchogbi'e ka gak che yog' ben' lle' yell-lioni.” ²⁹Ka bzej dii Isafaza', kana' wne':

Shel' Xancho Chioza', beena' nak liizelozu ben' yel' wak choo yel' wak xen, bi bkwaane' sto chop dia chechoka', ba biyol binitcho ka gok che ben' yell Sodomaka' na' ben' yell Gomorraka', shel'ka'.

³⁰¿Nakra inacho, naa lla? Ben'ka' bi nak ben' Israel bi wzegake' wneyi kwenche yiyakgake' ben' wen lao Chioza', per daa ben'ilal'gake'ne', ba biyakgake' ben' li ben' shao' lawe'na'. ³¹San ben' Israelka', la'kzi goklall'gake' yiyakgake' ben' wen lao Chioza' daa zejlangake' ley che'na', bi wxakgakile'n. ³²Na' ¿biche bi biyakgake' ben' li ben' shao' lawe'na'? Daa bi ben'ilal'gake'nen'. Kon gokgakile' ina Chioza' nakgake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj, ³³yaja' daa chzetj Cho'a Xtill' Chioza', daa na:

Wselaa to ben' yell Sionna', na' saklebile' ka to yaj daa chjachew' ben', na' ka to yaj dii lljsho'gake' na' ibixgake'.

Na' beena' wxenilalleene', biga yiyajile' daa nxenilalleene'.

10 Na' le' ben' bish' na' le' ben' zan', daa lialallaa na' daa chnab' kat' choe'llwill' Chioza' chnabidee yisle' ben' wlall' cha'ka', ben'ka' nak ben' Israel,

kwenche bi kwiayi'gake'. ²Nez nle'id' chegake' zechgagake' wneyi gongake' ka cheeni Chioza', toz daa bi nezgakile' nakyen'an cheenile' gongake'. ³Daa bi chajni'gakile' toz Chiozan' chiyone' ben' ben' li ben' shao', chaklall'gake' yiyon kwingake' ben' wen, na' bi cheengakile' gon'ilal'gake' Cristona' kwenche yiyakgake' ben' li ben' shao' lawe'na'. ⁴La' daa bid Cristona', bene' daa bi gok gon leya', na' yog' ben'ka' gon'ilal'gake'ne' yiyakgake' ben' li ben' shao' lao Chioza'. Na' bich goncho lez daa goncho ka na leyan' yiyakcho ben' wen lawe'na'.

⁵Dii Moisza' bzeje' ka chiyal' gon ben'ka' zoa xni'a leya' kwenche yiyakgake' ben' wen lao Chioza', na' nan: “Nottezə ben' chon doxen ka na leya' si'e banez yel' mban che'na'.” ⁶Na' che ben'ka' nak ben' li ben' shao' lao Chioza' daa non'ilal'gake'ne', wne': “Bi sa'lall'zle, inale: ¿Nora gak shaj yabana'?", (kwenche gone' ka yetj Cristona' yell-lioni). ⁷“Ni bi inale: ¿Nora gak yetj gana' lle' ben' wetka'?", (kwenche lljaleje' Cristona' ladje'ka'). ⁸Ki chizna daa bzej dii Moisza': “Dillaa daa ba wna Chioza' zoalenan le' na' ba yoon cho'a loll'lena' na' loo yichjlal'do'lena'”, na' lennan' daa choe'lennto' le', nanto' chiyal' gon'ilal'le Cristona'. ⁹Shi wi'o dill' Jesúza' nake' Xancho na' shajli'o do yichj do lalloo nan Chioza' bisbane'ne' ladj ben' wetka', na' yisla Chioza' li kwenche bi kwiayoo. ¹⁰La' daa shajle'cho do yichj do lall'chon, yiyakcho ben' li ben' shao' lao Chioza', na' lekzka' daa choe'cho dill' nan Cristona' nake' Xancho, yisle' cho' kwenche bi kwiayi'cho.

¹¹Cho'a Xtill' Chioza' nan: “Nottez ben' gon'ilalleene', biga yiyajile' daa ben'ilalleene'.” ¹²Laa nakcho ben' Israel, laa bi nakcho ben' Israel, Cristona' nake' Xancho, na' chaklene' yog'cho cho' chnabcho yel' goklen lawe'na'. ¹³La' not-

tezə beŋ' inabe' gaklen Xancho Crístona' le', na' yisle'ne' kwenche bi kwiayee. ¹⁴Per ɔnakra gon beŋ' inabgake' gaklene' legake' shi bin' gonlilall'gake'ne'? Na' ɔnakra gongake' gonlilall'gake'ne' shi bin' yengakile' xtilleena'? Na' ɔnakra gak yengakile' xtilleena' shi kono zoa chixje'ile'n legake'? ¹⁵Na' ɔnakra gak soa beŋ' chixjee xtilleena' shi kono wsel' legake'? Ka na Cho'a Xtill' Chioza': "Mbalaz inlleb kat' ila' beŋ'ka' ziditixje'gake' dill' wen dill' kob che Chioza'."

¹⁶Per aga yog' beŋ' Israelka' chzenag-gake' dill' wen dill' kob che Chioza'. Chak ka bzej dii Isaíaza', gana' na: "Xan', kono chajle' dillaa daa chyixje'nto'." ¹⁷Daan, kwenche gonlilall' beŋ' Crístona' chiyal' yengakile' xtilleena'.

¹⁸Na' nia': ɔAbin' yengakile' cho'a xtilleenan', lla? ɔYog'ze' ba bengakile'n! La' cho'a xtill' Chioza' nan:

Cho'a xtilleeka' chllinan doxen yell-lioni axt gana' zeelo chiyoll chidon.

¹⁹Na' chiznia', ɔanti neto' beŋ' Israelan bi wyajniinto'n, lla? Zajniinto'n. La' dii Moiséza' wdixji'e daa goll Chioza'ne' che beŋ' Israelka' kana' wne':

Nad' Chios gon' wen che beŋ'ka' bi nakgake' yell cha' kwenche gaklall'le gon' chele ka chon' chegake'.

Na' gon' kwenche illaale daa chon' wen che beŋ' zit'ka' beŋ'ka' bi napgake' ye!' chajni.

²⁰Na'tech dii Isaíaza' biyaxjile' wne':

Beŋ'ka' bi wze wneyi gombia'gake' nad', ben' ka bembia'gake' nad'.

Na' ben' kwenche beŋ'ka' bi wyoo yichj-gake' nad' bembia'gake' nad'.

²¹Na' dii Isaíaza' lekzka' wdixji'e daa goll Chioza'ne' che beŋ' Israelka' kana' wne': "Toshiizi goklallaa gaklen beŋ' wide-nagka', beŋ'ka' bi chzoa xtilleena'."

11 Na' nia': ɔaba wlej yichj Chioza' yell che'na' toshiizin, lla? ɔBi nakan ka! La' lekzka' nad' nak' beŋ' Israel. Golj' lo dia che dii Abrahamana'

na' nak' xiin dia che dii Benjamínna'. ²Kani'teyi wlej Chioza' neto' beŋ' Israel kwenche naknto' yell che', na' aga ba wlej yichje' neto'. ɔAbi chjtinile ka na Cho'a Xtill' Chioza' che Elíaza'? nan ka be'lwille' Chioza' wdawe' xya che beŋ' Israelka', chi'e: ³"Xan', beŋ' wlall cha'ka' ba betgake' beŋ'ka' wdixjee daa gollo' legake' na' ba bliiayi'gake' gana' chzeynto' bayix'ka' chonnto' li'. Stochga nad' chgaana', na' lekzka' cheengakile' witgake' nad'." ⁴Na'ch Chioza' golle'ne': "Ni nzoa' galla mil beŋ' Israel, beŋ' chzenag cha' na' bin' wchek' xibe'ka' lao Baala'." ⁵Na' ka'kzan chak naanlla, zi xonjchga neto' beŋ' Israel chzenagnto' che'. Na' ye!' beŋ' wen che'na' wleje' neto' gaknto' lall' nee daa nake' beŋ' chiyesh'lallii. ⁶Na' shi ye!' beŋ' wen che'nan' wleje' neto', zevin aga wleje' neto' ni che shi bi dii wennan chonnto'. La' shel' wleje' neto' ni che dii wenna' chonnto', bi nakan to goklen daa bene' chento', shel'ka'.

⁷Beŋ' Israelka' goklall'gake' yiyakgake' beŋ' wen lao Chioza' tobiall'zgake', na' bi gokan, san beŋ'ka' ba wlej Chiozan' bdo!' bllongakile'n. Na' beŋ'ka' sto, zizikchli gokchgake' beŋ' widenag. ⁸Gok ka na Cho'a Xtill' Chioza' daa na: "Chioza' bchol' bnitile' legake' kwenche bi shajni'gakile'. Na' axt naanlla nakgake' ka to beŋ' bi chen chle'i." ⁹Ki wna dii Davina':

"Yiyakshga lni che'ka' ka to yalj dii wza-pan legake', na' ka to dii chgoo chchew'gake', na' sak'zi'gake'.

¹⁰Gakshgagake' ka beŋ' lchol'; na' toshiizi gak chegake' ka to beŋ' noa' to dii zii wal'."

¹¹Na'ch nia': ɔAada' bi bzenag beŋ' Israelka' che Chiozan' wchoonlallee legake' toshiizi, lla? ɔBi nakan ka! San daa bi bzoagake' xtilleenan', na'chan bisle' beŋ'ka' bi naklə beŋ'

Israel kwenche ben' Israelka' lekzka' gakkall'gake' yisle' legake'. ¹²Shi yel' widenag che ben' Israelkan' benan ka gok wen che ben'ka' bi nak ben' Israel, ¿alechlə ki gach wen chegake' kat' ben' Israelka' yiyonlilall'gake'ne'?

¹³De to dii cheenid' we'len' le' dill, le' bi nakle ben' Israel. Chioza' ba wleje' nad' na' bselee nad' laolena'. Na' do yichj do lallaa chon' dga bene' lall' na' gon', ¹⁴kwenche shi bal' ben' wlall' cha'ka' gakkall'gake' gak chegake' ka ba chwiagake' chak chele, na' yilagake' bi kwiayi'gake'. ¹⁵La' shi daa bzoa Chioza' ben' Israelka' ka'lə, bene' ka ben'ka' bi nak ben' Israel bizoalengake'ne' wen, le mbalaz kat' illin lla yilebe' ben' Israelka' sto shii. La' gak chegake' ka to ben' biban ladj ben' wetka'. ¹⁶Na' shi lee kwana' chbejcho daa chonicho yetxtil necha' daa choe'cho Chioza', zevin doxente kwana' nakan che'. Na' shi lo yaga' nakan che Chioza', lekzka' xoziiinka' nakgakan che'.

¹⁷Ben' Israelka' zaklebgakile' yag olivo wenna' daa bchogue' bal' xoziiinka', na' le' bi nakle ben' Israel zakleBILE' yag olivo yixaa daa bidee lee yag wenna'. Na' yag wenna' noxaan xozii yag olivo yixaa diika' bidee le'inna' na' cho'en yel' mban chegakan. ¹⁸Per bi gakile nakchle ben' wench aga ka ben' Israelka', ben'ka' zaklebi xoz' yaga' diika' bchogue'. Bi shep sha'lall'le, la' aga xoz' yagan' cho'en yel' mban cheyin san loinnan' choe'n yel' mban che xoziiinka'.

¹⁹Na' wnaljale: "Bchogue' xoziiinka' kwenche bidee neto' le'inna'." ²⁰Lekzile kan' nakan, la' daa bi benlilall'gake' Chiozan', bzo'e' legake' ka'lə, na' biyakle lall' nee daa nonlilall'lene'. Daan, bi shep sha'lall'le, san li gall illeb Chioza'. ²¹La' shi Chioza' bi biyeshile' xoz' yaga' diika' nak dowalj, lekzka' gone' chele shi naa. ²²Li gakbe'i ka ben' wen ben' shao' nak Chioza' na' lekzka' nake' ben' chsak'zi'. La' bsak'zi'e' ben'ka' bi benli-

lall'gake'ne', na' ba chone' wen chele. Na' gonche' wen chele shi gonle ka dii le gonlilall'lene', san shi bich gonlilall'lene' lekzka' wzoe' le' ka'lə. ²³Na' shi ben' Israelka' gonlilall'gake'ne', na' yidee legake' sto shii lee yaga', la' Chioza' wak gone'n. ²⁴Na' le' bi nakle ben' Israel, wak inacho nakle ka xoz' yag olivo yixaa diika' bidee lee yag olivo wenna', la'kzi bi nakan dowalj xoziiin. ¿Alechlin diika' nak dowalj xoziiin ki yideen sto shii? Ben' Israelka' nakgake' ka xoziiin daa nak dowalj, na' aga bi lallj nakan yileb Chioza' legake' dii yoblə.

²⁵Le' ben' bish' na' le' ben' zan', de to dii bin' inezile daa bzajni Chioza' nad', na' cheenid' inezilen kwenche bi gakkze ben' cha'sib na' gakkze zak'chle ka neto' ben' Israel. La' aga toshiizin gak ben' Israelka' ben' widenag, san kat'ka' ba bza' ben'ka' bi nak ben' Israel gonlilall'gake' Cristonan', bich gak ben' Israelka' wide-nag. ²⁶Na' ka illin lla gak ka', na'ch yog' ben' Israelka' yiyakgake' lall' na' Chioza'. Na' gak ka na Cho'a Xtilleena' daa na:

Yell Jerusalenna' ichej to ben'
yisell yilee ben'ka' nak xiin dia che dii
Jacoba' lao dii mala'.

²⁷Na' dgan chcheb' gon' chegake',
yizi'xen' saaxya che'ka'.

²⁸Na' daa bi bzenag ben' Israelka' dill wen dill' kob che Cristona', bllaa Chioza' legake'. Na' daa gok ka' got' latj benlilall'lene', le' bi nakle ben' Israel. Per Chioza' ni chakile' neto' ben' Israel daa wleje' dii xozxto'nto'ka' kwenche gaggake' ben' yell che'. ²⁹Na' daa chon' Chioza', aga wikwase'n na' bi chiyajile' daa chax chnabe' cho'. ³⁰Kana', le' bi nakle ben' Israel, bi bzenagle che Chioza'. Per naa, daa gok ben' wlall' cha'ka' ben' widenag lao Chioza', ba biyesh'lallile' le'. ³¹Na' daa bi chzenaggake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake'

ka chiyesh'lallile' le'. ³²La' Chioza' bi'e latj yog'loł ben' gokgake' ben' widenag kwenche yog'lołgake' yiyesh'lallile'.

³³¡Dii xen inleeb nak yeł' sin' na' yeł' chajni čhe Chioza'! ¡Ni to kono chajni daa nllie' bia' gak wa daa nllie' bia' gone'! ³⁴La' "ni to kono nezi daa chza'lall' Xancho Chioza', na' ni to kono gak wzajni-ile'ne' nakan chiyal' gone'. ³⁵Biga zoa ben' ba bi'e Chioza' dii naki che' kwenche gone' lez yigoo Chioza' wzon che'." ³⁶La' len' bxe bsile' yog'lołte dii de na' bllie' bia' chongakan ka chaklallee, na' yog'loł dii de nakan che'. ¡Le' chidołee koochone' balaan zejli kan! Kan' nakan.

12 Na' le' ben' bish' na' le' ben' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gakle dowalj ben' wen ka chazlallee, la' kan' chiyal' we'la'ochone'. ²Na' bi gonle txen diika' de lo yell-lioni, san li we' latj yikob Chioza' yichjall'do'lena' kwenche yilla' yeł' mban chelena'. Na' ka' gakbe'ile daa cheenile' gonle. Na' daa cheenile' goncho nakan dowalj dii wen, daa chazlallee.

³Daa nzoa Chioza' nad' gon' xshine'na', nia' le': Ni tole bi gakile ba nakle to ben' zakii. San li gakbe'i nak nakle lao Chioza' kon ka zej chaklene' le' chonlilall'lene'. ⁴Ka nak che kwerp chechoni, dii zan dii nsa'n na' aga toz ka dii chongakan. ⁵Ka'kzan cho', la'kzi nak zancha, tozan nakcho daa nonlilall'cho Crístona', na' ndil nllagcho ka ndil nllag diika' nsa' to kwerp.

⁶Chioza' ba bene' cho' wde wdeli daa gak goncho kon ka chazlallee gon to tocho. Daan, beena' naki che' chixje'ile' ben' daa che' Chioza'ne', chiyal' wxenilalleene' gaklene' le' gone'n. ⁷Na' beena' naki che' gaklene' ben', chiyal' gone'n do yichj do lallee. Na' beena' naki che' wli' wsedile' ben' yoblə, chiyal' wli' wsedile' legake'. ⁸Na' beena' naki che' wtip'e' lall' ben', chiyal' wtip'e' lall'gake'. Na' beena'

naki che' izanile' bi wi'e ben', chiyal' wi'en do yichj do lallee. Na' beena' naki che' gak kwee xnezi dii chak che ben', chiyal' gone'n xochi ga zeelo gake'. Na' beena' naki che' yiyeshile' ben', chiyal' yibaile' gaklene' ben'.

⁹Li gaki ljwell-le do yichj do lall'le. Li gakzbani dii mala' na' li soa gonle dii wenna'. ¹⁰Li gaki ljwell-le ka bish' goljle, na' ganga goni ljwell-le ka ben' zak'chi ka le'.

¹¹Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.

¹²Li yiba yizaki daa nonle lez lljazoalenle Chioza', li gap yeł' chxenlall' kat' zaak yeł' zak'zi'ka', na' li we' lwill Chioza' toshiizi.

¹³Le' nakle lall' na' Chioza', li gaklen ljwell-le shi bi dii chyalljile. Na' li we' ben' ga yigaangake' loo yoo lill-le.

¹⁴Chiyal' inabile Chioza' gak wen che ben'ka' chsak'zi' le'. Li inab gak wen chegake' na' bi chishjle bia' blag' chegake'.

¹⁵Li yiba yizakleni ben'ka' chiba chizaki na' li kwell-len ben'ka' chbell.

¹⁶Li soalen ljwell-le wen. Bi gakle ben' cha'sib, san li gon txen ben' yesh'do'ka'. Na' bi gon kwinle ka to ben' sin'.

¹⁷Shi ga zoa ben' chone' mal chele, bi yizi'le wzonna'. Chiyal' sho' yichjle gonle wen lao yog' ben'. ¹⁸Chiyal' gonle axt ga zeelo gakle kwenche soalenle yog' ben' mbalaz. ¹⁹Le' ben' bish' na' le' ben' zan', bi chiyal' yizi'le wzon che ben' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che ben'ka' chon dii mala'. Na' nad' wsak'zi'gakee." ²⁰Na' lezkka' nan: "Shi chbił chdon beena' chakzbani li', be' dii yeej gawe'. Na' daa gono' ka', yiyi yido'ile'." ²¹Bi we'le latj inabia' dii mala' le', san li gon wen kwenche gonle ga dii mala'.

13 Yog'cho chiyal' wzenagcho che ben'ka' chnabia', la' aga bi yel' wñabia' de dii bi nak che Chioza'. Na' Chioza' nzoe' ben'ka' kwenche inabia'gake'. ²Na' beena' chizoshiy' ben'ka' chnabia', daa nllia Chioza' bia' gonchon chizoshiy'e. Na' ben'ka' chon ka', choglo chegake' sak'zi'gake'. ³Ben'ka' chnabia', aga zoagake' kwenche wwall wshebgake' ben'ka' chon wenan, san ben'ka' chon malan chiyal' gall illebgame' legake'. Shi chall chllebo' ben'ka' chnabia', ben wen, na' inegake' wen cho'. ⁴La' Chioza' nzoe' ben'ka' chnabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə ben'ka' chnabia'n, san Chiozan' nzoe' legake' kwenche wsak'zi'gake' ka chiyali beena' bi chon wen. ⁵Daan, chonan byen wzenagcho che ben'ka' chnabia', aga kwenchezə bi wsak'zi'gake' chon', san daa nezicho chiyal' goncho wenan. ⁶Na' lekzka' chiyal' we'cho daa chido'l'cho chixjcho, la' Chioza' nzoe' legake' kwenche chnabia'gake', na' lënnan' noni xshingake'.

⁷Na' chiyal' yiyixjcho che yog' ben' shi bi chbag'cho chegake'. Shi chal'cho daa chchixj ben'ka' chnabia' cho', chiyal' chixjchon. Na' beena' chiyal' idap balaan, chiyal' gapchone' balaan. Na' beena' chido'l' sho'e balaan, chiyal' koochone' balaan. ⁸Bi chiyal' ibag'cho che ben', san daa chiyal' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'. ⁹Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selalloo bi de che ben'." Yog'kzə diikin ba choncho lente yog' diika' sto nllia leya' bia' shi ba choncho dga na: "Chiyal' gaki bish' ljwello'na' ka chaki kwino'." ¹⁰Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

¹¹Li gakbe'i ka nak llaki zoacho naa. Ba gol' goncho ka dii le na' bich gonzcho ka ben' ches, la' gaoch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'. ¹²Ba zoa gao te che yell-lioni gani chnabia' dii mala' daa zaklebi yel' chola', na' ba zoa gao ile'icho beeni' che Chioza'. Daan, chiyal' kwey yichjcho dii mala' na' soacho goncho dii wenna' lega ben' yoo beeni' che Chioza'. ¹³Chiyal' wsa' checho wen, ka ben' chda tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichlə daa nak zban. Na' bi chiyal' gakkil-lencho ben', ni bi chiyal' gakcho ben' xe'. ¹⁴San chiyal' gon kwincho lall' na' Xancho Jesusristona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.

14 Li gap yel' chxenlall' che beena' biin' gakcha, na' bi gakkil-lenlene' ni che diika' bi nak dii llialo. ²La' bal' ben' chakgakile' nakkzan wen gaogake' bittezə yel' wao, na' zi bale' chakgakile' chiyal' gaogake' shgal' yix' kwan. ³Beena' cheej chao bittezə, bi chiyal' gonile' nakzi beena' bi cheej chao yog'lol'. Na' beena' bi cheej chao yog'lol', bi chiyal' gakile' beena' cheej chao bittezə bi chone' wen. La' Chioza' ba noni xine' choptegake'. ⁴¿Nora nako' li' wwia wyizo' nak chon wen llin che ben' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

⁵Na' nit' ben' chakgakile' zoa lla nakchan lla choo lla xench aga ka lla yoblə. Na' lekzka' zoa ben' chakgakile' toz ka nak yog'te llaka'. To to ben' chiyal' soe' do yichj do lallee gone' ka chakile' nakan wen. ⁶Na' beena' chaki zoa lla nakan lla choo lla xench aga ka lla

yoblə, chbeje'n kwenche kwee Xancho Crístona' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'lol, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

⁷Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Crístona'.

⁸Shi mbancho na' goncho ka sho' Xancho Jesucrístona' balaan, na' shi guetcho na' guetcho ka sho'e balaan. La', laa mbancho wa ba witscho, lall' na' Xanchona'kzan nakcho. ⁹Crístona' wite' na' bibane' ladj ben' wetka' kwenche gake' Xan yog'lol ben', ka ben' mban na' ka ben' ba wit.

¹⁰Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lolcho ljazecho lao Chioza' kwenche wchogloe' che to tocho. ¹¹Cho'a Xtill' Chioza' nan:

Xancho Chioza' ne', dii li zoakz' nad',
na' dii li yog' ben' wchek' xibe'ka'
lawa'ni,
na' yoguee we'gake' dill' nan nad' nak'
Chios.

¹²Na'chan to tocho yidecho kwent lao Chioza' che diika' bencho.

¹³Daan, bich chiyal' yiya yiyilj ljwellcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakchoplallee. ¹⁴Daa bza-jnii Xancho Jesúza' nad', nezid' aga bi yel' wao de dii chxinj chlenan cho', lete shi to ben' chakile' de yel' wao dii chxinj chlenan yichjlall'do'ena', bi nakan wen gawe'n shi naa. ¹⁵Na' shi daa cheej chawo' chonan ka chakchoplall' bish' ljwello'na', aga chakilo'nen' shi ni cheej chaozo'n. Bi chiyal' yeej gawo' daa gonan ka kwiayi' beena' wit Crístona' ni

che'. ¹⁶La'kzi chonle bittezə dii chakile nakan wen, bi chiyal' gonchlen shi chonan ka ina ben' yoblə aga wenan chonle.

¹⁷La' shi ba chnabia' Chioza' cho', diika' cheej chaocho bi nakan dii llialo, san dii llialo yiyakcho ben' li ben' shao' na' soalen ljwellcho mbalaz, na' soacho yiba yizakicho daa zoalen Espíritu Sántona' cho'. ¹⁸Na' shi zoacho choncho diiki chazlall' Crístona', na' yibayi Chioza' ka choncho na' lekzka' ben' yell-lioni inagake' choncho wen.

¹⁹Daan, chiyal' goncho to dii byen soalen ljwellcho mbalaz na' gakchachcho ganga. ²⁰Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen, san bi nakan wen yeej gaocho to dii chonan ka gakchoplall' ben' yoblə. ²¹Wentelan bi gaocho belaa ni bi yeejcho vinona', ni bi gonzcho bittezə dii gonan ka gakchoplall' bish' ljwellchoka'. ²²Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa nezile' nak wen. ²³Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

15 Na' cho' ba zoachechcho chonli-lall'cho Chioza', chiyal' gapcho yel' chxenlall' che ben'ka' bin' gakcha, na' bi chiyal' gonzcho daa cheenzicho goncho. ²To tocho chiyal' goncho dii gakle-nan bish' ljwellchoka' kwenche gakchagake'. ³La' Crístona' aga bene' daa wya-zlall' to kwintze', san gok che' ka na Cho'a Xtill' Chioza', daa na: "Daa wchell wne ben' cho' bzoazi'yaagakan nad'." ⁴Na' yog' diika' na Cho'a Xtill' Chioza' bzej-gake'n kwenche wzajniin cho' na' wti-pan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho.

⁵Chioza', beena' choṅ cho' yeḷ' chxen-lall' na' chtipe' lall'cho, gaklenshgue' le' soalen ljwell-le wen kon ka bli'yi Cristo Jesús'a' cho', ⁶kwenche yog'le gakle toz we'la'ole Chioza', beena' nak Xa Xancho Jesucristona'.

⁷Daan, li wleb ljwell-le, ka ben Crístona' blebe' le' bénlene' txen, kwenche koole Chioza' balaan. ⁸Na' nia' le', Crístona' bide' kwenche gaklene' neto' ben' Israel, kon ka bcheb Chioza' lao dii xoxzto'nto'ka' kwenche inezinto' chone' kon ka chchebe'. ⁹Na' lekzka' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na:

Daan, we'lawa li' ladj ben'ka' bi nak ben' Israel,

na' goḷ' inia' we'lawa li'.

¹⁰Na' gan yoblə chiznan:

Le' bi nakle ben' Israel, li yibaleni neto' naknto' yell che'.

¹¹Na' lekzka' gan yoblə chiznan:

Yog'le le' bi nakle ben' Israel, li we'la'o Xancho Chioza'.

Le' lle'le' yog'te yell, li goḷ' inie'.

¹²Na' lekzka' dii Isafaza' bzeje' daa na:

Ka to yag dii chigaa, ka' yiyak xiin dia che dii Isafina',

daa galj to ben' inabi'e ben'ka' bi nak ben' Israel,

na' gongake' lez gaklene' legake'.

¹³Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen yeḷ' wak che Espíritu Santo che'na' le'.

¹⁴Le' ben' bish'dawaa na' le' ben' zandawaa, nezyenid' le ben' wen nakle na' le ba chajniile, na' ba chak wzajniiljwell-le. ¹⁵Na' lee yishi ba biyaxjid' bzej' le' che baḷ' diika' bi chiyal' guetlall'le, la' chaklen Chioza' nad' kwenche ¹⁶chon' xshin Jesucristona' ladj ben'ka' bi nak ben' Israel. Na' llinni chon' nakan ka xshin bəox,

beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Crístona', na' yixis yiyib Espíritu Sántona' yichjlall'do'eka', na' gagkake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

¹⁷Daa chaklen Cristo Jesús'a' nad', chibaid' cho'a dill' chon' xshin Chioza' daa bene' lall' na'. ¹⁸Aga wiyaxjid' wi'a dill' che bichlə dii ba ben', san cho'a dill' ka ba bchin Crístona' nad' kwenche zan ben'ka' bi nak ben' Israel chzenag-gake' che'. Bchine' diika' wnia' na' diika' ben' ¹⁹kon yeḷ' wak che Espíritu che'na' kwenche gok diika' ben ble'i ben' na' wyajle'gake'. Wzolo' Jerusalénna' na' wya' axt doxen gana' mbani Ilíricon'a' be'len' yog' ben' dill' wen dill' kob che Crístona'. ²⁰Na' ben' byen jtixji'a dill' wen dill' kob che'na' gana' konon' inezin, kwenche bi jachish' jalan' xshin ben' yoblə. ²¹San kon ka na Cho'a Xtill' Chioza', gana' nan:

Ben'ka' bin' gombia'gake' xtilleena', gombia'gake'n,

na' ben'ka' bin' yengakile' xtilleena', shajni'gakile'n.

²²Na' ni che llin dga chon' bin' gak yid' gana' zoale, la'kzi zan shii ba gok-lallaa yidwia' le'. ²³Per naa ba biyoll ben' xshin Chioza' doxen gani chda', na' chakid' wak yidwia' le', la' kana'te chak-lallaa yid'. ²⁴Cheenid' tia' gana' zoale kat' sha' Españana', la' cheenid' ile'id' le', la'ch' shloll, kwenche soacho mbalaz. Na' chbez' gaklenle nad' kwenche gak kooch' nez. ²⁵Per naa, yiyaa Jerusalénna' Il-jasan' dii chyallji ben' bish'choka' lle' na'. ²⁶La' ben'ka' choe'la'ogake' Crístona' Macedóniana' na' Acáyani do yichj do lall'gake' ba btopgake' mech dii wse'gake' che ben' yesh'do'ka' len ladj ben'ka' nonlilall' Crístona' Jerusalénna'. ²⁷Do yichj do lall'gake' chaklall'gake' gaklengake' legake', na' dii li nakan to

dii chiyal' gongake', la' lengake' ba naki chegake' dii wenka' ba bcheb Chioza' che neto' ben' Israel, na' chiyal' yigoogake' wzon che ben' Israelka' we'gake' daa chyalljgakile'. ²⁸Na' ka yiyoll lljasa' mechi dga bengake' lo na', na' kwaa nez sha' Españana' na' tia' yidwia' le'. ²⁹Na' nezid' kat' yidwia' le', dii xen in-leb gaklen Crístona' cho'.

³⁰Le' ben' bish' na' le' ben' zan', daa nonlilall'cho Xancho Jesucristona' na' daa chon Espíritu Sántona' ka chaki ljwellcho, chat'yoid' le' gake nad' txen inabgachile Chioza' gaklene' nad' lawi diika' chdil' chllag'. ³¹Li inabi Chioza' yisle' nad' lo na' ben'ka' bi chonlilall'gake' Crístona', ben'ka' lle' gana' mbani Judeana', na' lekzka' li inabile' sho'lall' bish' ljwellchoka' lle' Jerusaléna' dga lljasa' chegake', ³²kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen. ³³Na' Chioza', beena' chon ka zoacho mbalaz, soalenshgue' yog'le. Ka' gakan.

16 Cheenid' gombia'le ben' zanchona' le Febe, beena' zoa chaklene' bish' ljwellchoka' nonlilall' Jesucristona' yell Cencreana'. ²Daa nonlilallee Xancho Jesucristona', wlebgachlene' do yichj do lall'le kat' yide' gana' zoale, la' kan' chiyal' goncho, cho' nakcho lall' na' Chioza'. Na' gaklenlene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

³Li wwapgach chiox Priscílana' len ben' che', Aquílana', ben'ka' chonlengake' nad' xshin Cristo Jesúza'. ⁴Legake' bzoa dii nxoll ye! mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' ben'ka' bi nak ben' Israel, ben'ka' ba nonlilall' Crístona' to to yell gana' jtixji'a xtilleena'. ⁵Na' lekzka' li wwapgach chiox ben'ka' chdop chllag choe'la'ogake'

Crístona' lille'ka'. Na' wwapgachle chiox Epenétona', beena' le chakid', beena' gok ben' nech benlilallee Crístona' gana' mbani Ásiana'. ⁶Li wwapgach Maríana' chiox, la' le ba bilal' bizodile' kwenche goklene' le'. ⁷Li wwapgach chiox ben' wlall' cha'ka' Andróniconá' na' Júniaza', ben'ka' wyoolen' txen lillyana'. Nech-gake' benlilall'gake' Crístona' ka nad', na' mbejlaogake' ladj ben'ka' chjtixjee xtilleena'.

⁸Li wwapgach chiox Ámpliaza'. Le chakidee daa nake' Xancho Jesucristona' txen. ⁹Li wwapgach chiox Urbánona', beena' chonlene' neto' xshin Cristo Jesúza', na' Estáquiza', beena' le chakid'. ¹⁰Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' ben'ka' nake' txen loo yoo lille'na'. ¹¹Li wwapgach chiox Herodiónna', beena' nak ben' wlall' cha'. Na' lekzka' li wwapgach chiox Narcísona' na' ben'ka' nake' txen loo yoo lille'na', ben'ka' nonlilall' Xancho Jesucristona'. ¹²Li wwapgach chiox Trifénana' na' Trifósana', noolka' chon xshin Xancho Jesucristona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'. ¹³Li wwapgach chiox Rúfona' beena' le zoacheche' chonlilallee Xancho Jesucristona', na' lekzka' xneena', beena' chonile' nad' ka xiine'. ¹⁴Li wwapgach chiox Asíncritona', Flegóntena', Hérmaza', Patróbaza', Hérmeza' na' ben' bish'choka' na' ben' zanchoka' zoalen legake'. ¹⁵Li wwapgach chiox Filólogona' na' Júliana', na' Nerewa' len ben' zane'na', na' Olímpaza' na' yog' ben'ka' zoalen legake', ben'ka' nak lall' na' Chioza'.

¹⁶Li wwapgach chiox ljwell-le lega ben' chaki ljwellin daa nakle Chioza' txen. Yog' ben'ka' nonlilall' Crístona' yel-lka' gana' ba wya' chwappake' le' chiox.

¹⁷ Le' beṇ' bish' na' le' beṇ' zan', li wsak' bi wzenagle che beṇ'ka' chon ka chak beṇ' choplā, na' gongake' ka gakklejile che dill' lina' ba nsedle. Bi gonle legake' txen. ¹⁸ Beṇ'ka' chon ka' aga chongake' ka cheeni Xancho Jesucristona', san chongake' daa nazan chegake'. Na' choe'la'o choe' dill'gake' na' choe'gake' dill' goll-lall' kwenche chonlej chongan-gakile' beṇ'ka' chajle'daz. ¹⁹ Yog'te beṇ' ba nezgakile' nakle beṇ' wizoa dill', na' le chiba chizakid' ka chonle. Na' cheenid' gake beṇ' sin' kwenche gonchle diika' nak wen na' bibi dii mal gonle. ²⁰ Na' Chioza', beena' chon ka soacho mbalaz, lii wlliyi'tie' yel' wak che Satanáza' na' gone' ka wlej wshoshjlen. Xancho Jesucristona' gaklenshgue' le'.

²¹ Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosípateri, beṇ'ki nak beṇ' wlall cha'.

²² Nad', Tercio, chzej' dga na Pábloni, na' lekzka' chwape' le' chiox daa nakcho Xancho Jesucristona' txen.

²³ Na' Gáyoni chwape' le' chiox, beeni none' lille'ni zoanto', na' lekzka' lille'ni no'en kwenche chdop chllag beṇ'ki choe'la'ogake' Crístona'. Na' Erástoni, beeni ngoo lo nee mech che yelli, chwape' le' chiox, na' lekzka' bish' ljjwell-choni le Cuarto.

²⁴ Xancho Jesucristona' gaklenshgue' yog'lołtele. Kan' gakan.

²⁵ Chiyal' we'la'ocho Chioza', beena' wak gone' ka soachechle gonlilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucristona'. Nakan daa kono wnezi kani'teyi, ²⁶ per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii beṇ'ka' wdixjee daa golle legake' kani'yi kwenche yog' beṇ' lle' doxen yell-lioni shajle'gake'n na' wzenaggake' cheyin.

²⁷ Toz Chioza' zeelo nake' beṇ' sin'. Na' chiyal' koochone' balaan zejli kani daa bselee Jesucristona'. Kan' nakan.

Kart nech daa bzej Páblona' na' bseleen lao ben'ka' nonlilall' Jesucrístona' yell Coríntona'

1 Nad' Pablo nak' ben' gox wñab Cristo Jesúza' kwenche gak' postl che' kon ka chaklall' Chioza'. Nad', len ben' bish'cho Sóstenezi, chwapnto' le' chiox. ²Chzej' le', le' chdop chllagle choe'la'ole Chioza' yell Coríntona', na' nakle lall' nee daa ba nonlilall'le Jesucrístona'. Chioza' gox wñabe' le' kwenche gakle lall' nee len yog' ben'ka' choe'la'ogake' Xancho Jesucrístona' gattezə, la' Xancho Jesucrístona' lekzka' nake' Xangake'. ³Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

⁴Toshiizi cho'a Chioza' ye! choxken ka wen ba bene' chele daa nonlilall'le Cristo Jesúza'. ⁵La' daa ba naklene' txen, Chioza' chaklene' le' kwenche chak gonle yog' diika' cheenile', ka choe'le xtilleena' na' leyi chajniilen. ⁶Na' ka', ba nakbia'cha dii li ba wyajle'le xtill' Crístona' daa be'lennto' le'. ⁷Na' daa ba non Chioza' le' daa chak gon to tole, ba chak chonle yog' daa cheenile gonle shlak chbezle yiyed Xancho Jesucrístona'. ⁸Na' gaklene' le' soachechle gonlilall'lene' axl llana' yiyede', kwenche bibi xtol'le gat' lawe'na'. ⁹Chios, beena' gox wñab le' kwenche nakle txen Xiine' Jesucrístona', beena' nak Xancho, toshiizi chone' ka chchebe'.

¹⁰Le' ben' bish' na' le' ben' zan', chat'yoid' le' kon ye! wñabia' che Xancho Jesucrístona', li gak toz lao yog'lolte na' bi gonzə che chele, san toz ka li se wñeyi na' li gon toz dill' lao bittezə dii gonle. ¹¹Nia' ka', le' ben' bish'dawaa na' le' ben' zandawaa, la' ben'ka' lle' lill Cloéna' ba wñagake' nad' ka chakdil-len ljjwell-le. ¹²Nia' ka', daa ba-le nale:

“Nad' chon' txen Páblona'”, na' ba-le nale: “Nad' chon' txen Apóloza'.” Na' ba-le nale: “Nad' chon' txen Céfaza'.”[‡] Na' zi ba-le nale: “Nad' nak' txen Crístona'.”¹³ ¿Achakile' Crístona' nake' chop shon kwenlə? ¿Awa chakile nadaan wit' lee yag cruza' ni chele? ¿Anti lia'na' bzetjgake' ka wchoale nisa? Nezkzile bi nakan ka'. ¹⁴Choxken Chioza' ni tole bi bchoa' nisa', lete Crístona' na' Gáyona', ¹⁵kwenche kono inazə daa chone' nad' txenan wchoe' nis. ¹⁶Lekzka' bchoanis' ben'ka' lle' loo yoo lill Estéfanaza', na' bi chjadinid' shi nochlə ben' yoblə bchoanis'. ¹⁷La' aga bsel' Crístona' nad' wchoa' ben' nis, san kwenche chixje'id' legake' dill' wen dill' kob che'nan'. Na' ka chyixji'an, bi chpaa dill'ka' cho'a kwenche ki gaki ben' dill'ka' cho'a nakchan dii zak'chi aga ka daa wit Crístona' lee yag cruza'.

¹⁸Kat' no cho'e dill' che daa wit Crístona' lee yag cruza', ben'ka' kwiayi' chakgakile' bizan chon chnan. San cho' yisla Chioza' kwenche bi kwiayi'cho, nezicho nakan dill' zakii dii nsa' ye! wak che'na'. ¹⁹La' Cho'a Xtill' Chioza' nan:

Yinítloa' ye! sin' che ben' sin'ka'.

Na' gonllejid' ben'ka' chaki le chajni.

²⁰¿Bitgui gak gon ben' sin'ka' na' ben'ka' le' nsed ley che Chioza', na' ben'ka' choe' dill' dii chaki ben' nakan dill' sin'? La' Chioza' ba bli'e bibi zakii ye! sin' che ben' yell-lioni. ²¹Lo ye! sin' che'na', ba bene' kwenche aga ye! sin' che ben' yell-lioki gaklennan legake' gombia'gake' le'. La' wyazlallee yisle' ben' kwenche bi kwiayi'gake' daa shajle'gake' xtill' Crístona' daa chyixje'i ben' legake', la'kzi chaki ben' bizan chon chnan.

²²Ka nak ben' Israelka', legake' chñabgake' ile'gakile' ye! wak kwenche shajle'gake', na' ben' griegoka' chiyiljgake' daa chakgakile' nak ye! sin'. ²³San neto'

[‡]1:12 Céfás: kan' le Pédrona' de dill' arameo, daa gok xtill' Jesúza'.

chyixje'into' ben' daa wit Crístona' lee yag cruza', na' ben' Israelka' chakzbangakile' daa nanto' ka', na' ben'ka' bi nak ben' Israel chakgakile' biz dill' daa choe'nto'. ²⁴San cho' ba gox wñab Chioza' kwenche nakcho lall' nee, ka neto' naknto' ben' Israel na' ka le' nakle ben' griego, nezicho Chioza' bli'e yel' wak na' yel' sin' che'na' daa bselee Crístona' wite' ni checho. ²⁵Na' dga ben Chioza' daa chaki ben' yell-lioni bizan chon chnan, leyen'lannan' nakchan to yel' sin' xench aga ka bittezə yel' sin' che ben' yell-lioni. Na' daa chaki ben' yell-lioni chli'n bi nap Chioza' yel' wak, leyen'lannan' napchan yel' wak aga ka bittezə yel' wak dii nap ben' yell-lioni. ²⁶Le' ben' bish', li se wñeyi ka nak daa gox wñab Chioza' le' kwenche nakle lall' nee la'kzi aga zanle nape yel' sin'na' de yell-lioni, ni aga zanle nakle ben' zakii, ni aga zanle goljle lo dia che ben' zakii. ²⁷La' Chioza' ba wleje' ben' bi nake' ben' sin' yell-lioni kwenche wsi'e ben' sin'ka' yel' zto', na' wleje' ben' bibi zakii yell-lioni kwenche wsi'e ben'ka' zakii yel' zto'. ²⁸Chioza' ba wleje' ben' bibi zakii, na' ben' choni ben' legake' nakzi, na' ben'ka' kono nakgake' yell-lioni, kwenche chli'e bibi zakii yel' zakii daa de yell-lioni. ²⁹Na' ka', kono gak gon kwini ben' choo ben' xen lawe'na'. ³⁰La' kwinkzen' ba bene' ka gokcho Jesucristona' txen. Na' daa ba nakcho Crístona' txen, Chioza' ba none' cho' yel' sin' che'na', na' ba biyone' cho' ben' li ben' shao' lawe'na', na' ba bixis biyibe' yichjlall'do'chona' na' ba bisell bilee cho' lo ni'a na' dii mala'. ³¹Na' kon ka na Cho'a Xtill' Chioza': "Shi no cheeni wshalj wshon, chiya' wshalj wshone' che yog' diika' ba ben Xanchona' che'."

2 Na' le' ben' bish' na' le' ben' zan', ka bidtixje'id' le' xtill' Chioza', aga bpa' dill'ka' be'len' le', ni bi bchin' dill' sin' che ben' yell-lioni. ²Kana' wzoa lad-

jlena', ben' to dii byen be'len' le' toz xtill' Jesucristona' na' ka nak daa wite' lee yag cruza', na' bich bi dill' yoblə be'len' le'. ³Na' ka wzoalen' le', bleb' daa gokid' shi bi gak' wi'a xtill' Jesucristona' ka chiya'. ⁴Na' ka bshaljlen' le' na' ka wdixje'id' le' xtill' Crístona', aga bi'a dill' dii chaki ben' nakan dill' sin' kwenche kooyelaa le' shajle'le. San daa bi'a xtilleena' kon yel' wak che Espíritu che Chiozan' wyajle'le. ⁵La' aga goklallaa shajle'le ni che yel' sin' che ben' yell-lioni, san daa yenile' dill'ka' nsa' yel' wak che Chiozan'.

⁶Dii li de to yel' sin' daa choe'lennto' ben'ka' ba nakcha nonlilall'gake' Crístona'. Per bi nakan yel' sin' che yell-lioni, ni bi nakan yel' sin' che ben'ka' chñabia'gake' lo yell-lioni, la' wllin lla te che ben'ka'. ⁷San chzajniinto' le' yel' sin' che Chioza' daa ngash' kani'teyi, daa wlo'e xñezin kana' zi' wxə wsi'e yell-lioni. La' kana'te wlo'e xñezin yid Crístona' chixje' xto'choka' kwenche soacho mbalaz. ⁸Ni tlish' ben' wñabia'ka' zoa yell-lioni bi wyajni'gakile' yel' sin' che Chioza', la' shel'ka' wyajni'gakile'n, bi betgake' Xancho Crístona' lee yag cruza', beena' liizelozi nak ben' choo ben' xen. ⁹Per ka na cho'a xtill' Chioza':

Daa konon' ile'i na' konon' yeni, ni konon' sa'lall' shi gakan, lënnan' wloo Chioza' xñezin gone' che ben'ka' chakgakile'ne'.

¹⁰Na' Chioza' ba bene' kwenche Espíritu che'na' ba bzajniile' cho' cheyi diika'. Na' Espíritu che'na' nez nle'ile' yog'lol, na' chajniile' kwaslol yog' daa nak che Chioza'.

¹¹La' cho' ben' yell-lion shinchozə nezicho dii yoo loo yichjlall'do' kwini, na' bi nezicho bi yoo loo yichjlall'do' ben' yoblə. Kakzan, toz Espíritu che Chioza' nez nle'ile' daa ngoo Chioza' xñezin. ¹²Na' cho' aga yel' sin' daa de yell-lionin chchincho, san Chioza' ba bene' cho' Espíritu che'na' kwenche chajniicho

ka nak dii wenna' daa ba none' cho'.
 13 Na' neto', kat' cho'ento' xtill' Crístona',
 aga chchinnto' ye! sin'na' de yell-lionizə,
 san chzajniinto' diika' chzajni Espíritu
 che Chioza' neto', na' chchinnto' dill' daa
 chzajniile' neto'.

14 Na' beena' bi yoo Espíritu che
 Chioza' loo yichjlall'do'ena', bi chajli'e
 dill' daa chzajni Espíritu che Chioza',
 daa chakile' bizan chon chnan. Na'
 bi chajniile'n daa chyaljin gaken Espí-
 rítuna'ne' kwenche shajniile'n. 15 San
 beena' yoo Espíritu che Chioza' loo
 yichjlall'do'ena' chajniile' che bittezə daa
 cheeni Chioza' inezile', na' kono gak bi
 ina che'. 16 Cho'a Xtill' Chioza' nan: "Ni
 to kono nezi daa cheeni Xancho Chioza'
 gone', na' ni to kono gak wzajniile'ne'
 nakan chiyal' gone'." San cho' ba yoo Es-
 píritu che Chioza' loo yichjlall'do'choni,
 ba chajniicho daa cheeni Crístona' gone'.

3 Le' ben' bish' na' le' ben' zan', bi gok
 we'len' le' ka dill'ka' choe'len' ben'ka'
 ba nakcha lo xnez Chioza', daa ni chonle
 ka nazan chele, na' ni nakle ka bi'do' daa
 bin' shajni'yen'ile che Crístona'. 2 Na' ka
 chon ben' kon bdo' cheenna' cho'eb' nil-
 laa daa bin' gak gaob' ye! wawa', kan'
 ben' chele, bi be'len' le' dill' dii nak lallj,
 la' bin' gak shajniilen. Na' ni naa bin' sha-
 jni'kzilen. 3 Nia' ka', daa ni chonle daa
 nazan chele. Daa chakxe'i ljwell-le, na'
 chakdil'-len ljwell-le, chli'n ni chonle ka
 nazan chele na' chonle ka ben' bi nombia'
 Chioza'. 4 Daa na ba'-le: "Nad' nak' txen
 Páblona'", na' zi ba'-le nale: "Nad' nak'
 txen Apóloza'", ¿abi chakbe'ile ka ben' bi
 nombia' Chiozan' chonle?

5 ¿No nak Apóloza'? Na' ¿no nak' nad'?
 Zeelochoz naknto' wen llin che Xancho
 Crístona', na' le' bene' ka ben'ilall'lene'
 ka be'lennto' le' xtilleena'. To to neto'
 bennto' kon ka wlo'e xnezin gonnto'.
 6 Nad' nak' ka beena' goz daa wdis' xtill'
 Crístona' ladjlena', na' Apóloza' nake' ka
 beena' wdil, daa bli' bsdchile' le'. Per

Chioza' bene' ka wyajle'le daa bli' bsd-
 into' le'. 7 Na' aga no nak beena' chaz
 ni beena' chyl, la' toz Chiozan' chone'
 ka chgol daa ba byaz. 8 Toz ka zak'
 beena' chaz na' beena' chyl. Na' Chioza'
 gone' kwenche to toe' si'e banez kon
 ka nak llinna' daa bene'. 9 Neto' naknto'
 txen chonnto' xshin Chioza' ladjlena',
 na' naknto' ka ben' goz goon che', na'
 le' nakle ka yell-lío che' gana' chonnto'
 llinna'. Na' lekzka' nakle ka to yoo che'
 dii chonnto'.

10 Chioza' ba goklene' nad' chon'
 xshine'na' ladjlena', na' daa ben'
 ladjlena' nakan ka ben' wlek to len
 yoo, na' ben' yoblə chlise' zeeka'. Na' to
 to wen llin chiyal' wsakee shi chone'
 llinna' ka chiyal' gakan. 11 Na' kono gak
 wxə sto len yoblin, la' Jesucrístonan'
 zaklebile' len yoona' ba chi'. 12 Na' lo len
 yooni, zoa ben' wxəile'n or wa plat, wa
 yaj dii zakii, na' zoa ben' wxəile'n yagla',
 wa yeje, wa yix. 13 Na' llinna' daa gon
 to toe' wli'lawin shi nakan dii zakii. La'
 kat' illin lla gon Chioza' ye! joschis che
 ben' yell-lioni, yi' che'na' wzeyan daa bi
 zakii, na' gakbia' nak nak llinna' ben to
 toe'. 14 Na' shi no ben to dii bi shey, na'
 si'e banez che xshine'na'. 15 Per shi daa
 bene' sheyan, na' bibi banez si'e cheyin.
 Na' kayaadia yile' bi kwiajee lo yi'na'.

16 ¿Abi chakbe'ile nan le' chdop chlla-
 gle choe'la'ole Crístona' nakle ka lill xlatj
 Chioza', na' Espíritu che'na' zoe' lad-
 jlana'? 17 Na' shi no wlliyi' lill xlatje'na',
 Chioza' wlliajee beena' gon ka', na' len'
 nakle ka lill xlatj Chioza' daa nakle lall'
 nee.

18 Bi siye' kwinle. Shi nole chakile
 nakle ben' sin' daa naple ye! sin' che yell-
 lioni, chiyal' yiyakle ka to ben' bibi cha-
 jni' lao ben' yell-lioni kwenche Chioza'
 gone' le' dowalj ye! sin'na'. 19 La' ye!
 sin' che ben' yell-lioni aga bi zakaan lao
 Chioza'. Cho'a Xtill' Chioza' nan: "Chioza'
 chone' kwenche ben' sin'ka' chakchix-

gakile' lo yel' sin' che'ka.' 20 Na' lekzka' nan: "Xancho Chioza' nombi'e yog'lo! daa chza'lall' ben' yell-lioni, na' nezile' nakan dii bibi zakii." 21 Daan, ni tole bi chiyal' gakle ben' cha'sib daa shi non nakle txen, la' yog' ben' na' yog' dii de nakan chele kwenche si'le banez cheyin: 22 laa nad' Pablo, laa Apóloza', laa Cé-faza', laa yell-lioni, laa yel' mbanna', laa yel' wita', laa daa chak naa, laa daa zi' gak. Yog'nto' len yog' diika' nakgakan chele kwenche si'le banez cheyin. 23 Na' le' nakle lall' na' Crístona', na' Crístona' nake' lall' na' Chioza'.

4 Chiyal' gakbe'ile neto' naknto' wen llin che Crístona', na' nak lo na'nto' chzajniinto' ben' daa kono wnezi daa wloo Chioza' xnezin. 2 Na' chonan byen gonnto' kon ka ba none' lall' na'nto' gonnto'. 3 Na' aga bitek wneyi zia' shi le' wa laa xonj ben' chi'e nad' kwent wneyi shi chak gon' xshin Chioza' ka chiyal'. Ni nad' biga chbi'a kwent wneyi che kwini' shi chon' ka chiyal'. 4 Na' la'kzi bibi de dii chao chdian nad', aga ni che ka' bibi dol' cha' de. Toz Xancho Crístona' nez nle'ile' shi chon' ka chiyal' gon'. 5 Na' daan, bi chiyal' sele kwent wneyi ben', san li kwez axt kat'ka' yila' Xancho Crístona' na' wli'e lawi daa ngash' naa na' daa yoo loo yichjlall'do' yog' ben'. Kana'chan gon Chioza' ka sho'cho balaan shi bencho ka cheenile'.

6 Le' ben' bish' na' le' ben' zan', choe'len' le' dill'ki kwenche gak wen chele, na' cho'a dill' che kwini' len xtill' Apóloza' kwenche inezile ka chonnto' na' wsedle bi tele lawi daa na Cho'a Xtill' Chioza'. Na'ch bi gakle ben' cha'sib na' soazle che bal' ben' na' gonzile zi bal' nakzi. 7 Achakile nakchle ben' zak'chi aga ka ben' yoblø? La' Chioza' bene' diika' ba napple. Na' daa ben' Chioza'gakan, ¿berache chshalj chshonzle cheyin ka ina-cho tobial'lozlen bllelilen?

8 Le' chakile bich bi chyalljile. Chakile ba nakle ka ben' wni'a daa non Chioza' diika' gak gon to tole. Chakile ba chnabia'lenle Crístona' na' bich chyalljile neto'. Le mba shel' dii li ba chnabia'le, kwenche len neto' inabia'lennto' le', shel'ka'. 9 Chakid' Chioza' ba none' kwenche neto' postl naknto' ka ben' liizelozzi bibi zakii, na' ka ben' nchogbia' guet. Na' yog'te ben' yell-lioki na' len anjka' chibangakile' chwiagake' ka chak chento'. 10 Ben' zan chakgakile' naknto' ben' bi nteyi daa chonnto' xshin Crístona', san le', chon kwini'le ka ben' le' chajni' daa nonlilall'le Crístona'. Neto' chakbe'into' bibi chak gonnto', san le' chakile chak gonle bittezø. Chle'shii ben' le', san neto', chle'zbani ben' neto'. 11 Axt naanlla zoa kat' chbi' chdonnto', chyallj xalaannto', chsak'zi' ben' neto', na' aga bi lill xlatjnto' de. 12 Na' chisto yichj chisto lall'nto' chonnto' llin kon ni'a na'nto'ki kwenche gat' dii yeej gaonto'. Zoa ben' chyishjgake' bia' blag' chento', na' neto' chnablnto' gaken Chioza' legake'. Chchi chsak'gake' neto' na' chzo chzakinto' daa chongakile' neto'. 13 Chiya dii nagake' chento', na' neto' choe'lento' legake' dill' xochi. Na' chongakile' neto' ka ben' zeelo bibi zakii, ka to dii ba wchoon ben'. Axt naanlla ni chongakile' neto' ka'.

14 Aga chzej' dga kwenche wsi'a le' yel' zto', san kwenche wzajniid' le', daa chakid' le' ka xiin'. 15 Na' la'kzi zoa shi mil ben' wzajniile' le' che Crístona', toz beena' nak ka xalen zoa. La' nadaan nak' ka xale daa wlo'a le' lo xnez Cristo Jesús'a ka be'len' le' dill' wen dill' kob che'na'. 16 Daan chat'yoid' le', li gon ka chon'.

17 Na' daan, ba bselaa Timotewa' gana' zoale. Chakidee ka dowalj xiin' na' chone' xshin Crístona' ka chiyal' gone'. Le' yisee lall'le ka nsa' cha' lo xnez Cris-

tona', na' ka chzajniid' ben'ka' chdop chllag choe'la'ogake' Crístona' doxen gana' chda'. ¹⁸ Ba'le ba chep cha'lall'le daa chakile' bich yidwia' le'. ¹⁹ Per shi Xanchona' wi'e latj, yob yidwia' le' na' ile'id' shi ben'ka' chep cha'lall' dii li chak gongake' ka nagake' wa shi chshaljz-gaken'. ²⁰ Aga de dill'zan inacho ba chnabia' Chioza' cho', san daa gapcho yel' wak che'nan' na'chan gak goncho ka cheenile'. ²¹ ¿Nakra cheenile gon' kat' yidwia' le'? ¿Acheenile gonid' le' znia?', anti ¿we'len' le' dill' xochi daa le chakid' le'?

5 Ba benid' dill' nagake' nan len to ben' ladjlena' zoalene' xna'zi'ena' ka xoolle'. Daa chon beena' nakan to dii zban inlleb; ni ben'ka' bi nombia' Chioza' bi chongake' ka'. ² Na' la'kzi chak ka' ladjlena', ni chep cha'lall'zle daa chakile ba chonle ka cheeni Chioza'. Chiyal'lə gakyeshilen na' yibejle beena' chon ka'. ³ La'kzi naa bi zoa' gana' zoale, le chi' yichj' ka nsa' chele. Na' kon li gaktezi na'kzan zoalen' le', na' li gon ka ba bchogloa' gak che beena' ben ka'. ⁴ Na' kat' ndi'a nllagle choe'la'ole Xancho Jesúsza', li gaktezi na'kzan zoa' ladjlena', na' daa zoalen yel' wak che Xancho Jesúsza' le', ⁵ li yibej beena' na' li gone' lall' na' Satanáza' kwenche shi yiyakbe'ile' na' yiyaj yilenile' na' yile' lo yel' zi'na' daa za' llana' wchoglo Xanchona' che ben'.

⁶ Bi nakan wen chep cha'lall'le. Ba nezskzile dillaa de nan: "Lat'z levadúrana' chisgolan doxen kwa che yetxtila'." ⁷ Dii mal daa ben beena' ladjlena' nakan ka levadúrana'. Na' ka neto' ben' Israel bi choe'nto' latj yigaan ni lat' levadúrana' loo yoo lilnto' kat' cha' lni Paskwa', ka'kzə le' chiyal' kwejle beena' chon zban ladjlena' kwenche gakte ka kwa kob daa bi nchix levadúrana', kon ka ba nakkzle. La' Crístona', beena' zaklebi xil'do'na' chitgake' Paskwa', ba wite' ni checho.

⁸ Na' ka chon ben'ka' chon lni Paskwa' chbejgake' yog'lol daa nchix levadúrana', ka'kzə cho' chiyal' soa kwezcho bich goncho saaxyana' na' bi dii mal daa bencho kani'yi, san soacho do yichj do lall'cho shajlencho daa nak dii li.

⁹ Ba bzejgz' le' to shii wnia' le' bi gonlele txen ben'ka' chdalen ljwellin. ¹⁰ Daa wnia' bi chiyal' gonle txen ben'ka' chdalen ljwellgake', wa chzelall'gake' gat' kwe'gakile' dii de yell-lioni, wa chbangake', wa choe'la'ogake' no yaj yag, aga che ben'ka' bi nombia' Chiozan' nia' ka', la' shel' bi gak lencho ladje'ka' chiyal' ichejtezkcho lo yell-lioni, shel'ka'.

¹¹ San daa wnia' ka' zejzin bi gak lencho nottezə ben' ne' nake' cho' txen nonlilall'cho Crístona' na' chdalene' xiin xool ben', wa chzelallile' gat' kwe'ile' dii de yell-lioni, wa choe'la'owe' no yaj yag, wa chbell chnie' che ben', wa nake' weezo, wa nake' ben' wban. Yog' ben'ka' chon ka', ni bi yeej gaolenle legake'. ¹² Bi nak lall' na'cho kwe'cho kwent wneyi ben'ka' bi nonlilall' Crístona'. San ben'ka' nakcho txen nonlilall'cho Crístona', legaken' chiyal' kwe'cho kwent wneyi. ¹³ Chioza' yizi'e kwent ben'ka' bi nonlilall' Crístona'. Na' le', li yibej beena' chon dii mala' ladjlena'.

6 Kat' tole de to dii zed chele kon sto beena' nakle txen nonlilall'le Crístona', bi chiyal' shajle lao ben'ka' bi nonlilall' Crístona' kwenche gongake' yel' joschis chelena', san li shaj lao ben'ka' nak lall' na' Chioza' kwenche gongake' yel' joschis chelena'. ² ¿Abi nezile wllin lla le' nakle lall' na' Chioza' gonle yel' joschis che ben' yell-lioki? Na' shi len' gonle yel' joschis che'ka', lekzka' wak gonle yel' joschis che bizə diido'ka' chak naa. ³ ¿Abi nezile axt anjlka' goncho yel' joschis che'ka'? Na' shi goncho yel' joschis che anjlka', ¿abi gak goncho yel' joschis che diiki chak naa zoacho yell-lioni? ⁴ Na'

shi le' chakdił-len lıjwell-le ni che biz diika' chak chele, ¿berache chajzle lao joschiska' ben'ka' bi nonlılall'gake' Crıstona', ben'ka' bibi zakii ladjlena'?⁵ Nia' le' ka' kwenche yido'latile. ¿Aniga tlısh'le bi nteyi kwenche gak gonle yel' joschis che ben'ka' nonlılall'lenle Crıstona'?⁶ Latjin dii gonlen ladjle na'z, ba zejzle zjtaole xya che lıjwell-le lao joschiska' bi nonlılall' Crıstona'.

⁷ Na' daa chao xya che lıjwell-le chli'n bi nsa' chele wen. ¿Biçe ki chonxenlall'le yog' dii choni ben' le', wa ki chonle ka'z kat' no chzi' chban bi de chele?⁸ Per le'lə, lwaa dii gonle ka', dii zan dii choni lıjwell-le na' chizi' chibantezle che lıjwell-le.

⁹ ¿Abi nezile ben'ka' bi chon wen aga willingake' gana' zoa Chioza' chnabi'e? Bi siye'z kwinle, la' ka nak ben'ka' chdalen lıjwellin, ben'ka' choe'la'o yaj yagka', ben'ka' bi chon banez xoolin wa noolka' bi chon banez ben' cheyin, ben' xejka',¹⁰ ben' wbanka', ben'ka' chzelalii gat' kwe'gakile' daa de yell-lioni, ben' weezoka', ben'ka' chbell chne che ben', wa ben'ka' chyiljall' naklə si' kwangake' bi de che ben', ni to ben'ka' chon diiki bi yillingake' gana' zoa Chioza' chnabi'e.

¹¹ Na' bal-le gokle ka ben' malki kana'. Per naa Chioza' ba bixis biyibe' le', ba none' le' yell che', na' ba biyone' le' ben' li ben' shao' lawe'na' daa ba nonlılall'le Xancho Jesucristona' na' daa chon Espıritu che'na' llin lo yel' mban chelena'.

¹² Dill' de, nan: "De latj goncho bittezə." Likzan, per aga yog' daa goncho nakan wen. Na' la'kzi de latj goncho bittezə, bi chiyal' we'cho latj inabia'n cho'.¹³ Nezicho yel' wawa' nakan che leechoni, na' leechoni none'n kwenche shoon yel' wawa'. Per Chioza' gone' ka te che chopte diiki. Na' kwerp chechoni aga none'n kwenche nottez gat'lencho, san kwenche goncho daa cheeni Xancho Crıstona', na' Xanchona' nak lall'

nee kwerp chechoni.¹⁴ Na' ka bisban Chioza' Xancho Jesucristona' ladj ben' wetka' kon yel' wak che'na', ka'kzan yisbane' cho' ladj ben' wetka'.

¹⁵ Nezile yog'cho nonlılall'cho Crıstona' chzaklebicho tkwen wej kwerp che'na'. Na' biga chiyal' wchincho kwerp chechoki nak ka tkwen wej kwerp che Crıstona' kwenche gat'lencho noolə wdana'.¹⁶ ¿Abi nezile nottezə ben' gat'lene' to noolə wda, chake'ne' toz? La' Cho'a Xtill' Chioza' nan: "Ben'ka' chop gakgake' toz kwerp."¹⁷ Per beena' chon kwine' lall' na' Xancho Crıstona', chake'ne' toz daa yoo Espıritu che'na' loo yichjlall'do'ena'.

¹⁸ Bi wchinle kwerp chelena' gat'lenze nottez ben', li ikwas lao dii mala' nak ka'. La' lennan' chxinj chlenchan kwerp chechona' aga ka bichlə dii mal yoblə. Beena' gon to dii mal yoblə, aga bi nonan che kwerp che'na', san daa chon beena' chchin kwerp che'na' chat'lene' nottez, chxinj chlenan do ka nake'.¹⁹ ¿Abi nezile kwerp chechoni nakan lill xlatj Espıritu Sántona', beena' bzoa Chioza' loo yichjlall'do'choni? Na' bi gak goncho daa nazan checho;²⁰ la' Crıstona' ba biya'o bizi'e cho' daa blalj xchene'na' na' wite' ni checho kwenche nakcho lall' na' Chioza'. Daan yog' daa gonlen kwerp chechoni chiyal' gonchon ka sho' Chioza' balaan.

7 Ka nak diika' wnable nad' ka bzejle nad', nad' nia' nakan wen shi bi ikaa che ben' byona'.² Per daa zoale dii nxoll gat'lenle nottez ka chon ben' yell-lioni, daan to to ben' byo chiyal' soa nool che', na' lekzka' to to noolə chiyal' soa ben' che'.³ Na' ben'ka' nshagna', ka ben' byo ka nool, bi chiyal' wlloni lıjwellgake' kwerp che'ka'.⁴ La' noola' aga nak kwerp che'na' che toze', san nakan len che ben' che'na'. Na' ka'kzə ben' che'na' bi nak kwerp che'na' che toze', san nakan len che xoolə'na'.⁵ Na' daan bi wlloni lıjwell-le kwerp cheleka', per shi choptele ba be'le

dill' bi gat'len l'jwell-le to tiemp kwenche we'lwill-le Chioza', aga bi nonan. Na' tena' chiya' yiyell l'jwell-le dii yoblə kwenche bi soale dii nxoll gon dii xiwaa le' gan na' we'le cho'a xbayi beli chenna' talenle ben' yoblə.

⁶Nia' le' ka' kwenche inezile wak wshagna' ben' byona' na' noola', per bi chonan byen shi bi cheengakile'. ⁷Nad' chakid' nakan wen shel'ka' yog' ben' byo soe' toze' ka zoa' nad', per wde wdeli nak daa non Chioza' gon to tocho.

⁸Na' le' bin' wshagna'le, na' lekzka' le' ba wit ben' cheleka', nia' le' naklan wen soa tozle, ka zoa' nad'. ⁹Per shi bi yizolen, wenchoklə ikaa chele kwenche bi sho' shel'all'le selall'le nool wa ben' byo daa chonan lallj inabia' kwinle.

¹⁰Na' le' nshagna'le, nia' le' kon ka non Xancho Críston'a' mandad gonle, aga nakan dii nia' nad': Noola' bi chiya' yilee ben' che'na'. ¹¹Na' shi noola' yilee ben' che'na', bi chiya' yikee ben' yoblə, san wenlan yiyoe'xene' ben' che'na' na' yikeene' dii yoblə. Na' ka'kzə ben' byona' bi chiya' yilee xool'e'na'.

¹²Ka le' nshagna'le na' bi nonlilall'le Críston'a' choptele, nia' le' dga, per bi nakan daa nllia Xanchona' bia' gonle: shi to ben' byo nshagna'lene' to noolə bi nonlilall' Críston'a', na' noola' none' lez ga'x'she'lene'ne', bi chiya' yilaa ben' che'na' le'. ¹³Na' shi to noolə nshagna'lene' to ben' byo bi nonlilall' Críston'a', na' ben' che'na' none' lez ga'x'she'lene'ne', bi chiya' yilaa xool'e'na' le'. ¹⁴Ben' byona', beena' bi nonlilallee Críston'a' shi nshagnee to noolə ben' ba nonlilalleene', Chioza' chle'shiile'ne' ni che nool che'na'. Na' noola', beena' bi nonlilallee Críston'a', shi nshagnee to ben' byo ben' ba nonlilalleene', Chioza' chle'shiile'ne' ni che ben' che'na'. Shel' bi nakan ka', bi chle'shii Chioza' xiine'ka', shel'ka'. San daa nonlilall' togake' Críston'a', Chioza' chle'shiile' xiine'ka'. ¹⁵Per

shi xoolo'na' wa ben' cho'na', beena' bi nonlilallee Críston'a', bich cheenile' soalene' li', be' latj yiyaje'. Bi chonan byen soayaadialenzo'ne', la' Chioza' ba gox wñabe' cho' kwenche soacho mbalaz. ¹⁶Na' li' nonlilalloo Críston'a', bi nezilo' shi wak gono' kwenche ben' cho'na' wa xoolo'na' gonlilallee Críston'a' na' yile' bi kwiayi'e.

¹⁷To tocho, ka ben' nshagna' ka ben' zoa toze', chiya' soacho kon ka non Xanchona' checho ka gox wñab Chioza' cho'. Ka'kzə chon' byen gon yog' kwen ben'ka' chdop chllag choe'la'ogake' Críston'a'. ¹⁸Shi nole yoole sen daa le circuncisión ka gox wñab Chioza' le', bi gonle ka yinit senna'. Na' shi bi yoole senna' ka gox wñab Chioza' le', bi koo kwinle sen. ¹⁹Aga bi nonan shi yoocho senna' wa shi bi yoochon, san daa lialote goncho ka nllia' Chioza' bia'. ²⁰To tocho chiya' soacho kon ka nakcho ka gox wñab Chioza' cho'. ²¹Shi ba nzi' ben' li' kwenche gono' xshine'na' ka gox wñab Chioza' li', bibi gakilo'. Per shi sho'ilo' xnezin yisane' li', ben to dii byen. ²²La' beena' ndoo chon xshin ben' ka gox wñab Chioza'ne', Críston'a' ba bisell bileene' lao dii mala'. Na' beena' chon xshinkze' ka gox wñab Chioza' le', ba nak Críston'a' Xane' daa ba biya'o bizi'ene' lao dii mala'. ²³Daa wit Críston'a' biya'o bizi'e cho' lo ni'a na' dii mala'. Daan chiya' wzenagch-cho che' aga ka che nottez ben'. ²⁴Na' le' ben' bish' na' le' ben' zan', kon ka zoa-cho ka gox wñab Chioza' cho', ka'kzan soa kwezcho lawe'na'.

²⁵Na' ka le' ni zoale tozle, bi nllia Xancho Críston'a' bia' nak gonle, per nad' inia' ka chakid' chiya' gonle. Na' daa ba biyesh'lallii Xanchona' nad', zak'kzi xtilaana' wzenaglen. ²⁶Nad' chakid' nakan wen soale kon ka zoale naa, la' llaki zoa-cho nakgakan dii lallj. ²⁷Shi zoa nool chele bi yilaa'lene'. Na' shi kono nool chele zoa, bi gonle byen ikaa chele.

²⁸ Shi wshagna'le, bi nakan mal; na' shi to nool wew' wshagna'b' lekzka' aga bi mal nakan. Per dii zan dii zed chen chle'i ben'ka' nshagna', na' chaklallaa bi gak chele ka'.

²⁹ Na' le' ben' bish' na' le' ben' zan', cheenid' inia' le' dga: Zi' lat'chga latj checho de. Daan, le' nshagna'le, bi we'le latj wsej wllon nool chelena' gonle ka cheeni Chioza'. ³⁰ Na' shi nole zoale nyesh' bi we'le latj wsej wllonan gonle ka cheeni Chioza'. Na' shi nole zoale mbalaz, bi we'le latj wsej wllonan gonle ka cheeni Chioza'. Na' shi nole cha'o chzi'le bitezə, bi we'le latj wsej wllonan gonle ka cheeni Chioza'. ³¹ Na' shi nole chzi'le banez dii de yell-lioni, bi we'le latj wsej wllonan gonle ka cheeni Chioza'; la' yell-lioni dga nombia'cho nakan dii te cheyin.

³² Nad' chaklallaa bibi sele wneyi cheyin, shel'ka'. La' ben' byona' bi nshagna' chzeche' wneyi daa nak che Xanchona' kwenche gone' ka yiyoollalee. ³³ San beena' nshagna' chzeche' wneyi cheyi daa de yell-lioni na' nak gone' kwenche yiyoollalii nool che'na' daa chone', ³⁴ na' choplə nak diika' chzie' wneyi cheyin. Na' nool tona' na' ka'kzə nool wewaa zechgake' wneyi che daa nak che Xanchona', na' do ka nakgake' chon kwingake' lall' nee kwenche gongake' daa cheenile'. San noola' nshagna' chzeche' wneyi cheyi daa de yell-lioni na' nak gone' kwenche yiyoollalii ben' che'na' daa chone'.

³⁵ Nia' le' ka' aga daa cheenid' wsej wllon' bi gonle, san daa cheenid' gaklen' le' gonle ka chiyali, kwenche bibi wllonan gon kwinle lall' na' Xancho Crístona' do ka nakle na' gonle ka cheenile'.

³⁶ Shi to bi' wew' ba nakan ikaab' to nool wew' bi' ba nzag'b', na' chakib' wenan ikaab' leb' daa ba golb', wshagna'chb', aga bi mal chom'. ³⁷ Per shi zoa bi' wew' chakib' bi chonan byen

ikaab' noolə na' wzoib' beli chen chebaa kwenche bi wxinj wlem', wenan gom' bi wshagna'b'. ³⁸ Na' bi'na' wshagna' wenkzan chom', per bi'na' bi wshagna'b' chontechb' wen.

³⁹ Na' noola' nshagna', chonan byen soalene' toz ben' che'na', shlak mbane'; per shi guet ben' che'na', wak yikee ben' yoblə, kon shi nake' ben' nonlilall' Xancho Crístona'. ⁴⁰ Per nad' chakid' wzoache' mbalazch shi bich yikaa che'. Na' dga ba wnia', chakid' Espíritu che Chioza' yoo loo yichjall'dawa'nin na ka'.

8 Na' ka nak che yel' wawa' daa chllia ben' lao lwaa lsak' chios che'ka', yog'cho nezicho cheyi dga. Per nxoll gakcho ben' cha'sib daa chakicho le nezicho. San shi napcho yel' chakina', wzecho wneyi gaklen ljwellcho gakchachcho. ² Na' beena' chaki le nezile', chiyal' gakbe'ile' bi nezile' ka chiyal'. ³ Per beena' le chakile' Chioza', Chioza' nombi'ene'.

⁴ Na' ka nak yel' wawa' daa chllia ben' lao lwaa lsak' chios che'ka', nezicho lwaa lsak' chios che'ka' bibi zak'gakan, san toz Chiozan' zoa. ⁵ Dii li de dii zan daa na ben' nakgakan chios chegake'. Per la'kzi nagake' zoa chios chegake' na' xan-gake' yabana' wa lo yell-lioni, ⁶ cho' nezicho toz Chiozan' zoa, beena' nak Xacho. Len' bxe bsil yog'lołte dii de, na' zoacho kwenche we'la'ochone'. Na' lekzka' zoa toz beena' nak Xancho, na' len' Jesucrí-tona', beena' bxe bsile' yog'lołte dii de, na' ni chen' mbancho.

⁷ Per aga yog' ben' nezgakile' dga. Bal ben' wyoologake' be'la'ogake' lwaa lsak' chios che'ka', na' kat' cheej chaogake' yel' wawa' daa ba bllia ben' lawinka' chak-gakile' txenan chonlengake'n. Na' daa bin' gakbe'gakile' bibi zakii diika', chak-gakile' malan' chongake' kat' cheej chao-gake' yel' wawa'. ⁸ Per aga ni che daa cheej chaochon ile'shi'chi Chioza' cho' wa gonile' cho' nakzi; la' aga bi chon

daa gaocho wa daa bi gaocho. ⁹Per cho', la'kzi chakbe'icho aga bi zakii lwaa lsak' chios che'ka' na' nezicho aga bi nonan shi yeej gaocho diika' blligake' lawinka', chiya' wsak'cho kwenche ki wchixcho beena' bin' gakcha lo xnez Chioza' gone' daa chakile' nakan mal. ¹⁰La' shi nezile aga bi zakii lwaa lsak' chios che'ka' na' cheej chaole gana' choe'la'ogake' le-gakan, na' ile'i to bish' l'jwell-le le', ben' bin' gakcha lo xnez Chioza', na' nxoll wchoglallee yeej gawe'n, la'kzi chakile' nakan mal. ¹¹Na' daa chonle daa nezile bi nakan mal, nxoll wlaale lo xnez Chioza' bish' l'jwell-lena' beena' bin' gakcha, beena' lekzka' wit Crístoná' ni che'. ¹²Na' daa chonle ka gon bish' l'jwell-lena' to dii na yichjlall'do'ena' bi chiya' gone', lao Crístoná'kzan chxinj chlenle. ¹³Daan shi daa cheej chaw' gonan ka wxinj wlen bish' l'jwellaa, naklan wen bichga gaw' belaa, kwenche bi gon' ka wxinj wlene'.

9 De lsens gon' daa chakid' nakan wen. Nad' nak' postl che Xancho Jesucrístoná'. Nad' ble'idee, na' le' ba nonlilall'lene' daa bzajniid' le' xtilleena'. ²Na' la'kzi zoa ben' bi chajle'gake' nak' postl che Jesucrístoná', le' nezile nak' postl che'. Na' daa ba nonlilall'lene' chli'n kan' nakan.

³Na' ki chilli'a xtill' ben'ka' na bi nak' dowalj postl: ⁴Nezile wak inabnto' gon ben' dii yeej gaonto' shel'ka'. ⁵Na' lekzka' wak ikaanto' to noolə nonlilallee Crístoná' na' wche'nto'ne' gana' gonnto' xshin Chioza', ka chon postlka' sto, na' ben'ka' nak ben' bish' Xancho Crístoná', na' lekzka' Céfaza'.[†] ⁶¿Achakile zeelo Bernabéna' len nad' chiya' gonnto' llinna' kon ni'a na'nto'ki kwenche yeej gaonto'? ⁷Aga ga zoa soldad chyixj gaxt che kwine'. Na' biga zoa ben' gaze' yag uvana' na' bi yeeje' daa chbian. Ni biga

zoa ben' gape' no shib wa no xil' na' bi yeeje' xill'bka' kat' chsie'n. ⁸Bi gakile nad'zan nia' ka', la' lekzka' na leya' bzej dii Moiséza'. ⁹La' leya' nan: "Bi wllino' yixja' cho'a goonka' kat' chlej chshoshjgakb trígona'." Na' aga toz che goonkan' ze Chioza' wneyi. ¹⁰San daa zie' wneyi chechon wne' ka'. La' leya' byoan kwenche gaklanen cho'. Ka beena' chwaan goonna', na' ka beena' chonshao' trígona', nongake' lez lengake' ikaagake' daa chizi' chilapgabe'. ¹¹Na' shi neto' naknto' ka ben' goz daa ba bzajniinto' le' cho'a xtill' Chioza', ¿achakile zi'telan gonnto' inabinto' le' shi bi chyalljinto'? ¹²Shi ben'ka' sto chli' chsedi le' choe'le daa chyallj chchingakile', ¿alechla neto'?

Per chonnto' banez bibi chnabinto' le' kwenche bibi gombeg wzenagle dill' wen dill' kob che Crístoná'. ¹³Nezkzile ben'ka' chon llin loo lill xlatj Chioza' cheej chao-gake' daa chjwa' ben'ka' lao Chioza'. Na' bxozka' chit bayix'ka' lao Chioza' de lsens gaogake' xpel' bayix'ka' chitgabe'. ¹⁴Na' ka'kzə Xancho Crístoná' bllie' bia' che ben'ka' chyixjee dill' wen dill' kob che'na', lekzan ibangakile'. ¹⁵Per nad' ni tshii bin' inabid' le' gonle dii chyalljid', ni bi chzej' dga kwenche gonlen. Wenchlan guet' aga ka daa ina ben' cha' chon' xshin Crístoná' daa naxjid'. La' chibaid' inia' bibi chchixj' chon' xshine'na'.

¹⁶Na' nad' bi gak wshalj wshon' daa chyixji'a dill' wen dill' kob che Crístoná', la' chonan byen gon' daa none' lall' na'. jNa' nyesh'laz gak cha' shi bi wi'a dill' wen dill' kob che'na'! ¹⁷Na' shel'ka' chyixji'an daa goljan loo yichjlall'dawaani, na' chidol' sia' laxj', shel'ka'. Per aga chyixji'an daa goljan loo yichjlall'dawaanin, san zeelo chon' daa ben Crístoná' lall' na' gon'. ¹⁸Na' dgan baneza' chizi'a: daa le chibaid' chyixji'a dill' wen dill' kob che Crístoná' na' bibi inabid' ben'

wzenague'n, la' bi cheenid' ibanid' dill' wen dill' kob che'na', la'kzi wak gon ka', shel'ka'.

¹⁹La'kzi kono ben' chnabi'e nad', chon kwin' ka ben' ndoo lla yel lao yog'lo' ben' daa choe'lengakee xtill' Crístona', kwenche shanch ben'ka' gonlilall'gake'ne'. ²⁰Kat' zoa' ladj ben' Israelka', ben'ka' nak ben' wlall' cha', na' chsa' cha' ka nsa' chegake' kwenche gonlilall'gake' Crístona'. Na' chon' daa na leya' bzej dii Moiséza' daa nogake' la'kzi nezid' bich chnabi'an nad'. ²¹Na' kat' zoa' ladj ben'ka' bi nombia' ley daa bzej dii Moiséza', na' chsa' cha' ka nsa' chegake' kwenche gonlilall'gake' Crístona'. Per bi inacho chzoa' ka'lə daa nllia Chioza' bia', la' chzenag' che leya' daa bzoa Crístona' loo yichjlall'dawaani. ²²Na' kat' zoa' ladj ben'ka' chaki dii zan dii bi de lsens gongake', na' chsa' cha' ka nsa' chegake' kwenche wzajni'chgakidee che Crístona'. Ba bsa' cha' ka nsa' che yog'lolgake' kwenche gon' gan yisla' balgake' na' bi kwiayi'gake'. ²³Chon' yog' diiki kwenche wzenag ben' dill' wen dill' kob che Crístona' na' yizi'lengakee banez cheyin.

²⁴Nezkzile ka nak che ben'ka' chxonj, zangake' chxonjgake', per tochokzen' gone' gan na' ikee daa chido'lee. Na' ka chon' beena' chxonj kwenche gone' gan, kan' chiya' gonle, li' gon ka dii le gonle ka cheeni Chioza' kwenche gone' daa si'le banez. ²⁵Ben' wyitjka' chsed, chbej yichjgake' daa choaziyaa kwerp che'ka'. Na' chongake' ka' kwenche idol' illongakile' daa yibagakile' xtiti shloll na' te cheyin. San cho' choncho to dii byen kwenche idol' illonicho to dii biga llia te cheyin. ²⁶Daan, nad' bi chon' ka beena' kon chxonj ni bi nezile' gan illine', ni bi chon' ka beena' chdi' na' bi chzakile' kwalle' beena' chdi'lene'. ²⁷San chnabi'a kwin' kwenche chon' daa chiya' gon' kwenche ki, ka yiyoll wli' wse-

did' ben' nakan chiya' gone', nad'lə bi sho'lall'zi Chioza' ka nsa' cha'.

10 Le' ben' bish' na' le' ben' zan', bi cheenid' gal-lall'le daa gok che dii xozxtochoka', yog'gake' wloogake' nez xan beja' daa bze Chioza' na' yog'gake' bidegake' lo neza' bsalje' loo nisdona'. ²Na' yog'gake' naggake' ka ben' wchoa nis daa gokgake' dii Moiséza' txen biyajlengake'ne' xan beja' na' daa bidelengake'ne' lo neza' daa byalj loo nisdona'. ³Na' yog'lo'le' wdaogake' toz yel' wao daa be' Chioza' legake'. ⁴Na' yog'lolgake' weejgake' toz nis daa bi'e legake', nisa' daa gol lee yaja', yaja' daa zaklebi Crístona', beena' wzoalene' legake'. ⁵La'kzi yog'lolgake' wxi'gake' banez diika', zangake' bi biyoolallii Chioza' ka bengake', na' witgake' gana' bibi chashj chleb.

⁶Na' yog' diika' gok chegake' chzajniin cho' bi chiya' selall'cho goncho dii mala' ka bengake'. ⁷Bi chiya' we'la'ole diika' non ben' lwaa lsak' chios che'ka' ka ben balgake', la' Cho'a Xtill' Chioza' nan: "Wche'gake' weej wdaogake' na' biyolla' bengake' kon daa nazan che beli chen che'ka'." ⁸Na' bi chiya' gat'lencho nottez ben', ka ben balgake', na' daa bengake' ka', shllaz wit shonichoa milgake'. ⁹Na' bi chiya' wzoacho Chioza' gone' daa nazan checho, ka ben balgake', na' daa bengake' ka' wdinyaa belka' legake' na' witgake'. ¹⁰Ni bibi gon inazle che Chioza' ka ben balgake' na' ni cheyin bse'lee anjl che'na' beena' bete' legake'.

¹¹Na' yog' diiki gok chegake' nakan to dii chzajniin cho' bi goncho ka bengake', na' lliagakan lee Cho'a Xtill' Chioza' kwenche chsi'nin cho' mbancho llaki zeelo. ¹²Daan, nottezcho shi chakicho zoachechcho nonlilall'cho Crístona', chiya' wsak'cho kwenche bi ibixcho goncho dii mala'. ¹³Yog' dii malaka' chdi' chllagle nakgakan ka diika' chdi' chllag nottez ben'. Na' wak wxenilall'le Chioza' gaklene' le', la' len' bi wi'e latj

idił illagle daa bi so sakile, san kat' idił illaglen, lekzen' gaklene' le' kwenche so sakile yichejle lawinna'.

¹⁴Daan, le' ben' bish'dawaa na' le' ben' zandawaa, bi we'la'ole diika' non ben' lwaa lsak' chios che'ka'. ¹⁵Chshaljlen' le' ba nteile, na' kwinkzle gakbe'ile shi dga chzajniid' le' nakan shli. ¹⁶Kat' chisa'lall'cho daa wit Crístona' ni checho, na' cheejcho lat' wej vinona' na' choe'cho Chioza' yel' choxken, zejín nakcho Crístona' txen daa blalj xchene'na' ni checho. Na' kat' chxoxjcho yetxtila' na' chaochon, zejín nakchone' txen daa bzani kwerp che'na' wite' ni checho. ¹⁷Na' la'kzi nakcho ben' zan, toz yetxtilan' chaocho, na' zejín nakcho ka toz kwerp.

¹⁸Na' li wwia ka chon ben' Israelka'. Yog' ben'ka' chaogake' xpel bayix'ka' chitgake' lao Chioza' nakgake' toz choe'la'ogake'ne'. ¹⁹Na' bi gakile nia' lwaa lsak' daa non ben' chios che'ka' nakgakan dii zakii, ni bi gakile' bel' che bayix'ka' chitgake' lawinka' zak'chgakan ka bittezə bel'. ²⁰San ki zejín daa nia' ka': kat' ben'ka' bi nonlilall'gake' Chioza' chitgake' bayix'ka' chliiagake'n lao lwaa lsak' chios che'ka', dii xiw'ka'lan choe'gake'n, na' aga Chiozan'. Na' bi cheenid' we'la'olenle legake' dii xiw'ka'. ²¹Bi gak yeej gaocho daa cheej chaocho kat' chisa'lall'cho daa wit Xancho Crístona', na' lekzka' yeej gaotezcho daa cheej chao ben'ka' choe'la'o dii xiw'ka'. ²²Bi chiyał' wshaacho Chioza', la' aga wzo wzakichone'.

²³Dez dill', nagake': "Wak goncho bittez dii cheenicho." Dii likzan, per aga yog' daa gak goncho nakan wen. La'kzi de latj goncho bittezə, aga yog' daa goncho gaklenan bish' ljwellchoka' gakchachgake' lao Chioza'. ²⁴Ni tocho bi chiyał' goncho ka gak wen che tozcho, san chiyał' gakencho ben' yoblə kwenche gak wen che'.

²⁵Bittezə bel' dii chit'gake' lao yaana' wakə si'len. Na' bi inable shi nakan dii bliiagake' lao lwaa lsak' chios che'ka' kwenche bi gakchoplall'le cheyin. ²⁶La' doxen yell-lioni na' yog'te daa de lawinna' nakan che Xancho Chioza'.

²⁷Shi to ben' bi nonlilallee Crístona' chaxe' le' lljtaole lille'na', na' cheenile' shajle, li yeej li gao daa gone', na' bi inabile' shi nakan dii bliie' lao lwaa lsak' chios che'na' kwenche bi gakchoplall'le cheyin. ²⁸San shi no ina le': "Beli nakan dii wllia lao lwaa lsak' chios cha'ka'", na' bi gaolen ni che beena' wna le' ka'. La' beena' wna ka' wakte gakile' malan chonle shi gaolen. ²⁹Bi gakile nia' malan gonle gaolen, san nia' ka' ni che beena' gakile' malan chonle shi gaolen.

La'kzi nezid' aga bi nonan gaw' bittezə, bi cheenid' gon' ka sa'lall' ben' yoblə nan malan' chon'. ³⁰Na' shi cho'a Chioza' yel' choxken cheyi daa gaw', ¿berache inaz ben' malan chon' daa chaw' to dii ba bi'a Chioza' yel' choxken cheyin? ³¹Na' bittezə dii chonle, shi cheej chaole wa shi bichlə dii yoblə chonle, chiyał' gonlen ka sho' Chioza' balaan. ³²Bi gonle ka ixop ben' yoblə gone' to dii mal, laa nake' ben' Israel, laa bi nake' ben' Israel, laa nake' ben' nakcho txen nonlilall'cho Chioza'. ³³Li gon ka nad', la' chon' to dii byen toshiizi chon' ka yiyoollalii yog' ben'. Aga chon' kwenche to nad'zə gak wen cha', san chon' ka gak wen che ben' yoblə kwenche yilagake' bi kwiyai'gake'.

11 Li wsa' to chele ka nsa' cha', la' nad' nsa' cha' ka bsa' che Crístona'.

²Le wen chonle daa toshiizi chjadinile nad' na' ni zejlenle diika' bli' bsedid' le'. ³Per cheenid' shajniile dga: Chioza' chnabi'e Crístona', na' Crístona' chnabi'e yog'loł ben' byo, na' ben' byoka' chnabi'a'gake' nool che'ka'. ⁴Na' nottezə ben' byo shi nkwash' yichje'na' shlak choe'lwille' Chioza' wa shlak chyixji'e

daa che' Chioza'ne', bi chgwee Crístona' balaan. ⁵San shi nottez nool bi wkwash' yichje'na' shlak choe'lwille' Chioza' wa shlak chyixji'e daa che' Chioza'ne', na' chnìte' balaan che ben' che'na'. Na' shi ka' chone', na' nake' ka to noolə ben' nshib axt lo yej. ⁶Na' shi to noolə bi wkwash' yichje'na', wenlan wshibteguen' axt lo yej. Na' shi chido'ile' wshiben', chiyal' wkwasheen. ⁷Na' ben' byona' bi chiyal' wkwash' yichje'na' daa nake' lwaasak' Chioza' na' chli'e balaan che'na'. Na' noola' chli'e balaan che ben' che'na'. ⁸La' aga kwit lee noolan' wlej Chioza' ben' byona', san noolan' wleje'ne' kwit lee ben' byona'. ⁹Na' ni bi bxie' ben' byona' kwenche gaklene' noola', san bxie' noola' kwenche gaklene' ben' byona'. ¹⁰Ni cheyi daan, na' ni che anjlka' len ladjchoka', chiyal' wkwash' yichje'ka' kwenche nakbia' chapgake' balaan ben' che'ka'. ¹¹Per cho' nakcho Xancho Crístona' t xen, nezicho noolka' chyalljgatile' cho' ben' byo, na' cho' ben' byo chyalljicho noolka'. ¹²La' ka nak daa bchej noola' kwit lee ben' byona', lekzka' ben' byona', noolan' chzane' le'; per Chiozan' bxe bsile' yog'lol.

¹³Na' le'zə, li wwiakachi shi nakan wen we'llwill noolka' Chioza' gal' yichjz-gake'. ¹⁴Kon ka yoolocho choncho, chakbe'icho nakan ye'l' zto' we'z ben' byona' latj igol yish' yichje'na'. ¹⁵San nakan wen we' noola' latj igol yish' yichje'na' na' nakan to balaan che'. La' Chioza' none'n kwenche wkwasha'n yichje'na'. ¹⁶Na' shi nole bi chazlall'le dga ba wnia', chiyal' inezile ka neto' na' ka yog' kwen ben'ka' chdop chllag choe'la'ogake' Chioza', toz ka yoolonto' chonnto'.

¹⁷Na' ka nak dga inia' le', bi gak inia' le wen chonle. La' kat' chdop chllagle choe'la'ole Chioza' lwaayin dii nan gaklenen le', chzoaziyaalan le'. ¹⁸Zigaate cheenid' inia' le' daa ba benid' nagake' chele nan kat' chdop chlla-

gle choe'la'ole Chioza' nonzə che chele. Na' chajli'a dii llijakz ka chonlen. ¹⁹Na' chakljayile chiyal' gagle chop shon kwenlə kwenche wli'lawin nolen chazlalli Chioza' ka chonle. ²⁰Na' kat' chdop chllagle na' cheej chaolen ljjwell-le t xen kwenche chisa'lall'le daa wit Xancho Jesucrístona', bi chonlen ka blìie' bia'. ²¹La' kat' yeej gaole, bi chbez ljjwell-le kwenche yeej gaole t xen, san to tole lii cheej chaotele ye'l' wao cheleka'. Na' bal-le bibi de gaole na' zi bal-le axt chzollile. ²²¿Abi zoa lill-le ga yeej gaole? ¿Berache chonzile nakzi ben'ka' nakcho t xen choe'la'ocho Chioza' na' chsi'zle ye'l' zto' ben'ka' bibi de yeej gaogake'? ¿Bitgui iniale, lla? ¿Achakile inia' le' le wen chonle? Bi inia' le' ka', la' aga wenan chonle.

(Mt. 26:26-29; Mr.

14:22-25; Lc. 22:14-20)

²³Dga ba bli' bseidid' le' nakan daa bli' bseidi Xancho Jesucrístona' nad'. Lle'na' ben Júda'ne' lo na' ben' malka', Xancho Jesús'a' bexee yetxtila', ²⁴na' biyoll bi'e Chioza' ye'l' choxken, na'ch bxoxje'n na' chi'e: "Dgan kwerp cha'ni daa chzanid' ni chele. Li gox' lat' wejan gaolen. Li gon dga kwenche lljadinile nad'." ²⁵Na' lekzka' biyoll wdaogake' xshe'na', bexee kopa' daa yoll vinona', na' chi'e: "Dga yollə loo kopi zejín xchen'na' daa laljə daa gon ka gaki dii koba' bcheb Chioza' gone'. Li gon dga, na' to to ka yeejlen li lljadini nad'." ²⁶Na' to to ka gaole yetxtila' na' yeejle vinona' axt llana' yiyed Xancho Crístona' zejín chyixje'ile ben' ka nak daa wite'ni checho.

²⁷Nottezə ben' gawe' yetxtila' wa yeeje' vinona' daa chonan ka lljadini-cho Xanchona', na' bi chape' balaan ka nak daa chone', toz ka nak xtoleena' ka che ben'ka' betgake' Xanchona' na' blaljgake' xchene'na'. ²⁸Daan, to tocho chiyal' yiya yiyilj kwíncho kat' zi' gaochó

yextila' na' kat' zi yeejcho vinona'. ²⁹La' Chioza' wsak'zi'e nottez ben' kontele yeej gawe'n na' bi gone'n ka kwee Xancho Crístona' balaan daa bzani kwerp che'na' ni checho. ³⁰Daan, zanle bi shao'le wa zoazi'yaale, na' bal' ben'ka' nakle txen ba witgake'. ³¹Per shi yiya yiyilj kwinchó, Xancho Chioza' bi wsak'zi'e cho'. ³²Na' shi chsak'zi'e cho', chone'n kwenche yigooshlilall'cho na' bi wlliaiyilene' cho' ben'ka' bi nonlilall'gake'ne'.

³³Na' le' ben' bish' na' le' ben' zan', kat' chdop chllagle kwenche yeej gaole, li kwez ljjwell-le. ³⁴Na' shi nole chbil chdonle, chiyal' yeej gaole loo yoo lill-le kwenche bi gonle ka gonan byen tele yel' zak'zi' daa bi chonle wen kat' chdop chllagle. Dech diika' cheenid' wzajniid' le', na' kwaa xnezin kat' yidwia' le'.

12 Le' ben' bish' na' le' ben' zan', cheenid' inezile che diika' non Espíritu che Chioza' gak gon to tocho.

²Nezkzile kana' bin' gonlilall'le Xancho Jesús'a, bentezle txen ben'ka' choe'la'o lwaa lsak' chioska' diika' ni bi chak ine. ³Daan, cheenid' inezile ni to ben' bi ine: "Aga bi zakii Jesús'a" shi zoalen Espíritu che Chioza' le'. Na' lekzka' ni to ben' bi gak ine: "Jesús'a nake' Xancho" shi bi zoalen Espíritu Santo che Chioza' le'.

⁴Wde wdeli daa chon Espíritu che Chioza' to tocho, per lekzen' chone' yog'tegakan. ⁵Wde wdeli nak xshin Xancho Crístona' goncho, per toze' len' nak Xancho. ⁶Na' wde wdeli nak daa none' lall' na'cho gon to tocho, per toz Chiozan' chaklene' cho' kwenche chak chonchon. ⁷Chioza' chli'e zoalen Espíritu che'na' cho' daa none' to tocho diika' chak choncho kwenche chaklenenan yog'cho. ⁸Na' ba bene' kwenche Espíritu che'na' chaklene' balcho choe'lencho ben' dill' kon yel' sin' che'na', na' zi balcho, chone' ka chajniicho daa nak che Chios na' chak chzajniichon ben' yoblə. ⁹Na' zi balcho, chon

Espíritu che'na' ka chajle'chacho gone' daa inabichone'; na' zi balcho, chone' ka gak yiyoncho ben'. ¹⁰Na' zi balcho, chchine' kwenche choncho yel' wak; zi balcho, chone' ka chak chyixje'cho daa na Chioza' cho'; zi balcho, chone' ka chakbe'icho shi dillaa choe' ben' dii li nakan che Chioza' wa shi nakan che dii xiwaa. Zi balcho, chone' ka chak chnecho wde wdeli dill' dii bi nsedcho; na' zi balcho, chone' ka chak chizajniicho bin wna beena' chne dillaa. ¹¹Na' toz Espíritu che Chioza' chgwee xnezin goncho yog' diika', na' le' chgone' daa gon to tocho.

¹²Na' ka kwerp chechona' nakan toz la'kzi zan diika' ndil' nllagan, ka'kzə cho' nonlilall'cho Crístona' nakchone' toz la'kzi nakcho ben' zan. ¹³Na' yog'lolcho cho', ka ben' Israel, ka ben' griego, ka ben' ndoo lla yel' chone' xshin ben', na' ka ben' chon xshinkze', Espíritu che Chioza' ba bene' kwenche nakcho ka toz kwerp. Na' toz len' yo'e loo yichjlall'do' to tocho.

¹⁴Na' ka nak kwerp chechona', zan diika' ndil' nllagan. ¹⁵Na' shi ni'achona' inan: "Daa bi nak' neena', bi ndil' nllag' kwerpa'." La'kzi shi inan ka', ndil' nllagkzan kwerpa'. ¹⁶Na' shi nagchona' inan: "Daa bi nak' jalawe'na', bi ndil' nllag' kwerpa'." La'kzi shi inan ka', ndil' nllagkzan kwerpa'. ¹⁷Na' shel'ka' doxen kwerp chechona' nakan jalaocho, ¿nakra goncho kwenche yenicho? Na' shi doxen kwerp chechona' nakan nagcho, ¿nakra goncho kwenche ila'icho? ¹⁸Na' Chioza' bzoe' to to diika' ndil' nllag kwerp chechona' kon gana' chakile' nakan wen soa to ton. ¹⁹La' shel' toz ka nak yog'te daa ndil' nllagan, bi nakan to kwerp shel'ka'. ²⁰Na' la'kzi zan diika' ndil' nllaggakan kwerp chechona', tozkw kwerpan nakan.

²¹Na' jalaochoka' bi gak ye'gakan na'choka': "Bi chyalljid' le'." Ni bi gak ye' yichjchona' ni'achoka': "Bi chyalljid' le'." ²²Na' diika' ndil' nllag kwerp che-

chona' daa chakicho bi nakan wal, lelagakannan' lliarote. ²³Na' diika' ndil nllag kwerp chechona' daa chakicho bitek bi zaka'n, lelagakannan' chap-shiicho. Na' diika' bi cheenicho ile'i ben' chkwashi'chon xachona'. ²⁴Na' diika' ndil nllag kwerp chechona' na' bi chonan ka yiyi yido'icho ile'i ben' legakan, bi chonan byen kwash'chon. Na' ka' ben Chioza' kwerp chechona' kwenche nkwash'cho diika' chonan ka yiyi yido'icho ile'i ben' legakan. ²⁵Na' yog' diika' ndil nllag kwerp' chaklen ljuwellin daa nakgakan toz. ²⁶Daan shi gayi kwerp chechona' chey chla, doxen kwerp' bi shao'. Na' shi gayi kwerp chechona' chonichon wen, doxenan chibayi.

²⁷Na' le' nakle ka kwerp che Cris-tona' daa naklene' toz, na' to tole nakle ka tkwen wej kwerp che'na'. ²⁸Na' ladjchona', cho' chdop chllagcho choe'la'ocho Cris-tona', Chioza' lliarote bzoe' neto' naknto' postl, na'ch bzoe' ben' chyixji'e daa chi'ene', na' de wyoni bzoe' ben' wli' wsedile' ben' cho'a xtilleena'. Na'ch bzoe' ben' wli'e yel' wak che'na', na' ben' yiyone' ben', na' ben' gaklen bish' ljuwellchoka', na' ben' ch-goo xnezin che xshine'na', na' ben' chne wde wdeli dill' dii bi nsede'. ²⁹Nezicho aga yog'cho nakcho postl. Aga yog'cho chak chixje'cho daa na Chioza' cho'. Aga yog'cho chak wli' wsedicho cho'a xtilleena'. Na' aga yog'cho chak goncho yel' wak. ³⁰Aga yog'cho chak yiyoncho ben'. Aga yog'cho chak inecho wde wdeli dill' dii bi nsedcho. Na' aga yog'cho chak yizajniicho bi zeji dill'ka'. ³¹Na' le', li selall' gaklen Espiritu che Chioza' le' kwenche gak gonle diika' zak'chi.

Na' naa wsedid' le' to dii llialaotech.

13 Shi nad' chak' wde wdeli dill' dii chne ben' yell-lioni na' axt len xtill' anjlka' chak', per bi chakid' ben', aga bi zjanayin chak' diika', na' nak' ka to dii nak de ya dii chon dane wa ka platiy dii

chon sshag. ²Na' la'kzi shi chak chixji'a daa na Chioza' nad', na' nezid' yog'lo' daa nak che Chioza' axt daa kochnon' inezi, na' la'kzi shi le chajli'a che Chioza' axt chon' ka illa' xishna' yaaka', shi bi chakid' ben', aga bi zjanayin chak gon' diika'. ³Na' la'kzi shi wi'a ben' yesh'do'ka' yog' dii de cha', wa izanid' kwerp cha'ni kwenche wzeygake'n, shi bi chakid' ben', aga bi gaklenen nad' lao Chioza'.

⁴Shi chakicho ben', gapcho yel' chxenlall' chegake', gonicho legake' wen, bi gakxe'icho legake', bi wshalj wshoncho lawe'ka', bi gakcho ben' cha'siba, ⁵bi gonichogake' zban, bi chiljcho daa nak to banez chezcho, bi gakcho zgaal' zyl, ni bi koolall'cho. ⁶Ni bi yibaicho kat' no chon mal, san yibaicho kat' no chon wen. ⁷Shi chakicho ben', bi goncho dii choo dii xen bittez dii chonile' cho', na' bi sa'lall'cho mal che', san toshiizi goncho lez gone' wen, na' so sakicho bittezə.

⁸Yel' chakina' aga wiyoll' widon. San ka nak daa chyixjee ben' daa che' Chioza'ne', na' daa ine ben' wde wdeli dill' dii bi nsede', wllin lla bich iyalljan, na' ni bich bi iyalljicho inezicho. ⁹La' lat'chga daa nezicho naa, na' lat'chga daa na Chioza' cho' kwenche chyixje'ichon ben', ¹⁰per kat' illin lla Chioza' gone' ka gombia'chone' kwas'lo', na' te cheyi diika' chzajniin cho' lat' wej naa.

¹¹Kana' nak' bi'do', bshalj' lega bi'do', ben' pensar ka bi'do', na' wyajniid' lega bi'do'. Per ka bgol' bich bsa' cha' ka che bi'do'. ¹²Ka'kzan chak checho kon daa nak che Chioza' naa. Nakcho ka to ben' chwia to lo wan dii bi nja'yen'. Per wllin lla kat' ile'yen'ichone' ka chle'i cho'alaoljuwellcho. Bin' gombia'yen'cho Chioza' naa, per wllin lla kat' gombia'chone' kwas'lo' ka nombi'e cho'. ¹³Na' naa diiki shonə nakgakan dii lliarote goncho: gonlilall'cho Chioza', gonchone' lez, na' gapcho yel' chakina'. Na' daa lliarote lawi diiki shon, lannen' yel' chakina'.

14 Li gon byen gakile' bish' l'jwell-leka' na' lekzka' li selall' gon Espiritu che Chioza' le' to dii gak gonle, na' daa lialoch selall'le gone' ka gak chixje'le daa ina Chioza' le'. ²La' beena' chne dill' daa kono chajni, Chiozan' chshaljlene', aga ben' yell-lionin. La' Espiritu che Chiozan' chone' ka cho'e dill' daa kono chajni. ³San beena' chyxjee daa che' Chioza' le', chone' ka gakchach ben' lao Chioza', na' chtipe' lall'gake' na' chiyonxenlallee legake'. ⁴Beena' chne dill' daa kono chajni, to le'zen' chaklenan, san beena' chyxjee daa che' Chioza'ne' chaklene' yog' ben'ka' chdop chllag choe'la'ogake' Cristona' kwenche gakchagake' lo xneze'na'.

⁵Nad' cheenid' shel'ka' yog'lol-le gak inele dill'ka' daa kono chajni, per wibachid' shel'ka' gak chixje'le daa ina Chioza' le'. La' dii zak'chi daa chyxjee ben' daa na Chioza' aga ka daa inie' dill' daa kono chajni, lete shi yizajniile' ben'ka' bin zeji dill'ka' chnie' kwenche gakchachgake' lao Chioza'. ⁶Na' le' ben' bish' na' le' ben' zan', shi nad' yidwia' le' na' inia' dill' daa kono chajni, bi gaklenan le'. Lete waklenan le' shi wzajniid' le' to dii ba bli' bsemi Chioza' nad', wa to dii chiyal' inezile che', wa chixje'id' le' bi ine' nad', wa wli' wsedid' le' cho'a xtilleena'.

⁷Kachaka' blleja' wa no dii lia kwerd cheyin, kono shajni bin chkwelgake' shi bi chllaa shiinka'. ⁸Na' kat' chak to wdi, shi beena' chkwel clarinna' bi kwelle'n kwasol, aga no idop il-lag kwenche shajgake' lo wdila'. ⁹Na' ka'kzan chak chele, shi inele dill' daa bi chajni ben', nakra gone' shajniile' bin nale. Na' bibi zakii dill'ka' chnele shi naa. ¹⁰Nezicho zan kwen xtil' ben' de yell-lioni na' to togakan chajni ben'ka' chnegake'n. ¹¹Na' shi bi chajniid' dillaa we'len to ben' nad', nak' ka ben' zit' par le', na' lekzka' le' nake' ka ben' zit' par nad'. ¹²Na' daa ba chzelall'le gon Es-

piritu che Chioza' daa gak gonle, li gon ka dii le inable daa gaklenan bish' l'jwell-leka' chdop chllag choe'la'ogake' Cristona' kwenche gakchachgake' lawe'na'.

¹³Daan, beena' chne dill' daa kono chajni, chiyal' inabile' Chioza' gaklene'ne' kwenche gak yizajniile' ben' bin zeji dillaa chnie'. ¹⁴La' shi chshaljlen' Chioza' dill' daa bi chajniid', yichjall'dawaani nezin chshaljlen' Chioza', per bi chajniid' bin chepee. ¹⁵¿Beran chiyal' gon', Ila? Chiyal' we'llwill' Chioza' kon dill' daa na Espiritu che'na', na' lekzka' we'llwillee kon dill' daa chajniid'. Na' lekzka' chiyal' gol' kon dill' daa na Espiritu che'na', na' gol' kon dill' daa chajniid'. ¹⁶La' shi we'la'ole Chioza' kon dill' daa kono chajni, la'kzi nakan che Espiritu che Chioza', ben'ka' yengakile' dill'ka' chnele aga gongake' le' txen we'le yel' choxken Chioza' la' bi chajni'gakile' bin nale. ¹⁷La'kzi choe'le Chioza' yel' choxken do yichj do lall'le, bi chaklenan ben' yoblə daa bi chajni'gakile' bin nale. ¹⁸Cho'a Chioza' yel' choxken daa chnech' dill' daa kono chajni aga ka yog'tele. ¹⁹Per kat' ndop nllagcho choe'la'ocho Chioza' txen, wenchlan inia' gay'zə dill' daa chajniicho kwenche wzajniid' ben' yoblə, aga ka daa inia' ga shi mil dill' daa kono chajni.

²⁰Na' le' ben' bish' na' le' ben' zan', bi gonze pensar ka bi'do' bin' shajni, san li gon pensar ka ben' golə, ben' ba chajni. Per ka nak che dii mala', li gak ka to bi'do' bin' sho' yichjin dii mala'. ²¹Cho'a Xtil' Chioza' nan: "Wchin' ben' zit', ben' chne dill' yoblə, kwenche wzajniid' ben' Israelki, per ni ka' bi wzenaggake' cha', na Xancho Chioza'." ²²Daan, kat' chnecho dill' daa kono chajni chonan kwenche ben'ka' bi chonli-lall'gake' Chioza' gake'gakile' zoalene' cho' per bibi chzajniin cho' ba nonli-lall'chone'. San daa chixje'cho daa na

Chioza' cho', chaklenen cho' ba nonlilall'chone' per bi chaklenen ben'ka' bi chonlilall'gake'ne'.²³ Na' kat'ka' ndop nllagle choe'la'ole Crístona', shi yog'zle choe'le dill' daa kono chajnií, na' sho' ben' bi chajniile' bin chonle wa ben' bin' gonlilall' Crístona', wak gakile' bi nza'n chelenan'.²⁴ San shi yog'le chyixje'le daa na Chioza' le', na' sho' to ben' bin' gonlilall' Crístona' wa to ben' bi chajnií bin chonle, na' yiyakbe'ile' nake' ben' saaxya na' yiyaj yilenile' dii malka' chone' ka yenile' dill'ka' chyixje'le.²⁵ Na'ch gonan ka wli'lawi daa yoo loo yichjlall'do'ena', na' wchek' xibe' we'lawee Chioza', na' gakbe'ile' dii licha Chioza' zoalene' le'.

²⁶ Na' le' ben' bish' na' le' ben' zan', kat' chdop chllagle de latj kwenche bal-le gol-le dii koon Chioza' balaan, na' zi bal-le wli' wsedile, zi bal-le chixje'le daa na Chioza' le', na' zi' bal-le inele dill' daa kono chajnií, na' zi bal-le yizajniile dillaa kono chajnií. Yog' diiki chiyal' wchinlen kwenche gaklenen soachechle lo xnez Chioza'.²⁷ Na' kat' inele dill' daa kono chajnií, chopzle wa shonzle inelen, na' yizoayile inele, na' chiyal' soa to ben' yizajniile' bin wnale.²⁸ Na' shi kono zoa ben' chak yizajniile' bin inale, bi chiyal' inelen gana' ndop nllagle choe'la'ole Crístona', san wak inelenlen Chioza' de loo yichjlall'do'lena'zə.²⁹ Na' lekzka' chop shonzlen chixje'le daa na Chioza' le', na' yizoayile inele. Na' ben'ka' chzenag, chiyal' wzenagyen'gake' shi dii li nakan daa na Chioza'.³⁰ Shi shlak to ben' chyixje'le dillaa daa che' Chioza'ne', na' ine Chioza' sto ben' chi'e ladjlena', chiyal' kwez beena' chne kwenche chixjee beena' sto daa che' Chioza'ne'.³¹ To tole yizoayile chixje'le daa na Chioza' kwenche yog'le shajni'chile diika' na Chioza' na' wtipch lall'le.³² Na' beena' chyixjee daa che'

Chioza'ne' chiyal' inabia' kwine' kwenche wi'e latj ine ben' yoblə, shi naa.³³ La' Chioza' cheenile' gonle xochi yog' daa chonle kat' choe'la'olene' na' bi gonle kon daa nazan chele.

Ka yoolo ben'ka' choe'la'ole Crístona' yog'te gana' chdop chllaggake',³⁴ noolka' chiyal' soagake' llizə gana' chdop chllagle, la' bi de lsens inegake'. San chiyal' wchek' yichj wchek' laogake' lao ben'ka' chnabia' legake', kon ka na ley daa bzej dii Moiséza'.³⁵ Na' shi de daa cheengakile' inezgakile', chiyal' inabgakile' ben' che'ka' loo yoo lillgake', la' bi nakan wen inegake' kat' ndop nllagle.

³⁶ Bi gakile zigaate ladjlenan' golj wxe cho'a xtill' Chioza', ni bi gakile le'chgan ba bleblen.³⁷ Shi nole chakile nakle ben' chyixjee daa na Chioza', wa chakile Espiritu che Chioza' chzajniile' le', chiyal' gakbe'ile dga chzej' le' nakan dii chon Xancho Crístona' mandad.³⁸ Na' shi no bi chzenag cheyi dga chzej' le', lekzka' kono wzenag che'.

³⁹ Na' le' ben' bish'dawaa na' le' ben' zandawaa, li selall' gak chixjeele daa na Chioza' le', na' bi wllonle ine ben' dill' daa kono chajnií.⁴⁰ Per bittezə dii gonle, li gonan kon ka chiyali na' xochi li gonan.

15 Na' le' ben' bish' na' le' ben' zan', cheenid' yisaa lall'le dill' wen dill' koba' wdixje'id' le' daa ba bleble na' zoachechle chajle'le cheyin.² La' lannan' yislan le' kwenche bi kwiayi'le shi toshiizi soachechle shajle'le daa ba wdixje'id' le'. Na' shi bi soachechle toshiizi aga bi zjanayin daa nale ba wyajle'le cheyin.

³ Bli' bsedid' le' dga bzajnií Chioza' nad' daa nakan dii lialote: nan Crístona' wite' ni checho daa nakcho ben' saaxya, kon ka na Cho'a Xtill' Chioza'.⁴ Na' bkwash'gake'ne' na' biyon lla bibane' ladj ben' wetka', kon ka na Cho'a Xtill'

Chioza'. ⁵ Na' bli'lawe' Céfaza',[§] na'tech bli'lawe' postlka' sto. ⁶ Na'tech bli'lawe' wdeli gay' guioa ben' bish'choka' na' ben' zanchoka' nonlilall'gake'ne'. Na' zan ben'ka' ni mban lla naanlla, na' balgake' ba wit. ⁷ Na'tech bli'lawe' Jacóbona', na' wdena' bli'lawe' yog' postlka'.

⁸ Na' zeeloteyi bli'lawe' nad', la'kzi nak' ben' bibi zakii. ⁹ Nad' nak' liizelozi ben' bibi zakii ladj ben'ka' wlej Crístona' gongake' xshine'na', na' bi chidolaa ina ben' nad' "postl", daa bsak'zi'a ben'ka' chonlilall'gake'ne'. ¹⁰ Per daa nak Chioza' ben' chiyesh'lallii, wleje' nad' wi'a xtill' Crístona'. Na' daa biyeshlallile' nad' bi gokdadzan, la' ba bench' xshine'na' aga ka yog' postlka' sto. Per aga tobialozan' bena'n, san len' ba goklene' nad' kwenche bena'n. ¹¹ Na' la'kzi nad' wa postlka' sto choe'lennto' ben' xtilleena', toz ka dill' choe'nto', na' lennan' ba wyajle'le.

¹² Na' daa chyixje'nto' biban Crístona' ladj ben' wetka', ¿berache nazə bal-le bi yiban ben' wetka'? ¹³ La' shel' bi yiban ben' wetka', lezkza' aga biban Crístona' shel'ka'. ¹⁴ Na' shel' Crístona' bi bibane' ladj ben' wetka', aga bi zakii daa chyixje'nto' cho'a xtilleena', ni aga bi zakii daa nonlilall'lene', shel'ka'. ¹⁵ Na' shel' bi yiban ben' wetka', aga dill' li che Chiozan' be'lennto' le' daa wnanto' Chioza' bisbane' Crístona' ladj ben' wetka', shel'ka'. ¹⁶ La' shel' bi yiban ben' wetka', aga biban Crístona', shel'ka'. ¹⁷ Na' shel' Crístona' bi bibane' ladj ben' wetka', aga bi zjanayin nonlilall'lene', na' ni napkzle dol' che saaxya cheleka', shel'ka'. ¹⁸ Na' shel' nakan ka', ben'ka' benlilall'gake' Crístona' na' ba witgake', wlliyi'chokzgaken', shel'ka'. ¹⁹ Na' shel' to lo yell-lionizan noncho lez gaklen Crístona' cho', nyesh'lazch nakan checho aga ka che yog' ben' yoblə, shel'ka'.

²⁰ Per dii li Crístona' bibane' ladj ben' wetka', na' daa bibane' neche' ladj ben' wetka' zaklebile' dii necha' chizi' chilap ben'. ²¹ Daa bxinj bjen toz ben', wyoo yel' wita' yell-lioni, na' lezkza' toz ben' bxie' daa yiban ben' wetka'. ²² Ka chet yog' ben' ni che daa bxinj bjen dii Adánna', ka'kzan yiban beena' nak Crístona' txen. ²³ Per to to ben' yibane' ladj ben' wetka' kat' illin llana' nllia Chioza' bia' yiban-gake'. Zigaate Crístona' bibane' ladj ben' wetka', na' kat' yiyed Crístona', lezkza' yiban yog' ben'ka' nak lall' nee. ²⁴ Na' te che yell-lioni kat'ka' wlliyai' Crístona' yog'lol' yel' wak na' yel' wñabia' yoblə, na' yiyo'e yel' wñabia' che'na' Xacho Chioza'. ²⁵ La' Crístonan' chiyal' inabi'e axt ki yiyoll yido wzoe' xni'ena' yog' ben'ka' chakzi' chakzbani le' na' yog' dii xiw'ka'. ²⁶ Na' yiyollin, wlliyayee yel' wita'. ²⁷ Cho'a xtill' Chioza' nan Chioza' bzoe' xni'a Crístona' yog'lolte dii de. Na' daa nan yog'lolte zoa xni'a Crístona', aga len Chiozan' zoe' xni'ena', la' len' bzoe' xni'a Crístona' yog'lolte dii de. ²⁸ Na' kat'ka' yog'lolte dii de ba zoan xni'a Crístona', na'ch kwín Crístona', beena' nak Xiin Chioza', wzexj yichje' lao Chioza', beena' bzoa yog'te dii de xni'ena'. Na'ch gakbia' nan Chioza' nake' liizelozi ben' zakii lao yog'lolte dii de.

²⁹ Na' chiznia' sto, ¿bera zejín daa chchoa bal ben' nisa' lwaab ben' wetka'? Shi chakgakile' bi yiban ben' wetka', ¿berache chchoazgake' nisa' lwaagake'?

³⁰ Na' shel'ka' bi yiban ben' wetka' ¿berache zoaznto' dii nxoll gak dii gak chento' do lla do yel'? ³¹ Dii li, le' ben' bish' na' le' ben' zan', yog' lla zoa' dii nxoll guet'. Na' lezkza' dii licha le chiba chizakid' chele daa ba nonlilall'le Xancho Jesucrístona'. ³² Yell Éfesona' wdil-len' ben'ka' nak ka ba zña nlləb, ¿beratgui gon' gan wdil-lengakee shel'ka' bi

[§]15:5 Céfás: kan' le Pédróna' de dill' arameo, daa gok xtill' Jesús'a.

yiban ben' wetka'? Gonchokljacho ka dil-laa de daa na: "Yeej gaotezcho la' wetcho wx̄e willj."

³³ Bi we'le latj no siye' le'. La' dill' de, nan: "Shi goncho txen ben' malka' na' solo goncho ka chongake'." ³⁴ Li yiyeeni kwas̄loj na' bich gonle dii mala', la' bal-le ni bi nombia'le Chioza'. Nia' le' ka' kwenche yido'latile.

³⁵ Wnalja bal-le: "¿Nakra gak yiban ben' wetka'? Na' ¿Nakra yiyak kwerp che'ka'?" ³⁶ Shi ka' nale, nakle ka ben' bi nteyi. Kat' chazcho binna', bi chila' yagdo'na' shi bi chbiayi' binna'. ³⁷ Kat' chazcho, aga yagdo'nan' chazcho, san bin cheyinnan' chazcho, na' chila' yagdo'na'. Na' kan' chak che bittezə dii chazcho, shi no trigo wa bichlə. ³⁸ Na' Chioza' chgwee x̄nez x̄latjin chakan ka cheenile', na' to to bin chak xyaguinna' kon ka chiya'! gak che to ton. ³⁹ Aga toz ka nak kwerpka'. Nlla'lə nak kwerp che benecha' len che bayix̄'ka'. Na' nlla'lə nak che baka' chzo xan yabana' na' che belka' lle' loo nisa'. ⁴⁰ Lekzka' nak cheyi diika' lle' xan yabana' na' diika' chle'icho lo yell-lioni. Nlla'lə ye'! xochi cheyi diika' chle'icho xan yabana' len ye'! xochi cheyi diiki chle'icho lo yell-lioni. ⁴¹ Nlla'lə ye'! chey cheeni' che wbillā' len che beo'do'na' na' len che beljka'. Na' ladj beljdo'ka' nlla'lə nak ye'! chey cheeni' che to togakan. ⁴² Na' ka'kzan gak che ben'ka' yiban ladj ben' wetka'. Kwerpa' daa chgash' loo bana' nakan dii gooll' iteb, san kwerp daa yiyas kat' yibancho ladj ben' wetka' bi nakan dii gooll' iteb. ⁴³ Kwerpa' daa chgash' loo bana' nakan dii bichbi zakii, san daa yiyas ladj ben' wetka' gakan to dii zakii nllēb. Kwerpa' daa chgash' loo bana' nak blān'zan, san daa yiyas ladj ben' wetka' gakchechan. ⁴⁴ Kwerpa' daa chgash' loo bana' nakan de beli chenzə dii chon llin yell-lioni, san kwerp daa yiyas ladj ben' wetka' gakan to dii kob daa gon̄ Chioza'. Na' daa

nezicho kwerp chechoni nakan de beli chenzə, lekzka' chiya'! inezicho wat' to kwerp kob checho daa gon̄ Chioza'.

⁴⁵ Cho'a Xtill' Chioza' nan: "Adánna', beena' gok ben' nech, goke' to ben' yaa ben' ban." Na' lekzka' Crístonā' goke' ben' yell-lío, per le' chone' ye'! mban zejli kan̄i. ⁴⁶ Zigaate chbanlencho kwerp de beli chenni, na'techlan ibanlencho dii koba' daa gon̄ Chioza'. ⁴⁷ Ben' necha' ben Chioza' de bishte yo, goke' ben' yell-lío. Na' ben' wchopina', beena' nak Xancho, len' wzee yabana'. ⁴⁸ Kwerp chechona' nakan ka kwerp che ben' necha' b̄xe bsil Chioza' de bishte yona'. Na' ka nak kwerp che Crístonā', beena' zoa yabana' naa, ka'kzan yiyak kwerp chechona' kwenche lljazoacho yabana'. ⁴⁹ Naa nakcho ka beena' ben Chioza' de bishte yo, na' wllin lla yiyakcho ka Crístonā', beena' zoa yabana'.

⁵⁰ Na' le' ben' bish' na' le' ben' zan', cheenid' inia' le': Aga wak yillinlencho kwerp de beli chenni gana' zoa Chioza' chnabi'e. Na' kwerpi dga gooll' iteb bi gak gonan txen kwerp daa bi gooll' iteb. ⁵¹ Ni inia' le' to dii kono w̄nezi: aga yog'cho guetcho, per yog'cho yiyakcho nlla'lə. ⁵² Tokonganzi, to ka chshod' ch̄xa'z jalaochoki, kat' kwell trompet che Chioza', yiyakcho nlla'lə. La' ka kwell trompeta', ben' wetka' yibangake' kon to kwerp dii bi gooll' iteb. Na' cho' ni mbancho, lekzka' yilla' kwerp chechoki. ⁵³ La' kwerp chechoni dga gooll' iteb, yiyakan to dii bi gooll' iteb. Na' beli chen chechoni dga ile'i ye'! wita', yiyakan to dii bichga guet. ⁵⁴ Kat'ka' kwerp chechoni dga gooll' iteb ba biyakan to dii bi gooll' iteb, na' beli chen chechoni dga ile'i ye'! wita' ba biyakan to dii bichga guet, na' gak ka na Cho'a Xtill' Chioza' daa na: "Xancho'na' ba bene' gan bsol bnite' ye'! wita' toshiizi." ⁵⁵ Na' lekzka' nan: "Ye'! wit, li' chsi ch̄hogo' ye'! mban che ben', ¿gan̄ ye'! wak cho'na' naa?" ⁵⁶ Daa bi

choncho diika' bllia Chioza' bia' goncho chli'n nakcho ben' saaxya, na' daa nakcho ben' saaxya, yel' wita' napan yel' wak kwenche wsoł wñitan cho'. ⁵⁷ Per chox̄n Chioza' bselee X̄ancho Jesucristona' ni checho kwenche bi saki yel' wita' si' ikaan cho' zejli kani.

⁵⁸ Daan, le' ben' bish'dawaa na' le' ben' zandawaa, li soachech lo x̄nez Chioza' toshiizi. Na' zizikli li gon xshin X̄ancho Jesucristona', la' ñezkzile xshine'na' aga nakan to llin dii chondadzle.

16 Na' ka nak mech daa wtope daa we'le ben'ka' nak lall' na' Chioza', li gon ka ben' mandad gon ben'ka' chdop chllag choe'la'ogake' Crístona' to to yell daa llia gana' mbani Galáciana'. ² Yog' lla nech che x̄manka', to tole chiyal' kwejle lat' wej daa benle gan lo x̄manna' na' kooshao'len kwenche bibi wtope kat' yid'. ³ Na' kat' yid' gana' zoale, wselaa ben'ka' kwejle lljwa'gake' Jerusalénna' mecha' daa btope, na' wgox̄'gakee yish daa wzej' kwenche ben' Jerusalénka' wlebgake' legake'. ⁴ Na' shi chonan byen shaa, na' sha'len' legake'.

⁵ Chonan byen tia' gana' mbani Macedóniana', na' ka tia', yidwia' le'. ⁶ Na' waklja yigaanlen' le' shloll wa soalen' le' axt ka yiyollch te dii zaga'. Na' kat' yigwaa nez yiyaa gan yoblə wak gaklenle nad' gonle daa iyallj ichinid'. ⁷ Aga shlollzan cheenid' yidwia' le', san non lez yigaanlen' le' ssha, shi X̄ancho Chioza' wi'e latj. ⁸ Na' ñaa cheenid' yigaana' yell Éfesoni axt ka gal' lni Pentecostéza', ⁹ la' ben' zan lle' ni, ben' cheeni wzenag txill' Jesucristona', la'kzi ben' zan chllaagake' daa choe'len' ben' xtilleena'.

¹⁰ Na' shi ba za' Timotewa' gana' zoale, li gonile wen, la' lekzka' lene' chone' xshin X̄ancho Jesucristona' ka chon' nad'.

¹¹ Na' ni tole bi gonilene' nakzi, san li gaklene' yigwee neza' mbalaz kwenche yidwie' nad', la' chbeztia'ne' kon ben' bish'choka' sto.

¹² Na' ka nak ben' bish'cho Apólozi, le got'yoidee yidlene' ben' bish'choki yidwiagake' le', per bi goonile' yide' ñaa, per widkze' kat' gat' latj che'na'.

¹³ Li se kwas na' li soachech gonlilall'chle Crístona'. Li gakcha lo x̄neze'na' na' bi illeble. ¹⁴ Na' bittezə dii gonle, li gonan lega ben' chaki ljwellin.

¹⁵ Na' le' ben' bish' na' le' ben' zan', ñezile ben'ka' lle' lill Estéfanzí gogake' ben' nech ben' ben'ilall'gake' Crístona' gana' mbani Acáyana', na' zoatekgake' chli' chsedgakile' ben'ka' nak lall' na' Chioza'. ¹⁶ Chat'yoid' le', li wzenagach che ben'ka' chon ka legake', na' li wzenag che yog' ben'ka' chaklen chongake' xshin Chioza'. ¹⁷ Le chibaid' daa ba bid Estéfanzí len Fortunátoni na' Acaíconi gani zoa', la' daa zoalengake' nad' ni, bich chakyeshid' daa bin' gak yidwia' le'. ¹⁸ Ba biyongake' nad' to yel' chxenlall' ka daa chongake' le'. Ka ben'ki na' ka ben'ka' chon ka legake', chidol'gake' gapple legake' balaan.

¹⁹ Ben'ki chdop chllag choe'la'ogake' Crístona' to to yell gani mbani Ásiani chwagake' le' chiox. Na' Aquílani len Priscílani, len ben'ka' chdop chllag lille'ka' chwagake' le' chiox do yichj do lall'gake' daa nakle X̄ancho Crístona' txen. ²⁰ Na' yog' ben' bish'choka' lle' ni chwagake' le' chiox. Na' li wwap ljwellle chiox lega ben' chaki ljwellin daa nakle lall' na' Chioza'.

²¹ Nad', Pablo, kwín' chzej'*** gani chwap' le' chiox.

²² Nottezə ben' bi chakile' X̄ancho Jesucristona', wsak'zi'shga Chioza'ne'. jBidagach X̄an'!

** 16:21 Kwín' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

²³Xancho Jesucristona' soalenshgue'
le' na' gaklenshgue' le'. ²⁴Le chakid'
yog'le daa nakcho Jesucristona' txen.

Kart wchopi daa bzej Páblona' na' bseleen lao ben'ka' nonlilall' Jesucristona' yell Coríntona'

1 Nad' Pablo nak' postl che Jesucristona' kon ka chaklall' Chioza', na' len ben' bish'cho Timotewi chwapnto' le' chiox, le' chdop chllagle choe'la'ole Chioza' yell Coríntona'. Na' lekzka' chwapnto' chiox yog'lo' bish' l'jwell-choka' lle' gana' mbani Acáyana', ben'ka' nak lall' na' Chioza'. ²Na' chnabinto' Xacho Chioza' len Xancho Jesucristona' gaklenshgagake' le' na' wzoagake' le' mbalaz.

³Chiyal' we'la'ocho Chioza', Xa Xancho Jesucristona', la' len' Xachona', beena' chiyesh'lallile' cho' na' chiyonxenlallee cho' lao bittezə dii chak checho. ⁴Chiyonxenlallee cho' lao yog'lo' diika' chzak'zi'cho kwenche ka chone' checho, ka'kzan goncho yiyonxenlall'cho ben' yoblə kat' chzak'zi'gake'. ⁵Daa lennto' chzak'zi'nto' ka wxak'zi' Crístona', Chioza' chtipche' lall'nto' daa nonnto' Crístona' txen. ⁶Na' shi neto' chzak'zi'nto', chak chento' ka' kwenche gondiplall'chle na' yilale bi kwiyai'le. Na' shi Chioza' chtipe' lall'nto', chone' ka' kwenche lekzka' le' gondiplall'le na' so sakile' ka yel' zak'zi'ki chen chle'into'. ⁷Nonyen'nto' lez bi gakchoplall'le lao diika' chen chle'ile, la' nezinto' daa lenle chtil'le yel' zak'zi'ka', lekzka' lenle wtip Chioza' lall'le.

⁸Le' ben' bish' na' le' ben' zan', cheeninto' inezile' ka'k'tek dii lalljka' btılnto' gana' mbani Ásiana'. Gokan to dii lallj wal dii bich nan so sakinto', na' bich bennto' lez yel' mbanna'. ⁹Goktezkinto' ni bllin lla guetnto' naa. Gok chento' ka' kwenche gokbe'into' bi gak wxenilall' kwinnnto', san chiyal' wxenilall'nto' Chioza', beena' chisban ben' wetka'. ¹⁰Na' Chioza' bisle' neto' na' wislachkze'

neto' lao dii nxollka' nsa' yel' wit. Na' nxenilall'nto'ne' toshiizi wislachkze' neto' ¹¹shi gaklenle inabilene' gaklene' neto'. Na' shi ben' zan inabe' chento', lekzka' ben' zan we'gake' Chioza' yel' choxken kat' ba goklene' neto'.

¹²De to dii chakyibennto': daa nezzen'into' do yichj do lallnto' nsa' chento' wen ladj ben' yell-lioni, ka chazlall' Chioza', na' chonnto' to dii byen chonchnto' wen ladjlena'. Na' aga yel' sin' che ben' yell-lionin chaklenan neto' chonnto' ka', san Chiozan' chaklene' neto'. ¹³⁻¹⁴Diiki chzejnto' le' nakan dii shajniile ka wlablen. La'kzi naa bin' shajni'yen'ile biche nsa' chento' ka', chbez' illin lla shajniilen kwas'lo', kwenche kat'ka' yila' Xancho Jesús'a, yibaile' daa nonle neto' txen, ka chibainto' nonto' le' txen.

¹⁵Daa nxenlallaa wyajniile dga na' wleble nad', goklallaa tegaxj' yidwia' le', la' gokid' le' yiba yizakile yidwia' le' chop shii. ¹⁶Gokid' tia' wwia' le' ka shaa Macedóniana', na' yidia' wwia' le' sto shii ka zizaa. Na' zak goklenle nad' kwenche yigwaa nez yiyaa Judeana', shel' gokan. ¹⁷Bi gakile aga do yichj do lallaan wnia' yidwia' le'. ¿Anti chakile chon' ka chon nottezə ben' yell-lioki chongake' to “wak” to “bi gaka”? ¹⁸Chioza' nez nle'ile' biga chonnto' to “wak” to “bi gaka” laolena'. ¹⁹Nad' Pablo, len Timotewi na' Silvónoni be'nto' ladjlena' cho'a xtil' Cristo Jesús'a, beena' nak Xiin Chioza'. Na' Jesucristona' ba bli'e toshiizi chon Chioza' kon ka ba wne' gone'. ²⁰Na' ni che Crístona' chak yog'lo' dii chcheb Chioza', na' nacho “kan' nakan” kwenche chgoocho Chioza' balaañ. ²¹Na' Chioza'kzan chone' kwenche soatip soashoshcho gonlilall'cho Crístona', ka chone' chento' na' ka chone' chele. Na' wleje' cho' kwenche nakcho lall' nee, ²²na' Espíritu Santo che'na' nake' ka to sey daa ba ngweene' loo

yichjlall'do'chona' kwenche chakliyicho ba nakcho xiine', na' kwenche nezicho wllin lla gone' yog' dii wenna' daa ba bchebe' gone'.

²³Chioza' nezile' bin' yid' Coríntona' yidwia' le' daa chap' yel' chxenlall' chele, na' bi cheenid' wsheshlen' le'. ²⁴Aga cheeninto' gonnto' byen kon daa inaznton' gonle daa nakle Crístona' txen, la' ba zoachechkzle nonlilall'lene'. San cheenlinto' gaklennto' le' kwenche gapchle yel' chiba chizakina'.

2 Daan, bchogllalaa bi bidwia' le' kwenche bi yidzoaz' le' nyesh' sto shii. ²¿Nora gon ka yiba yizakid' shi ba bidyenyesh'zid' le'? ³Na' bzejchoklè le' daa bi goklallid' yid' na' gonyeshile nad', la' cheenlid' gonle ka yiba yizakid'. Na' nxenlallaa lenle yiba yizaklenile nad'. ⁴Bzej' le' daa wzechga' wneyi nleeb na' gokyesh'chgaid' axt wchellchga'. Na' aga bzeja'n kwenche gonyeshid' le' san kwenche inezile le' chakid' len'.

⁵Na' beena' benyeshile' nad', aga toz nadaan benile' ka', san lenkzlen benyeshile' lat'. Nia' "lat'", kwenche bi inia' zi'tegala ben beena' checho. ⁶Yel' zak'zi'na' daa ba benle che' ba gokkzə to ka't'. ⁷Na' naa chiyal' yizi'xenle che' na' gaklenlene' kwenche ki gakshejlaltee lo yel' chakyeshii che'na'. ⁸Daan, chat'yoid' le', li wli' ni chakkzilene'. ⁹Ba bzej'kz' le' kana' che ka nak dga kwenche wli'shkilaole shi leile gonle yog'te diika' nia' le'. ¹⁰Na' beena' yizi'xenle che', lekzka' nad' wizi'xenkz' che'. Na' shi de dii yiyakxen che', Crístona' nezile' wizi'xenkz' che' beena' ni chele, ¹¹kwenche bi we'cho cho'a xbayi Sattanáza'. La' nezkiicho ka nak yel' wxiye' cheyinna'.

¹²Ka billin' yell Troaza' kwenche wi'a dill' wen dill' kob che Crístona', got'chga latj cha' kwenche gon' llin che Xanchona', shel'ka'. ¹³Per daa bi bil-lag' ben' bish'cho Títona', na'ch gokshe-

jlall'chga'. Daan, bilaa ben'ka' dill' na' biyaa Macedóniana'.

¹⁴Choxken Chioza' chone' kwenche toshiizi chonnto' gan lao diika' chlis chta dii xiwaa daa naknto' Crístona' toz. Na' ngoonto' nez choe'nto' xtilleena' kwenche doxen zbii zkaan yell-lioni illiljan, ka chllilj shii xla' to dii chla' zix sia, na' gombia' ben' le'. ¹⁵Ka bibayi Chioza' shii xla' llen yala' daa chla' zix sia, ka'kzan chibaile' daa nzoa Crístona' neto' choe'nto' xtilleena' ladj ben'ka' yila na' ladj ben'ka' kwiayi'. ¹⁶Ben'ka' kwiayi', bi chibagakile' dillii choe'nto' daa chla'gakile'n zyel' wit. Na' ben'ka' yila, chibagakile'n daa chla'gakile'n zix sia daa nsa'n yel' mban chegake'. ¿Notgui gak gone' dga? ¹⁷Ben' zan lliallaltee yibeje' cho'a xtill' Chioza' mech. San neto' aga kan' chonnto'. Nez nle'i Chioza' do yichj do lall'nto' choe'nto' xtilleena' lega ben' bselee, daa naknto' Crístona' toz.

3 Ka choe'lennto' le' dill'ki, ¿achakile ba wizzolonto' chshalj chshon che kwinnton'? ¿Awa chakile chiyal' gonnto' ka chon bal' ben', gonnto' yish, wa inabinto'n le', gana' cho'en dill' nan chonnto' wen? ²Le'kzan nakle ka yish daa cho'en dill' chonnto' wen, la' daa nonlilall'le Crístona' chakbe'i yog' ben' choe'nto' dill' li. Na' toshiizi yooole loo yichjlall'do'nto'ki. ³Na' daa ile'i ben' ba bikob Crístona' yichjlall'do'lena' daa be'lennto' le' cho'a xtilleena', nakle ka to yish dii bzej kwin Crístona' nan chonnto' wen. Na' bi nakan to dii nyoj lee yish wa dii nyoj lee yaj taa, san daa ba bsele' Crístona' Espíritu che Chios yaa Chios banna' loo yichjlall'do'lena' zejín bzeje'n lee lall'do'lena'.

⁴Daa chaklen Crístona' neto', chiyaxjid' nia' chonnto' xshine'na' ka chazlall' Chioza'. ⁵Aga daa le napnto' yel' sin'nan' chonnto' diiki, san Chiozan' chaklene' neto' chonnto'n. ⁶Chioza' ba

bli' bsdile' neto' kwenche gak we'nto' dill' che dii koba' daa ba bchebe' gone' checho. Na' dga bi nakan ka ley che dii Moiséza' daa chlliyi'n ben', san dga nakan che Espíritu che Chioza', na' len' cho'e yel' mban che ben'.

⁷Ka nak leya' be' Chioza' dii Moiséza', daa byoj lee yaj taana', nchogbia'n gat' yel' wit checho, gokan to dii zakii nleeb na' bsa'n yel' chey cheeni' xen axt ni bi gok wwia ben' Israelka' cho'alo dii Moiséza' daa le chey cheeni'n la'kzi gokan dii yinit. Na' shi leya' daa nchogbi'a gat' yel' wit checho gokan to dii zakii nleeb, ⁸¿alechlə nak yel' zakii che dii koba' daa bxe Espírituna'? ⁹Shi leya' daa nchogbi'a guetcho gokan to dii zakii nleeb, na' daa chon Chioza' checho chizi'xene' xto'l'choka', naktechan dii zakii nleebch. ¹⁰Ka nak yel' zakii che leya', bi bllinan ka nak yel' zak' xen inleeb cheyi dga ba bxie' sto. ¹¹Na' shi leya' daa ben llin shlolz gokan to dii zakii, dii zak'techi nak dga gon llin toshiizi.

¹²Daa ba de dga nonnto' lez na'chan choe'nto' dill' kon ka nakan. ¹³Na' bi chonnto' ka ben dii Moiséza' kana' bkwash' cho'alawe'na' kon to lech' kwenche ben' Israelka' bi ile'gakile' ka chinit yel' chey cheeni'na' cho'alawe'na'. ¹⁴Na' yel' chajni che'ka' bi benkzan llin, la' axt naanlla kat' chlabgake' leya' bi chajni'kzgakile'n na' nakan ka to dii ngash'. San ben'ka' gonlilall'gake' Crístona', legaken' shajni'gakile'n, la' len' wsalje' yichjlalldoe'ka'. ¹⁵Axt naa, kat' chlabgake' daa bzej dii Moiséza', de to dii chsej chllonan shajni'gakile'n. ¹⁶Per kat' to ben' yiyaj yilenile' na' gonlilallee Xancho Crístona', na' yikwas daa chsej chllonan shajniile'n. ¹⁷La' Xanchona', lekzen' Espírituna', na' beena' zolen Espíritu che Xanchona'ne', bich bi ntaqw nchejan le'. ¹⁸Daan, yog'lolcho cho' bich bi de wsej wllonan gombia'chone', na' ba nakcho ka to wan

gana' chli'lao balaan che Xanchona'. Na' Espíritu che'na' zejch chiyonshawe' cho' kwenche yiyakcho ka Xanchona'.

4 Daa ba biyesh'lallii Chioza' neto', ba bzoe' neto' chonnto' xshine'na', na' bi chidinjinto'. ²Neto', ni to dii nak yel' zto' bi chonnto', ka diika' chon ben' do ngash'zə. Na' bi chiziye'nto', ni bi chshok chlewnto' cho'a xtil' Chioza', san choe'nto' dill' li che'na' kon ka nakan. Na' yog' ben' wzenague'n, gakbe'i loo yichjlall'do'ena' ka nakan, na' lekzka' Chioza' nezile' ka chonnto'. ³Per ben'ka' kwiayi', bi chajni'gakile' dill' wen che Crístona' choe'nto', daa ngashaan lawe'ka'. ⁴La' dii xiwaa daa chnabia' yellioni, ba bchol bnitin yichjlall'do'eka' kwenche bi sho'n beeni' che dill' wen dill' kob che Crístona', beena' bli' ka nakyen' Chioza'. ⁵Aga xtil'nton' choe'nto', san choe'nto' dill' che Jesucrístona', nanto' len' nake' Xancho. Na' daa chakinto' Crístona', chonnto' bittez dii gak gonnto' kwenche gaklennto' le'. ⁶La' Chioza', beena' wna: "Wzeeni' beeni'na' lo yel' chola'", lekzka' ba wlo'e beeni' che'na' loo yichjlall'do'nto'na' kwenche gombia'nto' Jesucrístona', na' kan' gakbe'into' ka nak yel' zakii che Chioza'.

⁷Na' beeni' che dill' wen che Crístona' nakan to dii zakii inleeb. Na' ba nzoa Chioza'n loo lall'do'nto'ni, neto' naknto' ben' bibi zakii, kwenche ka we'nto' xtilleena', gakbe'i ben' yel' wak xenna' nsa'n nakan che Chios, aga nakan chento'. ⁸La'kzi chiya dii chak chento', bi nakgakan dii bi yichej yilalennto'. La'kzi de dii nzen neto' wneyi, bi chaksheljall'nto'. ⁹La'kzi chino ben' neto', aga chchoonlall' Chioza' neto'. La'kzi chchix chol'gake' neto', bin' wlliyai'gake' neto'. ¹⁰Gattezə chajnto', chsak'zi'gake' neto' na' cheengakile' witgake' neto' ka betgake' Jesús'a. Chak chento' ka' kwenche nakbia' Jesús'a' zoe' chaklene' neto'. ¹¹La' shlak mbannto', toshiizi zelennto' yel'

wit daa naknto' Jesúza' txen. Chak chento' ka' kwenche nakbia' zoa Jesucristona' chaklene' neto' lao diika' chllaglo beli chen chento'ni dga guet. ¹²Daa choe'nto' cho'a xtill' Crístona' zelennto' yel' wit, kwenche le' gat' yel' mban chele.

¹³Cho'a Xtill' Chioza' nan: "Daa benliallaa Chioza', na'chan bi'a dill'." Na' kakzan neto', daa chonlilall'nto'ne'n, na'chan choe'nto' cho'a xtilleena'. ¹⁴Na' nezicho Chioza', beena' bisbane' Xanch Jesúza' ladj ben' wetka', lekzen' yisbane' cho' ka bisbane' le'. Na' ka neto' ka le', yichi'e cho' gana' zoe'. ¹⁵Yel' zi' dga chllaglonto' naa, chllaglonto'n kwenche gak wen chele. Na' ka zej chanch ben' gombia' dill' wen che Crístona', lekzka' ben' zanch wi'e Chioza' yel' choxken daa nake' ben' wen, na' sho'e balaan xen.

¹⁶Daan bi chidinjinto'. La'kzi beli chen chento'ni zej chde cheyin, yichjlall'do'nto'ni chikob Chioza'n lla kon lla. ¹⁷Diiki chtilnto' naa, nakan dii te toldezə, na' bibi chaktekinto'. La' nezinto' daa chak chento' ki, Chioza' gone' to dii wen inlebb chento' dii bi te cheyin. ¹⁸Aga zento' wneyi che diiki chle'icho yell-lioni, san diika' bi nla'n zento' wneyi. La' yog'te diiki chle'icho yell-lioni, de toldezə che ka diika', na' diika' bi chle'icho naa, nakan dii bi te cheyin.

5 Kwerp chechoni nakan ka to yoo dii te cheyin. Na' nezicho shi ba wliayi'n, Chioza' yiyone' sto dii kob dii bi te cheyin yabana'. Na' aga nakan dii beni ni'a na' ben'. ²Chibanchgaicho naa zoacho yell-lioni, na' ba cheenchgaicho yobzə lljazoalencho Chioza' yabana' gana' gone' sto kwerp kob checho. ³Ka chak che beena' chishaa xe'na' daa ba biyi na' chiyakwe' to dii kob, kakzan gak checho daa yishaa Chioza' kwerp chechoni dga kwiayi'. ⁴Shlak ni zoacho lo kwerpi, chibanicho na' chakyeshicho. Aga inacho chibachgai-

cho guetchon, san daa cheenicho yobzə ile'icho kwerp kob chechona' daa bi te cheyin na' ibanlenchon zejli kani. ⁵Na' kwin Chioza' ba none' checho ile'icho dga, na' ba bselee Espíritu che'na' zoe' loo yichjlall'do'chona' kwenche chakliyi-cho gone' yog' daa ba bchebe'.

⁶Na' daa nezicho dga, toshiizi nxe-nilall'cho Chioza'. Na' nezicho kwerpi mbanlencho, bi yillinlenchon gana' zoa Chioza'. ⁷Chajle'cho dga, la'kzi bin' ile'ichon. ⁸Na' cheenicho yobzə yiza'cho yell-lioni na' yigaan kwerp chechoni, la' nxenall'cho kat' yiza'cho ni, na' lljazoalencho Xanchona'. ⁹Na' daan, choncho to dii byen choncho ka chazlall' Chioza' naa mbancho wa la'kzi ba wicho. ¹⁰La' chonan byen yog'olcho lljazecho lao Crístona' gana' wchogloe' checho, kwenche to tocho ikaacho daa chido'cho kon ka bencho shlak wbancho, shi bencho wen wa bencho mal.

¹¹Na' daa nezinto' yog'cho techo lao Xanchona', na'chan chonnto' to dii byen choe'lennto' ben' xtilleena' kwenche gonlilall'gake'ne'. Chioza' nezile' do yichj do lall'nto' chonnto' xshine'na', na' non' lez nezki yichjlall'doleka' ka chonnto'. ¹²Aga cheeninto' chibzə kwinnnto' laolenan', san nia' le' ka' kwenche yibaile ka chonnto' na' gak yilliile xtill' ben'ka' chonz ka le chontegalə na' nagake' legaken' zeelo chongake' dii wenna' per bi chongake'n do yichj do lall'gake'. ¹³Shi bal-le chakile chaktontnto'n, Chioza' nezile' xshine'nan' chonnto'. Na' shi chakile aga chaktontnto'n, banez chekzle llinna' chonnto'. ¹⁴Daa nezinto' le chaki Crístona' cho', na'chan chonnto' to dii byen choe'nto' xtilleena'. Na' chajle'nto' daa wite' ni checho, zej in yog'cho wicho. ¹⁵Wite' ni che yog'olcho kwenche bich goncho kon daa nazan checho, san goncho ka chazlall' beena' wit na' bibane' ni checho. ¹⁶Ni cheyi

daan, bich choninto' nottez ben' nakzi, shi zakee wa bibi zakee. La' kana' gokinto' bibi zakii Crístona', na' naa ba nezinto' bi nakan ka'. ¹⁷ Beena' ba nake' Crístona' txen, ba bikob Chioza' yel' mban che'na'. Ba wchoonlallee yel' mban gol che'na', na' ba zoe' to lo yel' mban kob.

¹⁸ Yog'loŋte diiki nakan che Chioza', beena' ba ben ka bizoalenchone' wen daa bselee Crístona' wite' ni checho. Na' bene' lall' nanto' we'lennto' ben' dill' nak gongake' yizoalengake' Chioza' wen. ¹⁹ Kwin Chioza' bene' ka cho' ben' yell-lío chizoalenchone' wen daa bselee Crístona' wite' kwenche binit-loe' saaxya chechoka'. Na' ba bene' lall' na'nto' we'lennto' ben' cho'a xtilleena' kwenche inezgakile' nak gongake' yizoalengake'ne' wen. ²⁰ Daa bzoa Crístona' neto' choe'lennto' le' xtilleena', li gaktezi kwinkz Chiozan' chat'yoile' le' daa nanto' le': "Li yizoalen Chioza' wen."

²¹ Crístona' ni to dii mal bi bene'. Per ni checho chon', Chioza' benile'ne' ka ben' saaxya, kwenche daa gonlilall'cho Crístona' yiyakcho ben' li ben' shao' lawe'na'.

6 Neto' chonnto' xshin Chioza', chat'yointo' le' gonle ka chiyoolallee daa ba bene' to dii wen chele. ² La' Cho'a Xtill' Chioza' nan:

Ka byalljilo' wzenag' cho', nad' bzenag'.

Ka byalljilo' yisla' li' na' goklen' li'.

Na' nia' le', naan' ba bllin lla bllin gor gaklen Chioza' le'. Naan' nakan llana' yisla' le'.

³ Na' neto' bi chonnto' bittez dii gon ka ine ben' zban che xshin Chioza' dga chonnto'. ⁴ San toshiizi chonnto' to dii byen chonnto' xshin Chioza' ka chiyali. Daan, chonnto' banez laa lo yel' zi', laa chyallj chchininto', laa de dii lallj, ⁵ laa chit chyingake' neto', laa chyixjake' neto' lillya, laa lliadia' ben' neto', laa chonnto' llin dii nak zii zshab, laa tento' bishgal zi' bishgal ya', laa

chbił chdonnto'. ⁶ Na' lekzka' chli'nto' chonnto' xshin Chioza' ka chiyali daa zoanto' do yichj do lall'nto', daa ba nezinto' daa nak dii li, daa napnto' yel' chxenlall' che ben' na' chonnto' wen chegake', daa zoalen Espíritu Sántona' neto', daa chakinto' ben' do lall'nto', ⁷ daa choe'nto' cho'a xtill' Chioza' daa nak dii li, na' daa zoalen yel' wak che Chioza' neto'. Na' dii li dii shao'ka' chonnto' nakgakan ka dii chniayinto' kwenche chdil-lennto' dii mala'. ⁸ Zoa ben' chle'shi'gakile' neto', na' zoate ben' chle'zbangakile' neto'. Zoa ben' chnegake' wen chento', na' zoate ben' chnit chdegake' neto'. Zoa ben' chongakile' neto' ka to ben' wxiye', la'kzi dill' lin choe'nto'. ⁹ Zoa ben' chongake' ka bi nombia' neto', la'kzi nombia'kzgake' neto'. La'kzi chtilnto' yel' wita', ni mbankznto'. Na' la'kzi chit chyingake' neto', bin' gongake' gan guetnto'. ¹⁰ La'kzi de dii zan dii cheenin gonyeshiin neto', toshiizi zoanto' mbalaz. La'kzi naknto' ben' yesh', ben' zan chonnto' ka ben' wni'a daa choe'lennto' legake' cho'a xtill' Chioza'. La'kzi bibi napnto' ni, nezinto' dii xench nak chento'na' de.

¹¹ Le' ben' bish' na' le' ben' zan', le' lle'le yell Coríntona', ba be'lento' le' dill' kon ka nakan na' ba bli'nto' chakinto' le' do yichj do lall'nto'. ¹² Neto' chli'nto' chakinto' le' do yichj do lall'nto', per le', bi chli'le shi chakile neto'. ¹³ Chat'yoid' le', le' nakle ka xiin' cha', gonle ka chon neto' na' li' gaki neto' do yichj do lall'le.

¹⁴ Bi gonle txen ben'ka' bi nonjilall' Crístona'. La' aga widili daa nak dii li dii shao' kon dii mala', na' aga wdili beeni'na' kon daa nak yel' chol'. ¹⁵ La' ba nezgzile bi chidili Crístona' dii xi-waa. Na' lekzka' beena' ba chonlilallee Crístona' bi chidilile' beena' bi chonlilalleene'. ¹⁶ Na' bi gak soa daa nak lwaa lsak', diika' choe'la'o ben', loo yoodo' che

Chioza'. L̄a' cho' nakcho ka yoodo' che Chios yaa Chios banna'. Ka wna Chioza' che ben' Israelka':

Soa' ladje'ka', na' nad' gak Chios chegake' na' legake' gakgake' yell cha'.

¹⁷Na' daan goll Chioza' legake':

L̄i yichej ladj ben'ka', bi gonle legake' txen.

Bi gox'le daa ba wnia' bi nxi nyech.

Na' ka' wleb' le',

¹⁸na' gak' X̄ale,

na' le' gake xiin cha'.

Kan' na X̄ancho Chioza', beena' zeelo nap yel' wak choo yel' wak xen.

7 Kan' nak daa ba b̄cheb Chioza' checho, le' ben' bish'dawaa na' le' ben' zandawaa. Daan, chiyal' goncho to dii byen gakcho ben' nxi nyech lawe'na' kwenche bibi dii mal ta' ichen kwerp chechoni na' yichjlall'do'choni. Na' daa chall chlebecho Chioza' goncho ka dii le gakcho dowalj ka cheenile'.

²L̄i gaki neto' do lall'le. L̄a' ni to kono bin' goninto', na' ni to konon' wsak'zi'nto', na' ni to konon' siye'nto'.

³Aga chsheshlen' len' nia' le' ka'. Ba wnia'kz' ka chakchgaid' le' axt ni guetid'.

⁴N̄xenlallaa chonle wen, na' cho'a dill' chele ka wen ba chonle. Ladj dii zi' dii ya'ka' ni chtiplallaa na' le chiba chizakid'.

⁵Kon ka bla'nto' gani mbani Macedóniani, bibi yel' wixi'lall' chento' got'. Doxenzə chdil̄ chllagnto' dii zed, chakdil̄-len ben' neto', na' za' dii chwall chsheban neto'. ⁶Per Chioza', beena' chiyonxenlall' ben'ka' zoa nyesh', biyonxenlallee neto' ka bla' Títona'. ⁷Aga to daa bla'ze'n, san daa choe'yenee xtill'le ba chonle wen. Na' be'lene' neto' dill' ka zelall'le ile'ile neto' na' ka chakyeshile daa zele w̄neyi cha'. Na' daa benid' dga zizikli chibaid'.

⁸La'kzi yisha' bse'laa benyeshiin le', bibi chaktekid'. La'kzi gokyeshid' ka bwia' benyeshiin le' shloll', ⁹naa chibaid',

aga daa gokyeshile, san daa gokle-nan le' biyaj bilenile ka cheeni Chioza'. Na' aga bi gok chele ni che daa bzej' le'. ¹⁰Chioza' chone' ka gakyeshicho kwenche yiyaj yilenicho na' gat' yel' mban checho zejli kani, na' bich chakyeshicho daa gok checho ka'. Per yel' chakyeshii daa nsa' dii mala' choncho chlliayi'n cho'. ¹¹Yel' chakyeshina' daa be' Chioza' latj got' ladjlena' benan ka gokbalile' daa ben beena', na' wda'le nad'. Benan ka blaaale na' wyoosheble, na'tech wzelall'le yidwiach' le', na' bsak'zi'le beena' wdap dolaa. Na' yog' diiki chli'n bi nonle txen dii mala' bene'. ¹²Na' ka bzej' le', aga bzej' ni che beena' ben dii mala', ni aga ni che beena' benile' zi'bia', san beena'n kwenche Chioza' gaklene' le' gakbe'ile dii likzan zele w̄neyi chento'. ¹³Diiki chakleneneto' chiyakshao'lall'nto'.

Na' zizikchli bibainto' ka ble'into zoa Títona' mbalaz daa b̄tiple lallee. ¹⁴Ba be'len' Títona' dill' chele, goshee le chibaid' ka chonle, na' bi chido'id' daa goshee ka'. Na' ka dill' daa be'lennto' le' nakan dii li, lekzka' gokbe'i Títona' xtill'lana' daa bi'a lawe'na' nakan kon ka goshee. ¹⁵Na' zizikchli chakile' le' kat' chjadinile' ka bleblene' na' bzenagle che' lega ben' chiyal' gall illeble. ¹⁶Chiba chizakid' daa ba nxenlallaa dii likzə chzenagle.

8 Na' naa, le' ben' bish' na' le' ben' zan', cheeninto' inanto' le' ka mba ba ben Chioza' goklene' ben'ka' chdop chllag choe'la'ogake' Crístona' gani mbani Macedóniani. ²La'kzi biya dii ba gok chegake', mbalaz inlleb zoagake'. Na' la'kzi chak yel' zi' yel' yesh' chegake', do yichj do lall'gake' bzangakile' bi de chegake' kwenche gaklengake' ben' yoblə. ³Nad' nezyen'id' do yichj do lall'gake' be'gake' mecha' bzangakile', na' bengake' axt ga zeelo gogkake'. ⁴Na' legake' got'yochgagakile' neto' kwenche

we'nto' latj lengake' gaklengake' bish' ljuwellchoka' nak lall' na' Chioza'.⁵ Bentechlgake' aga ka to daa nonnto' lez gongake'. Zigaate ben kwingake' lall' na' Xancho Crístona' kwenche gongake' ka cheenile', na'tech bzenaggake' chento' daa nezgakile' nan kan' cheeni Chioza' gongake'.⁶ Ni cheyinnan' ba got'yointo' Títona' kwenche yisyolle' wtopo' daa chzanile we'le ben'ka' chyallj chchini. ⁷Na' ka mbejlaole chonle yog' dii nak wen: daa nonlilall' chgale Crístona', daa chak we'le dill' mbalaz, daa le chajniile, daa cheenchgaile gonle dii wenna', na' daa le chakile' neto', lekzka' li gon byen kwejlaole gakenle ben' we'le daa chzanile.

⁸Aga chontek' byen gonle ka nia', san daa cheenzid' inezile ka chibachgayi ben' bish'choka' gaklengake' ben', na' kan' cheenid' gonle, kwenche wli'le shi lekzilen chaki ljwell-le do yichj do lall'le. ⁹Ba nezkzile dii wenna' ben Xancho Jesucrístona'. La'kzi nake' ben' choo ben' xen, ben kwine' ka ben' bibi zakii kwenche gak wen chele.

¹⁰Daa godwizi wzolole btople mech kwenche gakenle ben'. Na' aga no got'yoi le' btoplen, san benlen do yichj do lall'le. Na' naa inia' ka nak daa gonle: ¹¹li yisyoll daa wzolole chonle dii nech do yichj do lall'le. Ka bibaile kana' wzolole, ka'kzə li yibayi yisyoll-len. Li we' ka to daa gak we'le. ¹²La' shi izanilen do yichj do lall'le, na' ixin' lao Chioza', la'kzi lat'zan. Chioza' bi chnabe' dii bi napcho.

¹³Aga ni che nia' le' gakenle ben' na' le'lə yigaan yesh'le, san gat' dii iyalljile ganga. ¹⁴Naa le' nape daa chyalljgake'le. Na' shi wxe willj ba nappake' bi dii iyalljile, na' yiyaklengake' le'. Na' bibi iyalljile ganga. ¹⁵Na' gak ka na Cho'a Xtill' Chioza': "Beena' bitop dii zan, aga bi bichoonan, na' beena' bitop lat'zan, aga bi byalljile."

¹⁶Choxken Chioza' bzie' Títona' wneyi ka wneyi daa zia' chele. ¹⁷Na' le bibaile' bchebe' yidwie' le', daa lekzka' chaklallee ile'ile' le'.

¹⁸Na' chsel'lennto'ne' sto ben' bish'cho, ben' le wen zeyi che' lao yog'lol ben'ka' nonlilall' Crístona' to to gana' chdop chllaggake', daa le cho'e dill' wen dill' kob che Crístona'. ¹⁹Na' aga daaza, san lekzka' ben'ka' chdop chllag choe'la'ogake' Crístona' ni, wlejgake'ne' sa'lene' neto' ljasannto' mecha' bdop. Na' chonnto' dga kwenche sho'ch Chioza' balaan na' kwenche wli'n nan cheeninto' gakennto' ben'. ²⁰Bi cheeninto' bi gon inaz ben' chento' ni che mech xenni ngoo lo nanto'. ²¹Na' chonnto' to dii byen gonnto'n ka chiyali, aga toz lao Xancho Chioza' san lenkz lao ben'.

²²Lekzka' chsel'lennto' legake' sto ben' bish'cho, beena' zan shii ba ble'into' chone' wen, na' naa cheenchliile' gakenle' daa nxenlallee gonle ka cheeni Chioza'. ²³Na' ka nak Títona', nake' nad' txen chone' xshin Chioza' ladjlena'. Na' ben' bish'choka' zi chop wlej ben'ka' chdop chllag choe'la'ogake' Crístona' ni, chongake' ka choo Crístona' balaan. ²⁴Kwenche inezi ben'ka' nonlilall' Crístona' gan yoblə, li wliyi ben'ki chsel'aa nan dii li ba chakile ben', na' li wli' chonle wen kon ka choe'nto' xtill'le.

9 Bich chonan byen wzej' le' inia' chiyal' gakenle ben' bish'choka' nak lall' na' Chioza'. ²La' ba nezd' ka cheenile gakenle ben', na' ba bi'a xtill'le lao ben' Macedóniaki, chepgakee godwitzteyi le' lle'le Acáyana' cheenile gakenle. Na' ka wnezi ben' Macedóniaki ka cheenile gonle, zangake' ba chaklall'gake' gaklengake'. ³La'kzi nakan ka', chsel'aa ben' bish'choki kwenche inezgakile' nan choe'nto' dill' li daa che'nto'gake' nan chonle wen. Nia' le' ka' kwenche gonchle ka dii le wtoplen. ⁴La' shi za'len no ben' Macedonia nad' ka yidwia' le', na'

ile'gakile' bi chonle ka dillaa choe'nto' chele, na' gakan yel' zto' chento' daa nx-enlall'nto' chonle wen. Na' le' si'techlälə yel' zto'. ⁵Ni cheyinnan' chakid' chonan byen wselāa ben' bish'choki yidwiagake' le' zigaate, kwenche gaklengake' le' yiy-oll wtope daa ba bcheble. Na' kat' yid', ba xoashawan lega dii chzanile, na' aga inacho do ki do lall'len choe'len.

⁶Li lljadini cheyi dga: Beena' gaz lat'zə, lat'chokzə yizi' yilape'; na' beena' gaz dii xen, lekzka' dii xen yizi' yilape'. ⁷To tole we'le ka to daa chzanile. Bi gonlen do ki do lall'le, la' aga no chon byen we'len. La' Chioza' chakchgaile' beena' chibayi we'n do yichj do lallee. ⁸Chioza' wak gone' ka gakchga wen chele kwenche toshiizi gat'ch yog'lol dii chyallj chchinile na' gakteyin gakenle yog'lol ben' bibi de che'. ⁹Cho'a Xtill' Chioza' nan:

Cho'e ben' yesh'do'ka' daa chyallj chchingakile',
na' dii wenna' daa chone' biga llia te cheyin.

¹⁰Chioza', beena' chon' bi dii chaz chbekcho na' dii cheej chaocho, lekze'n gone' bittezə dii chyalljile, na' gone' ka shesh shanch bi de chele kwenche gonchle dii wenna'. ¹¹Na' ka', gapchle dii xench kwenche gak we'chle dii xench gakenle ben'. Na' kat' lljasannto' mecha' daa ba btope lao ben'ka' chyalljin, na' we'gake' Chioza' yel' choxken. ¹²Ka nak mecha' daa we'le ben'ka' nak lall' na' Chioza', aga to gakenzan legaken', san lekzka' gonan ka we'chgagake' Chioza' yel' choxken. ¹³Na' ka ikaagake'n, we'la'ogake' Chioza' daa chonle ka na dill' wen dill' kob che Cristona' daa ba chajle'le. Na' lekzka' we'la'ogake' Chioza' daa btope mech xen be'len legake' na' nochlə ben' yoblə. ¹⁴Na' daa chwiagake' chaklenchga Chioza' le', na' inabgakile'ne' gakenche' le'. ¹⁵Choxken Chioza', daa ba bene' to dii wen inlebb checho.

Bichkzə bi dill' chillle we'cho ka to ba bene' checho.

10 Nad' Pablo, chat'yoid' le', na' choe'len' le' dill' goll-lall' ka be' Cristona' dill' daa nape' yel' chxen-lall', la'kzi nagake' cha' bi chiyaxjid' wsheshlen' le' kat' zoa' ladjlena', na' galjə zoa' zit' chiyaxjid' chnia' le' zi'bia' lee yishka' chzej'. ²Na' chat'yoid' le', li gongach wen kwenche kat' yidwia' le' bi lenle wsheshlen' ka wsheshlen' ben'ka' naz chon' lega ben' yell-liao. ³La'kzi naknto' ben' de beli chen, bi chdilnto' ka chdil ben' yell-lioki. ⁴Neto', kat' chdil-lennto' dii mala' bi chchinnto' yesya ka daa chchin ben' yell-lioki, san daa chchinnto' nsa'n yel' wak che Chioza' kwenche chlliyai'nto' yel' wak che dii xiwaa. ⁵Na' chlliyai'nto' daa yoo loo yichjlal'do' ben' daa chsej chllonan gombia'gake' Chioza'. Na' chonnto' kwenche wzexj yichjgake' wzenaggake' che Cristona'. ⁶Na' kat' ba nakbia' chzenagle kwaslol, na' wwiato' nak gonnto' che beena' bi chzenagkz.

⁷Li wwia ka chonnto'. Na' shi chakile nonle Cristona' txen, chiya' gake'ile lekzka' neto' naknto'ne' txen. ⁸Aga chido'id' chshalj chshon' daa nia' kwinn Cristona' bene' lall' na'nto' we'nto' xtilleena' kwenche gakennto' le' gake wal, aga kwenche wlliyai'nto' len'. ⁹Bi cheenid' gakzile chzej' yishki kwenche wsheb' le'. ¹⁰Zoa ben' ne' yishka' chzej' le' le znia chnen, per kat' zoalen' le' ni bi nak' ka ben' illeble, na' ni dill' bi chak wi'a. ¹¹Na' ben'ka' naz ka', chiya' inezgakile' kon ka chzejnto' naa zoanto' zit', ka'kzə gonnto' kat' soanto' ladjlena'.

¹²Bi cheeninto' gakebinto' ben'ka' chyibz kwingake'. Daa chakgakile' le' wen chongake' na' daa chsaklebi ljwelle' nochgake' chonch, chli'gake' bi nte-gakile'. ¹³Neto', aga wshalj wshonnto' che to dii bin' gonnto'. San cheyi daa ben Chioza' lall' na'nto' gonnto'n

choe'nto' dill', na' le' bselee neto' lall-lena'. ¹⁴Neto' bidye'lennto' le' dill' wen dill' kob che Crístona' dii nech, na' bi chixoa chento' inanto': "ki bennto'". ¹⁵Bi chshalj chshonlenznto' xshin ben' yoblə, san nonnto' lez gonlilall'chle Crístona' kwenche gonchnto' xshin Chioza' daa nak lall' na'nto' gonnto' gana' zoale. ¹⁶Lekzka' nonnto' lez we'nto' dill' wen dill' kob che Crístona' kon ga bin' illin xtilleena', kwenche bi wshalj wshonlenznto' xshin ben' yoblə.

¹⁷Beena' chshalj chshon kat' bin chone', che Chiozan' chiyal' wshalj wshone'. ¹⁸Beena' chshalj chshon che kwine', bibi zakee, san beena' ina Chioza' le wen chone', beenan' zak'.

11 La'kzi chakile biz dill' diika' cho'a, li wzenagan. ²Dga chaktek cha' chele za'n che Chioza'. Nad' ba non' le' lo na' Crístona', ka chak che to ben' zoa to nool wew' che', bi' napshii kwim', na' chone'b' lo na' beena' gak ben' cheb'. Na' kan' cheenid' gake lao Crístona', ka to nool wew', bi' napshii kwinin. ³Per chxollid' gak chele ka gok che dii Évana' kana' wxiye' be'la' le' daa bzenague' cheb. Na' chakid' shi ka' gon-zle wzenagle bi dill' wxiye' dii gonlle-jin le', na' bich gonlilall'le Crístona' do yichj do lall'le. ⁴Shi chla' ben' choe'lene' le' dill' nlla'lə aga ka daa ba bsdinto' le' che Jesús'a, wa chsedtegakile' le' nlla'lə che Espíritu che Chioza', beena' zoa loo yichjlall'do'chona', wa che dill' wen dill' kob che Crístona' daa wyajle'le dii nech, na' chajle'tezle chegake'. ⁵La'kzi chakile chajni'chi ben'ka' nale nakgake' postl chele aga ka nad', nad' nezid' bi nakan ka'. ⁶Le'ljaile bi chakyenaa wi'a dill', per chajni'chid' aga ka legake'. Na' dgan ba bliinto' le' toshiizi lao yog'lo'te dii chonnto'.

⁷¿Achakile malan ben' bentez' ka ben' bibi zakii na' aga bi laxj' wñabid' le' kana' be'len' le' dill' wen dill' kob

che Chioza'? Goktgui gake ben' za-kii lawe'na'. ⁸Bex'shaz' mecha' daa ben' ben'ka' chdop chllag choe'la'ogake' Crístona' yell yoblə kwenche bibi byalljid' shlak bli' bsedid' le'. ⁹Na' kana' wzoa' ladjlena' na' byallj bchinid', ni tole bi benid' zed. Ben' bish'choka' lle' yell Macedóniana' bidwa'gake' daa byalljid'. Na' ka' bibi zed benid' le', na' biga gonkzid' le' zed. ¹⁰Dill' li che Crístonan' cho'a, na' nia' ni to ben' lle' gana' mbani Acáyana' bi wsej wllone' wshalj wshon' ka to dga chon'. ¹¹¿Anezile bi'che nia' ka'? ¿Achakile bi chakid' len'? Chioza' nezile' le chakid' le'.

¹²Per gonchzk' ka chon' kwenche bi wi'a latj che ben'ka' cheeni wshalj wshongake' inazgake' chongake' ka chonnto'. ¹³Ben'ki bi nakgake' dowalj postl, na' chdagake' chziye'gake', nazgake' nakgake' postl che Crístona'. ¹⁴Na' daa chongake' ka' bi nakan ka dii yibanicho, la' nezicho dii xiwaa chonz kwinin ka anjl che Chios. ¹⁵Daan, bi nakan ka dii yibanicho ben'ka' chon xshininna' nagake' chsedgakile' ben' nakan gongake' yiyakgake' ben' wen lao Chioza'. Na' daa chongake' ka', len wlliaiy'n legake'.

¹⁶Sto shii nia' le', bi gakele bizə dillaan choe'len' le'. Wa shi ka' chakile, li gaks-hazi ka', per li we' latj wi'a dill' kwenche wshalj wshonlataa. ¹⁷Na' daa chshalj chshon' che kwim', chon' ka ben' bi nteyi, la' aga kan' cheeni Xanchona'. ¹⁸Daa le chshalj chshon ben' zan shi no nakgake', lekzka' nad' wshalj wshon' non nak'. ¹⁹Le' nale nakle ben' sin' na' chibazile chleble ben'ka' bizə chon chna lat' wej. ²⁰Chonzle banez shi bi chgongake' le' gonle, shi chzi' chkaagake' bi de chele, shi kon daa nazan chegake' chongakile' le', wa shi chgap' chball'gake' xag'lena'. ²¹¿Achakile bi chiyaxjid' gon' ka chon ben'kin? Nezganz bi gakelebid' legake' gon' ka'.

Letē shi lēgake' chiyaxjgakile' chshalj chshongake', lēkzka' nad' wiyaxjid' wshalj wshon', ka chon to bēn bi nteyi. ²² Shi nagake' nakgake' bēn' hebreo, lēkzka' bēn' hebreo nad'. Shi nagake' nakgake' bēn' Israel, lēkzka' bēn' Israel nad'. Shi nagake' nakgake' xiin dia che dii Abrahamā', lēkzka' xiin dia che' nad'. ²³ Shi nagake' chongake' xshin Crístona', nad' nia' chontechla'n ka lēgake'. (Daa nia' ka' chon' ka bēn' bi nteyi.) Nad' choe'l-lall'ch' chon' xshin Crístona' aga ka lēgake'. Lech ba wyaa lillya ka lēgake', ba bet wdinch bēn' nad' aga ka lēgake', na' dii zan shii ba bila' lo yel' wita'. ²⁴ Gay' shii ba bet wdini bēn' Israelka' nad' yid sota' twaljichoa wej, ²⁵ shon' shii bet wdingakile' nad' yaga', na' zi shlin bliiagake' nad' yaja'. Lēkzka' shonə shii ka yo'a loo barkwa' wche'lenan nad' yel, na' zi shlla shyel bgaana' lo nisdona'. ²⁶ Shlak chda' ngwaa nez dii zan dii ba ben ble'id'. Ba wzoa' dii nxoll wa' no yao nad', no che bēn' wban, no che bēn' wlall' cha'ka', no che bēn' bi nak bēn' Israel. Ba wzoa' dii nxoll ka wdia' yell xenka', na' ka wdia' lyix', na' ka wdia' lo nisdona'. Na' lēkzka' ba wzoa' dii nxoll che bēn' wxiye'ka' nazgake' ba chajlē'gake' che Crístona'. ²⁷ Ba benchga' llinna' axt' ba chjxakchgaid', zan shii ba wlej' bishgal, ba wbił wdonchga' na' ben banez bi weej wdaw', ba blagloa' no dii zag na' byallj xalaana'.

²⁸ Na' ka chllagloa' yog'loł diiki, ka'kzan chllagloa' daa zia' wneyi lla kon lla che yog' bēn'ka' nonlilall' Crístona' to yell. ²⁹ La' kat' to bēn' bich chone' ka dii le, kon chakid' nad'kzan chak' cha' ka'; wa shi ga zoa bēn' biz che' chone' na' chchixē' bēn' yoblə lo xnez Chioza', na' chllaa yichj'. ³⁰ Shi de dii chonzan ka

wshalj wshon', we'tochl' dill' cheyi daa chli'n bibi gak gon' tobialoz'. ³¹ Chios, beena' nak Xa Xancho Jesúsza', beena' chgoocho balaan toshiizi, nezile' cho'a dill' li. ³² Na' ka wzoa' yell Damáscona', beena' nzoa rey Arétaza' ngoo lall' nee yella' bzoe' bēn' wdapgake' cho'a yella' kwenche nan gox'gake' nad'. ³³ Na' bēn'ka' zoa gana' bllin', bigoogake' nad' to loo lloom, biletjgake' nad' to cho'a ventan dii zoa lee zee daa nechj yella', na' bi bex'gake' nad'.

12 Chonkzan byen wshalj wshon' dill' cheyi daa ble'do'id' na' cheyi daa bli'yi Xanchona' nad' daa konon' yen ile'kzi. ² Nombi'a to bēn'†† nake' Crístona' txen. Ba gok shda' yiz Crístona' bchi'ene' yabana' axt' gana' lliate Chioza'. Bi nezid' shi wyaje' do beli chen che'na', wa shi to bishbe che'na'zan wyaj. Toz Chioza' nezile' ³ shi wyaje' do beli chen che'na' wa shi to bishbe che'na'zan wyaj, per nezid' ⁴ bche Chioza'ne' yabana' gana' nak mbalaz inleeb. Na' benile' dill' dii konon' yenkzi, dii bi de lsens no wshaljan. ⁵ Che beena' gok cheyin kan' wshalj wshon', san ka nak nad', aga bi de wshalj wshon' lete wak wshalj wshon' cheyi diika' chli'n bibi gak gon' tobialoz'. ⁶ Shel' cheenid' wshalj wshon', aga inacho chon' ka bēn' bi nteyin, la' dill' lin cho'a. Per bi gon' ka', kwenche kono ile'i nad' bēn' le zakii daa ba ble'id' diika'. La' diika' chon' na' dill'ka' cho'a, lēkzgakannan' wli'gakan nakan nak'.

⁷ Kwenche bi gak' bēn' choo bēn' xen lao yel' mba yel' shao' inleebka' ba bli'yi Crístona' nad', bi'e latj bla' to dii chzak'zi' nad', to dii bsel' Satanáza' daa choaziyaan nad', na' chak' ka bēn' chad' chbibe' yesh'. ⁸ Dga chak' cha', shon' lin ba wñabid' Xanchona' yikwase'n. ⁹ Na' wne'

††12:2 Nombi'a to bēn': daa nan ki, Páblona' cho'e dill' che kwine', la' kwinkzen' bche' Crístona' yabana'.

nad': "Chaklə ch'o' zoalenkz' li' na' gaken' li'. Daazan chyaljilo'. L'a' yel' wak cha'na' chli'ch lawin kat' de daa chli'n bibi gak gono' tobialozo'." Daan, chibachid' wi'a dill' cheyi diika' chli'n bibi gak gon' tobialoz', kwenche yel' wak che Crístona' soalenchan nad'.¹⁰ Na' daa chakid' Crístona', chibaid' kat' za' daa chli'n bibi chak gon' tobialoz', kat' choni ben' nad' zban, kat' chyalj chchinid', kat' chsak'zi' ben' nad', na' kat' de to dii lallj cha'. L'a' kat' za' daa chli'n bibi chak gon' tobialoz', kana'lan chakbe'id' zoalench yel' wak che Crístona' nad'.

¹¹ Ba ben' ka ben' bi nteyi daa chshalj chshon' che kwín' ni chele, l'a' le'lan nan we'le dill' nan chon' wen. L'a'kzi bibi zaka, aga chonch ben'ka' nale nak postl chele ka nad', ben'ka' nale chajni'chgayi.

¹² Daa wzoatezi wzoa' ben' daa yoo lo na' gon' lao yog' diika' btil' na' daa ben' yel' wakka' ladjlena', chli'n nak' dowalj postl. ¹³ Bi gakile' benid' le' nakzi aga ka ben'ka' nonlilall' Crístona' yell yoblə daa bi benid' le' zed bibi wkaa chele. Bi nakan ka'. Na' li' si'xen cha' shi bi ben' wen ben' ka'.

¹⁴ Ba chon' wneyi yidwia' le' de wyon shii, na' lekzka' bi cheenid' gonid' le' zed. L'a' aga chzelallaa bi de chele, san len' chzelallaa yidwia'. Ka chak che ben' nape' bi'do', aga legakban' wweej wwaogakb' legake', san xaxna'b'kan' segake' wneyi wweej wwaogake' legakb'. Kan' chak cha' chele. ¹⁵ Do yichj do lallaa izanid' bi de cha', axt yel' mban cha'ni izanid', kwenche gak wen chele. L'a'kzi nad' axt ga zeelo gacid' le', widezile zizikchli gonile nad' kazli.

¹⁶ Nezkzile aga bi zed benid' le', per bal-le chakile' biyiljlal'zan' kwenche wxiyaa le'. ¹⁷ Wa li' inashki shi no ben'ka' ba bselaa ba wxi' wkaagake' bi de chele. ¹⁸ Gosh' Títona' yidwie' le', na' bsel'lenee sto ben' nakcho txen. Li inashkilja shi bi wxi' wkaa Títona' chele. Nezile bi nakan

ka'. L'a' toz ka nsa' chento' na' toz ka cheeninto' gakennto' le'.

¹⁹ Shi chakile' choento' dill'ki kwenche bibi sa'lall'le chento', aga kan' nakan. Choento' dill' lao Chioza' daa naknto' Crístona' txen. Le' ben' bish'dawaa na' le' ben' zandawaa, yog'lo! diiki chonnto' nakan dii gaken le' kwenche gakhale lo xnez Chioza'. ²⁰ Chxollid' kat' yidwia' le' bi chonle ka cheenid' gonle. Na' le', aga wyazlall'le ka gon' chele ka yid' gana' zoale shi naa. Chxollid' shi ka yid' ba chdi! chsheshlenz ljwell-le, ba chakxe'zi ljwell-le, ba chllaaz ljwell-le, ba chonz che chezle, bizə ba chon chnaz che ljwell-le, ba chchitjzle dill' che ljwell-le, ba chep cha'lall'zle, na' bichkzə nkaani'a xnezi daa chonle. ²¹ Lekzka' chxollid' shi kat' yidwia' le' sto shii, si'a yel' zto' lao Chios cha'na' ni chele, na' kwell' ni chele. L'a' zantele chonle dii mala', na' bin' yiyaj yilenile diika' ba benlenle beli chen che-lena' kon ka nazan chele.

13 Dga gak shon shii yidwia' le'. Naach yidyen' ka na cho'a xtil' Chioza': Shi zoa ben' chawe' xya che to ben', na' bibi gak gone' shi bi zoa chop shon ben' inagake' kan' nakan. ² Kana' bidwia' le' de wchop shiyi, gosh' ben'ka' chongake' dii mala' bich wwialoz' che-gake'. Na' naa zoa' zit', ba nia' le' ka' sto shii, bich si'xen' kat' yid' dii yoblə. ³ Gon' ka' ni cheyi daa cheenile ile'ile shi lekzi-daan cho'a dill' kon ka cheeni Crístona'. L'a' Crístona' bi nake' ka ben' bibi gak gon ladjlena', san nape' yel' wak kwenche yigwee shli lall'le. ⁴ Dii likzə Crístona' blexj yichje' wdee lee yag cruza' ka ben' bi nap yel' wak, per naa zoalene' yel' wak che Chioza'. Na' lekzka' neto' lennto' Crístona' naknto' ka ben' bi nap yel' wak, per daa naknto'ne' txen lekzka' zoalennto' yel' wak che Chioza' kwenche gonnto' xshine'na' ladjlena'.

⁵ Li yiya yiyilj kwínle shi dii li ba nonlilall'le Jesucrístona'. Na' li

gakbe'yenii shi zoalenzke' le', wa shi bi nonlilall'kzlene'. ⁶Na' nonto' lez gakbe'ile zoalenzke' neto'. ⁷Chnabinto' Chioza' gaklene' le' bibi dii mal gonle. Aga chnabinto'ne' dga kwenchezə wli wzez chento' le wen bennto' xshine'na' ladjlena', san cheeninto' gonle dii wenna' daa chiyal' gonle la'kzi ina ben' bi chak gonnto' xshin Chioza'. ⁸Bi gak bi inanto' cheyi daa nak dii li, san zeelo chaklennto' kwenche wli'chlwin. ⁹Chibainto' shi le' nakchale na' bi chonan byen wchinnto' ye! wñabia'na' nak lall' na'nto', la'kzi zoa ben' chle'ile' neto' ka ben' bi nap ye! wñabia'. Na' inabchinto' Chioza' gaklene' le' gakle doxen ka cheenile'. ¹⁰Chzej' le' naa kwenche kat' yid' bi inetek' le' zña.

La' Xanchona' none' nad' ye! wñabia' kwenche gaklen' le' gakchale lo xnez Chioza', aga bene'n kwenche wliayaa le'.

¹¹Dga zeelo nia' le', le' ben' bish' na' le' ben' zan', lialallaa soale mbalaz na' we'l-lall'le gakle doxen ka cheeni Chioza'. Li wtip lall'le, li gak toz na' soalen ljwell-le mbalaz. Na' Chioza', beena' chakile' cho' na' chzoe' cho' mbalaz, soalene' le'. ¹²Na' li wwap ljwell-le chiox lega ben' chaki ljwellin daa nakle lall' na' Chioza'. ¹³Na' yog'lo! ben'ki ba bixi biyech lao Chioza' chwapgake' le' chiox.

¹⁴Xancho Jesucristona' gaklenshgue' le', na' ye! chaki che Chioza' soalenan le', na' Espíritu Santo che'na' gone' ka gakbe'ile zoalene' le'. Kan' gakan.

**Kart daa bzej Páblona'
na' bseleen lao ben'ka'
nonlilall' Jesucrístona'
gana' mbani Galáciana'**

1 Nad' Pablo, nak' postl che Jesucrístona', na' aga no ben' yellio wleje' nad' na' bselee nad' wi'a xtilleena', san kwin Jesucrístona' na' Xacho Chioza', beena' bisbane'ne' ladj ben' wetka', bsel'gake' nad'. ²Nad' na' yog' bish' ljjwellchoki chwapnto' le' chiox, ka le nonlilall'le Crístona' to to yellka' lle' gana' mbani Galáciana'. ³Chnabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz. ⁴Jesucrístona' bzani kwine' wite' ni checho daa nakcho ben' saaxya, kwenche bisle' cho' lao dii mala' de yell-lioni, kon ka goklall' Xacho Chioza' gone', ⁵beena' chido! sho' balaan zejli kani. Kan' nakan.

⁶Le chibanid' chele daa ba bilaala'odozle Chioza', beena' gox wñab le' na' bliile' le' ye! chiyesh'lalli che'na' daa bselee Crístona' wite' ni checho, na' ba zjanozle to dii yoblə daa bi nak dill' wen dill' kob che'. ⁷Aga inacho de sto dill' wen dill' kob yoblan, san zoaz bal ben' cheengakile' gonllej gongangakile' len', na' chsha'zgake' dill' wen dill' kob che Crístona'. ⁸Shi ga za' ben' yishee dill' wen dill' kob che Crístona' daa ba wdixje'into' le', Chioza' wsak'zi'shgue' zejli kani nottezə beena' gon ka', laa neto' wa no anjl ben' za' yabana'. ⁹Ba wñiakzə' le' ka', na' naa chiznia'n sto shii: shi no chsha' dill' wen dill' kob che Crístona' daa ba wdixje'into' le', Chioza' wsak'zi'shgue'ne' zejli kani.

¹⁰Aga cheenid' ile'shii ben' nad' daa nia' ka', san cheenid' gon' daa chazlall' Chioza'. Shi cheenid' gon' ka' chazlall' ben', aga wen llin che Crístona'chan nak'.

¹¹Cheenid' inezile dga, le' ben' bish' na' le' ben' zan', dill' wen dill' kob che Crístona' daa wdixje'id' le' bi nakan dii wdiljlall' ben' yell-lioni. ¹²Ni to ben' yellio bi bli' bsedile'n nad', san kwin Jesucrístona' bli' bsedile'n nad'.

¹³Ba benzkzile' ka bsa' cha' kana' ni noa' ley chento'na', neto' ben' Israel. Na' bsak'zi'a ben'ka' nak lall' na' Chioza' daa nonlilall'gake' Crístona', goklallaa yis'engakee. ¹⁴Kana' ni noa' ley chento'na', wlejlaw' ladj ben'ka' nak ljjwell' daa ben' to dii byen wnoa' yog' diika' bkwaanlen dii xozxto'nto'ka' neto'. ¹⁵Per Chioza', kana' zi' galjtia', ba ngwee xnez xlatjin yiyesh'lallile' nad', na' wleje' nad' kwenche gon' xshine'na'. Na' ka bllin llana' nllie' bia', ¹⁶bene' ka bembia' Xiine'na' kwenche llj'a xtilleena' lao ben'ka' bi nak ben' Israel. Na' ka gox wñab Chioza' nad', ni tlish' ben' yell-lio bi wñabid' wzajniile' nad' daa chiya! gon'. ¹⁷Ni bi biyaa Jerusalénna' lljawia' ben'ka' wlej Crístona' nakgake' postl che' kana' zi' kweje' nad'. San lii wyaatia' gana' mbani Arábiana', na'tech biyaa Damáscona' sto shii.

¹⁸Na' ka wde shon yiz, biyaa Jerusalénna' kwenche bembia' Pédróna', na' bigaanlenee shda' wbill. ¹⁹Lekzka' ble'id' Jacóbona', beena' nak ben' bish' Xanchona', na' kochno postl yoblə ble'id'. ²⁰Chioza' nezile' dga chzej' le' bi nakan de wxiye'.

²¹Na'tech wyaa gana' mbani Síriana' na'ch Cilíciana'. ²²Per ben'ka' nonlilall' Crístona' Judéana' bin' gombia'gake' nad'. ²³Zeelo ba bengakile' nagake': "Beena' bsak'zi'e cho' kana', ba chde' choe' dill' wen dill' kob che Crístona' daa goklallee yisol yinite' kana'." ²⁴Na' be'la'ogake' Chioza' daa ba chyixji'a xtil' Crístona'.

2 Wde shda' yiz biyaa Jerusalénna' sto shii, na' wza'len Bernabéna' nad' na' lekzka' bchi'a Títóna', ²la' Chioza'

bene' ka wneꝑid' nan chiyał' sha'. Na' jashaljen' beṅ'ka' chṅabia' lao beṅ'ka' nonlilall' Crístona', na' to nad' to legake' bzajniid'gake' ka nak dill' wen dill' kob che Crístona' daa choe'len' beṅ'ka' bi nak beṅ' Israel. La' goklallaa ineꝑgakile' bin chli' chsedid' kwenche bi inagake' daa ba ben' na' daa ni chon' nakan dii bibi zakii. ³Na' ni Títona', beena' zyaalen', naktie' beṅ' griego, bi bengake' byen sho'e seṅ daa le circunciśión, ⁴la'kzi wzoa beṅ' aga do lall'gake' lengake' neto' n xenilall'nto' Cristo Jesús'a' san bidwia bidyizgake' shi ni chonnto' ka na ley daa bzej dii Moiséza'. La' goklall'gake' toshiizi idakw ichejnto' gonnto' doxen ka na leya'. ⁵Na' neto', biga bennto' ka goklall'gake', daa cheeninto' ineꝑzile bich chonan byen gonle daa na leya', san chiyał' gonle daa na dill' wen dill' kob che Crístona' daa nak dii li.

⁶Ka nak beṅ'ka' chṅabia' lao beṅ'ka' nonlilall' Crístona' yell Jerusalénna', la'kzi nakgake' beṅ' mbejlawin bitek zia' wneꝑi shi no nakgake', la' yog'cho toz ka zak'cho lao Chioza'. Bi wṅagake' chonan byen yishaa diika' chli' chsedid' che Crístona'. ⁷San gokbe'gakile' Chioza' ba bene' lall' na' wi'a dill' wen dill' kob che Crístona' lao beṅ'ka' bi nak beṅ' Israel, ka bene' che Pédrona' bene' lall' nee chixje'ile'n beṅ' Israelka'. ⁸La' Chioza', beena' wleje' Pédrona' kwenche nake' postl' che' na' chixje'ile' cho'a xtilleena' beṅ' Israelka', lekzen' wleje' nad' nak' postl' che' kwenche chixje'id' cho'a xtilleena' beṅ'ka' bi nak beṅ' Israel.

⁹Jacóbona', Pédrona', na'ch Juanna', beṅ'kin mbejlaogake' lao beṅ'ka' nonlilall' Crístona', ka gokbe'gakile' chaklen Chioza' nad' kwenche chon' xshine'na', na' bli'gake'n chongake' nad' na' Bernabéna' t xen daa beṅ'gake' na'nto'ka'. La' gokgakile' wenan gonnto' xshin Chioza' lao beṅ'ka' bi nak beṅ' Israel shlak chli' chsedgakile' beṅ' Is-

raelka'. ¹⁰Toz dii wṅagake' neto' nan chiyał' yiyesh'lallinto' beṅ' yesh'ka', na' leyen'kzannan' ba yookzə yichj' gon' do yichj' do lallaa.

¹¹Na' ka bid Pédrona' Antioquána', bsheshlenee, la' daa bene' bi nakan wen. ¹²Dii nech weej wdaolene' beṅ'ka' bi nak beṅ' Israel, per ka bid beṅ'ka' bsel' Jacóbona', bsane' bich weej wdaolene' legake' daa bblebe' beṅ'ka' na chiyał' sho'cho seṅ daa le circunciśión na' goncho doxen ka na leya'. ¹³Na' beṅ' Israelka' lle' na', beṅ'ka' ba nonlilall' Crístona' goklebgakile' Pédrona' bich weej wdaolengake' beṅ'ka' bi nak beṅ' Israel. Na' axt lenzə Bernabéna' goklebile' legake'. ¹⁴Na' ka gokbe'id' bi chongake' ka na dill' wen dill' kob che Crístona', na' gosh' Pédrona' lao yog' beṅ'ka' lle' na': "Len naktio' beṅ' Israel, na' ba wlej yichjo' ley chechona' na' ba wzolozo' chono' t xen beṅ'ka' bi nak beṅ' Israel. ¿Biche cheenzilo' gono' byen gon beṅ'ki daa yoolocho choncho, cho' nakcho beṅ' Israel?"

¹⁵Cho' nakcho beṅ' Israel ka goljtecho chakicho bi nakcho beṅ' saaxya ka beṅ' yellka' sto, ¹⁶per neꝑzicho ni tlish' beṅ' bi nake' beṅ' li beṅ' shao' lao Chioza' daa chone' yog' daa na ley che'na'. San beena' gonlilallee Jesucristonan' yiyake' beṅ' li beṅ' shao' lawe'na'. Na' lekzka' cho' ba benlilall'cho Jesucristona' kwenche yiyakcho beṅ' li beṅ' shao' lao Chioza', na' aga daa goncho daa na leyan'. La' aga no yiyak beṅ' li beṅ' shao' lao Chioza' daa chone' daa na leya'.

¹⁷Daa cheenicho gakcho beṅ' li beṅ' shao' lao Chioza' daa wit Crístona' ni checho, chakbe'icho lenkzcho cho' beṅ' Israelan nakcho beṅ' saaxya. Na' daa chakbe'icho nakcho beṅ' saaxya, ¿azejin Crístona' none' cho' beṅ' saaxya? ¿Bi nakan ka! ¹⁸Shi ba wlej yichj' leya', na' sto shii yiyonza'n lez yiyonan nad' beṅ' wen, na' gap' do! lao Chioza'. ¹⁹Nad'

nak' ka beṅ' ba wit lao leya' daa bich chon' ka nan, kwenche gak soa' gon' ka cheeni Chioza'. ²⁰Nad' nak' ka beṅ' witlen Crístona' t xen kana' wite' lee yag cruza'. Daan, bich chon' daa nazan cha' san Crístona' zoe' lo yeṅ' mban cha'ni. Na' daa chonlilallaane', shlak mban' chon' daa cheeni Xiṅ Chioza', beena' gokile' nad' na' bzani kwine' wite' ni cha'. ²¹Bi chzoa' ka'lə yeṅ' chiyesh'lalli che Chioza' daa bselee Crístona'. La' shel' leya' bizoyin biyonan cho' beṅ' li beṅ' shao', bi benan byen wit Crístona' lee yag cruza', shel'ka'.

3 Le' beṅ' Galacia, beṅ' bi chajni, ¿no wxiye'z le'? Kwasloṅ bli' bsendinto' le' nanto' Crístona' wxak'zi'e lee yag cruza' ni checho. ²Toz dii cheenid' inabid' le': ¿Ani che daa chonle daa na leyan' bidsoa' Espíritu che Chioza' loo yichjlall'do'lena'? ¿Anti daa wya-jle'le che xtill' Crístona' daa bli' bsendid' len', lla? ³Ni lat' bi chajniile! Espíritu che Chioza' wyo'e loo yichjlall'do'lena' ka wzolo chonlilall'le Crístona'. Na' naa chakile yiyakle beṅ' li beṅ' shao' daa chonle ka na leya'. ⁴¿Ana' bibi zjanayin yog' yeṅ' zak'zi'ka' ba ben ble'ile daa benlilall'le Crístona'? Non' lez bi gakan ka'z. ⁵Chioza' bzoe' Espíritu che'na' loo yichjlall'do'lena' na' bliile' le' yeṅ' wak che'na', aga ni che daa chonle ka na leyan', san daa wyajle'le xtill' Crístonan'.

⁶Ka ben dii Abrahama', wyajli'e che Chioza', na' daa wyajli'e, Chioza' wne' goke' beṅ' li beṅ' shao' lawe'na'. ⁷Chiyal' inezile dga: beṅ'ka' chajle' che Chioza', legaken' nakgake' dowalj xiṅ dia che dii Abrahama'. ⁸Cho'a Xtill' Chioza' nan bllie' bia' che beṅ'ka' bi nak beṅ' Israel lengake' yiyakgake' beṅ' li beṅ' shao' lawe'na' shi gonlilall'gake'ne'. Na' bi'e dill' wen dill' koba' kana' golle' dii Abrahama': "Ni cho' li' gak wen che yog' beṅ' lle' zbii zkaan yell-lioni." ⁹Na' Chioza'

chonleeye' beṅ'ka' chonlilall' le', ka bene' che dii Abrahama' daa benlilallee le'.

¹⁰Beṅ'ka' non lez gagkake' beṅ' wen daa chongake' daa na leya', ba mbi-ayi'gake'. La' Cho'a Xtill' Chioza' nan: "Ba nakten kwiayi' beena' bi saki gone' yog'loṅte daa nllia leya' bia'." ¹¹Na' nakbia'cha aga no nak beṅ' li beṅ' shao' lao Chioza' daa chone' daa na leya'. Cho'a Xtill' Chioza' nan: "Beena' nak beṅ' li beṅ' shao' daa nonlilallee nad', beenan' ibane'." ¹²Na' aga na leya' chiyal' gonlilall'cho Chioza', san nan: "Nottezə beṅ' chon doxen ka na leya' si'e banez yeṅ' mban che'na'."

¹³Crístona' wxak'zi'e lee yag cruza' ka to beṅ' mal ni checho kwenche bi kwiayi'cho daa bi choncho daa na leya'. La' Cho'a Xtill' Chioza' nan: "Ba mbi-ayi' beena' wwal'gake' to lo yag." ¹⁴Gok ka' kwenche ka le' bi nakle beṅ' Israel lenle gonlilall'lene', na' Chioza' gone' wen chele ka bchebe' gone' che dii Abrahama'. Na' shi gonlilall'cho Cristo Jesús'a, Espíritu che Chioza' soalene' cho', kon ka bchebe' gone' checho.

¹⁵Le' beṅ' bish' na' le' beṅ' zan', cheenid' wshaljlen' le' ka choncho cho' beṅ' yell-lío: Kat' to beṅ' gone' to yish dii zakii na' ba nakchan, aga no gak ina' bibi zakaan ni bich gak wzanche' cho'a dill'ka' le'inna'. ¹⁶Na' kan' nak daa bcheb Chioza' gone' che dii Abrahama' len xiṅ dia che'na'. Cho'a Xtill' Chioza' bi nan: "xiṅ dia che'ka", san nan: "xiṅ dia che'na'". Bi choe'n dill' che beṅ'ka' shesh shan lo dia che'na', san che toz Crístona', beena' golj lo dia che'nan' cho'en dill'. ¹⁷Dga nia' naa zevin Chioza' bi bzoe' ka'lə daa bchebe' gone' che dii Abrahama' ka bi'e dii Moiséza' ley che'na' wde tap guiyoa shichoa yiz. La'kzi Chioza' bi'e leya', bi wlej yichje' daa bchebe' gone' che dii Abrahama'. ¹⁸Na' shi chonan byen goncho daa na leya' goktgui ikaacho daa bcheb Chioza' gone', bich

nakan daa b̄chebe' gone' cho' ka'zə, shi naa. Per Chioza' b̄chebe' wi'en dii Abrahama' ka'zə.

¹⁹ Shi ka' nakan, ¿berache be' Chioza' leya'? Bi'e leya' kwenche gakbe'i ben' bi chongake' ka cheenile'. Na' bllie' bia' gonan llin shlak biñ' yid Crístona', beena' b̄cheb Chioza' galjə lo dia che dii Abrahama'. Chioza' b̄chine' anjka' be'gake' ley che'na' dii Moiséza', na' b̄chine' dii Moiséza' 'bzajniile' ben'ka' ka nan. ²⁰ Na' Chioza' 'bi byalljile' ben' yoblə wzajniile' dii Abrahama' daa b̄chebe' gone' che', san kwinkze' bzajniile'ne'.

²¹ ¿Achakile Chioza' bititjile' xtilleena' daa b̄chebe' gone' che dii Abrahama' ka bi'e ley che'na'? Bi nakan ka'. La' shel' leya' gak gonan yel' mban checho, ba biyakcho ben' li ben' shao' daa choncho ka nan, shel'ka'. ²² Cho'a Xtill' Chioza' nan yog'loł ben' ndakw nchejgake' lao saaxyana', na' ben'ka' gonlilall' Jesucristona' gaki chegake' daa ba b̄cheb Chioza'.

²³ Kana' zi' yid beena' gonlilall'cho, na' ntakw nchej leya' neto' ben' Israel, axt ki Chioza' bliile' neto' Crístonan' yisle' ben'ka' gonlilall'gake'ne'. ²⁴ Na' leya' goklenan neto', gokan ka to ben' nak lall' nee chap chwie' xiin ben', axt ki bid Crístonan' benlilall'nto'ne' na' biyaknto' ben' li ben' shao' lao Chioza'. ²⁵ Na' naa daa ba bla' beena' nonlilall'cho, bich chnabia' leya' neto'.

²⁶ Daa ba nonlilall'le Cristo Jesús'a, ba nakle xiin Chioza'. ²⁷ Yog'loł-le, le' ba wchoale nisa' daa nonlilall'le Crístonan', ba billa'le na' ba nsa' chele ka nsa' che' daa naklene' toz. ²⁸ Na' cho' nakcho Crístonan' txen, laa ben' Israel, laa ben' bi nak ben' Israel, laa ben' ndoo lla yel chone' xshin ben', laa ben' chon xshinkze', laa noolə, laa ben' byo, ba nakcho toz. ²⁹ Na' shi nakcho lall' na' Crístonan', dii licha nakcho xiin dia che dii Abrahama', na' lencho chidol'cho daa b̄cheb Chioza' gone' che'.

4 Kin cheenid' inia' le': bi'na' gak lall' na'b' daa de che xabaa, shlak ni nesh'b' toz ka zaklebib' wen llinka' nap xabaa, la'kzi leban' gaki cheb' yog'lołte dii de che'. ² Na' nzoa xabaa ben' chap chwiagake' le' na' chgoogake' xnezi yog'te dii gom' axt ki illinch llana' bllia xabaa bia' bich soab' xni'a ben'ka'. ³ Ka'kzan gok checho kana' biñ' shajni-icho, na' wnocho diika' na ben' yell-lioki chonan byen goncho. ⁴ Na' ka bllin lla, Chioza' bselee Xiine'na', wxan to nool le', na' wzo'e xni'a ley che dii Moiséza' ⁵ kwenche yisle' nottezə ben' zoa xni'a leya' na' yiyake' xiin Chioza'. ⁶ Na' daa ba nakcho xiine', bselee Espíritu che Xiine' Jesucristona' loo yichjall'do'choni, na' Espírituna' chone' kwenche che'cho Chioza': "Xadawaa." ⁷ Na' naa, bich nakle ka ben' ndoo lla yel chone' xshin ben', san ba nakle xiin Chioza'. Na' daa ba nakle xiine', ba nonle lez ikaale daa chidol' ben'ka' nak xiine'.

⁸ Kana' bin' gombia'le Chioza', na' wzoale xni'a diika' benlilall'le, diika' bi nak dowalj chios. ⁹ Per naa ba nombia'le Chioza', wa wench inacho ba nombia' Chioza' le', ¿berache sto shii wzoazle xtillii diika' na ben' yell-lioki chonan byen gonle, diika' bibi zakii? ¿Acheenile yizoale xni'a diika' sto shiin? ¹⁰ Na' lenzle chaple balaan llaka', beo'ka', na' kat' chibii lla yelka', na'ch yizka', diika' chakile nakgakan dii llialo. ¹¹ Le chxolid' shi gakdadz xshin Chioza' daa ba ben' ladjlena'.

¹² Le' ben' bish'dawaa na' le' ben' zandawaa, chat'yoid' le' gonle ka chon', la' nad' ba ben' kwina' ka le' bi nole leya' na' bich zoa' xni'ayinna'. Aga chllaan nia' le' ka', la' bigan' bi gonile nad'. ¹³ Le'kzə nezile ni che to yillwe' dii bex' nad' bgaan' lall-lena', na' kan' gok be'len' le' dill' wen dill' kob che Crístonan' dii nech. ¹⁴ Na' bi benile nad' nakzi ni bi bzoale nad' ka'lə ni che yillwe'na' gok', la'kzi

gokan to dii zed chele. San bleble nad' ka to anjł che Chioza' wa ka kwin Cristo Jesúza'. ¹⁵ ¿Garan yel' chiba chizaki che-lena' nape kana' wzoalen' le'? Neziđ' shel' wx'e'ile kwej jalaolena' gonlen nad' kana'. ¹⁶ Na' naa, ¿achllaale nad' daa ba wnia' le' dill' liki?

¹⁷ Ben'ka' bidli' bidsedi le', aga do lall'gaken' bli' bsdgakile' le'. San daa cheenzgakile' yılaale neton' na' gonle le-gake' t xen. ¹⁸ Nakkzan wen toshiizi soa ben' wli' wsedile' le' kon shi gongake'n do yichj do lallgake', kwenche aga to kat' yidwiaz' le' wli' wsedid' le'. ¹⁹ Le' xiin-dawaa, sto shii chak cha' ka chak che noola' chllagloe' sane' bi'do' che'na' daa chi' yichjlikz' gake ka chazlall' Crístona'. ²⁰ Shel' wx'e'id' naate soalen' le' we'len' le' dill' goll-lall', la' bi chajniid' biche chon-zle ka'.

²¹ Ka le' cheenile gonle daa na leya', li inashki nad': ¿abin' yenile ka na leya'? ²² Cho'en dill' wzoa chop xiin dii Abrahama': tob' gok xiin noola' wxi'gake' bene' llin che'ka', na' stob' gok xiin beena' gok nool che' dowalj, beena' biga gok wen llin che ben'. ²³ Xiin nool wen llin che'ka' wzoab' daa wzoalen ljwellgake'. San noola', beena' biga gok wen llin che ben', wzoa xiine' daa bcheb Chioza' wi'e to bi' chegake'. ²⁴ Daa gok che noolka' chop, chzajniin cho' che chop daa be' Chioza' ben' Israelka'. Dii Agara' zaklebile' leya' daa be' Chioza' lo yaa Sinaína'. Na' len' goke' xna' beena' wdoo lla yel bene' xshin ben'. ²⁵ Na' zaklebile' yaa Sinaína' daa zoa Arábiana', na' nake' ka yell Jerusalénna' daa zoa naa. La' yog' ben'ka' chesh chalj yella' nakgake' ka ben' ndoo lla yel chone' xshin ben' daa zoagake' chongake' daa na leya'. ²⁶ San cho' lljazoacho Jerusalénna' daa zoa yabana' gana' zoa Chioza', bi nakcho ka ben' ndoo lla yel chone' xshin ben', la' bi zoacho xni'a leya'. ²⁷ La' Cho'a Xtill' Chioza' nan:

Li' nool will, ben' kono xiin zoa, biba bizaki.

Li' bin' tio' lo yel' zak'zi' che yel' san bi'do', besyaa yel' chiba chizaki cho'na'.

La' noola', beena' wchoonlall' ben' che'na'ne',

soach xiine' aga ka beena' zoalen ben' che'na'.

²⁸ Na' le' ben' bish'dawaa na' le' ben' zandawaa, nakle ka dii Isaaca', beena' bcheb Chioza' wi'e dii Abrahama'. ²⁹ Na' ka gok kana', bi'na' golj daa wzoalen ljwellgake', biya dii benib' bi'na' golj kon yel' wak che Espíritu che Chioza', kakzan chak naa. ³⁰ Na' Cho'a Xtill' Chioza' nan: "Bilag noola' chon xshino'na' len xiine'na'. La' bi lem' ikaab' daa chidoł' xiin beena' biga gok wen llin che ben'."

³¹ Na' naa, le' ben' bish'dawaa na' le' ben' zandawaa, aga nakchcho ka xiin beena' wdoo lla yel bene' xshin ben', san nakcho ka xiin beena' biga gok wen llin che ben'.

5 Crístona' ba bisell bilee cho'. Na' chiyał' soachechle kwenche bich soale xni'a daa wtakw wchejan le' dii yoblə.

² Nad' Pablo chnabid' le' wzenagle dga nia' le'. Shi le' we'le latj koogake' le' sen daa le circuncisión, bibi zjanayin nale nonlilall'le Crístona', shi naa. ³ Sto shii nia' le', nottezə ben' wi'e latj koogake'ne' sen daa le circuncisión chonan byen gone' yog'loł daa na leya'. ⁴ Le' chonle ka na leya' daa chakile yiyonan le' ben' li ben' shao', Crístonan' ba bilaala'ole daa chakile ka', na' ba bzoale ka'lə yel' goklenna' ben Chioza' chele. ⁵ San neto', daa zoalen Espíritu che Chioza' neto', nonnto' lez yiyaknto' ben' li ben' shao' lawe'na' daa nonlilall'nto' Crístona'. ⁶ Na' shi nonlilall'cho Cristo Jesúza', aga bi zakii lawe'na' sho'cho sen daa le circuncisión wa bi sho'chon. Daa zakii lawe'na' gonlilall'chone' na' gaki cho ben'.

⁷Zejkzle wen lo nez lina' daa ba yoole, shel'ka'. ¿No benlej benganzi le' kwenche bich chzenagle dill' lina'? ⁸Aga nak dga che Chios, beena' gox wñab le'. ⁹Dezə dill' nan “lat'zə levadúrana' chis-golan doxen kwa che yetxtila’”. ¹⁰Nxe-nilallaa Xanchona' gaklene' le' kwenche bi shajle'le che daa bi nak dill' li. Na' Chioza' wsak'zi'e nottezə beena' gonllej gonganile' le'.

¹¹Ka nak nad', le' ben' bish'dawaa na' le' ben' zandawaa, shel' ni nia' chiyal' sho' ben' sen daa le circuncisión, aga wsak'zi' ben' Israelka' nad', shel'ka'. La' shel' ni chon' byen gongake'n, bi gakzbangakile' xtill' Crístona' daa nia' wite' lee yag cruza' ni checho kwenche gakcho ben' wen lao Chioza', shel'ka'. ¹²Ka nak ben'ka' chdzə chongake' byen sho' ben' sen daa le circuncisión, wwentelə shel' wchogtega kwingake' dololte gana' chg-wee senna'!

¹³Le' ben' bish'dawaa na' le' ben' zandawaa, Chioza' gox wñabe' le' kwenche yiyell yila'le lao dii mala'. Na' aga ni che biyell bila'le na' gonzle kon daa nazə beli chen chelena'. San li gaklen ljjwell-le na' li gaki ljjwell-le ganga. ¹⁴La' doxen daa na leyan' choncho shi choncho daa bllia Chioza' bia' daa na: “Chiyal' gakilo' bish' ljjwello'na' ka chaki kwino’.” ¹⁵Li wsak' bi til wsheshle kwenche ki wzoazi'yaa ljjwell-le na' wlliaiyi' ljjwell-le.

¹⁶Ki nia' le' naa: li gon ka cheeni Espíritu che Chioza', na' bich gonle daa na beli chen chelena'. ¹⁷La' daa chzelall' beli chenna' bi nllaguin Espíritu che Chioza', na' daa cheeni Espíritu che Chioza' bi nllaguin daa chzelall' beli chenna'. Na' ni to diiki bi nllagui ljjwellin, na' daan bi choe'gakan latj gonle daa chaklall'le. ¹⁸Per shi chzenagcho daa na Espíritu che Chioza', bich zoacho xni'a leya'.

¹⁹Nakbia'cha diikin chon ben'ka' chzenaggake' daa che' beli chen che'ka':

chdalengake' xiin xool ben' wa xiin xyo ben', chongake' daa nak dii zban, chibagakile' gongake' yog' daa na beli chen che'ka', ²⁰choe'la'ogake' yaj yag, chlangake' yel' willa'na', chakzbangakile' ben', chakdil-lengake' ben', chakxe'gakile' ben', chllaa chlogkake', chibagakile' to lezgake' gak wen chegake', chibagakile' kwekgake' dil' chix na' gonte cheləgake'. ²¹Nakgake' ben' xe', nakgake' wen xya, nakgake' ben' weezo, chajgake' ga chal' lni na' chzoll chnitgakile' na' chjeej chjtaogake' ka nla' ka nte, na' chongake' bichlə dii bi yejni'a. Na' nia' le' sto shii, ka dillaa ba be'len' le', ben'ka' chon ka' aga wak yillingake' gana' chnabia' Chioza'.

²²San ben'ka' chzenaggake' daa na Espíritu che Chioza' chakgakile' bish' ljjwellgake', chiba chizak'gakile', zoagake' mbalaz, napgake' yel' chxenlall', chle'shi'gakile' ben', chongake' wen che ben', chongake' daa chchebgake', ²³nakgake' ben' gaxjllall', na' chnabia' kwingake'. Na' ben'ka' chon diiki aga bi ley de dii inan bi chongake' wen. ²⁴Na' ben'ka' ba nak lall' na' Cristo Jesúsza' bich choe'gake' latj inabia' beli chenna' legake' daa nakgake' ka ben' ba wit lawi daa chzelall' beli chen che'ka'. ²⁵Shi ba yoo Espíritu che Chioza' loo yichjllall'do'chona', chiyal' we'cho latj inabi'e cho'.

²⁶Bi chiyal' gakcho ben' cha'sib, ni bi chiyal' wshagdilzə ljjwellcho, ni bi gakxe'i ljjwellcho.

6 Le' ben' bish'dawaa na' le' ben' zandawaa, shi inezile to beena' nakle txen chone' dii mala', ka le' chzenagle che Espíritu che Chioza' chiyal' gaklen-lene' kwenche yigooshlilallee, na' bi gonilene' zi'bia'. Na' li se wneyi che kwinkle kwenche ki lenle yixople lao dii mala'. ²Li gaklen ljjwell-le bittezə dii chak chele, la' kan' cheeni Crístona' gonle.

³Shi zoa ben' chon kwine' ben' choo ben' xen, chziye'z kwinen'. ⁴To tole chiyał' yiya yiyiljle nak nsa' chele. Na' shi ba chizoile chonle dii wenna', li yiba yizaki, na' bi inazle chonchle ka ben' yoblə. ⁵La' to tocho chiyał' sho' yichjcho goncho daa naki checho.

⁶Ben'ka' chzenag cho'a xtilł' Chioza' chiyał' we'gake' bi de chegake' beena' chli' chsedi legake'.

⁷Bi gakkzile wak siye'le Chioza'. Daa gaz kwekle lekzannan' yizi' yilaple.

⁸Beena' choe' cho'a xbayi beli chenna', kwiayee daa chzenague' cheyin. San beena' chon ka cheeni Espíritu che Chioza', yizi'e banez yel' mban zejli kani daa chzenague' che'. ⁹Bi chiyał' lljxa-kicho goncho dii wenna', la' wllin lla yizi'chon banez kon shi bi yidinjicho.

¹⁰Na' daan, kat' de xlatjin, chiyał' gonicho wen yog' ben', na' llialote ben'ka' nakcho toz nonlilall'cho Crístoná'.

¹¹Kwin' chisyoll' chzej' yishi.†† Li wwiakachi ka nak letr yel' cha'ki.

¹²Ben'ka' chonzə byen sho'le sen daa le circuncisión, chongake'n kwenchzə kono bi ina chegake', na' kono wsak'zi' legake'

daa choe'gake' xtilł' Crístoná', beena' wit lee yag cruza'. ¹³La' ni ben'ka' yoo senna' bi chizogakile' gongake' doxen ka na leya'. San cheenzgakile' sho'le senna' kwenchə wshalj wshongake' ba bengake' gan yoolen. ¹⁴Ka nak nad', biga cheenid' wshalj wshon' che kwín', san wshalj wshon' che daa ben Xancho Jesucrístoná'. La' daa wite' lee yag cruza' bich bi wneyi zia' shi bi ina ben' cha', na' ka'kzə ben' yell-lioka' bich ndegake' nad' kwent. ¹⁵Bibi zjanayin sho'cho senna' wa bi sho'chon, san daa ba bikob Chioza' yichjlall'do'chonán', lennan' zakii. ¹⁶Yiyesh'lall'shgayi Chioza' yog'lol ben'ka' chon ka ba wnia', na' gone' ka soagake' mbalaz, la' legaken' nakgake' dowalj ben' Israel, ben'ka' nak yell che'.

¹⁷Na' naa, bich cheenid' no kwekw nad' dii zed, la' kwerp cha'ni nsa'n yill che yog' diika' ba wxak'zi'a daa chon xshin Xancho Jesúsá'.

¹⁸Le' ben' bish'dawaa na' le' ben' zandawaa, Xancho Jesucrístoná' soalenshgue' yog'loltele na' gaklenshgue' le'. Kan' gakan.

††6:11 Kwin' chisyoll chzej' yishi: Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenchə gokbe'gakile' len' bseleen.

Kart daa bzej Páblona' na' bseleen lao ben'ka' nonlilall' Jesucrístona' yell Éfesona'

1 Nad' Pablo nak' postl che Jesu-crístona' kon ka chaklall' Chioza'. Chwap' le' chiox, le' lle'le yell Éfesona', na' nakle lall' na' Chioza' daa nakle Cristo Jesús'a' toz, beena' chonlilall'le.

² Chnabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

³ Chiyal' we'la'ocho beena' nak Chios che Xancho Jesucrístona', beena' nak Xe'. La' ba benleeye' cho' na' ba naki checho yog' dii wenna' de yabana', daa nakcho Crístona' toz. ⁴ Chioza' wleje' cho' gachcho Crístona' toz kana' zi' xe silte yell-lioni kwenche gakcho ben' nxi nyech na' bibi xtol'cho gat' lawe'na'. Daa le' chakile' cho', ⁵ wlo'e xnezin kana' zi' xe silte yell-lioni gakcho xiine' kon ka wyazlallee gone' checho, daan bselee Jesucrístona' ni checho. ⁶ Na' daan, toshiizi we'la'ocho Chioza' daa bene' to dii wen inleeb checho daa ba nakcho Xiine'na' toz, beena' le' chakile'. ⁷ Ba nakchone' toz daa wdxije' xtol'choka' kana' blalj xchene'na' ni checho kwenche Chioza' bizi'xene' saaxya chechoka' daa naklikze' ben' wen inleeb.

⁸ Na' dii xen wal chaklen Chioza' cho' daa none' cho' ye' sin'na' len ye' chajniina'. ⁹ Na' ba bliile' cho' daa goklallee gone' daa kono wnezi kani'yi, daa bliie' bia' gon Crístona'. ¹⁰ Na' bliie' bia' illin lla gak ka wyazlallee na'ch yiyone' toz yog'lol' dii bxe bsile', ka diika' lle' yabana' na' ka diika' lle' lo yell-lioni, kwenche Crístona' inabi'e lao yog'lolan.

¹¹ Chios, beena' chon yog'lol' daa chaklallee kon ka chgwee xnezin gak, wleje' cho' kana' zi' soatecho kwenche gaki checho dii wenna' wi'e ben'ka' nak Crístona' toz. ¹² Na' goklallee zigaate neto' naknto' ben' Israel wxenilall'nto' Crís-

tona' kwenche shajlawee daa nake' ben' choo ben' xen. ¹³ Na' lekzka' le', wyajle'le che Crístona' na' bénlene' txen ka benile dill' wen dill' kob che'na' daa nak dii licha daa choe' dill' yisle' cho' kwenche bi kwiayi'cho. Na' ka wyajle'le, Chioza' bli'e ba nakle lall' nee daa bzoe' Espíritu Sánto che'na' loo yichjlall'do'lena' kon ka bchebe' gone'. Na' daa bene' ka', wak inachcho wlo'e le' to sen daa chli'n nakle lall' nee. ¹⁴ Na' daa zoa Espíritu che'na' loo yichjlall'do'chona', nezicho gak lo na'cho yog' diika' nchebe' gone' cho' kat' illin lla yizi' yikee cho' nakcho lall' nee, kwenche koochone' balaan daa nake' ben' choo ben' xen.

¹⁵ Na' daan, ka wnezid' nonlilall'le Xancho Jesús'a' na' le' chakile' yog' ben'ka' nak lall' na' Chioza', ¹⁶ bi chsanlallaa wi'a Chioza' ye' choxken ni chele na' chnab' gaklene' le' kat' choe'lwillee.

¹⁷ Choe'lwil' Chios che Xancho Jesucrístona', beena' nak Xacho, beena' liizelozi chidolee sho'e balaan xen, chnabidee gon Espíritu che'na' le' ye' sin' che'na' na' wzajniile' le' kwenche gombia'chlene'.

¹⁸ Na' chnabidee wzoe' beeni' che'na' loo yichjlall'do'lena' kwenche inezile bin nonle lez daa ba gox wñabe' le', na' ka mbalaz inleeb nak daa wi'e ben'ka' ba nak lall' nee, ¹⁹ na' kwenche gakbe'ile ka nak ye' wak choo ye' xen che'na' daa bi chiyoll chido daa chaklenen cho' nonlilall'chone'. Lennan' ye' wak choo ye' wak xen ²⁰ daa bli'e kana' bisbane' Crístona' ladj ben' wetka' na' wlekwe'ne' shlaa de shli che'na' yabana', ²¹ gana' nzoe'ne' chnabia'che' aga ka yog'lol' anjlka' na' dii xiw'ka' nap ye' wak na' ye' wñabia'. Na' zeyi che' kochno zoa, ni kochno soa, ben' gachch ben' zak'chi ka le'. ²² Na' bzoe' xni'a Crístona' yog'lolte dii de, na' nzoe'ne' chnabi'e lao yog'lolcho cho' nakchone' toz, ka chon yichjchona' chnabi'an doxen kwerp chechona'. ²³ La' cho' nakchone'

toz, zaklebicho kwerp che'na'. Na' toshizi zoalene' cho' na' chnabi'e cho', la' len' chnabi'e yog'lo'lte dii de doxen yell-lioni na' yabana'.

2 Kana' bin' gonlilall'le Crístona', gokle ka ben' net lao Chioza' daa wzoale bxinj' bjenle. ²Na' wdale benle kon ka nazan chele, ka chon nottezə ben' yell-lion, ben' bi nombi'e Chioza'. Na' bzenagle cheyi daa chnabia' dii xiw'ka' ze lo llazə, daa chnabia' yichjlall'do' ben'ka' bi chzenag che Chioza'. ³Ka'kzan ben yog'lo'cho kana', bencho kon daa nazan checho, be'cho cho'a xbayi beli chen chechoni na' yog'lol' diika' wza'lall' loo yichjlall'do'choni. Na' daa bencho ka', chido'cho yel' zak'zi' che Chioza' kon ka chido'gak che ben'ka' bi chzenag che'. ⁴Per daa nak Chioza' ben' lall'do' xen inleeb na' le chakile' cho', ⁵bene' yel' mban checho zejli kani ka benlilall'cho Crístona', beena' biban ladj ben' wetka', la'kzi gokcho ka ben' net daa choncho saaxyaka'. Na' daa nak Chioza' ben' wen inleeban, bisle' cho' kwenche bi kwiayi'cho. ⁶Na' daa nakcho Cristo Jesúsza' toz, ka bisban Chioza'ne' ladj ben' wetka', lenkzchon bisbane' daa bene' cho' to yel' mban kob. Na' ba nakten llanabia'lenchone' yabana'. ⁷Chioza' bene' ka' kwenche llaka' zi' za' wli'lawin nake' ben' wen inleeb daa bene' to yel' goklen xen checho daa bselee Crístona' ni checho. ⁸La' yel' ben' wen che'nan' bisle' cho' kwenche bi kwiayi'cho daa ba nonlilall'cho Crístona'. Aga inacho daa nakcho ben' wenan bisle' cho', san nakan to goklen daa bene' checho ka'zə. ⁹Na' bi gak gakzcho cha'sib, la' aga daa choncho dii wenna' bisle' cho'. ¹⁰La' Chioza' bikobe' yel' mban chechona' ka bene' cho' lall' na' Crístona' kwenche soa-cho goncho dii wenna' ba wlo'e xnezin goncho.

¹¹Ka le' bi nakle ben' Israel, ben' Israelka' nsi'gake' le' Ben' bi yoo sen daa

le circuncisión, na' legake' nsi' kwingake' Ben' yoo sen daa le circuncisión. Li lljadini ka gokle kana'. ¹²La' kana' bin' gombia'le Crístona', gokle ka ben' zit' laonto'na', neto' wlej Chioza' kwenche naknto' yell che', na' Chioza' aga bchebe' gaklene' le' ka bchebe' gaklene' neto' ben' Israel. Na' wzoale yell-lioni bi bembia'le Chioza' ni bi benle lez gak wen chele. ¹³Kana', gokle ka ben' zit' laonto'na'. San naa, ba nakcho toz daa nonlilall'le Cristo Jesúsza', beena' blalj xchene'na' wite' ni checho. ¹⁴Crístona' bene' ka bizoalen ljjwellcho wen. Kana', bi ble'shii ljjwellcho, san naa, ba biyone' cho' toz daa bsol bnite' daa benan ka bwiyi ljjwellcho. ¹⁵Daa bzani kwin Crístona' wite' ni checho, bchogue' daa wna ley chento'na' chiya' gonnto'. Bene' ka' kwenche neto' ben' Israel na' le' bi nakle ben' wlall chento' biyakcho toz lawe'na'. Na' ba bizoe' cho' wen. ¹⁶Na' daa wite' ni checho lee yag cruza', bizoe' cho' wen kon Chioza', ka le' na' ka neto', na' biyakcho toz na' bich chakzbani ljjwellcho.

¹⁷Crístona' bidtixji'e dill' wen dill' koba' daa na yog'cho wak soalencho Chioza' wen, ka le' nakle ben' zit' na' ka neto' naknto' ben' yell che'. ¹⁸La' daa nonlilall'cho Crístona', ka le' na' ka neto', wak ibig'cho lao Xacho Chioza' daa ba bene' cho' Espíritu che'na'. ¹⁹Na' le' bi nakle ben' Israel bich nakle ka ben' zit', san ba lenle ben'ka' nak yell che Chioza', na' Chioza' ba none' le' ka ben' loo yoo. ²⁰Le' nakle ka to yoo, na' neto' postl na' ben'ka' chyixjee daa che' Chioza' legake' naknto' ka len yoonā, na' kwin Jesucrístonā nake' ben' llialaote ka yaja' daa mbejlawi, yaja' daa ba nchejcha yoonā. ²¹Na' Jesucrístonā chone' kwenche yog'cho cho' nakchone' txen gakcho toz na' gakcho ka to yoodo' gana' zoa Chioza'. ²²Na' lekzka' Jesucrístonā chone' kwenche yog'cho, ka neto' na' ka

le', gakcho ka to yoo gana' zoa Chioza' daa zoalen Espíritu che'na' cho'.

3 Nad' Pablo dia' lillyani daa chy-ixje'id' le' xtill' Crístoná', le' bi nakle ben' Israel. ²Ba nezkzile' dii wenna' ben Chioza' daa bene' lall' na' wi'a xtilleena' laolena'. ³Ba bzajniile' nad' daa kono wnezi, kon ka ba bzej' le' to chop cho'a. ⁴Na' kat' wlable yishi, gakbe'ile ba bzajniile' nad' daa kono wnezi che Crístoná'. ⁵Diaka' ba wde bi wnezgakile' dga ba bzajni Espíritu che'na' neto' postl che' len ben'ka' wdixjee daa goll Chioza' le-gake'. ⁶Na' dga kono wnezi nan: yog'cho cho' chajle'cho dill' wen dill' kob che Cristo Jesúsá', ka le' bi nakle ben' Israel na' ka neto' ben' Israel, nakcho toz na' txen ikaacho dii wenna' b'cheb Chioza' gone' checho.

⁷Yel' ben' wen che Chiozan' wleje' nad' na' bzoe' nad' gon xshine'na', na' chak-lentie' nad' kon yel' wak che'na' kwenche choe'len' ben' dill' wen dill' kob che Crístoná'. ⁸Nad' chakid' shlas aga no nak' lao yog' ben' nak lall' na' Chioza'. Per la'kzi aga bi zakaá, Chioza' wleje' nad' kwenche we'len' ben'ka' bi nak ben' Israel dill' wen dill' kob che Crístoná' daa le zak'chga na' bich bi de dii wsaklebichon. ⁹Chioza', beena' bxe bsil yog'loite dii de, kani'yi wlo'e xnezin gone' to dii gone', na' ni to kono golle' ka nak daa gone'. Na' naa ba bene'n lall' na' wzajniida'n ben' ¹⁰kwenche ni checho, cho' nakcho toz nonlilall'cho Crístoná', gakbe'i anjilka' lle' yabana' na' dii xiw'ka' doxen ka nak yel' sin' che Chioza'. ¹¹Na' daa bselee Xancho Cristo Jesúsá', ba bene' ka wlo'e xnezin gone' kana' zi' wxe wsiltie' yell-lioni. ¹²Na' daa nonlilall'cho Crístoná' na' nakchone' txen, de latj checho we'lwillcho Xacho Chioza' na' nezicho wzenague' checho. ¹³Na' nia' le', li gon goklen bi yidinjile ni che dga chllagloa' daa be'len' le' xtill' Crístoná', san li yibayi daa chzak'zi'a ni chele.

¹⁴Daan, ch'chek' xib' choe'lwill' Xa-cho Chioza', beena' nak Xa Xancho Jesucrístoná', ¹⁵beena' ben kwenche yog'cho cho' nakcho xiine' nakcho toz, ka ben' lle' yell-lioni ka ben' lle' yabana'. ¹⁶Na' daa nape' doxen yel' waka', chnabidee kwenche Espíritu che'na', beena' yoo loo yichjlall'do'léna', gone' ka gakchachle ¹⁷na' soachle gonlilall'le Crístoná' kwenche toshiizi soalene' le', na' yel' chakina' wde loyin lo yel' mban chelena' kwenche soatezi soale gakilene' na' gaki ljwell-le, ¹⁸na' gakbe'ile, le' na' yog' ben'ka' nak lall' na' Crístoná', ka chakchgaile' cho', na' biga yiyoll yido yel' chaki che'na'. ¹⁹Cheenid' gombia'le yel' chaki che'na' daa nak liizelozí dii xen inleeb, daa kono illin shajni kwásol, kwenche yiyoll yido gakle doxen ka cheeni Chioza'.

²⁰Chioza' chidolee sho'e balaan daa chak chone' dii xench aga ka daa chnabichone' wa daa chakicho gone' checho ni che yel' wak che'na' daa zoalen cho'. ²¹Cho' nonli'lall'cho Cristo Jesúsá' chiyal' koocho Chioza' balaan toshiizi na' zejli kani ni cheyi daa bselee Crístoná' ni checho. Kan' nakan.

4 Nad' dia' lillyani daa chyixji'a xtill' Xancho Jesucrístoná'. Na' chat'yoid' le' soale gonle wen kon ka chiyal' goncho cho' ba gox wñab Chioza'. ²Li gak ben' gaxjlall', li ile'shii ben', li gap yel' chxenlall' chele ganga na' li gaki ljwell-le. ³Espíritu Sántona' bene' ka yog'cho biyakcho toz, na' li gon byen soalen ljwell-le wen kwenche toshiizi gakcho toz. ⁴Yog'cho, cho' nonlilall'cho Crístoná', zaklebicho to kwerp daa nakcho toz; na' toz Espíritu yoo loo yichjlall'do'chona'; na' toz ka noncho lez gon Chioza' checho daa ba gox wñabe' cho'. ⁵Toz beena' nak Xancho, na' toze'n nonlilall'cho, na' toz ka zeji daa chchoa-cho nisa'. ⁶Tozə Chioza' zoa, beena' nak Xa yog'lolcho. Na' len' chnabi'e lao

yog'lolcho; na' chchine' yog'cho kwenche chak daa cheenile' gak, na' zoalene' yog'cho.

⁷Per to tocho non Crístona' dii gak goncho kon ka goklallee. ⁸Daan, cho'a xtill' Chioza' nan:

Ka biyep'e yabana', zinchi'e pres che'ka', na' bi'e dii wen che'na' ben' yell-lioki.

⁹Na' ka nak daa nan "biyep'e", z-e-jin zigaate betje' bide' yell-lioni. ¹⁰Na' beena' bid yell-lioni, lekzen' biyep'e yabana' gana' zoe' chnabi'e lao yog'lolte dii de. ¹¹Na' len' bzoe' ben' nak postl che', na' ben' chyixjee daa chi'ene', na' ben' chyixjee dill' wen dill' kob che'na', na' ben' chap chwie' ben'ka' ba nonlilall' le', na' ben' chli' chsedi cho'a xtilleena', ¹²kwenche ben'ka' nak lall' nee gak gongake' xshine'na', na' yiyoll yido gakcha yog' ben'ka' nak Crístona' txen, ¹³axt ki yog'cho gakcho toz gonlilall'cho Xiin Chioza' na' gombia'chchone'. Na' gakyen'cho ka chiyal' gakcho, na' yiyoll yido gakcho dowalj ben' wen doxen ka nak Crístona'. ¹⁴Na' bich gakzcho ka bi'do' na' shajle'tezcho bittezə daa chyiylall' ben', na' ni bi gak gon ben' wxiye'ka' gan siye'gake' cho' kwenche shajle'cho daa bi nak dii li. ¹⁵San shajlencho dill' li che Chioza' na' gapcho yel' chaki che'na', na' ka' zej gakchcho ben' wen ka nak Crístona', beena' chnabi'e cho', ka chon yichjchoni chnabi'a'n kwerp chechoni. ¹⁶Ka nak kwerp chechoni, tkwen tkwen wejan nox' ljwellin na' chaklen ljwellin bittezə llin gonan. Ka'kzan cho' nakcho Crístona' txen nakcho ka toz kwerp kwenche to tocho goncho daa none' cho', na' yog'cho zejch chakchacho na' zejch chakchi ljwellcho.

¹⁷Nia' le' dga kon yel' wñabia' che Xancho Crístona': bich soale gonle ka chon ben'ka' bi chonlilall'gake' Chioza', ben'ka' kon chyiylall'gake' daa bibi zakii, ¹⁸na' ncho' nñiti yichjlall'do'eka' na' bi ntegak-

ile', na' bi napgake' yel' mban daa non Chioza' cho', ni bi nombia'gake' daa nak che Chioza', daa nakgake' ben' lall'do' wal. ¹⁹Bichkzə bi yel' zto' nombia'gake', na' biga chjshyagakile' chongake' yog' diika' nak zban. ²⁰San le', nezile aga kan cheeni Crístona' goncho, ²¹shi dii likzə ba benile xtill' Jesús'a' na' ba nzedile soale gonle ka cheenile' kon ka nak dii li che'na'. ²²Na' chiyal' wsanle bich gonle dii malka' benle, na' kwej yichjle yel' mban gol chelena', la' daa wxiye' beli chenna' len', bxinj bñenan le'. ²³Chiyal' yikob yichjlall'do'leka' na' bich bi dii mal sa'lall'le. ²⁴Na' chiyal' yikob yel' mban chelena' kwenche yiyakle dowalj ben' li ben' shao' lega ben' nak xiin Chios.

²⁵Daan, bich chiyal' siye'le, san to tole chiyal' we'len ljwell-le dill' li, la' yog'cho ba nakcho toz, ka kwerp chechona' nakan toz, la'kzi zan diika' ndil nllagan.

²⁶Kat' illaale, bi wxinj wñenle ni bi koolall'zle, ²⁷kwenche bi we'le latj che dii xiwaa.

²⁸Na' beena' chzi' chban, bich gone' ka', san wchine' ni'a neena' gone' llin kwenche gape' dii wi'e ben'ka' bibi de cheyin.

²⁹Na' bi chiyal' we'le dill' zban, san chiyal' we'le dill' wen dill' shao' dii gonan ka soatip soashoshch ben'ka' chzenag bin nale na' gaklennan legake'. ³⁰Na' bi gonle ka soayesh' Espíritu Santo che Chioza', beena' ba nzoe' loo yichjlall'do'chona' kwenche chakbe'icho ba nakcho lall' na' Chioza' shlak illin lla yikee cho', cho' ba biya'o bizi'e.

³¹Chiyal' kwej yichjle yog'lol dii malki: bich koolall'le, bich illaa ilokle, bi koole ben' be' ban, bibi gon ñnale che ben' na' ni sto dii malka' bich gonle. ³²Li gak ben' wen ben' shao' na' ben' chiyesh'lalli bish' ljwellin. Chiyal' yizi'xen che ljwell-le, ka ben Chioza' bizi'xene' chele daa nonlilall'le Crístona'.

5 Daa ba nakle xiin Chios na' chak-ile' le', li wsed gonle wen ka chone'.² Chiyal' soale gakile ben', ka chaki Crístona' cho'. Daa chakile' cho', bzani kwine' wite' ni checho, na' bibayi Chioza' daa bene' ka', ka bibaile' shii xla' bayix'do'ka' bzeygake' lawe'na' kana'.

³ Bi chiyal' selall'le inelen ljwell-le wa gonle bichlā dīi zban, ni bi selall'le gat' kwe'ile dīi xen wal. Ni to diiki bi chiyal' gak ladjlena' daa ba nakle lall' na' Chioza'.⁴ Bi we'le dill' zban, ni dill' dīi bi zakii ni dill' dīi bi yejni'alallii, la' aga dill' ka diikin chiyal' we'le, san chiyal' we'le Chioza' yel' choxken.⁵ La' ba nezczile ni to ben' chnelen ljwellin, wa ben' chon bichlā dīi zban, wa ben' chzelall' gat' kwe'ile dīi xen, bi yilline' yabana' gana' chnabia' Crístona' len Chioza'. Beena' chzelallii gat' kwe'ile' dīi xen, toz ka chone' ka beena' choe'la'o daa nak yaj yag.⁶ Bi we'le latj no siye' le' we'lenze' le' dill' dīi bi zakii, la' ben'ka' chon chiya dīi malki, ile'gakile' yel' zak'zi' xen che Chioza' daa bi chzenaggake' che'.⁷ Daan, bi chiyal' lenle ben'ka' chon ka'.

⁸ Kanan', nchol' nnti yichjlall'do'lena', san naa daa ba nakle Xancho Jesucristona' txen, ba yoo beeni' che'na' loo yichjlall'do'lena', na' chiyal' soale gonle lega ben' ba yoo beeni' che'na'.⁹ La' beeni' che'na' chaklenan cho' gakcho ben' wen, na' ben' li ben' shao', na' ben' choe' dill' li.¹⁰ Li se wneyi kwenc̄he inezile bi daa chazlalli Xanchona' gonle.¹¹ Bi gonle txen diika' chon ben'ka' nchol' nnti yichjlall'do'eka', la' bibi zakii daa chongake', san li gon ka yiyakbe'gakile' bi chongake' wen.¹² La' axt chiyi chido'icho we'cho dill' cheyi diika' chongake' do ngash'zə.¹³ Per yog'lol' diika' choncho, chli'laogakin lo beeni' che Chioza' nak nakgakan.¹⁴ La' beeni' che'na' chili'n lao yog'te diika' choncho. Daakzan ne':

Li yiban, le' nakle ka ben' ches;

na' li yiyas ladj ben' wetka'.

Na' Crístona' kwee beeni' che'na' loo yichjlall'do'lena'.

¹⁵ Na' li se wneyi wsa' chele wen, na' bi gonle ka ben' bi nteyi, san li gaktō ka ben' sin'.¹⁶ Li gon ka dīi le gonle dīi wenna' kat' de xlatjin, la' llaki zoacho le ba ch'chga dīi mala'.¹⁷ Daan, bi chiyal' gonle ka ben' bi nteyi, san chiyal' shajniile daa cheeni Xancho Jesucristona' goncho.¹⁸ Bi soll nitile, la' beena' chzoll chniti chone' chiya dīi bi yejni'alallii. San li we' latj soa Espíritu Sántona' inabi'e loo yichjlall'do'lena'.¹⁹ Chiyal' we'len ljwell-le dill' che sálmoka', na' gol-le dīi koon Xanchona' balaan na' bichlā dīi ina Espíritu che Chioza' gol-le. Na' li gol' ine we'la'ole Xancho Crístona' do yichj do lall'le.²⁰ Na' daa nakcho Xancho Jesucristona' txen, toshiizi chiyal' we'le Xa-cho Chioza' yel' choxken daa chaklene' cho' lao yog'lol'te.

²¹ Chiyal' wzexj yichjle wzenag che ljwell-le, daa chaple Crístona' balaan.

²² Na' ka le' noolə zoa ben' chele, chiyal' wzexj yichjle wzenagle chegake', ka chonle chzenagle che Xancho Crístona'.²³ La' ben' byonan' chnabi'e nool che'na', ka chon Crístona' chnabi'e cho' nonlilall'chone', cho' ba bisle' kwenc̄he bi kwiayi'cho. Chnabi'e cho', cho' zaklebi-cho kwerp che'na', ka chon yichjchoni chnabi'an kwerp chechoni.²⁴ Na' ka cho' nonlilall'cho Crístona' na' chzexj yichj-cho lawe'na', ka'kzan chiyal' gon noolka' wzexj yichje'ka' lao yog'lol' daa ina ben' che'ka'.

²⁵ Na' ka le' ben' byo zoa nool chele, li gaki nool cheleka', ka chon Crístona' chakile' cho' nonlilall'chone' na' bzani kwine' wite' ni checho.²⁶ kwenc̄he biyakcho ben' nxi nyech lawe'na'. Bixis biyibe' yichjlall'do'chona' ka wyajle'cho xtilleena'.²⁷ kwenc̄he yibaile' cho' nakcho lall' nee kat' yillincho lawe'na' na' bibi nda' nchen yichjlall'do'chona',

san gakcho ben' nxi nyech, ben' bibi xtoliin de. ²⁸Na' ka'kzə le' ben' byo, le' zoa nool chele, chiyal' gapshiile nool cheleka' ka chapshii kwintle. Beena' chakile' nool che'na', kwinkzen' chakile'. ²⁹Biga zoa ben' chwiile' kwerp che'na', san chweej chwawe'n na' chapshi'en, ka chon Crístona' chapshi'e cho' nakchone' txen, ³⁰la' to tocho nakcho ka tkwen wej kwerp che'na'. ³¹“Daan, wlaa ben' byona' xaxneena' kat' ikaa che', na' soalene' xoolena' gaggake' toz.” ³²Dill'ki ba wnia' chzajniin le' to dii zak'chgayi daa bin' inezile', la' chzajniin cho' ka chon Crístona' daa chakile' cho' ba nakchone' toz. ³³Na' ka le' ben' byo, to tole chiyal' gakile' nool cheleka' ka chaki kwintle. Na' le' noolə, chiyal' gaple balaan ben' cheleka'.

6 Na' le' bi'do, li wzenag che xaxnaleka' lega bi' chzenag che Xancho Crístona', la' kan' chiyal' gonle. ²Dga bliia Chioza' bia' goncho gokan dii nech daa nsa' to dii bchebe' gone' checho shi goncho ka ne', na' nan: “Li gap balaan xaxnaleka', ³kwenche gak wen chele na' ibanle ssha lo yell-lioni.”

⁴Na' le' zoa xiinle, bi gonle ka gakshejlall'b', san li yisgolgakk' xochi na' li wzajni'gakib' kwenche wzenaggakk' che Xancho Crístona'.

⁵Na' le' ndoo lla yel-le chonle xshin ben', li gon daa na ben'ka' nak xanle yell-lioni. Li gagake' balaan, li illebgake' na' li gon xshine'ka' do yichj do lall'le. Li gaktezi che Crístona'kzan chzenagle.

⁶Aga kat' chwiazə xanlena' yilal' yizodile' kwenche ile'shi'gakile' le', san li gonan do yichj do lall'le lega ben' nak wen llin che Crístona', la' kan' cheeni Chioza' goncho. ⁷Chiyal' gonle llinna' do yichj do lall'le, na' li gaktezi xshin Crístona' chonle, aga che ben' yell-lion. ⁸La' nezkele nottezə nakcho, laa ben' ndoo lla yele' chone' xshin ben' wa ben' chon

xshinke', Xanchona' gone' ka yizi'cho banez che dii wenna' ba bencho.

⁹Na' le' nzi'le ben'ka' chon xshinlena', lezka' li gonigake' wen. Bi wwall wsheble legake', la' nezkele, ka le' na' ka legake', yabana' zoa to ben' nak Xanle, na' le' aga nakzi ben' chakile'.

¹⁰Na' lezka' nia' le' ben' bish'dawaa na' le' ben' zandawaa, li gak wal kon yel' wak choo yel' wak xen che Xanchona'.

¹¹Li wchin yog' diika' non Chioza' gakkennan cho' kwenche gakkhale na' so sakile gonle gan dii xiwaa kat' za'lenan yel' wxiye' cheyinna'. ¹²La' aga ben' de beli chenzan chdil'lencho, san chdil'lencho dii xiw'ka' bi chle'icho, diika' ze lo llazə na' napgakan yel' wak na' yel' wñabia', diika' chñabia' lo yell-lioni gani dechga dii mala'. ¹³Na' daan, li goni chele yog' daa non Chioza' gakkennan le' kwenche so sakile dii mala' lla'na' wtil'len, na' ka yiyoll wtil'len ni zechechkzle. ¹⁴Li soachech na' li we' daa nak dill' li, la' lennan' gakkennan le' gonan ka bachleena' daa chchel' leelena'. Na' li soa li gon daa nak dii licha, la' lennan' gakkennan le' gonan ka daa chbin soldadka' chkweejan lcho'eka'. ¹⁵Na' li se kwas we'lenle ben' xtill' Crístona' daa wzoan legake' mbalaz, ka chon to soldad ze' kwase' nlej xele'na' kwenche shaje' lo wdila'. ¹⁶Na' daa lliallote lawi diiki, li soachech gonlilall'le Chioza' kwenche gakkennan le' na' wso lñitan yog'lo' de wxiye' che dii xiwaa, na' gonan llin ka daa nox' soldada' chkweejan le' kwenche bi chchele' daa chzal' beena' chdil'lene'. ¹⁷Na' li wzoa yichjle daa bisla Chioza' le' lao dii mala', na' gonan llin ka lap' ya che soldadka' daa chkweej yichje'ka'. Na' Cho'a Xtill' Chioza' gakan ka to yesya daa chon Espiritu Sántona' le' kwenche til'lenle dii mala'. ¹⁸Toshiizi li we'llwill Chioza', na' inabilene' kon ka chzajni Espiritu che'na' le'. Na' toshiizi li se wneyi, na' bi lljxakile inabi-

lene' che yog' ben'ka' ba nak lall' nee.
¹⁹Na' lekzka' li inabi Chioza' kwenche
 wxoe' cho'a lollaani dill'ka' we'len' ben',
 na' bi illeb' wzajniid' ben' ka nak dill' wen
 dill' kob che Crístoná' daa kono wyajnií
 kani'yi. ²⁰La' Chioza' nselee nad' lo laze'
 kwenche we'len' ben' cho'a xtilleena',
 na' ni cheyinnan' dia' lillyani. Li inabi
 Chioza' gaklene' nad' kwenche bi gall
 illeb' wi'a cho'a xtilleena'.

²¹Tíquiconi, ben' bish'choni le chakid',
 nake' to ben' toshiizi chaklene' lo xshin

Chioza', na' yidzajniile' le' yog'lol' ka
 chak cha' na' daa chon'. ²²Chseláane'
 yide' laolena' kwenche inezile ka chak
 chento', na' kwenche wtipe' lall'le.

²³Le' ben' bish' na' le' ben' zan',
 chñabid' Xácho Chioza' na' Xancho Je-
 sucristóna' gongake' ka soale mbalaz,
 na' gonlilall'chle legake', na' gaki ljwell-
 le. ²⁴Chioza' gaklenshgue' yog'lol'-le, le'
 zoale chakchgaile' Xancho Jesucristóna'.
 Kan' gakan.

**Kart daa bzej Páblona' na'
bseleen lao ben'ka' nonlilall'
Jesucristona' yell Filípoza'**

1 Nad' Pablo na'ch Timotewi naknto' wen llin che Jesucristona', chwapnto' chiox yog'le, le' lle'le yell Filípoza', le' nakle lall' na' Chioza' daa nonlilall'le Cristo Jesúsza'. Na' lekzka' chwapnto' chiox ben'ka' chgoo xnezi xshin Chioza' ladjlana' na' ben'ka' chaklen legake'. ²Chios, beena' nak Xacho len Xancho Jesucristona' gaklenshgagake' le' na' wzoagake' le' mbalaz.

³Ka ka chjadinid' le' cho'a Chios cha'na' yel' choxken. ⁴Na' toshiizi choe'lwiller kon yel' xaba kat' chñabidee gaklene' yog'le, ⁵daa lenle chonle nad' txen, dezd ka wyajle'le axt naa, kwenche ides dill' wen dill' kob che Jesucristona'. ⁶Nezyen'id' Chios, beena' wzolo chone' to dii wen loo yichjlall'do'lena', gone' kwenche yiyoll yido yiyakle ka chazlallee kat' illin lla yila' Jesucristona'. ⁷Na' chiyal'kz yibaid' ka chjadinid' le', la' toshiizi yoole loo yichjlall'dawaani. Na' la'kzi dia' lillyani wa choe'len' ben' dill' wen dill' kob che Jesucristona' kwenche gakbe'gakile' nakan dill' li na' shajle'gake' cheyin, nezid' toshiizi chaklenle nad' lo llinna' daa ben Chioza' lall' na' gon' yel' ben' wen che'na'. ⁸Chioza' nez nle'ile' ka chakid' yog'le kon ka chaki Cristo Jesúsza' le'. ⁹Kat' choe'lwill' Chioza', chñabidee zizikli yisgolche' yel' chaki chelena', na' gonche' le' yel' sin'na' len yel' chajniina' ¹⁰kwenche gakbe'ile daa nakch wen na' ka' soale do yichj do lall'le na' bibi dol' gaple kat' yiyed Crístona'. ¹¹Na' Jesucristona' gaklene' le' gonle lega ben' li ben' shao' kwenche sho' Chioza' balaan na' we'la'o ben' le'.

¹²Le' ben' bish' na' le' ben' zan', cheenid' inezile diiki ba gok cha' goklen-

lan kwenche bdesch dill' wen dill' kob che Jesucristona', na' bi bizogakin wsej wllongakan. ¹³La' naa yog'lo' soldadka' lle' ni na' nochle ben' yoblə lle' do ni nezgakile' dia' lillyani daa chonlilallaa Crístona'. ¹⁴Na' daa dia' lillyani, zan ben' bish'choka' ba wloolall'gake' chongake' lall'chog choe'gake' xtill' Chioza' na' bi chllebgake'.

¹⁵Dii li balgake' choe'gake' xtill' Crístona' daa chakxe'zgakile' nad' na' daa cheenzgakile' gonchgake' ka nad'. Per zoakz ben' chone'n do yichj do lallee. ¹⁶Ben'kin chongake'n daa chakgakile' nad' na' daa nezgakile' Chioza' ba nzoe' nad' kwenche wi'a dill' wen dill' kob che Jesucristona'. ¹⁷Na' ben'ka' zi shkwen choe'gake' xtill' Crístona' daa cheenzgakile' gonchgake' ka nad', na' aga chongake'n do lall'gake'. Na' chakzgakile' daa chongake' ka' gakyeshid' daa nej' lillyani. ¹⁸Per aga bi chon daa cha' shi do lall'gaken' chongake'n wa aga do lall'gaken'; kon daa choe'lgake' xtill' Crístona', daalan chibaid'.

Na' zizikli yibachid' ¹⁹daa nezid' wichej' wen lao yog' diiki chak cha' daa chñable cha' lao Chioza' na' daa chaklen Espíritu che Jesucristona' nad'. ²⁰Na' toshiizi non' lez Chioza' gaklene' nad' kwenche bi sia' yel' zto', san naa na' toshiizi gon' kwenche sho' Crístona' balaan, laa ibanch' wa laa guet'. ²¹La' shi ibanch', gonchzk' daa cheeni Crístona'; na' shi guet', de to banez cha'. ²²Shi dech yel' mban cha', gonchzk' xshin Crístona' kwenche ben' zanch gombia'gake'ne'. Na' bi nezid' non nakch wen. ²³Chonan lallj inia' non nakch wen: to cheenid' guet' kwenche ljazoalen' Crístona', na' naktechlan wen. ²⁴Per chonchan byen ibanch' ni chele. ²⁵Chakid' nakchan wen ibanch' kwenche gaklench' le' gakchachle gonlilall'le Crístona' na' yiba yizakchile daa nonlilall'lene'. ²⁶Na'

kat' ile'ile nad' ladjlena' sto shii, le yiba yizakile we'la'ole Cristo Jesúsza'.

²⁷ Naktez gak, li se wneyi wsa'to chele wen lega ben' chajle' che dill' wen dill' kob che Crístona' kwenche laa yidwia' le' wa laa yenzid' xtill'le, inezid' ni zoachechle nxenilall'le Crístona' na' nakle toz chonle ga zeelo chakle kwenche shajle' ben' dill' wen dill' kob che'na', ²⁸ na' bi gall illebzle ben'ka' chakzi' chakzbani le'. Na' daa gonle ka', wli'n kwiayi'chokzgaken', na' le' yilale, la' Chioza' bi wi'e latj kwiayi'le. ²⁹ La' Chioza' goklene' le' kwenche benlilall'le Crístona', na' lekzka' chaklene' le' lo ye'l' zak'zi'ka' chen chle'ile daa nonlilall'lene'. ³⁰ Ba chsak'zi'gake' le' ka ble'ile bsak'zi'gake' nad' daa chyixji'a xtill' Crístona', na' nezczile ka'kzə ni chak cha'.

2 Daa nakle Crístona' toz, ye'l' goklen che'na' chtipan lall'le, na' ye'l' chaki che'na' chonan ka soale mbalaz, na' Espíritu che'na' zoalenkze' le', na' lall'do'lena' nakan lall'do' yesh'. ² Daan, li gak toz, li gaki ljwell-le ganga, na' toz ka dii sele wneyi, na' toz ka dii selall'le, kwenche yiba yizakchid' ni chele. ³ Bibi sele wneyi che tozle wa kwenche gon kwinle ben' choo ben' xen, san li gonan kon ye'l' gaxjlall', li goni ben' ka ben' zak'chi ka le'. ⁴ Ni tole bi chiyal' chiljzle dii nak to banez chezle, san lekzka' li gon ka si' ben' yoblə banez.

⁵ Li se wneyi gonle ka ben Crístona'.

⁶ La'kzi nake' Chios, bzanile' ye'l' wñabia' che'na' na' balaan che'na' daa naplene' Xe' Chioza',

⁷ na' bzo'e' ka'lə daa naki che', na' ben kwine' ka to ben' bi zakii, na' golje' goke' to ben' de beli chen.

⁸ Na' ka ba nake' ben' yell-lio, bləxj yichje'

bene' kon ka wna Chioza' axt bi'e latj betgake'ne' lee yag cruza'.

⁹ Daan, Chioza' wlo'ene' to balaan xen inleeb daa liizelozi zak'chi,

na' bzo'e'ne' nake' xan yog'lojte dii de, ¹⁰ kwenche yog' ben' lle' yabana', na' lo yell-lioni, na' xan yell-lioni kat' yengakile' le Jesúsza' wchek' xibe'ka' lawe'na'.

¹¹ Na' yog'loj ben' we'gake' dill' nan Jesu-crístona' nake' Xancho na' daa gongake' ka' sho' Xacho Chioza' balaan.

¹² Daan, le' ben' bish'dawaa na' le' ben' zandawaa, kon ka ba benkzle toshiizi bzoale dill' kana' wzoalen' le', li we'l-lall'ch gakchle ben' wizoa dill' naa bich zoa' ladjlena'. Li gall illeeb Chioza', beena' bisla le', na' li gon ka dii le gonle daa cheenile'. ¹³ La' Chioza'kzan chone' kwenche chalj loo yichjlall'do'lena' gonle dii wenna' daa chaklallee gonle, na' lekzka' chaklene' le' kwenche chonlen.

¹⁴ Na' yog'loj daa gonle, li gonan do yichj do lall'le, na' bi gakkleshile ni bi gakkuedzle, ¹⁵ kwenche ben' malka' lle' yell-lioni, ben'ka' nxinj yichjlall'do'eka', gakbe'gakile' bibi dii mal chonle, na' kono bi gak ina chele. Na' gaktole ben' bibi dol' cheyin de, lega ben' nak dowalj xiin Chios. Na' gakle to beeni' lawe'ka', ka beljdo'ka' chey cheeni', ¹⁶ daa chzoachechle chzenagle che cho'a xtill' Chioza' daa nsa' ye'l' mban. Na' shi ka' gonle, kat'ka' yila' Crístona' de dii gonan ka yibaid' daa bi bendadz' xshin Chioza' ladjlena'. ¹⁷ Daa chzani kwinle sak'zi'le kwenche gonle daa cheeni Chioza' naa nonlilall'le Crístona', zaklebin daa chzani ben' choe' Chioza' kwenche choe'laweene'. Na' daa chzanid' kwin' witgake' nad' daa chon' xshin Crístona', zaklebin ka daa chlalj-gake' lao daa chzani ben' choe' Chioza'. Na' la'kzi axt witgake' nad', chiba chizakid' na' cheenid' yiba yizaklenile nad'. ¹⁸ Li yiba yizakleni nad', na' li soa mbalaz ka zoa'.

¹⁹ Non' lez Xancho Jesúsza' wi'e latj yobzə wselaa Timotewa' gana' zoale,

kwenche yibaid' ka yiyede' ine' chak wen chele. ²⁰Kochno zoa sto cha' ka le', la' tochga len' zelene' nad' wneyi do yichj do lallee gak wen chele. ²¹La' ben'ki sto zoalen nad', che kwinzgake' zegake' wneyi na' bi zegake' wneyi daa cheeni Jesucristona'. ²²Per ba nezczkile ka wen nsa' che Timotewa' na' ka ba goklene' nad' ba be'nto' dill' wen dill' kob che Críston'. Ba goklene' nad' ka ben' chaklen xayin. ²³Daan, kat' ba nezid' nakan gak cha', lii wsel'tia'ne' gana' zoale. ²⁴Na' nxenlallaa Xanchona' lekzka' yob yidwia' le' kwinkz'.

²⁵Na' naa chakid' chonan byen yiselaa ben' bish'cho Epafrodítóni, beeni nonlene' nad' txen chdil'-lennto' dii mala' daa chonnto' xshin Chioza', beeni bsel'le kwenche gaklene' nad' lao dii chyallj chchinid'. ²⁶Cheenchaile' ile'ile' le', na' le chakyeshile' daa wnezile we'ile'. ²⁷Na' dii licha zi lat'zə ki wite', per Chioza' biyesh'lallile'ne' biyakile'. Na' aga tozen' biyesh'lallile', san lenan' kwenche bi gakyesh'chid'. ²⁸Daan chiselaane' laolena' dopiyenzə kwenche yibaile' daa yile'ilene' sto shii, na' nad' bich gakyesh'tekid' chele. ²⁹Li yilebgache' kon ye! chiba chizaki daa nake' cho' txen nonlilall'cho Xanchona'. Na' li gap balaan yog'lo! ben'ka' chon ka chone'. ³⁰La' zi lat'zə ki wite' daa chone' xshin Críston'. Bzoe' dii nxoll ye! mban che'na' goktgui bidyaklene' nad' bidyene' diika' bi gok gonle.

3 Na' naa, le' ben' bish'dawaa na' le' ben' zandawaa, li yiba yizaki daa ba nonlilall'le Xanchona'. Nad' bi chak zedid' wzej' le' dii yoblə diika' ba wni-akz' le' daa nezid' waklenen le'. ²Li wsak' bi wzenagle che ben' malka', ben'ka' nazə chonan byen wchogtekwə kwerp chechona' sho'cho sen daa le circuncisión. ³La' cho'ye'lan nakcho dowalj ben'ka' yoo sen, cho' choe'la'ocho Chioza' daa yoo Espíritu che'na' loo

yichjlall'do'chona' na' chiba chizakicho daa nakcho Cristo Jesús'a' txen. Na' bi noncho lez daa goni kwerp chechoni gaklenen gakcho ben' wen lao Chioza'. ⁴Nia' ka' la'kzi de dii zan dii gak wxenilallaa che kwín' daa gonan ka ile'shii Chioza' nad'. Shi no chakzi de dii gak wxenilallee che kwine' daa gonan ka ile'shii Chioza'ne', zalechlin nad'? ⁵Ka gokid' xon' lla, wloogake' kwerp cha'ni sen daa le circuncisión. Nak' ben' Israel, na' golj' lo dia che dii Benjamínna', na' nak' dowalj ben' hebreo ka xaxna'ka', na' bsedyenaa ley chento'na' na' bzenag' cheyin, na' benlen' fariseoka' txen. ⁶Daa le wzechga' wneyi ley che Chioza', axt gokid' chon' ka cheeni Chioza' daa bchi' bsakaa ben'ka' chonlilall'gake' Jesús'a'. Na' ben' kon ka na leya', na' aga no gok ina bi ben' ka nan. ⁷Kana'n gokid' le zak'chgayí yog' diika', per naa, daa ba nonlilallaa Críston', chakbe'id' bibi zak'gakan. ⁸Na' dii li nezid' bibi de dii zak'chi ka daa ba nombia' Cristo Jesús'a', beena' nak Xan'. Na' daa le chakidee, bich nxenilallaa yog' diika' gokid' le zak'chga, san ba nongaka'n ka beb kwenche gombia'ch' Críston' ⁹na' gakee txen. Aga daa chon' daa na leyan' nak' ben' li ben' shao' lao Chioza', san daa nonlilallaa Crístonan', la' ben'ka' chonlilall'gake' Críston', Chioza' chiyone' le-gake' ben' li ben' shao'. ¹⁰Cheenid' gombia' Críston' na' ye! wak che'na' ka daa bli'e kana' bibane' ladj ben' wetka', na' cheenid' izanid' kwín' gak cha' ka gok che' daa wdíe' ye! zak'zi'ka' na' wite'. ¹¹Na' ka', non' lez idola' yisban Chioza' nad' ladj ben' wetka'.

¹²Bi nia' ba nombi'ane' kwaslo! wa ba chon' kwaslo! ka chazlallee. Per ni chon' ka dii le kwenche gak gona'n, la' ni che lennan' gox wñab Cristo Jesús'a' nad'. ¹³Le' ben' bish' na' le' ben' zan', bi nia' ba chon' kwaslo! ka chazlallee. Per de to dii chon', bich zia' wneyi che diika'

ba wde, san chon' to dii byen kwenche idolid' dii wenna' zi' za'. ¹⁴Ni chon' ka dii le kwenche yillin' gana' ikaa daa gon Chioza' nad'. La' ni cheyinnan' gox wñabe' nad' kwenche nak' Crístona' txen.

¹⁵Na' kan' chiyal' secho wñeyi yog'lolcho, cho' ba nakchacho chonlilall'chone'. Na' shi bi zelen wñeyi Chioza'kzæ wzajniile'n le'. ¹⁶Na' daa lliallote chiyal' soatezi soacho goncho kon ka ba bzajni Chioza' cho'.

¹⁷Le' ben' bish' na' le' ben' zan', li wsa'to chele ka nsa' cha', na' ka nsa' che ben'ka' chon kon ka ba bliinto' le' gonle. ¹⁸Zan shii ba wnia' le', na' naa axt chakyeshid' nia' le' dga sto shii, zan ben' chongake' ka bibi zakii daa wit Crístona' lee yag cruza' daa bi nsa' chegake' wen. ¹⁹Wllin lla kwiayi' ben'ki daa choe'laogake' toz daa chñab beli chen che'ka', na' chep cha'lall'lgake' cheyi daa chongake' lwaayi dii nan yido'gakile'. Kon lillinzi daa de yell-lioni zegake' wñeyi. ²⁰San cho', yabanan' nak lallcho. Na' nan' ziza' Xancho Jesucrístona', beena' chbezcho yisle' cho' kwenche bi kwiayi'cho. ²¹Len' yishee kwerp chechoki, diiki gooll' iteb, kwenche yiyakan ka kwerp che'na' daa le zakii. Na' gone'n kon ye'l' wak che'na' daa chñabia'lene' lao yog'lolte dii de.

4 Le' ben' bish'dawaa na' le' ben' zandawaa, le' chakid' le', na' chze-lall'chgaid' ile'id' le', na' chiba chizakid' daa nonlilall'le Crístona', na' ni chele le' de to dii yizi'a banez. Li soachech gonlilall'le Xanchona'.

²Chat'yoid' Evódiana' len Síntiquena' yizoagake' wen daa nakgake' Xanchona' txen. ³Na' li' nako' nad' txen do yichj do lalloo choncho xshin Chioza', chat'yoid' li', gaklengacho' ben' zanchoki. La' le ba bllaglogaken' goklengake' nad' be'nto' dill' wen dill' kob che Jesucrístona', len Cleméntena' na' ben'ka' sto benlench nad' xshin Chioza'. Ba da' lie'ka' lee libr che

Chioza' gana' da' le ben'ka' napgake' ye'l' mban zejli kanj.

⁴Li yiba yizaki toshiizi daa nakle Xancho Crístona' txen. Na' sto shii nia' le': jli yiba yizaki! ⁵Li wsa' chele xochi kwenche yog' ben' gakbe'gakile' nakle ben' wen. Ba zoa gao yiyed Xanchona'.

⁶Bi kwekzæ yichjle bittez dii chak chele, san li we'llwill Chioza' na' li gonan lall' nee, na' li wi'e ye'l' choxken. ⁷Na' gone' ka soale mbalaz axt kono shajniikzi biçe zoale ka'. Na' ye'l' zoa mbalaza' wsol wñitan dii zeda' de loo yichjlall'do'leka' daa nakle Cristo Jesús'a txen.

⁸Na' le' ben' bish' na' le' ben' zan', daa zeelote naa, li se wñeyi cheyi daa nak dii li, che yog'lolte dii chidol' gapcho bal-aan, che yog'lol' daa nak dii li dii shao', che yog'lol' dii bibi dii mal nsa'n, che yog' dii wenka' chon ka yibaicho, na' che yog'lol' dii zeyi cheyin nakan wen. Li se wñeyi che yog'lol' diiki nak wen, diiki chidol' we'cho xtiliin.

⁹Li gon daa ba bli' bsedid' le' na' daa benile wnia', na' daa ble'ile chon'. Lenan' li gon, na' Chios, beena' chon ka soa-cho mbalaz, soalene' le'.

¹⁰Chiba chizakchgaid' lao Xancho Jesucrístona' daa bachga chizele wñeyi cha' dii yoblæ. Bi nia' ba gol-lall'le nad', san bi got' xlatjinnan' gaklentole nad'. ¹¹Aga daa chyallj chchinida'n nia' ka', la' ba nzedid' gon' banez ka'k dii de cha'. ¹²Ba nezid' bi daa ne' soe' lo ye'l' yesh', na' lekzka' ba nezid' bi daa ne' soe' lo ye'l' wnia'. Ba nzedid' gon' banez bittez dii chak cha', shi nelj nlla'id' wa shi chbil' chdon', shi dechga daa chyallj chchinid' wa shi shlas bibi dekzæ. ¹³Chzoid' yog'lolte dii chtil' daa chaklen Crístona' nad'. ¹⁴Per le wen benle daa goklenle nad' lo dii lalljki chtil'.

¹⁵Na' nezczile kana' bizaa Macedóniana' na' wzoloa' cho'a dill' wen dill' kob che Crístona', totgui le' lle'le Filipoza'

benle daa byalljid' kwenche ji'a cho'a xtil' Chioza'. La' ni to ben'ka' ba nonlilall' Crístoná' yellka' sto bi goklengake' nad'.¹⁶ Na' kana' wzoa' yell Tesalónicana', zan shii bse'le dii byalljid'.¹⁷ Aga inácho chylj' bi gonle nad', san cheenlid' gat'ch ye' shao' chele yabana'.¹⁸ Epafrodí-toni ba bene' nad' daa bse'lenlene', na' naa ba nap' yog'te daa chyalljid' axt ba chichoonlan. Na' chibayi Chioza' daa bse'len, ka chibaile' diika' chzani ben' choe'gake'ne', diika' chla'ile' zix sia kat' chzeygake'n lawe'na'.¹⁹ Chios cha'na', beena' nap' yog'lo'te dii wen dii

shao'ka', gone' le' yog'lo' daa chyalljile daa nakle Cristo Jesúsá' txen.²⁰ Toshi-izi chiyal' koocho Xácho Chioza' balaan. Kan' nakan.

²¹ Li wwapsha chiox yog'lo' ben'ka' nak lall' na' Chioza' daa nongake' Cristo Jesúsá' txen. Na' lekzka' ben' bish'choki zoalen nad' ni, chwagake' le' chiox.²² Na' yog'lo'te ben'ka' nak lall' na' Chioza' ni chwagake' le' chiox, na' ben'ka' chon xshin ben' wñabia' Césara', leyen'gake' chwagake' le' chiox.

²³ Xácho Jesucrístoná' soalenshgue' le' na' gaklene' yog'lo'tele. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Colósaza'

1 Nad' Pablo nak' postl che Jesucrístona' kon ka goklall' Chioza'. Na' len ben' bish'cho Timotewi ²chwapnto' le' chiox, ka le nakle lall' na' Chioza', le' zoale yell Colósaza', na' nakle bish' ljwellnto' daa nonlilall'le Crístona' do yichj do lall'le. Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

³Toshiizi ka chnabnto' chele, choe'nto' Chioza' yel' choxken, beena' nak Xa Xancho Jesucrístona'. ⁴La' ba beninto' dill' ba nonlilall'le Cristo Jesús'a' na' ba chakile yog'loj ben'ka' nak lall' na' Chioza'. ⁵Ba nsa' chele ka' daa nonle lez ljazoale yabana' gana' zoa Chioza'. Na' wzolo benlen lez ka wzolo bzenagle dill' wen dill' kob che Crístona' daa nak dill' li che Chioza'. ⁶Na' dill' wen dill' kobi daa ba bzenagle ba bliljan doxen yell-lioni na' ba chon xshinin loo yichjlall'do ben', kon ka benan loo yichjlall'do'lena' ka benilen na' wyajniile nan dii li Chioza' chakile' cho'. ⁷Dgan blii Epáfraz'a' le', beena' chonlene' neto' xshin Crístona' na' le chakinto'ne', na' zoatezi zoe' chone' xshin Crístona' ladjlena'. ⁸Na' Epáfraz'a' wne' neto' ka ba chaki ljwell-le daa zoa Espíritu che Chioza' loo yichjlall'doleka'.

⁹Na' daan, ka wnezinto' ka ba chonle, toshiizi chnabinto' Chioza' gaklenche' le'. Na' chnabinto'ne' gone' le' do ka nak yel' sin' che'na' na' yel' chajni che'na' kwenche shajniile kwasolj daa chaklallee gonle, ¹⁰na' gak wsa' chele lega ben' nonlilall' Xanchona', na' toshizi gonle daa chazlallee, na' gak gonle yog'lojte daa nak wen, na' zejch gombia'chle Chioza', ¹¹na' gakchachle kon yel' wak che'na' daa zeelo nak yel' wak choo yel' wak xen kwenche ka' gaple

yel' chxenlall' na' so sakile lao bittezə dii chak chele, na' yibaile ¹²we'tezi we'le Xacho Chioza' yel' choxken. La' len' bene' kwenche ljazoalene yog' ben'ka' nak lall' nee yabana' gana' chnabi'e, gana' de beeni' che'na'. ¹³Chioza' dibej'e' cho' lo yel choja' gana' chnabia' dii xiwaa na' ba bizoe' cho' lo na' Xiine'na', beena' le chakile', kwenche inabi'e cho'. ¹⁴La' len' bisle' cho' lao yel' zak'zi'na' chidol'cho daa blalj xchene'na' wite' ni checho kwenche biyakxen saaxya chechoka'.

¹⁵Crístona' bli'e ka nak Xe Chioza', beena' kono chle'i, na' Crístona' ba chnabiak'ze' kana' zi' xe silte yog'loj dii de. ¹⁶La' len' bxe bsile' yog'lojte dii de: diika' de yabana' na' diika' de yell-lioni. Bene' dii chle'icho na' bentie' dii bi chle'icho, ka no anjlka' na' len anjlka' biyak dii xiw' diika' chnabia' lo yell-lioni. Bene' yog'lojte dii de, na' bene'n kwenche sho'e balaan. ¹⁷Ba zoakz Crístona' kana' zi' xe sil yog'lojte dii de, na' le' chone' ka chongakan daa bllie' bia' gongakan. ¹⁸Na' len' chnabi'e cho' nakcho lall' nee, daa nakchone' txen. Len' bxi'e' yel' mban daa nak zejli kanj daa nake' ben' nech ben' biban toshiizi ladj ben' wet'ka'. Daan, nake' liizelozi ben' choo ben' xen na' chnabi'e lao yog'lojte dii de. ¹⁹La' Chioza' wyazlallee gap Crístona' doxen yel' wñabia', yel' wak na' yog' ka diika' nape', ²⁰na' bene' ka yog'lojte dii bxe bsile' yabana' len yell-lioni bizoalengakan le' wen daa wit Crístona', blalj xchene'na' lee yag cruza'.

²¹Na' le', kanan' nlaala'ole Chioza' ni che dii malka' chonle na' gokzi' gokzbanilene'. ²²San naa, ba bene' kwenche bizoalene' wen daa bselee Crístona' wite' lee yag cruza' kwenche gakle ben' nxi nyech, ben' bibi nda' nchen na' ben' bibi xtoljin de lawe'na'. ²³Per chonan byen toshiizi soachechle gonlilall'le Crístona', beena' ba wyajle'le che', na' bi gakchoplall'le cheyi daa benle lez gaki

chele ka bzenagle dill' wen dill' kob che'na'. Na' dga ba benile, ba choe'gake'n dill' doxen yell-lioni, na' nad' Pablo, chaklen' cho'an dill'.

²⁴ Na' naa chiba chizakid' daa chllagloa' yog' yel' zak'zi'ki ni chele. La' daa chak cha' ki, chen chle'id' ka yel' zak'zi'ka' ben ble'i Crístona' ni checho, cho' ba nonlilall'chone' na' zaklebicho ka kwerp che'na'. ²⁵ Chioza' bzoe' nad' gak lo na' gaken' le' ba chonlilall'lene' na' wliid' le' kwasloj cho'a xtilleena'. ²⁶ Kani'teyi kono wnezi daa wlo'e xnezin gone', per naa ba bliile'n ben'ka' nak lall' nee. ²⁷ Chioza' chaklallee inezi ben'ka' nak lall' nee dga kono wnezi kana', na' nakan to dii zakii nllleb nan Crístona' zoalene' le' bi nakle ben' Israel, le' chonlilall'lene', na' nonle lez lljazoalene Chioza' gana' de balaan xen che'na'.

²⁸ Neto' chyixje'into' ben' xtil' Crístona', na' chat'yointo' yog' ben' wzenag-gake'n. Na' chchinnto' do ka nak yel' sin'na' daa ba ngwee neto' ka chli' chsedinto' legake' kwenche yog' ben'ka' gak Crístona' txen yiyakgake' kwasloj ka cheeni Chioza'. ²⁹ Daan, choe'l-lallaa chyixji'a cho'a xtilleena' kon ga zeelo chizoid', na' Crístona' chaklene' nad' kon yel' wak che'na'.

2 Cheenid' inezile' dii xen dii chen chle'id' ni chele na' ni che ben' bish'choka' lle' Laodiceana', na' ni che yog'loj ben' bish'choka' bin' gombia' nad', ² kwenche yog'le wtip' lall'le na' gake toz gaki ljwell-le, na' shajniile kwasloj daa wloo Chioza' xnezin daa kono wnezi kani'yi. Na' lennan' daa bidyen Crístona', ³ beena' blii cho' doxen ka nak yel' sin' na' yel' chajinii che Chioza', diika' nak dii zakii nllleb. ⁴ Nia' le' ka' kwenche kono siye' le' we'lenze' le' dill' xochi na' gakile nakan dill' li. ⁵ La'kzi bi zoalen' le', chi yichjkz' le' na' chiba chizakid' daa nezid' nsa' chele wen na' zoachechle chonlilall'le Crístona'.

⁶ Na' daa ba nonle Jesucrístona' Xanle, chiya' wsa' chele lega ben' ba nake'ne' txen. ⁷ Ka zoachech to yag dii ba nde loinna' zitj, ka'kzan le', li soachech gonlilall'le Crístona', kon ka ba bli' bsdinto' le', na' toshiizi li we' Chioza' yel' choxken.

⁸ Li wsak', bi we'zle latj no siye' le' kon yel' sin' daa chaljlall' ben' yell-lioni daa bibi zakii. La' aga xtil' Crístonan' chli' chsedgakile' san che diika' chnabia' lo yell-lionin.

⁹ Crístona', beena' golje' goke' ben' de beli chen, nape' doxen yel' wnabia', yel' wak na' yog' ka diika' nap Chioza'. ¹⁰ Na' le', daa nakle Crístona' txen, yel' wak che'na' ba chonan llin lo yel' mban che-lena', la' Crístona' napche' yel' wnabia' na' yel' wak aga ka yog' anjka' wa dii xiw'ka' chnabia'. ¹¹ Na' lekzka' daa naklene' txen wak inacho yoo to sen loo yichjlall'do'lena' daa chli'n nakle lall' na' Chioza', per bi nakan ka senna' daa chgoo ben' kwerp che'ka' daa le circuncisión, san senna' chgoo Crístona' nakan daa chikobe' yichjlall'do'chona' kwenche dii mala' daa chzelalii beli chenna' bich inabia'n cho'. ¹² Ka wchoale nisa' wak inacho witlenle Crístona', na' bgash'lenlene' ka bgashee, na' lekzka' bibanle ka bibane' ladj ben' wetka' daa wyajle'le Chioza' bisbane' Crístona' kon yel' wak che'na'. ¹³ Na' le', gokle ka ben' net lao Chioza' ni che saaxya cheleka' daa bin' choonlall'le daa cheeni beli chen che-lena'. San naa, Chioza' ba bene' to yel' mban kob chele daa nakle Crístona' txen, na' bizi'xene' yog' saaxya cheleka'. ¹⁴ Chioza' bikwase' daa wdao xya checho, na' bsol bnite'n kana' wda' Jesucrístona' lee yag cruza'. ¹⁵ Na' bikwase' yel' wak che dii xiw'ka', diika' chnabia' ben' yell-lioki, kana' wit Crístona' lee yag cruza'. Na' daa bli'e bene' legakan gan, bsi'e legakan yel' zto' lao lkwe' ben'.

¹⁶Daan, bi wzenagle che ben'ka' nagake' bi gak yeej gaole bittez yel' wao, wa nagake' chonan byen gonle lnika', na' koole balaan llana' chize beo' cheena', na' gombaane lla sabdka'. ¹⁷Yog'lol' diiki nakan daa wzajniin cho' lat' che daa zi' gon Chioza' na' benan llin kana' zi' wselee Crístona', na' naa daa bide' bich chongakan llin. ¹⁸Bi we'le latj no siye' le' kwenche bi wnitle daa ba nonle lez ikaale. Bi wzenagle che ben'ka' chonzə ka le chzexj yichjin lao Chioza', na' choe'la'ogake' anjlka', na' nazgake' chle'dogakile' na' chep cha'lall'lengake' daa chyiljall'zgake'. ¹⁹Ben'ka' chon ka' bi nakgake' Crístona' txen, beena' zaklebi yichjchona' daa chnabi'e cho' nonlilall'chone'. Na' cho' nakchone' txen, chakchacho ka cheeni Chioza', ka chak che tkwen wej kwerp chechoni ndil' nllagan bechj bnia'ka' nox' ljwellin kwenche ka' chgolgakan txen.

²⁰Daa ba nakcho Crístona' txen daa wite' lee yag cruza', wak inacho ba netcho lao diika' chyiljall' ben' yellioni na' bich chiya' inabia'n cho'. Na' zberache ni chonzle txen diika' chyiljall' ben' yell-lioni, ²¹kachaka' daa nagake': "Bi wchino' dga, bi gawo' dga, na' bi goxoo dga?" ²²Yog'lol' diiki chwal' ben' yell-lioni nakchozgakan dii chibill chido na' dii chde cheyin ka zej chchin-chogakan. ²³Dii li, diika' nagake' chontekzgakan ka dii le zakii, la' kat' chongake'n chontekzgake' ka ben' le chapshii daa nak che Chios, na' ka ben' le chzexj yichjin lao Chioza', na' ka ben' le chdezi' beli chen cheyin, per yog' diika' chongake' bi gak yikwasgakan daa chibayi beli chenna'.

3 Daa ba nakle txen Crístona' na' nakle ka ben' bibanlene' txen ka bibane' ladj ben' wetka', chiya' kwe' yichjle cheyi daa nak che yabana', gana' lliia Crístona' shlaa de shli che Chioza'. ²Li se wneyi daa nak che yabana', na' bich kooz

yichjle daa nak che yell-lioni. ³La' ba nakle ka ben' ba wit daa nakle Crístona' txen, na' yel' mban chelena' ba nakan toz kon Crístona' lao Chioza'. ⁴Na' ka yiyed Crístona', beena' none' le' yel' mban daa nak zejli kani, lekzka' sho'lenlene' balaan xen daa chidolee.

⁵Daan, chiya' kwej yichjle yog'lol' dii mala' daa chiba chizaki beli chen chelena': bi inelenzle xiin xool ben' wa xiin xyo ben', bi gonle bichlə dii zban, bich we'le cho'a xbayi beli chen chelena', bich sa'lall'zle gonle dii mala', ni bi selall'le bi gat' kwe' chele. La' beena' chzelall' gat' kwe'ile' dii xen, toz kan chonlene' beena' choe'la'o daa nak yaj yag. ⁶Chioza' wsak'zi'e ben'ka' chon diika' daa bi chzenaggake' che'. ⁷Na' le', lekzka' benle diika' kana' bin' wzenagle che Chioza'. ⁸Per naa, chiya' kwej yichjle yog'lol' diiki: yel' chllaa chlok, yel' wen dii mal, yel' chyilj chzan xtill' ben', na' yel' chbell chne ka nla' ka nte. ⁹Bich siye' ljwell-le, la' ba wlej yichjle yel' mban gol chelena' na' bich gonle dii malka' benle kana'. ¹⁰Ba biyakle ben' kob, na' Chios, beena' bxe bsil le', chone' ka gombia'chlene' na' gakchle dowalj ka cheenile'. ¹¹Aga bi zakii shi nakcho ben' Israel wa shi bi nakcho, shi yoocho sen daa le circuncisión wa shi bi yoochon, shi nakcho ben' nsed wa ben' bi nsed, shi nakcho ben' ndoo lla yel chone' xshin ben' wa nakcho ben' chon xshinkzin. Daa lliialoten, gakcho Crístona' txen, la' nottezə nakcho lekzen' zoalene' cho'.

¹²Chioza' le chakile' le' na' ba wleje' le' kwenche gakle lall' nee. Na' daan, chiya' yiyesh'lallile ben' na' gonile legake' wen, na' bi gakle ben' cha'sib, san gakle ben' gaxjlall', na' gaple yel' chxenlall'. ¹³Chiya' gonle banez ljwell-le, na' chiya' si'xen che ljwell-le shi no bi chon chele. Ka ben Crístona' wxi'xene' chele, lekzka' le' chiya' si'xenle che ben'. ¹⁴Na' daa lliialote chiya' gaki

ljwell-le, la' shi chaki ljwell-le, lennan' gonan ka gonle yog' diiki. ¹⁵Li we' latj inabia' ye'l' mbalaz che Crístona' loo yichjlall'do'lena', la' kwenche soalen ljwell-le mbalazan ba gox wñabe' le' gaxe toz. Na' tlizi chiyal' we'lene' ye'l' choxken.

¹⁶Li kooshao' do ka nak xtil' Crístona' loo yichjlall'do'lena'. Li wli' wsemi ljwell-le na' li wtip lall' ljwell-le, li wchin do ka nak ye'l' sin'na' daa ba bene' le'. Li goł no salmo, no himno, na' bichlā daa na Espíritu che Chioza' goł-le, na' li we' Chioza' ye'l' choxken ka goł-le. ¹⁷Na' yog'loł daa gonle wa daa inale, chiyal' gonlen lega ben' nak Xancho Jesús'a txen na' we'le Xacho Chioza' ye'l' choxken daa ba nonlilall'le Jesucríston'a'.

¹⁸Le' noolə, li wzenag che ben' che-lena', la' kan' chiyal' gonle daa ba nxe-nilall'le Xanchona'. ¹⁹Na' le' ben' byo, li gaki xool-lena' na' bi gonile legake' zid' zñia. ²⁰Na' le' bi'do', li wzenag yog'loł daa na xaxna'leka', la' kan' chazlall' Xanchona'. ²¹Na' le' chisgol chischoole, bi wsheshlenle xiñleka' kontełe, kwenche bi gakyesh'gakib'. ²²Na' le' ndoo lla yelle chonle xshin ben', li wzoa dill', li gon yog'loł daa na ben'ka' nak xanle lo yell-lioni. Aga kat'ka' chwiazgake' gonle ka chilali kwenche ile'shi'gakile' le', san do yichj do lall'le li gonan daa ba chall chlleble Xancho Críston'a'. ²³Yog'loł daa gonle, li gonan do yichj do lall'le na' li gaktezi xshin Xancho Crístonan' chonle na' aga che ben' yell-lion. ²⁴La' nezczile Xancho Críston'a', beena' nak dowalj Xanle, gone' ka yizi'le banez che dii wenna' chonle. ²⁵San beena' chon mal, lekze' ikee laxji dii mala' chone', nottezə nake'.

4 Le' nzi'le ben'ka' chon xshinlena', li gongakile' wen. Li lljadini lekzka' le' zoa to Xanle yabana'.

²Li we'l-lall' we'lwill-le Chioza', na' li se kwas we'lwill-lene' na' we'lene'

ye'l' choxken. ³Na' kat' we'lwill-lene', inabgachile'ne' gaklene' neto' kwenche wsaljche' xneznto' llje'chnto' xtil' Críston'a' daa kono wñezi kana', la' ni cheyin-nan' dia' lillyani. ⁴Li inabi Chioza' gaklene' nad' kwenche gak wi'a dill' kwasloł, ka chiyal' wi'an.

⁵Li wsak' li gon wen ladj ben'ka' bi nombia' Críston'a', la' naayen'nan de latj wli'le non nakle txen. ⁶Dill'ka' choe'le chiyal' gakan sia mbalaz toshiizi, na' lekzka' gak yilliile xochi xtil' ben' kat' no bi inabi le'.

⁷Ben' bish'cho Tíquiconi, beeni le chakicho, we'lene' le' dill' ka nak yog'loł di-ika' chak cha'. Len' do yichj do lalle chonlene' nad' xshin Xancho Críston'a'. ⁸Daan, chsełane' laolena' kwenche wi'e dill' nakan chak chento' na' wtip'e lall'le. ⁹Na' lekzka' ben' wlall' chele Onésimoni zizalene'ne', beeni le chakinto' na' nake' dowalj bish' ljwellcho. Legake' we'gake' dill' che yog'loł daa chak cha' ni.

¹⁰Aristárconi, beeni nak' txen dento' lillyani, chwape' le' chiox; na' lekzka' Márcona', ben' bish' Bernabéna'. Ba wni-akz' le' shi yidwia Márcona' le', li gonshaile' wen. ¹¹Ka'kzə Jesús'i, beeni che'gake' Justo, chwape' le' chiox. Ladj yog' ben' Israelka' nonlilall' Críston'a', ben'kichgan chaklengake' nad' chonnto' xshin Chioza', na' le ba btipgake' lallaa. ¹²Ben' wlall' chele, Epáfrazi, lekzka' chwape' le' chiox. Nake' to ben' chon xshin Críston'a', na' toshiizi choe'lwill'e Chioza' ni chele kwenche gachale lo xneze'na', na' soachehche we'l-lall'le gonle ka cheeni Chioza'. ¹³Nezid' ka wñeyi nllleb zie' chele na' che ben'ka' lle' yell Laodicéana' na' yell Hierápoliza'. ¹⁴Lúcazi, beeni chon rmech, beeni le chakid', chwape' le' chiox, na' lekzka' Démazi.

¹⁵Li wwap chiox bish' ljwellchoka' lle' yell Laodicéana', na' lekzka' Nínfana' na' ben'ka' chdop chllag lille'na'

choe'la'ogake' Crístoná'. ¹⁶Ka yiyoll wlable yishi bzej', li wselaan lao ben'ka' nonlilall' Crístoná' yell Laodicéana' kwenche lekzka' lengake' wlabgake'n, na' legake' gongake' le' yisha' daa bselaa lawe'ka' kwenche wlablen. ¹⁷Li ye'

Arquípona' gone' to dii byen gone' kwasloj daa ba non Chioza' lall' nee gone'.

¹⁸Nad', Pablo, kwin' chzej'^{¶¶} gani chwap' le' chiox. Li ljadini lillyan dia'. Chioza' gaklenshgue' le'.

^{¶¶}4:18 Kwin' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

**Kart nech daa bzej Páblona' na'
bseleen lao ben'ka' nonlilall'
Jesucrístona' yell Tesalónicana'**

1 Nad' Pablo na' Silvánoni len Timotewi chwapnto' le' chiox, le' chdop chllagle choe'la'ole Jesucrístona' Tesalónicana', le' nakle lall' na' Xacho Chioza' len Xancho Jesucrístona'. Chñabinto' legake' gonshgagake' ka gak wen chele, na' wzoagake' le' mbalaz.

²Toshiizi choe'nto' Chioza' yel' choxken che yog'lol-le kat' choe'lwillnto'ne'. ³Toshiizi ka choe'lwillnto' Chioza', beena' nak Xacho, chjadininto' ka choe'l-lall'le chonle dii wenna' daa nonjilall'lene' na' chakile'ne', na' daa zoachechle nonle lez Xancho Jesucrístona'. ⁴Na' le' ben' bish' na' le' ben' zan', le' nakle ben' chaki Chioza', nezinto' ba wleje' le'. ⁵La' ka be'lennto' le' dill' wen dill' kob che Jesucrístona', aga de cho'a dill'zan be'lennto'n le', san kon yel' wak che Chioza' na' che Espíritu Sánto che'nan' be'nto' dill' do yichj do lall'nto'. Na' nez kzile ka wen bsa' chento' ladjlena' kwenche goklennto' le'.

⁶Na' le' bsdle chonle ka neto' na' ka ben Xancho Jesucrístona', la' Espíritu Sántonan' bene' ka bibaile bleble Cho'a xtill Chioza' la'kzi dii zan yel' zak'zi'ka' ben ble'ile. ⁷Na' daa bizo bizakile yel' zak'zi'ka', bliile ben'ka' nonlilall' Crístona' yellka' mbani Macedóniana' na' Acáyana' ka chiyal' gongake'. ⁸Na' daa benle ka', Cho'a xtill' Chioza' ba wisle-san aga to Macedóniana'zə, ni aga to Acáyana'zə, san doxente. Na' lekzka' ba bengakile ka nonjilall'le Crístona', na' bi chonan byen we'nto dill' chele. ⁹La' kwingake' choe'gake' dill' ka wen benle bleble neto', na' bsanle bich be'la'ole lwaa Isak' diika' bi nak chios kwenche benlilall'le beena' nak dowalj Chios yaa Chios ban, ¹⁰na' chbezle yiyetj Xiine'

Jesúza' yabana', beena' bisbane' ladj ben' wetka'. Na' Jesúza' yisle' cho' lao yel' zak'zi'na' ziza' daa we' Chioza' ben'ka' bi bzenag che'.

2 Le' ben' bish' na' le' ben' zan', nez kzile daa bidwianto' le' bi biddadznto'. ²Na' lekzka' nezile le wxak'zi'nto' yell Filípoza' na' biya dii wnagake' neto', per Chioza' goklene' neto' na' bi bllelento' wdixje'into' le' dill' wen dill' kob che Jesucrístona' la'kzi biya dii btillnto'. ³Na' ka wdixje'into'n le', do yichj do lall'nto' be'lennto' le' daa nak dill' li, na' kono wxiye'nto'. ⁴La' Chioza' wleje' neto' na' bzoe' neto' we'nto' dill' wen dill' kob che'na'. Na' aga chonnto'n kwenche chazlall' benaan, san kwenche chazlall' Chiozan', beena' nombia' yichjlall'do'nto'ni. ⁵Nez kzile, na' Chioza' nez nle'ile', ni shlin bigan' we'la'o we' dill'nto' le' daa chzelall'nto' bi de chele. ⁶Bi cheeninto' no koo neto' balaan, ni le' ni ben' yoblə. Daa naknto' postl che Crístona', zak' wñabinto' le' gonle daa chyallj chchininto' shel'ka', per bibi wnanto' le'. ⁷San kana' wzoalennto' le' bennto' chele ka chon to noolə chap chwie' bi'do' che'ka' xochi. ⁸Na' daa le chakinto' le', aga to daa be'lenznto' le' dill' wen dill' kob che Crístonan' bibainto', san lekzka' bennto' axt ga zeelo bizointo' goklennto' le'. La' le chakinto' le'. ⁹Le' ben' bish' na' le' ben' zan', chjadinkzile ka bdezi' kwinnto' shlak wzoalennto' le' kana' be'lennto' le' dill' wen dill' kob che Crístona'. Ka tella ka wal' bennto' llinna' kwenche ni tole bi beninto' zed.

¹⁰Chioza' nez nle'ile', na' lekzka' le' nonjilall'le Crístona', nezile do yichj do lall'nto' wzoanto' ladjlena', na' bennto' daa nak shli na' bsa' chento' wen kwenche kono biz gon ine chento'. ¹¹Lekzka' nezile beninto' to tole ka choni to ben' xiine'ka' ¹²daa btipnto' lall'le, na' bennto' le' yel' chxenlall', na' ba

be'lennto' le' dill' ka chiya' wsa' chele, le' nonlilall'le Chioza', beena' gox le' kwenche inabi'e le' na' lljazoalenene' gana' ile'ile ka nak balaan xen che'na'.

¹³ Na' lekzka' toshiizi choe'nto' Chioza' ye'l' choxken daa bleble cho'a xtilleena' be'lennto' le', la' gokbe'ile' nakan cho'a xtil' Chioza' na' aga cho'a xtil' ben' yell-lionizan. Na' dii li nakan cho'a xtil' Chioza' daa chisha'n yichjlall'do'chona', cho' chonlilall'chone'. ¹⁴ Na' le' ben' bish' na' le' ben' zan', kana' bsak'zi' ben' wlall' cheleka' le', gok chele ka gok che ben' Judeaka', ben'ka' chdop chllag choe'la'ogake' Crístoná', la' ben' wlall' che'ka', ben' Israelka', bsak'zi'gake' legake' daa nonlilall'gake' Crístoná'. ¹⁵ Lekzgaken' betgake' Xancho Jesús'a' na' betgake' dii ben'ka' wdixjee daa goll Chioza' legake' kani'yi, na' lekzka' blaggake' neto'. Bi chongake' ka chazlall' Chioza' na' chle'zbangakile' yog'lol' ben', ¹⁶ la' chsej chllongake' chixje'into' ben'ka' bi nak ben' Israel cho'a xtil' Chioza' kwenche yilagake' na' bi kwiayi'gake'. Na' daa chongake' ka', chzanchgake' saaxya che'ka', na' daan, ba naktén ile'gakile' ye'l' zak'zi' wala' we' Chioza'.

¹⁷ Le' ben' bish' na' le' ben' zan', kana' bi wzoalennto' le' shloll, la'kzi bi ble'into' le', toshiizi jadininto' le' na' le' goklall'nto' yidwianto' le'. ¹⁸ Dii li goklall'nto' yidwianto' le', na' nad'yen' zan shii goklall'laa yidwia' le', per Sataná'za' bsej blonan yid'. ¹⁹ Daa chonlilall'le Xancho Jesús'a' na' zoale chonle wen daa be'lento' le' xtilleena', nonnto' lez gonle ka yibainto' lawe'na' kat' yiyede'. ²⁰ Dii li, chibainto' ka chonle na' zoanto' mbalaz ni chele.

3 Na' ka bich bi rson chele de, bi wzoanto' wen na' be'nto' dill' yigaannto' to neto'zə Aténaza' ² na' bsel'nto' ben' bish'cho Timotewa', beena' chonlene' neto' xshin Chioza' daa chyixje'nto' dill' wen dill' kob che Crístoná'.

Bsel'nto'ne' kwenche yidti'pe' lall'le na' gone' ka soachechle gonlilall'le Crístoná', ³ kwenche ni tole bi gakklejile ni che ye'l' zak'zi'ka' chen chle'ile. La' nezizile kan' lliá bia' gak checho. ⁴ Na' kana' ni zoalennto' le', bsi'ninto' le' nan wle'icho ye'l' zak'zi'ka', na' nezile ba gok ka wnanto' le'. ⁵ Na' daa le' gokshejlallaa ni chele, bselaa Timotewa' kwenche inezid' shi ni nonlilall'kzle Jesucrístoná', la' gokid' dii xiwaa gonan ka gonchoplall'le na' gakkdadz xshin Chioza' daa bennto' ladjlena'.

⁶ Per naa ba bila' Timotewi gani zoanto' na' cho'e dill' ni nonlilall'kzle Jesucrístoná' na' chaki ljjwell-le. Lekzka' cho'e dill' toshiizi chjadinile neto' daa le chakile neto', na' le cheenile ile'ile neto'. Na' ka'kz neto', le cheeninto' ile'into' le'. ⁷ Daan, le' ben' bish' na' le' ben' zan', la'kzi chiya dii chen chle'into', axt bixenlall'nto' ka wnezinto' ni zoachechle nonlilall'le Crístoná'. ⁸ Daa ba nezinto' ni zoachechle chonlilall'le Xanchona', axt biyakshao'lall'nto'. ⁹ Na' bichkz bi dill' chillelinto' kwenche we'nto' Chioza' ye'l' choxken che ye'l' xabana' daa napnto' ni chele. ¹⁰ Ka tella ka wal' chnabinto' Chioza' wi'e latj yidwianto' le' dii yoblə kwenche yiyoll yido wzajniinto' le' daa ni chyalljile shajniile kwenche gonlilall'chlene'.

¹¹ Na' chnabid' Xacho Chioza' na' Xancho Jesús'a' gaklengake' neto' kwenche bibi wsej wllonan yidwianto' le'. ¹² Na' Xanchona' gonshgue' ka zizikli gakchi ljjwell-le na' gakile yog'lol' ben', ka chakinto' le'. ¹³ Na' gonshgue' ka gakchach yichjlall'do'léna' kwenche gakle ben' nxi nyech na' bibi xto'le' gat' lao Chioza', beena' nak Xacho, kat'ka' Xancho Jesucrístoná' ziza'léne' ben'ka' nak lall' nee.

4 Le' ben' bish' na' le' ben' zan', kon ye'l' wñabia' che Xancho Jesucrístoná', chat'yointo' le' soatezi soale gonchle ka chazlall' Chioza', kon ka bsedinto' le' gonle na' kon ka ba chonkzle.

²Ba nezkzile diika' wnanto' le' gonle, na' nakgakan diika' bllia Xancho Jesúza' bia' goncho. ³Chioza' cheenile' soale gonle daa chazlallee. Na' bi inelenzle xiin xool ben', ⁴san to tole chiyal' gape balaan xool-lena' lega ben' nak lall' na' Chioza', ⁵na' bi' we'zle cho'a xbayi beli chen chelena', ka chon ben'ka' bin' gom-bia'gake' Chioza'. ⁶Na' ni tole bi gonle'ile xool ljwell-le la' ba bsi'nkzinto' le' Xan-chona' wsak'zi'e yog' ben'ka' chon ka'. ⁷Chioza' aga gox wñabe' cho' kwenche goncho dii zbanki, san gox wñabe' cho' kwenche gakcho ben' nxi nyech. ⁸Daan, beena' bi chzenague' diiki chli' chsed-into' aga chento'n bi chzenague', san che Chiozan', beena' bene' le' Espíritu Sánto che'na'.

⁹Na' ka nak cheyi daa chaki ljwell-cho, bi chonan byen wzajni'chinto'n le', la' kwin Chioza' ba bsedile' le' gaki ljwell-le. ¹⁰Na' chakile yog'lo' ben'ka' nonlilall' Crístona', ben'ka' zoa doxente Macedóniana'. Na' chat'yointo' le' ben' bish' na' le' ben' zan', zizikchli' gakchi ljwell-le. ¹¹Li gon to dii byen soalen ljwell-le wen, na' li se wñeyi che loo yoo lill-lena', na' li gon llin kon ni'a na'leka' ka ba wnakznto' le' ¹²kwenche ben'ka' bi nonlilall' Crístona' inagake' le wen nsa' chele, na' lekzka' bibi zed ljenle lill ben'.

¹³Na' le' ben' bish' na' le' ben' zan', cheeninto' inezile nak gak che ben'ka' ba wit kwenche bi gakyeshile ka chakyeshii ben'ka' bi nongake' lez lljazoalengake' Chioza'. ¹⁴Daa chajle'cho wit Jesúza' na' bibane' ladj ben' wetka', lekzka' chajle'cho Chioza' yisbane' ben'ka' nonlilall'gake'ne' ka witgake'.

¹⁵Na' daan, nanto' le' kon ka wna Xancho Jesúza': Cho' ni mbancho kat' zizee, aga chon' yibialocho lao ben'ka' ba wit. ¹⁶La' kwin Xancho Jesúza' zizee yabana', na' inie' zillj gone' mandad yiban ben' wetka', na' anjla' chñabia' inie' na' yenicho kwell trompet che Chioza',

na' ben'ka' benlilall' Crístona' yibangake' nech. ¹⁷Na'tech, ka cho' ni mbancho, yigoyo Chioza' cho' yiyakchogake' txen ladj bejka' kwenche lljati'icho Xanchona', na' soalenchone' zejli kani. ¹⁸Na' daan, li wtip lall' ljwell-le kon dill'ki.

5 Na' le' ben' bish' na' le' ben' zan', bi chyalljin wzejnto' le' inanto' bi lla bi goran' gak diiki. ²La' ba nezkzile kwas'lo' llana' ziza' Xanchona' tokonganzi zizee, ka chon to wban kat' lljlane' wal' chel. ³Kat'ka' ben' yell-liona' ine': "Asi naa zoachgacho mbalaz. Bikzbi chak checho", kana'lan tokonganzi kwiayi'gake' na' aga wilalat'gake'. Gak chegake' ka chak che noola' tokonganze chzolo chaz bes che'na' kat' sane'. ⁴San le' ben' bish' na' le' ben' zan', ba nezele diiki kwenche ki sha chel-lə chon llana' zizee tokonganze. ⁵Yog'le ba nombiale Chioza' ba chdale lo beeni' che'na', na' bich chdale lo yel cho'la' daa chzaklebi dii mala'. ⁶Daan, li se kwas' na' li gaktō ben' nyeen nyeeniyi na' bi gonle ka chon ben'ka' bi nombia'gake' Chioza'. ⁷Ben'ka' chda lo yel cho'la' bi nombia'gake' Chioza', nakgake' ka ben' ches wa ka ben' chzoll chniti na' bi chakbe'gakile' bin chak. ⁸Per cho', lo beeni'nan' chdacho. Daan, chiyal' gakcho ben' nyeen nyeeniyi, na' gonlilall'chcho Chioza', na' gakicho yog'lo' ben' na' goncho lez lljazoalenchō Chioza'. Shi goncho yog' diika', na' gakcho ka to soldad beena' nyaz diika' chkweejan le' lo wdila'. ⁹La' aga gox wñab Chioza' cho' kwenche techo lo yel' zak'zi'na' zizan', san gox wñabe' cho' kwenche gat' yel' mban checho zejli kani daa wit Xancho Jesucristona'. ¹⁰Wite' ni checho kwenche la'kzi shi ni mbancho wa shi ba witcho, lljazoalenchone'. ¹¹Na' daan, li wtip lall' ljwell-le na' li gaklen ljwell-le soachechhle wzenagle che Chioza' kon ka ba chonkzle.

¹²Le' ben' bish' na' le' ben' zan', chñabinto' le' gape balaan ben'ka' chi-

lali chongake' xshin Xanchona' lad-jlena', ben'ka' ngoo lall' na' le' na' chli' chsedgakile' le' nakan chiyal' gonle. ¹³Li gapgake' balaan na' li' gaki legake' ni che llinna' daa chongake'. Na' li' soalen ljwell-le mbalaz.

¹⁴Lekzka' chat'yointo' le' ben' bish' na' le' ben' zan', li' we'lensha ben' liaka' dill' kwenche gongake' llin. Na' li' wtipsha lall' ben'ka' chidinji, na' li' gaken ben'ka' bin' gakcha lo xnez Chioza', na' li' gap yel' chxenlall' che yog'lol' ben'.

¹⁵Wsak'gale ni tole bi yizi'zle wzon che ben' shi bi gone' chele, san li' gon ka dii le gonle dii wenna', aga to ladjle na'zə, san kon yog'lolte ben'.

¹⁶Toshiizi li' yibayi. ¹⁷Li soatezi soa we'llwill-le Chioza'. ¹⁸Li we' Chioza' yel' choxken lao bittezə dii chak, la' kan' cheenile' goncho cho' nonlilall'cho Cristo Jesúsá'.

¹⁹Bi wsej wllonle daa cheeni Espíritu Sántona' gone'. ²⁰Bi gonzile nakzi xtill'

beena' ina: "Ki ba wna Chioza' nad'." ²¹San li' wseyen'an shi dii li' nakan daa goll Chioza' le' na' li' ikaa dii wenna'. ²²Bi gonle txen bittez dii mal.

²³Na' Chioza'kzə, beena' chzoe' cho' mbalaz, gone' ka yiyoll yido gake ka chazlallee. Na' gap wwie' do ka nakle kwenche bibi dol' naple kat' ziza' Xancho Jesucristona'. ²⁴Chioza', beena' gox wñabe' le', toshiizi chone' daa ba wne' gone', na' len' gone' dga.

²⁵Na' le' ben' bish' na' le' ben' zan', li' inabshayi Chioza' gaklene' neto'.

²⁶Li' wwapgach chiox yog'lol' ben' bish'choka' na' ben' zanchoka' lega ben' chaki ljwellin daa nakle lall' na' Chioza'.

²⁷Na' nia' le' kon yel' wñabia' che Xanchona' wlabshale dga lao yog'lol' ben' bish'choka' na' ben' zanchoka'.

²⁸Xancho Jesucristona' gaklensgue' le'.

Kart wchopi daa bzej Páblona' na' bseleen lao ben'ka' nonlilall' Jesucristona' yell Tesalóicana'

1 Nad' Pablo, na' Silvónoni len Timotewi chwapnto' le' chiox, ka le' chdop chllagle choe'la'ole Xacho Chioza' na' Xancho Jesucristona' Tesalóicana'. ² Na' chnabinto' legake' gonshgagake' ka gak wen chele na' wzoagake' le' mbalaz.

³ Dii licha toshiizi chiyal' we'nto' Chioza' yel' choxken ni chele, le' ben' bish' na' le' ben' zan', daa zejch chonlilall'le Jesucristona' na' daa to tole zejch chakile ben'. ⁴ Daan, choe'nto' xtill'le lao ben'ka' nonlilall' Crístona' to to gana' chdop chllaggake' choe'la'ogake' Chioza' ka nak daa zoachechle toshiizi nonlilall'le Crístona' la'kzi chen chle'ile yel' zak'zi'ka'. ⁵ Na' yog'lo! dga chli'n ka wen ben Chioza' wleje' le' gakte lall' nee, na' chli'n dii li nakle ben' chidol' lljazoa gana' chnabi'e, la' ni cheyinnan' chzak'zi'le.

⁶ Na' Chioza', beena' chchoglo che ben' ka chiyal', wsak'zi'e ben'ka' chsak'zi'gake' le'. ⁷ Na' le' chzak'zi'le naa, Chioza' gone' ka soale mbalaz, na' ka'kz gone' chento' kat'ka' ziza' Xancho Jesús'a yabana' ladj bel' yi'na' kon anjl che'ka', ben'ka' nap yel' wak xen, ⁸ kwenche wsak'zi'e ben'ka' bi bembia'gake' Chioza' ni bi bzenag-gake' dill' wen dill' kob che Xancho Jesús'a. ⁹ Ben'kin sak'zi'gake' zejli kani na' bi yillingake' gana' chnabia' Xanchona' kon yel' wak choo yel' wak xen che'na'. ¹⁰ Ka' gak chegake' kat' yila' Xancho Jesucristona' kwenche ben'ka' nak lall' nee koogake'ne' balaan na' yibachgayi yog' ben'ka' wyajle' che', na' lenle, daa wyajle'le xtilleena' be'lento' le'.

¹¹ Daan, toshiizi chnabnto' chele kwenche Chioza' ile'shiile' le' lega ben' gox wñabe', na' gaklene' le' kon yel' wak che'na' kwenche yiyoll gonle yog' dii wenna' ba yoo yichjle na' bichlè dii wenka' cheenile' gonle daa nonlilall'lene'. ¹² kwenche Xancho Jesús'a sho'e balaan ni che daa chonle, na' lezkza' kwee le' balaan. Na' Chios chechona' na' Xancho Jesucristona' gaklengake' le' gak ka'.

2 Na' naa, le' ben' bish' na' le' ben' zan', ka nak daa ziza' Xancho Jesucristona' na' daa yidi'a yillagcho yiyakchone' txen, chnabnto' le' ² bi gakklejile ni bi illeble kat' yenile inagake' ba bila'lè Xanchona'. Axt inatelzgake': "Ki ba wna Chioza'", wa inazgake': "Ki wna Páblona'", wa, "Ki bene'n yish nan ba bila'lè Xanchona'." ³ Bi we'le latj no siye'zè le' ka nak diiki. La' aga wiyedzie' shi ben'ka' chwiyi Chioza' bin' yizoshyi'gake'ne', na' shi bin' ichej beena' nak ben' mal wal,⁸⁸ beena' ba nakten kwiayee. ⁴ Beenin gon kwine' li-izelozì ben' choo ben' xen na' wsej wlone' we'la'o ben' Chioza' wa bittezè dii nonlilall'gake'. Na' lljchi'e loo yoodo' che Chioza' gon kwine' ka Chios.

⁵ ¿Abi chjadinile bshaljen' le' cheyi dga kana' zoalen' le'? ⁶ Naa ba nezile non ni nkwez beeni kwenche bi yobile' wli'lawe'. ⁷ Do ngash'zè ba wzolokzè chak dii mala' daa ba yoo xnezin gake. Stozè chyalj ikwas beena' ni nzague'n kwenche wli'lawin. ⁸ Na'ch wli'lao ben' mal wala', na' wit Xancho Jesús'a'ne' kon bishbe che'na' na' wlliaeyene' ka ziza'lene' yel' chey cheeni' che'na'. ⁹ Ka nak ben' mal wala', dii xiwaan gaklenan le' gone' biya yel' wak diika' gon ka yibani ben' kwenche siyee legake'. ¹⁰ Na' wchine' yog' de wxiye' kwenche

§§2:3 Beena' nak ben' mal wal: xtila' nagake' el hombre de pecado wa el hombre malvado. Bwia 1 Jn. 2:18.

siyee ben'ka' ba nakan kwiayi' daa bi goklall'gake' wlebgake' daa nak dii li kwenche yilagake'. ¹¹Daan, Chioza'kzə cho'e latj shajle'gake' che de wxiye'ka', ¹²kwenche kwiayi' yog'lołte ben'ka' bi wyajle'gake' che daa nak dii li, san bibachgakile' daa nak dii mal.

¹³Na' neto' naa, toshiizi chiyal' we'nto' Chioza' yel' choxken ni chele, le' ben' bish' na' le' ben' zan', ben' chaki Chioza'. La' dii nechte Chioza' wleje' le' kwenche yilale bi kwiayi'le daa ba bixis biyib Espiritu Santo che'na' le' na' daa chajle'le dill' li che'na'. ¹⁴Ni cheyi dgan, gox wñab Chioza' le' ka be'lennto' le' dill' wen dill' kob che'na', kwenche idol'le sho'lenle Xancho Jesucristona' balaan.

¹⁵Na' le' ben' bish' na' le' ben' zan', li soachech na' li kooshao' diika' bli' bsedinto' le' ka be'lennto' le' dill' na' ka bzejnto' le'. ¹⁶Na' kwin Xancho Jesucristona' na' Xacho Chioza', beena' ba gokile' cho' na' lo yel' ben' wen che'na' ba bene' cho' yel' chxenlall' zejli kanj na' to dii wen dii shao' dii goncho lez, ¹⁷wtipshgagake' lall'le na' wzoachechgake' le' kwenche toshiizi gonle wen na' we'le dill' wen dill' shao'.

3 Dii zeelo nanto' le', ben' bish' na' le', ben' zan', li inabshayi Xanchona' chento' kwenche cho'a xtilleena' choe'lennto' ben' illiljan tolbe'zə na' wlebgake'n lega dii zakii, kon ka benle le', ²na' kwenche yisle' neto' lo ni'a na' ben' malka', ben'ka' chon dii bi yejni'alallii. La' aga yog' ben' chajle'gake' che Xanchona'. ³Per nezicho Xanchona' chone' ka ne', na' gone' ka soachechchle na' gap wwie' le' lao dii mala'. ⁴Na' nxenlall'nto' Xanchona' chaklene' le' chonle ka ba wnanto', na' toshiizi gonlen. ⁵Na'

Xanchona' gaklene' le' gakile' ben', ka chon Chioza' chakile' cho', na' so sakile gable yel' chxenlall' lao yog' daa yen ile'ile ka ben Cristona'.

⁶Le' ben' bish' na' le' ben' zan', kon yel' wñabia' che Xancho Jesucristona' nanto' le' bi gonle txen nottezə ben' bish'choka' chdaliazə, la' aga kan' bsedinto' le'. ⁷La' nezczile ka chonnto', na' kan' chiyal' gonle. Neto' biga wzoaznto' ka ben' lia ladjlena'. ⁸Ni biga wdaoznto' yel' wao che ben' na' bi wdixjnto'n, san ka tella ka wal bilal bizodinto' bennto' llinna' kwenche ni tole bi beninto' zed. ⁹Na' dii licha, zak'kzə wñabnto' yel' goklen che'lena', she'ka', per bennto' llin kwenche ble'ile, na' kan' gonle. ¹⁰Kana' zoalennto' le' wnanto': "Beena' bi cheenile' gone' llin, lekzka' bi gawe'." ¹¹Na' ba beninto' bal-le kon chdale to ni to na', ni bi chonle llin, na' chlalltezi chele ga bi chiyal'. ¹²Na' ben'ki chon ka, chñabinto' legake' kon yel' wñabia' che Xancho Jesucristona' bich tazgake' ka'z, san gongake' llin kwenche yeej gaogake'.

¹³Na' le' naa ben' bish', na' le' ben' zan', bi lljxakile gonle dii wenna'. ¹⁴Shi no bi chzoa dill' ka nanto' lee yishi, li wwia no beena' na' bi gonlene' txen kwenche yido'ile'. ¹⁵Bi nia' gakzbani'lene', san wzajniile'ne' ka ben' bish'le.

¹⁶Na' kwin Xanchona', beena' chzoa cho' mbalaz, gone' ka soale mbalaz toshiizi bittezə dii chak chele. Xanchona' soalenshgue' yog'lołtele.

¹⁷Nad' Pablo, kwin' chzej* to chop cho'a lee yishi chwap' le' chiox, kan' chzej' lee yog' yishka' chselaa laolena' kwenche inezile nad'kzan chselaan. ¹⁸Xancho Jesucristona' gaklenshgue' yog'lołtele.

*3:17 Kwin' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart nech daa bzej Páblona' na' bseleen lao Timotewa'

1 Nad' Pablo, nak' postl che Jesu-cristona' kwenche wi'a xtilleena', la' Chioza', beena' bisla cho' kwenche bi kwiayi'cho, len Cristo Jesúsza', beena' noncho lez gone' wen checho, bzoagake' nad'. ²Chzej' li', Timoteo, nako' ka dowalj bi' cha' daa nakcho txen chonlilall'cho Jesucristona'. Xacho Chioza' len Xancho Cristo Jesúsza' gaklenshgagake' li', na' yiyesh'lall'gakile' li', na' gongake' ka so' mbalaz.

³Kana' ba zoa shaa Macedóniana', wñabid' li' yigaano' Éfesona' kwenche yoo ben'ka' chli' chsedi daa bi nak dii li' bi gongake' ka', ⁴na' bi segake' wñeyi che dill' golka' wdiljlall' ben' na' che diika' ben dii xozxtoe'ka' daa bi chiyoll chido. La' dill'ka' chonan ka chakgued ben' na' bi chaklenan gombia'gake' daa cheeni Chioza' goncho daa nonlilall'chone'.

⁵Ye'gako'ne' ka' kwenche gapgake' yel' chaki ka daa chalj loo yichjlall'do' beena' ba bixi biyech na' bibi de chao chdian le' daa ñezile' chone' ka chazlall' Chioza' na' nonlilalleene' do lallee. ⁶Balgake' lwaa segake' wñeyi cheyi diiki, ba lenzgake' choe'gake' dill' cheyi diika' bi zakii. ⁷Cheenzgakile' gagkake' ben' wli' wsedi ley che Chioza', per ni lekzgake' bi chajni'gakile' daa chli' chsedgakile' la'kzi nazgake' kayen'nan nakan.

⁸Ñezicho ley che Chioza' nakan wen, shi wñinchon ka chiyali. ⁹La' ñezicho aga ben Chioza' leya' ni che ben'ka' chon wen, san ni che ben'ka' chyishj xtilleena' len ben'ka' bi chzenag, ben'ka' bi chall chlleb Chioza', ben' saaxyaka', ben'ka' chiyit xaxña'yin, yog' ben'ka' nak wen xya, ¹⁰ben'ka' chñelen xiin xool ben', ben'ka' nak ben' xej, ben'ka' chit' chde ben', ben'ka' chziye', ben'ka' axt chozagake' Chioza' de taschiw kat'

chziye'gake', na' nottez ben' bi chone' daa na cho'a xtill' Chioza' ¹¹kon ka chzajni dill' wen dill' kob che'na' daa nak dii zakii nleeb. Na' Chioza', beena' chido! we'la'ocho, ba bene'n lall' na' wi'an dill'.

¹²Cho'a Xancho Cristo Jesúsza' yel' choxken chone' nad' wal, na' nñenlallee nad' wak gon xshine'na', na' bzoe' nad' gona'n. ¹³La'kzi biya dii ben wñia' che', na' bñhi' bsakaa ben'ka' benlilall'gake'ne' na' bshagdil' legake', Chioza' biyesh'lallile' nad' daa bi wñezid' bin chon' kana' bin' shajli'a che Jesúsza'. ¹⁴Na' dii xen goklene' nad', bene' ka chonlilall'chee na' bene' nad' yel' chakina' daa nak' txen Cristo Jesúsza'.

¹⁵Dillii nakan dii wñenlall'cho, na' yog'lol' ben' chiyal' shajli'en: Cristo Jesúsza' bide' yell-lioni kwenche yisle' ben' saaxyaka', na' nad'yen' goklikz' ben' saaxya wal. ¹⁶Per Chioza' biyesh'lallile' nad' kwenche wli' Jesucristona' do ka nak yel' chxenlall' xen che'na' na' ile'i ben'ka' zi' shajle' che' na' gapgake' yel' mban zejli kani. ¹⁷Toshiizi shajla'oshga beena' chñabia' zejli kani, beena' biga lliia te che', beena' zoakz la'kzi bi chle'ichone', na' sho'shgue' balaan. Zeelo len' nake' Chios. Kan' gaksghan.

¹⁸Timoteo, xiindawaa, nia' li' chiyal' gono' ka wdixje'i ben'ka' li' daa goll Chioza' legake' cho' dii nechte, kwenche daa wnagake' cho' gaklenan li' gono' ga zeelo yizoilo' gono' xshin Chioza' daa nak lall' no'. ¹⁹Toshiizi so' gonlilalloo Jesucristona' na' tlizi gono' wen kwenche bibi gao idian li' daa ñezilo' chono' ka chazlallee. La' bal' ben' dii shao'tekzə chongake' daa bi chiyal' gongake' na' bich chonlilall'gake'ne'. ²⁰Ka gok che Himenewa' len Alejándrona', na' wñabid' Chioza' gagkake' lall' na' Satanáza' kwenche wsedgake' bich bi gon inazgake' che Chioza'.

2 Naa nia' li' daa lliialote gonle: chiyal' we'lwill-le Chioza' na' inabile'ne' daa

chyalj chchinile na' daa chyalj chchini ben' yoblə, na' gat'yoile'ne' gaklene' yog'lolte ben', na' we'lene' ye'l' choxken ka nak daa chone' che yog'lol ben' yell-lioni. ²Chiyal' inabicho Chioza' gaklene' ben' wñabia'ka' na' yog'lolte ben' nak joschis, kwenche soacho mbalaz na' kono wsej wllon we'la'ocho Chioza' na' goncho daa cheenile'. ³La' dgan nakan wen na' chazlalli Chiozan', beena' bisla cho' kwenche bi kwiai'cho, ⁴na' cheenile' yog'lolte ben' yell-lioki yilagake' na' gombia'gake' daa nak dii li. ⁵La' toz Chiozan' zoa, na' toz beena' chizoa ben' yell-lioni wen kon Chioza', len' Cristo Jesús'a, ⁶beena' bzani kwine' wite' kwenche wdxixje' xtol' yog'lol ben' yell-lioni. Na' dga gokə, gokan llana' bllia Chioza' bia', na' bli'e cheenile' yisle' cho'. ⁷Na' kwenche inezi yog' ben' dga, bzoe' nad' nak' postl' che' na' bene' lall' na' chyixji'a xtilleena'. Na' bene' lall' na' wli' wsedid' ben'ka' bi nak ben' Israel, kwenche shajle'gake' dill' li che'na'. Na' dga cho'a dill' nakan dii li, na' bi chziyaa.

⁸Cheened' yog'lol ben' byoka' we'llwillgake' Chioza' gattezə zoagake', na' chiyal' gakgake' ben' lall'do' nxi nyech, ben' bi yoo daa nak ye'l' chllaa ye'l' chlok na' ye'l' wishagdil' kat' wlis neeka' lawe'na' we'llwillgake'ne'. ⁹Na' ka nak noolka', chiyal' wsak'gake' gawk xagake', na' bi tezgake' lawin yiyiljall'gake' naklə yipaa yichje'ka', ni bi wchingake' no or wa lech' zakii inleeb. ¹⁰San gonləgake' to dii byen seyi chegake' chongake' wen lega ben' choe'la'o Chios. ¹¹Chiyal' kwe' noolka' llizə wzenaggake' che ben'ka' chli' chsedi cho'a xtil' Chioza' na' wzoagake' xtilleeka'. ¹²Bi cho'a latj wli' wsedzi noolka' ben' byoka', ni bi inabia'z'gake' legake', san chiyal' kwe'gake' llizə wzenaggake'. ¹³La' Chioza' bene' zigaate Adánna', na'techlə bene' Évana'. ¹⁴Na' aga Adánnan' wxiye' dii xiwaa, san

noolan' wxiye'n na' bxope' lao saaxyana'. ¹⁵Na' noolka' chzoa xiñin, bi tegake' lao ye'l' zi'na' shi toshiizi nxenilall'gake' Chioza', na' segake' wñeyi gakgakile' ben', na' soagake' gongake' ka cheeni Chioza' lega ben' nyeeñ nyeeniyi.

3 Dillii nakan dii wxenlall'cho: shi no cheeni koo lall' nee gap wwie' ben'ka' nonlilall' Críston'a na' wli' wsedile' legake', llin wen inleeban lialallee gone'. ²To ben' ngoo loo nee chli' chsedile' ben', chiyal' gake' ben' zoa do yichj do lallee, ben' bibi cho'a xtillee de. Chiyal' soa toz xooole', na' gake' ben' nsa' cheyin wen, na' gake' ben' nyeeñ nyeeniyi, na' ben' chidolee gap ben' le' balaan. Na' chiyal' yiyeshile ben' wi'e ga yigaane', na' gakte wli' wsedile' ben'. ³Bi chiyal' gake' ben' weezo, ni bi gake' ben' wishagdil', ni bi selall'chgai'e' mech, san gake' ben' wen, ben' gaxjlall'. ⁴Chiyal' gak kwee xnez xlatji dii chak loo yoo lille', na' gone' byen wzenag xiñe'ka' che' na' soagakb' gongakb' daa nak wen. ⁵La' shi to ben' bi chak kwee xnez xlatji dii chak loo yoo lille', ¿nakra gone' kwee xnezi che ben'ka' nxenilall' Chioza'? ⁶To ben' shinzə wzolo chonlilallee Críston'a bi chiyal' gak lall' nee gap wwie' ben'ka' nonlilall' Críston'a, kwenche ki gakte' ben' chep cha'lall' na' wchoglo Chioza' che' ka ba nchogloe' che dii xiwaa. ⁷Lekzka' chiyal' seyi che' chone' wen lao ben'ka' bi nonlilall' Críston'a kwenche kono biz gon ina che' na' gonzə dii xiwaa gan wchixan le'.

⁸Lekzka' ben'ka' gak lo na'gake' gaklengake' wwiagake' bin chyalj chchini ben'ka' nakgake' txen nonlill'gake' Críston'a, chiyal' gakgake' ben' chidol' gap ben' legake' balaan, ben' chda do lallee, na' bi sollgakile', ni bi gakzgake' ben' wzelall'. ⁹Chiyal' soachehgake' shajle'gake' dii li daa ba bzajni Chioza' cho' daa kono wnezi kana'. Na' chiyal' soagake' do yichj do lall'gake' na' bibi

de gao idian yichjall'do'eka' daa nez-gakile' chongake' ka cheeni Chioza'.

¹⁰Na' lekzka' kat' kwejle ben'ki, chiyal' wwiayen'le nak nsa' chegake'. Na' shi bibi de dii chao xya chegake', wak gak lo na'gake' wwiagake' bin chiyallj chchini ben'ka' nakgake' txen nonlill'gake' Crístona'. ¹¹Na' noolka' lekzka' chiyal' gagake' ben' chidol' gap ben' legake' balaan, na' bi gagkake' ben' wichitj dill', san gagkake' ben' nsa' cheyin wen, na' gagkake' ben' gak wxenlall'cho toshizi gongake' wen. ¹²To ben' gak lo nee wwie' bin chiyallj chchini ben'ka' nake' txen nonlill'gake' Crístona' chiyal' soa toz xooles, na' chiyal' gap wwie' xiine'ka' kwenche gongakb' wen, na' kwe' xnez xlatji dii chak loo yoo lille'.

¹³Ben'ka' chak chgoogake' xnezi che diika' chiyallj chchini ben'ka' nakgake' txen nonlill'gake' Crístona' chidol'gake' to balaan, na' soachgagake' mbalaz daa nonlill'gake' Cristo Jesúsza'.

¹⁴La'kzi ba non' lez yobzə yidwia' li, chzej' dga ¹⁵kwenche shi bi chyobzid' yid', na' ba nezilo' nakan chiyal' soa ben'ka' nak xiin Chioza', la' cho' chdop chllagcho choe'la'ochone' nakcho xiin Chios yaa Chios banna'. Na' nak lo na'cho goncho ka gombia' ben' dill' li che'na'.

¹⁶Dii li dga chzajniin cho' che Crístona' daa kono wnezi nakan dii zakii nileb, na' nan:

Bide' golje' ka cho' ben' yell-lío,
na' Espiritu che Chioza' bli'e nan nake'
ben' li ben' shao'.

Na' ble'i anjlka' le',
na' wda ben' be'gake' cho'a xtilleena' lao
ben' yell-lioki,
na' benlilall'gake'ne'.

Na' biyepes' yabana' gana' yo'e to balaan xen.

4 Espiritu che Chioza' cho'e dill' kwasloj, ne' kat' ba zoa te che yell-lioni, bal ben'ka' ba nonlilall'gake' Crístona' bich gonlilall'gake'ne', na'

wzenaggake' che dii xiw'ka' na' diika' chli' chsedi ben' chegakin.

²Na' wzenaggake' che ben' wxiye'ka', ben'ka' bichbi chao chdian legake' daa ba nlantekzgake' yel' wxiye'na'.

³Na' chllongake' wshagna' ben', na' chllontegake' yeej gaogake' bal yel' wao la'kzi Chioza' wlo'e yel' waoka' kwenche cho' nonli'lall'chone' na' nombia'cho dill' li che'na' gaochon na' we'chone' yel' choxken. ⁴La' yog'loj daa bxe bsil Chioza' nakan wen, na' bibi de dii inacho bi gak gaochon kon shi we'chone' yel' choxken kat' yeej gaochon. ⁵La' daa chajle'cho cho'a xtil' Chioza' na' daa choe'lwillchone', chonleeye' yel' wao chechona'.

⁶Shi dga wli' wsedilo' bish' ljjwell-choka', na' gako' to wen llin wen che Jesuscrístona', na' tolla' ba nono' cho'a xtil' Chioza' loo yichjall'do'na' len dii wenna' daa bsedo' na' zej chono'n. ⁷Na' bi wzenago' bizə dill' gol dii chsees' ben', diika' wdiljall'gake' daa bi nak ka dii shajle'cho, san bsed gono' ka cheeni Chioza'.

⁸Nezicho kat' chchitj ni'a na'choki chaklenan kwerp chechoni. Per daa choncho ka cheeni Chioza', dii xentechlə chaklenan cho' naa zoacho yell-lioni na' lekzka' kat' illin lla lljzaoalenchone'.

⁹Dillii nakan dii wxenlall'cho, na' yog' ben' chiyal' shajli'en. ¹⁰Na' ni cheyinnan' chonnto' to dii byen chila'into' chonnto' xshin Chioza' daa ba nonnto' lez Chios yaa Chios banna', beena' cheeni yisle' yog'loj ben', na' ben'ka' chonlilall'yen' len' yisle'.

¹¹Diikin chiyal' yoo ben' gongake' na' wli' wsedilo' legake'. ¹²Bi weezo' latj no ile'zi li' nakzi daa nako' bi' wew', san ben wen lao ben'ka' nonli'lall' Crístona', ka de cho'a dill', na' yel' nsa' cheyin wen, na' yel' chaki ben', na' yel' nonlilallii Crístona', ni bibi dii mal sa'lalloo, kwenche lengake' gongake' ka'. ¹³Shlak yid', ben ka dii le blab Cho'a Xtil' Chioza'

lao ben'ka' chdop chllag, bli' bsedgakile', na' btip lall'gake'. ¹⁴Bi guetlalloo daa ben Chioza' lall' no' kana' ben'ka' ngoo lall' na'gake' ben'ka' nonlilall' Crístona' b̄xoā neeka' yichjo'na' bengake' li' lall' na' Chioza', na' bchej beena' wdx̄jee nan Chioza' ba wleje' li' gono' xshine'na'.

¹⁵Ben to dii byen ben diiki wloo Chioza' lo no' gono', na' benyenaan kwas̄l̄ol kwenche gakbe'i yog'l̄ol ben' ba zejch chono' wen. ¹⁶Wze w̄neyi che kwino' na' cheyi daa chli' chsedilo' ben', na' toshiizi wno'n. Na' shi gono' ka nan, na' yisla kwino' len ben'ka' chzenaggake' daa chli' chsedilo'.

5 Bi inezo' zibia' ben' golka', san be'lengake' dill' xochi ka ben' chshaljlen xayin. Na' goni ben' bishoo ben' xkwid'ka'. ²Na' goni x̄noo noolka' ba ngolch ka li', na' goni ben' zano' nool xkwid'ka', na' bibi dii mal sa'lalloo.

³Goklen nool wizebka', ben'ka' kono zoa chegake'. ⁴Per shi zoa xiin̄ xsoagake', chonan byen inezgakib' chiya'l' gap wwiagakb' le', la' len' bisgole' legakb'. La' kan' chazlall' Chioza' goncho. ⁵Nool wizeba', beena' kono zoakz cheyin, beena' bgaan̄ tlish' tyaj, chxenilallee Chioza' na' ka tella ka wal' choe'lwille'ne' na' chat'yoile'ne' gaklene'ne'. ⁶Per nool wizeba', beena' choe' cho'a xbayi beli chen che'na', nake' ka ben' net lao Chioza' la'kzi mbane'. ⁷Bzajni'gakile' dga kwenche bibi gon inaz ben' chegake'. ⁸La' beena' bibi w̄neyi ze che no dialla che' na' che ben'ka' nakyenee txen loo yoo lille'na', ba wlej yichje' daa nak che Chios, shi ka' chone', na' ba nxinjtechl̄e yichjlall'do'ena' aga ka beena' bin' shajle' che Chioza'.

⁹Lee yisha' gana' da' le nool wizebka' chiya'l' ta' le ben'ka' ba wdeli guiyon yiz, ben'ka' ben banez kochno bikaagake'. ¹⁰Chiya'l' seyi chegake' chongake' wen: daa gok bisgol xiine'ka', daa chiyesh'lall'gakile' ben' choe'gake'

ga yigaangake', daa chongake' bittez dii gaklenen ben'ka' nonlilall' Chioza', axt chyibgake' ni'eka', na' daa chaklengake' ben'ka' chzak'zi', na' daa chongake' ka dii le chongake' yog' daa nak wen.

¹¹Na' bi wdoo le nool wizebka' lee yisha' shi bin' gaggakile' guiyon yiz. La' zoa kat' we'gake' cho'a xbayi beli chen che'ka' na' yikaa chegake' na' bich gongake' kwas̄l̄ol xshin Crístona', ¹²na' gagake' dol' lao Chioza' daa bi saggakile' gongake' ka ba bchebgake'. ¹³Na' leyi chiyakgake' noolē lia na' chdagake' to to yoo. Na' aga toz daa, san lekzka' chchitjgake' dill', na' chjalaalli chegake' dii chak che ben' yobl̄e, na' choe'gake' dill' dii bi chiya'l' we'gake'. ¹⁴Daan nool wizebka' ni zoa xlatjin, cheenid' yikaa chegake' na' yizoa xiingake', na' koogake' x̄nezi dii chak loo yoo lillgake', kwenche bi wx̄a'gake' cho'alao ben'ka' bi chonlilall' Chioza'. ¹⁵La' bal' nool wizebka' ba bichejgake' lo x̄nez Chioza' na' ba zjanogake' Satanáza'l̄e.

¹⁶Shi to ben' nonlilall' Chioza' zoa to dialla che' nool wizeb, chiya'l' gaklene'ne' kwenche bi gake' to dii zii dii zshab che ben'ka' nonlilall' Crístona', na' gak we'gake' daa chyallj chchini nool wizebka' kono zoa chegake'.

¹⁷Ka nak ben'ka' ngoo lall' na'gake' ben'ka' nonlilall' Crístona', na' chak chgoogake' x̄nezin wen, chidol'gake' balaan̄ xen. Na' ben'ka' noni xshingake' choe'gake' cho'a xtill' Chioza' na' chli' chsedgakile', balaan̄ xentechl̄e chidol'gake'. ¹⁸La' Cho'a Xtill' Chioza' nan: "Ka nak goona' bana' chilali chlej chshoshjb̄ tr̄igona' kwenche ichej xayinna', bi wllinle yixja' cho'aba' kwenche gak koyob to chop cho'a." Na' lekzka' nan: "Beena' chon llinna' chidolee ikaa laxje'."

¹⁹Shi no chao xya che to ben' ngoo lall' na' ben'ka' nonlilall' Crístona', bi wzenago'n shi bi zoa chop shon ben' yizi'

cho'agake'n. ²⁰Na' shi ga zoa ben'ka' bi chsankzgabe' dii mala', chiyal' wshesh-leno' legake' kat' ndop nllagle kwenche yog'lo' ben'ka' nakle txen illebgake' na' bi gongake' ka'. ²¹Chat'yoid' li' lao Chioza', na' lao Jesucristona' na' lao anjl che'ka', toshiizi gono' diiki ba wnia'. Na' toz ka gonilo' yog'lo' ben', aga balze' gakilo'. ²²Bi wxoazə noona' yichj beena' cheeni gon xshin Chioza' shi bi nezilo' nak nsa' che', kwenche ki gako'ne' txen shi chone' dii mala'. Wdapshii kwino' kwenche ki ta' icheno' dii mala'.

²³Daa chak li'ona' na' daa zekizezi bi shawoo, bich yeejteko' toz nisa', san weej lat'do' wej vinona'.

²⁴Ba' dii malka' chon ben' chli'lawin ka zi' gaolə ben' xya chegabe'. Na' zi balan, zi' chila' chinezli beanaan. ²⁵Na' ka'kzə, dii wenna' daa chon ben' n'la'xejgakan, na' la'kzi de dii wenna' daa ngash', wlin lla wli'lawin.

6Yog'lo' ben'ka' ndoo lla yel chongake' xshin ben' na' ba chonlilall'gake' Cristona', chiyal' sho' yichjgabe' gapgabe' xane'ka' balaan kwenche bibi gon inaz ben' che Chioza' na' cheyi daa chli' chsedicho. ²Na' shi xane'ka' nonlill'gake' Cristona', la'kzi ba nakgabe' ben' bish'gabe' daa chonlilall'gake' Cristona', chiyal'kz gapgabe' legake' balaan, na' chiyal' gonchəgabe' xshine'ka' do yichj do lall'gake' daa chakgakile' legake' na' nezgakile' ben'ka' si' banez xshine'ka' nakgabe' ben' nonlilall' Cristona'. Dgan chiyal' wli' wsedilo' legake' na' ye'gako'ne' gongake'n.

³Shi no chli' chsedi dii nak nlla'ə na' bi chidilin daa bli' bsedi Xancho Jesucristona', na' bi chidiltein daa chsedi cho' goncho ka cheeni Chioza', ⁴beena' chon ka' nake' ben' chep cha'lall', ben' bibi nezi. Na' daa le chibaile' gakkil-lene' ben', chxie' daa nak yel' xe', yel' wishagdil, yel' chbell chne che ben', na' yel' chza'lall' mal che ben'. ⁵Na' biga

yyoll yido gakkil-lene' ben' daa ba nxinj yichlall'do'ena', na' bi nombi'e daa nak dii li. Na' chakile' daa chonze' ka chli' chsedi che Chioza' gatile' mech xen. ⁶Dii li, le mbalaz soacho shi goncho ka cheeni Chioza' na' goncho banez ka'k' to dii de checho. ⁷La' to ka cha'zchon goljcho yell-lioni, na' to ka cha'zchon yiza'cho. ⁸Shi de dii cheej chaocho na' de xalaancho, chiyal' goncho banez. ⁹Na' ben'ka' cheeni gak ben' wni'a, chxopgabe' lawi daa nak yel' wzelall' na' lliall'gake' biya dii bi yejni'alallii daa chxinj chlenan legake', na' chtakw chchejan legake' na' chbiayi'lengake'n. ¹⁰Lo yel' wzelall' mecha' chalj chxe biya dii bi yejni'alallii. Ba' ben', yel' wzelall' che'ka', ba bilaa-gake' lo xnez Chioza' na' ba chile'gakile' zan yel' zi'.

¹¹Per li' chono' xshin Chioza', biga gono' ka chon ben'ka', san ben daa nak dii licha, ben ka cheeni Chioza', wzoatezi wzoa benlilallee, wdap yel' chaki, gok wal lao yog'lo' dii idil illago', na' gok ben' gaxjlall'. ¹²Btiplaloo na' ben to dii byen gono' daa cheeni Chioza', beena' nonlilaloo. Na' be'l-lal' beni cho' daa nak yel' mban zejli kani. La' ni cheyinnan' gox wñab Chioza' li' na' bi'o dill' lao ben' zan nan nonlilaloo Cristona'. ¹³Na' naa, lao Chioza', beena' choe' yel' mban che yog'te dii de yell-lioni, na' lao Jesucristona', beena' be' dill' kon ka nakan lao Poncio Pilátona', chon' byen ¹⁴wzo' dill' dga nia' li', na' seyi cho' chono' wen na' bibi dii mal ta' icheno' ax't ni ka yila' Xancho Jesucristona'. ¹⁵La' wlin lla yiyede' ka bllia Chioza' bia', Chios, beena' chido' we'la'ocho, beena' zeelo chnabia'. Zeelo len' nake' Xan yog'lo' ben', na' chnabi'e lao yog'lo' ben'. ¹⁶Toze' len' biga lliate che', na' zoe' lo beeni' xen wala' daa kono chzoi wwia. Ni tlish' benech bin' ile'ile'ne' ni bi gak ile'gakile'ne'. Len' chidolee sho'e balaan zejli kani na' biga lliate yel' wñabia' che'na'. Kan' nakan.

¹⁷ Ben'ka' chle'i yel' wni'ana' yell-lioni, gollgake' bi gaggake' ben' cha'sibə, ni bi gongake' lez yel' wni'a che'ka'. L̄a' yel' wni'ana' bi nakan lez. San chiya' gongake' lez Chios yaa Chios banna'. Len' chone' zoayaa zoallin yog'lol̄ daa chyallj chchinicho kwenche si'chon banez. ¹⁸ Gollgake' gongake' wen, na' koo yichjgake' wzanchgake' dii wenka' chongake', na' segake' wneyi izangakile' we'gake' ben' dii de chegake'. ¹⁹ Na' daa gongake' ka', na'chan saki gongake' lez

daa zi' za', na' idol'gakile' yel' mban daa nak dowalj.

²⁰ Timoteo, wlooshosh yichjo' dga ba wnia' li'. Bi wzenago' dill'ka' bi yejni'alallii na' bibi zakaan, ni bi wzenago' xtill' ben'ka' chonzə ka nap yel' sin'. ²¹ Bal' ben' ba wyajle'gake' cho'a xtilleeka' na' ba bilaagake' lo xnez Chioza'.

Chioza' gaklenshgue' le' na' gone' ka gak wen chele.

Kart wchopi daa bzej Páblona' na' bseleen lao Timotewa'

1 Nad' Pablo nak' postl che Jesu- crístona' kon ka chaklall' Chioza', kwenche wi'a dill' nan ba bchebe' wi'e ye! mban zejli kaní che nottezə beŋ'ka' nak Crístona' txen. ²Chzej' li', Timoteo, nako' ka dowalj bi' cha'. Xacho Chioza' na' Xancho Jesucrístona' gaklenshgagake' li', na' yiyesh'lall'gakile' li', na' gongake' ka so' mbalaz.

³Tlizi choe'lwill' Chioza', beena' chonlilallaa do yichj do lallaa, ka ben dii beŋ' gol cha'ka'. Ka tella ka wal chnab' gaklene' li' na' cho'ane' ye! choxken ni cho'. ⁴Chjadinid' ka wchello' kana' zeelo bshaljcho, na' cheenid' ile'id' li' kwenche yiba yizakid'. ⁵Chjadinid' ka nonlilalloo Chioza' do yichj do lalloo, ka ben xna'golo' Lóidana' na' xnoo, Eunícena'. Na' nezyenid' lekzka' li' nonlilalloone' do yichj do lalloo.

⁶Na' daan, chisa'lalloo chiyal' we'l- lall'cho gono' xshin Chioza' kon ka nak ye! waka' daa bene' lall' no' kana' bxo'a' na'na' yichjo'na'. ⁷La' Chioza' beŋe' cho' Espíritu che'na', na' Espíritu che'na' chaklene' cho' kwenche bi gall illebcho, na' chone' cho' ye! wak len ye! chaki, na' chaklene' cho' gakcho beŋ' nyeen nyeeŋiyi. ⁸Daan, bi yiyi yido'ilo' wi'o cho'a xtil' Xanchona', ni bi yido'ilo' ni cha' daa dia' lillyani daa chon' xshin Chioza'. San chiyal' gono' nad' txen il- laglocho ye! zak'zi'ka' ni che cho'a xtil' Crístona', la' Chioza' chaklene' cho' len ye! wak che'na'. ⁹Chioza' bisle' cho' na' gox wñabe' cho' kwenche gakcho lall' nee, aga ye! chon wen chechonan', san kon ka goklallile' gone'n daa nake' beŋ' wen. Na' daa biyesh'lallile' cho' wlo'e xnezin wselee Jesucrístona' kana' zi' wxe wsiltie' yell-lioni. ¹⁰Na' naa, ba bli'lawi ye! chiyesh'lallii che'na' daa bid Jesu-

crístona', beena' bisla cho', na' blliyee ye! wak che ye! wita', na' dill' wen dill' kob che'na' chzajniin cho' nan de to ye! mban daa bi te cheyin.

¹¹Chioza' bzo'e' nad' nak' postl na' bene' lall' na' chyixji'a dill' wen dill' kobi na' chli' chsedida'n beŋ'. ¹²Na' ni cheyin- nan' chzak'zi'a lao dga chak cha' naa. Per bi chiyi chido'id', la' nezd' ka nak beena' ba nxenilallaa. Na' nezd' nape' ye! wak gapshi'e dill' li' che'na' daa bene' lall' na', kwenche toshiizi gakan dowalj axt kat' illin lla te che yell-lioni.

¹³Dill' lika' ba bli' bsedid' li', bli' bse'di'n beŋ' kon ka nakan. Na' daa ba nako' txen Cristo Jesúsza', soache- cho' gonlilalloone' na' gakteilo' beŋ'.

¹⁴Espíritu Sántona', beena' zoa loo yichjlall'do'chona', gaklene' li' kwenche toshiizi wli' wsedilo' beŋ' dill' lina' daa ba bsedid' li' na' bi wi'o latj shi ga za'zə beŋ' cheenile' yisheen.

¹⁵Nezkzilo' yog' beŋ' Ásiaka' wchoonlall'gake' nad', na' lentez Figélona' na'ch Hermógeneza'.

¹⁶Chñabid' Chioza' yiyesh'lallile' Onesíforona' len xiin xoole'na', la' zan shii bidtipe' lallaa na' bi bido'ile' bidwie' nad' loo lillyani. ¹⁷To ka bidze' Rómani, lii biyiljdotie' nad' axt ki billelile' nad'.

¹⁸Chñabid' Xanchona' yiyesh'lallile'ne' kat' illin llana' wchogloe' che beŋ'. Nezkzilo' dii xen goklene' cho' Éfesona'.

2 Na' li', naa, xiindawaa, gok wal daa chaklen Cristo Jesúsza' li'. ²Daa ba benilo' bli' bsedid' beŋ', bzajniin beŋ'ka' nxenlalloo, beŋ'ka' nezteilo' wak wli' wsedgakile'n beŋ' yoblə kon ka nakan.

³Wzoachech btıl ye! zak'zi'ka' chllag- lo' lega beŋ' chon xshin Cristo Jesúsza', ka chon' nad'. ⁴Ni to beŋ' zeje' lo wdila' aga dii yoblə zeze' wñeyi, san chiyal' kwej yichje' yog'lołte kwenche gone' daa yiyoolallii beena' wleje' le' gake' soldad.

⁵Lekzka' beena' chxonj, bibi gone' gan shi bi chzoe' dill' gone' yog'lołte daa

llia bia' gone'. ⁶Na' beena' cheeni yizi' yilape' chiyal' wwa'gaxje' llin cheyin. ⁷Wze wneyi dga nia' li', na' Xanchona' wzajni'chile'n li' kwasloł.

⁸Jadini Jesucristona', beena' biban ladj beŋ' wetka', beena' nak xiin dia che dii Davina', kon ka na dill' wen dill' kob che'na' daa chli' chsedid'. ⁹Na' ni cheyinnan' chzak'zi'a, axt ba wdixgake' nad' lillyani ka to beŋ' wen dii mal. Per aga len cho'a xtilleenan' nej lillyani, san zejchlə chlliljan. ¹⁰Daan chzo chzakid' yog' yel' zak'zi' dii chak cha', kwenche beŋ'ka' ba wlej Chioza' gakgake' lall' nee gonlilall'gake' Jesucristona' na' yilagake' kwenche bi kwiayi'gake', na' lljazoalen-gake'ne' zejli kani.

¹¹Dillii nakan dii wxenlall'cho:

Shi ba witlencho Crístona', lekzka' wbanlenchone'.

¹²Na' shi so sakicho lao bittezə yel' zi' yen ile'icho daa nakchone' txen, lekzka' inabia'lenchone'.

Shi cho' bi wchebcho nakchone' txen, ka'kzə le' inə' bi nake' cho' txen.

¹³La'kzi cho' bi choncho daa chchebcho, le' chone' ka ba bchebe',

la' toshiizi chone' kon ka chchebe' gone'.

¹⁴Bi guetlalloo yisoo dga lall' beŋ'ka' chli' chsedilo'. Na' kon yel' wñabia' che Chioza' daa ba bene' li' bsi'ngakile' bi chiyal' gagquedlenzə ljwellgake' ni cheyi diika' bibi zakii. La' bi chakle-nan beŋ', san chlliyi'lan beŋ'ka' chzenagan. ¹⁵Ben to dii byen gono' ka chazlall' Chioza' kwenche bibi wsi'n li' yel' zto' lo xshine'na', na' bli' bsemi dill' li' che'na' kon ka nakan. ¹⁶Bi wzenago' dill'ka' bi yejni'alallii na' bite bi zakgakan, la' beŋ'ka' choe' dill' ka diika' zizikli chongake' daa bi choolall' Chioza'. ¹⁷La' daa chli' chsedgakile' nakan ka to yillwe' dii nak lech na' chlliyi'n beŋ'. Ka' ben Himenewa' len Filétona', ¹⁸biłaala'ogake' dill' li' che Chioza' na' nazgake' ba bisbanle' beŋ' wetka'. Na'

chonllejgakile' beŋ'ka' ba nonlilall'gake' Crístona'. ¹⁹San dill' li' che Chioza' nakan ka to len yoo dii zoachech. Na' dill' li' che'na' nan ki: "Xanchona' nombi'e beŋ'ka' nak lall' nee." Na' lekzka' nan: "Nottezə beena' na nake' Crístona' txen, chiyal' yikwase' lawi dii mala'."

²⁰To loo yoo lill beŋ' wni'a aga chchine' shgal' dii nak de or wa de plat, san nchixgakan de yag len de yo. Bałan naki gana' chchine'n, na' bałan chonan llin gattez. ²¹Ka'kzan beena' chon daa chazlall' Chioza', saklebile' diika' nak de or wa de plat, na' zakee wchin Chioza'ne' gone' dii zan dii wen.

²²Bi gono' txen ni to dii malka' cheeni beli chenna' kat' zoan lo yel' wewaa. Na' ben to dii byen gako' beŋ' li' beŋ' shao', na' gonlilalloo Crístona', na' gakilo' beŋ', na' soaleno' bish' ljwello'ka' mbalaz, ka chon yog' beŋ'ka' nxi nyech yichjlalldoe'ka', beŋ'ka' choe'lwilgake' Xanchona'. ²³Bi wzenago' dill'ka' biz chon chna, dill'ka' bibi zak', la' ba nezkzilo' chxegakan wdil. ²⁴To beŋ' nłane' chone' xshin Xanchona' bi chiyal' wshagdile' beŋ', san chiyal' gonile' yog'loł beŋ' wen. Na' chonan byen gak wli' wsedile' beŋ', na' chiyal' gape' yel' chxenlall'. ²⁵Na' chiyal' we'lene' dill' xochi beŋ'ka' chzoshiyi' daa nak dill' li' daa chli' chsedile', na' gone' lez shicholə Chioza' gaklene' legake' kwenche yiyaj yilengakile' na' gombia'gake' daa nak dii li, ²⁶na' yiyeen yiyeenigakile' na' yilagake' lo ni'a na' dii xiwaa daa ntakw nchejan legake' daa chongake' ka cheenin.

3 Lekzka' chiyal' inezilo' dga: kat' ba zoa te che yell-lioni, dii zan dii nxoll gat'. ²La' beŋ' zan che to kwinzgake' segake' wneyi, na' lillinzi selall'gake' gat' kwe'gakile' mech, na' gakgake' beŋ' llalj na' beŋ' chep cha'lall'. Biz gon inagake' che Chioza', na' bi wzoagake' xtill' xaxneeka', ni bi we'gake' yel' choxken

ben' gaken legake', na' ni bi yoo yichj-gake' gongake' ka cheeni Chioza'. ³Na' bi yiyesh'lall'gakile' ben', ni bi si'xen che bish' ljwellgake', na' le chilh sangake' dill' che ben'. Na' bi sakgakile' inabia' kwingake', na' le yibagakile' wchi' wsak'gake' ben', na' gatzban-gakile' yog'loite daa nak wen. ⁴Gak-gake' ben' chop cho'a dill', na' ben' bibi nalli, na' gon kwingake' ben' choo ben' xen. Na' le yibachgakile' gongake' kon ka chzelall'gake' latjin dii nan gongake' ka cheeni Chioza'. ⁵La'kzi gonzgake' ka ben' le nxenilall' Chios, na' to kwinzgake' wli' wze chegake' nan bin' we'gake' latj wshaa Chioza' yichjlall'do'eka'.

Na' li' naa, bi chiyal' gono' ni to ben'ki txen. ⁶La' kan' nak ben' wxiye'ka' chda to to yoo, na' chziye'gake' noolka' bi nteyi, ben'ka' lall' lao saaxyana' na' chong-gake' biya dii mal. ⁷Noolki tlizi chzenag-gake' daa chli' chsedi nottezə ben' le-gake' na' biga llia chombia'gake' daa nak dii li. ⁸Ka ben ben'ka' le Janes na'ch Jambres, wzoshyi'gake' dii Moiséza', kan' chon ben'ki chsej chllongake' cheyi daa nak dii li daa nxinj nlen yichjlall'do'eka'. Na' bi nde ben'ki kwent lao Chioza' la'kzi nazgake' nonlilall'gake'ne'. ⁹Na' aga wgol daa chongake', la' yog' ben' gakbe'i nakgake' ben' bi yejni'alallii, ka gok che ben'ka' chop, ben'ka' wzoshyi' dii Moiséza'.

¹⁰Na' li', naa lla, ba nezgzilo' ka nak daa chli' chsedit', ka nsa' cha', ka nak daa lliallalaa gon', ka nonlilalaa Chioza', na' ka nak yel' chxenlallaa na' yel' chakina' nap', na' ka chtip lallaa kwenche chzo chzakid' yel' zak'zi'ki chtil'. ¹¹Na' nezilo' ka nak yel' zak'zi'ka' diika' ba bllagloa', ka diika' btil' Antioquiana', na' Icóniona', na'ch Lístrana'. La'kzi dii zan dii ba bllagloa', Xanchona' ba bisle' nad' lao yog'loiten. ¹²Dii li, yog'lo' ben'ka' cheengakile' gongake' ka cheeni Chioza' daa nakgake' txen Cristo Jesúza', wsak'zi'

ben' legake'. ¹³Na' ben' wen dii malka' len ben' wxiye'ka', zizikli gongake' mal, na' gaklelagakile' siye'chgage' ben' na' axt kwingake' ba chiyajle'gake' che yel' wxiye' che'ka'.

¹⁴Na' li', naa, wzoachech lawi daa ba nsedo' na' ba wyajli'o. La' nom-bia'kzo' ben'ka' bli' bsemi li'. ¹⁵Jadini kana' naktio' bi'do' nombi'o Cho'a Xtil' Chioza', na' lennan' gonan li' yel' sin'na' daa chsedin li' gonlilaloo Cristo Jesúza' kwenche yilo' na' bi kwiayoo. ¹⁶Kwin Chioza' bzajniile' dii ben'ka' bzej doxen Cho'a Xtilleena', na' zakaan wli' wsedin ben', wsheshlenen ben' bi chon wen, yigoon shli lall' ben' nakleji, na' wza-jniin ben' kwenche gake' ben' li ben' shao', ¹⁷kwenche beena' chon ka cheeni Chioza' zizikli gakchache' na' gak gone' yog' diika' nak wen.

4 Lao Chioza' na' lao Cristo Jesúza', beena' yiyede' inabi'e na' wchogloe' che to to ben', ka ben' ni mban na' ka ben' ba wit, chon dga lo no': ²Be'len ben' Cho'a Xtil' Chioza', na' toshiizi be-nan kat' de xlatjin gono'n, laa cheengakile' wzenaggake'n laa bi cheengakile'. Ben ka yiyakbe'i ben' nan ba bxinj blene', bsheshlen beena' bi zej shli, na' btip lall'gake' gongake' wen, na' wdap yel' chxenlall' chegake' na' bli' bsemi legake'. ³La' wllin lla kat' ben' yell-lioki bich gaklall'gake' wzenaggake' daa nak dii licha. Na' daa cheengakile' gongake' kon ka nan yichjlall'do'eka', yiyiljgake' wde wdeli ben'ka' chli' chsedi daa chiyoollall'gake' wzenaggake'. ⁴Na' yilaala'ogake' daa nak dii li na' wzenag-gake' bizə dill' gol. ⁵Per li', gokto lega ben' nyeen nyeeniya lao yog'loite dii chak, na' so sakilo' wtiloo yel' zak'zi'ka'. Ben ka dii le be' dill' wen dill' kob che Crístona', na' ben xshin Chioza' daa ba nak lall' no'.

⁶La' ba zoa witgake' nad' daa chon' xshin Crístona', na' ba zoa gaoshosh ll-

jazoalenee. ⁷Ba ben' ga zeelo bizoid', na' ba biyoll ben' daa ben Chioza' lo na' gon', na' toshiizi wzoachech' benlilalaane'. ⁸Na' naa ba chbez' llana' ikaa daa chidoḷaa daa ba ben' dii wenna'. Na' Xanchona', beena' chchoglo che ben' kon ka nakan, gone'n nad', na' aga toz nad', san len yog' ben'ka' do yichj do lall'gake' non-gake' lez llana' yiyede' sto shii.

⁹Ben to dii byen lii yidwiatezo' nad', ¹⁰la' Démaza', daa ngoo yichje' daa de yell-lioni, ba wchoonlallee nad' na' ba ziyaje' Tesalónica' na' Crescéntena' zeje' zji'e cho'a xtill' Chioza' Galáciana', na' Títona' zeje' Dalmáciana'. ¹¹Tochga Lúcazi zoalene' nad'. Jadilj Márcona' na' dalene' ni kwenche gaklene' nad' lo xshin Crístona'. ¹²Ba bselaa Tíquicon' Éfesona'. ¹³Kat'ka' tio' Tróaza' ikaasho' xachela' chdob' daa bkwaan' lill Cárpona'; na' lekzka' bex' librka', na' dii llialote goxoo libr de yidka'.

¹⁴Alejandro, ben' wichekw yana, le michian bene' cha', na' Xanchona' wi'ene' daa chidoḷee. ¹⁵Lekzka' li', wsako' ki

gone' cho' ka, la' le chakzbanile' daa chli' chsedicho.

¹⁶Dii nech ka bdegake' nad' lao ben'ka' chnabia' ni, ni to ben' bish'choka' bi goklengake' nad'; yog'zgake' wchoonlall'gake' nad'. Chnabid' Chioza' si'xene' chegake'. ¹⁷Per Xanchona' goklene' nad' wal kwenche bia' cho'a xtilleena' lao ben'ka' bin' gonlilall'gake'ne', na' bisle' nad' lao ye! wita'. ¹⁸Na' Xanchona' yisle' nad' lao yog'loḷ dii mal, na' lljazoalenee yabana' gana' chnabi'e. Len' chidoḷee sho'e balaan zejli kani. Kan' nakan.

¹⁹Bwapsha nad' chiox Priscana' len Aquílana', na' yog' ben' lle' loo yoo lill Onesíforona'. ²⁰Erástona' bigaane' Coríntona', na' bkwaana' Trófimona' Milétona' daa bi shawee. ²¹Btalalloo yido' ka zi' yizolo' dii zaga'. Eubúlioni, Pudénteni, Línioni, Cláudiani, na' yog'loḷ ben'ki nakcho txen nonlilall'cho Jesucrístona', chwapgake' li' chiox.

²²Xancho Jesucrístona' soalenshgue' li'. Na' gone' ka gak wen che yog'le.

Kart daa bzej Páblona' na' bseleen lao Títóna'

1 Nad' Pablo chzej' li', nak' wen llin che Chioza' na' nak' postl che Jesucristona', na' bselee nad' kwenche gaklen' ben'ka' ba wlej Chioza' gonlilall'gake'ne' na' gombia'gake' daa nak dii li daa chzajniin cho' goncho ka cheenile'. ²Na' zoachoncho lez to yel' mban zejli kaní. Kana' zi' wxe wsilte' yell-lioni, Chios, beena' biga chziye', bchebe' gone'n cho'. ³Na' naa ba bllin lla, Chioza', beena' chisla cho' kwenche bi kwiayi'cho, chzenile' yog' ben' cho'a xtilleena' daa bene' lall' na' chyixji'a, kon ka wne' gon'. ⁴Chzej' li', Tito, nako' ka dowalj xiin' daa nakcho toz chonlilall'cho Jesucristona'. Xacho Chioza' na' Jesucristona', beena' bisla cho' lao saaxya chechoka' kwenche bi kwiayi'cho, gaklenshgagake' li' na' gongake' ka so' mbalaz.

⁵Bkwaana' li' Crétana' kwenche wzeelo' koo xnezi daa bi biyollichon, na'ch kwejo' ben' koo lo na'gake' ben'ka' nakgake' txen nonlilall'gake' Crístona' to to yell, kon ka ba wnia' li' gono'. ⁶Beena' gak lall' nee ben'ka' nonlilall' Crístona' chiyal' wsa' che' wen kwenche bibi de ina ben' che', na' gake' ben' zoa toz xoolin, na' gonlilall' xiine'ka' Crístona', na' bi gakkakb' bi' mal ni bi' widenag kwenche bi wxa'gakkb' cho' alao ben'. ⁷Daa ngoo lall' nee xshin Chioza', chiyal' gake' dowalj ben' wen, ben' bibi de ina ben' che', na' bi gake' ben' chep cha'lall', ni bi gake' ben' lok, ni weezo, ni wishagdil, ni ben' wzelall'. ⁸San chiyal' wi'e ga yigaan ben', na' yibaile' gone' dii wen, na' gake' ben' nyeeen nyeeniyi, na' ben' nxi nyech, na' ben' chnabia' kwiniin. ⁹Chiyal' gonlene' xtill' Chioza' daa nak dii li daa ba nsede', kwenche wtipe' lall' ben' yoblə daa wli' wsedile' legake' daa nak dii li, na'

gone' ka shajle' ben'ka' nagake' aga kan' nakan.

¹⁰La' ben' zan inleeb ben' widenag zoa, ben' bizə chon chna, na' ben' chziye', na' zangake' nakgake' ben' Israel, ben'ka' na' yog'loŋte ben' byoka' chonlilall'gake' Crístona' chiyal' sho'gake' sen daa le circuncióon. ¹¹Ben'kan' bi chiyal' we'cho latj wli' wsedgakile' ben', la' daa chzelall'gake' gongake' gan mechan' chdagake' to to yoo chli' chsedgakile' daa bi nak shli, na' chonllejgakile' do bxoontegake'.

¹²To ben' Creta, ben' chneyaa, wne' che ben' wlall' che'ka': "Ben' Cretaki nakgake' ben' wxiye', ben' mal ga zeelo, ben' cheej chao ka nla' ka nte, na' ben' lia." ¹³Na' dii likzə ka nakannan'. Daan, bsheshlengake' ka chiyali kwenche shajni'gakile' daa nak dii li daa ba wyajle'gake', ¹⁴na' bich wzenaggake' che dill' golka' daa wdiljall' ben' Israelka', ni bi wzenaggake' daa nazə ben'ka' chzoa ka'lə daa nak dii li.

¹⁵Ben'ka' ba nxi nyech yichjlall'do'eka' lao Chioza', ni daa cheej chaogake' ni daa chox'gake' bi chsej chllonan' gak yichjlall'do'eka' dii nxi nyech. San ben'ka' nxinj yichjlall'do'eka' na' bi chajle'gake' che Crístona', bibi dii nxi nyech de lawe'ka', la' yichjlall'do'eka'ten lle' lla' dii mala', na' ni bi chao chdian legake' kat' chxinj chlengake'. ¹⁶Nazgake' nombia'gake' Chioza', per diika' chongake' chili'n laogake' bi nombia'gake'ne'. La' nakgake' ben' mal ga wdelawin, na' nakgake' ben' bi chzoa dill', na' biga gakkzə gongake' daa nak dii wen.

2 Na' li' naa, bli' bsedi ben' daa nak dii li. ²Bzajniin ben' golka' gaggake' ben' nsa' cheyin wen, ben' chidol' gap ben' legake' balaan, ben' nyeeen nyeeniyi, na' soachech'gake' gonlilall'gake' Crístona', na' gaggakile' ben', na' so sakgakile' bittez dii yen ile'gakile'. ³Lekzka' nool golka' chiyal' gall illebgake' Chioza',

na' bi gatzgake' ben' wıchtıj dıll', ni bi we'gake' latj gonzə yel' weezona' legake' gan, san chıyal' gongake' wen kwenche ile'i ben' ka chıyal' gongake'. ⁴Na' wli' wsedgakile' nool xkwıd'ka' gaki ben' che'ka' na' gaki xiıne'ka', ⁵na' gatzgake' ben' nyeen' nyeeniyi, ben' bi nda' nchen dii mal, na' gap wwıa loo yoo lıllgake', gatzgake' ben' chıyesh'lallıi, na' wlexj yıchjgake' lao ben' che'ka' kwenche kono ıne zban che xtıll' Chioza' ni chegake'.

⁶Na' lekzka' goll bi' wew'ka' gatzgakt' bi' nyeen' nyeeniyi. ⁷Li'yen'an chıyal' wli'o chono' wen lao yog'loıte daa chono'. Na' wsa' cho' bash bal kat' wli' wsedılo' ben' na' benan do yıchj do lalloo, ⁸na' wsako' wi'o dıll' kwenche bibi de ına ben' cheyin. Na' yido'i ben'ka' chakzbani cho' daa bibi de gon ınagake' checho.

⁹Bzani ben'ka' yoo xanin wlexj yıchjgake' lao xane'ka', na' gongake' ka yiyooll'gake', na' bi yıllıizgake' legake' dıll'. ¹⁰Na' bibi sı' kwangake' che xane'ka', san soa do lall'gake' kwenche wli'gake' lao yog'loı daa chongake' nan le wen nak cho'a xtıll' Chioza', beena' bısla cho' kwenche bi kwiayi'cho.

¹¹Chioza' ba bılıle' yog'loı ben' yel' goklen che'na' kwenche yılagake' na' bi kwiayi'gake'. ¹²Na' yel' goklenna' daa bene' checho chlı' chsedın cho' kwej yıchjcho daa bi nak wen na' diika' chzelall' belı chenna', na' soacho yell-lıoni nyeen' nyeeniyıcho, goncho ka chıyooll' Chioza', na' gall ıllıebchone', ¹³shlak noncho lez ıllın ılla choo ılla xenna' yıla' Jesucrıstona', beena' nak ben' choo ben' xen, na' nake' Chıos checho na' bıslıe' cho. ¹⁴Len' bzani yel' mban che'na' ni checho kwenche bısell' bılee cho' lao yog'loı dii mala', na' bıxıs bıyıbe' cho' kwenche gakcho lall' nee na' selall'cho goncho daa nak wen.

¹⁵Dgan chıyal' wli' wsedılo' ben', na' wtıpo' lall'gake' gongake' ka cheeni

Chioza', na' wsheshleno' ben'ka' bi chon wen, na' benan lega ben' nzoa Chioza'. Na' kono chıyal' gonzi lı' nakzi.

3 Bısalall'gake' wlexj yıchjgake' lao ben'ka' chnabia', na' gatzgake' ben' wızoa dıll', na' segake' wneyı gongake' daa nak wen. ²Bıbi gon ınazgake' che ben', san soalengake' ben' mbalaz na' gongakile' legake' wen, na' gatzgake' ben' gaxjıall' lao yog'loı ben'.

³Lekzka' cho', kana' gokcho ben' bi nteyi na' ben' bi bzoa dıll', na' gosh' wıall'cho lao dii mala', na' btakw bchej bıya diika' bıbayı belı chen chechona' cho', na' gokcho ben' xe'. Gokzbani ben' cho' na' gokzbani lıjwellcho ganga. ⁴Na' Chioza', beena' bısla cho' kwenche bi kwiayi'cho, bılıle' cho' yel' ben' wen che'na' len yel' chaki che'na'. ⁵Aga ınacho daa bencho dii wınan' bıslıe' cho', san daa bıyesh'lall'lıle' cho'n. Na' bıxıs bıyıbe' yıchjıall'do'chona' kwenche bıyakcho ben' wen, na' Espıritu Santo che'na' bıkobe' yel' mban chechona'. ⁶Na' daa wıt Jesucrıstona', beena' bısla cho', Chioza' bzoe' Espıritu Santo che'na' loo yıchjıall'do'chokı. ⁷Na' daa bıyesh'lallıle' cho', bıyone' cho' ben' ıı ben' shao' kwenche goncho lez ıkaacho yel' mbanna' nak zejlı kanı.

⁸Dıllıi nakan dii wxenlall'cho. Na' cheenıd' gono' to dii byen wli' wsedılo'n ben'ka' chajle' che Chioza' kwenche segake' wneyı gongake' wen. Diıkin nakgakan wen na' gaklenan yog' ben'. ⁹Bi gatzguedlenzo' ben' ni che cho'a dıll'ka' chıyljıall'gake', ni daa nazgake' ben dii xozxtoe'ka' daa bi chıyoll' chıdo, ni bi gatzkılılo' ben'ka' chakguedz ni che leya' daa bzej dii Moısıza'. La' bi chaklengakan ben' na' bıbi zak'gakan.

¹⁰Na' shı no chgoo ben'ka' dıll' kwenche gatzgake' choplə, chıyal' we'leno'ne' dıll' bıch gone' ka', na' shı ba gollo'ne' ka' to chop shıı na' bı chzenagkze', bkwaschokle' ka'la. ¹¹La'

nezicho to kwinzen' chlliayi' kwine' daa nxinj yichjlall'do'ena' na' chontie' dii mala'.

¹²Kat' wselaa Artémaza' wa Tíquiconá' gana' zo', ben to dii byen yidwio' nad' yell Nicópolisa', la' na' ba nchoglallaa lljsoa' shlak te beo'ka' chbe' dii zaga'.

¹³Goklengach ga zeelo gako' Zénaza', beena' nsed ley che Rómana', na'ch Apóloza'. Be'gake' daa chyallj chchingakile' kwenche koochgage' nez na' bibi

iyalljgakile'. ¹⁴Na' lekzka' ben'ka' nakcho toz chiya' sho'logake' gongake' daa nak wen na' gaklengake' ben' shi bi chyallj chchingakile' kwenche ka' wgongake' llin daa ba nsedgabe'.

¹⁵Yog'lol ben'ki zoalen nad' ni chwap-gake' li' chiox. Bwapgach chiox yog'lol ben'ka' lle' na', ben'ka' chakgakile' cho' daa nakcho txen chonlilal'cho Crístona'. Chioza' gaklenshgue' yog'lol-le. Ka' gakan.

Kart daa bzej Páblona' na' bseleen lao Filemónna'

1 Nad' Pablo, dia' lillyani daa chy-ixji'a xtill' Cristo Jesús'a, chzej' li' Filemón. Na' len ben' bish'cho Timotewi chwapnto' li' chiox, daa le chakinto' li', na' daa nakcho txen choncho xshin Chioza'. ²Na' lekzka' chwapnto' chiox ben' zanchó Ápiána', na' ben' bish'cho Arquípona', beena' nakcho txen chdil-lencho dii mala' daa choncho xshin Chioza', na' ben'ka' chdop chllag lillo'na' choe'la'ole Crístona'. ³Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁴Toshiizi kat' choe'llwill' Chioza' chjadinid' li' na' cho'ane' ye'l' choxken ni cho', ⁵la' ba nezid' ka nonlilalloo Xancho Jesucrístona' na' chakilo' yog' ben'ka' nak lall' na' Chioza'. ⁶Chñabid' Chioza' gaklene' li' gono' ka dii le we'leno' ben' cho'a xtilleena' daa ba wyajli'o kwenche shajni'chilo' kwasloj ka nak dii wenka' naki checho daa nakcho Crístona' txen. ⁷Ben' bish', chiba chizakid' daa chakilo' bish' ljwello'ka', na' dii xen chtipan lallaa, la' nezid' chtipo' lall' ben'ka' nak lall' na' Chioza'.

⁸Na' daan, la'kzi nap' ye'l' wñabia'na' ben' Crístona', na' wak gon' byen inia' li' daa chiya'l' gono', she'l'ka', ⁹chakid' wendlan gat'yoid' li' gono' daa cheenid' daa chaki ljwellcho. Nad' Pablo ba nak' ben' gol na' dia' lillyani daa chyixji'a xtill' Cristo Jesús'a, ¹⁰chñabid' li' to goklen che Onésimoni, beeni nak ka xiin' daa be'lenee xtill' Crístona' shlak dia' lillyani.

¹¹Kana' wzoalene' li' bi bene' ka dii le gone' xshino'na', san naa wak gaklene' li' ka chaklene' nad'. ¹²Na' chiselaane'

lawo'na', la'kzi le chakyeshii lall'dawaani yizee daa chachgaidee. Na' li' naa, bilebshe', kon gakilo' nad'kzan' chilebo'. ¹³Goklallaa wkwaana'ne' gaklene' nad' lo xlatjo' shlak dia' lillyani ni che dill' wen dill' kob che Crístona'. ¹⁴Per bi goklallaa wkwaana'ne' shi bi wchegaxjo', kwenche ye'l' goklen daa gono' cha' bi gonyaadiazo'n, san gono'n do yichj do lalloo. ¹⁵Shi bizee lillo'na' shloll kwenche naa gake' lall' no' toshiizi. ¹⁶Na' bich gake' to ben' ndoo lla yel chone' xshin ben' san gake' ben' bishoo, ben' gakilo'. Nad' le chakidee, na' li' chiya'l' gakchilo'ne' aga ka bish' ljwellzo', san ka dowalj ben' bishoo daa nakle toz nonlilall'le Xancho Jesucrístona'.

¹⁷Na' shi nako' nad' txen lo xshin Crístona', bilebshe', kon gakilo' nad'kzan' chlebo'. ¹⁸Na' shi bi bene' cho' wa shi bi chbaguee cho', na' wchixjo'n nad'. ¹⁹Kwin nad', Pablo chzej' dga, na' nia' li': Nad' chixjaan. Na' bi nia' li' lekzka' chbagoo cha' daa ba napo' ye'l' mban zejli kani. ²⁰Ben' bish', chñabid' li' ye'l' goklenni daa chakicho Xancho Jesucrístona'. Ben ka soa' mbalaz daa nakcho toz nxenilall'cho Crístona'.

²¹Chzej' li' daa nezid' nako' ben' wizoa dill', na' nezid' axt dii xenchlo gono' aga ka daa chñabid' li'. ²²Na' lekzka' nia' li', beshao'sha gana' soa', la' daa choe'llwill' le Chioza' ni cha', non' lez yichej' ni na' wi'e latj yidwia' le'.

²³Chwap Epáfrazi li' chiox, beeni nak' txen dento' lillyani ni che xtill' Cristo Jesús'a. ²⁴Na' lekzka' Márconi, Aristárconi, Démazi, na'ch Lúcazi, ben'ki chaklen nad' lo xshin Chioza', chwapgake' li' chiox.

²⁵Xancho Jesucrístona' soalenshgue' le' na' gaklene' le'.

**Kart daa bsel' to ben' lao
ben' hebreoka', ben'ka'
nonlilall' Jesucristona'**

1 Kani'yi zan shii Chioza' bchine' dii ben'ka' wdixjee daa golle' legake' na' aga toz ka bchine' to toe' kwenche be'lene' dii xozxto'choka' dill'. ²Na' naa ba zoa te che yell-lioni, Chioza' bselee Xiin'e'na' be'lene' cho' cho'a xtilleena', na' len' nzo'e' gak lall' nee yog'te dii de, na' lekzen' bene' yabana' len yell-lioni, diika' bllia Chioza' bia' gak.

³Len' chli'e' ka ben' choo ben' xen in-leb nak Chioza', na' chli'e' ka nakyen' Xe' Chioza'. Na' len' chone' kwenche yabana' len yell-lioni na' yog'lo' diika' lle' lla' lawinka' chongakan kon ka bllie' bia' gongakan daa nape' ye' wak kwenche chak kon ka ne'. Na' len' bixis biyibe' yichjlall'do'chona' ka bikwase' saaxya chechoka', na' biyolla' biyep'e' yabana' gana' chi'e' shlaa de shli che Xe' Chioza', beena' nak ben' choo ben' xen, na' chnabia'lene'ne'.

⁴Na' daa bene' dga, bli'e' nake' ben' zak'chi aga ka anjlka', na' lekzka' daa goll Chioza'ne' "Xiin'", nakbia' nake' ben' zak'chi aga ka legake'. ⁵La' Chioza' biga golle' ni to anjlka' ka dga golle' Xiin'e'na': Li' nako' Xiin', na' naa daa solo inabi'o inezi ben' nadaan nak' Xo'.

Na' ni to anjlka' bi golle':

Nad' gak' Xo',

na' li' gako' Xiin'.

⁶Na' lekzka' ka bsel' Chioza' Xiine'na', beena' nak tlish' tyaj, lo yell-lioni, wne': We'la'oshga yog'lo' anjl cha'ka' le'.

⁷Na' Cho'a Xtill' Chioza' cho'en dill' che anjlka', nan:

Chone' anjl che'ka' ben'ka' chon xshine'na',

ka be' na' ka bel' yi'.

⁸San che Xiin' Chioza' nan:

Li' nako' Chios na' inabi'o zejli kani.

Na' ye' wnabia' cho'na' nakan dii zej shli. ⁹Chibailo' ye' li ye' shawaa na' chwiilo' daa nak mal.

Daan Chioza', beena' nak Chios cho', ba bzoe' li' kwenche inabi'o, na' ba bene' ka soacho' mbalaztech aga ka ben'ka' nako' txen.

¹⁰Na' lekzka' nan:

Lin' nako' Chios, na' lin' bxe bsilo' yell-lioni ka wzolon, na' li'kzan bxe bsilo' yabana'.

¹¹Yog' diika' te chegakin, san li' zoakzo' zejli kani.

Na' yog' diika' yiyigakan ka chiyi to xalaan ben'.

¹²Na' yikwasgako'n,

na' yikobgako'n ka to ben' chikob xalaane'.

San li', toz ka zo' zejli kani;

biga llia te cho'.

¹³Ni shlin bin' ye' Chioza' ni to anjl che'ka':

Wche' kwit' de shli ni, shlak wzoa' xni'ona' ben'ka' chakzbani li'.

¹⁴San yog' anjlka' nakgake' wen llin che Chioza', na' chselee legake' chaklengake' cho' nakcho ben' yisle' kwenche bi kwiayi'cho.

2 Daan, chonan byen wzenagchcho do yichj do lall'cho dill' wen dill' koba' daa ba benicho kwenche bi laacho lo xneze'na'. ²La' diika' bllia Chioza' bia' goncho, diika' wdixjee anjlka', gogkakan to dii zakii, na' yog' ben'ka' wdishj-gake' cho'a xtilleena' na' bi bzenaggake'n wxak'zi'gake' kon ka chiyal' gak che-gake'. ³Alechlə naa aga wilacho lao ye' zak'zi'na' shi gonicho nakzi daa nak to dii zakii nleb daa ba ben Chioza' checho kwenche yisle' cho' na' bi kwiayi'cho? Zigaate Xancho Jesús'a' wdixji'e' daa yisle' cho', na'tech ben'ka' bzenag che' bizchop-gake' dillaa bi'e. ⁴Na' lekzka' Chioza' bli'e nan nakan dii li daa bene' ka ben ben'ka' dii zan ye' wak na' dii chon ka chibani-

cho, na' bselee Espíritu Santo che'na' bene' wde wdeli dii gag gon to tocho kon ka chaklall' Chioza'.

⁵ Aga bllia Chioza' bia' inabia' anjlka' lo yell-lío koba' daa ba ngwee xnezin gone', dga cho'a dill' cheyin naa. ⁶ San nakan ka wna to ben' bzej Cho'a Xtill' Chioza' kani'yi daa na:

¿Nora naknto', neto' ben' yell-lío, chi' yichjzo' neto',
na' zezo' wneyi che neto' naknto' xiin benech?

⁷ Zi lat'zə ki beno' neto' ka anjl cho'ka', na' nono' neto' to balaan xen wal. Na' bzo' neto' inabia'nto' lao yog'te diika' beno'.

⁸ Na' beno' yog'lolten lall' na'nto'. Na' daa bene' lall' na' ben' yell-lioni yog'lol dii de, zejín aga bi de dii bi gag lall' na'cho, la'kzi naa bin' ile'icho gag yog'lol dii de lall' na'cho. ⁹ Per nezi-cho Jesúsza' ba yo'e to balaan xen wal, la'kzi bi bllin sakee ka anjlka' shlak wde' lo yell-lioni goke' benech kwenche wxak'zi'e na' wite' ni checho. La' daa nak Chioza' ben' wenan, bzanile'ne' ble'ile' ye' wita' lo laz yog'lol ben'.

¹⁰ Dii li, Chioza', beena' bxe bsil yog'lolte dii de na' nakgakan che', cheenile' ben' be ben' zil gaggake' xiine' kwenche yichi'e legake' gana' de balaan xen che'na'. Daan, benan byen bzanile' Jesúsza' wxak'zi'e na' wite' kwenche bisle' cho'. Na' ka', biyoll bido bene' yog'lol daa nllia Chioza' bia' gone'. ¹¹ Jesúsza', beena' ba bixis biyibe' cho', na' cho' ba bixi biyechcho, toz Xachon nak. Daan, bi chiyi Jesucristona' ine' nakcho bish' ljwelle'. ¹² Na' chi'e Chioza':
Wi'a dill' cho' lao bish' ljwell'ka',
na' gol' inia' li' ladj ben'ka' chdop chllag
choe'la'ogake' li'.

¹³ Na' wizne':

Nad' wxenilallaa Chioza'.

Na' sto shii chi'e:

Ni zoalen' ben'ki nak xiin Chioza', ben'ki bene' lall' na'.

¹⁴ Na' daa nak xiine'ka' ben' de beli chen, lekzka' Jesúsza' golje' goke' ben' de beli chen kwenche wite' ni checho. Na' ka wite', bsol bnite' ye' wñabia' che dii xiwaa daa gok lall' na' yin wllia-ayi'n ben'. ¹⁵ Na' bisle' cho' ben' yell-lío, cho' nakcho ka ben' ndoo lao ye' wita' shlak mbancho daa chlebcho guetcho. ¹⁶ La' dii li, aga bid Jesúsza' kwenche gaklene' anjllan', san kwenche gaklene' xiin dia che dii Abrahaman'. ¹⁷ Daan, benan byen goke' ben' de beli chen doxen ka nakcho, cho' bish' ljwelle', kwenche yiyesh'lallile' cho' na' soe' gone' ka ben Chioza' lo nee gone' daa nake' bxo'z choo bxo'z xen checho. Na' bzani kwine' wite' kwenche bizi'xen Chioza' saaxya chechoka'. ¹⁸ Na' daa bizo bizakile' btil'e' daa nan kooyelaan le' bi gone' ka cheeni Chioza', wak gaklene' cho' kat' za' daa cheenin kooyelaan cho' goncho daa bi chazlall' Chioza'.

3 Na' naa, le' ben' bish' na' le' ben' zan', le' ba nxi nyech yichjlall'do'lena' na' ba gox wñab Chioza' le' kwenche nakle lall' nee, li se wneyi ka nak daa ben Cristo Jesúsza', beena' choe'cho dill' nonlilall'chone'. Nake' beena' bsel' Chioza' na' naktie' bxo'z choo bxo'z xen checho. ² Len' bene' yog'lol daa goll Chioza'ne', kon ka ben dii Moiséza' ladj ben'ka' nak yell che Chioza'. ³ Na' chidol'ch Jesúsza' balaan xench aga ka dii Moiséza', ka chak che to ben' chone' to yoo chooche' balaan xench aga ka yoonaa daa bene'. ⁴ Yog'z yoo zoa ben' bene'n, per Chioza' nake' beena' ben yog'lolte dii de. ⁵ Dii Moiséza', beena' gok wen llin che Chioza', bene' yog'lol diika' golle' gone' ladj ben'ka' nak yell che Chioza'. Na' diika' bene' chaklenen kwenche shajniicho diika' zi' we' Chioza' dill' cheyin. ⁶ Per Cristona', beena' nak Xiin Chioza', lekzka' bene' yog'lol diika' golle'ne', na'

ngoo lall' nee ben'ka' nak lall' na' Chioza'. Na' chon', nakcho lall' na' Chioza' shi soachehcho gonlilall'chone' na' yibai-cho daa noncho lez lljazoalenchone'.

⁷Daan, Espiritu Sántona' wne':

Shi chenile daa na Chioza' naanlla,

⁸bi gakle ben' lall'do' wal ka gok dii xozxto'leka'

na' bshaagake' Chioza' daa bi wya-
jle'gake' gone' ka bchebe'

kana' wdagake' gana' bibi chashj chleb.

⁹Na' wna Chioza': Kana' dii xozxto'leka' gokgake' ben' widenag daa bi wyajlegake' gon' daa bcheb' gon' chegake',

la'kzi choa yiz ble'gakile' diika' ben' chegake'.

¹⁰Daan, bllaa legake',

na' wnia': "Toshiizi chongake' kon ka nazan chegake',

na' bi chzenaggake' cha'."

¹¹Daan, lo ye! chllaa cha'na' bcheb', wnia':

Nezganw wi'a latj gaki chegake' ye!
wixi'lall' cha'na'.

¹²Le' ben' bish' na' le' ben' zan', li wsak' kwenche ni tole bi xinjz yichjlall'do'lena' na' gonan ka bich shajle'le na' yilaala'ole Chios yaa Chios banna'. ¹³San li wtip lall' ljwell-le yog' lla shlak naa ni de latj wzenagle che Chioza', kwenche bi siye' dii mala' le' na' yiyonan le' lall'do' wal. ¹⁴Nakkzcho Cristona' txen shi shnon mbancho soachehcho wxenilall'chone' kon ka wzoacho kana' zi' bxenilall'chone'.

¹⁵Kon ka na Cho'a Xtill' Chioza':

Shi chenile daa na Chioza' naanlla,

bi gakle lall'do' wal ka gok dii xozxto'leka' kana' wdagake' gana' bibi chashj chleb, kana' biyechj bibiitezgake' Chioza'.

¹⁶¿Nora ben'ka' beni daa goll Chioza' na' biyechj bibiitezgake'ne', lla? Yog' ben'ka' bibej dii Moiséza' Egíptonan' ben ka'.

¹⁷Na' ¿nora ben'ka' bllaa Chioza' choa

yiz, lla? Ben'ka' bxinj bñenan, ben'ka' wit gana' bibi chashj chleb. ¹⁸Na' ¿nora ben'ka' wna Chioza' chegake' bat ll-jazi'lall'gake' lo yell-liona' bchebe' wi'e legake', lla? Legaken' ben'ka' gok ben' widenag lawe'na'. ¹⁹Na' nezicho bi gok yillingake' gana' yizi'lall'gake' daa bi wyajle'gake' che'.

4 Daan, shlak ni de latj idolicho ye!
wixi'lallaa daa ba bcheb Chioza' gone' cho', chiyal' goncho byen kwenche idol' illonichon na' ni tocho bi igaanz-cho ka'z. ²La' cho' ba benicho dill' wen dill' kob che Chioza', ka daa beni dii xozxto'choka'. Per la'kzi bengakile'n, bi goklenan legake' daa bi wyajle'gake' cheyin. ³San cho' ba wyajle'cho cheyin ba nakten gon Chioza' cho' ye!
wixi'lallaa daa bllonile' ben'ka' kana' wne':

Daa bllaa legake' na' wnia':

nezganw wi'a latj gaki chegake' ye!
wixi'lall' cha'na'.

Per ka nak Chioza', wzoloe' chizi'lallee ka biyoll bxe bsile' yell-lioni. ⁴La' Cho'a Xtilleena' cho'en dill' che lla gall llana', gana' nan:

Ka bllin lla gall llayina', ba biyoll ben Chioza' yog'lo! daa bene', na' bizi'lallee.

⁵Na' lezkza' cho'en dill' kana' wne':

Nezganw wi'a latj gaki chegake' ye!
wixi'lall' cha'na'.

⁶Per ni de latj gat' to ye! wixi'lall' che zi bal ben' cheeni, la' ben'ka' bengakile' dii nech dill' wen che Chioza' bi gok yillingake' gana' yizi'lall'gake' daa bi bzenaggake' che'. ⁷Daan, bllia Chioza' bia' che sto lla, na' wde zan yiz wnie' dii Davina' kwenche wi'e dill' che llani naa, na' wne':

Shi chenile daa na Chioza' naanlla,

bi gakle lall'do' wal.

⁸She! dii Josuéna' bene' ka yizi'lall' dii xozxto'choka' ka bcheb Chioza' gone' chegake', aga bllia Chioza' bia' sto lla

yoblə gat' yeł' wixi'lall', shel'ka'. ⁹Daan, nezicho ni de latj idol' ben'ka' nak lall' na' Chioza' yeł' wixi'lall' che'na'. ¹⁰La' beena' ba bdoli yeł' wixi'lallaa daa bcheb Chioza', ba chizi'lallee ka bizi'lall' Chioza' kana' biyoll bxe bsile' yog'loł dii de. ¹¹Na' cho' chiyal' goncho byen idoli-cho yeł' wixi'lallaa daa bcheb Chioza' kwenche ni tocho bi gakcho ben' wide-nag ka gok ben'ka' kani'yi.

¹²Na' cho'a xtill' Chioza' nsa'n yeł' mban na' yeł' wak, na' nakan ka to dii chhogch aga ka to spad dii nlatit chop laa. La' chazan ga zeelo loo yichjlall'do'chona'. Na' chli'n lao daa chza'lall'cho loo yichjlall'do'chona' shi nakan wen wa shi nakan mal. ¹³Ni to diika' bxe bsil Chioza' bi ngashaan lawe'na'. Yog'lołte nez nle'i beena' yizi'e cho' kwent.

¹⁴Jesús, Xiin Chioza', beena' billin yabana', nake' bxož choo bxož xen checho, na' daan chiyal' soachechcho gonilall'cho beena' choe'cho xtilliinna'.

¹⁵Na' bxož choo bxož xen chechona' chiyesh'lallile' cho' daa nakcho ben' yell-liož, la' lekzka' btile' daa nan kooyelaan le' wxinj wlene' ka chak checho, per le', wzo wzakile' bi bxinj blene'.

¹⁶Daan, do lall'cho chiyal' ibig'cho xni'a Chioza', beena' chnabia' na' nake' ben' chiyesh'lallii, kwenche yizi'xene' checho na' gaklene' cho' kat' bittež dii chak checho.

5 Chioza' chbeje' yog' bxož choo bxož xenka' ladj ben' Israelka', na' chzoe'ne' kwenche inabe' gaklene' ben' wlall che'ka' na' lljwee lawe'na' yog' daa chzangakile', na' chite' bayix'ka' kwenche chizi'xen Chioza' saaxya che'ka'. ²Na' beena' nak bxož choo bxož xen nape' yeł' chxenlall' che ben'ka' chxinj chlen daa bi ntegakile', la' lekzka' zoe' dii nxoll wxinj wlene' daa nake' ben' de beli chen. ³Daan, chonan byen chite' bayix'ka' kwenche yizi'xen Chioza'

saaxya che'na', na' ka'kz chone' che ben' wlall che'ka'.

⁴Na' kono chzoa kwinin gake' bxož choo bxož xen tobialoze', san Chiozan' chbeje' beena' gak bxož choo bxož xen che', ka bene' che dii Aarónna'. ⁵Na' lekzka' Crístona', aga tobialozen' ben kwine' bxož choo bxož xen, san Chiozan' wlo'ene' balaan daa bzoe'ne' nake' bxož choo bxož xen. Na' kwine' golle'ne':

Li' nako' Xiin',
na' naa daa solo inabi'o inezi ben' nad' nak' Xo'.

⁶Na' lekzka' Cho'a Xtill' Chioza' nan:

Li' nako' bxož zejli kani,
ka bxož Melquisedeca'.

⁷Na' Crístona', shlak wbane' yell-lioni, wchelle' na' wnie' zilljə, wnabile' Chioza', beena' nap yeł' wak kwenche yisle'ne' lao yeł' wita', na' daa goke' ben' wizoa dill', Chioza' bzenague' che'. ⁸Na' la'kzi goke' Xiin Chios, diika' bllagloe' benan ka wyajniile' daa nak yeł' wizoa dill'. ⁹Na' ka', biyoll bido goke' ka chiyal' gake' kwenche wi'e yeł' mban daa bi te cheyin ben'ka' chzoa xtillena'. ¹⁰Na' Chioza' bzoe'ne' goke' bxož choo bxož xen ka gok Melquisedeca'.

¹¹Dii zanch de dii we'len' le' dill' che diiki ba wnia', per chonan lallj wzajni-ida'n le' daa bi chonle ka dii le. ¹²Naa ba gok ssha nombia'le cho'a xtill' Chioza', len' ba chiyal' wli' wsedilen ben' yoblə, shel'ka'. Per le'lə ni chyalljzile no wza-jni'chi le' diika' bi chontek lallj shajni-ile che cho'a xtill' Chioza' daa ba bsedle. Ni chonzle ka bi'do' ni chall' na' bin' gak gaob' yeł' wao. ¹³Na' nottež ben' bin' shajniile' bi daa nak wen na' bi daa nak mal nake' ka bi'do' ni chall'. ¹⁴San ben'ka' chzoachech chzenaggake' che Chioza', chakbe'gakile' daa nak wen na' daa nak mal. Legaken' nakgake' ka ben' ba cheej chao yeł' wao, aga ka bi'do'na' ni chall'.

6 Daan, chiyal' goncho ka dii le gakchachcho lo xnez Crístona', na' bi

yiyechej yibiilenzcho diika' ba nezkzicho: ka daa chiya' chilenicho dii malka' bencho daa nsa' ye'l' wit, daa gonlilall'cho Chioza', ² daa chchoa be'n' nis, daa chxoa na'choka' yichj be'n' kat' chnabcho gaklen Chioza'ne', daa yiban be'n' ladj be'n' wetka', na' daa wchoglo Chioza' che be'n' ga idol' to toe' zejli kani. ³ Chioza' gaklene' cho' kwenche goncho ka dii le gakchacho.

⁴ Ben'ka' ba yoo beeni' che Chioza' loo yichjlall'do'eka', na' ba bnix' bliagake' dii wenna' cho'e ben'ka' nak lall' nee, na' zoalen Espiritu Sántona' legake', ⁵ na' ba bnix' bliagake' dill' wen che Chioza' na' ye'l' wak che'na' daa yiyoll' yido ile'icho kat' illin llana', ⁶ shi yilaala'ogake' lo xnez Chioza', bich inan' yiyaj yilengakile' sto shii. La' lengake' ba chongake' ka ben be'n'ka' betgake' Xiin' Chioza' lee yag cruza' na' chsi'gake'ne' ye'l' zto' ladj lkwe' be'n'. ⁷ Benecha' zaklebile' to yellio dii chiyaalli kat' cheejan nis yeja' daa chxop zekizezi lawinna'. Shi nakan yellio wen, beena' chaz chaan' yitope' daa yeej gawe' lawinna', na' Chioza' gone' ka gashj ilebchan dii wenka'. ⁸ San shi chashj chlebzan no yag yesh' na' no yag ley, aga bi zakii yell-liona' na' chishj Chioza' bia' blag' cheyin na' wzey wtie'n.

⁹ Na' le' be'n' bish'dawaa na' le' be'n' zandawaa, la'kzi ba wnia' ka', nezid' kwasol' gonle wen lega be'n' ba bisla Chioza'. ¹⁰ Na' Chioza' nake' be'n' li be'n' shao', na' bi gal-lallee dii wenka' ba benle na' daa ba bli'le chakilene' daa goklenle be'n'ka' naklenle lall' nee, kon ka ni chonle naa. ¹¹ Na' cheenid' to tole soale gonchle wen do yichj do lall'le shnon mbanle, kwenche gak chele ka ba nonle lez. ¹² Bi gakle be'n' lia, san li gonto ka ba chon be'n'ka' zoatezi zoagake' chonlilall'gake' Chioza' na' chzi'gake' banez daa bchebe' wi'e legake'.

¹³ Ka bcheb Chioza' gone' wen che dii Abrahama', bzoa kwine' de taschiw gone' ka bchebe', la' koch no zoa be'n' zak'chi ka le' wzoe' de taschiw. ¹⁴ Na' golle: "Dii li gonleey' li' na' gon' ka shesh shan xiin' dia cho'ka'." ¹⁵ Na' dii Abrahama' wdape' ye'l' chxenlall' wleze' axt ki bllin lla gok ka bcheb Chioza' gone' che'. ¹⁶ Kat'ka' be'n' yell-lioki chchebgake' to dii gongake', chzoagake' to be'n' zak'chi ka legake' kwenche chakbal daa chchebgake', na' len chonan ka shajle' be'n' chegake'. ¹⁷ Na' ka'kzə Chioza', goklallee inezi be'n'ka' ikaa dii wenna' zi' gone' nan aga wde daa bchebe', san dii li, gonkze' ka wne'. Daan, bzoa kwine' de taschiw. ¹⁸ Na' ka nak daa bchebe' gone' len daa bzoa kwine' de taschiw zejlin aga wishee daa wne' gone', ni bi chziyee. Na' daa nezicho dga, chtipan lall'cho, cho' ba wbig'cho lawe'na' na' ba nxenilall'cho gone' ka ba bchebe'. ¹⁹ Ka chak che barkwa' chchinan to dii chbekwan daa tozga, kan' chon daa ba noncho lez Cristona', chaklenan cho' chajle'chacho na' bi gak choplall'cho. Loo lill xlatj Chioza' wze lechaa daa bkwashaan latja' gana' wzoe' na' bi gok sho'gake', san cho' ba noncho lez sho'cho ²⁰ gana' ba wyoo Jesúza' na' chnabe' checho, cho' zi' yillincho na'. Na' nake' bxoz choo bxoz xen checho zejli kani ka bxoz Melquisedeca'.

7 Melquisedeca' goke' be'n' wnabia' che yella' le Salem na' goke' bxoz che Chioza', beena' liizelozzi nak be'n' choo be'n' xen. Na' ka ziza' dii Abrahama' lo wdila' gana' bene' gan be'n' wnabia'ka', jatil Melquisedeca' le' na' wnabe' ka gak wen che'. ² Na' dii Abrahama' bene' shi kwen yog' diika' bikee che be'n' wnabia'ka' lo wdila' na' wleje' tkwenan' bi'en Melquisedeca'. Na' Melquisedec zejin Be'n' wnabia' be'n' chon daa nak

¹⁷7:2 Bene' shi kwen yog' diika'...na' wleje' tkwenan: Literalmente la décima parte.

shlichá. Na' lekzka' nake' ben' wñabia' che yell Salema', na' zejín ben' wñabia', beena' chon ka soalen ljjwellin mbalaz. ³Kono ñezi no gok xaxnee ni no gok dii xoxzto'e, ni kono ñezi bat golje' na' bat wite'. Daan nake' b̄xoz zejli kani ka nak Xiin Chioza'.

⁴Li wwia ka ben' zakii nleb gok Melquisedeca', la' kwin dii xoxzto'cho Abrahamá' bi'ene' tkwen che de shi kwen che yog' diika' bikee che ben'ka' bene' gan lo wdila'. ⁵Ley che dii Moiséza' nan ben'ka' nak xiin dia che dii Levína', ben'ka' nak b̄xoz, chiyal' ikaagake' tkwen che de shi kwen che yog' daa chon to to ben' wlall che'ka' gan, ben'ka' nak bish' ljjwllgake', la'kzi lengake' nakgake' xiin dia che dii Abrahamá'. ⁶Per Melquisedeca', la'kzi bi goke' dia che dii Levína', dii Abrahamá' bi'ene' tkwen de shi kwen che yog' diika' bikee che ben'ka' bene' gan lo wdila'. Na' Melquisedeca' wñabe' gak wen che dii Abrahamá', beena' b̄cheb Chioza' shesh shan xiin dia che'na' na' gaki che' yell-liona' gana' wzoe'. ⁷Na' ñezicho kwasloj beena' chñabe' ka gak wen che ben', nakche' ben' zak'chi aga ka beena' chñab gak wen che'. ⁸Na' ka nak b̄xozka' chkaa tkwen che de shi kwen che yog' diika' chat' chbe' che ben' wlall che'ka', nakgake' ben' chet. San che b̄xoz Melquisedeca', Cho'a Xtill' Chioza' cho'en dill' mbane' toshiizi. ⁹Na' b̄xozka', ben'ka' chkaagake' tkwen che de shi kwen che yog' diika' chon ben' wlall che'ka' gan, nakgake' xiin dia che dii Levína', na' wak inacho lenkzgaken' be'gake' Melquisedeca' daa be' dii Abrahamá' le', ¹⁰la' kana' jatil' Melquisedeca' dii Abrahamá', ba nakkzan galj dii Levína' na' gake' xiin dia che dii Abrahamá'.

¹¹Chioza' wleje' dii Aarónna', beena' nak xiin dia che dii Levína', gake' b̄xoz kana' bi'e dii xoxzto'choka' ley che'na'. Per b̄xozka' wzoa lo dia che dii Aarónna'

bi gok yiyongake' cho' ben' li ben' shao' lao Chioza'. Daan, benan byen soa sto b̄xoz yoblə, beena' gak ka b̄xoz Melquisedeca'. ¹²Na' kwenche to ben' bi nak xiin dia che dii Levína' gake' b̄xoz, lekzka' chonan byen yilla' leya'. ¹³La' b̄xoz chechona', beena' choe' Cho'a Xtill' Chioza' xtillee, aga golje' lo dia che dii Levína', san golje' lo dia che dii Judána', beena' konon b̄xoz ichej lo dia che'na'. ¹⁴Ñezteicho kwasloj Xancho Jesúsza' golje' lo dia che dii Judána', na' Moiséza' bi bzetje' dia che Judána' ka bi'e dill' no xiin dia cheyin gak b̄xoz.

¹⁵Wyajni'chicho dga ba wnia' shi ichej to b̄xoz kob, beena' gak ka b̄xoz Melquisedeca', ¹⁶to ben' bi nake' b̄xoz daa golje' lo dia che dii Levína' kon ka wna leya', san nake' b̄xoz daa bibi de dii gak wlliyai'n ye' mban che'na'. ¹⁷La' ki wna Chioza' che':

Li' nako' b̄xoz zejli kani,
ka b̄xoz Melquisedeca'.

¹⁸Na' daa golle' ka', zejín ba wde che leya' daa bi gok gaklenan ben'. ¹⁹La' leya' bi gok yiyonan cho' ben' li ben' shao' lao Chioza', na' bich chiyal' goncho lez gaklenan cho'. San goncho lez beena' ba bzoa Chioza' yiyone' cho' ben' li ben' shao', na' ka' gak ibig'cho lawe'na'.

²⁰Na' Chioza' bzoa kwine' de taschiw ka b̄chebe' gone' ka'. Ka wleje' ben'ka' nak xiin dia che dii Levína' gaggake' b̄xoz bi bzoa kwine' de taschiw gaggake' b̄xoz toshiizi. ²¹Per ka nak Xancho Jesúsza', Chioza' bzoa kwine' de taschiw ka b̄chebe' wzoe'ne' gake' b̄xoz, la' cho'a xtilleena' cho'en dill' chi'ene':

Nad' Chios ba bzoa' kwin' de taschiw na' aga wiyajid' cheyi dga nia':

“Li' nako' b̄xoz zejli kani,
ka b̄xoz Melquisedeca'.”

²²Na' daa bzoa' Jesúsza' nake' b̄xoz zejli kani, nxenlall'cho gon Chioza' checho sto dii wentech aga ka daa b̄chebe' gone' dii nech. ²³Ben' zan ba gok b̄xoz choo

b̄xoz xen, la' daa chetgake' benan byen yizoa lwaagake'. ²⁴San ka nak Jesúza', daa mbane' zejli kani, nake' b̄xoz choo b̄xoz xen toshiizi. ²⁵Daan, wak yisle' cho' toshiizi, la' daa nonlilall'chone' wak ibig'cho lao Chioza', la' len' zoe' toshiizi chnabe' gaklen Chioza' cho'.

²⁶Na' Jesúza', leyen'en' beena' chyalljicho gake' b̄xoz choo b̄xoz xen checho. Nake' ben' nxi nych, ben' bibi saaxya bene', ben' bi nda' nchene' ni to dii mal, ben' bi wlall' lao dii mala' chon ben' saaxyaka', na' biyepé' jazoe' yabana' gana' chgoogake'ne' balaañ. ²⁷Na' bi chone' ka ben b̄xoz choo b̄xoz xenka', ben'ka' benan byen betgake' bayix'ka' yog' lla na' bzeygake'b lao Chioza' kwenche zigaate legake' chiyakxen saaxya daa chongake', na' lekzka' betgake' bayix'ka' kwenche chiyakxen saaxya che ben' wlall' che'ka'. San Jesúza', shlin shlaxjzan bzani kwine' wite' ni che saaxya chechoka', na' daa bene' shlinz chonan llin zejli kani. ²⁸Ley che dii Moiséza' bzoan ben' goke' b̄xoz choo b̄xoz xen la'kzi bi gokgake' dowalj ben' wen. Per ka ba gok ssha chon b̄xozka' llin, Chioza' wne' wzoe' Xiine'na', beena' toshiizi nak dowalj ben' wen, gake' b̄xoz choo b̄xoz xen, na' bzoa kwine' de taschiw gak ka wne'.

8 Dga nak dii llialach lao diiki cho'a dill' cheyin: b̄xoz choo b̄xoz xen chechona' zoe' zejli kani na' ba chi'e shlaa de shli che Chioza' yabana' gana' chnabi'e. ²Na' nake' b̄xoz yabana' gana' non Xancho Chioza' dowalj lill xlatje', na' aga nakan dii ben ben' yell-lioni. ³Yog' b̄xoz choo b̄xoz xenka' chzoa Chioza' legake' kwenche chjwa'gake' lawe'na' yog' daa chzani ben' wi'ene', na' chitgake' bayix'ka' lawe'na'. Daan, lekzka' benan byen b̄xoz choo b̄xoz xen chechona' bzani'e daa bi'e Chioza'. ⁴Shel' zoe' yell-lioni aga nake' b̄xoz, shel'ka', la' zoakz b̄xozka' choe'gake' Chioza' diika' nllia leya' bia'

we'gake'. ⁵Diika' chon b̄xozka' bi nakan dowalj ka daa de yabana'. Daan, ka zi' gon dii Moiséza' lill xlatj Chioza', Chioza' bzajniile'ne', chi'ene': "Ben byen gonle yog'te diika' kon ka ba bzajniid' li' lo yaana'." ⁶Daa chon b̄xoz choo b̄xoz xen chechona' naa zak'chin aga ka daa chon b̄xozka' sto. Na' daa ba bizoe' cho' wen kon Chioza', Chioza' ba bchebe' gone' to dii zak'chi checho aga ka daa bchebe' lao dii xozxto'choka'.

⁷Shel' daa bcheb Chioza' dii nech gone' che dii xozxto'choka' benan ka ziyakgake' ben' li ben' shao', bi benan byen bchebe' gone' sto dii yoblə, shel'ka'. ⁸Per Chioza' ble'ile' bi ben ben'ka' ka blлие' bia', na' bene' ka wna dii beena' wdixjee xtilleena':

Xancho Chioza' ne': Wllin lla kat' wcheb' sto dii kob dii gaklenen le', le' zoale Israela' na' le' zoale Judána'.

⁹Na' aga gakan ka daa bcheb' gon' che dii xozxto'leka' llana' bibej' legake' Egiptona'.

La' legake' bi bengake' daa bchebgake' gongake', na' daan wchoonlall'gakee, na Xancho Chioza'.

¹⁰Na' naa de sto dii wcheb' gon' kat' illin llana' kwenche gaklen' ben' Israelka'. Gon' ka kwe' yichjgake' diika' ba lllia' bia' gongake', na' gon' ka kooshao'gake'n loo yichjlall'do'eka'.

Na' nad' gak' Chios chegake', na' legake' gakgake' yell' cha'.

¹¹Na' bich gonan byen no wli' wsedi bish' ljwellin, ni bich gonan byen no wli' wsedi ben' di-alla cheyin, ye'ze'ne':

"Chiyal' gombi'o Xancho Chioza'", la' yog'z ben' gombi'e nad', ka bi'do' ka ben' gol.

¹²"Nad' yizi'xen' xtoleeka', na' bich lljadinid' saaxya che'ka'."

¹³Na' daa wna Chioza' gone' to dii kob dii gaklenen legake', zejin daa bchebe' gone' kani'yi ba nakan dii wde cheyin. Na' daa ba nakan dii gol dii ba wde cheyin ba zoa yinitlon.

9Kana' bcheb Chioza' dii nech gaklene' ben' Israelka', bllie' bia' ka chiyal' we'la'ogake'ne', na' lekzka' bllie' bia' gongake' to lill xlatje' ga we'la'ogake'ne' lo yell-lioni. ²Na' ki nak lill xlatj Chioza' daa bengake': bengake' lo'inna' choplə, na' latj necha' bsi'gake'n Latj che Chios, na' bzoagake' to candeler na' to mes gana' bkwa'gake' yetxtilka' lao Chioza'. ³Na' lechaa daa bzegake' loo lill xlatj Chioza' kwenche bengake'n choplə bkwashaan latja' sto daa bsi'gake' Latj Ga Zoa Chios, ⁴gana' bzoagake' to diido' nongake' ka mes de or gana' bzeygake' yala', na' sto yiin dii nwazjgake' or ka loolə ka koll'lin, na' bsi'gake'n yiin daa yoo daa chonli daa bcheb Chioza'. Na' lo'inna' wyooshao' to xwag de or daa yoo ye! wawa' be' Chioza' legake' daa le maná, na' lekzka' loo yiina' wyoo bar che dii Aarónna' daa bigaa, na' yaj taaka' gana' nyoj daa nllia Chioza' bia' gongake'. ⁵Na' koll' yiina' bzoagake' lwaa Isak' anjlka' le kerubin kwenche chli'n zoa Chioza' na', beena' yoo balaan xen. Na' xil anjlka' zen chxolgakan kolliinna' gana' chxit' bxoza' xchen bayix'ka' kwenche chizi'xen Chioza' saaxya che'ka'. Per aga diikiyen'an cheenid' wsees'chid' le' naa.

⁶Na' ka ba nzoagake' yog' diika', na'ch bxozka' wzolo choogake' lle' zil loo latj necha' kwenche chongake' ka bllia Chioza' bia' gongake' kat' we'la'ogake'ne'. ⁷Per latj wchopina' tochga bxoz choo bxoz xenna' de lsens sho'e shlin non twiz. Na' kat' cho'e, chonan byen lljwee xchen bayix'ka' daa wxitee loo latja' kwenche yizi'xen Chioza' xtoleena' na' xto! ben' wlall che'ka' daa bi chakbe'gakile' chongake'. ⁸Na' Espíritu Sántona' chzajni-

ile' cho' daa chon bxoza' ka' zejin shlak ni chon lill xlatj Chioza' llin daa bengake' yell-lioni, bin' gat' lsens sho'cho Latja' Gana' Zoa Chioza'. ⁹Na' yog' diiki chzajniin cho' zoacho naa nan la'kzi be'gake' diika' bzangakile' lao Chioza' na' betgake' bayix'ka' na' bzeygake'b lawe'na' kwenche be'la'ogake'ne', diika' bengake' bi bizogakin yixis yiyibgakan yichjlall'do'eka' kwenche gongake' lez ba bizi'xen Chioza' xtoleeka' toshiizi. ¹⁰Diiki zeelo bengakan llin che to beli chen che'ka'chga: ka che no dii bi gak yeej gaogake' wa ka che daa chiyal' gongake' kwenche yixis yiyib kwingake'. Na' yog' diiki bengake' benan llin shlak bin' gon llin dii koba' bcheb Chioza' gone'.

¹¹Per naa ba bid Crístona', beena' nak bxoz choo bxoz xen checho, na' nsee dii wenka' chbezcho gak. Na' lill xlatj Chioza' gana' billin Crístona' nakan dii zak'chi na' dowalj daa aga no ben' yell-lío bxe bsile'n, la' bi nakan che yell-lioni. ¹²Na' Crístona', aga bexee no xchen shib wa no xchen goon ka wyo'e Latja' gana' zoa Chioza', san daa wlalj xchene'nan' wyo'e shlin shlxajz, na' che toshiizin wdixje' xto!choka'. ¹³Bxoza' bchine' xchen goon na' xchen shib, na' de che bakdo'na' chzeygake', na' bxi-teen ben'ka' bi nxi nych lao Chioza', la' kan' na leya' chiyal' gak kwenche bixi biyech kwerp che'ka' lao Chioza'. ¹⁴Na' shi kan' nakan, zalechlə xchen Crístona', beena' ni to dii mal bi nda' nchene', nsa'chan ye! wak? Espíritu Sántona', beena' zoa zejli kani, goklene'ne' kwenche ben kwine' lall' na' Chioza' na' wlalj xchene'na' daa yixis yiyib diika' nda' nchen yichjlall'do'choka', diika' chon ka kwiayi'cho. Na' ka', inezicho ba biyakxen xto!choka' na' gak goncho daa cheeni Chioza', beena' nak ben' yaa ben' ban.

¹⁵Daan, Crístona' bxie' dii koba' daa bcheb Chioza' gone' checho, cho' gox

wṇabe'. L̄a' daa bi'e yel' mban che'na' wite' ni checho, wdixje' saaxyaka' bencho shlak ben leya' llin, kwenche gak ikaacho daa bcheb Chioza' gone' checho zejli kani. ¹⁶ Shi to ben' ba bene' lishi daa yikwaanlene' to ben', aga wak ikaa beena' diika' chwal' yisha' shi bin' guet beena' chikwaan. ¹⁷ L̄a' yisha' daa bene' solo gonan llin kat' ba wite', na' bibi zakiin shlak ni mbane'. ¹⁸ Daan, ka bxe Chioza' dii necha' bchebe' gone', bene' byen betgake' bayix'ka' blalj xchemka'. ¹⁹ L̄a' biyoll bza-jnii dii Moiséza' dii xozxto'choka' yog' diika' nllia leya' bia', na'ch bexee lat' xa xil' dii mben dii xna' na' txis daa le hisopo na' bleeje'n loo chen che shibka' na' che goonka' betgake' na' zi lat' nis, na' bxiteen lee libra' gana' nyoj leya', na' lekzka' bxiteen yog' lo' ben'ka' lle' na'. ²⁰ Na' golle' legake': "Chennin chonan ka chakli daa ncheb Chioza' gone' checho na' lekzka' zejin chiyal' goncho yog' daa nllie' bia' goncho." ²¹ Na' lekzka' bxit' dii Moiséza' chenna' lill xlatj Chioza' daa bengake' de lech' na' yog' diika' bchingake' lo'inna' ka be'la'ogake'ne'. ²² Leya' bllian bia' nan de dii zan daa chiyal' wxit'gake' xchen bayix'ka' kwenche yixi yiyechgakan lao Chioza'; na' kono yiyakxen cheyin shi bi lalj chenna'.

²³ Benan byen wlalj xchen bayix'ka' kwenche bixi biyech diika' ben llin lill xlatj Chioza' yell-lioni, diika' nak ka bxen che diika' de yabana'. Per diika' de yabana', byalljin lalj to chen dii zak'chi aga ka xchen bayix'ka'. ²⁴ L̄a' Crístona' aga wyo'e loo lill xlatj Chioza' daa ben ben' yell-lioni daa bi nakan dowalj ka daa de yabana', san yabanana' wyo'e kwenche chnabile' Chioza' yizi'xene' checho. ²⁵ Na' aga zekizezin wyo'e be' kwine' blalj xchene'na', ka ben b̄xoz choo b̄xoz xenna' ze twiz wej wyo'e gana' le Latj Ga Zoa Chios kwenche bxitee xchen bayix'ka'.

²⁶ Shel' byalljin gone' ka chon b̄xozka', ba be' kwine' wite' zan shii, shel'ka', wzolozan ka wxe wzil yell-lioni. Per aga kan' nakan. San naa llaki zeelo, shlin shlaxjan bzani kwine' wite' ni checho kwenche bsol bnite' saaxya chechoka'. ²⁷ Na' kon ka llia bia' gak che to to ben' yell-lioni guete' shlinz, na'tech wchoglo Chioza' nak gak che to toe', ²⁸ ka'kzə Crístona' be' kwine' wite' shlinzə kwenche bsol bnite' xtol' ben' yell-lioki. Na' ka yiyede' de wchop shiyi, aga yiyede' kwenche wsol wnite' xtol' bēnaan, san yidixi'e ben'ka' chbezgake'nen'.

10 Ley che dii Moiséza' chzajniin cho' lat' che dii wenka' zi' za' gon Chioza', na' bi nakan ka daa nak dowalj. Daan, bi chzaki leya' yiyonon ben' li ben' shao' ben'ka' yog' yiz chitgake' bayix'ka' chzangakile' we'gake' Chioza' ka nllian bia' gongake'. ² Shel' daa chitgake' bayix'ka' gok bixis biyiban saaxya che'ka', aga wyooch yichjgake' nan nakgake' ben' saaxya na' bich betgake' bayix'ka', shel'ka'. ³ Per daa betgake' bayix'ka' lao Chioza' ze twiz wej bisa'lan lall'gake' saaxya che'ka', ⁴ la' xchen goonka' na' xchen shibka' bi gak yisol yinitan saaxyaka'.

⁵ Daan, ka bid Crístona' yell-lioni, golle' Chioza':

Aga cheenchilo' no wit bayix' lawo'na' wa izangakile' bichlə dii gongake' li', san ba beno' nad' ben' de beli chen kwenche izanid' kwin' lo lazgakin.

⁶ Bi chibailo' no wit bayix'ka' wa wzeygake'b lawo'na' kwenche wsol wnitō' saaxya che'ka'.

⁷ Na'ch wnia' li': "Ka choe' libr cho'na' xtillaa,

Chios cha', ni zoa' kwenche gon' daa cheenilo'."

⁸ Na' zigaate wne': "Aga cheenchilo' no wit bayix' na' wzeygake'b lawo'na' wa gongake' bichlə dii gongake' li' kwenche yizi'xeno' xtoleeka'", la'kzi nakgakan

daa nllia leya' bia' gongake'. ⁹Na'tech chi'ene: "Chios cha', ni zoa' kwenche gon' daa cheenilo'." Na' daa golle' ka' zejin bzoe' ka'lə dii gola' ben b̄xozka' na' b̄xie' to dii kob lwaayi daa bzoe' ka'lə. ¹⁰Na' daa ben Jesucrístona' ka cheeni Chioza', be' kwerp che'na' na' wite' shlin shlaxj ni checho, kwenche bixi biyech yichjlall'do'chona' lao Chioza'.

¹¹B̄xozka' chilalgakile' choe'la'ogake' Chioza' yog' lla, na' zekizezi chitgake' bayix'ka' lawe'na', la'kzi biga gak yisol yinitgakan saaxya che'ka'. ¹²San Crístona' bzani kwine' wite' shlin shlaxj kwenche bsol bn̄ite' xtol'choka'. Na' ka bibane', jachi'e sh̄laa de sh̄li che Chioza' gana' ch̄n̄abia'lene'ne'. ¹³Na' na' zoe' chbeze' shlak wzoa Chioza' ben'ka' chwiyi le' x̄ni'ena'. ¹⁴Na' daa bzani kwine' wite', biyone' ben'ka' bene' lall' na' Chioza' ben' li ben' shao' zejli kan̄i. ¹⁵Na' lekzka' Esp̄ritu Sántona' bi'e dill' cheyi dga, kana' wne':

¹⁶Ki nak daa ch̄heb' gon' chegake' kat' illin llana', na X̄ancho Chioza':

Gon' ka kooshao'gake' loo yichjlall'do'eka' diika' nllia' bia' gongake',

na' gon' ka kwe' yichjgake'n.

¹⁷Na' wnache':

Bichga lljadinid' saaxya che'ka' ni xtol̄leeka'.

¹⁸Na' shi Chioza' ba bizi'xene' xtol' ben', aga chyalljch witgake' bayix'ka' kwenche yiyakxenan.

¹⁹Le' ben' bish' na' le' ben' zan', daa ba wit Jesucrístona' na' blalj x̄chene'na' ni checho, wak sho'cho do lall'cho Latja' Gana' Zoa Chioza'. ²⁰Daa bi'e kwerp che'na', bsalje' to nez kob dii lljwa'n cho' gana' de yel' mban zejli kan̄i. La' kwerp che'na' zaklebin lechaa daa ze loo lill x̄latj Chioza' daa bchez' ka wite', na' zejlin byalj latja' gana' zoa Chioza' kwenche gak sho'cho. ²¹Na' Jesucrístona', beena' nak liizelozoi b̄xoz

choo b̄xoz xen, nake' b̄xoz checho, cho' nakcho lall' na' Chioza'. ²²Daan, chiya' ibig'cho lao Chioza' do yichj do lall'cho, na' w̄xenilall'cho wlebe' cho', la' nezicho ba nxi nyech yichjlall'do'chona' daa ba bsol bn̄ite' xtol'choka', na' ba bixi biyechi kwerp chechoki nis xtila'. ²³Chiya' soachecho goncho lez lljazoalencho Chioza', kon ka choe'cho dill', la' nezicho chone' ka n̄chebe'. ²⁴Na' chiya' yiyiljall'cho naklə ka goncho gaklen lljwellcho kwenche to tocho gakchi lljwellcho na' gonchcho dii wen. ²⁵Bi chiya' kwej yichjcho daa chdop chllagcho choe'la'ocho Chioza' ka chonz bal' ben', san chiya' wtip lall' lljwellcho, ¿alechli naa daa chakbe'icho ba zoa yiyed X̄anchona'?

²⁶Na' shi ni chonchcho dii mala' daa nezicho bi chiya' goncho kat' ba nombia'cho dill' li che Chioza', bich bi de we'cho Chioza' kwenche yizi'xene' xtol'choka'. ²⁷Lechozə kwezcho do chall chlllebzcho w̄choglo Chioza' checho llana' wzalee ben'ka' chakzbangakile'ne' lo yi'na' chal'nin̄ daa wlliyai' legake'.

²⁸Kat' to ben' bi chzenague' che ley che dii Moiséza', shi zoa chop shon ben' ble'gakile' daa bene', na' chchoglo guete' na' kono gak yiyesh'lallii le'.

²⁹¿Alechlin ki gak yel' zak'zi'na' idol' beena' chonile' nakzi Xiin̄ Chioza' na' x̄chene'na' daa blalje', na' ch̄nie' zban che Esp̄ritu Sántona' beena' chiyesh'lallii cho'? La' x̄chene'nan' bixis biyiban yichjlall'do'chona', na' ka blalje'n b̄xie' dii koba' daa b̄cheb Chioza' gone' checho. ³⁰Na' nezicho Chioza' wne': "Nad' yizi'a wzon che beena' chon dii mala', na' wsak'zi'ane' ka chiya' gak che'." Na' lekzka' wne': "Nad' X̄anle w̄chogloa' chele, le' nakle yell cha'." ³¹¿Nyesh'laz wal inlleb gak che beena' w̄choglo Chios yaa Chios banna' che' sak'zi'e!

³²Li lljadini ka nak dii lalljka' ble'ile ka bleble beeni' che Chioza' loo yichjall'do'lena', na' bizo bizakile' yel' zak'zi'ka' bdil' blagle. ³³Bal-le biya dii ben wna ben' le' na' biya dii bchi' bsak'gake' le' lao lkwe' ben'. Na' zi bal-le goklenle ben'ka' biya dii gok chegake'. ³⁴Na' biyeshile' ben'ka' got' lillyana', na' wzoale mbalaz la'kzi bikaa ben' bi dii de chele, daa nezile de to dii wench chele yabana' daa bi te cheyin. ³⁵Daan, bi kwej yichjle daa nxenilall'le Chioza', la' to banez choo banez xen si'le cheyin. ³⁶Chiyal' so sakile diika' chen chle'ile kwenche yiyoll yido gonle ka cheeni Chioza' na' gaki chele daa nchebe' gone'.

³⁷La' Cho'a Xtill' Chioza' nan:

Ba zoa gaoshosh yiyed beena' chiyal' yiyed,
na' aga wllachile'.

³⁸Na' beena' nak ben' li ben' shao' daa nonlilallee nad' ibane' zejli kani.

Na' shi bich gonlilallee nad', bich ile'shiidee.

³⁹Per cho', aga nakcho ka ben'ka' kwiayi' daa chibiigake' bich chonlilall'gake'ne', san cho' zoacho nonlilall'chone' yilacho bi kwiayi'cho.

11 Daa nonlilall'cho Chioza', len-nan' chonan kwenche chakliyi-cho daa noncho lez na' chajle'chacho cheyi daa bin' ile'icho. ²Daa benlilall' dii xozxto'choka' Chiozan', ble'shiile' legake'.

³Na' daa nonlilall'cho Chioza', nezicho len' bxe bsile' yabana' len yell-lioni na' ka bene'n aga bi bchine', san kon ka wnie' wxw wzil yog' diika' chle'icho.

⁴Daa benlilall' dii Abela' Chiozan', bi'ene' to dii zak'chi aga ka daa be' dii Ca'anna'. Na' daa benlilalleene', Chioza' wne' che' goke' ben' li ben' shao' na' bibaile' diika' bi'ene'. Na' la'kzi ba wit dii Abela', daa benlilallee Chioza' ni chza-niin cho' ka chiyal' goncho.

⁵Na' daa benlilall' Enoca' Chiozan', bi ble'ile' yel' wita', san Chioza' bikeene' shi'a shbane' na' koch no ble'i le'. Na' ka zi' yikaa Chioza'ne' wzeyi che' chone' ka chazlall' Chioza'. ⁶Na' shi bi gonlilall'cho Chioza', aga wak goncho ka ile'shiile' cho', la' chonan byen beena' cheenile' gombi'e Chioza' chiyal' shajli'e che' nan zoakze' na' chone' wen che ben'ka' chiy-ilj le'.

⁷Daa benlilall' dii No'ena' Chiozan', wyajli'e ka bsi'nile'ne' che yejsiwaa daa zi' za' gak daa konon' yen ile'i. Na' daa bllebe' Chiozan', bzenague' che' na' bene' barkwa' gana' wyoo do bxoone' kwenche bilagake'. Na' daa benlilallee Chioza' na' bzoe' xtilleena', bli'n ben'ka' wlliyi' yell-lioni gokgake' ben' mal. Na' Chioza' ble'ile'ne' ben' li ben' shao' daa benlilalleene'.

⁸Na' ka'kzə dii Abrahama', daa benlilallee Chiozan', bzenague' ka goxe' le' na' golle'ne' shaje' lljsoe' to latj dii bchebe' wi'ene' gakin che'. Na' wzee lalle'na' zeje' la'kzi bi wnezile' gan illine'. ⁹Na' daa benlilallee Chiozan', jsoe' ka ben' zit' lo yell-liona' bcheb Chioza' wi'ene'. Na' bene' lille'na' de lech', ka'kzə dii Isaaca' na' dii Jacoba', ben'ka' lekzka' goki chegake' daa bcheb Chioza' lao dii Abrahama'. ¹⁰Na' dii Abrahama' jsoe' na', la' nezile' wllin lla lljzoalene' Chioza' to latj wen daa ben kwinn Chioza', daa bi te cheyin.

¹¹Na' lekzka' daa benlilallee Chiozan', wyajli'e gon Chioza' ka soa xiine' la'kzi ba nake' ben' gol na' nakte dii xoole' Sárana' nool will. ¹²Ka' gok wzoa ben' zan inlleb xiin dia che', ka beljka' llia xan yabana' na' ka yoxa' chi' cho'a nisdona' daa kono ibabi, la'kzi ba nake' ben' gol ka wzoa xiine'na'.

¹³Yog' ben'ki ni nonlilall'gake' Chioza' ka witgake' la'kzi lo yell-lioni bi wxi' wkaagake' diika' bcheb Chioza' wi'e legake'. Per wnezgakile' wllin lla gak ka

wne', na' bibagakile' daa zi' gak. Na' wna-gake' nalgake' ka ben' zit', ben' za' xtit shllolz lo yell-lioni. ¹⁴Na' daa wngake' ka', zejın ni chbezgake' gana' gak dowalj lallgake'. ¹⁵La' shel' goggakile' yella' gana' wza'gake' nakan dowalj lallgake', zak biyajgake' na' dii yoblə shel'ka'. ¹⁶San legake' wzelall'gake' yillingake' yabana' gana' zoa to lallgake' dii wench. Daan, Chioza' bi chiyiile' daa nagake' nake' Chios chegake', na' ba nonshawee gana' lljazoagake'.

¹⁷Na' dii Abrahama', beena' bcheb Chioza' gak xiın dia che'na' ben' zan, daa benlilalleenen' bzenague' che' kana' golle'ne' izani xiıne'na', bi'na' nak tlish' tyaj, wite'b lao Chioza' kwenche gakbia' shi dii li nxenilalleene', ¹⁸la'kzi ba goll Chioza'ne': "Xiın dia cho'ka' galjgake' lo xiın dia che dii Isaaca'." ¹⁹Na' daa wya-jle' dii Abrahama' nap Chioza' ye! wak yisbane' ben' wetka', wak inacho Chioza' bisbane' xiıne'na' ladj ben' wetka' daa biz bi'e latj wite'b'.

²⁰Na' lekzka' dii Isaaca', daa benlilallee Chiozan', wnable'ne' gone' ka gak wen che xiıne' Jacoba' na' Esaúna' llaka' zi' za'. ²¹Na' lekzka' dii Jacoba', daa benlilallee Chiozan', ka ba zoa guete' wnable'ne' gone' ka gak wen che chopte xiın dii Joséna', na' de nchish'zi yag bar che'na' be'lawee Chioza'. ²²Na' lekzka' dii Joséna', daa benlilallee Chiozan', kana' ba zoa guete', bi'e dill' wllin lla yichej ben' Israelka' Egíptona', na' golle' legake' yisa'gake' llit wet che'na' kat' yilleshgake'.

²³Na' lekzka' daa benlilall' dii xaxna' dii Moiséza' Chiozan', ka goljb' bkwash'gakeeb' shon beo' daa ble'gakile' ka xochi gokb'. Na' bi bllibgake' daa bchoglo faraónna' guet bdo'ka'. ²⁴Na' lekzka' daa benlilall' dii Moiséza' Chiozan', ka bgole' bi goonile' ina ben' nake' xiın bi' nool che faraónna'. ²⁵Wyazlall'che' biya dii sak'zi'lene'

ben' wllall che'ka', ben'ka' nak yell che Chioza', aga ka daa gone' dii malka' nak toldezə daa chibayi ben'. ²⁶Gokbe'ile' zak'chi kwell ine ben' che' ni che Cristona', aga ka daa si'e banez che ye! wni'ana' de Egíptona', daa bzoa yichje' dii wenna' we' Chioza'ne'. ²⁷Daa benlilall' dii Moiséza' Chiozan', bizee Egíptona' na' bi bllibe' illaa faraónna' le', san goke' wal daa wpezile' Chioza', beena' kono chle'i, wzoalene' le'.

²⁸Na' daa benlilallee Chiozan', bene' lni Paskwa'. Na' golle' ben' wllall che'ka' witgake' twej xil'do' na' wxit'gake' xchema' yichj puert che'ka' kwenche anjla', beena' lljet bi' byo nechka', bi wite' bi' byo nech che'ka'. ²⁹Na' daa benlilall' ben' Israelka' Chiozan', gok bidegake' loo nisdona' le Nisdo' Xna, la' Chioza' bene'n chop laalə kwenche gok bidegake' lo yo billa'. Na' ka nan te ben' Egíptoka', to biyejzan na' wche'gake' ye!.

³⁰Lekzka' daa benlilall'gake' Chiozan', bene' ka billee zeeka' nechj yell Jericóna' ka biyoll wyechjgake'n gall lla.

³¹Na' lekzka' nool wdana' wle Rahab, daa benlilallee Chiozan', blebe' ben' Israelka' lille'na' ka bllingake' jawia jayigake' lalle'na' na' bi wlliyai'lene' ben' Jericóka' ben'ka' bi bzenag che Chioza'.

³²Dii zanch dii de inia', per bich bi latj de wi'a dill' ka ben dii Gedeónna', dii Baráca', dii Sansónna', dii Jefténa', dii Davina', dii Samuela' na' dii ben'ka' wdixjee daa goll Chioza' legake'. ³³Daa benlilall'gake' Chiozan', wkaagake' yell-lio che ben'ka' wdil-lengake', na' wnable'gake' xochi ka wyazlall' Chioza', na' goki chegake' daa bcheb Chioza' wi'e legake'. Na' Chioza' bisle' balgake' lao bell zniaka', ³⁴na' zi bale' bene' kwenche bi bzey yi' wala' legake', na' zi bale' bilagake' bi witgakile' spada'. Na' bal ben' blán'ka', ben Chioza' legake' ben' wal, na' ka wdil-lengake' soldadka'

nak ben' zit', bengake' legake' gan. ³⁵ Na' Chioza' goklene' bal' noolka', bisbane' no xiin che'ka' ba wit.

Na' zi bal' ben' biya dii bchi' bsak' ben' legake' axt ka witgake' na' bi goklall'gake' kwej yichjgake' Chioza' kwenche yilagake' lao yel' zak'zi'na', daa bengake' lez gag wen chegake' kat' yisban Chioza' legake'. ³⁶ Na' zi balgake' btitjgakile' na' bet wdingake' legake', na' bchejgake' legake' gdenna' na' wdxijgake' legake' lillyana'. ³⁷ Na' zi balgake' betgakile' yaj, na' zi balgake' wlejgake' chopla kon sierra', na' zi balgake' betgakile' spad. Na' zi balgake' biga wzoa lill xlatjgake' na' bchingake' no xa xil'ka' no xa shibka' lwaa xagake', na' gogkake' ben' yesh'do' na' dii zan dii ben ble'gakile' daa bchi' bsak' ben' legake'. ³⁸ Wdagake' latja' gana' bibi chashj chleb na' do yaa yaoka', na' bigaangake' do xan blejka'zə na' no loo yech. Na' ben'ka' kana', ni lat' bi nan chido'gake' soa ben' wenka' ladje'ka', shel'ka'. ³⁹ Na' lakzi Chioza' wyazlallee ka benlilall'gake'ne', ni togake' shlak wzoagake' yell-lioni bi ble'gakile' gag daa bchebe' gone' chegake'. ⁴⁰ La' wlo'e xnezin kwenche aga to lezgake' yizi'gake' banez ka nak daa bchebe' gone', san cheenile' lencho yizi'cho banez che to dii zak'chi kwenche yog'cho yiyakcho kwasloj ka cheenile'.

12 Na' daa nezicho ben' zan ben'ka' wzoachehgake' benlilall'gake' Chioza', lekzka' cho' chiya' kwej yichjcho yog' dii chllonan goncho ka cheeni Chioza' na' kwej yichjcho saaxyana' daa chombegui cho', na' soachehcho gonchcho ka dii le koochcho nez lo xneze'na' ka to ben' chxonj na' chgooyibe' kwenche gone' gan. ² Chiya' soacho wwiacho ka ben Jesúza', beena' chon ka chonlilall'cho Chioza', na' lekze' gaklene' cho' kwenche yiyoll yido gonlilall'chone' kwasloj. La' le' bizo bizakile' ka betgake'ne' lee yag

cruza', na' bi bene' kwent che yel' zto'na' wxi'e daa nezile' ka yiyoll ile'ile' yel' zak'zi'na', yiba yizakile'. Na' naa chi'e gana' chnabia' Chioza' shlaa de shli che'na'.

³ Chiya' koo yichjcho ka bizo bizakile' biya daa beni ben' malka' le' kwenche bi lljxakicho ni bi wshe'lall'cho gonlilall'chone'. ⁴ Na' ka nakle le', aga bin' xchenle wlaljle ni cheyi daa chdil-lenle dii mala'. ⁵ Ba gol-lall'le daa wna Chioza' cho' daa nakcho xiine', ka wne':

Xiindawaa, bi gonilo' nakzi yel' zak'zi'na' chselaa kwenche wzajniid' li', na' bi yidinjilo' kat' chon' ka yiyakbe'ilo' daa chono'.

⁶ La' nad' Chios, chigwaa shli lall' ben'ka' chakid',

na' chsak'zi'a ben'ka' nak xiin'.

⁷ Chti'le yel' zak'zi'ka' kwenche yigooshlilall'le, la' Chioza' chonile' le' ka' daa nakle xiine'. La' aga ga zoa to bi'do' bi chsak'zi' xabaa leb' kwenche yigooshlilall'b'. ⁸ Na' shi Chioza' bibi gonile' le' kwenche yigooshlilall'le, ka chone' che yog' xiine'ka', zejín nakle ka ben' bi wyoo xayin. ⁹ Kana' nakcho bi'do', xachoka', ben'ka' bisgol cho', bsak'zi'gake' cho' na' wdapchogake' balaan. Na' lialotech wzexj yichjcho wzenagcho che Xacho Chioza', beena' zoa yabana', kwenche gat' yel' mban checho zejli kani. ¹⁰ Na' xachoka', shlak bisgolgake' cho' bsak'zi'gake' cho' kon ka gogkakile' nakan wen. Per Chioza' chsak'zi'e cho' kwenche gaklene' cho' gakcho ben' li ben' shao' ka nake' le'. ¹¹ Aga no chibayi kat' chllagloe' yel' zak'zi'na', san le' chakyeshile'. Per beena' yiyakbe'i cheyi daa chllagloe' na' yigooshlilallee, yisa' che wen na' soe' mbalaz.

¹² Li gondiplall', na' li gon ka dii le gonlilall'le Chioza'. ¹³ Li gon ka cheeni Chioza' kwenche beena' ba chshe'lall'

ile'ile' ka chonle na' yiyondiplallee na' bi kwej yichje' Chioza'.

¹⁴Li gon byen soalenle yog'te ben' mbalaz, na' li wsato chele lega ben' nxi nyech lao Chioza', la' kono yillin lawe'na' shi bi nxi nyech yichjlall'do'ena'. ¹⁵Li gon byen gap wwia ljwell-le kwenche ni tole bi gonle daa wllonan si'le banez daa ba ben Chioza' chele yel' ben' wen che'na', na' kwenche bi galj xe loo yichjlall'do'leka' dii mala' daa wxinj wle-nan ben' zan. ¹⁶Na' ni tole bi takenle no xiin xool ben'. Na' bi gonile nakzi daa nak che Chioza', ka ben dii Esaúna'. Ty-eenz yel' wawa' bsha'ile' daa nan gaki che' daa nake' ben' nech. ¹⁷Na' nezgzile ka wde, goklallee inab xe'na' gak wen che' daa nake' ben' nech, na' bich gokan. La'kzi le wchelle' wnable'n xe'na', bich bi gok gongake'.

¹⁸Aga ka gok che dii xozxto'chokan' chak chele. Legake' wbig'gake' kwit yaa Sinaína' na' ble'gakile' chal'ninan, axt wche' cho'la'n, na' wzen to be' wal, ¹⁹na' bengakile' wchell trompeta' na' wne Chioza' legake'. Na' ka bengakile' shi'ena' got'yogakile'ne' bich inie' legake', ²⁰daa le bblebgake' daa goll Chioza': "Nottez yidlej lo yaani chiyal' wítilene' yaja', laa ben' laa bayix'." ²¹Daa ben ble'gakile' le bsheban legake', axt kwín Moisésa' wne': "Axt chxiztit' daa le chllebchga'."

²²San le' ba wbig'le gana' zoa Chios, ben' yaa ben' banna', gana' le yaa Sión na' Jerusalén daa zoa yabana', gana' lle' lla' ben' zan inlleb anjl che'ka', ²³gana' ndop nllag ben'ka' nak xiin' Chioza', ben'ka' nak ka bi' nech, na' ba da' lie'ka' lee libr che'na' de yabana'. Na' ba wbig'le lao Chioza', beena' yizi'e kwent che yog'lol ben'. Na' ba nakcho txen ben' li ben' shao'ka' ba wit, ben'ka' ba biyon Chioza' dowalj ben' li ben' shao'. ²⁴Lekzka' ba wbig'le lao Jesúsza', beena' be' yel' mban che'na' kwenche bxie' dii koba' daa ncheb Chioza' gone' checho. Na'

xchene'na' daa blalje' ni checho chaklen-lan cho', aga chonan ka xchen dii Abela' daa wdao xya che dii ben' bisheena'.

²⁵Li wsak' kwenche bi gakte widenag lao Chioza', beena' chne cho'. La' shi ben' Israelka' bi bilagake' lo yel' zak'zi'na' daa bi bzenaggake' daa goll Chioza' legake' lo yell-lioni, zalechlə cho', aga wilacho lo yel' zak'zi'na' shi yizechj koll'cho beena' zoa yabana' na' bi wzenagcho xtillena'?

²⁶Ka wne Chioza' ben'ka' kani'yi, shi'ena' benan ka wxo' wnib yell-lioni, per naa ne': "Sto shii gon' ka xo' inib yell-lioni, na' aga toz yell-lioni, san lente yabana'."

²⁷Na' daa ne' "sto shii gon' ka xo' iniban", zejín yinit yog' diika' bene', diika' te cheyin, na' yigaan diika' biga te cheyin.

²⁸Na' yel' wnabia' daa gon Chioza' cho' gana' zoe', biga te cheyin. Daan, chiyal' we'chone' yel' choxken na' we'la'ochone' ka chazlallee na' gall illebchone'. ²⁹La' Chios chechona' nake' ka to yi' wal daa chzey chte.

13Li soatezi soa gaki ljwell-le ka chakile to ben' bish' golje. ²Na' bi gal'lall'le wleble ben' loo yoo lill-le na' we'le legake' ga yigaangake', la' bal ben'ka' ben ka' blebgake' anjlka' lille'ka', la'kzi bi gokbe'gakile'.

³Li ljadini gaklenle ben'ka' de lillyana', na' li gaktezi lenkzlen chak chele ka'. Li gaklen ben'ka' chiya dii ch'chi' chsak' ben' legake', na' li gaktezi lenkzlen chak chele ka'.

⁴Dii wen inlleb daa ne' nkaa che', na' le' nshagna'le bi chiyal' talenle ben' yoblə, la' Chioza' wsak'zi'e nottez ben'ka' soalengake' nool bi nak nool chegake' wa ben' byo bi nak ben' chegake'.

⁵Bi chiyal' selall'cho yel' wni'ana', san goncho banez kak' dii de checho, la' Chioza' ba wne': "Biga wsan' li' ni bi kwej yichj' li'." ⁶Daan, wak inacho do yichj' do lall'cho:

Xancho Chioza' zoe' chaklene' nad'. Na' bi gall illeb' shi bi goni ben' nad'.

⁷ Na' li lljadini ka ben ben'ka' bli' bsedi le' cho'a xtil' Chioza'. Li wwia ka wzoa wlezgake' benlilall'gake' Crístona' toshi-izi, na' li gonlilallee ka benlilall'gake'ne'.

⁸ Jesucristona' biga chillee, lekzen' kani'yi, lekzen' naa na' lekzen' zejli kani. ⁹ Bi we'le latj no wli' wsedi le' dii yoblə dii chyiljall' ben' dii gonan ka yilaale di nez li che Chioza'. Wenchan wzoachech yichjlall'do'choni lo yel' chaki che Chioza', aga ka daa sho'z yichj-cho cheyi diika' na ben' bi chiyal' yeej gaicho. La' ben'ka' chinal' chinogake'n bi chaklanan legake'.

¹⁰ Daa ba wit Crístona' ni checho, ba chizi'cho to banez daa bi bizi' bxoza' bet bayix'ka' gana' wzoa lill xlatj Chioza' daa bengake' de lech'. ¹¹ Bxoz choo bxoz xenna' jwee xchen bayix'ka' Latja' Gana' Zoa Chioza' kwenche yizi'xene' xtoleeka', per bchejgake' latja' gana' wchengake' kwenche jazeygake' kwerp che bayix'ka'. ¹² Na' ka'kzan gok che Jesúsza', lekzka' wlejpgake'ne' yella' ka betgake'ne'. Na' wlalj xchene'na' kwenche yisol yinite' saaxya che ben'ka' gonlilall'gake'ne'. ¹³ Na' cho' naa, chiyal' nocho Crístona' la'kzi le gakzbani ben' cho' ka gokzbangakile'ne'. ¹⁴ La' yellioni gani zoacho nakan dii te cheyin, per noncho lez yillincho gana' soacho zejli kani. ¹⁵ Daan, chiyal' we'la'ocho Chioza' toshiizi daa wit Crístona' ni checho, na' koochone' balaan kon cho'a loll'choni we'cho dill len' nake' Xancho, la' lennan' nakan ka dii chzanicho we'chone'. ¹⁶ Bi gal-lall'cho goncho dii wenna' na' izanicho bi de checho we'chon ben' chyallj chchinile'n, la' lennan' chazlall' Chioza' na' daa choncho ka', len' choe'la'ocho.

¹⁷ Li wzenag che ben'ka' chli' chsedi le' na' li wlexj yichjle lawe'ka', la' legaken' chap chwiagake' le' daa yoo yichjgake' wllin lla yidegake' kwent lao Chioza' daa bengake'. Li wzenag daa nagake' kwenche yibagakile' gon xshine'ka' na' bi gaggakile'n to dii lallj. La' shi bi wzenagle che daa chli' chsdgake', bibi banez cheyin si'le.

¹⁸ Li inabi Chioza' gaklene' neto', la' nezzen'into' chonnto' ka cheenile', na' cheeninto' wsa' chento' wen lao yog'lolte. ¹⁹ Na' chat'yoid' le' inabile Chioza' ni cha' kwenche yob gak yid' sto shii gana' zoale.

²⁰ Chioza', beena' chzoe' cho' mbalaz, bisbane' ladj ben' wetka' Xancho Jesucristona', beena' chap chwia cho' ka chon xan xilaa, beena' choe'la'ochga xil' che'ka'. Na' lekzen' beena' bxe daa bcheb Chioza' gone' checho zejli kani kana' blalj xchene'na' na' wite'. ²¹ Na' Chioza'kzə gonshgue' ka gak gonle dolo dii wenna' ka cheenile' gonle, na' gonshgue' ka gaklen Jesucristona' le' gakle ka chazlallee. ¡Sho'shgue' balaan zejli kani! Ka gakan.

²² Chat'yoid' le' ben' bish' na' le' ben' zan', li koo yichjle diiki chnabid' le' gonle, diiki to chop cho'a ba bzej'. ²³ Na' cheenid' inezile ba bichej ben' bish'cho Timotewa' lillyana', na' shi ba wdaile' yide' ni, na' wchi'ane' yidwianto' le'.

²⁴ Li wwap chiox yog' ben'ka' chli' chsedi le' na' yog' ben'ka' nakle txen nakle lall' na' Chioza'. Na' ben' Itáliaki nakcho txen chwapgake' le' chiox.

²⁵ Chioza' gaklenshgue' yog'lol-le.

Kart daa bzej Santiágoná'

1 Nad' Santiago,[‡] nongake' nak' wen llin che Chioza' na' wen llin che Xancho Jesucristona', chwap' le' chiox, ka le' nakle ka shllin kwen xiin dia che dii Israela' daa nakle lall' na' Chioza' na' neslesle doxen yell-lioni.

²Le' ben' bish'dawaa na' le' ben' zandawaa, li yiba yizaki kat' ile'ile yiya yel' zak'zi'. ³La' ba nezkzile kat' chzak'zi'cho daa nonlilall'cho Chioza', chaklenan cho' soatipchcho gonlilall'chone'. ⁴Na' li gap yel' chxenlall' lao bittez daa gak chele kwenche yiyoll yido gakchale kon ka chazlall' Chioza'.

⁵Shi nole chyaljile yel' sin'na', li inabin Chioza' na' gone'n. La' Chioza' cho'en nottezə ben' chnabe'n, aga no chllonile'n. ⁶Li inaban na' li gonyen' lez gone'n na' bi gakchoplall'le. La' beena' chonchoplall' nake' ka bli che nisdona' daa choa' be'na' to ni to na'lə. ⁷Beena' chakchoplall', bi gone' lez we' Xancho Chioza' daa chnabe', ⁸la' chiya dii na yichjlall'do'ena' gone', na' shal' ki shal' ka'lə chake' lao yog'loł daa chone'.

⁹Ben' bish'chona', beena' nak ben' yesh'do', chiyał' yiba yizakile' daa nake' ben' zakii lao Chioza'. ¹⁰Na' ben' bish'chona', beena' nak ben' wni'a, chiyał' yibaile' daa ba biyakbe'ile' aga no nake' lao Chioza'. La' ka chde che yejdo'ka' llia lyixaa ka'kzan te che ben' wni'aka'. ¹¹Kat' chla' wbilldo'na' na' chna'n zi'bia' na' chbill yag yeja', na' chllib yeja' llian na' yel' mba cheyinna' chbiayi'n. Ka'kzan ben' wni'ana', yiyol yinite' lao delgens che'na' chone'.

¹²Chakomba beena' chzo chzaki chtile' bittez dii mal. La' kat' ba wdie' lawinna', Chioza' wi'ene' yel' mban zejli kani daa bchebe' wi'e ben'ka'

chakgakile'ne'. ¹³Nottez ben' kat' chza'lallee gone' dii malka', bi chiyał' ine': "Chioza' bzoe' dii mali lawa'ni". La' Chioza' aga bi dii mal chone' ni bibi dii mal chzoe' lao ben' kwenche gone'n. ¹⁴San daa chzelall'cho goncho dii malan', lennan' chgooyelaan cho' kwenche ixopcho lawinna'. ¹⁵Na' daa chzelall'cho dii mala', chxopcho lao saaxyana', na' saaxyana' daa choncho chlliyai'n cho'.

¹⁶Le' ben' bish'dawaa na' le' ben' zandawaa, bi siye'z kwinle. ¹⁷Chioza', beena' zoa yabana' na' bxe bsile' yog' diika' chzeeni' xan yabana', len' chone' cho' yog'loł daa nak dii wen dii shao' na' toshiizi zoe' chone' wen na' biga chillie. ¹⁸Len' wyazlallee gone' yel' mban checho zejli kani daa wyajle'cho dill' li che'na', kwenche ladj yog' ben'ka' bxe bsile' gokcho ben' nech ben' biya'o bizi'e, na' zaklebicho diika' chizi' chilapgake' dii nech daa chzangakile' choe'gake' Chioza'.

¹⁹Le' ben' bish'dawaa na' le' ben' zandawaa, li wzoa yichjle dga: yog'loł ben' chiyał' wsede' wzenague', na' wsakee bin ine', na' gape' to yel' chxenlall' bi illaa iloke'. ²⁰La' yel' chllaa chloka' chllonnan goncho ka cheeni Chioza'. ²¹Daan, li choonlall' yog'loł dii zbanka' chonle na' yog'loł dii malka' chonle, na' li wlexj yichjle wzenagle cho'a xtill' Chioza' daa ba nezile. La' lennan' napan yel' wak yislan le' kwenche bi kwiai'le.

²²Aga to wzenagzcho cho'a xtill' Chiozan', san chiyał' goncho ka nan. Na' shi bi goncho ka nan, chziye'zə kwinchon, shi naa. ²³Beena' to chzenagz cho'a xtill' Chioza' na' bi chone' ka nan, chone' ka beena' chwia cho'alawe'na' lo wanna', ²⁴na' ka chikwase' chiyoll chwia cho'alawe'na', li chal-lall'tie' nakan nake'. ²⁵Beena' bi chal-lall' dii wenna' nllia

[‡]1:1 Santiago Lekzen' Jacóbona'.

Chioza' bia' gone' daa yisell yilaan le' lao dii mala', na' zie'n wneyi, na' toshiizi zoa'tip zoashoshe' chone' ka nan, beenan' zoa mbalaz.

²⁶ Shi no chakzi chone' ka cheeni Chioza', per bi chak gox' cho'a lolleena', chziye'z kwinen' na' bibi zakii daa ne' chone' ka cheeni Chioza'. ²⁷ Daa cheeni Xacho Chioza' goncho na' nxi'n lawe'na', len dga: yiyesh'lalicho bi' wizebdo'ka' na' nool wizebka' lao dii lalljka' chen chle'gakile', na' gap wwia kwincho bi goncho txen dii malka' de yell-lioni.

2 Le' ben' bish' na' le' ben' zan', ka le' chonlilall'le Xancho Jesucristona', beena' yoo balaan xenna', aga nakzi ben' gakile. ² Shi gana' ndop nllagle yida to ben' nllin xbene'na' niy de or na' nakw xalaane' dii wen, na' lekzka' yida to ben' yesh'do' na' nakwe' xalaane' dii ba bida' bichollee, ³ na' chle'shi'chile beena' le' nak xalaaninna', na' che'lene': "Wche' latji gani nak wen", na' che'le ben' yesh'do'na': "Na'zə wze, li", wa ba che'lene': "Lo yo na'tezə wche'", ⁴ zaga nakzin ba chle'ile bal ben' daa chwia chyile nak nake', na' ba chza'lall'le chegake'?

⁵ Le' ben' bish'dawaa na' le' ben' zandawaa, li wzenag dga: Chioza' ba wleje' ben'do'ka' nak ben' yesh' yell-lioni kwenche do yichj do lall'gake' gonlilall'gake'ne' na' soalengake'ne' gana' chnabi'e, kon ka ba bchebe' gone' che ben'ka' chakgakile'ne'. ⁶ Na' le', chonzile legake' nakzi. zAaga ben' wnia'kan' chsak'zi'gake' le' na' chjtaogake' xya chele lao ben'ka' chnabia'? ⁷ zAaga legaken' chbell chnegake' mal che Xanchona', beena' nakcho lall' nee, beena' le' zakii?

⁸ Dii wen inlleban chonle shi dii li chonle daa lialote nllia Cho'a Xtill' Chioza' bia' gonle daa nan: "Goki bish' ljwello'na' ka chaki kwino'." ⁹ Per shi nakzi ben' gakile, chxinj chlenle, na' ba de xtol'le daa bi chonle ka na ley che

Chioza'. ¹⁰ Shi to ben' zeje' chone' yog'te daa nllia ley che Chioza' bia', per shi ton bi gone', doxente leya' chawan xya nape' dol'. ¹¹ Chios, beena' wna: "Bi chiya' ineleno' ben' yoblə", lekzka' wne': "Bi wito ben'." Na' shi chito' ben', la'kzi bi chneleno' ben' yoblə, chyishjo' daa nllia ley che'na' bia'. ¹² Chiya' wshaljle wen na' wsa' chele wen kon ka nllia leya' bia', lega ben' nezi wllin to lla leya' daa chisell chila' cho' lao dii mala', wchoglon checho. ¹³ Ben'ka' bi chiyesh'lallii ben', lekzka' Chioza' bi yiyesh'lallile' legake' llana' wchogloe' che ben'. San ben'ka' chiyesh'lallii ben', Chioza' yiyesh'lallile' legake'.

¹⁴ Le' ben' bish' na' le' ben' zan', bibi zjanayin inaz ben' nonlilallee Chioza' shi bi nla' dii wenna' chone'. zAwak to daa nonlilall'ze' yislan le' shi bi chone' wen? ¹⁵ Inatezcho to ben' byo wa to noolə, ben' nakcho txen nonlilall'cho Jesucristona', bibi xalaane' de na' chyalljite dii yeej gawe' ka naa ka wxə. ¹⁶ Na' tole ye'lene': "Soashgo' mbalaz, na' gat'shga xalaano' na' dii yeej gawo'", na' bi we'lene' daa chyalljile', bibi zejin ye'zlene' ka'. ¹⁷ Ka'kzan beena' nonlilallee Chioza', shi bi chone' daa nak wen, bibi zjanayin ne' nonlilalleene'.

¹⁸ Zoa ben' ine': "Li' no' nonlilalloo Chioza', na' nad' chon' daa nak wen. Aga wakbe'i ben' shi nonlilalloo Chioza' shi bi chono' daa nak wen. San nad', daa chon' daa nak wen chli'a nonlilallaa Chioza'." ¹⁹ Li' chajli'o toz Chiozan' zoa, na' wenkzan chono' chajli'o. Lekzka' dii xiw'ka' chajle'gakan na' le' chllibgakan. ²⁰ Bi gono' ka ben' bi nteyi. Chiya' gakbe'ilo' shi bi chono' daa nak wen, bibi zjanayin no' chajli'o che Chioza'. ²¹ Daa bzani dii xoxzto'cho Abraham'a xiine' Isaaca', bchi'eb' lo yaana' nan ljete'b' ka goll Chioza'ne' gone', na' wna Chioza' nak dii Abraham'a ben' wen lawe'na'. ²² zAbi chakbe'ilo' daa benlilall' dii Abra-

hama' Chiozan', bzanile' xiine'na'? Na' daa bene' ka', bli'en nan dii licha nonlilallee Chioza'. ²³Na' billinin daa nyoj lee Cho'a Xtill' Chioza' daa nan: "Abraham' wyajli'e che Chioza', na' Chioza' wne' nake' ben' li ben' shao' lawe'na'." Na' w nagake' che' goke' to ben' bllagui Chioza'.

²⁴Na' chakbe'ile beena' chonlilallee Chioza' nake' ben' wen lawe'na' shi chone' ka cheenile', na' aga to daa inaze' nonlilalleene'. ²⁵Ka'kzə gok che noolə wdana' wle Rahab. Chioza' wne' nake' ben' li ben' shao' daa bkwashee loo lille'na' ben'ka' jawia jayi lalle'na', na' bigwee legake' to nez yoblə ka bichej-gake' lalle'na' kwenche kono bet legake'. ²⁶Ka chak che to kwerp, shi bi yoon bishbe, netan, ka'kzan beena' to nonlilall'ze' Chioza' na' bi chone' ka cheenile', bibi zjanayin nonlilalleene'.

3 Le' ben' bish' na' le' ben' zan', bi shanzle selall'le gakle ben' chli' chsedi, la' ba nezakzile' kat' yizi' Chioza' cho' kwent wsak'zi'che' neto' chli' chsedinto' ben' shi bi gonnto' ka cheenile'. ²Yog'lo'cho chxinjcho. Na' beena' bi chxinje' de cho'a dill' nake' to ben' li ben' shao', na' lekzka' chak inabi'e doxen kwerp che'na'. ³Kat' chgoocho dona' cho'a kabaya' kwenche gom ka cheenicho, chzakicho chgoochob neza' gana' cheenicho shajb. ⁴Na' lekzka' li wwiakachi barkwka', la'kzi nakgakan dii xen wal na' chde be' wala' chlligaan diika', ben'ka' chsa' legakan chdagake' toz yagdo' xaninka' na' chajgakan gana' cheengakile'. ⁵Ka'kzan chak che loll'choni. La'kzi nakan to diido'zə, dii zan dii chshalj chshonan. Nezicho toz bzeyi'do' wak wzeyan to yix' din xen wal. ⁶Na' loll'choni nakan ka to yi'. Na' nakan to dii lliashesh' chiya dii mal na' chxinj chlenan do ka nak benecha' shlak mbane' daa chzenague' che dii xiwaa. ⁷Benecha' chak gonmaxe' yog'te bayix', ka ba ze xan yabana', ka ba chxob le'in, ka ba yoo loo

nisdo'na'. Per la'kzi chnabi'e legakb, ⁸bi chak inabi'e lolleena'. Nakan to dii mal dii bi cheeni no inabia' len, na' nakan ka yierb dii chitan ben'. ⁹Chchincho loll'choni choe'la'ocho Xacho Chioza', beena' nak Xancho, na' lekzka' chchinchon chyishjcho bia' blag' che ben'ka' bxe bsile', ben'ka' bene' lwaa lsakee. ¹⁰Cho'a loll'choni choe'la'olenchon Chioza' na' lekzka' len chyishjan bia' blag' che ben'. Le' ben' bish' na' le' ben' zan', bi chiya' goncho ka'. ¹¹To ga chal nis, aga wak galan nis dii gak yeejcho na' galten nis zxi'. ¹²Le' ben' bish'dawaa na' le' ben' zandawaa, nezile to yag yixwew aga wbian daa ne' aceituna, na' yag uvana' aga wak kwian yixwew. Na' ka'kzə gana' chal nis zxi'na' aga walan dii gak yeejcho.

¹³Shi ladjlena' zoa ben' sin', ben' chajni, chiya' wli'en wsa' che' wen na' wlexj yichje' gone' kon ka na' ye' sin'na' daa noe' Chioza' le'. ¹⁴Na' shi we'le latj wxinj wlen ye' xe'na' yichjlall'do'lena', na' gonile ben' nakzi, bi chiya' wshalj wshonle inale nable ye' sin' daa chon Chioza'. La' shi ka' chonle aga dill' lin choe'le. ¹⁵Ka nak ye' sin'na' daa nale nable, bi nakan dii ben' Chioza', san nakan de yell-liozə dii chalj yichjlall'do'lena', na' nakten che dii xiwaa. ¹⁶Gana' zoa ben'ka' chakxe'i ljwellgake' na' chakdil-gake' nogaken' mbejlawi, nan' chxe wdi' wishesh na' chiya dii mal. ¹⁷Ben'ka' nap ye' sin' daa choe' Chioza', nakgake' ben' chon ka cheenile', na' bi nakgake' ben' wishagdil. Nakgake' ben' wen, ben' wizoa dill', ben' chiyesh'lallii ben', na' aga nakzi ben' chakgakile', na' nakgake' ben' chda do lallii. ¹⁸Ben'ka' chon to dii byen soalen ljwellgake' mbalaz, na' lekzka' chongake' ka soalen ljwell ben' yoblə mbalaz, si'gake' banez goni ben' le-gake' wen, na' soagake' mbalaz.

4 Biche chakile de wdi' wshesha' ladjlena' shi aga dii malka' lle' lla'

loo yichjlall'do'lanan' chnabia'gakan le'?
² Chzelall'le bi gat' chele na' bi chatilen. Shel' wx'e'ile witle ben' na' ikaale bi de che', na' chakxe'ile' bi de che ben'. Na' daa bi chat' chbe'ile daa chzelall'le gat' chele, chdil' chsheshlen ljjwell-le. Na' bibi chat' chbe'ile daa bi chnabilen Chioza'.
³ Na' kat' chnabilene'n, bi chone'n daa nezile' chnablen kwenchez gonditjen we'le cho'a xbayi beli chen chelena'.
⁴ Le' ben' bi yootli lallin. ¿Abi nezile daa nonle txen dii mala' de yell-lionin chonan ka chakzbanile Chioza'? Nottezə ben' cheenile' gone' txen dii mala' de yell-lioni chakzbanile' Chioza'.
⁵ Bi gakilo' nazə Cho'a Xtill' Chioza' daa nan: "Daa ba ngoo Chioza' Espíritu che'na' loo yichjlall'do'chonin lliallalee toze' le' wzenagcho che'." ⁶ Per dii xen chaklene' cho', na' Cho'a Xtilleena' nan: "Chioza' bi chle'shiile' ben'ka' chep cha'lall', per chaklene' ben'ka' nak ben' gaxjlall'."
⁷ Daan, li wlexj yichjle lao Chioza'. Na' li soachech bi we'zle latj che dii xiwaa, na' yikwasan ka'lə. ⁸ Li wxenilall' Chioza' na' soalene' le'. Le' ben' saaxya, li yiyaj yileni che dii malka' chonle. Na' ka le' cheenile' gonlilall'le Chioza' na' gontele txen dii mala' de yell-lioni, li we' latj yixis yiyib Chioza' yichjlall'do'lena'.
⁹ Li gakyeshii na' li kwellyesh'. Lwaa wxill-le li kwellyesh'. Li yisha' ye'l' chiba chizaki chelena' yiyakan ye'l' chakyeshii. ¹⁰ Li gak ben' gaxjlall' lao Xanchona', na' gone' le' ben' choo ben' xen.

¹¹ Le' ben' bish', bi kwell ine che ljjwell-le. Beena' chbell chne che to ben' nakcho txen nonlilall'cho Chioza' wa chiya chiyilje'ne', che ley che Chioza'n chbell chnie' na' chiya chiyilje'n. Na' shi ka' chono', lwaa wzenago' daa na leya', ba chzoaz kwino' chchoglo' cheyin. ¹² Toz beena' zoa, beena' wdixj leya', na' naktie' ben' chchoglo' che ben'. Na' len' wak yisle' ben' wa wlliayeene'. Na' li, naa, ¿nora nako' yiya yiyiljzo' bish' ljjwello'na'?

¹³ Li wzenag, ka le' nale: "Naa wa wxe shajcho yell yoblə na' lljsoacho twiz lljencho delgens na' goncho gan mech."

¹⁴ Ni bi nezile bi gak chele ka wxe. Ye'l' mban chelena' nakan ka gopaa daa chbe' xtitz na' lii chinitten. ¹⁵ Kin chiyal' inale: "Shi Chioza' w'e' latj ibanchcho, na' goncho dga cheenicho goncho." ¹⁶ Per latjin dii inale ka', chshalj chshonləle, na' daa chshalj chshonle nakan mal. ¹⁷ Beena' nezi chiyal' gone' wen na' bi chone'n, nakan xya lao Chioza'.

5 Li wzenag dga, le' ben' wni'a. ¿Li gosyaadia kwell-le, daa ba za' ye'l' zi'ka' yen ile'ile! ² Ye'l' wni'a chelena' ba gooll' bteban; na' be'l' zidaa ba bliiayiib xalaanleka'. ³ Or plat cheleka' ba chasgakan bej. Na' daa nakgakan ka', chasgakan xya chele na' wlliaiy'gakan le' ka chon yi'na' chzey chten. La' ba bkwa' bti'azle ye'l' wni'ana' naa ba zoa kwiayi' yell-lioni. ⁴ Daa bi be'le laxj ben'ka' bizi' bilap cheleka' chawan xya chele. Na' Xancho Chioza', beena' zeelo nap ye'l' wak choo ye'l' wak xen, ba bzenague' xyana' daa chao wen llinka'. ⁵ Yell-lioni ba weej wdaoshao'le na' ba be' cho'a xba beli chen cheleka'. Ba be'la'o kwintle ka ben' choe'la'o to bayix' kwenche wite'b gawe'b, na' kan' gak chele, ba zoa kwiayi'le. ⁶ Ba bchoglole che ben'do' bibi ben, na' ba betle legake', la'kzi bibi ben-gake' chele.

⁷ Na' le' ben' bish' na' le' ben' zan', li gap ye'l' chxenlall' ax't kat' yiyedch Xancho Jesucristona'. Ben' goz goona' none' lez yizi' yilape', na' nape' ye'l' chxenlall' chbeze' gak yeja'. ⁸ Ka'kzə le', chiyal' gaple ye'l' chxenlall' na' soachechle gonlilall'le Xancho Jesucristona', la' ba zoa yiyede'. ⁹ Le' ben' bish' na' le' ben' zan', bi gaaz xya che ljjwell-le kwenche bi wchoglo Chioza' chele. La' ba zoa gaoshosh yiyed beena' wchoglo che ben'. ¹⁰ Le' ben' bish' na' le' ben' zan', li wwia ka ben dii ben'ka' wdixjee daa goll

Xancho Chioza' legake' kani'yi, wdap-gake' yel' chxenlall' la'kzi chiya dii wxak'zi'gake'. ¹¹Dii li, chakomba ben'ka' chizo chizaki yel' zak'zi'ka'. Ba benzkzile ka ben dii Joba', bizo bizakile' wdie' lo yel' zak'zi'ka'. Na' nezckzile ka ben Xancho Chioza' che' biyoll wxak'zi'e, la' Xancho' nake' liizelozi ben' chiyesh'lallii.

¹²Le' ben' bish' na' le' ben' zan', dii lliallote dga: bi wzoazle de taschiw yabana' ni yell-lioni, ni sto dii yoblə kwenche shajle' ben' chele. Kat' inale: "wakan", ka'kzan gonle. Na' kat' inale: "bi gakan", la' bi gakkzannan', kwenche bi gat' xtol'le lao Chioza'.

¹³Shi nole chak dii chak chele, li we'llwill Chioza'. Na' shi nole zoa mbalaz, li gol' inie'. ¹⁴Shi to ben' bi shawee, chiya' gaxe' ben'ka' ngoo lall' na'gake' ben'ka' nonlilall' Cristona' kwenche we'llwillgake' Chioza' ni che', na' chebgake' yichje'na' seta' na' inab-gake' yiyakile' kon yel' wak che Xancho Jesucristona'. ¹⁵Na' kat' we'llwillgake'

Chioza' na' shajle'gake' gone' daa chnab-gake', na' yiyaki beena' bi shao', la' Xancho'na' yiyone'ne'. Na' shi ba bxinj' blene' na' yiyakxen che'. ¹⁶Daan, li yixoadol' lao ljwell-le na' li we'llwill Chioza' inab che ljwell-le kwenche yiyakile. Chioza' chzenague' che beena' nak ben' li ben' shao', na' chone' daa chnabile'ne'. ¹⁷Elíaza', beena' wdixjee daa goll Chioza'ne' kani'yi, goke' ben' de beli chen ka cho', na' ka be'llwille' Chioza' do yichj do lallee wnable'ne' bi gak yeja', na' bi gok yeja' lo yell-lioni shon' yiz yo gashja'. ¹⁸Na' be'llwille'ne' sto shii, na' bizolo yeja' na' biyashj bileb lo yell-lioni dii weej wdaogake'.

¹⁹Le' ben' bish' na' le' ben' zan', shi tole yilaale lo nez li che Chioza', na' sto ben' yoblə yigwee le' sto shii, to dii we-nan chone'. ²⁰La' chiya' inezile beena' yigoyoe' to ben' saaxya lo nez mala' na' yigweene' lo nez lina', ba chaklene'ne' yile' lo yel' wita' na' yiyakxen saaxya che'na' la'kzi nakan dii zan.

Kart nech daa bzej Pédróna'

1 Nad' Pedro nak' postl che Jesucristona', chzej' le', ka le' ba wlej Chioza' gagle lall' nee na' neslesle zoale do Pón-tona', Galáciana', Capadóciána', Ásiana' na' Bitíniana', gana' bi naki lall-le. ²Kon ka wlo'e xpezin gone' chele kani'teyi, Xacho Chioza' ba wleje' le' na' Espíritu che'na' ba bikobe' yichjall'do'lena' kwenche soale wzenagle che Jesucristona' na' gagle ben' nxi nyech ni che xchene'na' daa bixis biyib le'. Chioza' gaglenshgue' le' dii xen wal na' gonshgue' ka soale mbalaz inleeb.

³We'la'ocho Chioza', Xa Xancho Jesucristona'. Daa ba biyesh'lallile' cho', ba bene' sto yel' mban kob checho daa bisbane' Jesucristona' ladj ben' wetka', na' soacho gonchon lez toshiizi. ⁴Na' ikaa-cho daa ba ngooshawee yabana' daa biga kwiayi', na' daa bibi nda' nchen, na' daa biga te che yel' mba cheyinna'. ⁵Daa nonlilall'cho Chioza' lekze' wkwash' wkweejlene' cho' yel' wak che'na' kwenche idol' illonicho yel' mbanna' daa ba nakten gone' cho' kat' illin lla te che yellioni.

⁶Na' ni cheyi dgan chiba chizakile, la'kzi llaki naa wde wdeli dii chdil chllagle tolde. ⁷Ka nak ora', chiyal' ten lo yi'na' kwenche wli'lawin shi nakan dowalj. Ka'kzan le', kat' chtil-le yel' zak'zi'ka' chli'lawin shi dowaljkzan ba nonlilall'le Jesucristona'. Na' daa nonlilall'lene' zak'chan ka ora', la' ora' wllin lla kwiayi'n. Per le' zoachechle nonlilall'le Jesucristona', kat' ba biyoll wdele lo yel' zak'zi'ka', na' shajla'ole na' sho'le to balaan xen kat' yiyede'.

⁸La'kzi bin' ile'ilene', le chakilene'. Na' la'kzi bi chle'ilene' naa, chajle'le che' na' dii xen wal chiba chizakile axt bichkz bi dill' chillelile we'le cheyin, ⁹daa ba

nezile gat' yel' mban chele zejli kani daa nonlilall'lene'.

¹⁰Dii ben'ka' wdixjee daa goll Chioza' legake' kani'yi, be'gake' dill' ka nak yel' chiyesh'lalli che'na'. Na' biyiljyollgake' daa golle' legake' kwenche shajni'gakile' nakan gone' yisle' cho' na' gone' yel' mban checho zejli kani. ¹¹Na' Espíritu che Crístona'kzan be'lene' legake' dill' che yel' zak'zi'ka' ile'ile' na' che balaan xenna' daa sho'e ka yiyoll tie' yel' zak'zi'ka'. Na' goklall'gake' inezgakile' nakan gak yide' na' bi lla bi goran' gak dga. ¹²Na' Chioza' bzajniile' legake' nan aga legaken' yen ile'gakile' diika' be'gake' xtilliin, san len' yen ile'ilen. Na' lennan' dill' wen dill' kob che Crístona' daa benile ka be'len ben'ka' le' dill' kon yel' wak che Espíritu Sántona', beena' bse!' Chioza'. Na' axt anjlka' cheengakile' inezchgakile' cheyi diiki.

¹³Na' ni che daa ba ben Chioza' chele, chiyal' se kwasle na' gagle ben' nyeen nyeenyi. Li gonyen' lez dii wenna' gon Chioza' le' kat' yiyed Jesucristona'. ¹⁴Daa nakle xiin Chioza' na' chzoale xtilleena', bich chiyal' gonle dii mala' wzelall'le kana' bin' gombia'lene'. ¹⁵San chiyal' soale gagle dowalj ben' li ben' shao'. La' Chioza', beena' gox wñabe' le', nake' dowalj ben' li ben' shao'. ¹⁶La' Cho'a Xtilleena' nan: "Li gak dowalj ben' li ben' shao', ka nad' nak' dowalj ben' li ben' shao'."

¹⁷Daa che'le "Xa", beena' chhoglo che ben' kon ka chidol' to toe', chiyal' gall illeblene' shlak zoale yell-lioni gani nakle ka ben' zit'. ¹⁸Chioza' ba bisle' le' lo yel' mban daa bi nxe bi nzak' daa bkwaanlen dii xozxto'leka' le'. Na' nezile daa bisle' le' aga wdixjile'n or wa plat, diika' chbiayi', ¹⁹san xchen Crístona' daa zak'chgayi, lennan' biya'o bizi-ile' le' kana' betgake'ne' ka to xil'do' ba bibi nda' nchen. ²⁰Kana' zi' xe silte yellioni, Chioza' wleje' Crístona' sak'zi'e. Na'

naa ba zoa te che yell-lioni ba bide' ni checho. ²¹Na' ni che Crístonan' ba nonlilall'le Chioza', beena' bisbane'ne' ladj ben' wetka' na' wlo'ene' balaan xen. Daan, ba chonlilall'le Chioza' na' ba nonlene' lez.

²²Na' le' naa, daa ba chonle ka na dill' li che Chioza' ba bixi biyechle, na' do lall'le chaki ljwell-le. Na' chiya' gakchi ljwell-le do yichj do lall'le axt ga zeelo. ²³La' nakle ka ben' ba golj dii yoblə, per aga de beli chen daa chde cheyi, san Chioza' ba bikobe' yel' mban chelena' daa wyajle'le cho'a xtilleena' daa nsa' yel' mban na' biga te cheyin. ²⁴Cho'a Xtill' Chioza' nan:

Yog'lol ben' yell-lioki nakgake' ka yixaa, na' balaan che'ka' nakan ka yejka' ze lyixaa.

Yixaa chbillan na' chllib yejdo' cheyinna',

²⁵san cho'a xtill' Chioza' zejli kani den, na' biga te cheyin.

Na' lennan' dill' wen dill' koba' daa ba wdixje'gakile' le'.

2Daan, chiya' choonlall'le yog'lol dii mal, yog'lol de wxiye', na' yel' xe', na' yel' chbell chne che ben'. ²Ka chon to bdo' cheendo' chdom' nillaa, kan' chiya' ibil' idonle cho'a xtill' Chioza' daa nak dowalj, kwenche gaklenan le' gonlilall'chlene' na' idol'le yel' mbanna' daa gone'. ³La' ba bnix bliatele ka ben' wen nak Xanchona'.

⁴Li ibig' lao Xancho Crístonan', beena' nap yel' mban, beena' zaklebi yaja' daa bi wyoolallii wen yooka', la'kzi lao Chioza' nake' to ben' zakii nleb na' wleje'ne' kwenche gone' ka chazlallee. ⁵Na' lekzka' le', Chioza' ba bene' to yel' mban kob chele daa nonlilall'le Crístonan', na' zaklebi ka yajka' daa chkwaagake' ljwellin kwenche gakan to yoo ga sho' Chioza' balaan. Na' gake' bəoz che', na' Jesucrístona' gaklene' le' kwenche

soale we'la'ole Chioza' ka chazlallee.

⁶Cho'a xtill' Chioza' nan:

Wselaa to ben' yell Siónna',

na' zaklebi'le' yaja' daa mbejlawin dii wlejgakile' kwenche gakan yaja' daa wchejcha yoonan'.

Na' beena' wxenilalleene', biga si'e yel' zto'.

⁷Ka le' ba nonlilall'le beena' zaklebi yaja', chakbe'ile nake' ben' zakii. San ben'ka' bi nonlilall'gake'ne' chongake' ka chillini Cho'a Xtill' Chioza' daa na: Yaja' daa bi wyoolall' wen yooka', leyen'lannan' yaja' daa ba nchejcha yoonan'.

⁸Na' lekzka' nan:

Zaklebi'le' to yaj dii chgoo chchew' ben' na' chchixan legake'.

Chbixgake' daa bi chzenaggake' cho'a xtill' Chioza', na' ka'kzan chiya' gak chegake'.

⁹San le', nakle ben' wlej Chioza' kwenche gonlilall'lene', na' nakle bəoz che beena' chnabia', na' yell che', to yell dii biya'o bizi'e. Na' wleje' le' kwenche we'le dill' ka nak yel' wak choo yel' wak xen che beena' bibej le' gana' nak shgasj shchol' kwenche biyoole lo beeni' choo beeni' xen che'na'. ¹⁰Kana', bi gokle lall' na' Chioza', san naa ba nakle lall' nee. Kana', bi biyesh'lallii Chioza' le', san naa ba chiyesh'lallile' le'.

¹¹Le' ben' bish'dawaa na' le' ben' zandawaa, daa nakle ka ben' zit' yell-lioni, chat'yoid' le' bi we'le latj we' cho'a xbayi beli chen chelena' daa cheeni inabia' yichjlall'do'lena'. ¹²Li wsa' chele wen ladj ben'ka' bi nonlilall' Chioza', kwenche llana' wchoglo Chioza' che to to ben', gakbe'gakile' benle wen na' we'la'ogake'ne', la'kzi naa chnegake' chele nan nakle ben' mal.

¹³Daa ba nonlilall'le Xancho Jesucrístona', chiya' wlexj yichjle lao yog'lol ben'ka' chnabia': ka lao beena' liizelozii chnabia', ¹⁴na' ka'kz lao ben'ka' chselee

kwenche wdezi'gake' ben'ka' chon dii mala' na' kwee balaan ben'ka' chon wen. ¹⁵ Chioza' cheenile' gonle wen kwenche idap cho'a ben'ka' biz chon chna chele, ben'ka' bi nteyi ni bi chajni'gakile'.

¹⁶ Li soato lega ben' ba biyell bila', na' aga ni che ba biyell bila'le na' gonle kon daa nan chele. Li soato lega ben' chon ka cheeni Chioza'. ¹⁷ Li gap balaan yog'lol ben'. Li gaki bish' l'jwell-leka'. Li gall illeb Chioza'. Na' li gap balaan ben' wñabia'na'.

¹⁸ Ka le' chonle xshin ben', li wlexj yichjle lao xanleka' do yichj do lall'le. Aga to ben'ka' chonzi le' wen gonile ka', san ka'kzə li goni ben'ka' chsak'zi' le'. ¹⁹ La' wenan no gon banez kat' no chsak'zi' le' la'kzi bibi do! nape' daa ba ngoo yichje' daa cheeni Chioza'. ²⁰ Per shi le' chzak'zi'le ni che to dii mal dii benle, bibi zakiin lao Chioza' gonlen banez. San shi chzak'zi'le ni che dii wenna' chonle na' chonlen banez, lennan' zakii lao Chioza'. ²¹ Kwenche gonle dgan gox wñab Chioza' le'. La' Crístona' wxak'zi'e ni chele na' bliile' le' nakan chiya! gonle. ²² Aga bi saaxya ben Crístona', ni bibi dill' wxiye' bi'e. ²³ Kana' biz ben wnagake' che', bi biyechj bibi'e, na' ka bsak'zi'gake'ne' bi bwall bshebe' le-gake', san ben kwine' lall' na' Chioza', beena' chchoglo che ben' ka chiya!. ²⁴ Crístona' biyoni che' saaxya chechoka' ka wite' lee yag cruza' kwenche bich goncho txen saaxyana', san soacho goncho ka cheeni Chioza'. Na' daa wxak'zi'en, zoale shi'a shao'. ²⁵ Kani'yi wdale ka xil'do' ba wnit. Per naa ba nakle lall' na' Crístona', beena' chap chwia le' ka ben' chap chwia xil' cheyin, na' zie' wneyi chele.

3 Le' noolə zoa ben' chele, li wlexj yichjle lawe'ka' kwenche shi bi chajle'gake' cho'a xtill' Chioza', gakbe'gakile' nakan dii wen ka ile'gakile' nsa' chele wen. Na' aga chini gat'yoile legake' sha-

jle'gake' cheyin, ² san daa wwiazgake' chonle wen lega ben' chall chlleb Chios shajle'gake'. ³ Bitek sele wneyi naklə gon kwinkle xochi: ka no naklə yipaa yichjle, na' wchinze no bga no niy de or, wa gawkle lech' dii zakii nllleb. La' aga di-ikin dii lialote. ⁴ San dii lialote gak-shao' loo yichjlall'do'lena' kwenche gakle ben' gaxjlall' na' ben' lall'do' xen, la' lennan' nakan yel' xochi dii bi te cheyin na' zak'chgayin lao Chioza'. ⁵ La' kan' ben noolka' kani'yi, ben'ka' gok ben' li ben' shao'. Bxñilall'gake' Chioza' na' blexj yichje'ka' bzenaggake' che ben' che'ka'. ⁶ Ka ben dii Sárana', bzoe' xtill' dii ben' che', Abraham'a', na' golle'ne' "xan". Na' le' nakle dia che' shi gonle wen ka bene' na' bi illeble bi gak chele.

⁷ Na' ka le' ben' byo, li goni xool-leka' wen. Li gapshiigake' daa bi nakgake' chech ka cho' ben' byo, na' daa nezile lengaken' chido! ikaa yel' mbanna' daa gon Chioza' chele. Li gon dga kwenche bibi wsej wllonan wzenag Chioza' chele kat' choe'lwill-lene'.

⁸ Na' sto dii nia' le', yog'loltele chiya! soalen l'jwell-le wen, na' gakle ben' lall'do' yesh', na' gaki l'jwell-le ka chakile' to ben' bish' goljle. Li yiyesh'lallii ben', na' li gak ben' gaxjlall'. ⁹ Bi yizi'zle wzon che beena' chon mal chele wa beena' chbell chne chele. San li inabi Chioza' gak wen che', daa nezile gox wñabe' le' kwenche gak wen chele. ¹⁰ La': Beena' cheeni idie' lo yell-lioni na' gakte wen che', chiya! wsakee kwell inie', na' bi wi'e latj ichej dill' wxiye' cho'a lolleena'.

¹¹ Chiya! yilaalawee dii mala', na' gone' daa nak wen.

Chiya! sie' wneyi soalene' ben' mbalaz.

¹² La' Xancho Chioza' chap chwie' ben'ka' nak ben' li ben' shao', na' chzenague' kat' chñabgake' yel' goklen che'na',

per bi chle'shiile' ben'ka' chon mal.

¹³Aga no bi goni le' shi toshiizi zele chonle dii wenna'. ¹⁴Per shi yel' chon wen chelena' wti'lle yel' zak'zi'ka', chakomba le'. Na' bi gall illebze bi goni ben' le', na' bi gakshejlall'le. ¹⁵San do yichj do lall'le li koo Cristona' balaan, beena' nak Xancho. Na' toshiizi li se wneyi che dill'ka' yilliile lao nottezə ben' inabile' le' cheyi daa ba nonle lez. Na' xochi li we'lengake' dill'. ¹⁶Na' li gon daa nezile nak wen daa nakle Cristona' txen, kwenche ben'ka' naz chele bi chonle wen si'gake' yel' zto'. ¹⁷Wenchlan sak'zi'cho daa choncho wen, shi ka' cheeni Chioza', aga ka daa sak'zi'cho daa choncho mal.

¹⁸La' shlin shlaxjzan wxak'zi' Cristona' ni che saaxya chechoka'. Aga bi xtolee got', per wxak'zi'e ni checho cho' ben' mal, kwenche bizoalencho Chioza' wen. La'kzi beli chen che'na' ble'in yel' wita', Espíritu che Chioza' bisbane'ne' ladj ben' wetka'. ¹⁹Na' wyaje' latja' gana' nej ben' malka' jti'xe'ile' legake' daa bene' gan dii mala' na' yel' wita'. ²⁰Legaken' gok-gake' widenag kana' wzoa dii Noéna', na' wdap Chioza' yel' chxenlall' che-gake' shlak ben dii Noéna' barkwa'. Na' xon'chga ben'ka' wyoo loo barkwa' bi williayi'gake' loo nisa'. ²¹Na' daa bila ben'ka' loo nisa' kani'yi, zaklebin daa chchoacho nisa' naa. Na' daa chchoa-cho nisa' aga chixis chiyiban kwerp chechoni, san chli'n ba wñabicho Chioza' yixis yiyibe' yichjlall'do'choni kwenche sho' yichjcho bich bi xtol'cho de. Na' de yel' mban checho zejli kani daa biban Jesucristona' ladj ben' wetka'. ²²Na' biyep'e yabana', jachi'e shlaa de shli che Chioza' na' chñabi'e lao anjlka' na' lao bichlə yel' wñabia' dii de.

4 Na' kon ka gok che Cristona' wxak'zi'lene' beli chen che'na', ka'kzan chiya' izani kwindle. La' beena'

ba wxak'zi' beli chen che'na' bich chñabia' saaxyana' le'. ²Na' bich gonze' daa nazan che beli chen che'na' shlak ni mbane', san gone' ka cheeni Chioza'. ³Ba gok to ka't chonle txen ben'ka' bin' gombia' Chioza', choe'gake' cho'a xbayi beli chen che'ka', chongake' kon daa nazan chegake', chzoll chnitgakile', chaoxatgake', biz chegake' chon, na' choe'la'ogake' no yaj yag, diika' chakzbani Chioza'. ⁴Na' dii xen chakllejgakile' naa daa bich chonle legake' txen lawi diika' bi yejni'alallii, na' chiya dii chon chnagake' chele. ⁵Per wllin lla yidegake' kwent lao beena' ba ze kwas wñogloe' che yog'lol ben', ka ben' ni mban ka ben' ba wit. ⁶Daan, ben'ka' bengakile' dill' wen dill' kob che Chioza' na' wyajle'gake'n, la'kzi witgake' ka ba nchogbia' gak che yog' ben' yell-lío, ni mbankzgabe' lao Chioza'.

⁷Daa ba zoa gao kwiayi' yog'lolte dii de, chiya' gake' ben' nyeen nyeeniya na' sele wneyi we'llwill-le Chioza'. ⁸Na' dii lialote, gaki ljwell-le, la' beena' nap yel' chakina' chonxenlallee ka'ktezə dii choni ben' le'. ⁹Li wleb ljwell-le loo yoo lill-le do lall'le. ¹⁰To tole chiya' wgonle llin wde wdeli diika' non Chioza' gak gonle kwenche kon ga chyal'lan wchinlen gaklenle ben' yoblə. ¹¹Beena' naki che' wi'e cho'a xtil' Chioza', chiya' ine' kon ka nan. Na' beena' naki che' gaklene' gone' to llin, chiya' wchine' doxente fuerza' be' Chioza' le'. Na' yog'lol daa gonle, li gonan kwenche shajla'o Chioza' daa nakle Jesucristona' txen. La' le' chidolee sho'e balaan na' inabi'e zejli kani. Kan' nakan.

¹²Le' ben' bish'dawaa na' le' ben' zandawaa, bi gakllejile na' yibanzile daa chle'ile yel' zak'zi'ka', la' bi nakan ka dii yibanicho. ¹³San li yibayi daa lenle chzak'zi'le ka diika' wxak'zi'

Crístona', kwenche lekzka' yiba yizakile kat' ile'ile ziza'lene' balaan xen che'na'.¹⁴ Chakomba le' shi no ine zban chele daa nakle Crístona' txen, la' Espírituna', beena' nak ben' choo ben' xen che Chioza', zoalene' le'.¹⁵ Shi nole chzak'zi'le, wenlan sak'zi'le daa chonle dii wenna' aga ka daa sak'zi'le daa nakle wen xya, wa jlanle, wa benle bichlè dii mal, wa jalalli chele ga bi chak che ben'.¹⁶ Na' shi chzak'zi'le daa nakle Crístona' txen, bi chiyal' yiyii yido'ile, san li we'la'o Chioza' daa naklene' txen.

¹⁷ Ba bllin lla solo gon Chioza' yel' joschis che ben'ka' nonlilall'gake'ne'. Na' shi solon ladjchoni, çnakla gak che ben'ka' bi chzenag dill' wen dill' kob che Chioza', lla?¹⁸ Na' shi ben'ka' zej shli dii zan dii chen chle'gakile' na' axt kayaa-dia yilagake' lawinka', çalechli ki gak che ben'ka' bi chall chlleb Chioza' na' ben' saaxyaka'?¹⁹ Na' ben'ka' chzak'zi' kon ka nllia Chioza' bia' gak chegake', toshiizi chiyal' gongake' dii wenna' na' gon kwingake' lall' na' Chioza', beena' bxe bsile' legake', na' gaklene' legake' ka bchebe' gone'.

5 Le' ngoo lo na'le bish' ljwellchoka' nonlilall' Crístona', lekzka' nad' nlan' ka daa nlanle, na' ble'teid' ka wxak'zi' Crístona', na' len' chidołaa ikaa balaan xenna' kat' yilee. Daan, chat'yoid' le':² Gap wwiale ben'ka' ba nonlilall' Chioza', ben'ka' ba none' lall' na'le. Li gonan lega ben' chibayi gon ka chazlall' Chioza'. Na' aga gonyaadiazlen, ni bi gonle lez gaxjle dii xen, san li gonan do yichj do lall'le.³ Na' bi gonzle ka chnabia'tegal lao ben'ka' nak lall' na'le, san chiyal' wli'le chonle wen lawe'ka'.⁴ Na' kat' yila' Jesucrístona', beena' chnabia' yog'loł ben'ka' chap chwia ben'ka' nonlilall'gake'ne', na' gone' le' to balaan xen daa biga te cheyin.

⁵ Na' lekzka' le' bi' xkwid', wlexj yichjle lao ben' golka'. Na' yog'loł-le chiyal' wlexj yichjle lao ljwell-le ganga, na' gake ben' gaxjlall', la':

Chioza' bi chle'shiile' ben'ka' chep cha'lall',

san chaklene' ben'ka' nak gaxjlall'.

⁶ Li gak ben' gaxjlall' lao Chioza', beena' nap yel' wak choo yel' wak xen, kwenche kwee le' balaan kat' illin llana'.⁷ Li gon lall' na' Chioza' yog'loł dii chak chele, la' le' zie' wneyi chele.

⁸ Li gakto ben' nyeen nyeeniyi na' li se kwas. La' dii xiwaa daa chak'zi' chakzbani cho' chdan ka to bell znia, ba chbił chdon, na' chyiłjan no wlliai'n.

⁹ Li soatip li soashosh gonlilall'le Crístona' na' bi we'zle latj che dii xiwaa, la' nezkzile' doxenə yell-lioni yog'loł ben'ka' nakcho txen ba chle'gakile' yel' zak'zi'ka' ka diika' chen chle'ile.¹⁰ Na' ka ba biyoll wdele yel' zak'zi'ka' shloll, Chioza', beena' nap yel' chiyesh'lall' xen, yiyone' le' ka chazlallee na' gone' ka gachachle na' yizoatip yizoashoshe' le'. La' lekzen' gox wñabe' cho' kwenche yidoł'cho balaan xen che'na' daa bi te cheyin daa nakcho Crístona' txen.¹¹ Len' chidolee sho'e balaanna' na' inabi'e zejli kanı. Kan' nakan.

¹² Ben' bish'cho Silvónoni, beeni neqid' zoatip zoashoshe' nonlilallee Crístona', goklene' nad' bzej' le' to chop cho'a dill' kwenche wtip' lall'le. Na' dga nia' le' chli'n dii licha chaki Chioza' cho'. Li soatip li soashosh lo yel' chaki che'na'.

¹³ Ben'ki nonlilall' Crístona' yell Babilóniani, ben'ki ba gox wñab Chioza' ka gox wñabe' le', na' lekzka' Márconi, bi'ni nak ka dowalj bi' cha', chwappake' le' chiox.¹⁴ Li wwap chiox ljwell-le lega ben' chaki ljwellin.

Soashgale mbalaz yog'loł-le le' nakle Crístona' txen.

Kart wchopi daa bzej Pédróna'

1 Nad' Pedro, nak' wen llin che Jesucristóna' na' nak' postl che'. Chzej' le', ka le' ba nonlilall'cho Jesucristóna', beena' nak Chios checho na' ba bene' cho' yel' mban zejli kani daa nake' ben' li ben' shao'. Na' daa nonlilall'chone' nakan to dii zakii. ²Gaklenshga Chioza' le' na' gone' ka soale mbalaz inleeb daa ba nombia'lene' na' nombia'tele Xancho Jesús'a'.

³Kon yel' wak che'na' ba none' cho' yog'lol daa chyalljicho kwenche soacho goncho ka cheenile' daa nombia'chone', na' lo yel' ben' wen che'na', daa nak dii xen inleeb, gox wñabe' cho'. ⁴Na' daa nake' ben' wen inleeban, bchebe' gone' ka gake' ben' wen ka nake' le', na' yilale lao daa chxinj chlenan ben' yellioni daa chongake' daa nazan chegake'. Na' daa bchebe' gone' checho nakan dii wen inleeb na' dii xen zaka'n. ⁵Daan, le' ba chonlilall'lene' chiyal' gonle ka dii le kwenche gonle wen, na' gapchle yel' sin', ⁶na' inabia' kwinle, na' gaple yel' chxenlall' kat' bi chak chele, na' gonle ka cheenile', ⁷na' ile'shii ljwell-le na' gakile yog' ben'.

⁸Shi zizikchli gonle yog' diiki, gonan ka gakbia' lo yel' mban chelena' bi bembia'dadzle Xancho Jesucristóna'. ⁹Per beena' bi chon diiki, nake' ben' bi nteyi daa ba gol-lallee ba bixi biyech saaxya che'na' bene'. ¹⁰Daan, le' ben' bish'dawaa na' le' ben' zandawaa, daa ba gox wñab Chioza' le', li gon ka dii le soachechle gonle diiki. La' kat' ba chonle diiki bibi de wchixan le', ¹¹na' le' shajla'ole kat' yillinle gana' chñabia' Xancho Jesucristóna', beena' bisle' cho'.

¹²Daan, toshiizi yisaa lall'le diiki, la'kzi ba nezilen na' ba zoachechle chajle'le dill' li che Chioza' daa ba nombia'le.

¹³Shlak ni mban', chakid' chiyal' yisaa lall'le diiki, ¹⁴la' nezid' ba zoa gaoshosh

guet' kon ka ba wna Xancho Jesucristóna' gak cha'. ¹⁵Na' gontekz' to dii byen we'len' le' dill' naa ni mban' kwenche lekzka' kat' ba wit' lljadinile' diiki ba wnia' le'.

¹⁶Diika' ba bli' bsedinto' le' che yel' wak che Xancho Jesucristóna' na' cheyi daa yiyede', aga nakan dii biyiljall'zə ben', san chopshosh jalaonto'kin ble'into' yel' ben' choo ben' xen che'na'. ¹⁷Ble'into' ka wloo Xacho Chioza'ne' balaan len yel' chey cheeni' che'na' ka wñie' yabana' gana' nak liizelozi mbalaz, na' wne': "Beenin xiinaa, le chakidee na' chazlall'chgaid' ka chone'." ¹⁸Neton' zelennto'ne' lo yaa che Chioza' na' kwinnton' beninto' shii Chioza' ka wñie' yabana'te.

¹⁹Na' daa ble'into' dga, bichop cho'a dill' daa bzej dii ben'ka' wdixjee daa goll Chioza' legake' kani'yi. Na' le', chiyal' sele wñeyi xtillleeka', daa nakan ka to yil' daa chzeeni' ga nak shgasj shchol, axt ki illin lla yiyed Jesucristóna', beena' chzaklebi belj xsila', na' kooche' beeni' che'na' loo yichjlall'doleka'. ²⁰Na' dii lialote shajniile dga: ni to cho'a dill'ka' bzej dii ben'ka' wdixjee daa goll Chioza' legake' kani'yi bi nakan dii wdiljlall'zgake'. ²¹La' dii ben'ka' wdixjee daa goll Chioza' legake' kani'yi, biga wñegake' tobia'lall'zgake', san Espiritu Sántonan' bzajniile' legake' kwenche be'gake' xtill' Chioza'.

2 Per lekzka' ladj ben' Israelka' wzoa ben' wxiye', wnazgake' chyixje'gake' daa goll Chioza' legake'. Na' ka'kzə ladjlena' soa ben' wli' wsedi de wxiye'ka'. Na' wli' wsedgake' le' ka ki gake'zile' de wxiye' che'ka' daa chlliaiyi' ben'. Na' wzoagake' ka'lə Xanchona', beena' wdixj saaxya che'ka'. Na' daa gongake' ka', tolbe' kwiaiyi'gake'. ²Ben' zan gongake' txeen dii mal che'ka' na' gongake' dii zban daa nazan chegake'. Na' ni chegake' ine ben' zban che dill' li che Chioza' daa nocho. ³Daa selall'gake'

gat' kwe'gakile', wli' wsedgakile' le' daa chyiljall'zgake'. Kani'teyi ba nchogbia' chegake' kwiayi'gake', na' bich gaxken chegake'.

⁴Chioza' bi wxi'xene' che anjlka' bxinj, san btakw bcheje' legake' lo yel chol'a' latja' gana' nseje' legake', na' nan' nkweze' legake' axt kat' illin lla wchogloe' chegake'. ⁵Ni bi wxi'xene' che ben' yell-lioka' kani'yi, san bene' yejsiw' wala' bliiayee ben' malka'. Per dii Noéna', beena' wdixje'i ben' nan chiyal' gongake' wen, Chioza' bisle'ne' len zi gall ben'. ⁶Lezkza' Chioza' bchogloe' che ben'ka' lle' yell Sodómana' na'ch yell Gomórrana', na' bzey bti'e' yellka' axt ka biyakgakan de, kwenche ile'i ben' ka gag che ben' malka'. ⁷Per bisle' dii Lota', beena' gok ben' wen, beena' bwiyi dii zbanka' ben ben' malka'. ⁸Na' ben' wenni wzoa ladjeka', gokyeshii loo yichjlall'do'ena' ni cheyi dii malka' ble'ile' bengake' yog' lla. ⁹Yog'lo' diiki chli'gakan nan Xanchona' nezile' nak gone' yisle' ben'ka' chon ka chazlallee lawi bittezə dii lallj. Na' lezkza' nezile' nak wkweze' ben' malka' axt kat' illin lla wchogloe' che yog'lo' ben'.

¹⁰Na' dii lliarote wsak'zi'ch Xanchona' ben'ka' choe' cho'a' xbayi beli chen che'ka' daa nxinj yichjlall'do'eka', na' bi cheentegakile' no inabia' legake'. Ben'ka' bibi nalli na' nakgake' ben' cha'sib, na' ni bi chllbgake' inegake' che anjlka'. ¹¹San anjlka', la'kzi nakchgake' ben' walch na' napchgake' yel' wak xench, bi chiyaxjgakile' inegake' che anjlka' bi bzenag kwenche gaogake' xya chegake' lao Chioza'.

¹²Per ben'ki chnetezgake' zban che diika' bi chajni'gakile'. Nakgake' ka bayix'ka' baka' bi nteyi, baka' chalj-gakb na' chzen ben' legakb na' chit-gake'b. Ka'kzan gag che ben'ka', lezkza' kwiayi'gake'. ¹³Na' ikaagake' laxji dii mala' ba bengake'. Ben'ki chakgakile'

zix' sia choe'gake' cho'a' xbayi beli chen che'ka' axt tellatekzə. Na' kat' chhengake' le' cheej chaole, bi nxe bi nzak' nakgake' daa chibagakile' chongake' daa nazan chegake'.

¹⁴Nottezə noolə ile'gakile' chzelall'gake'ne', na' bi chelj chlla'gakile' gongake' saaxyana'. Na' chgooyel'gake' ben'ka' bin' gakcha lo xnez Chioza' kwenche gongake' dii mala', na' le chzelall'gake' gat' kwe'gakile'. Ben'ki chon ka' ba naktēn kwiayi'gake'. ¹⁵Ba wlej yichjgake' nez li che Chioza' na' ba zejgake' lo nez daa wyoo Balaama' xiin Beora', beena' wyoolall' sho' laxje' che dii mala' bene'. ¹⁶Na' ni che dii mala' nan gone', to burr, ba bi chak ine, wneb ka ben' na' bsheshlem le' kwenche bi gone' dii mala' ba ngoo yichje' gone' daa ncho' nitile'.

¹⁷Ben' malki zaklebgakile' beja' daa bich bi nis chal, na' ka bejka' choa' be'na'. Ba nchoglo chegake' soagake' zejli kani' gana' liizelozi nak shgasj shcho'.

¹⁸Chnegake' cha'sibə choe'gake' dill' dii bibi zakii, na' chgooyel'gake' ben'ka' kayaadia ba bichejgake' ladj ben'ka' chon dii mala' kwenche sto shii yizologake' yiyoe'gake' cho'a' xbayi beli chen che'ka'. ¹⁹Na' che'gake' wak gongake' daa nazan chegake', la' aga bi xya che dii mala' de, na' le'ye'n'gaken' ntakw nchej dii mala'. La' nottezə ben' chone' kon ka na daa chnabia' le', ba ndo'e lawinna'. ²⁰Na' ben'ka' ba biyell bila'gake' lao dii mala' daa de yell-lioni daa ba benli-lall'gake' Xancho Jesucristona', beena' bisla cho', shi sto shii yitakw yichej dii mala' legake', gaktechlə mal chegake' aga ka gok chegake' dii nech kana' bin' gonjilall'gake'ne'. ²¹Wenchlan shel' bi bembia'kzgake' nez li che Chioza' aga ka daa bembia'gake'n na' bilaala'ogake' cho'a' xtilleena' daa bli' bsemi ben' legake'. ²²Na' daa bengake' ka', billinin che dillaa de daa na: "Bekwaa chiyaob daa biyebb,

na' kusha', bana' zi' gozj, chibix chitolb loo benja' sto shii."

3 Le' ben' bish'dawaa na' le' ben' zandawaa, dgan de wchop shii chzej' le'. Na' chopten choe'len' le' dill' kwenche chisaa lall'le sele wneyi che dii wenna' daa ba nezile. ²Li lljadini dill'ka' be' dii ben'ka' wdixjee daa goll Chioza' le-gake' kani'yi, na' daa bllia Xanchona' bia', beena' bisla cho', daa ba bli' bsemi postlka' le'.

³Dii lliilote chiyal' inezile, kat' ba zoa te che yell-lioni, na' ichej ben' gongake' daa nazan chegake' na' gonlegake', ⁴inagake': "¿Berache bin' yiyed Crístona' ka bchebe' gone'? Ba wit dii xaxna'choka' na' toz ka ni chak naa ka kana' wxw wzilte yell-lioni." ⁵Ben'ka' na' ka', bi cheengakile' yisa'lall'gake' daa gok kani'yi, kana' to ka wnezə Chioza' na' wya' wbin' yabana', na' biyak nisdok'ka' toz na' bli'lao yell-liona'. ⁶Na' lezkza' len' bllie' bia' gok yejsiwaa kwenche bllia'yi' nisa' yell-lioni kani'yi. ⁷Na' yabana' len yell-lioni, diiki chle'icho naa, ba nllia Chioza' bia' chegakin wzey wte yi'na' legakan llana' wchogloe' kwiayi' yog' ben' malka'.

⁸Na' le' ben' bish'dawaa na' le' ben' zandawaa, bi gal-lall'le Xanchona' chle'ile' tlla ka to mil yiz na' to mil yiz ka tllazə. ⁹Zoa ben' ne' chshe'lall' Xanchona' gone' ka bchebe'. Aga chshe'lalleen', san nape' yel' chxenlall' daa bi cheenile' no kwiayi', na' cheenile' yog' ben' yiyaj yileni.

¹⁰Llana' yiyed Xanchona' tokongan-zan yilee, ka chon to ben' wban tokonganz cho'e loo yoo lill ben'. Na'ch gak to sshag wal na' yinitlo yabana' na' diika' llia xaninna', wzey yi'na' legakan na'

kwiayi'gakan, na' yell-lioni na' yog' dii de lawinna' sheygakan.

¹¹Daa nezicho yog'lolte dii de kwiayi'gakan, chiyal' goncho ka dii le gakcho ben' li ben' shao' na' soacho goncho ka cheeni Chioza' ¹²shlak chbezcho llana' wchogloe' che ben', na' goncho to dii byen kwenche yob gakan. Llana' gak ka', yi'na' wllia'yi'n yabana' na' diika' llia xaninna' yilengakan na' kwiayi'gakan. ¹³Na' cho', chbezcho to yaba kob na' sto yell-lio kob daa bcheb Chioza' gone' cho' gana' she' shgal' ben' li ben' shao'.

¹⁴Daan, le' ben' bish'dawaa na' le' ben' zandawaa, shlak zoale chbezle diiki, li gon to dii byen kwenche soalenle Chioza' wen, na' bibi xtoll'le gat' ni bibi nda' nchen yichjllal'do'lena' kat' lljazele lawe'na'. ¹⁵Na' chiyal' shajniile' dga: Xanchona' nape' yel' chxenlall' checho daa bi cheenile' kwiayi'cho, san cheenile' yog'cho yilacho. Na' lezkza' ben' bish'cho Páblona', beena' le chakicho, bzeje' xtillii diiki kon yel' sin' daa be' Chioza'ne'. ¹⁶To to ka bzej Páblona', bi'e dill' che diiki. Na' bal' diika' bzeje' le lallj shajniichon, na' ben'ka' bi nteyi len ben'ka' bin' gakcha lo xnez Chioza' chajni'gakile'n klelə, ka chongake' che bichlə daa na Cho'a Xtill' Chioza', chajni'gakile'n klelə, na' chllia'yi' kwingake'.

¹⁷Na' le' ben' bish'dawaa na' le' ben' zandawaa, daa ba nezile dga, li wsak' kwenche ki gonlleji ben' malka' le' na' yilaale lo xnez Chioza'. ¹⁸San li gon ka dii le shajni'chile ka chaklen Xancho Jesucristona' cho', na' li gombia'ch beena' bisle' cho'. Len' chidolee sho'e balaan naa na' zejli kani. Kan' gakan.

Kart nech daa bzej Juanna'

1 Chzejnto' le' kwenche inezile che beena' ba zoa kana' zi' xe sil yell-lioni, beena' bzenagnto' bi'e dill' na' chopshosh jalaonto'kin ble'into'ne'. Bwianto' ka nake' na' bex'nto'ne' kon na'nto'ki kana' wde' yell-lioni. Len' nake' Xtill' Chioza' na' len' cho'e ben' yel' mban zejli kani. ²Na' beeni nsa' yel' mban zejli kani bide' yell-lioni, na' ble'into'ne' na' choe'nto' dill' che'. Na' chyixje'into'n le' kwenche inezile ba zoalenkze' Xacho Chioza' kana' zi' xe silte yell-lioni na' ba bidsoe' ladjchoni. ³Chyixje'into' le' che beeni ble'into' na' bzenagnto' bi'e dill', kwenche yiyoll yido gakte neto' txen. Na' dii li ba nakkzcho txen Xacho Chioza' na' Xiine' Jesucrístona'. ⁴Chzejnto' le' diiki kwenche yiyoll yido soale mbalaz.

⁵Diikin bli' bsedi Jesucrístona' neto', na' chyixje'into'n le': Chioza' nake' ka beeni' daa nake' liizelozi ben' li ben' shao', na' bibi dii mal ni de wxiye' nsee, diika' nak ka yel chol. ⁶Shi inacho nakchone' txen na' chdatecho lo yel chola', chziye'zchon na' bi zejlencho daa nak dii li. ⁷San shi zoacho lo beeni'na' ka zoa Chioza' lo beeni'na', na' ba nakcho toz, na' xchen Xiine' Jesucrístona' chixis chiyiban yichjlall'do'chona' kwenche bibi saaxya nda' nchenan.

⁸Shi inacho bibi saaxya napcho, chziye'z kwinchon, shi naa, na' nakbia' bi nombia'cho dii lina'. ⁹San shi yixoadol'cho saaxya chechoka' lao Chioza', beena' toshiizi chon ka chchebe' na' nake' ben' li ben' shao', wizi'xene' saaxya chechoka' na' yixis yiyibe' cho' che yog'lol' dii malka' ba bencho. ¹⁰Shi inacho bin' goncho saaxya, ba chtobicho Chioza' de wxiye'na', na' nakbia' bin' gombia'cho cho'a xtilleenan', shi naa.

2 Le' xiindawaa, chzej' le' dga kwenche bi wxinj wlenle. Na' shi nocho ba

bxinj blencho, zoa to ben' inabe' cho' lao Xacho Chioza', len' Jesucrístona', beena' nak dowalj ben' li ben' shao'. ²Na' len' wdixje' saaxya chechoka' kon yel' mban che'na', na' aga che to cho'zan wdixje', san len che yog' ben' lle' zbii zkaan yell-lionin.

³Shi choncho ka nllia Chioza' bia' goncho, nezicho ba nombia'chone'. ⁴Na' shi zoa ben' ne': "Nombiane'", na' bi chone' daa nllie' bia', nake' to ben' wxiye' na' nakbia' bi nombi'e dii lina'. ⁵San shi ba choncho ka na cho'a xtill' Chioza', dii li ba chakichone' ka chiyali. Na' kan' chakbe'icho ba nakchone' toz. ⁶Beena' ne' ba nake' Chioza' tozə chiyal' wsa' che' ka bsa' che Jesucrístona'.

⁷Le' ben' bish'dawaa na' le' ben' zandawaa, ka nak dga chzej' le' bi nakan dii kob, lekzannan' bzenagle dii nechte. Nakan dii nllia Chioza' bia' kani'teyi na' bakzə yoon nagle. ⁸La'kzi ka', wak inacho dga chzej' le' nakan dii kob, la' dii li nakan ka ben Crístona' na' ka chonle. Na' dii mala' daa nak ka yel chol' zej chiyol chinitan, na' beeni' che Chioza' ba chzeeni'n.

⁹Shi to ben' ne' zoe' lo beeni' che Chioza', na' chakzbanile' bish' ljwelle'na', lo yel cholan' ni zoe'. ¹⁰Beena' chaki bish' ljwelle'na' ba zoe' lo beeni' che Chioza', na' bibi de wchixan le'. ¹¹San beena' chakzbani bish' ljwelle'na' chde' lo yel chola' na' bi nezile' galan zeje', la' dii mala' chone' ba nonan le' ka to ben' lchol.

¹²Le' xiindawaa, chzej' le' dga, daa ba bizi'xen Chioza' saaxya cheleka' daa wit Jesucrístona'. ¹³Le' zoa xiin' chele, chzej' le' dga daa nombia'le beena' ba zoa kana' zi' xe silte yell-lioni. Le' bi' wew', chzej' le' dga daa chzoile bi chzenagle che dii xiwaa.

Le' xiindawaa, chzej' le' dga daa nombia'le Xacho Chioza'. ¹⁴Le' zoa xiin' chele, chzej' le' dga daa nombia'le beena' zoa kana' wxe wzil yell-lioni. Lekzka'

chzej' le' bi' wew', daa nakle bi' wal na' ba bleble Cho'a Xtill' Chioza' loo yichjlall'do'lena', na' bi chzenagle che dii xiwaa.

¹⁵ Bi gaktekile yell-lioni, ni daa de law-inna'. Nottezcho shi chakicho daa de yell-lioni, bi chakicho Xacho Chioza'.

¹⁶ La' yog'loł diiki de yell-lioni: dii mala' daa chzelall' beli chenna', na' daa chzelall'cho bi dii chle'icho, na' yel' cha'siba'. Aga legakannan' chshab Xacho Chioza', san nakan dii chshab yell-lioni. ¹⁷ Na' yell-lioni chde cheyin len dii malka' chzelall'cho lawinna', san beena' chon ka chazlall' Chioza' de yel' mban che' zejli kani.

¹⁸ Le', xiindawaa, ba zoacho llaka' zeelo. Na' ba benile za' Beena' gakzbanile' Crístona'.⁸ Na' naa ba chle'icho ben' zan ben'ka' chakzbangakile'ne'. Daan, ba nezicho ba zoacho llaka' zeelo. ¹⁹ Legake' ba bengake' cho' txen la'kzi aga dii li gokgake' cho' tozə. La' shel' dii li gokgake' cho' tozə, ni nakgake' cho' txen, shel'ka'. Na' daa bikwasgake', bli'gake'n kwasloł aga do lall'gake'n gokgake' cho' txen.

²⁰ Per beena' nak liizelozi ben' wen ben' shao' ba bene' kwenche zoa Espíritu Sántona' loo yichjlall'do'lena'. Na' daan, yog'le chajniile dill' li che Chioza'. ²¹ Aga chzej' dga daa inacho bi nombia'le dii linan', san chzeja'n daa ba nombia'lennan', na' nezicho bibi dill' wxiye' nchix dill' li che Chioza'.

²² ¿Noran ben' wxiye'na'? Len' beena' na che Jesúza' aga len' Crístona', beena' chbezcho wsel' Chioza'. Beena' na ka', len' chakzbanile' Crístona', na' chzoe' Xacho Chioza' ka'lə len Xiine' Jesucrístona'. ²³ Beena' chzoe' Xiin Chioza' ka'lə lenkz Xe' Chiozan' chzoe' ka'lə. San beena' ina chonlilallee Xiin Chioza', lenkz Xe'nan' nake' txen.

²⁴ Daan, li kooshao' loo yichjlall'do'lena' yog'loł daa wzolo chsedle ka wyoole lo xnez Chioza'. Na' shi ba wlooshao'len loo yichjlall'do'lena', toshiizi gake tozə Xacho Chioza' len Xiine'na'. ²⁵ Na' dgan ba bcheb Jesucrístona' checho: gone' yel' mban zejli kani.

²⁶ Chzej' le' dga, daa chda ben'ka' cheengakile' siye'gake' le'. ²⁷ Na' ka nakle le', ba nzoa Jesucrístona' Espíritu Sántona' loo yichjlall'do'lena', na' aga chyaljchile no wsemi le' daa nak dii li. La' kwin Espíritu Sántona' ba chsedile' le' yog' diika', na' daa chli' chsedile' le' nakan dii li, bi nakan de wxiye'. Na' toshiizi li gak Crístona' tozə, ka ba bli' bsemi Espíritu Sántona' le'.

²⁸ Na' naa, xiindawaa, chiyal' gachcho Crístona' toz toshiizi kwenche kat' yiyede' yibaicho na' bi yiyi yido'icho lawe'na'. ²⁹ Na' daa ba nezile nake' ben' li ben' shao, lekzka' chiyal' inezile yog' ben'ka' chongake' daa nak shlichha nakgake' xiin Chios.

3 Li gakbe'i ka chaki Xacho Chioza' cho' daa ne' nakcho xiine'. Na' dii li ba nakkzcho xiinen'. Daan, ben'ka' bi nonlilall'gake' Chioza' bi chle'shi'gakile' cho', la' bi nombia'gake'ne'. ² Le' ben' bish'dawaa na' le' ben' zandawaa, ba nakcho xiin Chios. Na' la'kzi bin' inezyen'icho nakan yiyakcho, nezicho kat' yila' Jesucrístona' yiyakcho ka nake', la' ile'ichone' do ka nake'. ³ Na' nottez beena' ba none' lez dga, bich chone' txen dii mala' kwenche gake' ka nak Jesucrístona', beena' bibi dii mal nda' nchene'.

⁴ Na' beena' chxinj chlen chyishje' daa nllia Chioza' bia', la' kat' chxinj chlencho, xtilleenan' chyishjcho. ⁵ Le' ba nezile bid Jesucrístona' yell-lioni

§2:18 Beena' gakzbanile' Crístona': xtila' nagake' El Anticristo. Lekzka' bwia 1Jn. 2:22; 4:3; 2Jn. 1:7, na' 2Tes. 2:3.

kwenche bikwase' saaxya chechoka', na' nezteile bibi saaxya che' de. ⁶Na' yog' ben'ka' nalgake'ne' toz bi chdagake' lao saaxyana'. San yog' ben'ka' chda lao saaxyana' bin' gake'gake'le' non nak Crístona', ni bi nombia'gake'ne'. ⁷Le' xiindawaa, ni we'le latj no siye' le'. Beena' chon daa nak shli nake' ben' li ben' shao' ka Jesucristona' nake' ben' li ben' shao'. ⁸Na' beena' chxinj chlen nake' xiin dii xiwaa, la' dii xiwaa bxinj blenan kana' zi xe silte yell-lioni. Na' ni cheyi dgan bid Xiin Chioza', kwenche wlliyee yog'lol daa chon dii xiwaa.

⁹Beena' ba nak xiin Chios bich chde' lao saaxyana', la' Chioza' ba bikobe' yel' mban che'na'. Na' daa ba nake' xiin Chioza', bich gake' te' lao saaxyana'. ¹⁰Na' nakbia' ben'ka' dii licha nalgake' xiin Chios na' ben'ka' nak xiin dii xiwaa. La' nottez beena' bi chon daa nak shli na' bi chakile' bish' ljwelle'na' bi nake' xiin Chios.

¹¹Kana' wzolotele bzenagle xtill' Crístona' benile dga: chiyal' gake' bish' ljwellcho. ¹²Bi chiyal' goncho ka ben dii Caína', bene' dii xiwaa txen na' bete' ben' bisheena'. Na' ¿biche betze'ne'? Bete'ne' daa bentezi ben Caína' dii mala', na' ben' bisheena' bene' daa chiyoolallii Chioza'.

¹³Le' ben' bish'dawaa na' le' ben' zandawaa, bi gakklejile shi ben'ka' bi chajle' che Chioza' chakzbangakile' le'. ¹⁴Daa chakicho bish' ljwellchona' nezicho bich chdacho lo neza' gana' kwiayi'cho, san ba de yel' mban checho zejli kani. La' beena' bi chaki bish' ljwelle'na' ni zeje' lo neza' gana' kwiayee. ¹⁵Nottez ben' chakzbanile' bish' ljwelle'na', lebzín chonlene' ben' wen xyana'. Na' nezile ni to wen xya bi de yel' mban che' zejli kani. ¹⁶Crístona' bliile' cho' ka nak yel' chakina' daa bzani yel' mban che'na' ni checho. Na' lekzka' cho' chiyal' izani yel' mban chechoni ni che bish' ljwellchona'. ¹⁷Shi ga zoa-

cho chaj chdecho mbalaz na' chwiacho bish' ljwellchona' chyallj chchinile' na' bi chiyesh'lallichone', ¿nakran goncho inacho chakicho Chioza'? ¹⁸Le' xiindawaa, bi chiyal' gake' bish' ljwellcho de cho'a dill'z, san chiyal' wli'cho dii li chaki ljwellcho.

¹⁹Na' nezicho shi ba chaki ljwellcho, na' wli'n ba zejcho lo nez lina', na' nezicho Chioza' chibaile' ka choncho, ²⁰la'kzi yichjlall'do'choni inan nakcho ben' saaxya. La' Chioza' nakche' ben' choo ben' xench ka cho' na' nezile' yog'lolte. ²¹Le' ben' bish'dawaa na' le' ben' zandawaa, shi yichjlall'do'choni chakbe'in bibi xtol'cho de, na' bi gall illebcho we'llwillchone', ²²na' gone' bittezə daa inabichone', la' chzenagcho daa nllie' bia' goncho na' choncho ka chazlallee. ²³Na' dgan nllie' bia' goncho: gonlilall'cho Xiine' Jesucristona', na' gake' bish' ljwellcho ka ba bliie' bia' goncho. ²⁴Ben'ka' chongake' ka nllia Chioza' bia' ba nalgake'ne' toz na' zoalene' legake'. Na' nezicho zoalene' cho' daa ba bene' Espíritu che'na' zoe' loo yichjlall'do'choki.

4 Le' ben' bish'dawaa na' le' ben' zandawaa, bi shajle'le che nottez ben' ine': "Ba chne Chioza' nad'", san li wwiagaxjə shi leile' Chioza' chnie'ne' wa shi naze'n. La' yell-lioni ba chas chda ben' zan ben' chziye' nazgake' chyixje'gake' daa na Chioza'. ²Dgan gnan ka gake'ile beena' chyixjee daa na Espíritu che Chioza': yog'lol ben'ka' cho'e dill' nan Jesucristona' nake' Chios na' bide' golje' goke' ben' de beli chen ka cho', beenan' zoalen Espíritu che Chioza'ne'. ³Na' nottez beena' ina Jesucristona' bi goke' ben' de beli chen, bi zoalen Espíritu che Chioza'ne' na' chakzbanile' Crístona'. Na' ba nezile ba zoa wli'lao beena' gake'banile' Crístona', na' naa ba chdakz ben' chon ka' yell-lioni.

⁴Le' xiindawaa, ba nakle Chioza' tozə, na' bich chajle'le che ben' wxiye'ka',

la' beena' zoalene' le' napche' yel' wak xench aga ka dii xiwaa daa chda yell-lioni. ⁵ Ben' wxiye'ka' nogake' diika' na ben' yell-lioki, daan, zle che yell-lioniza choe'gake' dill', na' ben'ka' bi nombia'gake' Chioza' chzenaggake' xtilleeka'. ⁶ San cho' ba nakcho Chioza' tozə, na' ben'ka' nombia'gake' Chioza' chzenaggake' checho. Na' ben'ka' bi nakgake' Chioza' tozə, bi chzenaggake' checho. Na' kan' chnezicho non cho'e dill' li daa chzajni Espiritu che Chioza'ne' na' non cho'e dill' wxiye' daa chzajni dii xiwaane'.

⁷ Le' ben' bish'dawaa na' le' ben' zandawaa, chiyal' gaki ljwellcho, la' kan' chon Chioza' chakile' ben'. Nottezə ben' zoe' chaki ljwelle', nakbia' dii li nake' xiin Chios na' nombi'e Chioza'. ⁸ Na' beena' bi chaki bish' ljwelle'na' bin' gombi'e Chiozan', la' Chioza' zoe' chakile' cho'. ⁹ Chioza' bli'e ka chakile' cho' daa bselee Xiine'na' tlish' tyaj yell-lioni kwenche gonlilall'chone' na' gat' yel' mban checho dii bi te cheyin. ¹⁰ Kin nak yel' chaki daa nak dowalj: aga inacho cho'lan goki-cho Chioza', san daa chaki Chioza' chon' bselee Xiine'na' wite' kwenche wdixje' saaxya chechoka'.

¹¹ Na' le' ben' bish'dawaa na' le' ben' zandawaa, shi kan' chaki Chioza' cho', ka'kzan chiyal' gaki ljwellcho. ¹² Ni to ben' bin' ile'ile' Chioza', per shi chaki ljwellcho, Chioza' zoalene' cho' na' yel' chaki che'na' ba chonan llin lo yel' mban chechoki ka chiyali. ¹³ Nezi-cho zoalench Chioza' na' le' zoalene' cho' daa ba nzoe' Espiritu che'na' loo yichjlall'do'choki. ¹⁴ Na' neto' ble'into' Xiin Chioza' na' choe'nto' dill' nan Xacho Chioza' bselee Xiine'na' kwenche yisle' ben' yell-lioni na' bi kwiayi'gake'. ¹⁵ Nottezə ben' chajli'e na' cho'e dill' ne' Jesúza' nake' Xiin Chioza', Chioza' zoalene'ne' na' le' zoalene' Chioza'.

¹⁶ Cho' ba nezicho na' ba chajle'cho chaki Chioza' cho'. Chioza' zoe' chakile' cho', na' shi zoacho chakichone' na' chaki ljwellcho, zoalench Chioza' na' le' zoalene' cho'. ¹⁷ Na' shi ba chaki ljwellcho, chli'cho yel' chaki che Chioza' ba chonan llin lo yel' mban chechoki ka chiyali, na' bi illebcho llana' yizi'e cho' kwent, la' ka wda Jesucristona' ka'kzan chdacho chakicho ben' yell-lioni. ¹⁸ Gana' zoa yel' chaki che Chioza' bibi yel' chlleb de. Na' shi dii li napcho yel' chakina' aga wllebcho yel' zi'na' wsel' Chioza'. La' beena' chlleb, bin' gon xshin yel' chaki che Chioza' lo yel' mban che'na' ka chiyal'.

¹⁹ Cho' chakicho Chioza', la' zigaate len' gokile' cho'. ²⁰ Shi zoa ben' ne': "Chakid' Chioza'", per chakzbanile' bish' ljwelle'na', chziye'ze'n. ¿Nakran gone' gakile' Chioza', beena' bi chle'ile', len chle'itele' bish' ljwelle'na' na' bi chakile'ne'? ²¹ Dgan nllia Jesucristona' bia' goncho: Beena' chakile' Chioza', lekzka' chiyal' gakile' bish' ljwelle'na'.

5 Yog'lol ben'ka' chajle'gake' Jesúza' nake' Cristona', beena' bsel' Chioza', legaken' ba nakgake' xiin Chios. Na' yog' ben'ka' chakgakile' Xacho Chioza' lekzka' chakgakile' ben'ka' nak xiine'. ² Nezi-cho shi chakicho Chioza', choncho daa nllie' bia' goncho, lekzka' chakicho yog'lol ben'ka' ba nak xiin Chios. ³ Shi choncho daa nllia Chioza' bia' goncho, ba chakichonen', shi naa. Na' diika' nllie' bia' goncho bi nakan zii sshab. ⁴ Na' yog' ben'ka' ba nakgake' xiin Chios chizogakile' bich chongake' dii mala' de yell-lioni. Na' daa chonlilall'cho Jesucristona', chizoicho bi choncho dii mala' de yell-lioni. ⁵ Ben'ka' chajle' Jesúza' nake' Xiin Chios, legaken' chzogakile' bi chongake' dii mala' de yell-lioni.

⁶ Ka bid Jesucristona' yell-lioni wchoe' nisa' na' blalj xchene'na' kana' betgake'ne'. Aga to wchoaze' nisan', san bene' diiki chopte, wchoe' nisa' na' blalj

xchene'na'. Na' Espiritu che Chioza' choe' dill' ka daa gokə, la' len' zeelo cho'e dill' daa nak dii li. ⁷Na' shon diika' choe'n dill' che Jesucristona': ⁸Daa bidsoalen Espiritu che Chioza' le', na' daa wchoe' nisa', na' daa blalj xchene'na'. Na' toz ka choe'gakan dill'. ⁹Chajle'cho dillaa choe' ben', per zak'chi dillaa daa choe' Chioza', na' len' cho'e dill' che Xiine'na'. ¹⁰Beena' chajle' che Xiin Chioza', nezile xtil' Xa-cho Chioza' daa bi'e che Xiine'na' nakan dill' li. Na' beena' bi chajle' che Chioza' ba chone' Chioza' ka to ben' wxiye' daa bi chajli'e che dillaa bi'e che Xiine'na'. ¹¹Na' dillaa bi'e nan: ba bene' cho' yel' mban zejli kani, na' bene'n daa nonlilall'cho Xiine'na'. ¹²Beena' nake' Xiin Chioza' tozə, de yel' mban che' zejli kani, na' beena' bi nake' Xiin Chioza' tozə, bi gat' yel' mban che' zejli kani.

¹³Chzej' le' dill'ki, ka le' nonlilall'le Xiin Chioza', kwenche inezile ba de yel' mban chele zejli kani.

¹⁴Nxenlall'cho wzenag Chioza' checho kat' bin inabichone' shi nakan daa cheenile' gakə. ¹⁵Na' daa nezicho chzenague' checho bin chnabichone', lekzka' nezi-cho gone' daa chnabichone'.

¹⁶Na' shi chle'icho to bish' ljuwell-cho chone' dii mala' daa bi nak dii kwiayi'lene', chiya' inabicho Chioza' gaklene'ne', na' Chioza' gone' ka yiyak-shao' yichjall'do'ena'. Kan' goncho shi chone' dii mala' daa bi kwiayi'lene'. De dii mala' daa chon ben' daa wliayi'n le', na' bi nia' inabile Chioza' gaklene' beena' chon daa nak ka'. ¹⁷Yog' dii mala' nakan saaxya, per de saaxyana' daa bi wliayi'n cho'.

¹⁸Nezicho beena' ba biyak xiin Chioza' bich zoe' chone' dii mala', la' Jesucristona', Xiin Chioza', chap chwie'ne' kwenche dii xiwaa bich gak gox' wnizan le'.

¹⁹Nezicho nakcho lall' na' Chioza', na' yog' ben'ka' bi chzenag che Chioza' nakgake' lall' na' dii xiwaa.

²⁰Na' lekzka' nezicho ba bid Xiin Chioza' na' bidzajniile' cho' kwenche nombia'cho beena' nak dowalj Chios. Na' ba nakcho lall' nee daa nonlilall'cho Jesucristona'. La' Jesucristona' nake' dowalj Chios, na' chone' yel' mban checho zejli kani. ²¹Le' xiindawaa, mara gonlilall'le chioska' chon benecha'.

Kart wchopi daa bzej Juanna'

1 Nad' ngoo lall' na' bish' ljjwellchoki nonlilall' Crístona' chzej' li', noolə ba wlej Chioza' gako' lall' nee len xiino'ka'.** Na' le chakid' le', na' aga toz nad' chakid' le' san len yog' ben'ka' ba nombia' daa nak dii lin. ²Le chakid' le' daa ba nombia'cho daa nak dii li daa yoo loo yichjlall'do'choka' naa, na' soalenan cho' toshiizi. ³Chioza', beena' nak Xacho, len Xiine' Jesucristona', gongake' ka gak wen checho, na' yiyesh'lall'gakile' cho', na' gongake' ka soacho mbalaz kwenche zejch gombia'cho daa nak dii li na' gaki ljjwellcho.

⁴Dii xen biba bizakid' ka wnezid' bal xiino'ka'†† chdagake' lo nez li che Chioza', kon ka na Xachona' goncho. ⁵Na' naa, nia' le' chiya' gaki ljjwellcho ganga. Dga nia' le' aga nakan dii zi' benicho, san dezd nechte wnezicho dga. ⁶Dgan yel' chakina': goncho daa non Chioza' mandad. Na' dgan cheenile' goncho: soacho gakichone' na' lekzka' gaki ljjwellcho kon ka ba benicho dezd nech.

⁷Ben' zan ben' wxiye'ka' ba chda yell-lioni, na' bi chajle'gake' nan ba bid Jesucristona' yell-lioni goke' ben' de beli chen. Ben'ka' bi chajle', legaken' ben' wxiye'ka', ben'ka' chakzbangakile' Crístona'. ⁸Wsak'gale kwenche bi gakdadz llinna' ba benle, san yizi'le banez do ka nak daa chidol'le.

⁹Nottezə beena' yilaa nez li che Chioza' na' bich zejlene' daa bli' bsemi Crístona', bi zoalen Chioza'ne'. Na' beena' zejlen daa bli' bsemi Crístona', zoalen Xacho Chioza'ne' na' lekzka' Xiine'na'. ¹⁰Shi no za' gana' zoale zidyelene' le' dill' daa bi chidilin daa bli' bsemi Crístona', bi wleblene' loo yoo lill-lena', ni bi wwaplene' chiox. ¹¹La' beena' chlebe'ne', chone' txen dii mala' chone'.

¹²Dii zan dii cheenid' inia' le', per bi chaklallaa gona'n yishzə. San chbez' gat' latj yidkz' gana' zoale kwenche ile'i ljjwellcho na' we'cho dill', na' yiyoll yido soacho mbalaz.

¹³Ben'ka' nak xiin ben' bilo'na',‡‡ beena' wlej Chioza' gake' lall' nee, chwagake' le' chiox.

**1:1 Noolə ba wlej Chioza' gako' lall' nee len xiino'ka': ben'ka' nsed nagake' daa na Juanna' ka' zejin ben'ka' chdop chllag choe'la'ogake' Crístona' gana' bselee karta'.

††1:4 Bal xiino'ka': ben'ka' nsed nagake' zejin ben'ka' chdop chllag choe'la'ogake' Crístona' gana' bselee karta'.

‡‡1:13 Xiin ben' bilo'na': Llekzka' ben'ka' nsed nagake' zejin ben'ka' chdop chllag choe'la'ogake' Crístona' gana' zoa Juanna'.

Kart wyoni daa bzej Juanna'

1 Nad' ngoo lall' na' bish' ljjwellchoki nonlilall' Crístona', chzej' li', Gayo, nako' ben' chakid' do yichj do lallaa.

²Ben' bish'dawaa, chñabid' Chioza' kon ka mbalaz nak yichjlall'do'na' lawe'na', ka'kz gak wen cho' lao yog'lolte na' so' shi'a shao'. ³Le biba bizakid' ka bid bal ben' bish'choka' na' wñagake' zoačhecho' lo nez li che Chioza'. ⁴Bich bi de dii chonan ka yiba yizakchid' ka daa inezid' nan ben'ka' nak ka xiin' zejgake' lo nez li che Chioza'.

⁵Ben' bish'dawaa, le wen chono' daa chakleno' bish' ljjwellchoka' chon xshin Crístona', la'kzi nakgake' ben' zit' ben' bi nombi'o. ⁶Lao ben'ki lle' ni nonlilall'lenchogake' Crístona' ba be'gake' xtilloo daa le chakilo' legake'. Ben goklen, be'gake' daa chyallj chchingakile' kon ka chaklall' Chioza' goncho, kwenche koochgake' nez. ⁷La' legake' ba wloogake' nez kwenche gongake' xshin Jesucrístona', na' bibi be'gake' che ben'ka' bi nonlilall'gake'ne'. ⁸Daan, chiya' we'cho daa chyallj chchingakile' kwenche gaklenchogake' we'gake' dill' li che Chioza'.

⁹Ba bzej' le', le' chdop chllagle choe'la'ole Crístona', per Diótrefeza' bi chzenague' daa nia' le' daa cheenile' toze' inabi'e. ¹⁰Na' daan shi ba gokan yid' gana' zoale na' wsheshlenee, la' chde' biz chon chne' cha'. Na' leyi bi chlebe' bish' ljjwellchoka' chla' gana' lle'le. Na' ben'ka' cheeni wleb legake', chsej chlhone', na' chibeje' legake' bich cho'e latj idop illaglengake' le' txen.

¹¹Li' bish'dawaa, bi leno' gono' dii mala', san ben daa nak wen. Beena' chon daa nak wen nake' Chioza' txen, san beena' chon dii mala' bin' gombi'e Chiozan'.

¹²Yog'zə ben' choe' xtill' Demétriona' daa chone' wen, na' nakbia'cha chzenague' dill' li che Chioza'. Na' lekzka' neto' choe'nto' dill' ka wen chone', na' nezkzilo' dill' lin choe'nto'.

¹³Na' dii zan dii cheenid' inia' li', per bi cheenid' gona'n yishzə, ¹⁴la' chbez' yob gat' latj yidkz' gana' zo' kwenche ile'i ljjwellcho na' we'cho dill'.

¹⁵Chioza' gone' ka soashgo' mbalaz. Ben'ki nllaguicho chwapgake' li' chiox. Bwapgach chiox to to ben'ka' nllaguicho gana' zo'.

Kart daa bzej Júdaza'

1 Nad' Judas, nak' wen llin che Jesu-
crístona' na' lekzka' nak' ben' bish'
Jacóbona'. Chzej' le', ka le' chaki Xa-
cho Chioza', le' ba gox wñabe', na'
chap chwia Jesucrístona' le'. ²Chioza'
yiyesh'lall'shgaile' le', na' gonshgue' ka
soachle mbalaz na' gone' ka gakbe'chile'
ka chakile' le'.

³Le' ben' bish'dawaa na' le' ben' zan-
dawaa, le' ba goklall'chga' wzej' le' na'
we'len' le' dill' ka nak daa ba ben Chioza'
bisle' cho'. Per chonchan byen wzej' le'
kwenche gonle ka dii le shajle'le kwaslól
dill' li che Chioza' daa bkwaanlene' cho'
che toshiizi, ka cho' nakcho lall' nee. ⁴La'
ladjléna' do ngash'zə ba chda bal ben',
na' legaken', kani'teyi ba nchogbia' che-
gake' kwiayi'gake' daa nakgake' ben' mal.
Na' nagake' daa chiyesh'lalli Chioza' cho'
wak goncho kon daa nan checho. Na'
chzoagake' ka'lə Xancho Jesucrístona',
beena' zeelo chñabia' cho'.

⁵La'kzi le' ba ñezilen, cheenid' yisaa
lall'le ka biyoll bibej Xancho Chioza' ben'
Israelka' Egíptona', bliiayee ben'ka' bi
wyajle' che'. ⁶Na' lekzka' bene' che an-
jlka', ben'ka' wlej yichjgake' yel' wñabia'
che'ka' daa bene' lall' nagake', na' bchej-
gake' latj gana' lle'gake'. Chioza' ntakw
ncheje' legake' zejli kani' gana' shgasj
shchol, na' nan' nkweze' legake' axt kat'
illin lla choo lla xenna' wchogloe' che
yog'lól ben'. ⁷Lekzka' ben'ka' wlle' yell
Sodómana' na' yell Gomórrana', na' yel-
lka' nllaggakan, bengake' daa wnaz beli
chen che'ka', na' wñelen ljwellgake', na'
axt ben' byoka' biyat'len ljwellgake' na'
bengake' dii zban ka daa bi chiya' gon-
lencho beli chen chechona'. Na' Chioza'
bselee yi'na' bzey bten legake'. Na' daa
bene' chegake' ka', chsi'nile' yog'lól ben'
nan de yel' zak'zi' zejli kani' che ben'ka'
bi chon wen.

⁸Na' kan' chon ben' wxiye'ka' chda
ladjléna', nazgake' chle'do'gakile', na'
choe'gake' cho'a xbayi beli chen che'ka',
na' bi cheengakile' no inabia' legake'
na' bi nallgakile' chñegake' che anjlka'.
⁹Kana' anjla' le Miguel, beena' nak ben'
choo ben' xen ladj anjlka', gokdil'-lenile'
dii xiwaa kwerp che dii Moiséza', bi
biyaxjile' chishje' bia' blag' che dii xiwaa,
san gollén: "Chioza', beena' na' nak Xan',
wsheshlene' li'." ¹⁰San ben' wxiye'ka',
chñegake' che dii bi chajni'gakile'. Na'
chontezgake' diika' na beli chen che'ka',
ka chon bayix' ba bi nteyi. Na' di-
ika' chongake', leyen'gakannan' chlli-
ayi'n legake'.

¹¹ñyesh'laz gak che ben'ki!, daa
chongake' ka ben dii Caínna', na' daa
chongake' dii mala' ni che yel' wze-
lall' che'ka', ka ben dii Balaama'. Na'
daa nakgake' widenag ka dii Coréna',
kwiayi'gake'. ¹²Ben'ki nakgake' ka dii bi
nxe bi nzak' lengake' ladjléna' kat' chonle
lnina' choe'la'o ljwell-le, na' lengake' le'
cheej chaogake' ni bi chiyi chido'gakile'.
Na' nakgake' ka to ben' chap bayix' na'
bi zie' wñeyi chegakb, san legake' chap
chwia kwingake'. Na' nakgake' ka be-
jka' ze xan yabana' diika' bibi nis yollə
na' choa' be'na' legakan. Na' nakgake' ka
yag zix' dii bi chbia kat' chllin lla kwian.
Latjin dii nan kwian, chilleelan chlall'te
do loyin na' chbillan. Na' ben'ka' chon
ka' axt chop shiilə ba mbiayi'gake'. ¹³Na'
nalgake' ka bli che nisdona' daa chas
chat', na' yel' zto'ka' chongake' nakgakan
ka bllin' besja' daa chchoon bli che
nisdona'. Na' lekzka' nakgake' ka beljka'
diika' chlaa xnezinka'. Na' daa chongake'
ka' ba nchoglo'chegake' soaga

ke' gana' zeelo nak shgasj shchol zejli
kani'.

¹⁴Beena' wle Enoc, goke' ben' de
galli lo dia che Adánna'. Wdixji'e daa
goll Chioza' che ben'ki chon dii mala',
wne': "Li wwiakachi, za' Xanchona'

nchi'e ben' zan wal inleeb anjl che'ka'
¹⁵kwenche wchogloe' che yog'lol ben',
 na' wsak'zi'e ben' malka' ni che yog' dii
 malka' bengake' ye! ben' mal che'ka',
 na' ni che yog'lol daa wchell wnegake'
 che." ¹⁶Ben'ki bibikzə chazlall'gake',
 na' lillinzi chwia chyigake' che ben',
 na' toshiizi choe'gake' cho'a xbayi beli
 chen che'ka'. Na' chshalj chshon che
 kwingake', na' choe'la'o choe' dill'gake'
 ben' kwenchezə gongake' ben' gan.

¹⁷Na' le' ben' bish'dawaa na' le' ben'
 zandawaa, li lljadini dill'ka' be' postika',
 ben'ka' ben' Xancho Jesucristona' lall'
 na'gake' we'gake' cho'a xtilleena'.

¹⁸Wnagake' le', "Kat' ba zoa te che
 yell-lioni, yid ben' wtitjgake' che
 cho'a xtil' Chioza' daa chajle'cho, na'
 gongake' kon daa nazan chegake'."

¹⁹Legaken' chongake' choplə ben'ka'
 nonlilall' Chioza', na' chongake' daa na
 beli chen che'ka' na' bi yoo Espiritu che
 Chioza' loo yichjall'do'eka'.

²⁰Na' le' ben' bish'dawaa na' le'
 ben' zandawaa, li soachech gonlilall'chle

Chioza', na' li inabi Espiritu Sántona'
 gaklene' le' we'llwill-le Chioza'. ²¹Li gon
 ka cheeni Chioza', beena' le chaki le',
 na' li gon lez llana' gon Xancho Jesu-
 crístona' cho' ye! mban zejli kanina' daa
 chiyesh'lallile' cho'.

²²Li yiyesh'lallii ben'ka' chakchopi.
²³Na' zi bale', li yislagake' lawi dii mala'
 kwenche bi lljayaake' lo yi' gabila'. Na'
 li yiyeshlallii zi bal ben' chon dii malka',
 per li gakzbani saaxya che'ka' na' li wsak'
 ki gonle ka chongake'.

²⁴Shajla'oshga Chioza', beena' nap ye!
 wak gap wwie' le' kwenche bi ibixle
 lao dii mala', na' gone' ka lljazele
 lawe'na' gana' yoo balaan xen che'na'
 na' yiba yizakile daa bibi xtol'le de.

²⁵La' zeelo len' nake' Chios, na' bisle'
 cho' daa bselee Xancho Jesucristona', na'
 chidolee koochone' balaan na' we'cho
 xtillee nake' ben' choo ben' xen, ben' li-
 izelozi chnabia', na' ben' ye! wak choo
 ye! wak xen, naa na' zejli kan. Kan'
 nakan.

Jesucrístona' bliile' Juanna' che diika' zi' gak

1 Dgan blii Chioza' Jesucrístona' kwenche bliile' ben'ka' nonlilall' le' daa ba zoa gaoshosh gak. Na' Jesucrístona' bselee anjl che'na' kwenche bidzajniile' nad' Juan, nak' wen llin che'. ²Na' cho'a dill' che yog'lol' daa ble'id', na' nezid' nakan dowalj daa wna Chioza' na' daa bli'yi Jesucrístona' nad'.

³Chakomba beena' chlab dill'ki, diiki na Chioza' zi' gak, na' chakomba ben'ka' chzenaggake' na' zegake' wneyi cheyin, la' ba zoa gaoshosh gaggakan.

Juanna' chwape' chiox ben'ka' nonlilall' Crístona' gana' mbani Ásiana'

⁴Nad' Juan chwape' le' chiox, ka le' chdop chllagle choe'la'ole Jesucrístona', le' lle'le' yellka' gall gana' mbani Ásiana'. Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, na' espírituka' gall lle' gana' zoe' chnabi'e, gaklenshgagake' le' na' wzoagake' le' mbalaz. ⁵Na' lekzka' Jesucrístona' gaklenshgue' le' na' wzoe' le' mbalaz. Len' beena' choe' dill' li che Chioza', na' len' ben' necha' biban ladj ben' wetka' na' bich bi yel' wit ile'ile', na' nape' yel' wnabia' lao yog'lol' ben' wnabia'ka' lle' yell-lioni. Len' chakile' cho' na' ba bisle' cho' lao saaxya chechoka' daa blalj xchene'na', ⁶na' ba bene' cho' yel' wnabia'na', na' ba none' cho' bxoz che Xe' Chioza'. Len' chidolee sho'e balaan na' inabi'e zejli kani. Kan' nakan.

⁷Crístona' yiyede' ladj bejka' ze xan yabana', na' yog'lol' ben' ile'gakile'ne', lente ben'ka' betgake'ne'. Na' yog'lol'

ben' lle' yell-lioni kwellyesh'gake' ka ile'gakile'ne'. Kan' nakan.

⁸“Nadaan zaklebid' letr necha' le A”^{¶¶} daa ba zoakz' ka wxw wzil yell-lioni, na' daa zoakz' kat' te cheyin zaklebid' letra' chiyollin daa le Z”^{§§} kan' na Xanchio Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, beena' nak ben' yel' wak choo yel' wak xen.

Juanna' ble'do'ile' Jesucrístona'

⁹Nad' Juan, nak' le' txen, na' chnabia' Chioza' cho' daa nakcho Crístona' txen na' la'kzi dii zan dii chen chle'icho daa chonlilall'chone', lekzen' chaklene' cho' chizo chizakicho diika' chen chle'icho. Na' daa chyixji'a xtill' Chioza' na' xtill' Jesucrístona' bengake' nad' pres na' bsel'gake' nad' yell-liodo'ni le Patmos, dga lliia lo nisd'ni. ¹⁰Na' gok to lla, llana' nak lla che Xanchona', Espíritu che Chioza' bene' ka benid' wne to ben' zillj inleeb koll'lá', ka ga chbell to trompet. ¹¹Na' wne' nad':

—Bzej dga chle'ilo' to lee yish, na' bsejaan lao ben'ka' chdop chllag choe'la'ogake' Jesucrístona' yellka' gall gana' mbani Ásiana': Éfesona', Esmírmana', Pérgamona', Tiatírana', Sárdiza', Filadélfiana', na' Laodiceana'.

¹²Na' biyechj' kwenche ile'id' non chne nad', na' ka biyechj' ble'id' gall candeler de or chal'gakan. ¹³Na' ladj candelerka' gall ble'id' to ben' nake' ka cho' benech, na' nakwe' to xe' dii ton dii ze koll' ni'ena'te, na' ngoo li'ena' to bad' de or bllinten ka de cho'alcho'ena'. ¹⁴Yish' yichje'na' nakan xtil ka xa xil' wa ka beyaa, na' jalawe'na' chzeeni'n ka bel' yi'. ¹⁵Na' ni'ena' chep yesan ka daa ne' bronce dii ba beshawee lo yi'na'. Na' shi'ena' nenan sshag wal ka nen to

^{¶¶}1:8 Letr necha' le A: de dill' griegona' letri len alfa.

^{§§}1:8

yao xen daa chxop cho'a bnanja'. ¹⁶Nee de shlina' noxee gall belj, na' cho'ena' chchejan to spad dii nlatit chop laa. Na' cho'alawe'na' chna'titan ka chna'tit wbillá'.

¹⁷Ka ble'idee, na' bgoonaa ka ben' wet xni'ena'. Na' bikwise' nad' kon nee de shlina', na' wne' nad':

—Bi illebo'. Nadaan zoa' kana' wxe wzil yell-lioni na' nad'kzan ni zoa' kat' te cheyin. ¹⁸Na' nad'kzan ben' yaa ben' banna'. Betgake' nad', per biban' na' mban' zejli kani. Na' nap' yel' wak yisla' ben' lo yel' wita'. ¹⁹Bzej dga ba ble'ilo', dga chak naa, na' daa zi' gak. ²⁰Kin zeji che beljka' gall daa noxaa lo na' de shlini na' che candelerka' gall diika' nak de or: beljka' gall zaklebin gall ben'ka'* chap chwiagake' ben'ka' chdop chllag choe'la'ogake' nad' yellka' gall. Na' candelerka' gall zaklebin ben'ka' gall kwen.

Daa golle' ben'ka' lle' yell Éfesona'

2'Bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Éfesona': "Ki na beena' nox' beljka' gall lo nee de shlina', na' zie' ladj candelerka' gall, diika' nak de or: ²Nad' nez nle'id' yog' dii wenna' chonle, ka chonchgale xshin'na' na' ka zoachechle. Na' nezid' bi chleble ben'ka' bi nsa' cheyin wen, na' ba biyiljni'ale ka chon ben'ka' nazə nakgake' postl cha' na' ba gokbe'ile ben' wxiye'zgakan. ³Dii xen ba benxenlall'le lao diika' ba ben ble'ile ni cha', na' bichga bshe'lall'le. ⁴Per de to dii bi chazlallid' chele: bich napple yel' chakina' ka daa wdaple dii nechte. ⁵Li yiyakbe'i bich chonle dii wenna' benle kana'. Na' li yiyaj yileni na' li yiyon sto shii ka benle dii nechte kana' wzolole benlilall'le nad'. Shi bi yiyaj yilenile, na' yid' yikaa candeler

chelena' gana' zoale. ⁶De to dii ni chazlallid' chele: daa chakzbanile daa chon nicolaítaka', diika' lekzka' chakzbanid'. ⁷Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', wi'a latj gawe' daa lia lo yaga' daa nsa' yel' mbanna', daa zoa latj che Chioza' gana' nak mbalaz inleeb."

Daa golle' ben'ka' lle' yell Esmírmana'

⁸'Na' lekzka' bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Esmírmana': "Ki na beena' zoa ka wxe wzil yell-lioni, na' ni zoakze' kat' te cheyin, beena' wit na' bibane': ⁹Nad' nezid' yel' zak'zi'ka' chen chle'ile na' yel' yeshaa daa chak chele. Per de to dii zak'chi chele aga ka yel' wni'ana'. Na' nezid' dii mala' daa chbell chne ben' chele, ben'ka' nazgake' nakgake' ben' Israel, la'kzi dii licha lao Chioza' aga nakgake' ben' Israel, san nakgake' xonj ben' chzenag che dii xiwaa. ¹⁰Bi gall illeble yel' zak'zi'ka' yen ile'ile. Dii xiwaa gonan ka koogake' bal-le lillyana' kwenche gonan ka bich gonlilall'le nad', na' tele lo yel' zak'zi'na' shi lla. Li soachech gonlilall'le nad' ax't ni ka guetle, na' nad' gon' yel' mban chele zejli kani. ¹¹Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad' bi ile'ile' yel' wit wchopina'."

Daa golle' ben'ka' lle' yell Pérgamona'

¹²'Na' lekzka' bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Pérgamona': "Ki na beena' nox' spada'

*1:20 Ben'ka': Dill' griegona' nan angeloi. Zoa kat' dillii zejin anjl, na' zoa kat' zejin to ben' nsel' ben' lljwee rson wa lljtxixi'e to dii lljtxixi'e.

daa nlatit chop laate: ¹³Nad' nezid' zoale gana' chnabia' Satanáza', per ni zoachehle nonlilall'le nad'. Na' bi wlej yichjle daa nonlilall'le nad', ni kana' betgake' Antípaza', beena' bi bsan wi'e cho'a xtilaana', beena' betgake' lall-lena' gana' zoa Satanáza'. ¹⁴Per de to chop dii bi chazlallid' chele: ni lenzə ladjlena' bal' ben' bi cheengakile' yilaala'ogake' daa bli' bsemi dii Balaama' dii Balaca' kwenche wlooyelee ben' Israelka' bxinj blengake', na' wdaogake' yel' waoka' daa bliagake' lao lwaa lsak' diika' be'la'o ben'ka', na' wnelen ljwellgake'. ¹⁵Lekzka' ladjlena' ni len bal' ben' bi cheengakile' yilaala'ogake' daa chli' chsedi nicolaítaka'. ¹⁶Na' daan, chiyal' yiyaj yilenile cheyi diika' chak ladjlena'. Na' shi bi yiyaj yilenile, lii za'tia' yidtil-len' le' kon spada' daa chchej cho'ani. ¹⁷Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', na' wwawee daa le maná daa ngash'. Na' lekzka' wi'a to yaj llyish che' gana' da' to le kobe' daa kochno nombia', san toz beena' ikaan gombi'en."

Daa golle' ben'ka' lle' yell Tiatira

¹⁸'Na' lekzka' bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Tiatirana': "Ki na Xiin Chioza', beena' chzeeni' jalawe'na' ka bel' yi', na' ni'ena' nakan ka de bronze dii chnachga: ¹⁹Nad' nez nle'id' yog' dii wenna' chonle. Nezid' naple yel' chaki na' nonlilall'le nad', na' chaklenle ben', na' chzo chzakile bittezə dii chen chle'ile. Na' nezid' ba chonchle dii wenna' naa aga ka benle kana' zi' benlilall'le nad'. ²⁰Per de to dii bi chazlallid' chele: choe'zle latj zoa noola' le Jezabel ladjlena', beena' chonz ka ben' chyixjee daa che' Chioza' le'. Na' daa chli' chsedile' chziye'lene'n ben'ka' chonlilall'

nad', na' chone' ka chnelengake' ben' na' chaogake' yel' wawa' daa chllia ben' lao lwaa lsak' diika' choe'la'ogake'. ²¹Nad' ba bi'a latj che' kwenche yiyaj yilenile' daa chnelene' ben', per bi cheenile' kwej yichje'n. ²²Na' ni cheyin wsak'zi'ane', na' lekzka' wsak'zi'chga' ben'ka' chongake'ne' txen chxinj chlangake' shi bi yiyaj yilengakile' cheyi daa chonlengake'ne'. ²³Na' wit' ben'ka' nak ka xiine' daa chongake'ne' txen. Na' yog' ben'ka' chdop chllag choe'la'ogake' nad' to to yell inezgakile' nan nadaan nombi'a do ka nak yichjall'do' ben', na' gonid' to tole kon ka nak daa chonle. ²⁴Na' ka le' lle'le Tiatirana' na' bi chonle txen diika' chli' chsedi noola' ni diika' nagake' chzajnii Satanáza' legake' daa kochno nezi, bich bi dii yoblə inia' le' chiyal' gonle. ²⁵Kon li se wneyi gontez gonle daa nak wen axt kat'ch yiyed'. ²⁶Na' beena' so saki soacheche' gonlilallee nad' na' soe' gone' ka chazlallaa axt ni ka yiyed', na' wi'ane' yel' wñabia' kwenche inabi'e lao yog' yellka' lle' yell-lioni, ²⁷ka ben Xa'na', bene' nad' yel' wñabia'na'. Na' inabi'e legake', na' bi si'xene' che nottez ben' bi chzenag che', na' wlliaeye legake' ka ben' chxoxj chtin to yes' yo. ²⁸Na' lekzka' wi'ane' belj xsila'. ²⁹Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'o nad'."

Daa golle' ben'ka' lle' yell Sárdiza'

3'Bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Sárdiza': "Ki na beena' ngoo lall' nee gall espírituka' nak che Chioza' na' noxee beljka' gall: Nad' nez nle'id' yog' daa chonle. Na' la'kzi zeyi chele le wen chonle, lawa'ni bibi zakii daa chonle. ²Li yiyakbe'i, na' li yiyon ka dii le kwenche bi yiyoll yido kwej yichjle dii wenna' ni chonle. La' nez nle'id' daa chonle bi

nakan kwasloł ka cheeni Chios ɕha'na'.
³Li lljadini diika' ba bli' bsdgakile' le' na' li wzenag cheyin, na' li yiyaj yileni. Shi bi chonle ka dii le, tokonganzə yid-sak'zi'a le', ka chon to wban aga no chsi'nile' kat' chjlane'.⁴Na' la'kzi chonle ka', ni len bał ben' ladjlena' yell Sárdiza' ben' bi nda' nchen yichjlall'do'ena' dii mala'. Na' chidol'gake' soalengake' nad' na' gakwgake' to lech' xtil.⁵Beena' so saki soacheche' gonlilallee nad', na' wi'ane' to lech' xtil gakwe'. Na' biga yisol' lie'na' lee libr ɕha'na' gana' nda' le yog' ben'ka' napgake' yel' mban zejli kañi. Na' we'len' Xa'na' dill' len anjl ɕhe'ka', yep-gakee nake' nad' txen.⁶Beena' cheni, chiyał' wzenagyenee daa che' Espíritu ɕhe Chioza' ben'ka' gall kwente chdop chllag choe'la'ogake' nad'."

Daa golle' ben'ka' lle' yell Filadélfiana'

⁷Bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Filadélfiana': "Ki na beena' nak dowalj ben' li ben' shao', beena' nap yel' wñabia' ka daa wdap dii Davina'. Daa chsalje', kono gak yise-jan, na' daa chseje', kono gak yisal-jan.⁸Nad' nez nle'id' yog' dii wenna' chonle. Na' ba bsalj' ka to puert ɕhele na' kono gak wsej willon sho'le. Na' la'kzi xonjchgale nak, chonle ka na cho'a xtilaana' na' toshiizi chɕheble nakle nad' txen.⁹Ka nak ben'ka' chzenag ɕhe Satanáza' na' chziye'gake' nazgake' nakgake' ben' Israel, nad' gon' ka yid-ɕhek' xibe'ka' laolena' na' gakbe'gakile' nad' chakid' le'.¹⁰Daa ba benle banez wzoachechle benjilall'le nad', na' gapshii gapshawaa le' kat' illin lla yen ile'i yog'loł ben' yell-lioni yel' zak'zi'ka' kwenɕhe wli'lawin non chzenag ɕha'.¹¹Ba zoa gaoshosh yiyed'. Li se wneyi gontezi gonle daa nak wen kwenɕhe bi wni-tle daa ba non' lkwez ɕhele.¹²Beena' so saki soacheche' gonlilallee nad', ka

zoa pilarka' nox'gakan lill Chios ɕha'na', ka' soe' gana' zoa Chioza' na' yigaan-lene'ne' zejli kañi. Na' wda' le Chios ɕha'na' le', na' le yell ɕhe Chios ɕha'na', yell Jerusalénna' daa nak dii kob daa za' yaba ɕhe Chios ɕha'na', na' lekzka' wda' lia'na' le' daa nak dii kob.¹³Beena' cheni, chiyał' wzenagyenee daa che' Espíritu ɕhe Chioza' ben'ka' gall kwente chdop chllag choe'la'ogake' nad'."

Daa golle' ben'ka' lle' yell Laodicéana'

¹⁴Bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Laodicéana': "Ki na beena' na gakshga yog' daa na Chioza', beena' toshiizi choe' dill' kon ka nak dill' li ɕhe Chioza', beena' chñabia' lao yog'lołte daa bxe bsil Chioza':¹⁵Nad' nez nle'id' yog' daa chonle, nezid' bi chonle ka chazlallaa na' ni bi chbej yichjle nad'. Wenchlan shel'ka' gonle tozan.¹⁶Na' daa ni ton bi chɕhoglall'le gonle, kwejyichjchokl' le'.¹⁷Le' nazle nakle ben' wni'a, na' nale le wen chak ɕhele na' bich bi de dii chyalljile. Na' bi chakbe'ile lao Chioza' nakle ka ben' bi chak wen cheyin, ka ben' yesh', ka ben' lchol, ka ben' chda gal'yid gal'bel'.¹⁸Na' daan, nia' le' chiyał' si'le lawa'na' or daa ba gokshao' lo yi'na', kwenɕhe gakle dowalj ben' wni'a; na' si'le lawa'na' lech' xtila' gakwle kwenɕhe bich si'le zto' tale gal'yid gal'bel'le; na' si'le rmecha' kaale jalaoleka' kwenɕhe ile'ile.¹⁹Nad' chsheshlen' yog' ben'ka' chakid', na' chsak'zi'a legake' kat' bi chongake' wen. Na' daan, li gon ka dii le, na' li yiyaj yileni.²⁰Nad' chñia' le' ka to ben' ze to cho'a yoo. Shi zoa ben' guenile' chñia' na' wsaljje', na' sho'a na' gaolenee txen.²¹Beena' so saki soacheche' gonlilallee nad', na' wi'a latj inabia'lene' nad', ka ben' nad', wzoachech' wzo wzakid' daa btil' na' ba chñabia'len' Xa'na'.²²Beena' cheni, chiyał' wzenagyenee daa che' Es-

píritu che Chioza' ben'ka' gall kwente chdop chllag choe'la'ogake' nad'."

Choe'la'ogake' Chioza' yabana'

4 Ka biyoll bzej' diika' wne' nad', na' ble'do'id' nyalj to puert xan yabana'. Na' bizenid' bishbena' daa benid' dii nech daa nen ka ga chbell to trompet, na' wne' nad':

—Nilə wyep, na' wliid' li' diika' zi' za' gak.

²Na' ka wnie' nad', Espíritu che Chioza' bene' ka ble'id' yabana' gana' llia to ben' chñabi'e. ³Na' beena' llia na', chey cheeni'chgue' ka yaj wan daa le jaspe na' daa le cornalina. Na' tcho'a tlawi gana' llie' ze to betyaa na' chña'titan ka yaj wan daa le esmeralda. ⁴Na' gana' llie', ble'id' nechj zi tapichoa ben' lliagake' chñabia'gake', na' zoagake' do xtil na' nzoa twej corona de or yichje'ka'. ⁵Na' gana' llia ben' necha' chep yes, na' chashj chtin, na' chak sshag inlleb. Na' lawe'na' ze gall yi' chal'ninan na' legakannan' es-pírituka' gall che Chioza'. ⁶Lekzka' lao beena' llia chñabia' de to dii nak katekza nisdona' na' nakan ka de vidr.

Na' gchol' gana' chi'e chñabi'e lle' tap ben' de ye! mban cheyin, na' dii zan jalaogake' llia, ka laoləgake' na' ka koll'ləgake'. ⁷Ben' necha' nake' ka bell, na' ben' wchopina' nake' ka goon, na' ben' wyonina' nak cho'alawe'na' ka che benech, na' ben' wdapina' nake' ka bsia, ba chzo. ⁸To to ben'ki' zoa xop wej xil-gake', na' zoa dii zan jalaogake' ka loolə na' ka koll'lə xile'ka'. Na' bi chsangake' ka wal ka tella nagake':

Dowalj ben' li ben' shao', dowalj ben' li ben' shao',
ben' shao', dowalj ben' li ben' shao',
nak Xancho Chioza',

beena' nap ye! wak choo ye! wak xen,
beena' zoa ka wxe wzil yell-liona',
na' lekzen' zoe' naa, na' zoakze' zejli kani.

⁹Na' ben'ka' tap chgoogake' balaan beena' llia chñabia', beena' mban zejli

kani. Na' choe'gake' xtillee nake' ben' zakii nllleb na' choe'gake'ne' ye! choxken. Na' to to ka chongake' ka', ¹⁰ben'ka' tapichoa chček' xibe'ka' lao beena' mban zejli kani na' choe'la'ogake'ne'. Na' chzal'gake' corona che'ka' lawe'na', nagake':

¹¹Chios, li' nako' Xannto', na' chidołoo koonto' li' balaan na' we'nto' xtilloo nako' ben' zakii nllleb,
na' ben' ye! wak choo ye! wak xen.
Lin' bxe bsilo' yog'lołte dii de,
na' daa goklalloo soagakan, bxe bsilgako'n.

Yisha' daa ndos' gall sey

5 Na' beena' llia chñabia' noxee lo nee de shlina' to yish dii ndobə, na' chop laaten' nyoj. Na' gana' biyoll bidoban ndosa'n gall sey. ²Na' ble'id' to anjl, ben' nap ye! wak xen, na' wnie' zillj inlleb, chñabe':

—¿Notg zakii wxoxje' seyka' na' wselle' yisha'?

³Na' kono bllel yabana' ni lo yell-liona', ni xan yell-liona', ben' gak wzeshe'n na' wwie' bin da'n. ⁴Na' le wchellchga' daa kono bllel ben' zakii wzeshe' yisha' na' wwie' bin da'n. ⁵Na'ch to beena' len ben'ka' tapichoa wne' nad':

—Bich kwello', la' beena' nsi'gake' Bell che Judá daa mbejlawe' lo dia che dii Judána', beena' nak xiin dia che dii Davina', ba bene' gan dii mala' na' wak wxoxje' seyka' gall na' wzeshe' yisha'.

⁶Na'ch ble'idee zie' gchol' gana' llia beena' chñabia' na' gana' nechj ben'ka' tap na' ben'ka' tapichoa. Na' ble'idee ka to xil'do', ba betgake'. Na' llia gall lozb na' zi gall jalaob, diikan' nak es-pírituka' gall daa nak che Chioza' daa nselee doxen yell-lioni. ⁷Na'ch beena' ble'id' ka xil'do' wbiguee lao beena' llia chñabia' na' wdoyoe' yisha' daa ndobə daa noxee lo nee de shlina'. ⁸Na' kon ka wdoyoe' yisha' daa ndobə, ben'ka'

tap na' beṅka' tapichoa b̄chek' xibe'ka' lao beena' ble'id' nak ka xil'do'. To to-gake' nox̄gake' twejə arpa, na' l̄ekzka' nox̄gake' barser de or yoogakan yala' daa chzeygake', na' llen yala' zaklebin xtill' beṅka' nak lall' na' Chioza', dill'ka' choe'lengake'ne' kat' choe'lwillgake'ne'.⁹ Na' beṅgake' to dii kob dii chgoon l̄e' balaan, na' ki nan:

Lin' chidoḷoo goxoo yishi ndobə na' wx-oxjo' seyka', daa betgake' li', na' daa blalj xcheno'na' biya'o bizi'o beṅ za' yog' dia, yog' yell na' yog' nación, na' beṅ' chne wde wdeli dill', kwenche nakgake' lo na' Chioza'.

¹⁰ Na' ba nono' lall' na'gake' inabia'gake' lo yell-liona' na' gagkake' bxoz che Chios chechona'.

¹¹ Na'ch ble'id' anjl zan, na' benid' shi'eka'. Nechjgake' gana' llia beena' chṅabia' len beṅka' tap na' beṅka' tapi-choa. Na' daa nakgake' beṅ zan inllep ni bi wbadid'gake'. ¹² Na' w nagake' zillj nllleb:

Beena' nak ka xil'do', beena' betgake', chidoḷee we'nto' xtilllee nape' yeḷ' wṅabia' xen, na' naki che' yog'loḷ yeḷ' wni'a dii de, nape' yeḷ' sin' xen na' yeḷ' wak choo yeḷ' wak xen, nake' beṅ zakii nllleb, na' chidoḷee we'la'onto'ne' na' koonto'ne' balaan.

¹³ Na' benid' wne yog'loḷ dii de yeḷ' mban cheyin na' yog'loḷ diika' bxe bsil Chioza' yabana' na' yell-lioni, na' xan yell-lioni, na' loo nisdona', nagakan: Beena' llia chṅabia' len beena' nak ka xil'do', chidoḷ'gake' we'la'ocho l̄egake' na' koocho l̄egake' balaan zejli kan̄i, na' we'cho xtill'gake' nakgake' beṅ zakii nllleb, na' napgake' yeḷ' wak choo yeḷ' wak xen.

¹⁴ Na' beṅka' tap nechj l̄e', nagake':

—jKan' nakan!

Na' beṅka' tapichoa b̄chek' xibe'ka' be'la'ogake' l̄egake'.

Bxoxje' seyka'

6 Na' ble'id' Beena' Zaklebi to Xil'do' bxoxje' sey necha' lawi diika' gall, na' benid' wne to beṅka' tap lle' na', na' shi'ena' nenan ka ga chashj chtin. Na' wne' nad':

—Nilə da, na' bwia dga.

² Na' ble'id' to kabay llyish, na' beena' llia koll'ba' noxee to xis wixit'. Na' bzoa-gake' to corona yichje'na', na' bcheje' lega beṅ ben gan lo wdil na' zeje' sto shii lljene' gan.

³ Na' ka bxoxj Beena' Zaklebi to Xil'do' sey de wchopina', benid' wna beṅ wchopina', beena' len ladj beṅka' tap:

—Nilə da, na' bwia dga.

⁴ Na' ble'id' bchej sto kabay, ba xna. Na' beena' llia koll'ba' gok loo nee gone' ka bich soalen ljwell beṅ yell-lioni mbalaz na' wit ljwellgake'. Na' bi'ene' to spad xen.

⁵ Na' ka bxoxj Beena' Zaklebi to Xil'do' sey de wyonina', benid' wna beṅ wyonina' len ladj beṅka' tap:

—Nilə da, na' bwia dga.

Na' bwia' na' ble'id' to kabay gasj. Na' beena' llia koll'ba' noxee to xig'libr. ⁶ Na' benid' wne to beṅ ladj beṅka' tap, chi'e:

—Gono' ka sak' chop ya trígona' che shlla llin, na' xop ya cebádana' che shlla llin, na' bi wwal' wsilo' seta' ni vinona'.

⁷ Na' ka bxoxj Beena' Zaklebi to Xil'do' sey de wdapina', benid' wna beṅ wdapina':

—Nilə da, na' bwia dga.

⁸ Na' bwia', na' ble'id' to kabay, ba te, na' beena' llia koll'ba' lie' Yeḷ' Wit. Na' daa le Hades† zjanon l̄e'. Na' gok lo na-gake' witgake' to kwart beṅka' lle' yell-

lioni lo wdil, lo wbin, lo yillwe' na' lao ba zniaka'.

⁹Na' ka bxoꝝ Beena' Zaklebi to Xil'do' sey de gayi'na', ble'id' to dii nak ka gana' chzeygake' diika' chjwa'gake' lao Chioza', na' xni'ayinna' lle' ben'ka' betgake' ni che cho'a xtil' Chioza', na' daa bi bsangake' we'gake' xtillena'. ¹⁰Na' wne-gake' zillj inleeb, che'gake':

—Chios, li' nako' Xannto'. Nako' dowalj ben' li ben' shao' na' nako' ben' chon yog' dii chchebo', ꝑbat gono' yel' joschis che ben'ka' lle' yell-liona' na' yizi'o wzon daa betgake' neto'?

¹¹Na'ch bi'e twej xa xtilgake', na' golle' legake' kwezgake' zi' xtit ax̄t ki yizaa yibab ben'ka' nakgake' txen, ben'ka' zi' witgake' daa choe'gake' xtil' Chioza'.

¹²Na' ka bxoꝝ Beena' Zaklebi to Xil'do' sey de wxopina', ble'id' gok to bedxo' xen wal. Na' wbillā' biyakan dii gasj ka lech' gasj daa chakw ben' kat' chet to bish' ljwelle'. Na' doxen beo'do'na' biyakan dii xna ka chen, ¹³na' bllib beljdo'ka' lliā xan yabana', bxopgakan lo yell-liona' ka chxop yixwew yaa kat' chta be' wala' xyaguinna'. ¹⁴Na' yabana' bidoblolan ka chidob to yish, na' yog'lol' yaaka' na' yog'lol' yell-liodo'ka' lliā lo nisdona' blla' xishna'inka'. ¹⁵Na' ben'ka' chnabia' lo yell-lioni, na' no ben' zakii, na' no ben' wni'a, na' no xan soldadka', na' no ben' mbejlawin, no ben' ndoo lla yel chone' xshin ben' na' no ben' chon xshinkze', jakwash'gake' no loo blej, no ladj yajka' lle' lo yaaka'. ¹⁶Na' che'gake' yaa yaoka' na' yajka':

—Li idakwtega neto', na' li wkwash' neto' lao beena' lliā chnabi'e na' lao yel' zak'zi' daa chon Beena' Zaklebi to Xil'do', ¹⁷la' ba bllin lla wsak'zi'gake' ben', na' aga no so saki yel' zak'zi'na'.

Ben'ka' nak to guiyoa tapiyona mil

7 Ka biyoll ble'id' diiki, bizle'id' tap anj zechagake' tap laate yell-lioni,

chzag'gake' be'na' za' tap laate kwenche bibi be' se lo yell-lioni ni lo nisdona' na' ni lo yagka'. ²Lekzka' ble'id' sto anj zee gana' chla'lə wbillā', na' noxee sey che Chios yaa Chios banna'. Na' besyaa anjli zillj inleeb wnie' anjka' tap, ben'ka' gok lo na'gake' yel' waka' kwenche gak wliayi'gake' diika' de lo yell-liona' na' loo nisdona', na' chi'e legake':

³—Bibi gonile yell-lioni, nisdona', ni yagdo'ka' shlak bin' wda'cho seya' loxga ben'ka' nonlilall' Chios chechona'.

⁴Na' benid' ka'k' ben'ka' wda' seya' loxgue'ka', na' nakgake' to guiyoa tapiyona mil ben', ben'ka' nak shllin kwen dia che dii Israela'. ⁵Shllina mil ben'ka' nak dia che dii Judána', shllina mil ben'ka' nak dia che dii Rubénna', shllina mil ben'ka' nak dia che dii Gada', ⁶shllina mil ben'ka' nak dia che dii Asera', shllina mil ben'ka' nak dia che dii Neftalína', shllina mil ben'ka' nak dia che dii Manaséza', ⁷shllina mil ben'ka' nak dia che dii Simeónna', shllina mil ben'ka' nak dia che dii Levína', shllina mil ben'ka' nak dia che dii Isacara', ⁸shllina mil ben'ka' nak dia che dii Zabulónna', shllina mil ben'ka' nak dia che dii Joséna', na' zi shllina mil ben'ka' nak dia che dii Benjamína'.

Ben' be ben' zil ben'ka' zoa do xtil

⁹Ka biyoll dga, na'ch bwia' na' ble'id' ben' zan inleeb, ben' za' doxen yell-lioni, na' lo wde wdeli dia, na' ben' chne wde wdeli dill', na' ben' za' yog' yell. Zegake' lao beena' lliā chnabia' na' lao Beena' Zaklebi to Xil'do', na' kono ibabi legake' daa nakgake' ben' be ben' zil inleeb. Na' nakwgake' twej xagake' dii xtil na' nox'gake' twej zin. ¹⁰Na' yog'lol'zgage' chosyaagake' zillj inleeb, nagake':

Chios chechona', beena' lliā gana' chnabi'e,

na' Beena' Zaklebi to Xil'do' ba bislagake' cho'.

¹¹Na' yog'loł anjlka' nechjgake' beena' llia chnabia', na' ben'ka' tapichoa len ben'ka' tap, bchek' xibe'ka' lawe'na' axt lo yona' bllin loxgue'ka', na' be'la'ogake' Chioza', ¹²nagake':

¡Kan' nakan! Toshiizi we'la'ocho Chios chechoni, na' koochone' balaan, na' we'cho dill' ka nak yel' sin' che'na', na' we'chone' yel' choxken, na' we'cho dill' nake' ben' zakii nllleb, ben' chnabia' doxen, na' ben' yel' wak choo yel' wak xen. ¡Kan' nakan!

¹³Na' to beena' len ben'ka' tapichoa wñabile' nad':

—¿Nora ben'ki nakw lech' xtila'?
¿Gara za'gake', lla?

¹⁴Na' goshee:

—Li'kz ñezilo' daa, ben'do'.

Na' le' wne' nad':

Ben'kin ba bichej lo yel' zak'zi' xenna', na' ba biyib bixisi xe'ka' xchen Beena' Zaklebi to Xil'do', na' daan nakwgake' lech' xtila'. ¹⁵Daan, zegake' lao Chioza' gana' zoe' chnabi'e na' ka wal' ka tella choe'la'ogake'ne'. Na' Chioza', beena' llia chnabi'a soalene' legake' na' gap wwie' legake'. ¹⁶Bich ibil' idongake', ni bich wzey wbilldo'na' legake', ni bich gkgak-ile' zey', ¹⁷la' Beena' Zaklebi to Xil'do', beena' zoa gana' chi' Chioza' chnabi'e, gap wwie' legake'. Na' wchi'e legake' gana' chal nisa' daa nsa' yel' mbanna'. Na' Chioza' wkwase' yog'loł daa chkwellye-shaan legake'.

Bxoxje' sey de gállina'

8 Na' ka bxoxj Beena' Zaklebi to Xil'do' sey de gállina', goklli yabana' ka do gashj gor.

²Na'ch ble'id' gall anjlka' zegake' lao Chioza', na' bi'e legake' gall trompet.

³Na'tech bla' sto anjl noxee to barser de or, na' jsie' kwit daa nak ka mes de or gana' chzeygake' yala' daa zoa

lao beena' chnabia'. Na' bi'ene' yal zan kwenche wzeye'n lawinna', na' gakan toz xtill' ben'ka' nak lall' na' Chioza' kat' choe'lwillgake'ne'. ⁴Na' llen che yala' daa yoo loo barsera' nox' anjla' wyasan zejan lao Chioza' nakan t xen xtill' ben'ka' choe'lwillgake'ne'. ⁵Na' anjla' bexee barsera', wlo'en yi' galja' daa chi' gana' chey yala', na' bzaleen lo yell-lioni. Na' goshj wtin, na' gok sshag, na' wyep yes, na' wxo' wñib yell-lioni.

Trompetka' gall

⁶Na' anjlka' gall, ben'ka' nox' trompetka', wze kwasgake' wkwell'gake'n.

⁷Na' anjl necha' bkwelle' trompet che'na', na' bxop lo yell-lioni yaj yaba na'ch yi' na' nchixgakan chen. Na' schoo yell-lioni wyey, zi lat'zə ki gokan gashjə,[‡] na' wyeylenan dii zan inlleb yag, na' doxen gana' de shga'.

⁸Na' anjl wchopina' bkwell trompet che'na', na' bxop loo nisdona' to dii nak ka to yaa xen dii chal'nin. Na' zi lat'zə ki gok gashjə nisdona' biyakan chen. ⁹Na' zi lat'zə ki gok gashjə bado'ka' lle' loo nisdona' witgakb, na' lekzka' zi lat'zə ki gok gashjə barkwka' chda lo nisdona' wlliai'.

¹⁰Na' anjl wyonina' bkwell trompet che'na' na' bxop to belj xen chal'ninan, na' bxopan gana' de yaoka' na' gana' chal niska'. ¹¹Na' belj xenna' len Dii Zla'. Na' zi lat'zə ki gok gashjə nisa' gokan zla', na' ben' zan wit ni che nis zla'na'.

¹²Na' anjl wdapina' bkwelle' trompet che'na', na' zi lat'zə ki gok gashjə wbillla' na' beo'dona' na'ch beljdo'ka' wnit beeni' cheyinka'. Na' bich bzeeni'gakan zi lat'zə ki gok shgobill na' gashj yel.

¹³Na'ch ni zej chwia' na' benid' to bsia chzob gchoł xan yabana' na' wñeb zillj inlleb, nab:

[‡]8:7 Zi lat'zə ki gokan gashjə: literalmente la tercera parte.

—iNyesh'laz gak che ben' yell-lioka' kat' wkwel anjka' tompetka' zi shon!

9 Na' anjl, ben' gayi'na', bkwelle' trompet che'na', na' ble'id' to belj dii bxop xan yabana' jet'an lo yell-liona'. Na' be'gake'ne' xiinya che yecha' daa bi chiyoll chido nak zitj. ²Na' bsalje' cho'a yecha' daa bi chiyoll chido nak zitj na' bchej lo'inna' llen ka che to gorn xen. Na' llenna' daa bchej lo'inna' bkwashaan wbillla' na' xan yabana'. ³Na' loo llenna' bllesh ba zan inlleb bish'zo na' bliljgakb doxen lo yell-lioni. Na' bene' kwenche gak gad'gakb ka chad' bexjoni'ka'. ⁴Na' bi bi'e latj bi gongakib yix ga'na' daa de yell-lioni, ni tlish' dii nak shi'a shga', ni tlish' yag, san toz ben'ka' bi da' sey che Chioza' loxgue'ka' bzoazi'yaagakb. ⁵Na' bi bi'e latj witgakb legake', san to wzoazi'yaazgakb legake' gay' beo'. Na' gana' god'gakb wlan ka chla gana' chad' bexjoni'na'. ⁶Na' kat'ka' gak dga, ben' yell-lioka' galkall'gake' guetgake' per bi guetgake'; na' selall'gake' bich soagake' per yel' wita' wxonj kwashiin legake'.

⁷Na' bish'zoka' nakgakb ka kabay ba shaj lo wdil. Na' yichjbka' zoa twej dii nak ka corona de or, na' cho'alaobka' nakan ka cho'alao ben'. ⁸Na' yish' yichjbka' nakan ka yish' yichj noolə, na' leybka' nakan ka ley bell. ⁹Na' daa nakw-gakb nakan de ya na' chkweejan kwerp chebka'. Na' xilbka' chongakan sshag inlleb ka ga za' zan kabay ba ngoyo karret dii zej lo wdila'. ¹⁰Na' lo xbambka' zoagakan ka lew bexjoni', na' wchingakban kwenche wzoazi'yaagakb ben' yell-liona' gay' beo'. ¹¹Na' anjla', beena' nak lall' nee yech zitja', chnabi'e bish'zoka', na' dill' hebrewa' lie' Abadón, na' dill' griegona' lie' Apolión, na' zejín Williayi' Williade.

¹²Na' biyoll yel' zak'zi' necha', per ni chyallj zi chopan.

¹³Na'ch anjl, ben' wxopina', bkwel trompet che'na', na' benid' wne to ben' gana' zoa daa nak ka mes de or gana' chzeygake' yala' daa llia ka lozdo'in to to schin daa zoa lao Chioza'. ¹⁴Na' golle' anjl, ben' wxopina', beena' nox' trompeta':

—Bsell anjka' tap, ben'ka' nchej cho'a yao xenna' le Éufrates.

¹⁵Na' bselle' tapte anjka', ben'ka' nzoe' kwenche witgake' ben', na' zi lat'zə ki gok gashjə⁴ ben' yell-liona' betgake'. La' ba nllie' bia' gongake' ka' ka lo gora', lo llana', lo bewaa, na' lo yiza'. ¹⁶Na' benid' nak chop guioa millón soldadka' lliagake' kabay.

¹⁷Na' ki nak kabayka' ble'do'id' na' ben'ka' lliá koll'bka': daa nkweej cho'alcho'eka' nakan dii xna ka yi'na', na'ch de azul ka yaj wan daa le zafiro, na' dii gush ka bishte daa ne' azufre. Na' yichj kabayka' nakgakan ka yichj bell, na' loo cho'abka' chchej yi' dii nchix azufre na'ch llen. ¹⁸Zlat'zə ki gok gashjə⁸ ben' yell-lioka' witgake' ni che shon yel' zi'ki: yi'na', llenna', na'ch azúfrena' diika' bchej cho'a kabayka'. ¹⁹Na' kabayka', bchingakb cho'abka' na' xbambka' kwenche betgakb ben', la' xbambka' nakgakan ka bel, na' yichji daa zoa xbamka' daa nak ka bel bzoazi'yaagakan ben'.

²⁰Na' ben'ka' bi biya gueti diiki, bi biyaj bilengakile' dii malka' chongake', ni bi wlej yichjgake' we'la'ogake' dii xiw'ka' na' diika' nongake' de or, de plat, de bronce, na' de yaj na' de yag, diika' bi chle'i ni bi chengakin, ni bi chak sa'gakan. ²¹Ni bi biyaj bilengakile' daa chitgake' ben', daa nlangake' yel' willa'na', ni daa chnelen ljwellgake', ni daa chzi' chbangake'.

⁴9:15 Zi lat'zə ki gokan gashjə: literalmente la tercera parte.

⁸9:18 Zi lat'zə ki gokan gashjə: literalmente la tercera parte.

Anjla' noxee to yish dii ba biyesh

10 Na'ch ble'id' sto anjl, ben' nap ye'l' wak xen, chetje' yabana' zin-dobe' to bej. Yichje'na' xoa to betyaa, na' cho'alawe'na' chep cheeni'n ka wbilla', na' ni'eka' nakgakan ka be'l' yi' dii chzolla'. ²Na' noxee to yish dii ba biyesh, na' bzoe' ni'e de shlina' lo nisdona' na' de robesaa' bzoe'n lo yell-liona'. ³Na' besyaadie' zillj inleeb ka chosyaa to bell. Na' ka besyee, wne wziwaa gall shii. ⁴Na' ka biyoll wne wziwaa gall shii, na'ch nan wzej' daa wnagakan. Per benid' wne to ben' yabana', na' wne' nad':

—Bi wzejo' daa wna wziwaa, san wlooshawaan loo yichjlall'do'na'.

⁵Na' anjla', beena' ble'id' nzoa ni'ena' tlaa lo nisdona' na' daa zi tlaa lo yell-liona', blis nee de shlina' yabalə ⁶na' bzoe' de taschiw beena' zoa zejli kani, beena' bxe bsil yabana' na' yog'lo' daa llia xaninna', na' yell-lioni na' yog'lo' daa de lawinna', na' nisdona' na' yog'lo' daa lle' lo'inna', na' wne':

—Aga chllach gak daa llia bia' gak.

⁷San kat' wkwell anjl, ben' gállina', trompet che'na', na' yiyoll yido gak yog'lo' daa blia Chioza' bia' gak, kon ka golle' dii ben'ka' wdixjee daa wne' kani'yi.

⁸Na' sto shii benid' shii beena' wne ya-bana', na' wne' nad':

—Wyaj kwit anjla', beena' nzoa ni'ena' lo nisdona' na' lo yell-liona', na' jaxi' yisha' daa noxee.

⁹Na' wya' kwit anjla' na' binabidee yisha'. Na' wne' nad':

—Ni den, wdawan. Na' idawilon' zix sia ka shin basera', per loo li'ona' yiyakan zichj zla'.

¹⁰Na' bikaa yisha' lo na' anjla' na' wdawa'n. Na' bdawidaan zix sia ka shin basera', per ka bidon wdaw' na' biyakan zichj zla' loo li'ana'. ¹¹Na' wne' nad':

—Chonan byen wi'o dill' daa na Chioza' gak che ben'ka' lle' yellka', na' naciónka', na' ben' chne wde wdeli dill', na' ben' wnabia'ka'.

Chop ben' wi'e dill' daa che' Chioza' legake'

11 Na' bene' nad' to ya dii gak wchixid', na' wne':

—Wyaj na' jachix' ka'k' nak yoodo' che Chioza' na' ka'k' nak gana' chzey-gake' yala', na' blab ka'k' ben'ka' choe'la'o Chioza' na'. ²Na' bi wchixo' lesh' chy-oodo'na', la' ba nakan lall' na' ben'ka' bi nombia' Chioza', ben'ka' wlej wshoshj-gake' yell che Chioza' chopiyon beo'. ³Na' wselaa chop ben' wi'e cho'a xtil-laana', na' gakwgake' lech' zeshaa, na' to mil chop guiyoa guiyon lla chixje'gake' daa yepgakee.

⁴Ben'ki chop zaklebgake' chop yag olívoka' na' chop candelera' zoa lao Chioza', beena' nak Xan yell-lioni. ⁵Na' shi no bi goni legake', loo cho'eka' ichej yi' na' wliayi'n ben'ka' chakzbani legake'. Na' ka' kwiai' notteza ben' gakkallee bi gonile' legake'. ⁶Ben'ka' chop napgake' ye'l' wak kwenche bi gak yeja' shlak chixje'gake' daa ye' Chioza' legake'. Na' lekzka' napgake' ye'l' wak yiyongake' nisa' chen, na' gongake' yiya dii wsak'zi'n ben' yell-lioki kon ka'k'to cheengakile'. ⁷Na' kat' yiyoll chixje'gake' cho'a xtil' Chioza', daa nak ka bayix' znia daa ichej loo yecha' daa bi chiyoll chido nak zitz, goxaan legake' na' gonan gan witan legake'. ⁸Na' kwerp che'ka' gat'gakan yawi nez che yell xenna' gana' bda'gake' Xancho Jesucristona' lee yag cruza', daa zaklebi Sodómana' na'ch Egípton'. ⁹Na' ben' wde wdeli yell, na' wde wdeli dia, na' ben' chne wde wdeli dill', na' ben' wde wdeli nación wwiagake' kwerp che'ka' shon lla shgobill, na' bi we'gake' latj no kwwash' legake'. ¹⁰Na' ben'ka' zoa lo yell-lioni yiba yizakgakile' daa ba wit-

gake'. Na' daa le yiba yizakgakile' we' ljuwellgake' dii chiza'lall'gake', la' ben'ka' wdixjee daa goll Chioza' legake' chiya dii bengake' kwenche bsak'zi'gake' legake'.¹¹ Na' ka gok shon lla shgobill, Chioza' bisbane' legake', na' biyagake' sto shii. Na' yog' ben'ka' ble'gakile' legake' le bllebgake'.¹² Na' ben'ki chop bengakile' wne to ben' yabana', chi'e legake':

—Li yiyep nilə.

Na' biyepgake' yabana' to lo bej, chwiate ben'ka' gokzi' gokzbani legake'.¹³ Na' ka chiyepgake' gok to bedxo' xen, na' bchinjan lat' yella', na' wit galla mil ben'. Na' ben'ka' bi wit le bllebgake' na' be'la'ogake' Chioza', beena' llia yabana'.

¹⁴ Na' biyoll yel' zak'zi' de wchopina', per lii za'te de wyonina'.

Bkwelle' trompet de gállina'

¹⁵ Na' anjl, ben' gállina', bkwelle' trompet che'na', na' benid' wne ben' zan zillj inlebb yabana', wnagake':

Yel' wnabia'na' de yell-liona' ba nakan che Xancho Chioza' len Crístona',

beena' wleje' kwenche inabi'e; na' inabi'e zejli kani.

¹⁶ Na' ben'ka' tapichoa, ben'ka' llia lao Chioza', bchek' yichje'ka' axt lo yona', be'la'ogake'ne',¹⁷ nagake':

Chonnto' li' yel' choxken, Chios, ben' liizelozi nap yel' wak choo yel' wak xen, ben' nak Xannto'.

Li'kzan zo' naa, na' li'kzan zo' ka wxe wzil yell-liona', na' zejli kani zo'.

Na' ba wzolo chnabia'leno' yel' wak choo yel' wak xen cho'na'.

¹⁸ Ben'ka' lle' yell-liona' ba bllaa blokgage',

na' ba bllin lla wsak'zi'gako'ne'.

Na' naa gonon yel' joschis che ben' wetka',

na' wi'o daa chido' ben'ka' wdixjee daa gollo' legake',

na' ben'ka' nak lall' no', len ben'ka' chgoo li' balaan,

ka ben' zakii ka ben' bi zakii;

na' wlliyoo ben'ka' chlliyai' ben' yell-liona'.

¹⁹ Na'ch byalj yoodo'na' zoa yabana', na' loo yoodo'na' nla' yiina' gana' lle' yaj taaka' gana' bzej Chioza' diika' blлие' bia' gon ben' Israelka'. Na' wyep yes, na' gok sshag, na' goshj wtin, na' gok to bedxo' wal, na' wche'chga yaj yabana'.

Noola' na' bayixaa nak ba xna

12 Na' xan yabana' ble'id' to dii chonan ka yibanicho. Ble'id' to nool ndobə beeni' che wbillā' le', na' zoa beo'do'na' xni'ena', na' nzoa to corona yichje'na' na' llia shllin belj.² Na' noa' noola' to bdo', na' chosyee daa chllagloe' chaz besa' sane'b'.³ Na'ch bizle'id' xan yabana' sto dii chon ka yibanicho. Ble'id' to bayix' xen inlebb, ba xna, na' llia gall yichjb na' zi shi lozb, na' twej corona zoa to to yichjba'.⁴ Na' bta xbama' bshibb zan beljdo'ka' llia xan yabana', zi lat'zə ki gokan gashj,†† na' bzal'b legakan lo yell-lioni. Na' wze bayixaa lao noola' beena' san, kwenche guebb xiine'na' kate galjb'.⁵ Na' noola' wxane' to bi' byodo', bi'na' inabia' doxen zbii zkaan yell-lioni na' gom' byen wzenaggake' cheb'. Na' Chioza' lii bigoyotie'b' ziyajb' gana' chi'e chnabi'e.⁶ Na' bxonj noola' zeje' gana' bibi chashj chleb, gana' ba nonshao' Chioza' to latj che', na' we'gake' dii gawe' to mil chop guiyoa guiyon lla.

⁷ Na'tech gok to wdil yabana'. Anjl, beena' le Miguel, na' anjlka' ngoo lall' nee wdil-lengake' bayix' xnana'. Na' bayix' xnana', daa nak dii xiwaa, len anjl cheyinka' wdil-lengakan legake',⁸ per bi

** 11:13 Lat': literalmente la décima parte.

†† 12:4 Zi lat'zə ki gokan gashjə: literalmente la tercera parte.

wzogakin gongakan gan. Na' bich bi latj chegakin got' yabana'. ⁹Na' wlejgake' bayix' x̄nana', daa nak bel kani'teyi, daa le dii x̄iw' na' Satanás, daa chziye' doxen yell-lioni. Bzal'gake'n yell-lioni len anjl cheyinka'.

¹⁰Na' benid' wne to ben' zillj inleeb yabana', wne':

—Ba bllin lla bisla Chios chechona' ben' yell-liona', ba bli'e ye! wak choo ye! wak xen che'na' na' ye! wñabia' che'na', na' ye! wñabia' che Crístona', beena' wleje' inabia'lene' txen. La' ba bibejgake' dii xiwaa daa chao xya che ben'ka' nakcho txen, daa chao xya chegake' lao Chios chechona' ka tella ka wal.

¹¹Ba bengake'n gan daa chonlilall'gake' Jesucrístona', Beena' Zaklebi to Xil'do', beena' blalj xchene'na' ni chegake'. Na' bi bllebgabe' be'gabe' xtilleena', san bzani kwingake' guetgabe'. ¹²¡Ka le' zoale yabana', li yiba yizaki! Per ¡nyesh'laz gak chele, le' lle'le yell-liona' na' lo nisdona'! La' dii xiwaa ba betjan gana' zoale na' chllaa chlokan nall inleeb daa nezin bich bi latj xen cheyin de.

¹³Na' ka gokbe'i bayix' x̄nana' ba bzal'gabe'b lo yell-liona', na' blagdob noola' wxan bi' byodo'na'. ¹⁴Na' bzoa Chioza' chop xil noola', ka xil bsia xen, kwenche bxonjile' dii xiwaa na' lljsoe' gana' bibi chashj chleb, gana' ba nonshao' Chioza' to latj che', na' we'gabe' dii gawe' shon yiz yoo gashjə. ¹⁵Na' dii xiwaa, daa nak bayix' x̄nana', bem ka bchej nis zil loo cho'aba' gokan to yao kwenche nan wa'n noola'. ¹⁶Per yell-liona' byaljan kwenche goklenan noola', na' wdeban yawa' daa bchej loo cho'aba'. ¹⁷Na' daa gok ka', bllaa blokchga bayix' x̄nana' noola' na' wyajb jtíl-lem xiin dia che'na' bgaan, ben'ka' chzoa dill' daa nllia Chioza' bia' gongake', ben'ka' zoachech chajle'gabe' cho'a xtil' Jesu-

crístona'. ¹⁸Na' wze bayix' x̄nana' cho'a nisdona'.

Bayixaa bchej loo nisdona'

13 Na' ble'id' bchej loo nisdona' to bayix' llia gall yichjb na' zi shi lozb. Na' to to lozba' zoan twej corona, na' to to yichjba' llian leba' daa zeji chon kwim ka Chioza'. ²Na' bayixaa ble'id', nakb katekzə bell tigr[‡], na' ni'a naba' nakan ka ni'a na' oso, na' cho'aba' nakan ka che bell líón. Na' bayix' x̄nana' be'b leb ye! wak na' ye! wñabia' cheba' kwenche inabia'b. ³To yichj bayixaa zoalejan byaljan to we' daa nan guetib, na' we'na' biyakin. Na' yog' ben' yell-lioka' bibangakile' na' bengake' bayixaa txen. ⁴Na' be'la'ogake' bayix' x̄nana', daa be' ye! wñabia' cheba' bayixaa nak ka bell tigr, na' lekzka' be'la'ogake' bell tigr', nagake':

—Kono zoa sto ka bayixii, na' kono so saki til-lem.

⁵Na' kono bsej blon be'b dill' cha'sibə na' wñeb zban che Chioza', na' wñabia'b chopiyon beo'. ⁶Wñeb zban che Chioza', na' biz ben wñab che', na' che yabana' gana' zoe', na' che ben'ka' zoa yabana'. ⁷Na' gok lo na'b til-lem ben'ka' nak lall' na' Chioza', na' bem legake' gan. Na' lekzka' gok lo na'b inabia'b lao yog'lol ben' za' yog' dia, ben' lle' yog' yell, ben' lle' yog' nación, na' ben' chne wde wdeli dill'. ⁸Na' yog'lol ben'ka' lle' yell-lioni, ben'ka' bi da' leinna' lee libr che Jesucrístona', we'la'ogake' bayixaa. La' kana' wxe wzilte yell-lioni, Jesucrístona', Beena' Zaklebi to Xil'do' daa betgabe'ne', bzeje' lee libr che'na' le yog' ben'ka' gat' ye! mban cheyin zejli kani.

⁹Beena' cheni dga nia', chiya! wzenagyeneen. ¹⁰Beena' wche'gabe' wsejgabe', shajshaze' gatee lillyana'. Na' beena' ba nakan guetile' yesyana',

‡13:2 Bell tigr: literalmente leopardo.

guetshazile'n. Na' daan, ben'ka' nak lo na' Chioza' chiya' soachechgake' gonlilall'gake'ne'.

¹¹Na'tech ble'id' sto bayix' bchejb loo yell-liona' na' llia chop lozb dii nak ka che to xil'do', per chneb ka bayix' xnana'.

¹²Na' wdapb do ka nak yel' wñabia' che bayix' necha', na' ba necha' be'b latj wñabia'b kwenche bem byen yog' ben' lle' yell-lioni be'la'ogake' ba necha', bana' biyaki we' cheba' daa nan guetib'.

¹³Na' lekzka' bana' bchej loo yell-liona' bem yel' wak xen daa benan ka bibani ben', axt bem ka betj yi' xan yabana' bxopan lo yell-lioni chwiate ben' yell-lioka'. ¹⁴Na' ni che yel' wakki gok lo na'b gom gana' llia ba necha', wxiye'b ben'ka' lle' yell-lioni kwenche bzenag-gake' che ba necha', na' bem byen bengake' to lwaa lsak' ba necha' bana' biyaki we' cheba' daa bsalj yesyana'.

¹⁵Na' bayix' wchopina' wdapb yel' wak kwenche wloob bishbe daa nak lwaa lsak' bayix' necha', kwenche gak inen na' gonan ka witgake' yog' ben'ka' bi we'la'o len. ¹⁶Na' lekzka' bem byen yog'lo' ben' sho' nee de shlina' wa loxgue'na' to sen, ka ben' zakii ka ben' bi zakii, ka ben' wni'a ka ben' yesh', ka ben' ndoo lla yel chone' xshin ben' na' ka ben' chon xshinkze'.

¹⁷Na' kono gok wit' wde bi dii de che' wa si'e bi dii chyalljile' shi bi yo'e sen che bayixaa daa nak leb wa número daa zeji leba'. ¹⁸Chyalljicho yel' sin' kwenche shajniicho dga. Beena' shajniile'n na' yiy-iljni'e número che bayixaa daa nak to número che ben'. Na' número' nakan xop guiyoa guiyon xop.

Daa bel ben'ka' to guiyoa tapiyona mil

14 Na' ble'id' Jesucristona', Beena' Zaklebi to Xil'do', zie' lo yaana' le yaa Sión. Na' lene' to guiyoa tapiyona mil ben', na' da' loxgue'ka' le Jesucristona', Beena' Zaklebi to Xil'do', na' le Xe'na'. ²Na'ch benid' to sshag wal za'n

yabana', na' sshaga' nenan ka nen yao xenna' daa chxop cho'a bnanja' na' ka nen kat' chashj chtin. Daa benid', nenan ka shii dii zan arpa dii chsillgake'.

³Na' cholgake' to dii kob lao beena' llia chñabi'a na' lao ben'ka' tap zoa xilin, na' lao ben'ka' tapichoa. Na' koch no ben' yoblə gok gól daa cholgake', san toz ben'ka' nak to guiyoa tapiyona mil, ben'ka' bisla Chioza' ladj ben'ka' lle' yell-lioni. ⁴Ben'kin wdapshii kwingake' na' bi bdi'gake' nool, na' nogake' Jesucristona', Beena' Zaklebi to Xil'do', gattezə zeje'. Na' bisla Chioza' legake' ladj ben' yell-lioka' kwenche gagkake' lo nee na' lo na' Jesucristona'. Na' zaklebgakile' ka to dii nech dii chizi' chilap ben' cho'en Chioza'. ⁵Na' biga bchej dill' wxiye' cho'eka', na' ni to bibi nda' nchengake' lao Chioza'.

Dill' daa be' anjlka' shon

⁶Na' ble'id' sto anjl chzoe' xan yabana', na' chyixji'e dill' wen dii kob che Chioza' daa bi te cheyin lao ben'ka' lle' yell-lioni, ben'ka' lle' yog' naciónka', yog' yell, ben'ka' za' yog' dia, na' ben'ka' chne' wde wdeli dill'. ⁷Na' wñie' zillj inlleb, chi'e:

—Li illeb Chioza' na' li kwee balaan, la' ba bllin lla gone' yel' joschis che to to ben'. Li we'la'o beena' ben yabana' len yell-liona', na' nisdona', na' gana' chal niska'.

⁸Na' no sto anjl le', na' ne':

—Ba wlliyi' Babilóniana', yella' le wzeyi cheyi, yella' gana' wlle' ben'ka' zaklebi noola' chsolli ben' kwenche gonlen ljwellgake' bitez dii zbanka' cheeni beli chen che'ka', daa wlooyel'gake' ben'ka' lle' yog' naciónka' kwenche gongake' dii malka' bengake'.

⁹Na' jano sto anjl legake', ben' wyoni, na' wñie' zillj inlleb, wne':

—Nottezə ben' we'la'o bayixaa na' lwaa lsak'ba', na' wi'e latj sho' sen cheba' loxgue'na' wa neena', ¹⁰yen ile'ile' do ka nak yel' chllaa che Chioza'. Na' sak'zi'e

lo yi' gabiḷa' daa nak ka yina' nchix azúfrena' chwiate ben'ka' nak anjl che Chioza' na' Jesucrístona', Beena' Zaklebi to Xil'do'. ¹¹ Na' llen che yi'na' gana' sak'zi'gake' chasan zejli kani. Na' ben'ka' choe'la'o bayixaa na' lwaa Isak'ba' na' ben'ka' we'gake' latj sho'gake' sen cheba', bibi yeḷ' wixi'lall' gat' chegake' ka tella ka wal. ¹² Na' daa gak ka', ben'ka' nak lall' na' Chioza' na' chozagake' xtillena', na' zoatezi zoagake' chonlilall'gake' Jesúza', chiyal' so sakgakile' daa yen ile'gakile'.

¹³ Na' benid' wne to ben' yabana', na' wne' nad':

—Bzej dga: “Chakomba ben'ka' nak Xancho Jesucrístona' txen, ben'ka' guet naa na' ben'ka' zi' guet ni che'.” Kan' nakan, —na Espiritu che Chioza'—, legaken' yizi'lall'gake' che yog' dii ben ble'gakile', na' yog' dii wenka' bengake' bi gal-lallii Chiozan'.

Chioza' yitope' ben' yell-liona' ka ben' chizi' chilap

¹⁴ Na' bwia' na' ble'id' to bej llyish, na' lo beja' chi' to ben' nake' ka benech. Na' nzoa to corona de or yichje'na' na' noxee to garbat dii nlatit. ¹⁵ Na' bchej sto anjl loo yoodo' che Chioza', na' chosyee zillj inlleb chi'e beena' chi' lo beja':

—Bchin garbata' daa noxoo na' bizi' bilap, la' ba gol' yizi' yilapo' daa de yell-liona'.

¹⁶ Na' beena' chi' lo beja' bizi' bilape' daa de lo yell-lioni.

¹⁷ Na'ch bchej sto anjl loo yoodo' che Chioza' zoa yabana', lekzka' noxee sto garbat dii nlatit. ¹⁸ Na' bchej sto anjl gana' zoa daa nak ka mes de or gana' chzeygake' yala', na' nak lo nee yi'na'. Na' wnie' zillj beena' nox' garbata' daa nlatit, chi'ene':

—Bichogui garbata' noxoo uvana' de yell-liona', la' ba wegakan.

¹⁹ Na' anjla' bichoguile' garbata' uvaka' de lo yell-liona' na' bizi' bilape'n,

na' bleen gana' chsigake'n. Na' zejin Chioza' bitope' ben' yell-lioka' bi nakgake'ne' txen, na' wlo'e legake' gana' sak'zi'gake', gana' yen ile'gakile' yeḷ' chllaa che'na'. ²⁰ Na' ben'ka' zaklebi uvaka', wzak'zi'gake' cho'a yella'. Na' gana' blee legake' wlalj dii zil inlleb xchene'ka' na' wyasan ka to ze cho'a kabaya' na' bliljan shon guiyoa kilómetro.

Anjlka' gall

15 Na' ble'id' yabana' sto dii wal, dii chonan ka yibanicho. Ble'id' gall anjl, ben'ka' nak lall' na'gake' wisgake' zi gall yeḷ' zak'zi'ka' gat' lo yell-lioni kwenche yiyoll yido yeḷ' chllaa che Chioza'.

² Na' lekzka' ble'id' daa nak ka nisdó' de vidr nchixan yi'. Na' ble'id' ben'ka' bizo bizaki bi be'la'ogake' bayixaa na' lwaa Isak'ba' na' bi be'gake' latj sho'gake' sen cheba', zegake' cho'a nisdó' de vidra' na' nox'gake' twej arpa daa be' Chioza' legake'. ³ Na' cholgake' to dii beḷ' dii Moiséza', beena' ben ka cheeni Chioza', na' daa beḷ' Jesucrístona', Beena' Zaklebi to Xil'do', nagake':

Le nak diika' chono' na' chongakan ka chibaninto',

Chios, ben' nak Xannto', ben' yeḷ' wak choo yeḷ' wak xen.

Yog' diika' chono', chono'n ka chiyal', li' nako' ben' wñabia' che yog' ben' yell-lío.

⁴ Biga zoa ben' bi gall illebe' li', Xan'.

Biga zoa ben' bi kwe' li' balaan.

La' tozo' lin' nako' dowalj ben' li ben' shao'.

Na' ben'ka' lle' doxen yell-lioni yidgake' we'la'ogake' li',

daa ble'gakile' diika' chono' nakan shlichá.

⁵ Na' ka biyoll dga, bizle'id' byalj yoodo' che Chioza' yabana', latj gana' yooshao' ley che Chioza' daa bzeje' lee

yaj taaka'. ⁶Na' loo yoodo'na' bchej gall anjl, ben'ka' nak lall' na'gake' wis-gake' gall yel' zak'zi'ka' gat' lo yell-liona'. Nakwgake' twej lech' xtil dii chey cheeni' na' ngoo li'eka' twej bad' de or blinten ka de cho'alcho'eka'te. ⁷Na' to ben'ka' tap, ben'ka' zoa xilinna', bi'e to to anjlka' twej kop de or nangkakan tolla' yel' zak'zi' che Chioza', beena' zoa zejli kani. ⁸Na' loo yoodo'na' gokan tolla' llenna' ni cheyi balaan xen che Chioza' na' yel' wak choo yel' wak xen che'na'. Na' kono gok yiyoo loo yoodo'na' axt ki biyoll bido gallte yel' zak'zi'ka' daa nak lo na' anjlka' gall.

Yel' zak'zi'ka' gall daa yoll loo kopka'

16 Na' benid' wne to ben' zillj inlleb loo yoodo'na', chi'e anjlka' gall:

—Li shaj na' li lljalatj lo yell-liona' yel' zak'zi' che Chioza' diika' yoll loo kopka' gall.

²Na' wyaj anjl necha', jalatje' yel' zak'zi' daa yoll loo kop che'na' lo yell-liona' na' yog'lol ben'ka' yoo sen che bayixaa na' be'la'ogake' lwaa lsak'ba' byaljgake' we' dii wyoll guull' na' wyej wlagake'.

³Na' anjl, ben' wchopina', jalatje' yel' zak'zi' daa yoll loo kop che'na' lo nisdona', na' nisdona' biyakan ka xchen ben' witi yesya, na' wit yog'lol dii de yel' mban cheyin loo nisdona'.

⁴Na' anjl, ben' wyonina', jalatje' yel' zak'zi' daa yoll loo kop che'na' loo yaoka' na' yog' ga chal nis, na' biyakgakan chen. ⁵Na' benid' wne anjla' blalj yel' zak'zi'na' lo nisa', wne':

—Chios, lin' nako' dowalj ben' li ben' shao'. Lin' zo' naa, na' li'kzan zo' ka wxe wzil yell-lioni. Lin' chono' daa nak shlich'a daa ba bchoglo' che ben'ki kon ka chiya'gak. ⁶La' legake' blaljgake' xchen ben'ka' nak lall' no' na' ben'ka' wdixjee daa gollo' legake', na' ba be'gako'ne' chenna' yeejgake', ka chidol'kzə gak chegake'n.

⁷Na' lekzka' benid' wna beena' ze kwit daa nak ka gana' chzeygake' diika' chjwa'gake' lao Chioza', ne':

—Kan' nakan Chios, ben' nak Xannto', ben' yel' wak choo yel' wak xen, li' ba beno' yel' joschis kon ka chiya' gakan.

⁸Na' anjl, ben' wdapina', jalatje' yel' zak'zi' daa yoll loo kop che'na' lo wbilldo'na', na' bzejan ben' yell-liona'. ⁹Na' yog'lolgake' wyejgake' nall inlleb. Per bi biyaj bilengakile' lao Chioza', ni bi be'la'ogake'ne', san wnelgake' zban che' daa bi'e latj chak yel' zak'zi'ka'.

¹⁰Na' anjl, ben' gayi'na', jalatje' yel' zak'zi' daa yoll loo kop che'na' gana' lli'a bayixaa chnabia'b, bana' bchej loo nisdona', na' gok shgasj shchol doxen gana' chnabia'b. Na' ben' yell-lioka' non leb txen wdaoyaa lolleeka' daa le wyej wlagake'. ¹¹Na' wnelgake' zban che Chioza', beena' zoa yabana', daa chey chlagake' ni che we'ka' lliagake', na' bi biyaj bilengakile' dii mala' chongake'.

¹²Na' anjl, ben' wxopina', jalatje' yel' zak'zi' daa yoll loo kop che'na' loo yao xenna' le Éufrates, na' biyeej yao xenna' kwenche gok wde ben' wñabia'ka' za' gana' chla'lə wbill'a.

¹³Na' ble'id' shon dii xiw' dii nak ka bloll. Ton bchej loo cho'a bayix' xñana', na' ston bchej lo cho'a bayixaa bana' be'la'o ben' yell-liona', na' ston bchej loo cho'a bana' chziye' ben', cho'eb dill' daa che' bayixaa sto leb. ¹⁴Na' dii xiw'ki chongakan yel' wak. Na' bchejgakan jatopgakan ben' wñabia'ka' lle' doxen yell-lioni kwenche yiyakgake' toz til-lengake' Chioza', beena' zeelo nap yel' wak choo yel' wak xen, kat' illin lla choo lla xen che'na'. ¹⁵“Li se wneyi, nad' zizaa tokonganzi, ka chon to ben' wban aga no chsi'nile' kat' chjlane'. Chakomba beena' ze wneyi na' nakw xe'na' kwenche bi te gal'yid gal'bel'ze' na' si'e yel' zto'.” ¹⁶Na' dii xiw'ka' btopgakan ben' wñabia'ka' latja' le Armagedón de dill' hebreo.

¹⁷Na' anjl, ben' gállina', blatje' yel' zak'zi' daa yoll loo kop che'na' lo llazə. Na' loo yoodo'na' zoa yabana', gana' llia Chioza' chnabi'e, wnie' zillj, wne':

—Ba gok daa chiya' gak.

¹⁸Na'ch wyep yes, na' gok sshag, na' goshj wtin, na' bnib yell-liona' ni che to bedxo' xen inleeb dii nakch zibia' ka yog' bedxo'ka' ba gok shlak wzoa ben' lo yell-lioni. ¹⁹Na' yell daa le zeyi cheyin gokan shon laalə, na' yellka' lle' yell-lioni wlliyai'gakan. Na' ngoo yichj Chioza' wsak'zi'e Babilóniana', yella' le zeyi cheyin, kwenche ben'ka' lle' na' yen ile'gakile' yel' zak'zi' xen che'na' daa le bshaagake' le'. ²⁰Na' yog' yell-liodo'ka' llia lo nisdə'na' na' no yaaka' binitlogakan. ²¹Na' xan yabana' bxop yaj yaba dii yel' inleeb na' ziigakan wdeli choa kil. Na' ben' yell-lioka' wnelgake' zban che Chioza' ni che yaj yabana' daa gokan to yel' zak'zi' xen inleeb.

**Nool wdana' beena'
llia koll' bayix' xnana'**

17 To anjla', beena' len ben'ka' gall, ben'ka' nox'gake' kopka', bide' gana' zia' na' wne' nad':

—Da, wliid' li' yel' zak'zi'na' ile'i noolə wdana', beena' zaklebi yella' le zeyi cheyin daa llia gana' chde yao zan. ²Ben' wñabia'ka' lle' yell-liona' ba benlengake'ne' txen lo yel' wdana', na' ben'ka' lle' yell-liona' ba lenzgake' nak ka ben' chzoll chniti daa chongake' dii malka' chone'.

³Na' anjla' bchi'e nad' latja' gana' bibi chashj chleb na' Espíritu che Chioza' bene' ka ble'do'id' to noolə llie' koll' to bayix' xna, na' doxem da' dill' daa chne zban che Chioza', na' llia gall yichjb na' zi shi lozb. ⁴Na' noola' nakwe' to lech' de morad na' dii xnalil, na' le nonilen' nchine' or, yaj wan na' perla. Na' noxee to kop de or daa nak tolla' dii zbanka' na' yel' wdana' chone'. ⁵Na' loxgue'na'

da' to lie' daa kono wyajni bin zeyin, na' nan: “Babilóniana', yella' le zeyi cheyin, xaxna' yel' wdana' na' yog'lol' dii zban daa chak doxen lo yell-lioni.” ⁶Na' gokbe'id' wzolli noola' daa weeje' xchen ben'ka' bete', ben'ka' benlilall' Chioza' na' ben'ka' be' cho'a xtill' Jesúsza'. ⁷Na' anjla' wne' nad':

—¿Biche chibanzilo'? Na' inia' li' bi zeji daa ble'ilo' noola' na' bayixaa, bana' llie', bana' llia gall yichjin na' zi shi lozb. ⁸Bayix' xnana' ble'ilo', leban wzoa kani'yi, na' bich zoab naa. Na' wiyedb sto shii ichejb loo yecha' daa bi chiyoll chido nak zitj kwenche kwiayi'b toshizi. Na' ben'ka' lle' lo yell-lioni, ben'ka' bi da' lie'ka' lee libra' gana' da' le ben'ka' de yel' mban chegake' zejli kani kana' zi xe silte yell-lioni, yibangakile' ile'gakile' bayixaa, bana' wzoa kana', na' bich zoab naa, per wibam sto shii.

⁹Nin chyalljicho yel' sin'na' na' yel' chajniina'. Yichjbka' gall, zaklebin gall yaaka' gana' llia noola', ¹⁰na' lekzka' nakgakan gall ben'ka' chñabia'. Gay'gake' bich chñabia'gake', toe' chñabi'e naa, na' beena' sto zi' solo inabi'e. Na' kat' solo inabi'e, xtitzan inabi'e. ¹¹Na' bayixaa, bana' wzoa kani'yi na' bich zoab naa, leban' ben' wñabia' de wxoni'na'. Na' lene' ben'ka' gall, na' ba nakten kwiayi'tekze'.

¹²Na' lozbka' shi, diika' ba ble'ilo', zaklebigakan shi ben'ka' zi' solo inabia', per shlollzan inabia'lengake' bayixaa. ¹³Na' ben' wñabia'ki shi gakgake' toz, na' we'gake' bayixaa yel' wñabia' che'ka'. ¹⁴Na' til'lengake' Jesucristona', Beena' Zaklebi to Xil'do', na' Jesucristona' gone' legake' gan, la' len' Beena' zeelo nak Xan yog'lol' ben', na' Beena' liizelozhi chñabia' lao yog'lol' ben'. Na' ben'ka' zeyjlen le' txen nakgake' ben' wlej Chioza' na' zoachehgake' nonlilall'gake'ne' do yichj do lallgake'.

¹⁵Na' lekzka' wna anjla' nad':

—Yaoka' ble'ilo' gana' llia noolə wdana', zejın ben' zan inleeb, ben' za' yog' yell na' yog' naci3n, na' ben' chne wde wdeli dill'. ¹⁶Na' bayixaa na' ben' wñabia'ka' zaklebi lozba' shi gakzbangakile' nool wdana'. Na' gakgake' txen choonlall'gake'ne' gal'yid gal'belee na' gaogake' xpeleena', na' leyi wzeygake'ne' lo yi'na'. ¹⁷Chioza' ba bzoe' loo yichjlall'do'eka' daa cheenile' gongake', na' gakgake' toz we'gake' ye'l wñabia' che'ka' bayixaa na' yiyoll yido gak daa wna Chioza' gak. ¹⁸Na' noola' ba ble'ilo', len' zaklebi yell daa le zeyi cheyin, yella' chñabia' lao yog'lol ben' chñabia' yell-lioni.

Kwiayi' yell Babil3niana'

18 Ka biyoll ble'id' dga, na'ch ble'id' sto anjl chetje' yabana', na' nsa'chgue' ye'l wñabia' xen inleeb, na' beeni' che'na' bzeeni'n doxen yell-lioni. ²Na' besyaadie' ne':

—iBa wliayi' Babil3niana', yella' le wzeyi cheyi! iBa wliayi'n! Ba biyakan lill xlatjə dii xiw'ka'. Ba biyakan ga lle' lla' chiya dii xiw' na' ga lle' lla' yog'lol ba chda xan yabana' ba nak zban, ba chpani ben'. ³La' yella' wlle' ben'ka' zaklebi noola' chsolli ben' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' ben'ka' lle' yog' naci3nka' len ben'ka' chñabia' le-gake' kwenche gongake' dii malka' bengake'. Na' ben'ka' chit' chde lo yell-lioni biyakgake' ben' wni'a ni che yella' daa chit' chdegake' diika' zeelo chibayi ben'ka' lle' na'.

⁴Na' benid' wne sto ben' yabana', ne':

—Li yichej yell Babil3niana', ka le' nakle lall' na', kwenche bi gonle txen saaxyaka' chongake', na' bi ile'ile' ye'l zak'zi'ka' ile'i ben'ka' lle' na'. ⁵La' saaxyaka' chak yella' nakan dii zan inleeb, na' ngoo yichj Chioza' dii malka'

chongake'. ⁶Ka ba bsak'zi'gake' ben', ka'kzan sak'zi'gake'. Ye'l zak'zi' xench yen ile'gakile' aga ka daa ba bengakile' ben', axt choplə ka daa bchi' bsak'gake' ben' yen ile'gakile'. ⁷Ka to ba be'la'o kwingake' na' ka to ba biba bizakgakile' bengake' daa nazan chegake', ka'kzan illaglogaken' na' kwellyesh'gake' lao ye'l zak'zi' che'ka'. La' loo yichjlall'do'eka' nan: “Ni zoanto' ka ben' wñabia'. Bi naknto' ka ben' ba bzeb na' biga kwellyesh'nto'.” ⁸Na' daa nagake'ka', shllazə yen ile'gakile' ye'l zak'zi'ki: balgake' guet, na' ben'ka' yigaan kwellyesh'gake' na' ibil idongake', na' sheygake' lo yi'na', la' ben' ye'l wak choo ye'l wak xen nak Xancho Chioza', beena' ba bchogloe' chegake'.

⁹Na' ben' wñabia'ka' lle' yell-lioni ben'ka' ben legake' txen bengake' ye'l wdana' na' biba bizakgakile' lawi daa na' beli chen che'ka', kwellyesh'gake' ni che yell Babil3niana' kat' ile'gakile' chasan llenna' daa cheyan. ¹⁰Na' segake' zit'lə daa chllebgake' ye'l zak'zi'na' chllaglo ben'ka' lle' na', na' inagake':

—iNyesh'laz inleeb chak cho', yell Babilonia, li' le zeyi cho' chñabi'o! La' tolbe' ba bla' ye'l zak'zi' cho'ni.

¹¹Na' ben'ka' chit' chde lo yell-lioni lekzka' kwellgake' na' gakyesh'gakile' ni cheyin, la' kochno zoa no si' diika' chit' chdegake', ¹²diika' nak de or, de plat, yaj wan, perla, lech' shao' de lino na' de sed, lech' morad na' dii xnalil, na' biya yagla' dii chl'a' zix, no diika' chongakile' loshj lefantka' na' de yagla' diika' nak mbalaz inleeb, na'ch de ya, na' de yajes. ¹³Na' lekzka' chit' chdegake' canel, clab pimient, yal, set zix, nill' che yag dii chl'a' zix, vino, set, yezj widi, trigo, bayix' ba choa' yoa', xil', kabay na' karret daa chgoyogakb, ga biyollin axt chit' chdetegake' ben' gon xshin ben'. ¹⁴Na' ye'gake' ben'ka' lle' yella':

—Bichbi yel' shao' cheleka' de, diika' bibaile. Ba binit yel' wni'a cheleka' na' bichga ile'ile' dii wen dii shao'ka'.

¹⁵Na' ben'ka' bet' bde chiya diika' bsa'gake' na' bni'agake' daa bet' bde-gake'n yella', zit'lə segake' daa chlleb-gake' yel' zak'zi'na' chllaglo ben'ka' lle' na', na' kwellyesh'gake'. ¹⁶Na' inagake':

—iNyesh'laz inleeb chak che yella' le wzeyi cheyi, gana' gokwgake' lech' shao'ka' nak de lino, na' lech' morad na' dii xnalil, daa da' or, perla na'ch yaj wan! ¹⁷iLa' tolbe' binit yel' wni'a cheyinna'!

Na' yog' ben'ka' chsa' barkwka', na' yog' ben'ka' choogake'n, na' ben'ka' chon llin loo barkwka', na' yog' ben'ka' chon llin lo nisdona' kwenche cheej chao-gake', segake' zit'lə wwiagake'n. ¹⁸Na' ka ile'gakile' chey yella' na' gosyaagake', inagake':

—iBichga zoa sto yell dii zaklebin yelli dga le zeyi cheyin!

¹⁹Na' yillee bishte yona' yichje'ka', leyi kwellyesh'gake', na' gosyaagake' inagake':

—iNyesh'laz inleeb chak che yelli dga le zeyi cheyin! Yog' ben'ka' wdalen barkwka' lo nisdona' bni'alengake' yel' shao' cheyinna'. iNa' tolbe' ba wlliayi'n!

²⁰Ka le' lle'le' yabana', le' nakle lall' na' Chioza', na' ka le' bselee we'le xtilleena', na' ka le' nakle ben' wdixjee daa wna Chioza' le', li yiba yizaki, la' Chioza' ba bizi'e wzonna' daa bchi' bsak'gake' le'.

²¹Na'ch to anjl, ben' wal, blise' to yaj xen inleeb na' bzaleen loo nisdona', na' chi'e:

—Kan' gak che yell Babilóniana' daa le zeyi cheyin, na' bichga llia ile'i ben' len. ²²Bichga yeni ben' chsillgake' árpana', ni ben' chkwel no bllej no trompet lawinna'. Ni bichga soa ben' wlan wde wdeli llin, ni bich gak sshag che yaj molinna'. ²³Bich bi beeni' che yi' kandil gat' lawinna', ni bich bi lni che wishagna' gat' lawinna'. La' ben'ka' bet' bde bi

de cheyin lawinna' gokgake' ben' choo ben' xen yell-lioni, na' ben' Babilóniaka' wxiye'lengake' yel' willa' che'ka' yog' ben' lle' yell-lioni. ²⁴Na' lawinna' betgake' ben'ka' wdixjee daa goll Chioza' legake' len ben'ka' nak lall' nee, na' ndobgakile' yel' wit che yog' ben' ba betgake' doxen lo yell-lioni.

19 Ka biyoll ble'id' diiki, benid' chosyaa ben' zan yabana', nagake':

iWe'la'ocho Chioza'!

Xancho Chioza', beena' chisla ben'ka' nonlilall'gake'ne',

chidolee sho'e balaan' na' inabi'e toshiizi, ²la' len' chone' yel' joschis kon ka chiyal' gakan.

Ba bliiayee yella' daa le wzeyi cheyi.

Yelli zaklebin nool wdana' daa wlooyel'gake' ben' yell-liona' bengake' legake' txen bxinj blengake'.

Ba bizi'e wzon che ben'ka' nak lall' nee, ben'ka' betgake'.

³Na'ch wiznagake' sto shii:

—iWe'la'ocho Chioza'! Ba wlliayi' wllide yella' toshiizi.

⁴Na' ben'ka' tapichoa len ben'ka' zi tap, ben'ka' zoa xilin, bchek' xibe'ka' na' yichje'ka' bllinan axt lo yona' be'la'ogake' Chioza', beena' llia gana' chnabi'e. Na' nagake':

—Kan' nakan. We'la'ocho Chioza'.

⁵Na' gana' llie' chnabi'e benid' wne to ben', na' ne':

Li we'la'o Chios chechona', yog'lol-le le' nakle lall' nee na' chall chlleblene',

ka ben' zakii ka ben' bi zakii.

Yel' wishagna' che Beena' Zaklebi to Xil'do'

⁶Na' benid' shii ben' zan inleeb, na' nenan ka nen to yao xen daa chxop cho'a bnanja' na' ka ga chne to wziw' xen inleeb, nagake':

¡We'la'ocho Chioza'!

Xancho Chios, ben' yel' wak choo yel' wak xenna', ba wzoloe' chnabi'e.

⁷Yiba yizakicho dii xen wal na' koochone' balaan.

La' ba bllin lla wshagna' Beena' Zaklebi to Xil'do'.

Na' ben'ka' nonlilall' le' ba ze kwasgake' chszgake'ne' ka chon noola' llana' wshagnee.

⁸Na' ba bi'e twej xagake' de lech' shao' dii nxi nyech na' chep cheeni'n.

Na' lech' shawaa zaklebin dii wenka' bengake'.

⁹Na' wna anjla' nad':

—Bzej dga: “Chakomba ben'ka' gox wñab Jesucristona' soagake' kat' gak yel' wishagna'na'.”

Na' wne':

—Diikin dill' li che Chioza'.

¹⁰Na' b'chek' xibaa lao anjla' kwenche nan we'lawaane', na' wne' nad':

—¡Bi gono' ka'! La' lezkka' wen llin che Chioza' nad', ka nako' li' na' ka bish' l'jwello'ka', ben'ka' zoachehgake' chajle'gake' che Jesús'a. ¡Be'la'o Chioza'!

La' ben'ka' choe' dill' li che Jesús'a', zoa Espíritu che Chioza' chzajniile' legake' kwenche we'gake' xtillena'.

Beena' llia koll' kabay llyisha'

¹¹Na' ble'id' nyaljə yabana' na' bli'lao to kabay llyish. Na' beena' llie'b lie' Ben' Chon Kon Ka Ne' na' Cho'e Dill' Li. Na' ch'ogloe' che ben' kon ka chidol' gone' chegake', na' chdil'lene' ben'ka' chidol' til'lene'. ¹²Jalawe'na' chzeeni'gakan ka bel' yi', na' nllin yichje'na' dii zan corona. Na' da'n to lie' daa toze' le' nombi'e.

¹³Na' nakwe' to xe' dii nak ka dii wleej chen, na' lie' Cho'a Xtill' Chios. ¹⁴Na' nchi'e wen wdił che'ka', ben'ka' lle' yabana', na' nakwgake' lech' shao' daa nxi nyech, na' kabayka' lliagake' nkgakb ba llyish. ¹⁵Na' chchej cho'ena' to spad dii nlatit kwenche wlliayi'lene'n ben'ka'

lle' yell-lioni. Na' inabi'e legake', na' bi si'xene' che nottez ben' bi chzenag che'. Na' lo yel' chllaa che Chios, ben' yel' wak choo yel' wak xenna', wsak'zi'e legake' gonile' legake' ka chon to ben' chlej chshoshj uvana' kwenche chzin. ¹⁶Lee lechaa nakwe' ka do lee xichje'na' da'n lie'na', nan: “Ben' zeelo nak Xan yog'lol ben', na' Ben' liizelozi chnabia' lao yog'lol ben'.”

¹⁷Na' ble'id' to anjl zie' lo wbilldo'na', na' chosyee, chi'e yog' baka' ze xan yabana':

—Li yidop yillag kwenche yeej gaole to xshe' xen daa ba ben Chioza' chele.

¹⁸Na' gaole xpel' ben' wñabia'ka', na' che ben'ka' ngoo lall' na' wen wdiłka', na' che ben' walka', na' gaole xpel' kabayka' na' che ben'ka' chbiab. Na' gaole xpel' yog'lol ben', ka ben' ndoo lla yel chone' xshin ben' ka ben' chon llin chekze', ka ben' zakii ka ben' bi zakii.

¹⁹Na' ble'id' bayixaa, bana' bchej loo niso'na' len ben' wñabia'ka' chnabia' lo yell-lioni na' wen wdił che'ka' bidop billaggake' kwenche til' lengake' beena' llia kabaya' na' wen wdił che'ka'. ²⁰Na' bex'gake' bayixaa bchej loo niso'na' len bana' chyixjee xtill'ba', bana' ben chiya yel' wak gana' llia bayixaa. Na' daa bem ka' wxiye'b ben'ka' be' latj sho'gake' sen che bayixaa na' be'la'ogake' lwaa lsak'ba'. Na' shi'a shbangakb bzalee chopteb lo yi'na' chalnin daa nchix azúfrena'. ²¹Na' ben'ka' len legakb, beti beena' llia kabaya' legake' spad daa chchej cho'ena', na' yog'lol baka' ze xan yabana' belj blla'gakib xpeleeka'.

Wseje' dii xiwaa' to mil yiz

20 Na' ble'id' to anjl chetje' yabana', na' noxee xiinya che yecha' daa bi chiyoll chido nak zitj na' noxee sto gden xen. ²Na' anjla' bcheje' bayix' xñana', bana' nak bel' kani'teyi, leban dii xiwaa na' Satanáza', na' bcheje'n to mil yiz.

³Na' bzaʔeen ʔoo yecha' daa bi chiyoll chido nak zitj, na' bsejtipe'n kwenche shejan to mil yiz na' bich siye'n ben' yell-lioka'. Ka yiyoll gak to mil yiz na' yiselle'n xtit.

⁴Na'ch ble'id' gana' llia ben'ka' gok lo na'gake' gongake' ye'l' joschisa'. Na' ʔekzka' ble'id' ben'ka' bʔhoggake' yene'ka' ni cheyi daa be'gake' xtil' Jesúza' na' cho'a xtil' Chioza'. ʔegaken' bi be'la'ogake' bayixaa bchej ʔoo nisdona' ni bi be'gake' latj ta' sen cheba' loxgue'ka' wa neeka'. Na' bibangake' sto shii na' wʔnabia'lengake' Crístona' to mil yiz. ⁵ʔegaken' ben' nechka' yiban ladj ben' wetka'. Na' ben' wetka' sto, ka biy-ollch bza' de to mil yiza' bibangake'. ⁶Chakomba ben'ka' yiban nech ladj ben' wetka', ʔa' ben'kan' nak lall' na' Chioza'. Na' bi ile'gakile' ye'l' wit wchopina', san gagkake' bʔox che Chioza' na' che Crístona' na' inabia'lengake'ne' to mil yiz.

⁷Kat' yiyoll iza' de to mil yiza', yiselle' Satanáza' gana' ncheje'n. ⁸Na' tan siye'n ben'ka' lle' tap ʔaate yell-lioni, ben'ka' zaklebgake' ben'ka' lle' yellka' le Gog na' Magog, na' wtopan ʔegake' kwenche shajlengake'n lo wdila', na' gagkake' ben' be ben' zil ka yoxa' chi' cho'a nisdona'. ⁹Na' bllesh bcheengake' doxen lo yell-lioni na' wye'chjgake' yella' daa ʔe chaki Chioza', gana' lle' ben'ka' nak lall' nee, nan wlliy-ayi'gake' ʔegake'. Per Chioza' bʔetje' yi'na' xan yabana' bisya bisʔenan ʔegake'. ¹⁰Na' bzaʔee dii xiwaa, daa wxiye'n ʔegake', lo yi' gabiʔa' daa nchix' azúfrena', gana' bzaʔee bayixaa bchej ʔoo nisa' na' bana' wdixjeeb xtil'ba'. Nan' illaglogakan ye'l' zak'zi'na' ka tella ka wal' zejli kani.

Chioza' gone' ye'l' joschis che ben' wetka'

¹¹Na' ble'id' gana' llia Chioza' chʔabi'e, nakan to dii llyish na' to dii xen. Na'

lawe'na' binitlo yell-lioni len yabana', na' koch no ble'i ʔegakan. ¹²Na' ble'id' ben' wetka', ka ben' zakii na' ka ben' bi zakii, zegake' lao Chioza' gana' llie' chʔabi'e. Na' bsalje' librka', na'tech bsalje' sto libr yoblə gana' da' le ben'ka' de ye'l' mban cheyin zejli kani. Na' bene' ye'l' joschis che ben' wetka' kon ka choe' librka' dill' ben to toe'. ¹³Na' biban yog' ben'ka' wit ʔoo nisdona', na' ben' wetka' lle' latj che ye'l' wita' gana' le Hades,[¶] na' yog'ʔolgake' gok ye'l' joschis che'ka' kon ka ben to toe'. ¹⁴Na'ch ʔekzka' bzaʔ' Chioza' ye'l' wita' na' latja' le Hades lo yi' gabiʔa'. Na' lo yi' gabiʔan' nakan ye'l' wit wchopina'. ¹⁵Na' bzaʔee lo yi' gabiʔa' ben'ka' bi da' lie'ka' lee libra' gana' da' le ben'ka' de ye'l' mban cheyin zejli kani.

To yaba kob na' sto yell-lio kob

21 Na'ch ble'id' to yaba kob na' sto yell-lio kob, ʔa' yaba necha' na' yell-lio necha' binitlogakan na' ʔekzka' nisdona'. ²Na' ble'id' yell che Chioza', yell koba' le Jerusalén chetjan yabana' gana' llia Chioza'. Ba none'n xochi ka to noolə ben' ba nakwe' xe'na' kwenche wshagna'lene' ben' che'na'. ³Na' gana' llia beena' chʔabia', benid' wne to ben' zillj inleeb, ne':

—Chioza' ba zoe' ladj ben' yell-lioka' ʔaa. Na' soalene' ʔegake', na' gagkake' yell che', na' kwinn Chioza' soalene' ʔegake' na' we'la'ogake'ne'. ⁴Na' gone' ka bich gat' daa gonyeshiin ʔegake'. Bich bi ye'l' wit gat', ni kochno kwell, ni koch no gakyeshii, ni koch no shey ʔa, ʔa' ba wde che yog' diika' got' lo yell-lio necha'.

⁵Na' beena' llia gana' chʔabi'e wne' nad':

—Nadaan chikob' yog'ʔolte.

Na' ʔekzka' wne' nad':

—Bzej dill'ki, ʔa' nakgakan dii ʔi na' nakgakan dii gak wxenilall' ben'.

⁶Na' lekzka' wne' nad':

—Ba gok daa chiyal' gak. Nadaan zaklebid' letr necha' le A^{§§} daa ba zoakz' ka wxe wzil yell-lioni, na' daa zoakz' kat' te cheyin zaklebid' letra' chiyollin daa le Z.* Nad'kzan bxe bsil' yog'lol' dii de, na' nad'kzan gon' ka te chegakin. Na' beena' chbili, wi'ane' nis daa nsa' yel' mbanna' na' bibi sakile'n. ⁷Beena' so saki soacheche' gonlilallee nad', gaki che' dii wen dii shao' daa ba wnia' gaki che', na' nad' gak Chios che' na' le' gake' bi' cha'. ⁸San ka nak ben'ka' blleb gon nad' txen, na' ben'ka' bi wyajle' cha', na' ben'ka' chongake' daa chakzbanid', na' ben' wen xyaka', ben'ka' chnelen ljwellin, ben'ka' nlan yel' willa'na', ben'ka' choe'la'o yaj yagka', na' yog'lol' ben' wxiye'ka', legaken' chidol'gake' shajgake' lo yi' gabi'la' daa nchix' azufrena', na' lennan' yel' wit wchopina'.

Yell Jerusalénna' daa nak dii kob

⁹Na' gana' zia' bid to anjl beena' len anjlka' gall, ben'ka' nox' gall kopka' nakgakan tolla' yel' zak'zi'ka' zeelo, na' wne' nad':

—Da, wliid' li' xool Beena' Zaklebi to Xil'do'.

¹⁰Na' Espiritu che Chioza' bene' kwenche wyaalen' anjla' to lo yaa xen na' dii sibə, na' bliile' nad' yell Jerusalénna' daa nak yell che Chioza', chetjan yabalə gana' zoe'. ¹¹Na' yella' chey cheeni'n daa yoon yel' chey cheeni' che Chioza', na' chna'titan ka to yaj wan daa zakii daa le jaspe, daa chep yes ka vidr. ¹²To zee xen dii sibə nechjan yella' na' zoan shllin puert xen, na' to to cho'a puertka' ze twej anjl. Na' lekzka' to to lee puertka' llia le tkwen dia che dii Israela'. ¹³Na' tap laate zeena' nechj

yella' zoan shon wej puertka'. ¹⁴Loo len zee xenna' nechj yella' yoon shllin yaj, na' da'gakan le shllinte postl che Jesucristona', Beena' Zaklebi to Xil'do'.

¹⁵Na' anjl, beena' bshaljlene' nad', noxee to dii nak ka xis de or kwenche wchixile'n yella' len puertka' na'ch zee daa nechjan. ¹⁶Na' yella' toz ka nakan de tonlə na'ch de zlag'lə. Na' bchix anjla' yella' na' nakan chop mil chop guiyoa kilómetro, na' toz ka nakan ka de tonlə, ka de siblə, na'ch ka de zlag'lə. ¹⁷Na'ch bchixe' zeena' na' chillan to guiyoa tapiyon llit.† Kon ka chchixə not-tezə ben', ka'kzə bchix anjan'.

¹⁸Na' zeena' daa nechj yella' nakan de yaj wan daa le jaspe, na' yella' nakan de or dowalj daa chep yes ka vidr. ¹⁹Na' yajka' yoo loo len zeena' nakan xochi, nakan de biya yaj wan. Dii necha' nakan yaj wan daa le jaspe, de wchopina' nakan yaj wan daa le zafiro, de wyonina' nakan yaj wan daa le ágata, de wdapina' nakan yaj wan daa le esmeralda, ²⁰de gayi'na' nakan yaj wan daa le ónice, de wxopina' nakan yaj wan daa le cornalina, de gállina' nakan yaj wan daa le crisólito, de wxoni'na' nakan yaj wan daa le berilo, de gayina' nakan yaj wan daa le topacio, de shiyina' nakan yaj wan daa le crisoprasa, de shnejina' nakan yaj wan daa le jacinto, na'ch de shllinina' nakan yaj wan daa le amatista. ²¹Na' puertka' shllin nakgakan shllin perla, to to puertka' nakan de toz perla. Na' nez daa chde yella' nakan de or dowalj daa chep yes ka vidr.

²²Na' ni to yoodo' bi ble'id' yella', la' kwin Xancho Chioza', beena' nak liizelozi ben' yel' wak choo yel' wak xen, len Jesucristona', Beena' Zaklebi to Xil'do', zoagake' ladj ben'ka' lle'

§§21:6 Letr necha' le A: de dill' griegona' letri len alfa.

*21:6 Letra' chiyollin daa le Z: de dill' griegona' letri len omega.

†21:17 To guiyoa tapiyon llit: nakan ka do guiyon gay' metr.

na'. ²³Na' yella' bi byalljin wbillla' ni beo'do'na' kwenche wzeeni'gakan lawinna', la' ye'l' chey cheeni' che Chioza' na' che Jesucristona', Beena' Zaklebi to Xil'do', chzeeni'n lawinna'. ²⁴Na' ben'ka' za' doxen lo yell-liona' soagake' lao beeni' che Chioza' de yella'. Na' ben'ka' chnabia' yell-lioni wsa'gake' ye'l' zakii che'ka' na' balaan che'ka' yella'. ²⁵Na' puertka' zoa yella' toshiizi iyalgakan, la' bichbi wal' gat' na'. ²⁶Na' yisa'gake' yella' do ka nak balaan na' ye'l' zakii che nació'na'. ²⁷Na' biga sho' ni to dii nda' nchen dii mal, ni nottez ben' chon dii chakzbani Chioza', ni ben' chziye', san toz ben'ka' da' lie'ka' lee libr che Beena' Zaklebi to Xil'do', gana' da' le ben'ka' de ye'l' mban cheyin zejli kani.

Yao daa nsa' ye'l' mbanna'

22 Na' bli'yi anjla' nad' to yao dii nxi nyech yollan nis daa nsa' ye'l' mbanna', na' nakan nis xtil inleeb ka'kzə vidr. Na' chchejan gana' llia Chioza' chnabi'e len Jesucristona', Beena' Zaklebi to Xil'do', ²na' chden gcho'l' neza' daa chde yella'. Na' chop laate cho'a yawa' zoa yagka' nsa' ye'l' mbanna', na' ze tbeo' wej chbiagakan dii zixka', na' shllin shii chbiagakan twiz. Na' xlaguinka' nakgakan bell rmech che ben' yell-lioka'. ³Na' bibi daa nashj bia' blag' cheyin gat'ch yella', la' nan' kwia Chioza' inabia'lene' Jesucristona', Beena' Zaklebi to Xil'do'. Na' yog' ben'ka' lle' na' we'la'ogake'ne'. ⁴Na' ile'gakile'ne' kon ka nakyenee, na' ta' lie'na' loxgue'ka'. ⁵Aga bich bi wal' gat', ni bich bi yi' kandil iyalljgakile' ni beeni' che wbilldo'na', la' beeni' che Xancho Chioza' wzeeni'n gana' soagake', na' inabia'gake' zejli kani.

Ba zoa yila' Jesucristona'

⁶Na' wna anjla' nad':

—Dill'ki nakgakan dii li na' nakgakan dii gak wxenilall' ben'. Xancho Chioza', beena' chxoa xtillena' cho'a loll' ben'ka' chyixjee daa chi'e legake', ba bselee nad' nak' anjl che' kwenche wliid' ben'ka' nak lall' nee daa ba zoa gaoshosh gak.

⁷—iBa zoa gaoshosh yiyed'!

Chakomba beena' ze wneyi dill'ki llia lee libri cheyi diika' ba wna Chioza' gak.

⁸Nad', Juan, ben ble'id' diiki. Na' ka biyoll ben ble'ida'n, bchek' xib' nan we'lawaa anjla', beena' bli'yi nad' diika'.

⁹Na' le' wne' nad':

—iBi gono' ka! Nad' nak' wen llin che Chioza' ka li' na' ka bish' ljwello'ka', ben'ka' cho'e cho'a xtill' Chioza', na' ka yog' ben'ka' zegake' kwent wneyi daa llia lee libri. Toz Chiozan' chiya'l' we'lawoo.

¹⁰Na' lekzka' wne' nad':

—Bi wkwashoo dga ba bzejo' lee libri, dga chyixje'n che diika' wna Chioza' gak, la' ba zoa gaoshosh gakan. ¹¹Ben' mala' shajlenshaze' dii mala' chone', na' beena' nda' nchen saaxyana' shajlenshaze' saaxya che'na'; na' ben' wenna' soatezi soe' gone' wen, na' beena' nak lall' na' Chioza' soatezi soe' gonche' daa cheeni Chioza'.

¹²—iBa zoa gaoshosh yiyed'! Na' wi'a daa chidol' to to ben' kon ka nak daa ben to toe'. ¹³Nadaan zaklebid' letr necha' le A[‡] daa ba zoakz' ka wxe wzil yell-lioni, na' daa zoakz' kat' te cheyin zaklebid' letra' chiyollin daa le Z,[¶] Nad'kzan bxe bsil' yog'lol' dii de na' nad'kzan gon' ka te cheyin.

¹⁴Chakomba ben'ka' chnabgakile' nad' yixis yiyib' yichjlall'do'eka', kwenche idol'gake' gaogake' dii zixa' llia lo yaga' daa nsa' ye'l' mbanna', na' sho'gake' cho'a

[‡]22:13 Letr necha' le A: de dill' griegona' letri len alfa.

[¶]22:13 Letra' chiyollin daa le Z: de dill' griegona' letri len omega.

puert che yella'. ¹⁵San bi gak sho' ben' malka', ben'ka' nlan yel' willa'na', ben'ka' chnelen ljwellin, ben' wen xyaka', ben'ka' choe'la'o lwaa lsak' diika' non chios che-gake', na'ch yog' ben'ka' chibayi siye'.

¹⁶Nad', Jesús, ba bselaa anjl cha'na' kwenche bzajniile' li' diiki ba bzejo' na' wi'on dill' lao ben'ka' chdop chllag choe'la'ogake' nad'. Nad' nak' xiin dia che dii Davina', na' zaklebid' belj xsila' daa chna'tit.

¹⁷Na' Espíritu che Chioza', na' cho' zaklebisho noola' wshagna'lene' Jesucristona' daa nonlilall'chone', che'chone':

—¡Bida!

Na' beena' yeni dill'ki yeene':

—¡Bida!

Nottez' ben' chbili, wak yide' na' yeeje' nisa' daa nsa' yel' mbanna', na' aga bi sakile'n.

¹⁸Nad' chsi'nid' yog' ben' yeni dill'ki llia lee libri cheyi diika' wna Chioza' gak: Shi no chixoatelə cheyin lo dill'ki, Chioza' wdie'ne' lao yel' zak'zi'ka' ba bzetje' lee libri. ¹⁹Na' shi no yikwas bal dill'ki llia lee libri cheyi diika' wna Chioza' gak, Chioza' bi wi'e latj gawe' dii zixa' llia yaga' daa nsa' yel' mbanna', ni bi wi'e latj sho'e yell che'na', diiki choe' libri dill' cheyin.

²⁰Jesúza', beena' bzajni nad' diiki, ne':

—Dii li, ba zoa gaoshosh yiyed'.

Kan' nakan. ¡Bidagach, Xan' Jesús!

²¹Na' yel' goklen che Xancho Jesucristona' soalenshgan yog'loltele. Kan' gakan.